

# DIŽA' GÜEN ÇHE XANCHO JESUCRISTO

EL NUEVO TESTAMENTO  
DE NUESTRO SEÑOR JESUCRISTO  
en el zapoteco de San Bartolomé Zoogocho



**La Liga Bíblica**

*Las Sagradas Escrituras para Todos*

El Nuevo Testamento  
en el zapoteco de San Bartolomé Zoogocho  
La Liga Bíblica 3C primera edición 1987 [zpq]  
La Liga Bíblica versión electrónica 2009

Publicado por  
© La Liga Bíblica 1987

Se permite copiar, distribuir y comunicar públicamente esta obra bajo las siguientes condiciones:

- Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- No comercial. No puede utilizar esta obra para fines lucrativos.
- Sin obras modificadas. No se puede alterar, transformar o generar una obra a partir de ésta.

## ACLARACIONES SOBRE EL ALFABETO ZAPOTECO DE ZOOGOCHO

La mayoría de las letras con las cuales se escribe el idioma zapoteco son las mismas letras con las que se escribe el español, pero ha sido necesario añadir otras letras para simbolizar todos los sonidos del zapoteco.

La letra **j** simboliza un sonido distinto al de esta letra en español. Se usa para escribir palabras como: **jed** *gallina*, **vej** *pedra*, **neje** *ayer*.

La letra **š** (que también se escribe *ś*) se usa para escribir palabras como: **ša'** *cazuela*, **yiš** *papel*, **yeše'** *aguja*.

La letra **ž** (que también se escribe *ź*) se usa para escribir palabras como: **ža** *día*, **yež** *pueblo*, **liže'** *su casa*.

La letra **x** simboliza un sonido muy distinto al de esta letra en español. Se usa para escribir palabras como: **xela'** *mis huaraches*, **loxe'** *su barba*, **yox** *arena*.

En palabras en que una **l** va seguida de otra, no se pronuncia como la **ll** del español, sino que se pronuncia dos veces el sonido de **l**, con excepción de unas cuantas palabras tomadas del español, como *millón*. Por ejemplo, **xelle** *los huraches de Uds.*, **bille** *la hermana de Uds.*, **cholle** *Uds. cantan*.

Existen varias combinaciones de consonantes con **w**, las cuales son: **gw**, **cw**, **jw**, **yw**, **chw**, **tw**, **dw**, **šw**, **rw**, y **ñw**. Estas sirven para escribir palabras como: **gwtasa'** *dormí*, **yegw** *río*, **cheyacw** *xacho nos vestimos*, **bejw** *nube*, **mechw** *dinero*, **bitw** *epazote*, **yešw** *frito*.

En zapoteco hay dos clases de sonidos que pueden clasificarse en suaves y fuertes. Algunos sonidos suaves y fuertes se escriben con la misma letra, pero se diferencian subrayando el sonido fuerte:

<u>Suaves</u>		<u>Fuertes</u>	
<b>ch</b>	<b>cho'a</b> <i>boca</i>	<b><u>ch</u></b>	<b><u>choa</u></b> <i>cuarenta</i>
<b>x</b>	<b>xa'</b> <i>mi ropa</i>	<b><u>x</u></b>	<b><u>xa'</u></b> <i>mi papá</i>
<b>l</b>	<b>le'</b> <i>tú</i>	<b><u>l</u></b>	<b><u>le'</u></b> <i>él</i>
<b>n</b>	<b>nis</b> <i>agua</i>	<b><u>n</u></b>	<b><u>ni</u></b> <i>'a mis pie</i>

En otros casos de sonidos suaves y fuertes, el sonido fuerte no se subraya, sino se escribe con otra letra:

<u>Suaves</u>		<u>Fuertes</u>	
<b>b</b>	<b>bitw</b> <i>epazote</i>	<b>p</b>	<b>pita'</b> <i>arco iris</i>
<b>d</b>	<b>do</b> <i>mecate</i>	<b>t</b>	<b>to</b> <i>uno</i>
<b>g</b>	<b>go</b> <i>camote</i>	<b>c</b>	<b>cobe</b> <i>nuevo</i>
<b>z</b>	<b>zin</b> <i>palma</i>	<b>s</b>	<b>sina'</b> <i>sabio</i>
<b>ž</b>	<b>žit</b> <i>hueso</i>	<b>š</b>	<b>ši</b> <i>diez</i>

Las vocales sencillas, **a**, **e**, **i**, **o**, **u**, se usan para escribir palabras como: **ga** *nueve*, **yi** *hinchazón*, **de** *ceniza*, **yo** *tierra*.

Las vocales cortadas, **a'**, **e'**, **i'**, **o'**, se usan para escribir palabras como: **ga'** *verde*, **yi'** *lumbre*, **be'** *viento*, **cho'** *tos*.

Las vocales quebradas, **a'a**, **e'e**, **i'i**, **o'o**, se usan para escribir palabras como: **da'a** *petate*, **zi'i** *pesado*, **ne'e** *su brazo*, **yo'o** *casa*.

# Índice

San Mateo .....	1
San Marcos .....	68
San Lucas .....	107
San Juan .....	175
Hechos .....	223
Romanos .....	288
1 Corintios .....	318
2 Corintios .....	346
Gálatas .....	363
Efesios.....	374
Filipenses .....	384
Colosenses.....	391
1 Tesalonicenses .....	398
2 Tesalonicenses .....	404
1 Timoteo .....	408
2 Timoteo .....	417
Tito .....	423
Filemón.....	427
Hebreos.....	429
Santiago .....	452
1 Pedro .....	460
2 Pedro .....	469
1 Juan.....	474
2 Juan.....	481
3 Juan.....	483
Judas.....	485
Apocalipsis.....	488



# DIŽA' GÜEN DAN' BZOJ SAN MATEO

---

## Ḫoxxtao' Jesucriston'

(Lc. 3:23-38)

**1** Nga nyoj la bene' gosac ḫoxxtao' Jesucriston' chzolaon len da' ḫoxxta' ocho Abraham. Le Jesús'en goque' xi'in diaža che da' David, na' da' Davin' goque' xi'in diaža che da' Abrahanna'.

<sup>2</sup>Abrahanna' goque' ḫa Isaac, na' Isaaquen' goque' ḫa Jacob, na' Jacoben' goque' ḫa Judá len yezica'chle bene' biše' ca'. <sup>3</sup>Judán' na' Tamar gosaque' ḫaxna' Fares na' Zara. Na' Faresen' goque' ḫa Esrom, na' Esronna' goque' ḫa Aram.

<sup>4</sup>Na' Aranna' goque' ḫa Aminadab, na' Aminadaben' goque' ḫa Naasón, na' Naasónna' goque' ḫa Salmón.

<sup>5</sup>Salmónna' na' Rahab gosaque' ḫaxna' Booz. Na' Boozen' na' Rut gosaque' ḫaxna' Obed. Na' Obeden' goque' ḫa Isaí. <sup>6</sup>Na' Isaín' goque' ḫa rey David, na' rey Davin' goque' ḫa Salomón. Na' xna' Salomónna' goque' xo'ol da' Urías cate' za' yeca'a rey Davin' le' par gaque' xo'ole'.

<sup>7</sup>Na' Salomónna' goque' ḫa Roboam, na' Roboanna' goque' ḫa Abías, na' Abíasen' goque' ḫa Asa.

<sup>8</sup>Na' Asan' goque' ḫa Josafat, na' Josafaten' goque' ḫa Joram, na'

Joranna' goque' ḫa Uzías. <sup>9</sup>Uzíasen' goque' ḫa Jotam, na' Jotanna' goque' ḫa Acaz, na' Acazen' goque' ḫa Ezequíás. <sup>10</sup>Na' Ezequíásen' goque' ḫa Manasés, na' Manasésen' goque' ḫa Amón, na' Amónna' goque' ḫa Josías. <sup>11</sup>Josíasen' goque' ḫa Jeconías len yezica'chle biše' ca' gosenita' ca' tiemp caten' bene' Babilonia ca' gosezene' bene' Israel ca' na' goseche'ḫoxje' legaque' Babilonian'.

<sup>12</sup>Gwde goc ca', golje Salatiel xi'in Jeconíasen'. Na' Salatielen' goque' ḫa Zorobabel. <sup>13</sup>Na' Zorobabelen' goque' ḫa Abiud, na' Abiuden' goque' ḫa Eliaquim. Na' Eliaquinna' goque' ḫa Azor. <sup>14</sup>Na' Azoren' goque' ḫa Sadow, na' Sadoquen' goque' ḫa Aquim. Aquinna' goque' ḫa Eliud. <sup>15</sup>Na' Eliuden' goque' ḫa Eleazar, na' Eleazaren' goque' ḫa Matán. Na' Matánna' goque' ḫa Jacob. <sup>16</sup>Nach Jacoben' goque' ḫa José ben' goc bene' che María. Na' Marían' goque' xna' Jesús ben' nzi' Cristo, zeje diža' ben' gwlej Diosen' cont yedenabi'e.

<sup>17</sup>Na' gwzolaon tiemp che da' Abraham bžinte tiemp che da' David gosac žta' diaža chen', na' ca' tiemp che da' David bžinte ca' tiemp caten' gosezene' bene' Israel

ca' goseche'xoxje' legaque' Babilonia,  
lecze gosac yežta' diaža chen', na'  
ca tiempen' bžinten ca žan' golje  
Criston' ben' gwlej Diosen' cont  
yedenabi'e, gosac yežta' diaža chen'.

### Can' goc cate' golje Jesucriston'

(Lc. 2:1-7)

<sup>18</sup>Na' quingan' goc cate' golje  
Jesucriston'. Ba naquen gwšagna'  
Marían' len José, na' za' ca'a Josén'  
le' par gague' xo'ole' cate' gocbe'ede'  
ba noa' Marían' bdao'. Goc ca'  
dan' ben Spiritw che Diosen' cont  
bchendao' bdao'na' lo' le'e. <sup>19</sup>Na'  
Joséna' ben' ba naquen si'e Marían'  
par gague' xo'ole', goque' to bene'  
ben da' güen lao Diosen'. Na' bene'  
xbab cuejyichje' Marían' šizize cont  
nono gačbe'e na' cont bi gwsie' le'  
zto'. <sup>20</sup>Šlac chone' xbab gone' ca'  
gwtaše' na' to angl bene' gwsela'  
Xancho Diosen' blo'elagüe' le' lo  
bišgal. Na' gože' le':

—José, le' goljo' lo diaža che da'  
rey David. Bitw žebo' si'o Marían'  
par gague' xo'olo'. Spiritw che  
Diosen' benen cont no'e bdao'na'.

<sup>21</sup>Na' sane' to bi' byo dao' na'  
gwsio labe' Jesús, le len' yequ'e'  
xtola' bene' gualaž che' ca' bene'  
yesejnilaže'ne'.

<sup>22</sup>Goc yogo' da' ca' cont goc can'  
gwna Diosen' dan' bzoj to ben' be'e  
xtižen' cani', gwne':

<sup>23</sup>To no'ol güego' no'ole ne'  
napšičhgua cuine' güe'e to bi'  
byo dao' na' sane'be'.

Na' si' labe' Emanuel.  
Na' Emanuel zeje diža': Diosen'  
zoacze' len chio'.

<sup>24</sup>Na' cate' beban Josén' beyož  
gwñede' yelen', bene' can' gož

angl che Xancho Diosen' le', jaxi'e  
Marían' liže' par goque' xo'ole'.

<sup>25</sup>Perw bi gwzoalene' le' ca xo'ole'  
san gwzoacze' le' respetw bžinte  
ža gwxane' to bi' byo dao', xi'ine'  
nechw. Na' gwxi' labe' Jesús.

### Magos ca' jaseñe'e Jesúsen'

**2** Ca tiempen' cate' gwnabia'  
rey Herodes, golje Jesúsen'  
Belén, to yež gan' mbane distritw  
Judea. Na' besežin to čhope magos  
Jerusalén, za'aque' to nación  
zito' dan' chi' do ga chla' gwbiž.

<sup>2</sup>Na' gosenabde' bene' lo ciudan'  
gose'ene':

—¿Gan' rey che bene' Israel, ben'  
ba golje? Nezeto' ba golje', le ba  
ble'eto' beljw chen' cate' blan' lažto'  
dan' zoa gan' chla' gwbiž. Na' za'to'  
gonxento'ne'.

<sup>3</sup>Cate' gwñeze rey Herodesen'  
can' gosenen', gocchgüe' tole, na'  
lecze ca' yogo'lol bene' lo ciuda  
Jerusalénna'. <sup>4</sup>Nach reyna' btobe'  
yogo'lol bxož gwnabia' che chio'  
bene' Israel na' lecze yogo' bene'  
ca' chososed chosolo'e dan' bzoj da'  
Moisésen'. Na' gwñabde' legaque'  
gan' naquen galje Criston' ben' gwlej  
Diosen' cont yedenabi'e. <sup>5</sup>Nach gose'  
bene' ca' Herodesen':

—Galje' Belén, gan' mbane distritw  
Judea, le can' ža dan' bzoj to bene'  
be' xtiža' Diosen' cani'. Quinga žan:

<sup>6</sup>Ca nac yež Belén gan' že' diaža  
che da' Judá,  
nacczen yež da' zaca'chgua lao  
yež gwnabia' ca' zjachi' Judean'.  
Le to bene' Belén gague' bene'  
gwnabia',  
na' le' güia ne'e nación Israel  
čhian'.



<sup>7</sup>Nach Herodesen' goxe' magos ca' bagaše'ze cont ja'aque' lagüen' na' gwnabde' legaque' batyañen' besele'ede' bla' beljon'. <sup>8</sup>Nach gwsele' legaque' Belénna', gože' legaque':

—Le šja'ac na' le šjaydiljw bidaon'a' tcho'a. Na' cate' yeže'elebe' le yeda yedyedixjue'ele neda' cont lecze ša'a šjxenena'be'.

<sup>9</sup>Beyož bosozenag magos ca' can' gož reyna' legaque', nach gosa'aque'. Na' beljon' dan' besele'ede' do gan' chla' gwbižen' cate' bina' yesa'ac lažgaquen', zejen le'e yaban' žialaon laogaque' bžinten yo'o gan' zoa bidaon'a', na' gwlezen. <sup>10</sup>Na' magos ca' besyebede' juisyw cate' besele'ede' beljon' da' yoble. <sup>11</sup>Nach cate' besežine' yo'o gan' zoa bidaon', goso'e lo' yo'ona' na' besele'ede' bidaon'a' len xna'be' Marían'. Nach bosozoa xibgaque' gosonxene'be'. Na' gosaljo caj čhegaquen' gosebeje' oro, yal na' to nechw da' chla' zix da' nzi' mirra na' gosoen' čhebe'. <sup>12</sup>Na' šlac ne' nita' magos ca' Belénna', Diosen' gwdixjue'ede' legaque' lo' bišgal bich yesyedie' gan' zoa rey Herodesen'. Da'nana' besyequ'e' yeto nez yoble jaya'ac laže'.

#### **Bosoxonje' ja'aque' Egipto**

<sup>13</sup>Na' cate' ba besyeya'ac magos ca', to angl čhe Xancho Diosen' blo'elagüe' Josén' lo' bišgal, na' gože'ne':

—Gwyas, gwče' bidaon' na' xna'ben' le šja'ac nación Egipto na' soale na'ze, na' cate'ch nia' le'e, cana' guaque yezale, le Herodesen' ba nžie' bia' yeyiljue' bidaon'a' cont gote'be'.

<sup>14</sup>Nach ne' ze bxin gwyas Josén', gwče'e bida'ona' len xna'ben' zja'aque' Egipton'. <sup>15</sup>Nach gosenite' Egipto na'ze šlac bžin ža got Herodesen'. Na' dan' gosone' ca' goc can' gwna Diosen' dan' bzoj to bene' be' xtiže'na' cani', gwne': "Čhixjue'eda' Xi'inan' yeze'e Egipton'."

#### **Herodesen' gwsele' soldadw cont gosote' yogo' bi' byo dao'**

<sup>16</sup>Na' rey Herodesen', cate' gocbe'ede' gosonle magos ca' le' dan' bich besyedie' gan' zoe'na', leca bže'e. Na' bsaque' con can' gwyejni'ide' cate' gwnabde' legaque' batcan' bla' beljon', na' gwsele' soldadw čhe' ca' par jasete' yogo'lol bi' byo che'en dao' zelao bi' chop ize, bi' ca' gosalje Belénna' na' yezica'chle yež ca' zjanyechj zjambi'i Belénna'. <sup>17</sup>Na' lagüe dan' gosote' bi' byo dao' ca', goc can' bzoj da' Jeremías ben' be' xtiža' Diosen' cani', žan:

<sup>18</sup>Nente ši'i bene' Ramá, chesebežchgüe' nita'chgüe' yela' güine'.

No'ole ca' zjanaque' xi'in diaža čhe da' Raquel chesyeyaše' chesyegüine'de' čhe xi'inda'ogaque' ca', na' bitw chesaclaže' no yeyoexenlaže' legaque', le ba gosatben'.

<sup>19</sup>Cate' got Herodesen', Josén' ne' zoe' Egipton'. Nach to angl čhe Xancho Diosen' blo'elagüe' Josén' lo' bišgal, na' gože'ne':

<sup>20</sup>—Gwyas, beče' bidaon' len xna'be'na' na' le šjaya'ac Israel. Ba gosat bene' ca' besyeyiljw bidaon'a' cont yesote'be'.

<sup>21</sup>Nach gwyas Josén' beche'e bidaon' len xna'ben' jaya'ac lažgaque' Israel. <sup>22</sup>Perw Josén', cate' bende' Arquelao bezoe' chnabi'e latje che da' xe' Herodesen', bžebe' yeyeje' gan' mbane distritw Judean'. Na' Diosen' gwdixjue'ede' le' lo bišgalen' bi cheyała' šjaya'aque' distritw Judean', san šjaya'aque' gan' mbane distritw Galilean'. <sup>23</sup>Da'nan' besyežine' ciuda Nazaret na' jasenite'. Na' dan' jasenite' Nazareten' goc can' bosozoj da' bene' gosoe' xtiža' Diosen' cani', gosene': "Yososi'e Jesúsen' bene' Nazaret."

**Juan ben' bzoa bene' nis gwdixjue'ede' diža' güen che Diosen'**

(Mr. 1:1-8; Lc. 3:1-9, 15-17; Jn. 1:19-28)

**3** Na' gwde zan iz, Juan ben' bzoa bene' nis gwyeje' latje daš gan' mbane distritw Judean'.

<sup>2</sup>Na' gwdixjue'ede' bene', gože' legaque':

—Le yetinje xtoła'le ca', le ba bžin ža cate' Diosen' ben' zoa yaban' nabi'e yichjlaždao' bene' yosozenague' che'.

<sup>3</sup>Che Juanna' bzoj da' Isaíasen' caten' bzoje' Xtiža' Diosen' cani', gwne':

Bena' chne' zižje latje dašen', že': "Le gonšagüe' yichjlažda'olen' cont soale lez gwzenagle che Xanchon' cate' yide'.

Le cuejyichj da' malen' chonle cont yichjlažda'olen' gaquen ca to nez da' ba gosonšagüe'."

<sup>4</sup>Na' Juanna', xalane' goquen de yiša' xa camello. Na' da' bchej lšinen' goquen de yid, na' gwdagüe' biše'zo len šina' beser yixe'. <sup>5</sup>Bene' že' ciuda Jerusalénna' na' bene' že' yogo' yež

ca' gan' mbane distritw Judean', na' lecze bene' že' yež ca' nyečhj mbi'i yegw Jordánna' gosa'aque' ja'aque' gan' zoa Juanna' cont bosozenague' xtiže'na'. <sup>6</sup>Na' cate' gosexoadole' bi da' xinj zjanone', Juanna' bzoje' legaque' nis lo yegw Jordánna'.

<sup>7</sup>Na' lecze ja'ac zan bene' Israel bene' ca' zjanzi' fariseo na' bene' ca' zjanzi' saduseo. Ja'aque' cont bzoa Juanna' legaque' nis. Nach Juanna' cate' ble'ede' legaque' gože'ne':

—iLe'e nacchguale bene' zgot na' bene' gwxiye'! ¿Chaquele guac yelale lao castigw dan' sela' Diosen' caten' gone' yela' justis che benachen'? <sup>8</sup>Še da' li ba betinjele xtoła'len', cheyała' gonle da' nac güen cont yesacbe'e bene' ba boša' yichjlažda'olen'. <sup>9</sup>Na' bitw gonle xbab gaquele Diosen' bitw gone' le'e castigw che xtoła'len' lagüe dan' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'. <sup>10</sup>Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'. <sup>11</sup>Neda' da' li chzoa' le'e nis neche ba betinje xtoła'le, perw coža'na' za' yid ben' gon cont soa Spiritw che Diosen' lo' yichjlažda'olen' naban' le'e. Na' bene' ca' bi yeson can' chazlaže' Diosen', sele' legaque' lo yi' gabilen'. Na' ben' za' za' coža'na' zaca'che' ca neda' na' da' nacchgüe' bene' zaca', bi zaca' gona' xmandadoe' lechja' no xele'. <sup>12</sup>Benan' gone' len benachen' can' choncho cate' chdecho

trigon' lo' rner. Chotobcho trigon' chgo'ošagüe'chon na' chzeycho yix beben'. Na' bene' bi chesejnilaže' Diosen', sele' legaque' lo' yi' gabilen' dan' cbi cheyol chenet.

### Cate' gwzoa Jesúsen' nis

(Mr. 1:9-11; Lc. 3:21-22)

<sup>13</sup>Na' gwza' Jesúsen' gan' mbane Galilea na' gweyje' gan' zoa Juanna' cho'a yegw Jordánna' cont Juanna' bzo'e' le' nis. <sup>14</sup>Na' Juanna' ben cho'alagüe' gague goclaže' gwzoe' Jesúsen' nis, gože'ne':

—Chyažjda' gwzo' neda' nisen' na' le' zedenabo' gwzoe' le' nis.

<sup>15</sup>Nach Jesúsen' gože' Juanna':

—Bzoa neda' nisen'. Cheyała' goncho ca' cont gac yogo'lo' dan' non Diosen' mandadw gac.

Nach gwčheb Juanna' bzo'e'ne' nis.

<sup>16</sup>Na' cate' beyož gwzoa Jesúsen' nisen', bechoje' lo' nisen', na' la' byaljwte yaban' gan' zoa Diosen'. Na' ble'ede' Spiritw che Diosen' betjen ca to ngolbex na' bžinen gwzoan len le'. <sup>17</sup>Na' gosende' gwne' Dios ben' zoa yaban', gwne':

—Bengan' Xi'ina' bene' chacda' na' chebe chezaquelaže'chgüeda' che'.

### Goclaže' gwxiyen' co'oyelan' Jesúsen' gone' da' mal

(Mr. 1:12-13; Lc. 4:1-13)

**4** Na' Spiritw che Diosen' benen cont gweyje' Jesúsen' latje dašen' gan' Satanás dan' chnabia' da' xigüe' ca' goclažen' co'oyelan' le' cont gone' da' mal.

<sup>2</sup>Na' bitwbi gwdagw Jesúsen' lao čhoa ža čhoa yel, na' cate' gwde da' čhoa žana' gwdone'. <sup>3</sup>Na' Satanásen'

gwbigan' gan' zoa Jesúsen', gožen le':

—Še le' naco' dogualje Xi'in Diosen', gož yej quinga yesyeyaqen yetextil.

<sup>4</sup>Nach gož Jesúsen' len:

—Nyojczje Xtiža' Diosen' žan:

“Gague yela' guagw na'zen' chyažje chio' beñačh cont gac bancho, san lecze chyažjecho yogo'lo' diža' dan' ža Diosen'.”

<sup>5</sup>Nach gwče' Satanásen' le' ciuda Jerusalén dan' nac ciuda che Dios. Na' bcuen le' yichjo' yodao' blao gan' nac la'zelagüe' sibe, <sup>6</sup>na' gožen le':

—Še len' naco' dogualje Xi'in Diosen', nga boslažo' cuino', le' nyojczjen le'e Xtiža' Diosen', žan:

Sela' Diosen' bene' ca' zjanac angl che' yesaclene' le', na' yesoxe' le' cont bi čhego' no yej.

<sup>7</sup>Na' gož Jesúsen' gwxiye'na':

—Lecze can' nyojen Xtiža' Diosen', žan: “Bitw goncho Xancho Diosen' prueba še lede' can' že'na'.”

<sup>8</sup>Da' yoble gwxiye'na' gozče'en le' to lo' ya'a da' nacchgua sibe, na' blo'en le' yogo' nación dan' zjachi' doxen yežlion' len yela' zaca' yela' xdan čhegaquen. <sup>9</sup>Nach gožen le':

—Yogo' da' quinga chle'edo' nga gonan' lo' nao' še gwzoe' xibo' lagua' nga gonxeno' neda'.

<sup>10</sup>Nach gož Jesúsen' len:

—Beyej ca'ale Satanás. Nyojczjen le'e Xtiža' Diosen' žan: “Cheyała' šejnilaže'cho Xancho Diosen' na' toze le' gonxencho.”

<sup>11</sup>Na' becuase Satanásen' cuite'na' beyejen ga yoble nach besežin to čhope angl che Diosen' jasaclene' le'.

**Jesúsen' gwzologüe' chyixjue'ede'  
diža' güen che Diosen' distritw  
Galilea**

(Mr. 1:14-15; Lc. 4:14-15)

<sup>12</sup>Na' Jesúsen' beze'e distritw Judean' na' beyeje' distritw Galilea cate' bende' ba de Juanna' ližya.  
<sup>13</sup>Na' gwze'e yež Nazareten' jasoe' ciuda Capernaum dan' chi' cho'a nisdan' do gan' zjachi' distritw dan' zjanzi' Zabulón na' Neftalí. <sup>14</sup>Na' dan' jayzoe' ciudan' goc can' gwna da' Isaías ben' be' xtiža' Diosen' cani' caten' bzoje' dan' ža:

<sup>15</sup>Ca nac distritw Galilea gan' že' zan bene' cbi zjanaque' bene' Israel,  
gan' nita' distritw Zabulón na' distritw Neftalí dan' zjambane yešla'ale nisdan' na' yegw Jordán,

<sup>16</sup>nchol' yichjlaždao' bene' ca' že' na'.  
Perw Diosen' gwsele' to bene' gwlo'o to be'ni' xen lo' yichjlažda'ogaquen'.  
Gosaque' ca bene' guat len yichjlažda'ogüen' le gosone' da' malen',  
perw bena' gwseļa' Diosen' ba bocobe' yichjlažda'ogaquen'.

<sup>17</sup>Cana' gwzolao Jesúsen' gwduxjue'ede' gwne':  
—Le yetinje xtolā'len', le ba bžin ža cate' Diosen' ben' zoa yaban' nabi'e yichjlaždao' bene' yosozenague' che'.

**Jesúsen' gwleje' tap bene' gwxen bel  
cont gosaque' txen len le'**

(Mr. 1:16-20; Lc. 5:1-11)

<sup>18</sup>Na' zej Jesúsen' cho'a nisdan' che Galilea cate' ble'ede' čhope bene'

gwxen bel, Simón Pedro na' bene' biše' Andrés, na' zjanite' chosozaļe' yixjw dan' chesezende' belen' lo' nisa'. <sup>19</sup>Nach gože' legaque':

—Le šo'o len neda'. Nacle bene' gwxen bel, na' chbejle bel lo' nis, perw na'a gona' cont gaxle bene' yesyechoje' lo da' malen'.

<sup>20</sup>Na' la' gosebejyichjte' yixjw čhen' nach ja'aclene' Jesúsen'.

<sup>21</sup>Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e to lo' barcw len xagaque', chesyeyonšagüe' yixjw čhegaquen'.  
Na' lecze gox Jesúsen' legaque' šja'aclene' le'. <sup>22</sup>Na' la' gosontie' barcon' lo na' xagaque' Zebedeon' na' ja'aclene' Jesúsen'.

**Jesúsen' bsed blo'ede' bene' zan**

(Lc. 6:17-19)

<sup>23</sup>Na' Jesúsen' gwyeje' yogo' yež ca' zjachi' gan' mbane Galilea, bsed blo'ede' bene' ca' zjaže' to to yodao' che chio' bene' Israel. Na' gwduxjue'ede' diža' güen can' nabia' Diosen' yichjlaždao' bene' yosozenag che'. Na' Jesúsen' beyone' bene' ca' chese'e bite'teze yižgüe'.  
<sup>24</sup>Na' doxen nación Siria gwxoā diža' yogo' da' güen da' ben Jesúsen'. Nach bene' Siria ca' jasesane' yogo' bene' chesacšene lagüe'na', bene' chese'e zan yižgüe', bene' chesey chesela, bene' zjajo'o zjanyaz da' xigüe' yichjlažda'ogaque' len bene' chesaz šon na' bene' natsi' cuerp čhegaquen'. Na' beyone' legaque'.  
<sup>25</sup>Na' zan bene' gosao' le', bene' za'ac distritw Galilea na' distritw Decápolis, na' bene' za'ac ciuda Jerusalén, na' bene' za'ac yezica'chle

yež da' zjachi' distritw Judea, na'  
bene' za'ac yešla'a yegw Jordán.

**Diža' dan' bsd blo'e Jesúsen' to lo  
ya'a**

(Lc. 6:20-23)

**5** Na' Jesúsen' cate' ble'ede'  
bene' zan zjanžag, na' gwloe'  
gwchi'e to lo ya'a. Na' bene' ca'  
zjanaque' le' txen gosebigue' gan'  
chi'ena'. <sup>2</sup>Nach gwzolao bsd  
blo'ede' legaque', gwne':

<sup>3</sup>—Mbalaz zoa le'e chacbe'ele  
chyažjele gaclen Diosen' le'e, le ba  
chzenagle che Diosen' cont chnabi'e  
yichjlažda'olen'.

<sup>4</sup>Mbalaz soa le'e chacyaše'laže'le,  
le Diosen' yeyoe'xenlaže' le'e.

<sup>5</sup>Mbalaz zoa le'e chzexjwlaže'le  
len Diosen' na' len benachen', le  
gon Diosen' cont gac lo na'le doxen  
yežlion' can' gwne'.

<sup>6</sup>Mbalaz zoa le'e chzelaže'chgual  
gacle bene' güen len Diosen', le  
ba cheyon Diosen' le'e bene' güen  
lagüen'.

<sup>7</sup>Mbalaz zoa le'e cheyaše'le bene'  
yoble, le lecze ca' Diosen' yeyaše'  
yeži'ilaže'de' le'e.

<sup>8</sup>Mbalaz zoa le'e ba nacle bene'  
laždao' xilaže', le šjazyzoale txen len  
Diosen'.

<sup>9</sup>Mbalaz zoa le'e chego'ole yela'  
chxenlaže' che bene' chesedi'e, le  
Diosen' ne' nacle xi'ine'.

<sup>10</sup>Mbalaz zoa le'e chosoči  
chososaca' bene' le'e lagüe dan'  
chonle dan' nac güen lao Diosen', le  
chzenagle che Diosen' cont chnabi'e  
yichjlažda'olen'.

<sup>11</sup>Na' mbalaz soale še dan'  
chejni'laže'le neda' chesezi'diža'  
bene' le'e na' chososaca'zi'e le'e

na' chosoxie' diža' güenlaže' chele.  
<sup>12</sup>Le yebechgüe na' le soa mbalaz,  
le Diosen' gone' cont gacchgua da'  
güen chele cate' yežinle gan' zoe'na'.  
Can' chesonde' le'e, ca'czen' goson  
da' xozxta'ocho len da' bene' ca'  
goso'e xtiža' Diosen' cani'.

**Naccho ca zede' na' ca be'ni' len bene'  
že' yežlio nga**

(Mr. 9:50; Lc. 14:34-35)

<sup>13</sup>Le'e nacle ca zede', le zede'  
chaclenen cont bi cuiayi' no yid  
bela', na' le'e chonle cont benachen'  
cbi chesontequ'e da' mal. Perw še  
zeden' bich bi zxi' naquen, čnacxe  
goncho cont yeyaquen zxi' da'  
yoble? Na' bich bi zacan', lete  
cho'onchon na' gwlej gwšošj bene'  
len. Na' le'e še cbich gonle can'  
chazlaže' Diosen', nacle ca zede' dan'  
bich bi zxi' naquen.

<sup>14</sup>Na' le'e nacle ca be'ni' dan'  
chaclenle bene' cont chesenezde'  
nac chaclaže' Diosen' yesone'. Na'  
dan' chonle can', nacle ca to ciuda  
da' chi' to lo ya'a, le yogo'ze bene'  
chesele'eden'. <sup>15</sup>Notno gwgual'a to  
yi' na' gwdosen' to caj, san chde'en  
le'e ze'e cont chsenin' len yogo'  
bene' že' lo' yo'ona'. <sup>16</sup>Na' ca nac  
le'e, cheya'la' soateze soale gonle  
da' güenna' cont yesele'e bene' na'  
yesonxene' Xacho Dios ben' zoa  
yaban'.

**Jesúsen' bsd blo'ede' can' ža  
ley dan' bzoj da' Moisés**

<sup>17</sup>Bitw gaquale še neda' za'a  
zedeyena' cont ley dan' bzoj  
da' Moisésen' na' dan' bosozoj  
yezica'chle bene' ca' goso'e xtiža'  
Diosen' cani' bich yesonen žin. Za'a

cont gac can' ža yogo'loł Xtiža'  
 Diosen' dan' bosozoj bene' ca'. <sup>18</sup>Da'  
 li žia' le'e, te che yežlio nga len  
 da' ca' chle'echo le'e yaban', perw  
 ne to letr dao' ne to punt dao' dan'  
 nyoj le'e leyna' bi gac yexin, san  
 gac yogo'loł dan' nžia bia' Diosen'  
 gac. <sup>19</sup>Da'nan' note'tezle še bi gonle  
 can' žanna', la'czla' še naquen  
 la'zelagüe to da' dao', na' še lecze  
 gwlo'ele bene' yoble bi yosozenague'  
 chen, Dios ben' zoa yaba chnabi'e  
 ne' bi nacle bene' blao len le'. Na'  
 note'tezle še gonle can' žanna',  
 na' še lecze gwlo'ele bene' yoble  
 yesone' ca', Diosen' ben' zoa yaba  
 chnabi'e ne' nacle bene' blao len  
 le'. <sup>20</sup>Chnia' le'e, bene' fariseo ca'  
 na' bene' ca' chososed chosolo'e  
 dan' bzoj da' Moisés bitw zjanac  
 yichjlažda'ogaquen' güen lao Diosen'.  
 Na' še yichjlažda'olen' bi gacchen  
 güen lao Diosen' clcl ca' che bene'  
 ca', bitw yežinle yaban' gan' zoa  
 Diosen' chnabi'e.

### Da' malen' choncho še chža'a lježcho

(Lc. 12:57-59)

<sup>21</sup>Na' lecze bsd blo'e Jesúsén'  
 legaque' gože'ne':  
 —Ba nezele can' bzejni'i Moisésén'  
 bene' ca' gosenita' cani', gwne':  
 “Nono gotle. Na' še no got ljež  
 benache', justis ca' yesechoglagüe'  
 che' cheyała' gate'.” <sup>22</sup>Na' neda' žia'  
 le'e, note'tezle še chža'a ljež benachle,  
 zacan' yesechoglagüe' gata' castigw  
 chele. Na' note'tezle še chzi'diža'  
 lježle, zacan' yeson bene' blao ca'  
 chesenabia' nación Israel chechon'  
 castigw chele. Na' note'tezle še  
 chado'diža' lježle, zaca'czen' yesela'  
 Diosen' le'e lo yi' gabil.

<sup>23</sup>Cheyała' soacho binlo len ljež  
 benachcho. Na' la'czla' cate' ba zoale  
 lo' yodao' cont gwnežjwle bi dan'  
 gwnežjwle gonxenle Diosen', še  
 šjasa'laže'le ba benle da' mal contr  
 to bene' lježle, <sup>24</sup>na'ze cheyała'  
 gwcua'anle šlož dan' noxe'len' na'  
 šjenle cont yezoale binlo len bene'  
 lježlen'. Yeyoža' guaque šjasanle dan'  
 ba gwlejele cont gonxenle Diosen'.

<sup>25</sup>Cate' to bene' gagüe' xya chele  
 na' che'e le'e lao justis, šlac ngo'ole  
 nezen' le yeyiljwlaže' nac gonle cont  
 yezoale binlo len le' cont bi che'e le'e  
 lao justisen'. Še bitw gonle ca', cate'  
 žinle lao justisen', nach gone' le'e lo  
 na' bene' ca' yososeyjue' le'e ližya.  
<sup>26</sup>Da' li žia' le'e, bitw yebeje' le'e še  
 bina' chixjwle doxen dan' čala'le.

### Da' malen' choncho še chzoa xtocho

<sup>27</sup>Ba nezele ley dan' bzoj da'  
 Moisésén' žan: “Bitw gata'lenle no'ole bi  
 nac no'ol chele o bene' byo bi nac bene'  
 chele.” <sup>28</sup>Na' neda' žia' le'e, note'tezle  
 še chna'le to no'ole na' chzelaže'lene',  
 ba naple doła'. Le tozeczce ca malen'  
 ba chonle lo' lažda'olen' len dan' chon  
 bene' chzoa xtoe'.

<sup>29</sup>Na' še yejlaolen' chonen cont gonle  
 da' xinj, cheyała' cuejyichjle da' malen'  
 chonle. Yejni'a cuiayi' yejlaolen' clcl ca  
 cuiayi'le lo yi' gabilen' neche len. <sup>30</sup>Na'  
 še na'le chonen cont gonle da' xinj,  
 cheyała' cuejyichjle da' malen' chonle.  
 Yejni'a cuiayi' na'le clcl ca cuiayi'le lo yi'  
 gabil neche len.

### Bene' ca' zjanšagna' bitw cheyała' yesyele'e

(Mt. 19:9; Mr. 10:11-12; Lc. 16:18)

<sup>31</sup>Lecze nezele ley dan' bzoj da'  
 Moisésén' žan: “Note'teze bene'

yele'e len no'ol che', cheyała' chas to yiš ga güen' diža' le besyele'ena'." <sup>32</sup>Na' neda' žia' le'e note'teze bene' chele'e len no'ol che', len nezte'de' no'ole chen' bitw naque' to no'ole chzoa xtoe', chone' cont gague' ca to no'ole bene' chzoa xto. Na' note'teze yošagna'lene' to no'ole bene' bela'a len bene' che', lecze tozcze ca da' xinj gone' len dan' chon bene' chata'lene' no'ol che bene' yoble.

**Jesúsen' bzejni'ide' cheyała'  
güe'cho diža' li**

<sup>33</sup>'Na' lecze ba nezele can' bzejni'i da' Moisésen' da' xozxta'ocho ca: "Cate' gwzoale testigw Xancho Diosen', cheyała' gonle con can' ba gwnalen'." <sup>34</sup>Perw neda' žia' le'e gwbat nale quinga che bite'teze: "Yabana' zoan testigw chia' cho'a diža' li". Bi nale ca le yaba nan' zoa Diosen' chnabi'e. <sup>35</sup>Na' neca nale: "Yežlion' zoan testigw chia' cho'a diža' li", le yežlion' den xni'a Dios. Neca nale: "Ciuda Jerusalénna' zoan testigw chia' cho'a diža' li", le naquen ciuda che Dios ben' naque' la'zelagüe bene' chnabia'. <sup>36</sup>Na' neca nale: "Yichja' zoan testigw chia' cho'a diža' li", le bitw gac gonle cont yiša' yichjlen' yesyeyaquen da' šiš o yesyeyaquen da' gasj. <sup>37</sup>Še žale guaquen, gacczen; še žale bi gac, bi gacczen. Le bichle diža' da' nale cont yesejle'e chele, zan' che Satanás dan' chnabia' da' xigüe' ca.

**Bitw co'olaže'cho bene' chesegue'ede'  
chio'**

(Lc. 6:29-30)

<sup>38</sup>'Nezele ley dan' bzoj da' Moisésen' žan: "Še to bene' gone' zi'

yejlaolen', guac gonle zi' yejlagüen', na' še to bene' xope' to layle, guac xople to layen'." <sup>39</sup>Perw neda' žia' le'e, bitw gwžonle gwsaca'zi' bene' le'e. Še to bene' cape' šla'a xaga'le, le güe' dan' yešla'a. <sup>40</sup>Še to bene' chagüe' xya na' che'nde' que'e xcamisle, le güe' latje que'e len xadoñ chelen'. <sup>41</sup>Na' še to bene' blao gone' byen šejlenlene' gua'le yoa' chen' do gašj hor, le šejlene' le guan' chop ca'te'le. <sup>42</sup>Na' še bi dan' chnabe bene' le'e, le güen'. Na' le cuej še bi da' chnabe' cuejlene'.

**Cheyała' gaguecho bene' chgue'e chio'**

(Lc. 6:27-28, 32-36)

<sup>43</sup>'Na' lecze ba nezele ley chelen' žan: "Cheyała' gaguele bene' migw chele na' gue'ele bene' chgue'ede' le'e." <sup>44</sup>Perw neda' žia' le'e, cheyała' gaguele bene' chgue'ede' le'e, na' cheyała' nabele Diosen' gac güen che bene' chesezi'diže' le'e. Le gon binlo len bene' chesegue'ede' le'e, na' le yol güiž Diosen' cont gac güen che bene' ca' chososacazi'e le'e. <sup>45</sup>Še gonle ca', gwlo'ele nacle xi'in Diosen' ben' zoa yaban'. Len' chone' chla' gwbižen' cont chsenin' che bene' zjanaque' bene' güen lente che bene' zjanaque' bene' mal. Na' lecze chone' yejw par bene' zjanaque' bene' güen len bene' zjanaque' bene' mal. <sup>46</sup>Še chaquele šinze bene' chacde' le'e na' bi chaquele bene' yoble čbixchen' chbezle gon Diosen' da' güen chele? Con can' cheson bene' güechixjw ca' chonle, bene' ca' žale zjanaque' bene' xi'achgua. <sup>47</sup>Na' še con chguaple tiox bene' biše' lježle ca'ze čchaquele güenna' chonle da' chonle ca'? Bitw chonle güen, le ca'czen'



cheson bene' ca' bi zjanombi'e Diosen'. <sup>48</sup>Cheyała' gacle bene' šagüe' bene' güen len note'teze bene' con can' nac Xacho Diosen' ben' zoa yaban' bene' šagüe' bene' güen.

**Jesúsen' blo'ede' naquen' cheyała'  
goncho da' chazlaže' Diosen'**

**6** 'Cate' gonle to da' güen, bitw gonlen cont yesele'e bene' can' chonlen' na' yesonxene' le'e, le še chonle ca', Xacho Dios ben' zoa yaba bitw gone' ga gac güen chele. <sup>2</sup>Da'nan' cate' gwnežjwle to bene' da' chyažjde', bitw gwnežjwlen par yeseneze bene' ca dan' chonlen'. Bene' gwxiye' ca' chosonežjue' bi da' chosonežjue' do lo' yodao' na' do chanez par yeseneze bene' na' yesene' güen chegaque'. Da' li žia' le'e, ba gosaxencze' lagüe da' chesone' ca', perw Diosen' bitw gone' ga gac güen chegaque' še ca'. <sup>3</sup>San le'e, še bi da' gwnežjwle to bene', le gwnežjon šižize. <sup>4</sup>Gonlen ga cbi yesacbe'e bene' na' cbi yesonxene' le'e, nach Xacho Diosen' ben' chle'ede' yogo' dan' choncho gone' ga gac güen chele ga yesele'e yogo' bene'.

**Bsed blo'e Jesúsen' nac cheyała' yol  
güižcho Dios**

(Lc. 11:2-4)

<sup>5</sup>'Cate' yol güižle Diosen', bitw gonle can' cheson bene' gwxiye' ca'. Legaque' chesyebede' chesezeche' chosol güiže'ne' lo' yodao' chegaque', na' do squin chanez. Chesone' ca' cont yesele'e bene' can' chesone'na'. Da' li žia' le'e, ba gosaxenczen' lagüe da' chesone' ca', perw Diosen' bitw gone' ga gac güen chegaque' še

ca'. <sup>6</sup>Na' cate' yol güižle Diosen', le yeyo'o lo' yo'o chele na' gwseyjwle puerten' na' güe'le diža' len Diosen' ben' cbi chle'echo la'czla' zoe' len chio'. Na' Xacho Diosen' ben' chle'ede' yogo' dan' chonle gone' ga gac güen chele.

<sup>7</sup>Na' cate' yol güižle Diosen' bi güe'le diža' zan can' cheson bene' ca' bi zjanombia' Diosen'. Legaque' chesacde' lagüe' dan' cheso'e diža' zan Diosen' gwzenague' chegaque'. <sup>8</sup>Bitw gonle can' chesone'na'. Ca nac Xacho Diosen', cate' za' nabelenen' ba nezczede' bi dan' chyažjele.

<sup>9</sup>Quinga yol güižlene':

Xato' bene' zoa yaba, chnabto' yogo'lol bene' yesonxene' le'.

<sup>10</sup>Zelaže'to' nabi'o yichjlaždao' yogo' neto' benach.

Gačšca can' chazlažo' yežlio nga can' chac yabana'.

<sup>11</sup>Ca nac dan' che'ej chagwto' tža tža, benšcan na'a.

<sup>12</sup>Na' bezi'xenšca cheto', le lencze neto' chezi'xento' che ljež benachto' bite'teze da' chesonde' neto'.

<sup>13</sup>Na' bitw go'o latje soa da' gwžigan' neto' gonto' da' mal, san bcuas bcue'ejšca neto' len da' mala'.

Le'na' chnabi'o na' napo' yela' guac na' naco' bene' zaca' juisyw toli tocane.

Ca'czen' gačšca.

<sup>14</sup>'Na' še chezi'xenle che ljež benachlen' bite'teze da' chesonde' le'e, lecze Xacho Diosen' ben' zoa yaban' yezi'xene' xtoła'len'. <sup>15</sup>Perw na' še le'e bi chezi'xenle che ljež benachle, lecze ca' Xacho Diosen' bitw yezi'xene' chelen'.



**Jesúsen' bzejni'ide' nac goncho gwbas**

<sup>16</sup>'Cate' le'e gonle gwbas  
cont gonxenle Diosen', bitw  
gon cho'alaolen' ca che bene'  
chegüüne'chgüe', can' cheson bene'  
gwxiye' ca'. Legaque' chesone' ca'  
contze chesele'e bene' le chesone'  
gwbas na' yesonxene' legaque'. Da'  
li žia' le'e, ba gosacxencze' lagüe  
da' chesone' ca', perw Diosen' bitw  
gone' ga gac güen chegaque' še  
ca'. <sup>17</sup>San le'e cate' gonle gwbas, le  
gwpa'a yichjle na' le chib cho'alaole.  
<sup>18</sup>Le gon ca' cont bi yesacbe'e bene'  
chonle gwbas, san gacbe'e toz  
Xacho Dios ben' zoa len chio' la'czla'  
bi chle'echone'. Na' Xacho Diosen'  
ben' chle'e yogo' da' choncho gone'  
cont gaxxenle.

**Da' ca' zjazaca'chgua yaba gan' zoa  
Diosen'**

(Lc. 12:33-34)

<sup>19</sup>'Bitw co'ošagüe'le da' zcha'o da'  
zjanac da' zaca' da' zjade yežlio nga,  
le yesebiayin'. Ba! da' zjade yežlio  
nga chesaljen be dao' chesagwban',  
na' yebalen chesezen xche'en,  
na' lecze chaš bene' gwban na'  
yeseque'en. <sup>20</sup>San le gaque Diosen'  
cont gone' da' šagüe' da' güen chele  
da' bi te chen cate' yežinle yaban'  
gan' zoe'na', da' bi šo'ba', na' neca  
sen xche'en, na' neca gac šo' bene'  
gwban yeseque'en. <sup>21</sup>Le gan' de dan'  
chaquelen' na' zoa yichjlažda'olen'.

**Žia yejlaocho cont chle'echo**

(Lc. 11:34-36)

<sup>22</sup>'Žia yejlaole cont chle'ele. Še  
bitw bi chaquen, chle'eczele binlo.  
<sup>23</sup>Perw še yejlaolen' bi naquen binlo,

bitw chle'ele. Ca'czen' naquen len  
yichjlažda'olen'. Da' licze leca nchol  
yichjlažda'ole še bi chzenagle che  
Diosen'.

**Bitw gac gaquecho Diosen' na'  
gaquetecho mechw**

(Lc. 16:13)

<sup>24</sup>'Notno gac gon žin len chope  
xane' to ši'ize, le še gone' ca',  
gue'ede' to xan žinna' na' gacde'  
yeto'e; o gone' žin che toe' do yichj  
do laže' na' che ben' yeto gonen' to  
chža'alaže'ze. Lecze ca' le'e bitw  
gac gonle xšin Diosen' do yichj do  
laže'le na' gonte xšinle cont gacle  
bene' gwni'a.

**Diosen' chapši'e xi'ine' ca'**

(Lc. 12:22-31)

<sup>25</sup>'Da'nan' žia' le'e, bi gacžejlaže'le  
bi da' ye'ej gagwle šlac mbanle,  
na' lecze ca' bi gacžejlaže'le che  
xałana'le. Zaca'ch yela' mban chelen'  
ca yela' guagw. Lecze ca' cuerp  
chelen', zaca'chen ca xałana'le. <sup>26</sup>Le  
gon xbab ca nac be ca' zjažia xil  
ben' chesaš lo be', bitw chesazba',  
bitw cheselapba', neca zoa da'a xoa'  
chegacba', perw na' Xacho Diosen'  
ben' zoa yaba chguagwcze'ba'.  
iNacchle zaca' le'e ca be ca' zjažia  
xilen'! <sup>27</sup>Na' ne tole bi gac yoston  
cuinle gašje metr še con cue' yichjle  
tonle.

<sup>28</sup>'Na' žbixchen' chbec yichjle  
xałana'le? Le gon xbab ca nac yej  
ca' da' zjaze yix'e chesecha'oczen'.  
Bibi žin chesonen, neca chesaljen  
do. <sup>29</sup>Na' žia' le'e, da' rey Salomón  
gocue' lache' güen juisyw, perw  
bitw bežinlaže' xalane'na' ca yela'  
xdan che yej ca'. <sup>30</sup>Diosen' none'

xdan da' ca' ze yixen' la'czla' to chop žaze nitan' na' chosozeyen'. Nacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che'. <sup>31</sup>Da'nan' bitw cuec yichje' che bi dan' chyažjele, nale': "¿Bin' ye'ej gagwcho na' bin' gacwcho?" <sup>32</sup>Benē' ca' bi chesonxene' Diosen' con chesoe'laže' bi da' gata' yese'ej yesagüe' na' che xalana'gaque'. Perw Xacho Diosen' ben' zoa yaban' nezczedē' bi da' ca' chyažjele. <sup>33</sup>Cheyała' güe'laže'le gwzenagle che Diosen' cont nabi'e yichjlažda'olen' na' cont gacle bene' güen len le', lenna' naquen da' žialaoch, na' yogo' da' ca' chyažjele, goncze Diosen' len. <sup>34</sup>Bitw cuec yichje' che bi dan' gac gwxe güižj, le decze da' cuec yichjcho tža tža. Da'nan' to to ža con cuec yichjcho che dan' chac ca hora'.

**Bitw zaca'cho nacho zjanap bene' doła'**

(Lc. 6:37-38, 41-42)

**7** 'Bitw gonle xbab zaca'le nale bene' zjanape' doła'. Še nale che bene' zjanape' doła', ca'cze Diosen' ne' le'e nape doła'. <sup>2</sup>Can' chosbaga'le bene' žale zjanape' doła', lecze can' yosbaga' Diosen' le'e ne' nape doła'. Con can' chonle len bene', lecze can' gon Diosen' len le'e. <sup>3</sup>¿Bixchen' chna'le beb dao' dan' yo'o lo' yejlaolē' lježle na' bi chabe'e'le naquech beb xen dan' yo'o lo' yejlaolen'? <sup>4</sup>Na' še le'e yo'o to da' xench lo' yejlaolen' čnacxechen' che'le bene' lježlen': "Ben' yebeja' beb dao' dan' yo'o lo' yejlaguon'?" <sup>5</sup>iBene' güexoaayag! Zgua'tec le yebej beb xen dan' yo'o

lo' yejlaolen', nach le'ele binlo cont yebejle dan' yo'o lo' yejlaolē' lježle.

<sup>6</sup>Perw bitw güe'tezle xtiža' Diosen' len bene' ca' cheson yichjlaogüe' cbi chesaclaže' yosozenaguen', le xož yesonde' le'e znia ca cheson bał beco' še bi chazlaže'ba' bi da' chosonežjue'ba'. Na' še güe'tezle xtiža' Diosen' len bene' ca' cheson yichjlaogüe', xož yosolej yosošošje' diža' dan' güe'lenlene'. Ca' cheson čoš len da' cbi chesaclaže'ba' yesagwba'.

**Le nabe Diosen' bi dan' nabelene', le gonczen'**

(Lc. 11:9-13; 6:31)

<sup>7</sup>Še žan bi da' chyažecho, chnabchon. Še žan to da' chaclaže'cho želecho, chyiljwchon. Še žan chaclaže'cho saljw bene' puert che' na' necho cho'a puerta' cont saljue'. Na' ca'cze cheyała' ye'le Diosen' cate' bi da' chyažjele, o bi da' chaclaže'le gone'. <sup>8</sup>Na' note'tezle še bi da' chnabelene', gonczen'. Na' še bi dan' che'nele nezele, gwzejni'iczden' le'e. Na' še žan chaclaže'le gac to da' gac, yol güižle Diosen' can' chon to bene' chnie' cho'a puert, nach Diosen' gone' cont gacczen.

<sup>9</sup>Na' le'e xa' bidao', še xi'inle nabebe' le'e yetextil čgwnežjwlebe' to yej? <sup>10</sup>Na' še nabbe' yid beł gagwbe', čgwnežjwlebe' to be xigüe'? <sup>11</sup>La' nacle bene' mal, nezele chnežjo xi'inle to da' güen. Nacchxe güen gon Xacho Diosen' ben' zoa yaban' len bene' chnab lagüe'na' bi dan' chyažjde'.

<sup>12</sup>Na' con yogo' da' güen da' chaclaže'le yeson benachen' len le'e,

lecze ca' cheyała' gonle len legaque',  
le can' zejen da' nyoj le'e ley dan'  
bzoj da' Moisésen' na' dan' bosozoj  
da' bene' ca' gosoe xtiža' Diosen'  
cani'.

**Nez da' yežin yaban' zaca'leben ca to  
nez las**

(Lc. 13:24)

13-14' Lao yela' mban checho chope  
nez de, to nez güen na' to nez mal.  
Nez malen' zaca'leben ca to nez  
yo to nez laga' dan' chaquele leca  
mba naquen cont talen, na' bene'  
zan cheseque'en. Perw cheyała'  
gonle byen šo'le nez güenna' la'czła'  
chaquele naquen ca to nez las, to  
nez zdebe, le nez malen' chežinen  
gabił gan' saca'zi'le toli tocane. Na'  
nez güenna' chežinen yaba ga banle  
to li tocane.

**Dan' choncho chlo'en bin' yo'o lo'  
yichjlažda'ocho**

(Lc. 6:43-44)

15' Cheyała' gwsaca'le cont  
bi šejle'le xtiža' bene' ca'  
chesonlaže' chesene' xtiža' Diosen'  
cheseyixjue'ede'. Xdanchgua  
cheso'e dižan', le chesaclaže' gonle  
xbab zjanaque' bene' güen. Perw  
zjanaque' bene' laždao' xi'a na'  
chesaclaže' yosožiaye'e le'e. 16' Con  
can' nac da' chbia to to yaguen'  
nezecho bi yaga'. Ca nac yag yeše'  
bitw chbian uvas na' neca yag lay  
chbian yixgüigw. Ca'czen' cheyała'  
gacbe'ele bene' ca' yeseziye'e le'e  
cate' le'ele dan' chesone'na'. 17' Yag  
dan' nac yag güen, frut güencze  
chbian, na' yag da' bi nac güen,  
lecze frut da' bi nac güen chbian.  
18' Bitw nacho to yag frut güen

chbian frut da' bi nac güen, na' neca  
nacho dan' bi nac güen chbian da'  
nac güen. 19' Na' yogo'te yag frut da'  
bibi chbia, chog xan yaga' len na'  
gwzeyen'. 20' Na' can' nac dan' cheson  
to to bene', nezecho še zjanaque'  
bene' güen o bene' mal.

**Gague yogo' bene' yesyežine' gan' zoa  
Diosen' chnabi'e**

(Lc. 13:25-27)

21' Bene' zan chese'e neda':  
“Naco' Xana'”, perw gague yogüe'  
yesyežine' yaban' gan' zoa Diosen'  
chnabi'e. Bene' ca' cheson can'  
chazlaže' Xa' Diosen' ben' zoa yaban',  
legaczen' yesyežine' yaban' gan'  
zoe'na'. 22' Cate' žin ža yosodie' cuent  
lao Diosen', bene' zan yesi'e neda':  
“Xana', goclen neto' na'a, le ba  
gwdixjue'eto' xtižo'na'. Na' lecze ca'  
bza' bzetjto' lao' bebejto' da' xigüe'  
ca' zjajo'o zjanyaz yichjlaždao'  
bene'. Na' lecze bza' bzetjto' lao'na'  
bento' da' zan yela' guac.” 23' Perw  
na' yapa' legaque': “Bitw nombi'a  
le'e. Le šjaya'ac ca'ale le'e bene' güen  
da' xinj.”

**Chope bene' na' yo'o da' chon to toe'**

(Mr. 1:22; Lc. 6:47-49)

24' Bene' chzenag xtiža'na' na'  
chone' can' žia'na' zaca'lebde' ca  
to bene' sina' bene' ben liže' na'  
gwdixjue' lenen len yej gual. 25' Na'  
goc yejw zil juisyw na' betj yegw  
gwyechjen liže'na' na' gwyechj  
be' bdono'. Perw bitw gosezoen  
yosochixen len dan' gwdixjue' lenen  
de yej. 26' Na' bene' chzenag xtiža'na'  
perw bitw chone' can' žia'na',  
zaca'lebde' ca to bene' tont bene'  
bzoa ližen' lo yox. 27' Na' goc yejw zil

juisywna' na' betj yegon' gwyečhjen liže'na' na' gwyečhj be bdono'. Nach ližen' bebixen gwžiayin'.

<sup>28</sup>Na' cate' beyož be' Jesúsen' diža' ca', beŋe' ca' že' na' besyebande' can' bsed blo'eden'. <sup>29</sup>Le can' bzejni'ide' nacia' nezdē' cayanen' nac xbab che Diosen', gague bzejni'ide' can' chosozejni'i beŋe' ca' chososed chosolo'e ley dan' bzoj da' Moisésen'.

**Jesúsen' beyone' to beŋe' che'ede' yižgüe' dan' nzi' lepra**

(Mr. 1:40-45; Lc. 5:12-16)

**8** Beŋe' zan zesyenagüe' Jesúsen' cate' beyetje' ya'ana'. <sup>2</sup>Nach to beŋe' che'ede' yižgüe' dan' nzi' lepra gwbigue' lao Jesúsen' na' bzoa xibe' lagüena' gože'ne':

—Xana', še chaclažo' guac yeca'o yižgüe' dan' che'eda'.

<sup>3</sup>Nach Jesúsen' bli' ne'e na' gwxoen' yichje' na' gože' le':

—Chaclaža' yeyacdo'. Beyaque.

Nach la' beyactie' ca' nac yižgüe' dan' che'ede'. <sup>4</sup>Nach Jesúsen' gože' le':

—Notno yo'o can' ba beyona' le'. Con gwyej jaŋa' bxoza' cont le'ede' bačh beyacdo'. Na' bnežjw da' cheyaŋa' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' beŋe' yesenezde' ba beyacdo'.

**Jesúsen' beyone' xmos to soldadw**

(Lc. 7:1-10)

<sup>5</sup>Na' cate' bežin Jesúsen' Capernaum to xan soldadw beŋe' Roma la' bšagte' le'. Na' gota'yoede' Jesúsen', <sup>6</sup>gože'ne':

—Xana', xmosan' die' ližan' chacšenchgüede'. Natsi' cuerp chen' na' chžaglaochgüe'.

<sup>7</sup>Nach Jesúsen' gože' xan soldadoa':

—Sa'lēna' le' na' yeyona'ne'.

<sup>8</sup>Perw na' xan soldadoa' gože'ne':

—Xana', bitw naca' beŋe' zaque' par sa'o liža'na'. Ngateze ben mandadw yeyac xmosan' na' yeyaccze'. <sup>9</sup>Neda' zoa beŋe' chnabi'e neda', perw lecze nita' soldadw chia' na' chnabi'agaca'ne'. Cate' chapa' toe': “Gwyej”, na' cheje', na' cate' chapa' yetoe': “Da”, na' chide', na' cate' chapa' xmosa': “Da' nga gono”, na' chonen'. Nan' nezda' con nao' yeyac xmosan' na' yeyaccze'.

<sup>10</sup>Na' Jesúsen' cate' bende' xtiža' xan soldadoa' bebande' na' gože' beŋe' ca' zjanagüe' le'na':

—Da' licze žia' le'e, ne toze beŋe' Israel biŋa' šejnilaže'chgüe' neda' ca' bengā bi naque' beŋe' Israel. <sup>11</sup>Žia' le'e, beŋe' zan za'ac doxen yežlion' šjasyenite' txen len da' xoxzta'ocho Abraham, Isaac na' Jacob yaban' gan' zoa Diosen' chnabi'e na' yesebi'e cho'a mes yesagüe'. <sup>12</sup>Na' ca' nac beŋe' nación Israelen' ben' gwlej Diosen' cont yesenite' len le', choj beŋe' zan bitw yesejnilaže' neda'. Da'nān' sele' legaque' lo' yi' gabil gan' nac chol na' yesebežyaše' na' yesagwxejte laye' dan' yesežaglaochgüe'.

<sup>13</sup>Beyož gwna Jesúsen' ca' nach gože' xan soldadoa':

—Guac yeyejo'. Yeyaque xmoso'na', con can' chejli'o gac che'.

Na' xmos xan soldadoa' la' beyactedē'.

**Jesúsen' beyone' taobi'ĩn che Pedroa'***(Mr. 1:29-31; Lc. 4:38-39)*

<sup>14</sup>Na' gwyej Jesúsen' liž Pedroa', na' ble'ede' taobi'ĩn che Pedroa' die' yo'e da' la. <sup>15</sup>Jesúsen' beɣue' ne'e na' la' bechojtie' da' lan'. Nach la' gwyaste no'olen' bsiñi'e da' gose'ej gosagüe'.

**Jesúsen' beyone' beñe' zan***(Mr. 1:32-34; Lc. 4:40-41)*

<sup>16</sup>Na' cate' ba gwɣin, besežin beñe' gan' zoa Jesúsen' zjanči'e beñe' zan zjajo'o zjanyaz da' xigüe' yichjlažda'ogaquen'. Jesúsen' con bene' mandadw na' besyechoj da' xigüe' ca'. Lecze beyone' yogo' beñe' ca' chesacšene. <sup>17</sup>Bene' ca' cont goc can' ža Xtiža' Diosen' dan' bzoj da' Isaías che' cani', žan: "Le'na' yeque'e yela' chžaglao checho na' yeque'e yogo' yižgüe' chechon."

**Can' gož Jesúsen' beñe' ca' gosacłaže'****yesa'ogüe' le'***(Lc. 9:57-62)*

<sup>18</sup>Gwde na' ble'e Jesúsen' ba besežin beñe' zan zjanyechjde' le', nach bene' mandadw len beñe' ca' zjanaque' le' txen cont yeselague' yešla'a nisdaon'. <sup>19</sup>Na' bchoj to beñe' chsed chlo'ede' dan' bzoj da' Moisésen' nach gwbigue' lao Jesúsen' na' gože'ne':

—Maestrw, sa'lena' le' gate'tez šejo'.

<sup>20</sup>Nach gož Jesúsen' le':

—Nita' xišna' beza' na' lecze chesyežin xišna' be dao' ca' zjazoa xil, be chaš le'e yaba, perw bibi xišna' neda' de ga yezi'laža', neda' naca' ben' gwseła' Diosen' golja' beñach.

<sup>21</sup>Na' bchoj yeto ben' naque'

Jesúsen' txen na' gože'ne':

—Xana', sa'lena' le' perw za' got xa'. Beñšca latje zgua'tec šjajcuaša'ne'.

<sup>22</sup>Jesúsen' gože'ne':

—Yo'o len neda'. Beñe' ca' zjanac yichjlažda'ogüe' ca che beñe' guat, legaue' guaccze yosocuaše' yezica'chle beñe' guat.

**Jesúsen' bcueze' to be' bdono' lo nisdao'***(Mr. 4:35-41; Lc. 8:22-25)*

<sup>23</sup>Beyož be' Jesúsen' diža' ca', gwyo'e lo' barcon' len beñe' ca' zjanaque' le' txen. <sup>24</sup>Na' šlac zej barcon' lo nisen' gwzolao gwyechj to be' bdono' na' nisdao' leze chas chatan' na' gwzolao cheyož nis lo' barcon', perw ba chtas Jesúsen'. <sup>25</sup>Nach bosyosbane' le' gosi'ene': —iXanto'! iBosla chio'! iBach chbiayi'cho!

<sup>26</sup>Nach Jesúsen' gože' legaue':

—¿Bixchen' chžebtecle ca'? ¿Nacxechen' bi chejle'le chia'?

Na' gwyase' na' gwdile' be' bdonon' len nisdao', na' la' gosebe'žiten.

<sup>27</sup>Na' beñe' ca' zjanaque' Jesúsen' txen besyebande' can' bene'na', nach gose' lježgaue':

—¿Noxe benga? lente be' bdono' na' len nisdao' chosozenaguen che da' že'.

**Čhope beñe' Gadara zjajo'o zjanyaze' da' xigüe'***(Mr. 5:1-20; Lc. 8:26-39)*

<sup>28</sup>Na' besežine' yešla'a nisdao' gan' chi' laž beñe' Gadara ca'. Na' cate' bechoj Jesúsen' lo' barcoa' bosošag čhope beñe' le', beñe' zjajo'o zjanyaz da' xigüe'

yichjlažda'ogaque'. Bene' quinga ba nite' capsantw na' gosacchgüe' bene' znia juisyw len bene' chesyěžague' na' gague no chac ta tnez. <sup>29</sup>Na' bososye'e gose'e Jesúsen':

—¿Bixchen' chgoša' chlaže' chio' len neto', Jesús? Naco' dogualje Xi'in Dios. ¿Zao' gwsaco' neto' na'a cate' bina' žin ža si'to' castigw?

<sup>30</sup>Na' gała'ze chesaš zan coš chesagwba'. <sup>31</sup>Nach da' xigüe' ca' gosata'yoen Jesúsen' gose'en le':

—Še yebejo' neto' yichjlaždao' bene' quinga, gwseła' neto' gan' nita' coš ca' na' ben latje šjajo'oto' yichjlažda'oban'.

<sup>32</sup>Nach gož Jesúsen' legaquen:

—Le šjajo'o.

Nach besyechojen yichjlaždao' bene' ca' na' jaseyo'on yichjlaždao' coš ca'. Na' besyeyetšjes coš ca' le'e ya'a gan' nita'ban', na' jaselažo'ba' lo' nesdaon' ga gosatba' gose'ejba' nis.

<sup>33</sup>Na' bene' ca' chosoyoe' cošen' besele'ede' dan' ba goquen na' bosyoxonje' jasyeyeže' bene' lagüe' yež yogo' can' ba goquen na' can' ba besyeyac bene' ca' gosolo' gosaz da' xigüen' yichjlažda'ogaquen'. <sup>34</sup>Nach yogo' bene' ca' že' yeža' jasešague' Jesúsen' na' cate' besele'ede'ne' gosata'yoede' le' yeze'e lažgaquen'.

Jesúsen' beyone' to bene' bi chda  
šła'a ni'a ne'e

(Mr. 2:1-12; Lc. 5:17-26)

**9** Nach Jesúsen' beyo'e lo' barcon' len bene' ca' zjanaque' le' txen besyelague' yešła'a nesdaon' par besyěžine' Capernaum gan' ba gwzoacze' sša. <sup>2</sup>Na' besežin xonj bene' zjanlene' to bene' xinj bene' bi chda šła'a ni'a ne'e, zjanxoe' le' to

lo cam dao'. Cate' gocbe'e Jesúsen' le gosejnilaže'ne' nach gože' bene' güe'na':

—Bebe xi'ina'. Ba bezi'xena' xtolon'.

<sup>3</sup>Na' bał bene' ca' chososed chosolo'ede' dan' bzoj da' Moisésen' gosende' dan' gož Jesúsen' bene' güe'na' na' gosone' xbab lo' yichjlažda'ogaquen' gosene': "Benga chnie' diža' bya' che Dios chne' ca', le chon cuine' ca Dios." <sup>4</sup>Jesúsen' gocbe'ede' ca nac da' cheseza'laže', na' gože' legaque':

—¿Bixchen' chza'laže'le ca' lo' yichjlažda'olen'? <sup>5</sup>Še yapa'ne': "Ba bezi'xena' xtolona'," bi nezele še napa' yela' gwnabia' cont yezi'xena' xtolen'. San še yapa'ne': "Gwyas na' gwda", na' nacbia' še napa' yela' guac gac can' gwnian'. <sup>6</sup>Perw neda' naca' bene' gwseła' Dios golja' benach gwlo'eda' le'e na'a zoa' yežlio nga napa' yela' gwnabia' cont yezi'xena' xtol'a benachen'.

Nach gože' bene' xinja':

—Beyas, beyoa' xcamon' na' beyej ližo'.

<sup>7</sup>Na' beyas bena', beze'e zjayde' liže'. <sup>8</sup>Na' bene' ca' besele'ede' can' goquen' besežebchgüe'. Na' gosonxene' Diosen' dan' be'e yela' guac che Jesúsen'.

Jesúsen' gwleje' Mateo cont goque'  
txen len le'

(Mr. 2:13-17; Lc. 5:27-32)

<sup>9</sup>Na' Jesúsen' gwdie' latje gan' chi' Mateo chchixjue' impuesto. Na' cate' ble'ede' le' na' gože'ne':

—Da len neda'.

Na' gwzoža' Mateon' gwyejlene' le'.

<sup>10</sup>Ca' goquen' ba chi' Jesúsen' liž Mateon' ba che'ej chagüe' txen len

zan bene' güechixjw na' len yeba<sub>le</sub>  
bene' güen da' xinj na' len bene' ca'  
zjanaque' txen len le'. <sup>11</sup>Na' bene'  
fariseo ca' cate' besele'ede' chi'  
Jesúsen' txen len bene' ca', gose'e  
bene' ca' zjanaque' le' txen:

—¿Nacxe<sub>chen</sub>' ben' chsed chlo'ede'  
le'e che'ej chagwlene' txen bene'  
güechixjw na' yeba<sub>le</sub> bene' güen da'  
xinj?

<sup>12</sup>Na' cate' Jesúsen' bende'  
xtiža'gaquen' na' gože' legaque':

—Bene' cbi chesacšene bitw  
cheseyažjde' bene' güen rmed. Bene'  
chesacšende', legaquen' cheseyažjde'  
bene' güen rmed. <sup>13</sup>Le šjased bi  
zeje Xtiža' Diosen' dan' nyojen žan:  
“Chaclaža' yeyaše' yeži'ilaže'le bene',  
gague con gotle beyixe' gonxenle  
neda'.” Gague bene' ba zjanaque'  
bene' güen len Diosen' zedeneyoeda'  
cont yesyetinjde' xtolen', san bene'  
güen da' xinjen'.

**Gosenabde' Jesúsen' bix<sub>chen</sub>' bene'  
ca' zjanaque' le' txen bi gosone'  
gwbas**

(Mr. 2:18-22; Lc. 5:33-39)

<sup>14</sup>Nach bene' ca' chesone' txen len  
Juan ben' bzoe' bene' nis gosebigue'  
lao Jesúsen' na' gose'ene':

—Neto' na' len bene' fariseo ca'  
chonchguato' gwbas, perw bene' ca'  
zjanaque' le' txen bi chesone' gwbas.  
¿Bix<sub>chen</sub>'?

<sup>15</sup>Nach gož Jesúsen' legaque':

—¿Guac yesezoa bene' yela'  
güine' bene' chesaxe' to ga chac  
yela' güešagna' šlac ben' bšagnan'  
zoalene' legaque'? Še zoa ben'  
bšagnan' bi gac yesegüine'de'. Perw  
žin ža cate' bich soe' len legaque',  
cana'ch yesone' gwbas. Na' ca'cze

naquen len neda' na' len bene' ca'  
zjanaque' neda' txen.

<sup>16</sup>Nono zoa bene' ch<sub>chine</sub>' lache'  
cobe cont yoda' xe' da' de'exo', le  
lache' coben' yeben' cate' chiben' na'  
chezan' lache'exon', na' gan' nchezan'  
gacchen da' xen. <sup>17</sup>Na' lecze neca  
zoa bene' chgue'e vino cobe  
lo' bzod yide'exo', le vino coben'  
chšon' yide'exon' na' lalje vino na'  
yesebiayi' chopen. San chesegue'e  
vino coben' lo' yid cobe cont bitw  
cuiayi' vinon' len yiden'.

**Jesúsen' beyone' xi'in Jairo na'  
beyone' yeto no'ole bene' gwdane' xe'**

(Mr. 5:21-43; Lc. 8:40-56)

<sup>18</sup>Na' ne' choe'te Jesúsen' dižan',  
bžin to bene' gwnabia' bzoa xibe'  
lao Jesúsen' na' gože'ne':

—Za' gotte to xi'ina' no'ole. Yo'ošca  
xo<sub>a</sub> taco' yichjbe' cont yebambe'.

<sup>19</sup>Na' gwzoža' Jesúsen' na'  
gwche'e bene' ca' zjanaque' le' txen  
ja'aclene' bene' gwnabian'. <sup>20</sup>Na'  
šlac zja'aque' liž bene' gwnabian'  
zej to no'ole nagüe' legaque', bene'  
ba goc šižinw iz chzoe' gwba<sub>o</sub>', na'  
bene' byen gwbigue' cože' Jesúsen'  
gwdane' lox xen'. <sup>21</sup>Le bene' xbab lo'  
yichjlažda'ogüen', gwne': “Con še ba  
gwdana' xen' nach yeyacda'.” <sup>22</sup>Na'  
gwyechj Jesúsen' ble'ede' no'olen',  
gože'ne':

—Bendiplažo' xi'ina'. Ba beyacdo'  
dan' chejnilažo' neda'.

Na' la' beyactede'.

<sup>23</sup>Cate' bžin Jesúsen' liž bene'  
gwnabian' na' ble'ede' bene' zan  
zjaže' chesone' sšag chesebežchgüe'  
na' ba nita' bene' chosocuež bžejo  
par yosocuaše'be'. <sup>24</sup>Na' gože'  
legaque':



—Le yechoj ngale. Bi' no'ole daon' bina' gatbe', san chtasben'.

Na' bene' ca' bosoxiže' gosonle' che'. <sup>25</sup>Na' beyož bešaše' yogo'lol' bene' ca', nach gwyo'o Jesúsen', bexue' taca' bi' no'ol guaten', na' beyasbe'. <sup>26</sup>Na' ca' nac yela' guac dan' ben Jesúsen', gwxa' diža' chen yogo' yež dan' zjachi' do na'.

### Jesúsen' beyone' čhope bene' lchol

<sup>27</sup>Cate' beza' Jesúsen' len bene' ca' zjanaque' le' txen, ja'aclen čhope bene' lchol' legaque' na' gosene' zižje:

—Le' naco' xi'in diaža che da' rey David, beyaše'laže'sca neto'.

<sup>28</sup>Na' cate' Jesúsen' len bene' ca' zjanaque' le' txen besežine' yo'o gan' zjanite' na' besyeyo'e, na' lecze goso'o bene' lchol' ca'. Nach Jesúsen' gože' legaque':

—¿Chejle'le guac gona' cont yele'ele?

Nach gose'ene':

—Chejle'to' Xanto'.

<sup>29</sup>Nach Jesúsen' gwdane' yejlaogaquen', na' gože' legaque':

—Yele'ele, le chejnilaže'le neda'.

<sup>30</sup>Nach besyeyac yejlaogaquen' besyele'ede'. Na' Jesúsen' gože' legaque' bicze yeso'e diža' can' goc besyeyac yejlaogaquen'.

<sup>31</sup>Na' besyeya'aque' na' gate'tez ja'aque' doxen distritw Galilean' goso'e diža' ca' nac dan' ben Jesúsen' len legaque'.

### Jesúsen' beyone' to bene' bi goc nie'

<sup>32</sup>Na' cate' besyeya'ac bene' ca', la' besežinte bene' yoble zjanči'e to bene' bi goc nie', na' yo'o yaz da' xigüen' yichjlažda'ogüen'. <sup>33</sup>Jesúsen' bebeje' da' xigüen' na' la' beñete

bená. Na' bene' zan besele'ede' can' goquen' besyebanchgüede', na' gosene':

—Chio' bene' Israel, da' nechon' za' ble'echo yela' guac dan' nac ca'.

<sup>34</sup>Perw na' bene' fariseo' ca' gosene': —Satanás dan' nac xan da' xigüe' ca' chaclenen le' cont chebeje' da' xigüen' zjajo'o zjanyaz yichjlaždao' bene'.

### Jesúsen' cheyaše' cheži'ilaže'de' beñachen'

<sup>35</sup>Na' Jesúsen' len bene' ca' zjanaque' le' txen ja'aque' to to yež na' to to ciuda da' zjachi' do na' bzejni'ide' bene' Israel lo' yodao' čhegaque' ca', gwdixjue'ede' diža' güen can' nabia' Diosen' yichjlaždao' bene' yosozenag che'. Na' Jesúsen' beyone' bene' ca' chese'e bite'teze yižgüe' na' bite'teze da' chesac čhegaque'. <sup>36</sup>Na' ble'ede' ba besežag bene' zan na' beyaše' beži'ilaže'de' legaque', le gocbe'ede' chesacžejlaže' nac yesone' na' gague no zoa yesaclen legaque' len yogo' dan' chesežaglaogüe'. Nite' ca' nita' no xila' be nono de gwyoe legacba'. <sup>37</sup>Nach gože' bene' ca' zjanaque' le' txen:

—Chyažje bene' zan yeseyixjue'ede' xtiža' Diosen', perw to čhoppa bene' nita' yeseyixjue'eden'. Na' bene' yosozenague' che Diosen' zjazaca'lebe' ca' to coseš xen da' chyažjen yedoben. <sup>38</sup>Da'nan' le nabe Xancho Diosen' sela'che' bene' yesaclene' chio' yotobcho coseš chen'.

### Jesúsen' gwleje' bene' šižinw ca' gosaque' txen len le'

(Mr. 3:13-19; Lc. 6:12-16)

**10** Jesúsen' botobe' bene' šižinw ca' zjanaque' le' txen na'



bnežjue' legaque' yela' gwnabia' cont besyebeje' da' xigüe' lo' yichjlaždao' bene', na' cont besyeyone' bene' bite'teze yižgüe' da' chese'ede' na' bite'teze da' chesac čhegaque'.

<sup>2</sup>Quinga zjale bene' šižinw ca': Simón ben' lecze le' Pedro ben' goque' bene' blao, na' Andrés bene' biše' Pedroa', na' xi'in Zebedeon' Jacobo len Juan, <sup>3</sup>na' Felipe, na' Bartolomé, na' Tomás, na' Mateo ben' goc bene' güechixjw, na' Jacobo xi'in Alfeo, na' Lebeo ben' lecze le' Tadeo, <sup>4</sup>na' Simón ben' ben txen len partidw cananista, na' Judas Iscariote ben' bdie' Jesúsén' lo' na' ben' besegue'ede' le'.

**Jesúsén' gwsele' bene' šižinw ca'  
jasedixjue'ede' xtiža' Diosén'**

(Mr. 6:7-13; Lc. 9:1-6)

<sup>5</sup>Na' Jesúsén' gwsele' bene' šižinw ca' jasedixjue'ede' xtiža' Diosén', gože' legaque':

—Bitw šejle laž bene' cbi zjanaque' bene' Israel, na' neca šejle yež ca' zjachi' distritw Samaria. <sup>6</sup>Le šja'ac gan' že' bene' Israel bene' ba zjambiyi' dan' bitw na' yesombi'e Diosén'. <sup>7</sup>Le šja'ac le šjatixjue'ede' ba bžin ža Diosén' ben' zoa yaban' nabi'e yichjlaždao' bene' yosozenag che'. <sup>8</sup>Le yeyon bene' chesacšene, le yeyon bene' ca' chese'e yižgüe' dan' nzi' lepra, le yosban no bene' ba gosat, na' le yebej da' xigüe' ca' zjajo'o zjanyaz lo' yichjlaždao' bene'. Diosén' bibi bchixjue' le'e da' ba bene' le'e yela' guac chen' cont gonle da' quinga, da'nán' le gaclen bene' na' bibi gwchixjwlene'.

<sup>9</sup>Bitw gua'le mechw de oro, de plata o de cobre šlac co'ole nez.

<sup>10</sup>Na' neca gua'le bzod, o yeto xcamisle, neca gua'le yel, na' neca goxe'le xis da' gwčhiše'le. Ca nac le'e chonle xšinan' zaca'le par gon bene' da' ye'ej da' gagwle gan' sela' le'ena'.

<sup>11</sup>'Na' gate'tez ciuda o yež ga žinle, le nab še zoa to bene' güen bene' yebede' gwlebe' le'e ližen'. Na' še gwlebe' le'e, na'teze soale. Cate'ch žin ža šejle ga yoble, cana'ch yeza'le. <sup>12</sup>Na' cate' žinle liže'na', le gwguape' tiox, na' le nablaze' soa cueze' binlo len yichjlažda'ogüe'. <sup>13</sup>Na' še nita' bene' chesaclaže' yesezoa yesebeze' binlo len yichjlažda'ogaquen', na' gac can' gwñablaze'le par yesezoa yesebeze' binlo. Perw še nono zoa bene' chesaclaže' yesezoa yesebeze' binlo len yichjlažda'ogaque', bi gac dan' ba gwñablaze'len'. <sup>14</sup>Na' še zoa ga bi yosolebe' le'e neca yosozenague' chele, cate' yeza'le na', le cuibe ni'alen' yo bište cont nacbia' bi checa'ale čhegaque'. <sup>15</sup>Da' mal xen goson bene' ciuda Sodoma na' bene' ciuda Gomorra cani', perw da' li žia' le'e, cate' žin ža gac juisyw bene' ca' bi bosolebe' le'e ližen' yesale'chde' clel ca' bene' Sodomán' na' bene' Gomorran'.

**Gac da' saca'zi'cho**

<sup>16</sup>'Neda' sela' le'e šjatixjue'ele xtižan' len bene' ca' chesegue'ede' le'e. Zaca'leble ca' xila' dao' ben' chja'ac gan' že' beco'yo. Da'nán' cheyala' gacle bene' yo'ochgua xbab na' bene' xenlaže' len legaque'. <sup>17</sup>Le gwsaca' len bene' ca' chesegue'ede' le'e. Nita' bene' yesone' le'e lo' na' bene' gwnabia' ca' cont yesot yese'yine' le'e lo' yodao' čhegaquen'.

<sup>18</sup>Nach lecze dan' chejnilaže'le neda' nita' bene' yeseche'exo<sup>x</sup>je' le'e do lao rey, do lao nochle bene' gwnabia'. Na' can' güe'lenle lega<sup>q</sup>ue' xtižan', lecze can' güe'lenle xtižan' len bene' bi zjanaque' bene' Israel. <sup>19</sup>Perw cate' yesezene' le'e na' yeseche'e le'e lao bene' ca', bi cuec yichjle nac yoži'ile xtiža'gaquen' o nacle nale. Lo hor na'teze Diosen' gwzejni'ide' le'e bin' cheyala' nale. <sup>20</sup>Le gague le'eczen' nele, san Spiritw che Xacho Diosen' gonen ga nale bin' cheyala' nale.

<sup>21</sup>'Cana' bal benach yesechje' yesone' bene' biše' golje' lo na' bene' yesote' lega<sup>q</sup>ue', na' nita' bene' yesone' xi'inga<sup>q</sup>ue' lo na' bene' yesot legacbe', na' nita' bene' yesone' xaxne'e lo na' bene' yesote' lega<sup>q</sup>ue'. <sup>22</sup>Yogo'ze bene' yesegue'ede' le'e dan' chejnilaže'le neda', perw note'tez le'e gwyo gwchejlaže'le cont bi cuejyichjle dan' chejnilaže'le neda' žinten gatle, nach šjayzoale len Diosen'. <sup>23</sup>Še bene' že' to yež yosyola<sup>q</sup>ue' le'e, le yeza'teze na' yeyejle ga yoble. Bina' yeyož šjatixjue'ele xtižan' yogo' yež gan' že' bene' Israel ca' cate' yida' da' yoble, neda' naca' ben' gwsela' Diosen' golja' benach.

<sup>24</sup>'Ca nac cate' to bene' chsede' len to maestrw, bitw nacho naque' bene' blaoch ca maestroa'. Na' to mos bitw naque' blaoch ca xanen'. <sup>25</sup>Con cheyala' chazlaže' ben' chseda' še yežinlaže' ga<sup>q</sup>ue' ca maestrw che' na' cheyala' chazlaže' mosen' še yežinlaže' ga<sup>q</sup>ue' ca xanen'. Neda' naca' Xanle, na' bene' chesegue'ede' neda' chesene' chona' txen len Beelzebú dan' nac xan yogo' da'

xigüe', na' naquechxe yesene' che le'e nacle neda' txen.

**Cheyala' že**bc**ho castigw dan' gon  
Diosen' che bene' güen da' xinj**

(Lc. 12:2-9)

<sup>26</sup>'Bitw žeble bene' bite'teze da' yesonde' le'e, le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'. <sup>27</sup>Da' zan dan' chsed chlo'eda' le'e dan' bi chsed chlo'eda' yezica'chle bene'. Na' le'e le gwsed le gwlo'en yogo'lol bene', na' le gon cont bene' zan yesejni'iden'.

<sup>28</sup>Bitw cheyala' žeble bene' ca' yesot le'e. Lega<sup>q</sup>ue' bitw gac bi yesonde' yichjlažda'olen'. Cheyala' žeble Diosen', le len' nape' yela' gwnabia' cont gwžiaye'e cuerp chelen' len yichjlažda'olen' lo yi' gabilen'.

<sup>29</sup>'Nezecho byine dao' ca' bitw bi zjazaca'tecba', perw bitw nacho toba' gat sin cbi güe' Xacho Diosen' latje. <sup>30</sup>Na' ca nac chio', chaquechgüe Diosen' chio' na' neztede' bal yiša' yichj to tocho žia. <sup>31</sup>Da'nan', bitw žeble, le zaca'chle clel ca zan byin dao' ca'.

**Cheyala' güe'cho diža' len bene'  
ye'cho lega<sup>q</sup>ue' nombia'czcho  
Jesucriston'**

(Lc. 12:8-9)

<sup>32</sup>'Na' note'teze bene' še cho'e diža' len benachen' che'ene' chejle'e chia', lecze ca' neda' gua' diža' len Xa' ben' zoa yaban' yapa'ne' bena' naque' neda' txen. <sup>33</sup>Na' note'teze bene' še cho'e diža' len benachen' che'ene' bitw chejle'e chia', lecze ca' neda' gua' diža' len Xa' ben' zoa yaban' yapa'ne' bena' bi naque' neda' txen.

**Yesediḷe beṇe' neche dan' bid  
Jesúsen'**

(Lc. 12:51-53; 14:26-27)

<sup>34</sup>'Bitw gonḷe xbab beṇe' že' yežlio nga yesezoa yesebeze' binḷo len lježgaque' na'a ba bida'. Bitw yesezoa yesebeze' binḷo san yesediḷe'. <sup>35</sup>Lagüe dan' ba bida' yesediḷ beṇe' byo len xe' na' no'olen' len xne'e, na' yesediḷ xo'oliž no'ole len le'. <sup>36</sup>Beṇe' lo' yo'oze yesegue'e lježe'.

<sup>37</sup>'Note'tez beṇe' še chaquechde' xe' o xne'e clel ca chacde' neda', bitw zaque' gone' txen len neda'. Lecze ca' še chaquechde' xi'ine' clel ca neda' bitw zaque' gone' txen len neda'. <sup>38</sup>Na' note'teze' še bi chzenague' chia' lagüe' dan' chacde' yosoči yososaca' beṇe' le', bitw zaque' cont gaque' neda' txen še ca'. <sup>39</sup>Note'teze beṇe' chacde' gone' cont bi či saque' o cont nono yesot le', benan' cuiayi'. Na' note'teze beṇe' chzanlaže' cuine' saca'zi'e o gate' ne chia' neda, ba de yela' mban che' toli tocane'.

**Beṇe' ca' yesenita' mbalaz cate'  
yesyežine' yaba**

(Mr. 9:41)

<sup>40</sup>'Note'teze beṇe' chosolebe' le'e chosolebe' neda', lecze chosolebe' Dios ben' gwseḷe' neda'. <sup>41</sup>Na' note'teze beṇe' yebede' gwlebe' beṇe' cheso'e xtiža' Diosen', mbalaz soe' cate' yežine' yaban' lecze ca mbalaz soa ben' cheso'e xtiža' Diosen'. Na' mbalaz gac che beṇe' ca' cheson can' chazlaže' Diosen' caten' yesyežine' yaban'. Na' note'teze beṇe' yebede' gwlebe' legaque' da' chesone' can'

chazlaže' Diosen', lecze mbalaz soe' caten' yežine' yaban'. <sup>42</sup>Note'teze beṇe' gwnežjue' la' to xiga'ze nis ye'ej beṇe' chejnilaže' neda', la' gwnežjuen' beṇe' bi naque' beṇe' blao, da' licze gona' cont soe' mbalaz caten' yežine' yaban'.

**Juanna' gwseḷe' chope beṇe' zjanaque'  
txen len le' gan' zoa Jesúsen'**

(Lc. 7:18-35)

**11** Cate' beyož ben Jesúsen' mandadw can' yeson beṇe' šižinw ca' gwleje' cont gosaque' le' txen, beze'e latjen'. Na' gwyeje' yež ca' zjachi' do na' jased jalo'ede' xtiža' Diosen' len beṇe' ca' že'na'.

<sup>2</sup>Juanna' ben' bzoe' beṇe' nis, cana' ba die' ližya. Na' bende' diža' che yogo' dan' chon Criston' ben' gwseḷa' Diosen' cont yedenabi'e. Nach Juanna' gwseḷe' chope beṇe' zjanaque' txen len le' gan' zoa Jesúsen', <sup>3</sup>jaseže'ne': —žLen' naco' ben' chbezto' seḷa' Diosen', še cheyaḷa' cuezchto' yid beṇe' yoble?

<sup>4</sup>Nach Jesúsen' gože' legaque': —Le šjaya'ac na' le šjajež Juanna' doxen da' ca' ba ble'ele na' da' ca' ba benele. <sup>5</sup>Ba ble'ele chona' cont chesyee'e no beṇe' lchoḷ, na' chesyeda no beṇe' zjanxinj ni'e. Na' lecze beṇe' gose'e yižgüe' dan' nzi' lepra besyeyacde', na' chesyeyene no beṇe' cuež. Ba ble'ele bosbana' no beṇe' guat, na' ba benele choa' diža' güen chia' len beṇe' yaše' ca'. <sup>6</sup>Mbalaz zoa beṇe' chejle'e chia' na' bi chdebde'.

<sup>7</sup>Na' cate' besyeya'ac beṇe' ca' zjanaque' txen len Juanna', nach Jesúsen' be'lene' beṇe' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿Chaque' quil ca'ale? Bi naque' ca'.<sup>8</sup> ¿Nac naque' caten' jale'elne'? ¿Nyaze' lache' šagüe'? ¿še bitw? le bene' zjanyaz lache' šagüe' nite' yo'o güenchgua ca no liž bene' gwnabia'.<sup>9</sup> ¿Noxen' jale'ele? ¿to ben' choe' xtiža' Diosen'? Da' li cho'e xtiža' Dios, perw žia' le'e, zaca'che' ca note'teze bene' choe' xtiža' Diosen'.<sup>10</sup> Che benga nyojen le'e Xtiža' Diosen', žan:

Neda' Dios se<sub>la</sub>' to bene'  
cuialagüe' laguo' gü'e'e xtižon'  
cont cate' šejo' ba zjanita' bene'  
yosozenague' chio'.

<sup>11</sup>Da' li žia' le'e notoch no benačh na' soa bene' naquech bene' blao ca Juanna' ben' bzoe' bene' nis. Perw na' note'tez bene' chzenague' che Diosen' cont nabia' Diosen' yichjlažda'ogüen', la'czla' naque' bene' la'zelagüe' bene' bibi zaca', ba chejni'ichde' chia' clel ca Juanna'.

<sup>12</sup>Gwzolaon caten' Juanna' gwduxjue'ede' xtiža' Diosen' na' bzoe' bene' nis na' chžinten na'a, bene' zan chesone' ga zelao chesezaquede' cont nabia' Diosen' yichjlažda'ogaque'.

<sup>13</sup>Na' lecz gwzolaon cani'te bžinten cate' bla' Juanna' gwduxjue'ede' xtiža' Diosen', ley dan' bzoj da' Moisés na' dan' bosozoj yezica'chle bene' gosole xtiža' Diosen' bzejni'in chio' che yela' gwnabia' che Diosen'.<sup>14</sup>Na' Xtiža' Diosen' dan' nyojen žan yid yeto bene' yedeyene' can' ben Elías ben' be' xtiža' Diosen' cani'. Che Juanna' žan ca', con še šejle'le.<sup>15</sup>Le'e žia nagle da' chene, le gwzenag xtiža'na'.

<sup>16</sup>¿No gwsaca'lebda' le'e zoale na'a? Gwsaca'lebda' le'e ca bidao' dan' bicze bi chlebele. Nacle ca

bidaon' nita' gan' chac ya'a chese' lježbe':<sup>17</sup>”Ba bcuežto' bžejo, neca bya'ale, na' ba bilyaše'to, neca gwchežle.”<sup>18</sup>Juan ben' bzoe' bene' nis bide' laole nga, bitw gü'e'ej gwdagwšagüe' can' chese'ej chesagw bene' yoble, nach gwnale che': “Yo'o yaz da' xigüen' yichjlažda'ogüe'.”<sup>19</sup>Na' neda', Diosen' gwsele' neda' golja' benačh, na' chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw. Na' lecze žale chia' naca' xmigw bene' güechixjw ca' na' xmigw yezica'chle bene' güen da' xinj. Perw nacbia' yela' sina' che Diosen' dan' napt'o' naquen da' güen, le ba ble'eczele can' chon neto' napt'on'.

**Yež ca' gan' bitw bosozenague' che  
Jesúsen'**

(Lc. 10:13-15)

<sup>20</sup>Nach Jesúsen' be'e xtiža' bene' ca' že' yež ca' gan' bene' da' zan da' zaca' yesyebande', na' gwdi<sub>le</sub>' legaque' dan' bitw besyetinjde' xto<sub>la</sub>'gaquen'. Nach gwne':

<sup>21</sup>—iNyaše'chguaze gac che le'e bene' Corazín! iNyaše'chguaze gac che le'e bene' Betsaida! Bene' ca' nita' Tiro na' Sidón ba besyetinjde' xto<sub>la</sub>'gaque' šaca' blo'egacda'ne' yela' guac chia' ca dan' ba blo'eda' le'e. Na' bosoš'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e bene' ba boša' yichjlažda'ogaquen'.<sup>22</sup>Žia' le'e, saca'zi'chle clel ca bene' že' Tiro na' Sidón cate' žin ža gac juisyw.<sup>23</sup>Na' le'e nita'le Capernaum chonle xbab šeca Diosen' gone' gacxenchgual

cate' yežinle yaba gan' zoe'na'. Bi gone' ca', san sele' le'e lo yi' gabil. Šeca' bena' da' zaca' yesyebane bene' ca' gwnita' Sodoman' can' ba bena' laole nga, zesyetinjde' xtoł'agaquen', na' ne' chi' ciudan' šeca'. <sup>24</sup>Žia' le'e, gale'chle clal ca bene' Sodoman' cate' žin ža gac juisyw.

**Bene' ca' yesejnilaže' Jesúsen' nite' mbalaz**

(Lc. 10:21-22)

<sup>25</sup>Nach Jesúsen' boł güiže' Diosen', gwne':

—Xa', le' naco' Xan yežlio nga na' Xan yaba, chnabi'o doxen. Na' chona' yela' choxclen chio' ba bzejni'ido' bal' bene' diža' güen chio' quinga. Bzejni'ido' bene' ca' gosacbe'e cheseyažjde' no gwsed gwlo'e legaque'. Na' bitw bzejni'ido' bene' ca' cheson xbab zjanaque' bene' sina' na' bene' zjanajni'i.

<sup>26</sup>Beno' ca' Xa', le can' gwnalažo'.

<sup>27</sup>Na' gože' bene' ca' že'na':

—Xan' ba bene' lo na' gona' cont chombia' bene' le'. Le' nombia'yane' neda', na' neda' nombia'yana' le'. Na' bene' ca' ba gwleja' ba zjanombi'e Xan'. Na' noch no zjanita' bene' zjanombi'e Xan', ne neda' ca zjanombi'e. <sup>28</sup>Le'e chjaxaque'laže'le na' chacyaše'laže'le da' chaquele nac gonle cont soale binlo len Diosen', chata'yoeda' le'e, le šejnilaže' neda'. Neda' gona' ga soale mbalaz. <sup>29</sup>Le gwzenag chia' na' gwzejni'ichda' le'e. Neda' naca' bene' xenlaže' na' bene' šagüe' na' gona' ca soale mbalaz lo' yichjlažda'olen'. <sup>30</sup>Dan' žia' cheyala' gonle bitw naquen zed, na' can' chsed chlo'eda' bitw naquen zdebe.

**Ža che Dios bene' ca' zjanaque' Jesúsen' txen goselečhje' trigon' da' gosagüe'**

(Mr. 2:23-28; Lc. 6:1-5)

**12** Ca tiempen' gozac to ža che Diosa' cate' Jesúsen' gwdie' len bene' ca' zjanaque' le' txen gan' nyaž trigw. Nach bene' ca' gosedone', na' goselečhje' dao che trigon' cont gosagüe' xsenna'. <sup>2</sup>Na' besele'e bene' fariseon' can' gosone', na' gosi'e Jesúsen':

—Gwñašc' ibixchen' bene' ca' zjanaque' le' txen chesone' žin da' bi de lsens goncho ža che Dios?

<sup>3</sup>Na' Jesúsen' gože' legaque':

—İBina' gwlable can' ben da' rey Davin' to ža cate' le' na' bene' lježe' ca' gosedone'? <sup>4</sup>Gwyo' Davin' ga nac liž Dios na' gwdagüe' yetextil da' nac che Dios da' bi chac gagw bene' bi nac bxož, na' lecze bnežjue' che bene' zja'ac len le'. <sup>5</sup>Na' ibina' gwlable le'e ley dan' bzož da' Moisés gan' žan bxož ca' chesoncze' mandaw che yodao' blaon' yogo' ža che Diosen'? Na' bitw nacho zjanape' doła' dan' chesone' žin ža che Diosen'. <sup>6</sup>Žia' le'e, neda' zoa' nga zaca'cha' clal ca yodao' blaon'. <sup>7</sup>Xtiža' Diosen' dan' nyožen žan: “Chaclaža' yeyaše' yeži'ilaže'le bene', gague con gotle beyixe' par gonxenle neda'.” Šaca' chejni'ile bi zejenna' žan ca', bilja nale bene' quinga zjanape' doła', le bibi da' mal chesone'. <sup>8</sup>Žia' le'e, naquen' lo na' nia' bi da' nac güen goncho cate' nac ža che Diosen', neda' naca' ben' gwseła' Diosen' golja' benach.

**Beyac to bene' nxo'on šla'a taque'***(Mr. 3:1-6; Lc. 6:6-11)*

<sup>9</sup>Na' cate' Jesúsen' beze'e latjen',  
na' gwyo'e to lo' yodao' che chio'  
bene' Israel. <sup>10</sup>Na' lo' yodaon' zoa to  
bene' nxo'on šla'a taque', nach bene'  
fariseo ca' gose'e Jesúsen':

—¿De lsens yeyoncho bene' xinj ža  
che Diosen'?

Gose'ene' ca' cont de da'  
yosode'ede' yesagüe' xya.

<sup>11</sup>Nach Jesúsen' gože' legaque':

—Še nita' xila' dao' chele na' lažo'  
toba' to lo' yechw zitjw ža che  
Diosen' cate' bi de lsens goncho žin,  
¿cbi la' yebejteleba' lo' yechon' lo  
žana'? <sup>12</sup>Da'na'na' žia' le'e de lsens  
gaclencho bene' ža che Diosen'. Le  
zaca'ch to bene' clcl ca to xila' dao'.

<sup>13</sup>Nach Jesúsen' gože' ben' nxo'on  
taque'na':

—Bli naon'.

Na' blien' na' taquen' beyaquen  
binlo can' nac dan' yešla'a. <sup>14</sup>Nach  
bene' fariseo ca' besyežaše' yodaon'  
na' bosoxi'e nacle yesone' yesote'  
Jesúsen'.

**To dan' bzoj da' Isaías che Jesúsen'**

<sup>15</sup>Gocbe'e Jesúsen' can' bosoxi'a  
bene' fariseo ca' na' gwze'e gwyeje'  
ga yoble. Bene' zan ja'aclene' le', nach  
beyone' yogo' bene' ca' chesacšene.

<sup>16</sup>Na' bene' mandadw nono  
yesoe'lene' diža' non' beyon legaque'.

<sup>17</sup>Bene' ca' cont goc can' ža Xtiža'  
Diosen' dan' bzoj da' Isaíasen', žan:

<sup>18</sup>Bengan' naque' xmosa', ben'  
gwleja' cont gone' can'  
chazlaža'.

Chacchgüeda' le', na' chbeda'  
che'.

Na' neda' seła' Spiritw chian'  
soateze soan len le'.

Na' chixjue'ede' yogo'loj bene'  
can' chazlaža' yesone'.

<sup>19</sup>Bitw gacyože' len bene', neca  
yosye'e,

na' neca nie' zižjo lo nez cont  
yesene bene' bin' že'.

<sup>20</sup>Bi gwzoe' ca'ale bene'  
chesejnilaže' le' late' lasze.

Soe' gaclene' legaque'.

Nach žin ža gone' cont gac con  
da' zej to licha lo yežlion'.

<sup>21</sup>Na' bene' že' yogo' naciónna'  
yesebeze' gaclene' legaque'.

**Gosene' Jesúsen' bebeje' da' xigüe'  
len yela' guac che Beelzebú***(Mr. 3:19-30; Lc. 11:14-23; 12:10)*

<sup>22</sup>Na' zoa to bene' lchoj na' neca  
goc nie', na' yo'o nyaz da' xigüe'  
yichjlažda'ogüe' na' jasesane'ne' lao  
Jesúsen'. Na' Jesúsen' bebeje' da'  
xigüen' yo'o nyaz yichjlaždao' ben'  
na' la' bele'etede' na' gocte bene'.

<sup>23</sup>Na' yogo' bene' ca' besele'ede'  
can' goca' besyebanchgüede'. Nach  
gose'e lježe':

—¿Nac benga ben' chbezcho yide'  
lao diaža che da' rey David?

<sup>24</sup>Perw cate' bene' fariseo ca'  
gosende' diža' quinga gosene':

—Bitwbi yela' guac nap benga. Le  
Beelzebú dan' nac xan da' xigüe' ca'  
chaclenen le' cont chebeje' da' xigüe'  
zjajo'o zjanyaz yichjlaždao' bene'.

<sup>25</sup>Gocbe'e Jesúsen' can' goson  
bene' fariseo ca' xbaben', nach gože'  
legaque':

—Note'teze gobiern še choje'  
chop šon cuen na' yeyoža' yesedile'  
legacze', cuiayi' gobierna'. Na' lecze  
še bene' že' bite'teze yež yesaque'

chople na' yesedile' legacze', lecze bi sibia' yež chegaquen' še ca'. Na' še bene' lo' bite'teze yo'o yesechoje' chople na' yesedile' legacze', gague sša yesenite' txen. <sup>26</sup>Lecze ca' še Satanásen' yebejen yeto da' xigüe' yo'o nyaz yichjlaždao' bene', cuiayi' yela' chnabia' chen, le chdillen cuinen še ca'. <sup>27</sup>Le'e žale Beelzebún' chaclenen neda' cont chebeja' da' xigüe' ca'. Šaca' naquen can' žalen', lecze zejen Beelzebú dan' chnabia' da' xigüen' chaclenen bene' lježle chesyebeje' da' xigüe' zjajo'o zjanyaz yichjlaždao' bene'. Na' bene' lježle ca'ze chosolo'e clelen' chnele. <sup>28</sup>Spiritw che Diosen' chonen neda' yela' guac cont chebeja' da' xigüe' ca', na' da' chona' ca' chlo'en ba bžin ža nabia' Diosen' yichjlaždao' bene' yosozenag che'.

<sup>29</sup>'¿Nac gac šo' bene' gwban liž to bene' gual na' que'e bi da' de che' še bi zgua'tec gwcheje' bene' guala? Lete gone' ca' nach gac que'e bi da' de che'.

<sup>30</sup>'Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenagüe' chia'.

<sup>31</sup>'Da'n'an' žia' le'e, yogo' da' xinj da' chon benačh, na' yogo' diža' bya' dan' chesene' che Diosen', Diosen' yezi'xene' chen, perw note'teze bene' chne' yela' ya' che Spiritw che Diosen', gwbat yezi'xen Diosen' che'. <sup>32</sup>Na' note'teze bene' še ne' yela' ya' chia' neda' naca' ben' gwsela' Diosen' golja' benačh, Diosen' yezi'xene' che', perw note'teze bene' še ne' yela' ya' che Spiritw che Diosen', gwbat yezi'xen Diosen' che' na'a na' bate'teze.

**Diža' da' güe'cho chlo'en bin' yo'o lo' yichjlažda'ochon'**

(Lc. 6:43-45)

<sup>33</sup>'Ca nac yag frut ca', yag dan' nac yag güen, frut güencze chbian, na' yag da' bi nac yag güen, lecze frut da' bi nac güen chbian. Con can' nac da' chbia to to yaguen' nezecho bi yaga'. <sup>34</sup>Na' ca'czen' nac len le'e nacchgual bene' zgot na' bene' gwxiye'. Bitw gac güe'le diža' šagüe' dan' nacle bene' laždao' xi'a. Le yogo'te diža' da' chchoj cho'achon', lo' yichjlažda'ochon' nan' za'aquen. <sup>35</sup>To bene' laždao' xilaže' cho'e diža' šagüe', le can' nac lo' yichjlažda'ogüe' nan' cho'e dižan'. Na' to bene' laždao' xi'a cho'e diža' xi'a, le can' ža lo' yichjlažda'ogüen'. <sup>36</sup>Na' žia' le'e, cate' žin ža gon Diosen' yesežaglao yogo' bene' cheson da' xinj toli tocanē, cana' yogo'lo' bene' yosodie' cuent che yogo' diža' dan' ba goso'e da' bitwbi zjazacan'. <sup>37</sup>Na' con ca diža' dan' choe'le, Diosen' choglagüen' chele še naple doła' o še bi naple doła'.

**Bene' bi bosozenag che Diosen' gosenabe' gon Jesúsen' to yela' guac**

(Mr. 8:12; Lc. 11:29-32)

<sup>38</sup>Nach bal' bene' ca' chososed chosolo'e dan' bzoj da' Moisés, na' bene' fariseo ca' gose'e Jesúsen': —Maestrw, chaclaže'to' gono' to yela' guac da' le'eto' cont nezeto' še da' licze Diosa' gwsele' le'.

<sup>39</sup>Nach Jesúsen' gože' legaque': —Le'e zoale na'a nacchgual bene' laždao' xi'a na' ba gwlejyichjle Diosen'. Na' chnable gona' yeto yela' guac da' le'ele cont nezele



še Diosa' gwsele' neda', perw bi gona' can' chnablana', le ba ble'ele da' ca' chona'. Dan' gon Diosen' len neda' cont nezele le'na' gwsele' neda' naquen ca da' bene' len da' Jonás ben' be' xtižen' cani'. <sup>40</sup>Cate' za' šej Jonásen' Nínive, Diosen' bene' cont to beł xen be yo'o lo' nisdaon' gwdebba' le' na' šone ža šone yel gwo'e lo' le'eban'. Na' ca nac neda', gata' na' gaša', na' yeyoža' šo'a lo' ba šone ža šone yel. <sup>41</sup>Na' cate' žin ža gon Diosen' cont yogo' bene' cheson da' mal yesežaglagüe' toli' tocane, žana' bene' Nínive bene' ba gosat yedescuiše' le'e mbanle' na'a lao Diosen', le' legaque' besyetinjde' xtolen' cate' da' Jonásen' gwduxue'ede' xtiža' Diosen' len legaque'. Na' neda' zoa' nga naccha' bene' blao clal ca da' Jonásen', na' bitw chzenagle' chia'. <sup>42</sup>Na' lecze žana' cate' gon Diosen' cont yogo' bene' cheson da' mal yesežaglaogüe' toli' tocane, da' no'olen' gwnabia' bene' Seba ca' yedecuiše' le'e mbanle' na'a. Le le'na' gwze'e Seba gan' nac zito'chgua na' bide' nga cont bzenague' diža' sina' dan' be' da' rey Salomón. Na' neda' zoa' nga naccha' bene' blao clal ca da' rey Solomónna', na' bitw chzenagle' chia'.

**Da' xigüen' cheyo'on da' yoble lo' yichjlaždao' bene'**

(Lc. 11:24-26)

<sup>43</sup>Na' še to da' xigüe' da' yo'o nyaz lo' yichjlaždao' bene' yechojen, nach lažen nile nale yeyiljon ga soan mbalaz. Na' še bibi latje želen, nach nan: <sup>44</sup>“Da' yoble šjajo'a lo' yichjlaždao' ben' gan' ba gwo'a.”

Nach yeyejen da' yoble gan' zoa ben'. Cate' le'en bač beyacde', na' ba zoache' binlo, na' gague no yo'o nyazech yichjlažda'ogüe' da' gwžon yeyo'on da' yoble, <sup>45</sup>nach šjaytoben yegaže da' xigüe' da' zjanaquech mal ca len, na' txen yeso'on lo' yichjlažda'ogüen'. Na' še ba gosonen ca', na' gaquech mal che bena' clal ca goc che' cana'. Can' goc che bena', lecze ca' gac che le'e mbanle' na'a dan' nactecle bene' laždao' mal.

**Xna' Jesúsen' len bene' biše' ca' besežine' ga zoe'**

(Mr. 3:31-35; Lc. 8:19-21)

<sup>46</sup>Ne' choe'te Jesúsen' diža' len bene' quinga, cate' bžin xne'e len biše' ca'. Gosaclaže' yeso'e yeso'e'lene' le' diža' na' bene' zan nita' lagüe' na'ate. <sup>47</sup>Bene' ca' že' na', toe' gože' Jesúsen':

—Xna'o len bene' bišo' ca' zjanite' chy'o na' chesaclaže' yeso'e'lene' le' diža'.

<sup>48</sup>Nach Jesúsen' gože' le':

—¿Nezele no nac xna'a na' no zjanac biše' lježa'?

<sup>49</sup>Nach bli' ne'e blo'e bene' ca' zjanaque' le' txen na' gože' bena':

—Bene' quinga zjanaque' xna'a na' zjanaque' biše' lježa'. <sup>50</sup>Le note'teze bene' chone' da' chnaláže' Xa' Diosen' ben' zoa yaban', bena' nac bene' biša', bene' zana', lecze naque' xna'a.

**Jempl che bene' goz trigon'**

(Mr. 4:1-9; Lc. 8:4-8)

**13** Na' lo žana' gwza' Jesúsen' yo'o gan' zoen' jachi'e cho'a nisdaon'. <sup>2</sup>Nach catec bene' zan juisyw besedobe' gan' chi'en



na' benten byen gwoyo'e gwchi'e to lo' barcw. Na' yogo' bene' ca' besedoben' gosenite' cho'a nesdaon' ga nac yo biž. <sup>3</sup>Nach da' zan da' bsd blo'e Jesús'en' legaque' len jempl da' bi'e. Na' be'e to jempl, gwne':

—To bene' güen žin jeze' trigw, <sup>4</sup>na' šlac zej chose' trigon' late' bin che trigw dan' chazen' jasechazen chanez, nach be ca' žia xil be chaš le'e yaba gosagwban'. <sup>5</sup>Yelaten' jasechazen ga nac lo' yej ga bibi yotec zoa, na' da' nga byob blan' le' bi jasechazen ga nac sitjw. <sup>6</sup>Perw na' cate' bla' gwbiža' na' bzeyen len na' gosebižen, le' gague zjajo'otec loenna' sitjw. <sup>7</sup>Yelaten' jasechazen ga nac lo' yag yeše', na' yag yešen' gosecha'on na' bosololen len. <sup>8</sup>Perw na' yelaten' jasechazen ga nac yo šagüe' na' beselan'. Na' balen' gosebian to gayoa güeje to ton, na' yebalen' gosebian gayon güeje, na' yebalen' šichoa güeje. <sup>9</sup>Le'e žia nagle da' chene, le' gwzenag xtižan'.

**Jesús'en' be'e diža' bixchen' bzejni'ide' bene' jempl**

(Mr. 4:10-12; Lc. 8:9-10)

<sup>10</sup>Nach bene' ca' zjanaque' Jesús'en' txen gosebigue' lagüen', na' gose'ene':

—¿Bixchen' chsed chlo'edo' bene' quinga len jempl?

<sup>11</sup>Na' gož Jesús'en' legaque':

—Nono na' neze can' nac yela' gwnabia' che Diosen', na' ba chone' cont le'e chejnlaže'lene' nezelen. Perw bi chon Diosen' ca' len bene' bi chesaclaže' yesejnlaže'ne'.

<sup>12</sup>Note'teze bene' chosozenague' xtiža' Diosen', gwzejni'ich

Diosen' legaque' cont šanch dan' yesejni'ide'. Perw na' note'teze bene' bi chosozenague', da' daon' ba zjanezde', yeca'a Diosen' len. <sup>13</sup>Da'n'an' chsed chlo'eda' bene' quinga len jemplen', le' chesele'ede' dan' chona' perw bitw chesacbe'ede' bi zejen, na' chesende' xtižan' perw bitw chesejni'iden'. <sup>14</sup>Len bene' quinga ba chac can' bzoj da' Isaías, žan:

Da' li yenele, perw bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

<sup>15</sup>Nacle bene' güedenag na' bačh natcze yichjlažda'olen'.

Bi chazlaže'le gwzenagle dan' chenele na' dan' chle'ele; con nacle bene' güedenag.

Šaca' bi nacle bene' güedenag, šejni'ile bi zejen dan' chenele na' dan' chle'ele.

Nach yetinjle xtoła'le cont yeca'an na' yocoba' yichjlažda'olen'.

<sup>16</sup>'Perw le'e nacle neda' txen, leca mbalaz zoale dan' chle'ele da' ca' chona' na' chacbe'ele bi zejen, na' chzenagle xtižan' na' chejni'ilen. <sup>17</sup>Da' li žia' le'e, zan da' bene' ca' gosoe' xtiža' Diosen' cani' na' zan da' bene' ca' yezica'chle bene' bosozenag che Diosen' cani', gosaclaže'chgüe' yesele'ede' dan' chle'ele na'a, perw bitw goła' yesele'eden'. Na' gosaclaže'chgüe' yesende' dan' chenele na'a, perw bitw goła' yesenden'.

**Jesús'en' bzejni'ide' bi zejen jempl che ben' goz trigon'**

(Mr. 4:13-20; Lc. 8:11-15)

<sup>18</sup>'Na' le' gwzenag, quinga zejen jempl che ben' goz trigon'. <sup>19</sup>Ca

dan' byažen zejen xtiža' Dios da' chzejni' i che yela' gwnabia' che'. Na' biñ dan' beselažo' chanezen', zejen bene' ca' chesende' xtiža' Diosen' perw bi chesejni'iden'. Na' ca cheyoža' chžin gwxiyen' chebejen xtiža' Diosen' lo' yichjlažda'ogaquen'.<sup>20</sup> Na' biñ dan' beselažo' ga nac lo yej na' bi ben loen, zjanaquen ca bene' la' chesyebetede' xtiža' Diosen' cate' chesenden',<sup>21</sup> perw zjanaque' ca da' bibi loe chontec, šložga chesejle'e che xtiža' Diosen', na' cate' chac bi da' mal chegaquen' o cate' chesegue'e bene' legaque' dan' chosozenague' xtiža' Diosen', la' chesebejyichjte' xtižen'.<sup>22</sup> Na' biñ dan' beselažon' ga nac lo yag yeše', zejen ca bene' ca' ba zjanende' xtiža' Diosen', perw šlac zjambane' chesyela' chesyžejde' na' da' chesaclaš'e yesen'i'e chziye'en legaque'. Yogo' da' qui bi choen' latje yega'an xtiža' Diosen' lo' yichjlažda'ogüen', na' da'nan' bi chesejnilaže' le' ca cheyala'.<sup>23</sup> Na' biñ dan' beselažo' lo yo šagüe' zejen ca bene' chesende' xtiža' Diosen' na' chesejni'iden' na' chosozenaguen'. Ba'len gosebjan to gayoa güeje, na' yeba'len gosebjan gayon güeje, na' yeba'len šichoa güeje.

### Jempl che trigon' na' yiže'

<sup>24</sup> Na' gozoe'len Jesúsen' bene' ca' yeto jempl, goze'e legaque':  
—Yela' gwnabia' che Diosen' ben' zoa yaban' zaca'leben ca dan' goquen' cate' to bene' jeze' trigw lo yežlio che'na'.<sup>25</sup> Na' do šže'le gwey to bene' chgue'e le' šlac chesetas bene' ca' yezica'chle na' jeze' xsa yiže' gan' ba naz xan

yežlion' trigon', nach beze'e.<sup>26</sup> Na' to ši'ize trigon' len yiže' ca' beselan', na' trigon' gwzolao chbian.<sup>27</sup> Na' bene' güen žin che xan yežlion', cate' gosacbe'ede' nach jaya'aque' gan' zoa xangaque' jasyeyeže'ne': "Bene', čgague biñ trigon' goz yežlio čhion'? čBixčhen' nčhixen len yiže'?"<sup>28</sup> Nach xangaquen' gože' legaque': "To bene' chgue'e neda' jen ca'." Nach xmosen' gose'ene': "čChe'ndo' lažo'to' yižen'?"<sup>29</sup> Na' gože' legaque': "Bitw lažo'len. Le xož lažo'le lente trigon'.<sup>30</sup> Jaseyenna'. Guac yesecha'on txen. Na' cate' ba gole' yotoble cosešen', cana' gona' mandadw zgua'tec lažo'le yižen' na' gon'len manoj cont yeseyen. Nach šjaytoble trigon' co'ošagüe'len."

### Yela' gwnabia' che Diosen' naquen ca biñ che xomdas

(Mr. 4:30-32; Lc. 13:18-19)

<sup>31</sup> Nach gozo'e yeto jempl, gozne':  
—Šanch bene' yosozenag che Diosen' cont nabi'e yichjlažda'ogaque'. Da'nan' yela' gwnabia' che Diosen' ben' zoa yaban' zaca'leben ca to biñ che xomdas dan' goz to bene' yežlio čhen'.<sup>32</sup> Biñ che xomdasen' chnabia' nac da' dao' len biñ ca' chazcho. Perw na' cate' chlan' chcha'očen ca bichle yiže' cuan na' chaquen ca to yag cha'o, nach byiñ dao' ca' chjasen ližda'ogacba' lo xozenna'.

### Yela' gwnabia' che Diosen' naquen ca levadura

(Lc. 13:20-21)

<sup>33</sup> Nach gozoe' Jesúsen' yeto jempl, gozne':  
—Yela' gwnabia' che Diosen' ben' zoa yaban' zaca'leben ca levadura

dan' gwlec no'olen' len to rob yezj  
cont gwcha'o doxenen.

**Jesúsen' bzejni'ide' bene' len jempl**

(Mr. 4:33-34)

<sup>34</sup>Yogo' da' quinga bsed blo'e  
Jesúsen' bene' ca' besežag gan'  
zoe'na'. Bsed blo'ede' legaque' be'e  
jempl, bitwbi bzejni'ide' legaque' sin  
ca be'e jempl. <sup>35</sup>Bene' ca' cont goc  
can' bzoj da' bene' be' xtiža' Diosen'  
cani', žan:

Gwsed gwlo'egacda'ne' len jempl,  
na' yapegaca'ne' dan' nono  
na' neze da' ba ngaše' cate'  
gwxete yežlion'.

**Jesúsen' bzejni'ide' bi zeje  
jempl che trigon' na' yixen'**

<sup>36</sup>Nach beyož bsed blo'e Jesúsen'  
bene' ca' zjaže' na', beze'e txen  
len bene' ca' zjanaque' le' txen  
jaya'aque' yo'o gan' nite'na'. Na'  
cate' ba besyeyo'e lo' yo'on' bene'  
ca' zjanaque' le' txen gosebigue'  
cuite'na' gose'ene':

—Bzejni'išque neto' bi zejen jempl  
che trigon' na' yixen'.

<sup>37</sup>Nach Jesúsen' gože' legaque':

—Quinga zejen: Diosen' gwsele'  
neda' golja' beṇach na' zaca'lebda'  
ca ben' goze' biṇ che trigon'. <sup>38</sup>Na'  
doxen yežlio nga zaca'leben ca  
pedas yežlio gan' goze' trigon'. Na'  
bene' ca' chosozenague' che Diosen'  
cont nabi'e yichjlažda'ogaque'  
zaca'lebde' ca biṇ che trigon'.  
Na' bene' ca' chosozenague' che  
Satanás dan' chnabia' da' xigüe'  
ca' zjazaca'lebde' ca xsa yixen'.

<sup>39</sup>Satanásen' zaca'leben ca bene'  
chxi'a ben' goze' xsa yixen'. Na'  
žan' gac juisyw zaca'leben ca

žan' yosyotobe' trigon'. Na' angl  
ca' zaca'lebegaque' ca bene' ca'  
yosyotobe' cosešen'. <sup>40</sup>Na' can' šey  
yixen' yosyotoben', can' gac che  
bene' ca' chosozenag che Satanásen'  
cate' žin ža gac juisyon'. <sup>41</sup>Diosen'  
gwsele' neda' golja' beṇach na'  
cate' žin ža, neda' seļa' angl chia'  
ca' cont yosyotobe' yogo' bene'  
ca' chesego'oyele' bene' yoble  
yesone' da' mal na' lecze yosyotobe'  
yezica'chle bene' cheson da' mal.

Na' angl ca' yesyebeje' legaque'  
cont bich yesenite' txen len bene'  
ca' chosozenague' che Diosen' cont  
nabi'e yichjlažda'ogaquen'. <sup>42</sup>Nach  
yesesele' legaque' lo' yi' gabiḷ gan'  
yeseye' toli tocanē. Na' yesebežyaše'  
yesagwxejte laye' tantw  
yesežaglaochgüe'. <sup>43</sup>Cana'ch Xacho  
Diosen' gone' cont bene' ca' cheson  
da' güen nite' len le', le zjanaque'  
xi'ine' na' yesaque' ca be'ni' che  
gwbižen' cate' yesežine' yaban' gan'  
zoa Diosen' chnabi'e. Le'e žia nagle  
da' chene, le gwzenag xtiža'na'.

**Jempl che mechw xen  
dan' ngaše' lo' yo**

<sup>44</sup>Yeļa' gwnabia' che Diosen' ben'  
zoa yaban' naquen ca to mechw xen  
dan' ngaše' lo' yo. To bene' bželde'  
mechw xen da' ngaše' to lo' yežlio.  
Nach bocuašen' da' yoble lecze na'ze  
na' chebechgüede' beze'e jayete'  
yogo'lol bi da' de che' cont gwxi'e  
yežlion' gan' ngaše' mechua'.

**Jempl che to perla da' zaca'chgua**

<sup>45</sup>Na' yeļa' gwnabia' che Diosen'  
ben' zoa yaban', lecze zaca'leben ca  
da' nga goc. Zoa to comerciant bene'  
cha'o perla dan' zjanacchgua xdan.

<sup>46</sup>Na' bželde' to perla da' leca zacan'. Na' beyote' yogo'loł bi da' de che' na' gwxi'e perlan'. Ca'czen' zaca'lebe bene' ca' chesacbe'e zaca'chguan yosozenague' che Diosen'.

### Jempl che yixjw bel

<sup>47</sup>'Na' yela' gwnabia' che Diosen' ben' zoa yaban' zaca'leben ca da' nga goc. Gwnita' bał bene' gwxcen bel na' bosozale' yixjw bel chegaquen' lo' nisdaon' na' gwxcenen zan cuen bel. <sup>48</sup>Nach cate' ba gwža' lo' yixjon', besyebjen' yo biž, na' gosebie' be ca' zjanac güen par yesagüe' na' gosegüe'eba' lo' žome. Na' be ca' bi zjanac güen, gosecho'one'ba'. <sup>49</sup>Ca'czen gac che yogo' bene' cate' žin ža te che yežlion'. Angl ca' yesebeje' bene' mal ca' ladjo bene' ca' zjanaque' bene' güen lao Diosen' <sup>50</sup>na' yosozale' legaque' lo' yi' gabil gan' yesebežyaše' na' yesagwxejte laye' dan' leca yesežaglagüe'.

### Xtiža' Diosen' dan' byoj cani' len da' chsed chlo'e Jesúsen'

<sup>51</sup>Nach Jesúsen' gože' bene' ca' zjanaque' le' txen:  
—¿Zyejni'ile yogo' da' ca' ba blo'eda' le'e?

Nach gose'ene':

—Zyejni'iton'.

<sup>52</sup>Nach gož Jesúsen' legaque':  
—Note'tezle še chac chsed chlo'ele Xtiža' Diosen' dan' byoj cani', še lecze chzenagle can' chsed chlo'eda' che yela' gwnabia' che Diosen', nachen' zaca'leble ca to xan yo'o bene' nape' yogo'loł da' zaca' dan' chyažj chchinde', balen zjanaquen da' cobe na' balen zjanquen da' gole.

### Beñe' yež Narzaret bi gosejle'e che Jesúsen'

(Mr. 6:1-6; Lc. 4:16-30)

<sup>53</sup>Nach cate' beyož be' Jesúsen' jempl ca', beze'e latjen' len bene' ca' zjanaque' le' txen <sup>54</sup>jaya'aque' laže'. Na' jaysed jaylo'ede' bene' gualaž che' ca' lo' yodao' chegaquen'. Na' leca besyebande' len xtižen' na' gose' lježe':

—¿Ga jasede' yela' sina'? na' žnacxečen' chac chone' yela' guac ca'? <sup>55</sup>Nombia'chone', le naque' xi'in ben' chonšagüe' yag. Na' xne'ena' lie' María, na' Jacobo, José, Simón na' Judas zjanaque' bene' biše'. <sup>56</sup>Na' lecze bene' zane' ca' nite' lažcho nga. ¿Nacxe chaquen' cho'e diža' ca' na' chacte' chone' yela' guac?

<sup>57</sup>Na' dan' gosone' xbab nac Jesúsen' con to bene' gualaž chegaque', bi gosacłaže' yesejle'e che'. Na' gož Jesúsen' legaque':  
—Yogo'ze bene' chonla'ane' bene' choe' xtiža' Diosen', perw bene' gualaž che' na' bene' lo' yo'o che' bi chesonla'ane' le'.

<sup>58</sup>Na' to chopze yela' guac ben Jesúsen' Nazareten' dan' bitw gosejle'e che'.

### Quingan' goc gosote' Juan ben' bzoa bene' nis

(Mr. 6:14-29; Lc. 9:7-9)

**14** Na' ca tiempen' Herodes ben' naque' gobernador che distritw Galilean', bende' diža' ca nac yogo'loł dan' chon Jesúsen'.

<sup>2</sup>Nach gože' xmose' ca':

—Bengan' da' Juanna', ben' bzoa bene' nis. Ba bebane' ladjo bene' guat ca', da'nann' chaque' chone' yela' guac.

<sup>3-4</sup>Herodesen' gwne' ca' dan' bene' mandadw gosote' da' Juanna'. Quingan' goc: Herodesen' beque'e Herodías ca xo'ole' la'czla' Herodías naque' xo'ole bene' biše' Felipe. Na' Juanna' gože' Herodesen':

—Bi cheyala' soalen no'ol che bene' bišon'.

Na' dan' gož Juanna' Herodesen' ca, da'nan' Herodesen' bene' mandadw gosezene' Juanna' na' bosocheje' ni'a ne'e len gden lo' ližya gan' gosegüe'ene'.

<sup>5</sup>Herodesen' goclaže' gote' Juanna', perw bitwbi bende' le', le gwneзде' bene' zan chesejle'e Juanna' cho'e xtiža' Diosen', na' bžebe' bi yeson bene' ca'. <sup>6</sup>Perw na' cate' gosone' ljin' ža la Herodesen', bi' no'ol che Herodías bya'abe' lao bene' ca' ja'ac ljin'. Na' leca bebe Herodesen' can' bya'a no'ol güegon', <sup>7</sup>na' bzoe' Diosen' testigw che' gwnežjue'be' bite'teze nabebe' le'. <sup>8</sup>Na' gwlo'oyela' xna'ben' lebe' cont gožbe' Herodesen':

—Ben neda' to lo platw yichj Juan ben' chzoa bene' nis.

<sup>9</sup>Ne late'ze bi gwyazlaže' rey Herodesen' gone' can' gož no'ol güegon' le', perw bačhle bzoe' Diosen' testigw che' lao bene' ca' jasa'ac ljin' gwnežjue'be' bite'teze nabebe' le', da'nan' benšaze' mandadw gac can' gwnebebe' le'. <sup>10</sup>Ca' goquen' bene' mandadw jasechogue' yen Juanna' lo' ližya gan' yo'ena'. <sup>11</sup>Na' bosožie' yichjen' to lo platw cont bosonežjuen' no'ol güegon' na' lebe' bnežjwben' xna'be'.

<sup>12</sup>Nach bene' ca' zjanaque' txen len da' Juanna' jasyxi'e cuerp chen' na' jasecušen'. Gwde na' ja'aque'

gan' zoa Jesúsen' jaseže'ne' can' ba goquen'.

**Bguagw Jesúsen' gayo' mil bene'**  
(Mr. 6:30-44; Lc. 9:10-17; Jn. 6:1-14)

<sup>13</sup>Na' cate' bene' Jesúsen' can' goc che da' Juanna', beze'e latjen' len bene' ca' zjanaque' le' txen na' besyeyo'e to lo' barcw par ja'aque' to latje daš na' nono nochle ja'aclen legaque'. Perw bene' ca' že' yež ca' zjachi' cho'a nisaon' cate' gosende' ba zjada Jesúsen', na' gosa'ac lažgaque' ja'aque' yo biž jasešague' Jesúsen'. <sup>14</sup>Na' cate' bžin Jesúsen' cho'a nisaon', ble'ede' nita' bene' zan na' beyaše' beži'ilaže'de' legaque'. Na' beyone' yogo' bene' ca' chesacšene'. <sup>15</sup>Na' cate' ba chxo'a gwbiž gosebiga' bene' ca' zjanaque' le' txen lagüen', na' gose'ene':

—Zoacho to latje ga bibi de, na' ba nac bagwže' par gagwcho xgüe. Bze bene' quinga diža' cont šjaya'aque' yež dao' ca' dan' zjachi' ga'la'ze šjasediljue' da' yese'ej yesagüe'.

<sup>16</sup>Nach Jesúsen' gože' legaque':

—Bitw cheyala' šjaya'aque', san le'e güe'elne' da' yesagüe'.

<sup>17</sup>Nach gose'ene':

—Chopga bel' ya'a chechon' de na' gayo'ga yetextil dao'.

<sup>18</sup>Nach Jesúsen' gože' legaque':

—Le šjaxin' ni.

<sup>19</sup>Nach ben Jesúsen' mandadw gosebe' bene' zan ca' lo yixyen'. Na' gwxi'e yetextil ca' gayo' na' bel' ya'a ca' chope, na' gwne'e yabale be'e yela' choxclen che Diosen', na' bzoxjen' be'en bene' ca' zjanaque' le' txen cont goseyisen' len to to bene' ca'. <sup>20</sup>Na' yogüe' gosagüen' na' goseljde'. Na' bososše' šižinw žome

len yetextil bixjw len late' güeje bel dan' bega'anna'. <sup>21</sup>Na' bene' ca' gosagw da' ca' zjanaque' ca do gayo' mil bene' byo, bi cuent no'ol ca' len bidao'.

**Jesúsen' gwze'e lo nisdaon'**

(Mr. 6:45-52; Jn. 6:16-21)

<sup>22</sup>Gwde na' Jesúsen' bene' byen besyeyo'o bene' ca' zjanaque' le' txen lo' barcon' cont gosebialagüe' besyelaque' yešla'ale nisdaon' šlac bega'an le' besele' bene' ca' ližgaque'. <sup>23</sup>Na' beyož besele' bene' ca' ližgaque', gwlo'e to lo ya'a jal güiže' Diosen' toze'. Na' cate' gol, toz Jesúsen' zoe' lo ya'an. <sup>24</sup>Na' ca nac barcon' gan' zesyeyo'o bene' ca' zjanaque' Jesúsen' txen, ba zejen do gacho' nisdaon' nžiga'ses nisen' len dan' chas chata' nisdaon', le ben' chechjen clele. <sup>25</sup>Na' do šbal beyetj Jesúsen' ya'ana' na' gwze'e lo nisdaon' na' ba zejgale' gan' zja'aquen'. <sup>26</sup>Nach cate' besele'ede' le' zeje' lo nisdaon' leca besežebe', na' bososye'e gosene':

—iŠe da' chda chelen' chle'echo!

<sup>27</sup>Na' la' bol güižte Jesúsen' legaque', gože'ne':

—Le gonchach laže'le. Neda'na'. Bitw žeble.

<sup>28</sup>Nach Pedroa' gože'ne':

—Xanto', še da' li le'na', ben mandadw sa'a lo nisdaon' yida' gan' zon'.

<sup>29</sup>Nach gož Jesúsen' le':

—Da, Pedro.

Na' la' bchojte Pedroa' lo' barcon' gwzolao gwze'e lo nisdaon' zeje' gan' zoa Jesúsen'. <sup>30</sup>Perw na' cate' gocbe'ede' chechjchgua ben', bžebe' na' gwzolao chebe' lo' nisen'. Nach bosye'e, gože' Jesúsen':

—Xana', bosla neda'.

<sup>31</sup>Na' la' blite na' Jesúsen' bešue'ne', na' gože'ne':

—¿Bixčhen' chac čhopto'? Gweyje'ch chia'.

<sup>32</sup>Nach cate' beyo'o Jesúsen' len Pedroa' lo' barcon', la' gwlezte be'na'. <sup>33</sup>Na' bene' ca' že' lo' barcon' bosozoa xibe' lao Jesúsen' gosonxene'ne', gose'ene':

—Da' licze len' naco' doguale Xi'in Diosen'.

**Jesúsen' beyone' bene' chesacšene  
ben nita' Genesaret**

(Mr. 6:53-56)

<sup>34</sup>Na' gose'laque' nisdaon' na' besežine' yežlio gan' nzi Genesaret.

<sup>35</sup>Na' cate' bene' Genesareten' besyeyombi'e Jesúsen', goseyise' diža' yogo' yež ca' dan' zjachi' ga'la'ze cont gosenezde' ba bžin Jesúsen' lažgaque'. Na' bene' ca' že' yež ca' goseče'e yogo' bene' chesacšene lao Jesúsen'. <sup>36</sup>Na' goseneyoede' Jesúsen' gwnežjue' latje yesoxe' la'ch late'ze xni'a xen'. Na' yogo' bene' gosoxen' besyeyaquede'.

**Diža' mal dan' chchoj cho'achon'  
chonen cont lažda'ochon' bi naquen  
xilaže' len Diosen'**

(Mr. 7:1-23)

**15** Na' bal bene' fariseo ca' na' bene' ca' chososed chosolo'e dan' bzoj da' Moisésen' gosa'aque' Jerusalénna' na' besežine' gan' zoa Jesúsen', na' gose'ene':

<sup>2</sup>—¿Bixčhen' bene' ca' zjanaque' le' txen bitw zjana'ogüe' da' cheson bene' gol ca'? ¿Bixčhen' cbi chosyone'e zan ni'a cate' za' yesagüe'?

<sup>3</sup>Nach Jesúsen' gože' legaque':

—Na' le'e čbixčhen' chbejyichjle cbi chonle can' ža Diosen' cheyała' goncho san chonxen costumbr chelen'? <sup>4</sup>Diosen' none' mandadw can' goncho, gwne': "Le gap bala'an xaxna'le", na' "Note'teze' še chnešaše' len xaxne'e cheyała' gate'."

<sup>5</sup>Perw le'e žale gwaque ye' to bene' xaxne'e: "Bibi de gona' gaclena' le'e, le yogo' da' de čhia' ba bnežjuan' lo na' Dios." <sup>6</sup>Na' žale bich bi cheyała' gwnežjue' xaxne'en še ca'. Na' dan' žale ca', chzoale ca'ale dan' ža Diosen' na' con na'ole costumbr gole che da' xozxta'ole ca'. <sup>7</sup>Le'e nacle bene' gwxiye'. Chonle cayanen' bzoj da' Isaíasen' chele, gan' žan:

<sup>8</sup>Bene' qui chesonxene' neda' len diža' cho'a,

perw bi chesonxene' neda' len lažda'ogaque'.

<sup>9</sup>Bibi zejen dan' chesonxene' neda',

le dan' chososed chosolo'eden' naquen da' chnalaže' benačhze.

<sup>10</sup>Nach Jesúsen' bozoł güiže' bene' ca' zjanžaguen' cont gosebigue' lagüen' na' gože' legaque':

—Le gwzenag da' nga nia' le'e na' le šejni'i. <sup>11</sup>Bitw nacho dan' che'ej chagw benačhen' chonen cont lažda'ogüen' bi naquen xilaže' len Diosen'. Perw diža' mal dan' chchoj cho'e, lenna' chonen cont lažda'ogüen' bi naquen xilaže'.

<sup>12</sup>Nach gosebiga' bene' ca' zjanaque' Jesúsen' txen lagüen' gose'ene':

—čBi gocbe'edo' bene' fariseo ca' beseže'e cate' gosende' xtižo'na'?

<sup>13</sup>Na' gož Jesúsen' legaque':

—Gwžin ža cate' Xa' Diosen' ben' zoa yaban' gwžiaye'e yogo'loł bene' bi chosozenag che'. Gwžiaye'e legaque' can' choncho cate' chlažo'cho yixe' ca' chesela'ac lo yel.

<sup>14</sup>Jaseye bene' fariseo ca'. Zjanaque' ca to bene' lchoł bene' che'nde' cue'e nez yeto bene' lchoł. Nezecho to bene' lchoł bitw gac cue'e nez yeto bene' lchoł, le txen šjasebixe' to lo' yechw.

<sup>15</sup>Nach Pedroa' gože' Jesúsen': —Bzejni'išque neto' bi zejen can' gwnaon'.

<sup>16</sup>Nach gož Jesúsen' legaque':

—čLencze le'e bitw chejni'ile da' quinga ba gwnia'? <sup>17</sup>čBi nezele yogo' dan' che'ej chagw benačhen' cho'on lo' li'e na' chžin hor cheden? <sup>18</sup>Perw yogo' diža' dan' cheso' benačhen' chesechojen lo' yichjlažda'ogüen'. Na' še choe' bene' diža' mal, len chonen cont bi nac lažda'ogüen' xilaže' len Diosen'.

<sup>19</sup>Le lo' yichjlaždao' benačhen' nan' chchoj yogo' xbab mal cate' žan yesone' da' mal quinga: yesote' bene', yesata'lene' no'ol bi nac xo'olgaque' o bene' byo bi nac bene' čhegaque', na' yesone' gwban, yeso'e diža' güenlaže' che lježgaque', na' yeseneye'e che bene'. <sup>20</sup>Xbab mal ca' chesonen cont bi nac laždao' bene' xilaže' len Diosen', gague dan' bi chone'e zan ni'a cate' za' gagüe'.

**To no'ole bi naque' bene' Israel  
chejni'laže' Jesúsen'**

(Mr. 7:24-30)

<sup>21</sup>Beza' Jesúsen' latjen' len bene' ca' zjanaque' le' txen jaya'aque' distritw Galilea gała'ze gan' mbane ciuda Tiro na' ciuda Sidón. <sup>22</sup>Na'



to no'ole zoa do na', ben' bi naque'  
bene' Israel, gwze'e laže' cont bžine'  
gan' zoa Jesúsen' na' jašague'ne'. Na'  
gwne' zižje, gože'ne':

—Xana', le' naco' xi'in diaža che  
da' rey David. Beyaše'sque neto'. To  
bi' no'ol chia' yo'o nyaz da' xigüe'  
yichjlažda'obe' na' leca chžaglaobe'.

<sup>23</sup>Perw Jesúsen' bitw boži'e xtiža'  
no'olen'. Nach bene' ca' zjanaque'  
Jesúsen' txen gosebigue' cuite'na' na'  
gosata'yoede' le' gose'ene':

—Boži'išca no'olen', le con nagüe'  
chio' chol güiže' le' zižje cont  
gacleno'ne'.

<sup>24</sup>Nach gož Jesúsen' legaque':

—Diosen' gwsele' neda' cont  
chaclena' bene' Israel gualaž checho  
na'ze, le legaque' zjazaca'lebe' ca  
xila' dao' be zjanacžeje.

<sup>25</sup>Nach no'olen' gwbigue' bzoa  
xibe' lao Jesúsen', na' gože'ne':

—Xana', goclenšca neda'.

<sup>26</sup>Nach gož Jesúsen' le':

—Bitw naquen güen yeca'acho  
yela' guagw che xi'incho na'  
gwnežjwchon gagw beco' ca'.

<sup>27</sup>Nach gože'ne':

—Leczdo' Xana'. Perw beco'  
ca' guac yesagwba' bla'a dao' da'  
cheselažo' lo yo.

<sup>28</sup>Nach Jesúsen' gože'ne':

—No'ole, leca chejnilažo' neda'.  
Guaclenza' le' can' chaclažon'.  
Na' la' beyacte xi'in no'olen'.

### Jesúsen' beyone' bene' zan bene' chesacšene

<sup>29</sup>Beza' Jesúsen' latjen' len bene'  
ca' zjanaque' le' txen gosoe' nezen'  
dan' chde gała'ze cho'a nisdao'  
Galilean'. Nach gosepe' to lo ya'a  
jasechi'e lo ya'ana'. <sup>30</sup>Na' besežin

bene' zan lo ya'a gan' zoa Jesúsen'  
len bene' ca' zjanaque' le' txen.  
Zjanche'e no bene' nxiñj ni'e, bene'  
lchol, bene' bi chac nie', bene' bi  
zoa ni'a na'gaque', na' len bene'  
chese'e gwde gwdele yižgüe', na'  
bosonite' legaque' xni'a Jesúsen'. Na'  
Jesúsen' beyone' yogüe'. <sup>31</sup>Na' leca  
besyebane bene' ca' cate' besele'ede'  
can' besyene bene' ca' bi gosac  
yesene, na' besyeyac bene' bi zjazoa  
ni'a na'gaque', na' besyeda bene'  
nxiñj ni'e, na' besele'e bene' lchol  
ca'. Nach gosonxene' Diosen' ben'  
chonxen chio' bene' Israel.

### Jesúsen' bguagüe' tap mil bene'

(Mr. 8:1-10)

<sup>32</sup>Gwde na' Jesúsen' goxe' bene' ca'  
zjanaque' le' txen na' gože' legaque':

—Cheyaše'da' bene' qui, le ba goc  
šone ža zjanite' nga len neda', na'  
bibi de da' yesagüe'. Na' bi chaclaža'  
yosa'ane' sin cbi yesagüe' cont bi  
yesecholde' chanez.

<sup>33</sup>Nach legaque' gose'ene':

—Gan' zoacho nga naquen to latje  
daš ga bibi de. ¿Gaxe želecho da'  
yesagw yogo' bene' quinga?

<sup>34</sup>Nach gož Jesúsen' legaque':

—¿Gaca' yetextilen' de chele?  
Nach gose'ene':

—Gažga yetextil dao' zjade na' to  
chopga bel ya'a dao'.

<sup>35</sup>Nach Jesúsen' bene' mandadw  
yesebe' bene' zan ca' lo yon'. <sup>36</sup>Na'  
gwxi'e yetextil ca' gaže na' len  
bel ya'a dao' ca', nach be'e yela'  
choxclen che Diosen', nach bzoxjen'  
bnežjuen' bene' ca' zjanaque' le' txen  
na' legaque' bosonežjue' che yogo'  
bene' nita' na'. <sup>37</sup>Na' yogüe' gosagüe'  
gospeljde'. Gwdena' bososše'e yegaže



žome len late' güeje yela' guagw dan' bega'anna'. <sup>38</sup>Na' bene' ca' gosagw yetextilen' len belen' nac tap mil bene' byo, na' bi cuent no'ole ca' len bidao' ca'. <sup>39</sup>Nach beyož besela' Jesúsen' bene' ca' ližgaque', na' beyo'e to lo' barcw len bene' ca' zjanaque' le' txen na' ja'aque' distritw gan' nzi' Magdala.

**Gosenabde' Jesúsen' gone' to da' yesele'ede' le'e yaba**

(Mr. 8:11-13; Lc. 12:54-56)

**16** Na' goquen' bał bene' fariseo ca' na' bene' saduceo ca' gosebigue' gan' zoa Jesúsen', na' cont yesagüe' xya che' gosenabe' gone' to yela' guac da' yesele'ede' le'e yaban' cont yesenezde' še da' licze Diosa' gwsele' le'. <sup>2</sup>Nach Jesúsen' gože' legaque':

—Cate' chle'ele chexna le'e yaban' šeže'le nach žale: “Yeža'a gwxe dan' chexna le'e yaban'.” <sup>3</sup>Na' cate' chle'ele zete bejw xna le'e yaban' do cheni' nach žale: “Guac yejw zag, le ze bejw xna le'e yaban'.” Nacle bene' gwxiye', le nezele še guac yejw zag o še guac zeye' caten' chle'ele can' nac le'e yaban', perw bi chacbe'ele bi zejen da' ca' chon Diosen' tiemp nga zoacho na'a. <sup>4</sup>Le'e zoale na'a nacchgualē bene' laždao' xi'a na' ba gwlejyichjle Diosen'. Da'nan' chnabile gona' yeto yela' guac da' le'ele cont nezele še Diosen' gwsele' neda'. Perw bitw gona' can' chnablen', le ba ble'ele da' chona'. Dan' gon Diosen' len neda' cont nezele le'na' gwsele' neda' naquen ca dan' bene' len da' Jonás ben' be' xtiža' Diosen' cani'.

Nach beyož gwna Jesúsen' ca', beze'e len bene' ca' zjanaque' le' txen gan' nita' bene' ca'.

**Dan' chsed chlo'e bene' fariseo ca' na' bene' saduceo ca' zaca'leben ca levadura**

(Mr. 8:14-21)

<sup>5</sup>Na' cate' besežine' yešļa'a nisdao' Galilean', bene' ca' zjanaque' Jesúsen' txen gosache'ede' gosanjaže' yetextil da' yesagüe'. <sup>6</sup>Nach Jesúsen' gože' legaque':

—Le gon xbab, le gwsaca' len levadura che bene' fariseo ca' na' che bene' saduceo ca'.

<sup>7</sup>Nach gose' lježgaque':

—Gwne' ca' le gague bi yetextilen' noa'chon'.

<sup>8</sup>Na' Jesúsen' gocbe'ede' xbab dan' gosone', na' gože' legaque':

—¿Bixchen' chacžejlaže'le da' bibi yetextil de? ¿Bi chejle'le napa' yela' guac par gwguagua' le'e? <sup>9</sup>¿Bina' šejni'ile? na' ¿ba gonlaže'le can' bguagua' gayo' mil bene' byo len gayo'ze yetextil dao'? na' lecce ¿bitw zalaže'le do yebał žome pedas yetextil botoble dan' becho'onen? <sup>10</sup>Na' ¿chixe tap mil bene' byo ca' bguagua' len gažze yetextil dao'? ¿Zalaže'le yebał žome pedas yetextil can' botoble dan' becho'onen? <sup>11</sup>¿Bixchen' con benle xbab che yetextilen' cate' gwnia' le'e gwsaca'le len levadura che bene' fariseo ca' na' che bene' saduceo ca'?

<sup>12</sup>Nach bene' ca' zjanaque' Jesúsen' txen gosache'ede' gague be'e diža' che levadura dan' chosočhine' par chcha'o yetextilen' san be'e dižan' ca' cont bi yosozenague' che dan'

chososed chosolo'e beṇe' fariseo ca' na' beṇe' saduceo ca'.

**Pedroa' gwne' Jesúsen' naque' beṇe'  
gwseḷa' Diosen' cont nabi'e**

(Mr. 8:27-30; Lc. 9:18-21)

<sup>13</sup>Nach Jesúsen' len beṇe' ca' zjanaque' le' txen besežine' gaḷa'ze to ciuda dan' nzi' Cesarea de Filipino. Nach Jesúsen' gože' beṇe' ca' gosa'aclene' le':

—Diosen' gwseḷe' neda' golja' beṇaḅ. Perw źbi chesena beṇe'? źnon' naca' neda'? źBi chesene'?

<sup>14</sup>Na' gos'e'ene':

—Baḷe' chesene' naco' da' Juan ben' bzoa beṇe' nis. Na' yebaḷe' chesene' naco' Elías ben' be' xtiža' Diosen' cani'. Na' yebaḷe' chesene' naco' da' Jeremías o yeto beṇe' be' xtiža' Diosen' cani'te.

<sup>15</sup>Nach gože' legaque':

—źChixe le'e? źNo žale naca'?

<sup>16</sup>Nach Simón Pedroa' gože'ne':

—Len' naco' Cristo ben' gwleḷ Diosen' cont nabi'o, na' naco' dogualje Xi'in Dios, Dios ben' zoa toḷi tocaṇe.

<sup>17</sup>Nach Jesúsen' gože'ne':

—Simón xi'in Jonás, mbalaz zo' dan' gwnao' ca'. Notno beṇaḅ bzejni'i le' nao' ca'. Toz Xa' Dios ben' zoa yaba, len' ba bzejni'iden' le'. <sup>18</sup>Na' neda' žia', len' lio' Pedro na' zeje dižan' yej. Na' ca' to beṇe' güen yo'o chbeje' yej gual cont gonon žin cate' cueque' len' yo'on, ca'cze chbeja' le' gonon xšina', gaco' beṇe' nechw yotobo' beṇe' yesonxene' neda'. Na' bitwbi gac yeson da' xigüe' ca' yosolej yosošožen beṇe' ca' yesonxene' neda'. <sup>19</sup>Na' gona' lo nao' zgua'tec le' go'o xtižan' len

beṇe' zan cont yosozenague' che Dios ben' zoa yaban' na' nabi'e yichjlažda'ogaque'. Na' lecze naquen lo nao' yo'o beṇe' ca' yesonxene' neda' bica' da' ca' nac güen yesone' na' bica' da' ca' cbi nac güen yesone'. Na' Diosen' gwzejni'ide' le' naquen ye'gaco'ne' cont yežaguen len' dan' ža Diosen'.

<sup>20</sup>Nach Jesúsen' gože' legaque' nono yes'e' še naque' Cristo ben' gwleḷ Diosen' cont nabi'e.

**Jesúsen' gwdixjue'ede' gate'**

(Mr. 8:31-9:1; Lc. 9:22-27)

<sup>21</sup>Na' žana' Jesúsen' gwzolaḡüe' bzejni'ide' beṇe' ca' zjanaque' le' txen cheyaḷa' šeje' Jerusalénna'. Na' gože' legaque' beṇe' gole blao ca' chesenabi'e nación chechon', na' bḅoz gwnabia' ca' na' beṇe' ca' chososed chosolo'ede' dan' bzoj da' Moisés yosoči yososaque' le' na' yesote' le'. Perw yeyon ža yebane' ladjo beṇe' guat ca'. <sup>22</sup>Nach Pedroa' gwche'e Jesúsen' gan' nac lchojiže na' gwzolaḡüe' be'lene' le' diža' gwdile' le', gože'ne':

—Xana', Diosen' gaclene' le'. Bitw gac chio' ca' dan' žo' nga.

<sup>23</sup>Perw Jesúsen' gwyechje' gwne'e Pedroa' gože'ne':

—iGwcuas ca'ale Satanás! Chgo'oyelo' neda' bi gona' can' nžia' bia' Diosen' gona'. Bi nsa'o xbab che Dios, san nsa'o xbab che beṇaḅ.

<sup>24</sup>Gwde na' Jesúsen' gože' beṇe' ca' zjanaque' le' txen:

—Note'teze beṇe' še chaclaže' gaque' neda' txen, cheyaḷa' cuejyichj cuine' la'czla' žaglagüe' na' con gone' can' nia' neda'. <sup>25</sup>Note'teze beṇe' chacde' gone' cont bi žaglagüe' o

cont nono yesot le', benan' cuiayi'. Na' note'teze bene' chzanlaže' cuine' žaglagüe' o gate' ne chia' neda', ba de yela' mban che' toli' tocane. <sup>26</sup>¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toli' tocane? Le bi zoa nacle gon benachen' chixjue' cont gata' yela' mban che' toli' tocane. <sup>27</sup>Diosen' gwsele' neda' golja' benach na' cate' yida' yežlio nga da' yoble nsa'a yela' zaca' juisyw che Xa' Diosen' na' nchi'a angl chia' ca', cana'ch gona' cont to to benachen' nite' mbalaz o yezezaca'zi'e neche da' goson to toe'. <sup>28</sup>Na' da' li žia' le'e, balle nita'le nga na'a bina' gatle cate' žin ža le'ele neda' yida' gwlo'a yela' gwnabia' chian', neda' naca' ben' gwseła' Diosen' golja' benach.

### Jesúsen' goque' ca to be'ni'

(Mr. 9:2-13; Lc. 9:28-36)

**17** Gwde xop ža Jesúsen' gwchi'e Pedroa' len Jacobo na' Juan bene' biše' Jacobo na' ja'aque' to lo ya'a sibe. Na' nono nochle ja'aclen legaque'. <sup>2</sup>Na' lao legaque' bža' ca goc Jesúsen', cho'alagüen' goctiten ca gwbiž, na' xalanen' beyaquen šiš xila' ca be'ni'. <sup>3</sup>Na' concze besele'ede' da' Moisésen' len da' Elíasen' na' chosošalje' len Jesúsen'. <sup>4</sup>Nach Pedroa' gože' Jesúsen':

—iXanto', leca güenna' zoacho nga! Še chaclažo', gonto' šone ranšw, to chio', na' to che Moisés, na' yeto che Elías.

<sup>5</sup>Ne' choe'te Pedron' dižan' ca' cate' to bejw da' chactiten gwyečhjen legaque' na' ladjo bejon' gosende' gwna Diosen':

—Benga Xi'ina' ben' chacda'. Chbe chezaquelaže'chgüeda' che'. Le gwzenag che'.

<sup>6</sup>Na' cate' bene' ca' nče'e Jesúsen' gosende' diža' ca' besežebchgüe', con gosaze' coscho'ale lo yon'.

<sup>7</sup>Nach gwbiga' Jesúsen' gwxo'a ne' yichjgaquen' na' gože'ne':

—Le yeyas. Bitw žeble.

<sup>8</sup>Na' cate' besyechis lagüen', noch no besele'ede' san toze Jesúsen' zie'.

<sup>9</sup>Na' gwde na' šlac chesyeyetje' lo ya'an Jesúsen' gože' legaque':

—Nono ye'le can' nac dan' ba ble'ele nga. Cate'ch ba bebana' ladjo bene' guat ca', neda' naca' ben' gwseła' Diosen' golja' benach, cana'ch güe'le diža' chen.

<sup>10</sup>Nach bene' ca' zja'aclen Jesúsen' gose'ene':

—Bene' ca' chososed chosolo'e dan' bzoj da' Moisésen' chososedde' neto' chesene' zgua'tec da' Elías ben' gwzooa cani' cheyała' yide' da' yoble cate' za' yedenabia' ben' seła' Diosen'. ¿Bixchen' chesene' ca'?

<sup>11</sup>Nach Jesúsen' gože' legaque':

—Da' licze zgua'tec yid da' Elíasen' na' yeyonšagüe' yogo'loj. <sup>12</sup>Perw žia' le'e, Elías ba bide' na' bi gosacbe'e bene' še nac le'. Na' gosonde' le' con ca gosaclaže'. Na' ca'czen' yosočhi yososaque' neda' naca' ben' gwseła' Diosen' golja' benach.

<sup>13</sup>Nach bene' ca' zja'aque' len Jesúsen' gosacbe'ede' cho'e diža' che da' Juan ben' bzoe' bene' nis.

### Beyon Jesúsen' to bi' chazbe' šon

(Mr. 9:14-29; Lc. 9:37-43)

<sup>14</sup>Na' cate' besežine' gan' zjanžag bene' zan, to bene' bšague' Jesúsen' na' bzoa xibe' lagüe'na' gože'ne':

<sup>15</sup>—Xana, beyaše'laže'sca xi'ina' nga. Chazbe' šon na' leca chžaglaobe' len len. Na' zan ni'a ba jačhazbe' lo yi' na' lecze zan ni'a ba blažo'be' lo nis. <sup>16</sup>Ba bedesana'be' lao bene' ca' zjanaque' le' txen, perw bitw gosaque' yesyeyone'be'.

<sup>17</sup>Nach Jesúsen' gože' bene' ca' že'na':

—iLe'e bene' bi chejnilaže', chonchguale clele! ¿Batca' zelao na'lagua' le'e? Bedesan bidaon' ni.

<sup>18</sup>Nach Jesúsen' bene' mandadw yechoj da' xigüen' yo'o nyazen yichjlaždao' bidaon' na' la' bechojten. Na' la' beyaquetebe'.

<sup>19</sup>Na' gwde goc ca', bene' ca' zjanaque' Jesúsen' txen gosebigue' lagüen' cate' zoe' toze', na' gose'ene': —¿Bixchen' bi goc neto' yebejto' da' xigüen'?

<sup>20</sup>Jesúsen' gože' legaque':

—Bitw goc yebejlen dan' bitw gwyejle'le Diosen' gone' yechojen. Xsa xomdasen' naquen da' dao' riz. Na' da' li žia' le'e, la'czla' dan' chejnilaže'le Diosen' naquen ca to xsa xomdas lagüe dan' bi chejnilaže'teclene', še šejnilaže'lné', guaque ye'le ya'a nga: “Gwcuas nga, na' jayzoa na'ate”, na' gac can' nalen'. Bitw bi de dan' bi gac gonle con še chejle'le Diosen' gone' gaquen.

<sup>21</sup>Na' cont yebejle da' xigüe' ca' dan' zjanac ca dan' bebeja' yichjlaždao' bidao'na', cheya'la' gwyo gwchejle gonle gwbas na' zoatezle yol' güižle Diosen'.

**Da' yoble Jesúsen' gwdixjue'ede' gate'**

(Mr. 9:30-32; Lc. 9:43-45)

<sup>22</sup>Na' šlac zjajda Jesúsen' len bene' ca' zjanaque' le' txen do gan'

mbane distritw Galilea, Jesúsen' gože' legaque':

—Diosen' gwsele' neda' golja' benačh, na' yosodie' neda' lo na' bene' chesegue'ede'nda', <sup>23</sup>na' yesote'nda'. Perw na' yeyon' ža yosban Diosen' neda' ladjo bene' guat ca'.

Nach bene' ca' zjanaque' Jesúsen' txen cate' gosende' xtiže'na' gosacyaše'chgüede'.

**Jesúsen' gwdixjue' da' chosočhixjue' che yodao'**

<sup>24</sup>Na' cate' besyežine' Capernaum, bene' ca' chosočhixjue' che gastw che yodao' blao che chio' bene' Israel ja'aque' lao Pedroa'. Na' gose'ene':

—¿Bi chyixjw maestrw chelen' da' cheya'la' chixjue' che yodaon'?

<sup>25</sup>Nach gož Pedroa' legaque':

—Chyixjuen'.

Gwde gwna Pedroa' ca' gwyo'e lo' yo'ona'. Nach Jesúsen' la' gožtie' le':

—¿Bi xbab chono', Simón? Ca nac bene' gwnabia' ca' nita' yežlio nga, ¿non' chacdo' chosočhixjue'? ¿bene' gualaž che' o še bene' zito'?

<sup>26</sup>Nach Pedroa' gože'ne':

—Chosočhixjue' bene' zito'.

Nach Jesúsen' gože' le':

—Bene' zjanaque' biše' lježe' bitwbi cheseyixjue'. Na' chio' naccho xi'in' Dios ben' zoa yaba chnabi'e, bitw cheya'la' chixjwcho che yodaon'. <sup>27</sup>Perw cont nono yeson xbab chgue'echo yodao' blaon', na' chixjwcho. Gwyej cho'a nisdan', na' bzala' yixjw chion' na' be' nechw be seno', lo cho'aba'na' želdo' to mechw. Na' yeyoxon' šjadixjo' chechon'. Guaqueczen par šjadixjo' che chopcho.

**Gosacyoż bene' ca' zjanaque' Jesúsen'**  
**txen noe' nacch blao**

(Mr. 9:33-37; Lc. 9:46-48)

**18** Nachen' bene' ca' zjanaque'  
 Jesúsen' txen gosebigue'  
 cuite'na', na' gose'ene':

—¿No neto' gacchto' blao cate'  
 Diosen' ben' zoa yaban' gone' cont  
 nabi'o?

<sup>2</sup>Na' Jesúsen' goxe' to bidao' na'  
 bzeche'be' gachol' legaque'. <sup>3</sup>Na'  
 gože'ne':

—Da' li žia' le'e, note'tezle še bi  
 gwša' xbab chelen' cont gwzenagle  
 che Diosen' ca chon to bidao' cate'  
 chzenagbe' che xaxna'be', gwbat  
 nabia' Diosen' ben' zoa yaban'  
 yichjlažda'ole. <sup>4</sup>Na' note'teze  
 bene' še yeyaque' ca bidao' nga  
 na' gwzexjwlaže' lao Diosen', nach  
 gague' bene' blao len neda' cate'  
 Diosen' ben' zoa yaba gone' cont  
 solao nabi'a. <sup>5</sup>Note'teze bene' chone'  
 güen len to bidao' ca bi' nga neche  
 da' chejnilaže' neda', choncze' güen  
 len neda'.

**Bitw cheyala' goncho cont gon bene'**  
**da' xinj**

(Mr. 9:42-48; Lc. 17:1-2)

<sup>6</sup>Note'teze bene' chon cont lažo'  
 to bene' za' gwzologüe' chejnilaže'  
 neda' gone' da' xinj, yejni'acle  
 yosocheje' yene' to yiše xen na'  
 yosozale'ne' lo' nisdaon' clal ca da'  
 gone' cont lažo' bene' yoble gone'  
 da' xinjen'. <sup>7</sup>Nyaše'chguaze gac che  
 benachen' da' zjade da' zan yežlio  
 nga da' chesonen cont yesone' da'  
 xinj. Bia'cze gata' dan' yeson cont  
 lažo' bene' yesone' da' xinj, perw  
 nyaše'chguaze gac che bene' chon

cont lažo' bene' yoble gone' da'  
 xinjen'.

<sup>8</sup>Na' da' li žia' le'e, še ni'a na'len'  
 chonen cont gonle da' xinj, cheyala'  
 cuejyichjle da' malen' chonle. Yejni'a  
 bibi ni'a na'len' soa clal ca gonle da'  
 xinjen' len len. Na' yejni'a šjayzoale  
 len Diosen' toli tocane bi zoa šla'a  
 taca'len' o nchog šla'a ni'alen' clal ca  
 yeyejle lo yi' gabil' nya' cuerp chelen'.  
<sup>9</sup>Na' še yejlaolen' chonen cont gonle  
 da' xinjen', cheyala' cuejyichjle da'  
 malen' chonle. Yejni'a bibi yejlaolen'  
 cuia clal ca gonle da' xinjen' len  
 len. Na' yejni'a šjayzoale len Diosen'  
 toli tocane zoa šla'aze yejlaole clal  
 ca yežinle lo yi' gabil' žia chop la'a  
 yejlaolen'.

**Jempl che xila' be gocžeje**

(Lc. 15:3-7)

<sup>10</sup>Bi gonle note'teze bene'  
 chejnilaže' neda' ca bene' bibi  
 zaca'tec, la'czla' bitec zaque' len  
 benach. Žia' le'e, angl ca' chesape'  
 legaque' lecze nite' lao Xa' Diosen'  
 yaban' gan' zoe'na'. <sup>11</sup>Na' ca naca'  
 neda', Diosen' gwsele' neda' golja'  
 benach cont gwnežjua' yela' mban  
 toli tocane che bene' ba zjambiayi'.  
<sup>12</sup>¿Bixe chonle xbab? Še nita' to  
 gayoa xila' chele na' yexjw toba' žbi  
 yocua'anle be ca' yetaplalj togalj  
 do lo ya'a na'ze na' šjaydiljwle ben'  
 bexjua'? <sup>13</sup>Na' da' li žia' le'e, cate'  
 yeželeleba' yebechle dan' beželban'  
 clal ca can' chebele che be ca'  
 taplalj togalj ben' bi gosacžeje.  
<sup>14</sup>Ca'czen' naquen len bene' ca'  
 chesejnilaže' neda' bene' ca' bitec  
 bi zjazaque' len benachen'. Xacho  
 Diosen' ben' zoa yaban' bitw che'nde'  
 cuiayi' ne toe'.

**Cheyała' yezi'xencho che bene'  
lježcho bene' chesejnilaže' Diosen'**

(Lc. 17:3)

<sup>15</sup>Še to bene' lježle gone' mal  
contr to le'e, šejle šje'elenlene' diža'  
chopzle can' nac dan' chonen' cont  
yetingden'. Na' še gwzenague' diža'  
dan' šje'elenlenen', yezoe' binlo  
len Diosen' da' yoble. <sup>16</sup>Perw še bi  
gwzenague' diža' dan' šje'elenlenen',  
güench che'ele yeto o yechope  
bene' lježle cont yesaque' testigw  
ba gota'yoele ben' yoša' xbab chen'.  
<sup>17</sup>Na' še bitwczę gwzenague' chele,  
le güe' diža' can' chonen' lao yogo'le  
gan' chdop chžagle chonxenle Diosen'.  
Na' še neca gwzenagcze' che yogo'le,  
cbich gonlne' cuent len le'e chdop  
chžagle chonxenle Diosen'. Perw le  
gon cuent naque' txen len bene' ca'  
bi chesejnilaže' Diosen', ca no bene'  
güechixjw bene' chesonchgüa da' xinj.

<sup>18</sup>Da' li žia' le'e, naquen lo na'le  
ye'le bene' ca' yesonxene' neda' bica'  
da' nac güen yesone' na' bica' da'  
ca' bi nac güen yesone'. Na' Diosen'  
gwzejni'ide' le'e naquen' ye'gaclene'  
cont yežaguen len dan' ža Diosen'.

<sup>19</sup>Na' da' yoble žia' le'e, še chople  
nita'le yežlio nga gwxi'ale bin'  
nabele Diosen', Xa' Diosen' ben' zoa  
yaban' goncze' dan' nabelenen'. <sup>20</sup>Na'  
gan' nžag chope šonle chonxenle  
neda', zoacza' txen len le'e.

<sup>21</sup>Nach Pedroa' gwbigue' gože'  
Jesúsen':

—Xana', še bene' lježa' chone' da'  
mal contr neda', čbał ni'a cheyała'  
yezi'xena' che'? čzelao do gaž ni'a?

<sup>22</sup>Nach Jesúsen' gože'ne':

—Žia' le', gague cheyała' yezi'xen  
che lježle zelao do gaž ni'a, san

yogo'te ni'a cheyała' yezi'xen che  
lježle.

**Jempl che ben' bi bezi'xene'  
che dan' čała' bene' lježe'**

<sup>23</sup>Na' yela' gwnabia' che Diosen'  
ben' zoa yaban' zaca'leben ca da'  
nga goc. Zoa to bene' gwnabia' ben'  
chesała' xmose' ca' xmechue'. Na'  
goclaže' yebeje' cuent len legaque'.  
<sup>24</sup>Na' cate' gwzolağüe' bezi'e cuent  
che to toe', da' nechw bžin to  
xmose' ben' čała' zan millón. <sup>25</sup>Na'  
mosen' bitwbi xmechue' gota' par  
yonežjuen'. Da'nan' bene' gwnabian'  
bene' mandadw ta'ogaque' len  
xo'ole', len xi'ine' ca' na' len doxen  
da' zjade che' cont yeyaxjw dan'  
čale' chen'. <sup>26</sup>Nach mosen' bzoa  
xibe' lao bene' gwnabian' gota'yoede'  
le' gože'ne': “Xana', gwdapešca  
yela' chxenlaže' len neda', na'  
yeyona' doxen dan' čała' chion'.”  
<sup>27</sup>Nach bene' gwnabian' beyaše'de'  
le' na' bezi'xene' che doxen dan'  
čale' na' bsane' le'. <sup>28</sup>Perw na'  
cate' bechoj mosen' liž xanen', la'  
bežagtie' yeto mos lježe' bene'  
čała' late' xmechue'. Nach la'  
gwnizte' yene' gože'ne': “Yeyono'  
dan' chalo' chian' netec na'a.”  
<sup>29</sup>Nach mos lježen' la' bzoate' xibe'  
lagüen', gože'ne': “Gwdapešca yela'  
chxenlaže' chia' na' yeyona' doxen  
dan' čała' chion'.” <sup>30</sup>Perw na' mos  
nechon' bitw bzenague' che mos  
lježen'. La' gwyejte' jene' mandadw  
goseyixjue'ne' ližya na' bi yechoje'  
še bina' yonežjue' dan' čale' chen'.  
<sup>31</sup>Na' mos ca' yezica'chle cate'  
besele'ede' can' ben' mos nechon',  
leca gosacde' zi'. Na' ja'aque' lao  
bene' gwnabian' jaseže'ne' yogo'lol

can' goca'. <sup>32</sup>Nach bene' gwnabian' goxe' mos nechua' da' yoble lagüe'na', gože'ne': "Le' naco' to bene' xi'achgua. Neda' bezi'xena' čhio' doxen dan' čhalo' čhian' dan' gota'yoedo' neda' yezi'xena' čhion'.

<sup>33</sup>¿Bixčhen' bi beyaše'do' mos lježo' ben' čhal'e' čhion' can' beyaše'da' le'?" <sup>34</sup>Na' bža'achgua bene' gwnabian' na' bdie' le' lo' na' bene' goseyixjue'ne' ližya ga žaglaögüe', na' bi yechoje' še bina' yeyixjue' doxen dan' čhal'e' čhen'.

<sup>35</sup>Nach Jesúsen' gože' bene' ca' zjanaque' le' txen:

—Can' gon Xa' Diosen' ben' zoa yaban' len note'tezle še bi chezi'xenle che lježle do yichj do laže'le bite'teze dan' chesonde' le'e.

### Bi cheyała' yela'acho len no'ol chechon' cont soalencho no'ole yoble

(Mr. 10:1-12; Lc. 16:18)

**19** Na' Jesúsen' cate' beyož gwne' da' ca' beze'e distritw Galilean' na' gwłague' yegw Jordánna' beyeje' gan' mbane distritw Judean'. <sup>2</sup>Na' bene' zan ja'aclen le', na' beyone' bene' ca' chesacšene.

<sup>3</sup>Na' bał bene' fariseo ja'aque' gan' zoe'na', le' gosacłaže' yesebeje'ne' diža' da' yosočhine' cont gosožie'ne' xya čhol, nach gose'ene':

—¿Guac to bene' nšagna' yele'e len xo'ole' še bite'teze dan' chone' cbi cholaže' bene' čhen'?

<sup>4</sup>Nach gože' legaque':

—¿Bina' gwłable can' nyoj Xtiza' Diosen'? Žan cate' gwxe yežlion' Diosen' bene' bene' nechw ca' to bene' byo na' to no'ole. <sup>5</sup>Na' gwna Diosen': "Da'nan' bene' byon'

gwsane' xaxne'e cont soalene' no'ole čhen' na' chope' yesaque' ca toz bene'." <sup>6</sup>Na' ca' bich yesac čhope' san toze'. Da'nan' bi cheyała' yesyele'e, le' Diosen' ba bcode' legaque'.

<sup>7</sup>Nach gose'ene':

—Še naquen ca' ¿bixčhen' ben da' Moisésen' mandadw cate' to bene' yele'e len no'ol čhen' cheyała' čhas to yiš da' gwnežjue' no'ol čhen' ga güen' diža' besyele'ena'?

<sup>8</sup>Jesúsen' gože' legaque':

—Da' Moisésen' be'e latje yela'ale len no'ol čhele lagüe dan' nacle bene' güedenag len Diosen'. Perw cate' Diosen' bene' bene' nechw ca' bitw nacho gocłaže' yesyele'e. <sup>9</sup>Žia' le'e, note'teze bene' chele'e len no'ol čhe' na' cheque'e no'ole yoble, len neztede' no'ol čhen' bitw naque' to no'ole chzoa xtoe', toz ca da' xinjen' chone' ca nac dan' chon ben' chata'lene' no'ol čhe bene' yoble. Na' note'teze bene' yošagna'lene' to no'ole bene' bela'a len bene' čhe', lecze tozcze ca da' xinj gone' ca nac da' chon bene' chata'lene' no'ol čhe bene' yoble.

<sup>10</sup>Nach bene' ca' zjanaque' Jesúsen' txen gose'ene':

—Še can' naquen čhe bene' byo na' no'ole, güench nono gwšagna'.

<sup>11</sup>Jesúsen' gože' legaque':

—Gague yogo' bene' yesejni'ide' da' nga, šinze bene' ca' ba bzejni'i Diosen' legaque' bi zejen. <sup>12</sup>Nita' bene' bi žan yosošagne'e dan' gosalj'e' bi zjanya' cuerp čhe', na' lecze nita' bene' bi chosošagne'e lagüe dan' gosone bene' legaque' cont bi zjanya' cuerp čhegaque'. Na' lecze ca' nita' bene' cbi chosošagne'e



lagüe dan' chesazlaže'che' yesone'  
xšin Diosen' ben' zoa yaban'  
chnabi'e. Le gwzenag che dan' ba  
gwnian' še ba ben Diosen' cont  
chejni'ilen.

**Jasesane' bidao' lao Jesúsén'**

(Mr. 10:13-16; Lc. 18:15-17)

<sup>13</sup>Na' ja'ac bene' jasesane'  
bidao' lao Jesúsén' cont xoa ne'e  
yichjgacbe' na' nabe' lao Diosen'  
gaclene' legacbe'. Perw bene' ca'  
zjanaque' le' txen gosedi'le' bene'  
ca' zjanche'ebe'. <sup>14</sup>Nach Jesúsén'  
gože'ne':

—Le güe' latje yesid bidao' ca'  
lagua' nga, na' bi gwzönle, le  
bene' ca' zjanac ca bidao' quinga,  
legaue' chosozenague' che  
Diosen' ben' zoa yaba cont chnabi'e  
yichjlažda'ogaue'.

<sup>15</sup>Na' beyož gw<sup>x</sup>oa na' Jesúsén'  
yichjgacbe' gw<sup>n</sup>nabe' lao Diosen'  
gaclene'be', nach gwyeye' ga yoble.

**Bene' güego' bene' goc bene' gwñi'a**

(Mr. 10:17-31; Lc. 18:18-30)

<sup>16</sup>Na' goquen', to bene' güego'  
bžine' gan' zoa Jesúsén', na' gože'ne':

—Maestrw, le' naco' bene' güen.  
¿Bi da' güen cheya'la' gona' cont gata'  
yela' mban chia' toli tocane'?

<sup>17</sup>Nach Jesúsén' gože'ne':  
—¿Bixchen' žo' naca' bene' güen?  
Toz bene' güen zoa, na' len' naque'  
Dios. Perw na' še chaclažo' gata' yela'  
mban chio' toli tocane, cheya'la' gono'  
can' non Diosen' mandadw goncho.

<sup>18</sup>Nach gože' Jesúsén':

—¿Bica' da' ca'?

Nach Jesúsén' gože' le':  
—Nono gotle, bi gata'lenle no'ol  
bi nac no'ol chele o bene' byo bene'

bi nac bene' chele, bi cuanle, bitw  
güe'le diža' güenlaže' che bene'  
lježle. <sup>19</sup>Le gap bala'an xaxna'le, na'  
le gaue lježle can' chaque cuinle.

<sup>20</sup>Nach bene' güegon' gože'  
Jesúsén':

—Yogo'lol da' quinga gwzolagua'  
chonczan' cate' ne' nactia' bidao'.  
¿Bixe dan' chyažjeh gona'?

<sup>21</sup>Jesúsén' gože'ne':

—Še chaclažo' gaco' cayanen'  
chazlaže' Diosen', jayete' yogo' da' de  
chio', na' da' le'edo' chen bnežjon bene'  
yaše'. Nach še gono' ca', cate' yežino'  
yaba gan' zoa Diosen', da' zaca'ch gata'  
chio'. Na' še ba beyož beno' can' žia' le',  
nach sao' gaco' neda' txen.

<sup>22</sup>Perw na' bene' güegon' cate'  
beyož bende' diža' can' gož Jesúsén'  
le', beza'yaše', le bene' gwñi'achgua  
goque'.

<sup>23</sup>Gwde na' Jesúsén' gože' bene' ca'  
zjanaque' le' txen:

—Da' li žia' le'e, leca zdebe naquen  
to bene' gwñi'a gwzenague' che  
Dios ben' zoa yaba cont Diosen'  
nabi'e yichjlažda'ogüe'. <sup>24</sup>Da' yoble  
žia' le'e, bedao'ch te to be xen be nzi'  
camello to lo' nag yeše' clal ca to  
bene' gwñi'a gwzenague' che Dios  
cont Diosen' nabi'e yichjlažda'ogüe'.

<sup>25</sup>Na' bene' ca' zjanaque' Jesúsén'  
txen leca besyebande' cate' gosende'  
xtižen', nach gosene':

—¿Noxen' šjayzoa len Diosen' še ca'?

<sup>26</sup>Jesúsén' gwñe'e legaue', nach  
gože'ne':

—Bibi de da' gac yeson benachen'  
cont šjasyenite' len Diosen', perw bi  
zoa da' nacho da' bi gac gon Dios.

<sup>27</sup>Nach Pedroa' gože' Jesúsén':

—Neto' ba gwlejyichjto' yogo'  
da' de cheto' cont nacto' le' txen.



¿Bi da' güen gata' cheto' dan' ba gwlejičhjtó' da' ca'?

<sup>28</sup>Jesúsen' gože' legaque':

—Da' li žia' le'e, Diosen' gwsele' neda' golja' beṇach na' cate' yocobe' yežlion', neda' cui'a nabi'a güen juisyw can' chnabia' Dios ben' zoa yaba. Na' le'e šižinwle cue'le cuita'na' nabia'le šižinw cuen beṇe' ca' zjanaque' xi'in diaža che da' Israel. <sup>29</sup>Na' note'teze beṇe' ba gwlejičhje' liže', biše', zane', xaxne'e, xo'ole', xi'ine' o yežlio che', dan' chzenague' chia', Diosen' gwnežjue' le' da' zaca'ch da' xench ca yogo' da' ca'. Na' lecze gata' yela' mban che' toli tocanē. <sup>30</sup>Perw zan beṇe' zjanaque' beṇe' žialao na'a, gwžin ža cate' yesaque' beṇe' bzebe. Na' beṇe' zjanaque' beṇe' bzebe na'a, gwžin ža cate' yesaque' beṇe' žialao.

#### Jempl che beṇe' güen žin ca'

**20** Nach Jesúsen' gože' legaque': —Yela' gwnabia' che Diosen' ben' zoa yaban' zaca'leben ca da' nga goc. To beṇe' nape' to yežlio gan' že'chgua yag uvas. Na' gwze'e ližen' to zil do cheni' gwyeje' gan' chac ya'a jatiljue' beṇe' güen žin cont yesone' žin yežlio chen' žana'. <sup>2</sup>Na' gosexenlaže' beṇe' güen žin ca' to denario chixue' to toe' con ca chac mosen' tža žin. Nach gwsele' legaque' gan' jasene' žinna'. <sup>3</sup>Na' do cheda ga gozeje' gan' chac ya'an, na' ble'ede' nita'ch beṇe' bibi žin de yesone'. <sup>4</sup>Na' gože' legaque': “Lencze le'e le šja'ac gan' že' yag uvas chian' le šjen žin na' chixjwcza' le'e ca cheyala'.” Nach ja'ac beṇe' ca'. <sup>5</sup>Na' da' yoble gwyeje' do guagwbiž na' do cheda

šone. Bezle'ede' nita'ch beṇe' bibi žin chesone' nach gwsele' legaque' cont yesone' žin gan' že' yag uvas chen'. <sup>6</sup>Na' ca do cheda gayo' šeže'le gozeje' da' yoble ble'eczde' nita'ch beṇe' bibi žin chesone'. Na' gože' legaque': “¿Bixchen' bi gwyeje' žin?” <sup>7</sup>Nach gose'ene': “Notno gwne neto' šjento' xšine'.” Nach goze'le legaque': “Lencze le'e le šja'ac le šjen žin gan' že' yag uvas chian'. Na' chixjwcza' le'e ca cheyala'.” Nach ja'ac beṇe' ca'. <sup>8</sup>Na' cate' bžin hor bosa' xan yag uvasen' beṇe' güen žin ca', nach gože' mos blao chen': “Beyax beṇe' güen žin ca' cont chixjo'ne', solao chixjo' beṇe' ca' besela'ac bzebe, na' yeyožle len beṇe' ca' besela'ac da' nechw.” <sup>9</sup>Nach mos blaon' zgua'tec gwdixjue' beṇe' ca' gosezolagüe' gosone' žin cheda gayo' šeže'le tgüeje denario to toe'. <sup>10</sup>Na' cate' gwdixjue' beṇe' ca' gosezolagüe' gosone' žin šezildao', gosacde' chixjoch' legaque' da' zcha'och dan' gosezolagüe' gosone' žin šezildao'. Perw tozcze can' gwdixjue' yogo'lołte'. <sup>11</sup>Na' cate' beyož gosezi' laxjw beṇe' ca' gosezolao žinna' šezildao', gosadoe' diža' xan žinna'. <sup>12</sup>Gose'ene': “Do ža bžaglaochguato' lo da' zeye' bento' žin chion'. Na' tozcze can' gwdixjo' neto' len beṇe' ca' besela' bzebe, len to hor güejgan' gosone' žin.” <sup>13</sup>Perw na' xan žinna' gože' toe': “Migw chia', bitwbi da' mal chona' len le'. ¿Gague gwxenlažo' to denario chixjua' to tole? <sup>14</sup>Laxjon' ba gwxi'o, guac yeyejo'. Chac laža' gwnežjua' beṇe' ca' to denario güeje con can' beṇa' le'e la'czla' besela'aque' bzebe. <sup>15</sup>¿Bixchen' chxi'o neda' neče dan'

naca' bene' šagüe'? Naquen lo na' gona' cont ca chaclaža' len da' de chia'."

<sup>16</sup>Nach Jesúsén' gože' bene' ca' bosozenag jemplen':

—Can' naquen, nita' bene' zjanaque' bene' bzebe na'a, perw lecze gwžin ža cate' legaque' yesaque' bene' žialao. Na' nita' bene' zjanaque' bene' žialao na'a, perw gwžin ža yesaque' bene' bzebe. Diosen' chaxe' yogo'lo'lo' bene' cont yesejle'e che', perw bal' guen' chosozenague' che', na' legacze' chbeje' cont chesaque' xi'ine'.

**Da' yoble chyixjue'e Jesúsén' gate'**

(Mr. 10:32-34; Lc. 18:31-34)

<sup>17</sup>Jesúsén' len yezan bene' zja'aque' Jerusalénna'. Na' šlac zjangüe'e nezen' gwlejiže' bene' šiziŋw ca' gwleje' cont zjanaque' txen len le' na' gože' legaque':

<sup>18</sup>—Na'a ba zejcho Jerusalénna' gan' yesone' neda' lo na' bžoz gwnabia' ca' na' lo na' bene' ca' chososed chosolo'ede' dan' bžoj da' Moisés, na' yesechoglagüen' chia' yesote' neda', neda' naca' ben' gwseła' Dios golja' benačh. <sup>19</sup>Na' yesone'nda' lo na' bene' bi zjanaque' bene' Israel cont yesonle' chia', na' yesot yeseyine' neda', na' yesote'nda' yosode'e neda' le'e yag cruz, perw yeyon ža yebana' ladjo bene' guat ca'.

**Xna' Jacobo na' Juanna' gwñabe' yesebe' xi'ine' ca' cuit Jesúsén' gan' nabi'ena'**

(Mr. 10:35-45)

<sup>20</sup>Na' ja'ac xi'in Zebedeo, Jacobo len Juan, na' len xna'gaque' lao

Jesúsén'. Na' xna'gaquen' bzoa xibe' lao Jesúsén' gože'ne':

—Chñabda' le' to goclen.

<sup>21</sup>Nach Jesúsén' gože'ne':

—¿Bi goclen chaclažo' gona'?

Nach xna'gaquen' gože'ne':

—Chaclaža' gono' cont xi'ina' quinga yesebi'e šla'a güeje cuito'na' cate' žin ža nabi'o.

<sup>22</sup>Jesúsén' gože' Jacobo na' Juanna':

—Le'e cabi nezele bi dan' chñable. ¿Gwčhejlaže'le tele yela' zi' yela' ya' ca dan' tia' neda' na' gac chele can' gac chia'?

Nach bosyoži'e xtižen' gose'ene':

—Gwčhejlaže'to'.

<sup>23</sup>Nach Jesúsén' gože' legaque':

—Da' licze tele yela' zi' yela' ya' ca dan' tia' neda' na' gac chele can' gac chian', perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Xa' Diosen' gaquen che'.

<sup>24</sup>Nach cate' yeši bene' ca' zjanaque' le' txen gosende' can' gosena bene' ca' čhope, beseloque' legaque'. <sup>25</sup>Nach Jesúsén' goxe' yogüe' cont gosebigue' lagüen' na' gože' legaque':

—Nezeczzele bene' gwnabia' che to to nación na' bene' blao ca' chesone' byen chosozenag bene' čhegaque'.

<sup>26</sup>Perw bi naquen ca' len le'e. San note'tezle chaclaže'le gacle bene' blao, cheyla' gwzexjwlaže'le gaclen bene' lježle. <sup>27</sup>Na' še note'tezle chaclaže'le gacle bene' žialao, cheyla' gon cuinle ca xmos bene' lježle. <sup>28</sup>Ca'cze naquen len neda' naca' ben' gwseła' Diosen' golja' benačh. Gague za'a cont yesaclen bene' neda' san za'a cont gaclena'

be<sub>ne</sub>' , na' chzanlaže' cuina' yesote'  
neda' ne<sub>che</sub> xto<sub>la</sub>' be<sub>n</sub>ach<sub>en</sub>'.

**Jesúsen' bene' cont čhope be<sub>ne</sub>' lčhol  
besyele'ede'**

(Mr. 10:46-52; Lc. 18:35-43)

<sup>29</sup>Nach cate' besyeya'aque' ciuda  
Jericó, be<sub>ne</sub>' zan zjasenagüe'  
Jesúsen' len be<sub>ne</sub>' ca' zjanaque'  
le' t<sub>xen</sub>. <sup>30</sup>Na' čhope be<sub>ne</sub>' lčhol  
zjachi' chanez gan' zjayda Jesúsen'.  
Na' cate' gosacbe'ede' Jesúsen' zej  
gan' zjachi'ena' nach chososya'adie'  
gose'e le':

—X<sub>anto</sub>' , len' naco' xi'in diaža čhe  
da' rey Davin'. Beyaše'laže'šca neto'.

<sup>31</sup>Nach be<sub>ne</sub>' ca' chesyede gan'  
zjachi'ena' gosedile' legaque' cont  
yenenite' šize. Perw na' gosene'  
zižjech gose'ene':

—iX<sub>anto</sub>' , len' naco' xi'in diaža čhe  
da' rey Davin', beyaše'laže'šca neto'!

<sup>32</sup>Jesúsen' gwleze' gan' nite'na',  
nach goxe' legaque' gosebigue'  
lagüen'. Nach gože'ne':

—čBin' chaclaže'le gonda' le'e?

<sup>33</sup>Nach gose'ene':

—X<sub>anto</sub>' , chaclaže'to' yele'eto'.

<sup>34</sup>Jesúsen' beyaše'laže'de' legaque'  
na' gwdane' yejlaogaquen', nach la'  
besyele'etede', na' gosa'ogüe' le'.

**Gosonxene' Jesúsen' cate' beyo'e  
Jerusalén**

(Mr. 11:1-11; Lc. 19:28-40; Jn. 12:12-19)

**21** Na' cate' ba zoa yesežine'  
Jerusalénna' besežine' gan'  
chi' yež Betfagé, gan' zoa ya'a dan'  
nzi' Ya'a Olivos. Na' Jesúsen' gwsele'  
mandadw čhope be<sub>ne</sub>' ca' zjanaque'  
le' t<sub>xen</sub>, <sup>2</sup>gožgaque'ne':

—Le šja'ac yež dan' chi' ga<sub>la</sub>'ze,  
na' cate' žinlen' na' yeže<sub>lele</sub> to burr

be no'ole da'ba' yag na' nche'te  
to xi'inda'oba'. Le sežgacba' na' le  
che'gacba' nga. <sup>3</sup>Na' še bi ye' be<sub>ne</sub>'  
le'e na' ye'ine': “X<sub>anto</sub>'na' chyažjde'  
legača.” Na' la' yedyesantecze'ba'  
len le'e.

<sup>4</sup>Goc yogo' da' qui cont goc can'  
bzoj to ben' bzoj Xtiža' Diosen' cani',  
gwne':

<sup>5</sup>Gož be<sub>ne</sub>' ca' nita' Jerusalénna':  
“Le na'šc, ba za' rey čhelen',  
žie' cože' to burr dao', xi'in  
beyixe' be choa' yoa'.

Ze'e ca to be<sub>ne</sub>' bi naque' be<sub>ne</sub>'  
blao.

<sup>6</sup>Na' ja'ac be<sub>ne</sub>' ca' yež dao' dan'  
gož Jesúsen' legaque' ca', na' gosone'  
can' ben' Jesúsen' mandadw. <sup>7</sup>Na'  
besyeche'e burroa' len xi'inba' lao  
Jesúsen' na' gosexoa no xagaque'  
cože'ban' na' gwžia Jesúsen' be  
daon' cont gwyeje' Jerusalénna'.

<sup>8</sup>Na' be<sub>ne</sub>' zan gosonxene'  
Jesúsen' goseyixjw no xagaque'  
lo nez cont blej burron' len na'  
yeba<sub>le</sub>' gosečhogue' zoze' yag na'  
goseyixjuen' lo neza'. <sup>9</sup>Na' be<sub>ne</sub>'  
zjažialao na' lecze be<sub>ne</sub>' za'ac cože'  
bososye'e gosene':

—iLeca be<sub>ne</sub>' zaca' benga nac xi'in  
diaža čhe da' rey David! iMbalaz  
ben' za' nga gwse<sub>la</sub>' X<sub>ancho</sub> Diosen'  
le' cont nabi'e! iLeca be<sub>ne</sub>' zaca' ben'  
zoa yaban'!

<sup>10</sup>Na' cate' bžin Jesúsen'  
Jerusalénna' yogo' be<sub>ne</sub>' ca' že'  
ciudan' besyebande', na' gosene':  
—čNo benga bla' nga?

<sup>11</sup>Na' be<sub>ne</sub>' ca' nžag Jesúsen'  
bosyoži'e xtiža'gaque' gosene':  
—Bengan' Jesús be<sub>ne</sub>' za' yež  
Nazaret gan' mbane distritw Galilea  
na' cho'e xtiža' Dios.

**Jesúsen' bebeje' bene' ca' cheson ya'a  
yodao' blaon'**

(Mr. 11:15-19; Lc. 19:45-48; Jn. 2:13-22)

<sup>12</sup>Na' Jesúsen' gwyo'e chyo'o yodao' blaon' na' bešaše' yogo' bene' ca' chesote' na' bene' chesa'o na'. Nach bchixe' xmes bene' ca' chosoša' mechw, na' yag ga chesebe' bene' ca' chesote' ngolbex. <sup>13</sup>Na' gože' legaque':

—Nyojce Xtiža' Diosen' žan:

“Yesene' ližan' naquen to latje gan' yesoġ güiž bene' neda'”, perw le'e chonġen ca to latje ga že' bene' gwban.

<sup>14</sup>Na' bene' lchoġ ca' na' len bene' ca' nxinġ nġ'e gosebigue' lao Jesúsen' šlac zoe' chyo'o yodaon'. Nach beyone' legaque'. <sup>15</sup>Perw na' bġoz gwnabia' ca' na' bene' ca' chososed chosolo'e dan' bzoġ da' Moisésen' leca beseže'e cate' besele'ede' yela' guac ca' dan' ben Jesúsen'. Na' lecze beseže'e cate' gosende' can' bososya'a bi' bixjw ca' chyo'o yodao' blaon', gosenabe': “Leca bene' zaca' benga nac xi'in diaža che da' rey David.” <sup>16</sup>Nach gose'e Jesúsen':

—¿Zendo' bin' gosena bidao' ca'?

Jesúsen' boži'en gože' legaque':

—Zenda! ¿Bina' gwlable can' nyoj Xtiža' Diosen'?, žan:

Ba beno' cont bi' bixjw ca' na' len bi' nġ'e chesaže' chesonxembe' le'.

<sup>17</sup>Na' bechoje' gan' nita' bene' ca' na' beže'e ciudan'. Na' že'na' jayga'ane' Betania.

**Ben Jesúsen' cont gwbiž yag  
yixgüigw**

(Mr. 11:12-14, 20-26)

<sup>18</sup>Na' zil beteyo besyeya'aque' Betanian' jaseya'aque' Jerusalenna'

da' yoble. Na' šlac zjangüe'e nezen' gwdon Jesúsen'. <sup>19</sup>Na' ble'ede' to yag yixgüigw zoan cho'a nezen' na' jane'e še žia yaguen' yixgüigw. Perw bibi bželde', con xġaguen' na'že žia. Nach gožen':

—Bich bi yixgüigon' cuio'.

Na' la' gwbižte yaguen'.

<sup>20</sup>Nach bene' ca' zjanaque' le' txen besyebande' cate' besele'ede' can' goquen', nach gose'ene':

—¿Nac goquen' la' gwbižte yaguen'?

<sup>21</sup>Na' Jesúsen' gože' legaque':

—Da' li žia' le'e, še chejnilaže'le Diosen' na' bitw gacžejlaže'le, guaque gonġe can' ba benan' cont gwbiž yaguen'. Na' lecze ca' guac ye'le ya'a nga: “Gwcuase nga na' jaso'a lo' nesdaon'”, na' gac can' nalen'. <sup>22</sup>Na' še chejnilaže'le Diosen', bite'teže dan' nabelene' cate' yoġ güižlene', gonġcen' le'e.

**Yela' chnabia' che Jesúsen'**

(Mr. 11:27-33; Lc. 20:1-8)

<sup>23</sup>Nach Jesúsen' gozeje' yodao' blaon' da' yoble. Na' šlac chsed chlo'ede' bene' ca' že' na', bġoz gwnabia' ca' na' bene' gole blao ca' chesenabi'e nación chechon' gosebigue' cuit Jesúsen'. Nach gosenabde' le':

—¿Bi yela' gwnabia' napo' chono' da' qui? ¿No ben yela' gwnabian' cont chono' da' qui?

<sup>24</sup>Nach Jesúsen' boži'e xtiža'gaquen', gwne':

—Lecze de to da' nabda' le'e. Še yoži'ile xtižan' nach nġ'a le'e bi yela' gwnabia' chonġendan'.

<sup>25</sup>Le našč neda': ¿non' gwseġa' da' Juanna' bzoe' bene' nis? ¿Dios nan' gwseġe'ne', še benačen'?

Nach legacze' gose' lježe':  
 —Še ye'chone' Dios gwsełā' le', na' ye'e chio': "¿Bixchen' ca gwyejle'le che'?" <sup>26</sup>Na' bi gac ye'chone' benač gwsełā' le', le yogo'te bene' že' nga chesejle'e Diosen' gwsełe' da' Juanna' be'e xtiže'na', na' xož bi yesonde' chio'.

<sup>27</sup>Nach gose'e Jesúsen':

—Bi nezeto'.

Nach gože' legaque':

—Lecze neda' bi yapa' le'e bi yela' gwnabian' chonlenda' da' ca'.

### Jempl che chope xi'in bene'

<sup>28</sup>Na' Jesúsen' gože' legaque':

—Le gon xbab bi zeje jempl nga: Gwzoa to bene' gwnita' chope xi'ine'. Na' gože' tobe': "Xi'ina', chaclaža' šejo' güen žin na'aža gan' že' yag uvas chia' ca'." <sup>29</sup>Nach xi'inen' gožbe' le': "Bitw ša'a." Perw gwdele beyombe' xbab nach gwyejbe'.

<sup>30</sup>Nach gozeje' gan' zoa xi'inen' yeto, na' ježe'be' can' gože' bi' biše'ben'. Na' la' gožte bin' le': "Guaccze, na' ša'a." Perw bitw gwyejbe'. <sup>31</sup>Gwnašč neda', čno bi' ca' chope ben can' gwnalaže' xabe'?

Nach gose'ene':

—Bi' nechoa'.

Nach Jesúsen' gože' legaque':

—Ca'cze naquen. Na' da' li žia' le'e, bene' güečhixjw ca' na' no'ole ca' chja'aclen note'teze bene' byo yobech yosozenague' che Diosen' cont nabi'e yichjlažda'ogaque' cllel ca' le'e. <sup>32</sup>Ca' nac Juanna' ben' bzoe' bene' nis, bide' laolen' na' gwduxjue'ede' le'e naquen' cheyala' gonle cont yebe Diosen' le'e. Perw bitw gwyejle'le che'. Na' bene' güečhixjw ca' na' no'ole zle' ca'

gosejle'e che'. Na' cate' gocbe'ele bene' ca' ba gosejle'e che', bitw betinjele xtola'le ca' cont šejle'le che dan' bsede da' Juanna'.

### Jempl che mos mal ca'

(Mr. 12:1-12; Lc. 20:9-19)

<sup>33</sup>Le gwzenag yeto jempl nga.

Gwzoa to bene' na' goze' to cue' xen yag uvas lo yežlio che' na' gwlo'en le'ej. Na' na'teze bene' to ga yesesie' uvasen' cont choj xisen'. Na' lecze bene' to da' sibe ca' to campanaryw ga yesecua' bene' yosogüia yesene'e yag ca'.

'Na' bcua'ane' yežlion' lo na' bene' yesonši'e yag uvasen' na' gwze'e gwyeye' zito'. <sup>34</sup>Cate' bžin ža yosyotobe' cosešen', gwsełe' to chope xmoste' gan' že' bene' ca' nac lo na'gaque' yag uvasen' cont šjasyxi'e to tlaw cosešen' dan' cheyala' si'e. <sup>35</sup>Perw na' bene' ca' nac lo na'gaque' yag uvasen' gosezene' mos che' ca'. Goseyine' toe', na' yetoe' bosozie'ne' yej, nach yetoe' gosote'ne'. <sup>36</sup>Nach gossełā' xan yag uvasen' mos zanch cllel ca' bene' ca' gwsełe' da' nechw, perw lecze can' gosonde' bene' nechw ca', lecze ca' gosonde' legaque'.

<sup>37</sup>Nach gwdena' xan yežlion' gwsełe' cuincze xi'inen', gocde' yesezi'e xtižen'. <sup>38</sup>Perw na' bene' ca' nac lo na'gaque' yag uvasen' cate' besele'ede' xi'ine'na', nach gose' lježe': "Bengan' yega'anlene' yežlio nga cate' gat xen'. Le šo'o gotchone' cont yega'anlenchon." <sup>39</sup>Nach gosezene'ne', besyebeje'ne' gan' že' yag ca' na' gosote'ne'.

<sup>40</sup>Beyož be' Jesúsen' jempl nga, gozne':

—¿Nacxe chaquele gon xan yežlion' len bene' ca' bocua'anlene' yag uvas chen' cate' yežin cuine'?

<sup>41</sup>Nach bosyoži'e xtižen' gosene': —Šeje' šjetoe' bene' mal ca', na' yodie' yežlion' lo na' bene' yoble bene' yeson güen yosyonežjue'ne' to tlaw cosešen' cate' žin ža yosyotoben'.

<sup>42</sup>Jesúsen' gože' legaque': —Ca'czen'. ¿Bina' gwlable ga nyoj Xtiža' Diosen', žan quinga':

Yej dan' bi gosaclaže' bene' güen yo'o ca' yosochine', len ba naquen yej squin. Da' nga ben Xancho Diosen', na' naquen to da' yežejecho.

<sup>43</sup>Da'n'an' žia' le'e, da' bi chzenagle che Diosen', cuejyichje' le'e na' cueje' bene' yoble bene' yosozenag che' cont nabi'e yichjlažda'ogaque'. <sup>44</sup>Na' ca nac yejen', note'teze bene' lažo' lo yeja' na' cue'žošje', na' note'teze bene' chiže' yeja' cate' lažon' na' gwšošjen le'.

<sup>45</sup>Na' b\_xoz gwnabia' ca' na' bene' fariseo ca', cate' gosende' jempl ca' dan' be' Jesúsen', gosacbe'ede' be'e diža' che legaque' dan' bi chesejnilaže' le'. <sup>46</sup>Nach gosacclaže' yesezene' le', perw besežebe' bi yesone bene' ca' nžague' legaque', le yogüe' gosejle'e gwseļa' Diosen' Jesúsen' cont cho'e xtiže'na'.

**Jempl che ben' bene' lni  
cate' bšagna' xi'ine'**

**22** Na' da' yoble bsd blo'e Jesúsen' bene' ca' len jempl, gozne':

<sup>2</sup>—Yeļa' gwnabia' che Diosen' zaca'leben ca da' nga goc. Gwzoo to bene' gwnabia' na' bene' gastw

cate' bšagna' xi'ine'. <sup>3</sup>Na' cate' bžin hor solao lnin' gwseļe' xmosē' ca' cont jasexi'e bene' ca' ba boļ güiže' šja'ac lni'na', perw notno goclaže' šja'ac lni chen'. <sup>4</sup>Nach gože' yeto xonj xmosē' ca': “Le šjež bene' ca' ba boļ güižan' ye'lnē' ba bsini'a dan' gagwchona'. Ba betua' be dao' be chesane' na' ba bsini'a dan' gagwcho lo lnin'. Na' ye'lnē' yeside' gagwcho dan' ba bsini'an'.” <sup>5</sup>Perw bene' ca' ba gosata'yoede' cont šja'aque', bitw gosone' cuent dan' gose' mos ca' legaque'. Toe' gwyeje' jane'e yežlio che', na' yetoe' gwyeje' jene' negosyw. <sup>6</sup>Na' yebale' gosenize' mos ca' gwseļa' bene' gwnabian' na' gosonde' legaque' zi' na' gosote' legaque'. <sup>7</sup>Na' leca bža'a bene' gwnabian'. Na' gwseļe' soldadw che' ca' jasete' bene' ca' gosot xmosen' na' bosozeye' lažgaquen'. <sup>8</sup>Nach bene' gwnabian' gože' xmosen': “Ba bsini'a dan' gagwcho lo lnin', perw bene' ca' ba boļ güiža' nacbīa' bitw zjazaque' yeside'. <sup>9</sup>Le šja'ac le šjata yogo' nez na' ye'le yogo' bene' yežagle yeside' lnin'.” <sup>10</sup>Na' mos ca' ja'aque' yogo' nez na' jasetobe' con yogo' bene' besežague', no bene' naque' bene' güen na' no bene' naque' bene' mal, cont beža' yo'o gan' chac lnin'.

<sup>11</sup>'Perw cate' gwyo'o bene' gwnabian' jane'e bene' ca' že'na' na' ble'ede' to bene' bi nyaze' lache' da' bnežjue' yesaze' lo lnin'. <sup>12</sup>Nach gože' le': “Migw chia', žnac goquen' gwyo'o nga bitw nyazo' lache' dan' beņa' chazo'?” Nach bēna' bitw beželde' bi ye'ene'. <sup>13</sup>Nach bene' gwnabian' bene' mandadw yosochej xmosē' ca' ni'a na' bēna' cont yesyebeje'ne' na' yesebeque'ne'

gan' nac chol, ga cuežyaše' na' gan' gagwxejte laye' tantw žaglagüe'.

<sup>14</sup>Can' naquen, Diosen' chaxe' yogo' bene' cont yesejle'e che', perw bal guen' chosozenague' che' na' legacze' chbeje' cont yesaque' xi'ine'.

### Ca nac dan' cheyała' gaxjw

(Mr. 12:13-17; Lc. 20:20-26)

<sup>15</sup>Nach bene' fariseo ca' besežague' na' bosoxi'e naclen' yesone' cont yesebeje' Jesúsen' diža' da' yosode'ede' cont yesagüe' xya che'.

<sup>16</sup>Na' bene' fariseo ca' gosesele' bal bene' zjanaque' txen len legaque' na' yebał bene' chesone' txen len Herodesen' cont jaseže' Jesúsen':  
—Maestrw, nezeto' zoatezo' cho'o diža' li. Na' nezeto' diža' li cho'o chsed chlo'edo' bene' can' chazlaže' Diosen' goncho. Na' bi chono' cuent bi ža bene', le toz can' chono' len note'teze bene'.<sup>17</sup>Da'nan' zedenabeto' le' cont nao' neto' can' chacdo' cheyała' gonto'. ¿Naquen binlo no chixjw da' cheyała' chixjwcho lao ben' nac la'zelagüe bene' gwnabia' ben' chi' Roma, še bi?

<sup>18</sup>Jesúsen' gocbe'ede' yela' xi'a chegaquen', nach gože' legaque':  
—iNacle bene' gwxiye'! ¿Bixchen' chaclaže'le yoslažo'le neda' len xtižan'?<sup>19</sup>Le gwlo'e neda' to mechw dan' chyixjwle che gobiernen'.

Nach gosone' to mechw dan' nzi' denario.<sup>20</sup>Nach Jesúsen' gože' legaque':  
—¿No lao dan' da' le'e mechw nga? na' ¿no la da' nyoj le'en ni?

<sup>21</sup>Nach gosene':

—Che César ben' nac la'zelagüe bene' gwnabia' ben' chi' ciuda Roman'.

Nach Jesúsen' gože' legaque':  
—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

<sup>22</sup>Nach cate' gosende' xtiža' Jesúsen' besyebande'. Nach besyeya'aque' gan' zoe'na'.

### Cate' yesyeban bene' guat ca'

(Mr. 12:18-27; Lc. 20:27-40)

<sup>23</sup>Na' lo ža na'teze besežin bal bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosena'be' le', gosene':

<sup>24</sup>—Maestrw, da' Moisésen' gwne':  
“Še to bene' byo nšagne'e na' gate' sin nono xi'ine' zoa, bene' biše' ben' ba goten' cheyała' yošagna'lene' no'ol güezeba' cont yesenita' xi'in diaža che da' bišen'.<sup>25</sup>Na' len neto' gosanita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. Na' bene' gwchopen' bošagna'lene' no'ol güezeba'.<sup>26</sup>Na' lecze gote' nono xi'ine' gwnita'. Lecze ca' goc len bene' gwyona', bžinten bene' gaža' yogo'lole' gosac che' ca'.<sup>27</sup>Na' gwde gosat yogo'lol bene' ca', nach got len no'ola'.<sup>28</sup>Na' cate' yesyebane' ladjo bene' guat ca', ¿nox bene' ca' soalene' no'ola' ca' xo'ole'?, le yoguen' bosyošagna'lene' le'.

<sup>29</sup>Na' gož Jesúsen' legaque':  
—Clelen' chonle xbab dan' žale ca', le bi nezele can' ža Xtiža' Dios dan' nyojen, neca nombial'le yela' guac chen'.<sup>30</sup>Caten' yesyeban bene' guat ca', bich yosošagne'e, neca yosonežjo xi'ine' no'ol gwšagne'e, le yesaque' ca' angl bene' zjazoa yaba.  
<sup>31</sup>Na' ca' nac dan' yesyeban bene'



guat ca', čbina' gwlabla da' nga can' nyoj Xtiža' Diosen'? žan: <sup>32</sup>“Neda' naca' Dios ben' chonxen Abraham, ben' chonxen Isaac na' ben' chonxen Jacob”. Bene' guat ca' bi chesonxene' Diosen', san bene' zjamban.

<sup>33</sup>Na' bene' ca' zjanžaguen' besyebande' cate' gosende' diža' dan' bsd blo'ede' legaue'.

**Dan' nac da' blaoch dan' ža Diosen' cheyała' goncho**

(Mr. 12:28-34)

<sup>34</sup>Na' cate' gosene bene' fariseo ca' can' bzoaži Jesúsen' bene' saduceo ca', nach besedobe' jasa'aque' lagüen'.

<sup>35</sup>Na' to ben' nsedchgüe' ley dan' bzoj da' Moisés lecze goclaže' cueje' Jesúsen' diža' da' gwchine' contr le', gože'ne':

<sup>36</sup>—Maestrw, lo ley che Diosen', čnon' nacch da' žialao da' zjanyojen da' ža Diosen' cheyała' goncho?

<sup>37</sup>Nach gož Jesúsen' le':

—“Cheyała' gaguecho Xancho Diosen' con ca' zelao chejni'icho do yichj do laže'cho.” <sup>38</sup>Lenna' naquen da' žialaoch na' da' blaoch lagüe da' ca' ža Diosen' cheyała' goncho. <sup>39</sup>Na' da' gwchopen' zejgalan' ca', žan: “Cheyała' gague lježcho ca' chaque cuincho.” <sup>40</sup>Chope da' ca' ža Diosen' cheyała' goncho chzejni'in chio' can' zeje doxen dan' bzoj da' Moisésen' na' dan' bosozoj bene' ca' gosole' xtiža' Diosen' cani'.

**Criston' naque' xi'in diaža che da' rey David**

(Mr. 12:35-37; Lc. 20:41-44)

<sup>41</sup>Na' šlac ne' zjanžag bene' fariseo ca', <sup>42</sup>Jesúsen' gože' legaue':

—čBixe xbab chonle che Criston' ben' gwlej Diosen' cont yedenabi'e? čNo xi'in diaža che naque'?

Na' gose'ene':

—Xi'in diaža che da' rey Davin'.

<sup>43</sup>Nach Jesúsen' gože' legaue':

—Še ca' naquen, čbixchen' cate' da' David bzoje' can' blo'e Spiritw che Diosen' le', gwne' Criston' naque' Xane'? Quinga bzoje':

<sup>44</sup>Xancho Dios gože' Xanan':

“Gwche'edo' cuita' nga nabia'cho txen,

na' gona' cont yogo' no chesegue'e le' yosozexjw yichje' yosozenague' chio'.”

<sup>45</sup>čNacxe gac nacho Criston' xi'in diaža che da' rey David? le' cuin Davin' gože' le': “Xana”.

<sup>46</sup>Na' notoch no goc yosyoži'e xtižen'. Na' gwzolao žana' notoch no besyeyaxje bi yesenabde' Jesúsen'.

**Xtoła' bene' fariseo ca' na' bene' ca' chososed chosolo'e leyna'**

(Mr. 12:38-40; Lc. 11:37-54; 20:45-47)

**23** Nach Jesúsen' gwzolao be'e diža' len bene' ca' zjanaque' le' txen na' len bene' ca' zjanžague' gan' zoe'na', gwne':

<sup>2</sup>—Bene' ca' chososed chosolo'e ley na' bene' fariseo ca' ba zjanlane' xlatje da' Moisésen' cont chosozejni'ide' bene' ley che Diosen'.

<sup>3</sup>Na' da'n'an' cheyała' gwzenagle čhegaue' cate' chosozende' le'e can' ža leyna', na' cheyała' gonle can' chosozejni'ide' le'e. Perw bitw gonle can' cheson legaue', le' legaue' bitw chesone' dan' chesene' cheyała' gac. <sup>4</sup>Legaue' chosozanche' dan' ža leyna'. Chesonen' ca' to yoa' da' nono soe gua' na' chesaclaže' gua' bene' yoble len na' bitw chesaclaže' yeso'en' legaue'. <sup>5</sup>Ca' nac bene' ca', yogo' dan' chesonen', chesonen' ga



yesele'e bene' can' chesonen' contze yesonxene' legaque'. Chio' bene' Israel nchejcho caj dao' de yid do na'cho na' do loxgacho na' lo' caj dao'na' chgo'ošagüe'cho to pedas yiš gan' nyoj late' güeje Xtiza' Diosen'. Perw ca nac bene' ca' chososed chosolo'e ley che Diosen' na' bene' fariseo ca', zjanonche' caj dao' chegaque' da' xench ca yezica'chle bene'. Na' lecze chesone' lox xagaque' da' tonech clcl ca che bene' yezica'chle. <sup>6</sup>Chesyebede' chesebi'e gan' chesebe' bene' blao cate' chja'aque' gan' chac no lni na' cate' chja'aque' yodao' chegaque'. <sup>7</sup>Chesyebede' chesap bene' legaque' bala'an cate' chesyěžague' lagüe ya'a. Na' chesyebede' yese' bene' legaque' maestrw.

<sup>8</sup>Perw zia' le'e, bi gonle byen ye' bene' le'e maestrw, le toz neda' Cristo naca' Maestrw chele. Na' yogo' le'e chejnilaže'le neda' nac biše' lježle tole yetole. <sup>9</sup>Na' lecze bitw gonxenle note'teze bene' blao ye'ne': "Xato". Toze Diosen' ben' zoa yaba naque' Xacho. <sup>10</sup>Na' bitw güe'le latje ye' bene' le'e: "Xana", le toz neda' Cristo naca' Xanle. <sup>11</sup>Še no le'e nacle bene' blaoch, cheyala' gwzexjw yichjle gaclen lježle. <sup>12</sup>Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gaxene'.

<sup>13</sup>iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le bene' cont bi yosozenague' che Diosen', le bi chaclaže'le nabia' Diosen' yichjlažda'ogaque', na' lecze le'e bi chzenagle che Diosen' cont nabi'e yichjlažda'olen'.

<sup>14</sup>iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le no no'ole güezebe cont checa'ale yo'o chegaque'. Na' cate' chol güižle Diosen', šša choe'le diža' cont yesaque bene' leca chonxenle'. Gacchle castigw clcl ca yezica'chle bene' güen da' xinj.

<sup>15</sup>iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! iNacle bene' gwxiye'! Chejtez chejle chjatiljwle bene' zito' bene' yeson txen len dan' chsed chlo'elen'. Na' cate' chželelene' chzejni'ilne' cont yesaque' bene' xi'ach clcl ca le'e.

<sup>16</sup>iNyaše'chguaze gac che le'e! iNacle ca bene' lchol bene' chesacde' guac yesegüe'e nez bene' yoble! Žale note'teze bene' še ne': "Yodao' blaon' zoan testigw chia' gona' can' ba gwnia", bitwbi zejen dan' chnen'. Perw še že: "Oro dan' de lo' yodaon' zoan testigw chia' gona' can' ba gwnia", nach cheyala' gone' can' gwnen'. <sup>17</sup>iLe'e nacle ca to bene' lchol na' bitw chejni'ile! Oron' bitec bi zacan'. Yodao'na' gan' yo'o oron' lenna' zaca'chen, le dan' yo'o oron' lo'ennan', da'nan' oron' naquen che Dios. <sup>18</sup>Na' lecze žale še to bene' že: "Mes gan' chosozeye' beyixe' ca' chesonxene' Diosen', zoan testigw chia' gona' can' ba gwnia", bitwbi zejen xtižen'. Perw na' še že: "Dan' xoa lo' mes lo' yodaon' zoan testigw chia' gona' can' ba gwnia", nachen' cheyala' gone' can' gwnen'. <sup>19</sup>iLe'e nacle ca bene' lchol na' bitw chejni'ile! Dan' chosozeye' chesonxene' Diosen' bitec bi zacan'. Mes gan' chesexoe' dan' chosonežjue'

Diosen', lēna' zaca'chen, lē naquen che Dios. <sup>20</sup>Še bene' že': "Mes dan' zoa lo' yodaon' zoa testigw chia' gona' can' ba gwnia'", lencze dan' xoa lo mesen' zoa testigw che'.

<sup>21</sup>Na' še bene' že': "Yodaon' zoa testigw chia' gona' can' ba gwnia'", lēcze zejen Diosen' naque' testigw che', lē yodaon' naquen che Dios na' nan' zoe'. <sup>22</sup>Na' še bene' že': "Yaban' zoa testigw chia' gona' can' ba gwnian'", zejen Diosen' naque' testigw che', lē nan' zoa Diosen' chnabi'e.

<sup>23</sup>iNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye! L'a'czla' chnežjwle Diosen' to part lao ši part che yixegüej, che oreg, che comin, na' che bichle cuan chele, bibi zejen dan' bitw chzenagle che da' ca' zjanac da' žialaoch dan' ža leyna'. Leyna' žan cheyała' gonle da' nac güen lao Diosen', na' cheyała' yeyaše'laže' ljež benačhle na' cheyała' gonle can' ba gwlo'o cho'ale gonle. Da' ca' zjanaquen da' zejechen gonle, perw lēcze bitw cheyała' cuejyichjle bi gwnežjwle da' ca' chnežjwle Diosen'. <sup>24</sup>iNacle ca to bene' lchoł bene' chesacde' guac yesegüe'e nez bene' yoble! Zaca'lebele ca to bene' chebej yogo' beb dao' riz da' nchixe da' che'eje' perw bitw chacbe'ede' še yo'o to da' xen juisyw da' zaca' yebeje'. Lē chi' yichjle che da' ca' bitec bi zaca' da' ža ley chechon' cheyała' goncho, na' bi chonle da' ca' zjazaca'chguan.

<sup>25</sup>iNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle

bene' gwxiye! Zaca'leble ca ye'en dan' chchin bene' na' chyibe' cožen' perw bi chyibe' lo'en. Chonle cont chesaque bene' nacle bene' güen, perw leca chzelaže'le bi da' de che bene' na' chbechgüele chca'alēn.

<sup>26</sup>iLe'e bene' fariseo, nchol yichjlažda'olen! Lē yetinje xtoła'le cont da' licze gacle bene' güen can' chaclaže'le yeson bene' xbab nacle. Nach gacle ca to ye'en dan' nyibe' cožen' na' lo'en.

<sup>27</sup>iNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye! Zaca'leble ca to ba dan' zjanone' xdanchgua lagüen perw lo'en že' žit che bene' guat na' chi'chgua da' zban. <sup>28</sup>Chonle cont chesaque bene' nacle bene' güen, perw len yichjlažda'olen' nacle bene' gwxiye' na' bene' malchgua.

<sup>29</sup>iNyaše'chguaze gac che le'e chsed chlo'ele ley da' bzoj da' Moisés na' le'e bene' fariseo! iNacle bene' gwxiye! Chonšagüe'le cho'a ba che da' bene' goso'e xtiža' Diosen' cani', na' chonšagüe'le cho'a ba che yezica'chle bene' goson da' güen.

<sup>30</sup>Na' žale: "Šaca' chio' ba zoacho ca tiemp che da' xozxta'ocho ca', bitw bencho txen len legaque' cate' gosote' bene' ca' goso'e xtiža' Diosen' cani'." <sup>31</sup>Perw na' yogo'lołte dan' chonle chlo'en tozcze can' nacle len da' xozxta'ole ca' bene' gosot da' bene' ca' goso'e xtiža' Diosen' cani'. <sup>32</sup>Lē gwzala'ošaze lē gon bica'ch da' zgot dan' bitw goła' yeson da' xozxta'ole ca'.

<sup>33</sup>Le'e nacchguale bene' zgot na' bene' gwxiye'. Bitw gac yelale lao castigw dan' gon Diosen' le'e, lē

sele' le'e lo yi' gabilen'. <sup>34</sup>Na' da' gona', neda' sela' no bene' yeso'e xtiža'na' len le'e na' no bene' sina' na' nochle bene' yososedde' le'e xtižan'. Na' gotle bale' gwda'gaclene' to le'e yag cruz, na' yebale' chinle do lo' yodao' chelen', na' yebale' gwlaglene' gate'teze yež šja'aque'. <sup>35</sup>Na' dan' gonle ca' gaple doła' che yela' got che yogo' bene' ca' goson da' güen, ben' gosot da' xozxta'ole ca' gwzolaozen len da' Abel ben' naque' bene' güen lao Diosen' na' beyožen len da' Zacarías xi'in da' Berequías. Zacaríasen' gosote'ne' do gan' zoa yodao' blaon' na' do gan' ze mes gan' chosozeye' beyixe' chesonxene' Diosen'. <sup>36</sup>Na' da' li žia' le'e, le'e mbanle na'a si'le castigw che yela' got che yogo' bene' ca' gosot da' xozxta'ole ca'.

**Begüine' Jesúsén' che xtoła' bene'**

**Jerusalén**

(Lc. 13:34-35)

<sup>37</sup>'Le'e bene' Jerusalén, chotle bene' ca' chsela' Diosen' cont chesoe'lene' le'e xtižen' chchellene' yej. Zan ni'a ba goclaža' yotoba' le'e ca to jed xcaca' ben' nche' xi'in na' chyežba' legacba', perw bitw goclaže'le. <sup>38</sup>Na' na'a ba gwlejyichj Diosen' le'e. <sup>39</sup>Na' žia' le'e, bich le'ele neda' na'a, perw cate'ch žin ža le'ele neda' yeto nach nale: "Mbalaz ben' za' nga nsela' Xancho Diosen' le' nabi'e".

**Gwžin ža yosyočinje' yodao' blaon'**

(Mr. 13:1-2; Lc. 21:5-6)

**24** Na' ba cheza' Jesúsén' yodao' blaon' šeje' ga yoble cate' bene' ca' zjanaque' le'

txen gosebigue' gan' zoe'na' na' gosezolağüe' goso'e diža' catec xdan nac yodaon' na' lecze ca' yo'o ca' zjanyechjen. <sup>2</sup>Nach Jesúsén' boži'e xtiža'gaque' gwne':

—Ca nac yogo' da' quinga chle'ele, da' li žia' le'e, ne to yej da' zjancua' nga ca yega'an zjancua' cože' lježen. Yogon' yosyočinje'.

**Dan' gac cate' ba za' bagwze yeyož yežlio nga**

(Mr. 13:3-23; Lc. 21:7-24; 17:22-24)

<sup>3</sup>Na' ja'aque' Ya'a Olivos. Na' cate' Jesúsén' ba chi'e lo ya'an, bene' ca' zjanaque' le' txen gosebigue' lagüen' gose'ene' šižize:

—Che'neto' nao' neto' batcan' gac da' ca'. Na' žnac gac nezeto' cate' ba zoa bagwze yido' na' ba zoa yeyož yežlion'?

<sup>4</sup>Nach Jesúsén' boži'e xtiža'gaquen' gwne':

—Le gwsaca' cont notno siye' le'e.

<sup>5</sup>Le zan bene' yesaš yežlio nga bene' yesaclaže' yosolane' xlatja' nga. Na' yesene': "Nedan' Cristo ben' gwlej Diosen' cont nabi'e." Na' yeseziye'e bene' zan. <sup>6</sup>Na' yenele chac gwdiłe nile nale, na' yenele guac gwdiłe, perw bi žeble, le can' cheyla' gac. Perw gague lenna' nacho ba bžin ža yeyož yežlion'. <sup>7</sup>Le yesedił to yež len yeto yež yoble na' to nación len yeto nación yoble. Na' cue' yižgüe', na' gata' gwbin na' zan cuen ga xo'chgua lo yežlion'. <sup>8</sup>Perw na' yogo' da' qui gac cate' za' solao gata' yela' zi'.

<sup>9</sup>Nach bene' ca' že' yogo' nación yesegue'ede' le'e dan' chejnilaže'le neda' na' yesone' le'e lo na' bene' ca' chesegue' le'e na' yososaca'zi'e

le'e nach yesote' le'e. <sup>10</sup>Caná' beñe' zan beñe' ba chesejnilaže' neda' yesebejyichje' bich yesejnilaže' neda'. Na' legacteze' yesechje' yeson lježgaque' lo na' beñe' da' chesegue'ede' legaque'. <sup>11</sup>Na' beñe' zan yesonlaže' yesene' xtiža' Diosen' cheseyixjue'ede' na' yeseziye'e beñe' zan. <sup>12</sup>Na' lagüe dan' šanch beñe' ca' yeson da' malen', beñe' zan juisyw beñe' ba chesejnilaže' neda' bich yesacde' lježe'. <sup>13</sup>Perw na' note'tezle gwyo gwčhejlaže'le cont bi cuejyichjle dan' chejnilaže'le neda' žinten gatle, nach šjayzoale len Diosen'. <sup>14</sup>Na' šja'ac beñe' doxen lo yežlion' yeseyixjue'ede' diža' güen cont yeseneze beñachen' cheyała' yosozenague' che Diosen' nach nabi'e yichjlažda'ogaque'. Na' cate' beñe' že' yogo' nación ba zjañezde' da'na', cana'ch yeyož yežlion'.

<sup>15-16</sup>'Da' Daniel ben' gwdixjue'ede' xtiža' Dios cani' bzoje' che da' zbranchgua da' gwxiñjen latje gan' chonxencho Diosen'. Na' cate' le'e le'e le'e ba zoa dan' gan' zoa yodao' blao, cana' beñe' yesenita' distritw Judea cheyała' yosoxonje' šja'aque' do ya'adao'. (Beñe' gwlaben' cheyała' šejni'iden'.) <sup>17</sup>Na' beñe' chda do yichjo'o che ližen', bi yeyetje' yotobe' xšinlaze' že' ližen', con yoxonje'.

<sup>18</sup>Na' beñe' chda yiže' bi yeyej liže' šjayxi'e xałane'. <sup>19</sup>iNyaše'chguaze zjanac no'ol ca' zjanoa' xi'in na' no'ol ca' ne' chosoguaže' bidao' lo ža ca'! <sup>20</sup>Na' le nab lao Dios bi yažjen gwxonjle cate' chac zag o lo ža che Dios. <sup>21</sup>Le yesaquen ža da' leca yesale' beñe'. Cate' gwxete yežlion' na' ža na'aža nono na' gałe' ca', neca žinlažen' yesale'de' ca' da'

yoble. <sup>22</sup>Na' šaca' Xancho Diosen' bi yozaše' žan' yesac ca', notno yela, perw yozašen' neče chacde' beñe' ca' chesejnilaže' le'e, beñe' ba gwleje' zjanaque' xi'ine'.

<sup>23</sup>Caná' še no ye' le'e: "Le našc, nga zoa Criston' ben' gwlej Diosen' cont nabi'e", o "Le našc, na' zoe'", ne ca'cze bi šejle'le. <sup>24</sup>Yesaš beñe' gwxiye' beñe' yesaclaže' yosolane' xlatja' nga, na' yeson cuine' ca' beñe' chesoe' xtiža' Dios. Na' yesone' yela' guac da' yesele'e beñe' na' bichle da' zaca' yesyebande' cont yeseziye'e legaque'. Na' len beñe' ca' ba gwlej Diosen' zjanaque' xi'ine' yesaclaže' beñe' gwxiye' ca' yeseziye'e šaca' gac yeseziye'e legaque'. <sup>25</sup>Ba nezele can' gac, le ba gwdixjue'eda' le'e yogo' can' gac. <sup>26</sup>Na' še yes'e le'e: "Zoa Criston' latje dašen'", bitw gwzenagle čhegaque', bitw šejle. Na' še yes'e le'e: "Zoa Criston' lo' yo'ona'", bitw šejle'le čhegaque'. <sup>27</sup>Can' chac cate' čep yes chsenin' doxen le'e yaban' zejzenez, lecze can' gac cate' žin ža yida' da' yoble, Diosen' gwsele' neda' golja' benach. Yida' zejzenez na' yogo'lo' beñe' yesele'ede' neda'. <sup>28</sup>Nga chonen che ben' že': "Gan' de be guat nan' chesežag šod ca'."

#### Can' gac caten' yid Jesucriston' da' yoble

(Mr. 13:24-37; Lc. 21:25-33; 17:26-30, 34-36)

<sup>29</sup>'Na' cate' la' yeyožte saca'zi' benachen', gwbižen' yeyaquen čol, na' bion' bich gwsenin'. Nach beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'. <sup>30</sup>Na' cana'ch beñe' že' yežlion' yesele'ede'

neda' naca' ben' gwseĵa' Diosen' golja' beṇaĉ za'a ladjo bejon' len yela' guac xen na' yela' beṇe' zaca' juisyw chia'. Na' beṇe' ze' yogo' nación che yežlion' yesebežyaše', beṇe' bi gosejnilaže' neda'. <sup>31</sup>Na' caten' yida', to trompeta' cuežen zižje, na' seĵa' angl chia' ca' doxen yežlion' yosyotobe' beṇe' ca' ba gwleja' cont zjanaque' neda' txen gate'teze nite' doxen lo yežlio ga zelao nac zito'.

<sup>32</sup>Le gwzenag che jempl nga che yag yixgüigw: Cate' ba chzolao chebešjw yaguen' na' chelan' ĵaga' che'en dao', chacbe'ele baĉ zoa yela' tiemp yejon'. <sup>33</sup>Na' lecze cate' le'ele ba chac da' mal ca' ba gwnian', cana'ch nezele ba za' juisyw, ba zoa gaĵa'. <sup>34</sup>Da' li žia' le'e, biṇa' yenit diaža che le'e nita'le na'a cate' ba goc yogo'lol da' ca'. <sup>35</sup>Le'e yaba na' yežlion' yesede chen, perw ca nac xtižan', gague da' te cbi gac can' žanna'.

<sup>36</sup>Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nezda'. Toz Xa' Dios neze.

<sup>37</sup>Diosen' gwseĵe' neda' golja' beṇaĉ, na' can' goc tiemp che da' Noé, lecze can' gac caten' neda' yida' da' yoble. <sup>38</sup>Beṇe' ca' gosenita' tiemp che da' Noén' gosenite' chese'ej chesagüe' na' chosošagne' na' chosošague' na' no xi'ingaque'. Ne' chesonte' ca' caten' bžin ža gwyo'o Noén' lo' barcon'. <sup>39</sup>Bitw gosacbe'ede' bin' gac. Cate'ch goc yejw sio' juisyw na' bia' nisen' yogo'lolē' cana'ch gosacbe'ede'. Lecz can' gac, con cate'ch yida' da' yoble cana'chen' yesacbe'e beṇe' bin' gac.

<sup>40</sup>Quingan' gac caten' yida' da' yoble: Choṇe beṇe' nite' do yixe', toe' yezi' yeca'a, na' yetoe' yocua'ana'.

<sup>41</sup>Na' choṇe no'ole nite' chesote', toe' yezi' yeca'a na' yetoe' yocua'ana'.

<sup>42</sup>Da'nan' le soa le cueze, le bi nezele bi ža bi horen' yida' da' yoble, neda' naca' Xanle. <sup>43</sup>Le gon xbab che da' nga, šaca' neze xan yo'on' do bi hor lo yelen' žin beṇe' gwbanṇa' ližen', na'ze' cont bitw gü'e latje šo' ben' ližen' cuane' xšinĵazen'.

<sup>44</sup>Da'nan' le soa le cueze batcan' yida' da' yoble, le cate' bi chonle xbab yida', cana' yida', neda' naca' ben' gwseĵa' Diosen' golja' beṇaĉ.

### Mos ben' chon güen, na' mos ben' bi chon güen

(Lc. 12:41-48)

<sup>45</sup>Note'tezle še zoale lez bate'teze, zaca'leble ca to mos beṇe' naque' beṇe' sina' na' beṇe' chon da' cheyaĵa' gone'. Na' še to beṇe' mos chonchgüe' güen, nach xanen' cue'e lo ne'e ližen' cate' se'e cont mosen' gwnežjue' da' yesagw yogo' mos ca' cate' ba gole' yesagüe' tža tža. <sup>46</sup>Še to beṇe' mosen' chonteze' can' gož xanen' le', mbalaz soe' cate' yežin xanen'. <sup>47</sup>Da' li žia' le'e, xanen' cue' lo na' mosen' yogo'lol da' de che'. <sup>48</sup>Perw še mosen' naque' beṇe' zgot na' gone' xbab ne': "Ba gwže xanan'". <sup>49</sup>Nach solagüe' tile' mos ca' yezica'chle na' ye'ej gagwṁate' len no beṇe' borrašw, <sup>50</sup>nach xane'na' yežine' to ža senyale' le' to hor bi nacbe'ede'. <sup>51</sup>Na' dan' bi chon mosen' ca cheyaĵa' gone', xane'na' chinchgüe' le' ca gatte'. Gac che' can' chac che note'teze beṇe' gwxiye', chjaya'aque' gabilen' gan'

chesebežyaše' na' chesagwxejte laye'  
dan' leca chesežaglagüe'.

**Jempl che ši no'ole güego'**  
**ja'aque' to yela' güešagna'**

**25** Nach Jesúsen' goze'e bene'  
ca' zjanaque' le' txen:  
—Cheyała' soale lez batcan'  
yedenabi'a, can' gwnita' no'ole  
chesejni'i no'ol ca' za' gua'a diža'  
chen'. Goc to yela' güešagna', na'  
nita' ši no'ol güego' zjanaque' migw  
che bene' ca' chosošagnan'. Na'  
zjanxobe' lintern chegaque' ja'aque'  
jaseleze' yesyechoj bene' ca' liž  
no'olen' par šja'aque' liž bene' byon'  
txen. <sup>2</sup>Na' gayo' no'ol ca' gosaque'  
bene' chejni'i na' yegayoe' bibi xbab  
gosone'. <sup>3</sup>Cate' no'ol ca' bibi xbab  
goson gosa'ac liže', zjanxobe' lintern  
chegaquen', perw bitw gosoxe'  
botey gan' yože set dan' yosočhine'  
cate' yebiž dan' yože lo' lintern  
chegaquen'. <sup>4</sup>Na' no'ol ca' chesejni'i,  
zjanxobe' lintern chegaque' lente  
botey seten' dan' yosočhine'  
cate' yebiž dan' yože lo' lintern  
chegaquen'. <sup>5</sup>Na' bene' güešagna'  
ca' gosežede' na' no'ole ca' gosebeze'  
legaque' gosetase' šlac chesebeze'ne'.  
<sup>6</sup>Na' do chel, to bene' gwne' zižje,  
gože' legaque': “Ba chesyechoj bene'  
güešagnan'. Le šo'o šjašagchone'.”  
<sup>7</sup>Na' cate' gože' legaque' ca', yogo'  
no'ol ca' gosezeche' na' gosečhogue'  
mešw dan' gwyey che linterna' na'  
bosyogualen' da' yoble. <sup>8</sup>Na' no'ol  
ca' bibi xbab cheson gose'e no'ol ca'  
yegayo': “¿Bi gonle late' dan' yože  
botey chelen' neto'? le ba chebiž  
cheton'.” <sup>9</sup>Nach no'ol ca' gose'e  
legaque': “Bitw gac gonto' late' chele,  
le dan' de cheton' bitw gaquen

par yogo'cho. San le šja'ac le šjaxi'  
chelen' ga choten'.” <sup>10</sup>Nach no'ol ca'  
bi goson xbab ja'aque' jasexi'e seta'.  
Na' šlac zja'aque' besyežin bene' ca'  
chosošagna' liž bene' byon'. Na' no'ol  
ca' gosaque' bene' chejni'i, goso'e  
txen len bene' ca' chosošagnan' lo'  
yo'o gan' chesone' linin'. Nach mos  
ca' bososeyjue' puerten'. <sup>11</sup>Na' cate'  
besyežin no'ol ca' bi goson xbab,  
gose'ne' cho'a puerten', gose'e ben'  
zoa lo' yo'on: “Bene', gwsaljwšca  
puerta' cont šo'to'.” <sup>12</sup>Perw na' gože'  
legaque': “Da' li žia' le'e, bitw saljua'  
šo'le le bitw nombi'a le'e.”

<sup>13</sup>Nach gož Jesúsen' bene' ca'  
zjanaque' le' txen:

—Ca'czen' cheyała' soale lez  
batcan' yedenabi'a, le bitw nezele bi  
ža bi hor yida' yežlio nga da' yoble,  
neda' naca' ben' gwseła' Diosen'  
golja' benačh.

**Jempl che ben' bocua'anlene'**  
**xmose' ca' mechon'**

<sup>14</sup>Na' dan' yida' yežlio nga da'  
yoble yedenabi'a zaca'leben ca da'  
nga goc. To bene' gwyeje' nación  
zito'. Na' za' se'e goxe' mos che' ca'  
na' gwlo'e lo' na'gaque' xmechue'  
cont gosone' delgens. <sup>15</sup>Toe'  
bocua'anlene' gayo' mil. Na' yetoe'  
bocua'anlene' chop mil. Na' yetoe'  
bocua'anlene' to mil. Bnežjuen'  
legaque' con ca ble'ede' da' chac  
yeson to toe'. Beyož bene' ca' na'  
gwze'e. <sup>16</sup>Na' ben' bocua'anlene'  
gayo' mil la' gwzolaote chone'  
delgens len mechon' na' bene' gan  
lecze gayo' mil. <sup>17</sup>Lecze ca' ben ben'  
bocua'anlene' chope mil, na' bene'  
gan yechope mil. <sup>18</sup>Na' ben' bnežjue'  
to mil gwyeje' jacuaše' xmechw

xanen' to lo' yechw da' gwche'ene' lo' yo.

<sup>19</sup>Goc šsa gwza' xan mos ca' cate' bežine', nach bene' mandadw ja'ac xmos'e' ca' lagüen' cont bosyodie' cuent. <sup>20</sup>Mosen' ben' bocua'anlene' gayo' mil bžine' lagüen' na' gože'ne': "Xana', ni de da' gayo' mil dan' beno' neda'. Na' ba bena' gan yegayo' mil." <sup>21</sup>Na' xane'na' gože'ne': "Ba beno' da' güen. Naco' mos güen na' ba beno' ca cheya'la' gono'. Na' dan' beno' can' cheya'la' gonon' len da' daon' bocua'anlena' len', da'nan' gona' lo' nao' da' xench. Gwyo'o cont so' mbalaz len neda'." <sup>22</sup>Nach cate' bžin ben' bocua'anlene' chope mil, bena' gože'ne': "Xana', ni de da' chope mil dan' bocua'anleno' neda', na' ba bena' gan yechope mil." <sup>23</sup>Nach gož xanen' le': "Ba beno' da' güen. Naco' mos güen na' ba beno' ca cheya'la' gono'. Na' dan' beno' can' cheya'la' gonon' len da' daon' bocua'anlena' le', da'nan' gona' lo' nao' da' xench. Gwyo'o cont so' mbalaz len neda'." <sup>24</sup>Nach cate' bezžin ben' bocua'anlene' to mil, nach gože' xane'na': "Nga de xmecho' dan' bocua'anleno' neda'. Nezda' naco' to bene' znia. Chelapo' da' gosaz bene' yoble, na' chotobo' coseš ga goson bene' yoble žin. <sup>25</sup>Da'nan' gwya'a jačhe'ena' to yechw na' bcuaša' xmechon', le' bžeba' še gwñitan'. Na' na'a bezišcan'." <sup>26</sup>Nach xanen' gože' le': "iNaco' mos mal, na' naco' xagüed! Nezdo' chelapa' ga gosaz bene' yoble, na' chotoba' coseš ga goson bene' yoble žin. <sup>27</sup>Na' lagüe da' nezdo' chona' ca' čbixchen' bi gwlejo' xmechuan' bene' yoble cont yezi'an len yichjen na'a ba bela'a?"

<sup>28</sup>Nach gože' xmos'e' ca' yezica'chle: "Yeca'ale mechon' dan' bocua'anlena' benga na' gwnežjwlen ben' ba noxe' ši mil. <sup>29</sup>Can' naquen, note'teze bene' chon güen len dan' chnežjo xanen' le', xanen' gwnežjochcze' che', cont gata' da' zcha'och che'. Perw na' note'teze bene' bi chgone' žin dan' chnežjo xanen' le', yeca'a xanen' da' daon' noxe'na'. <sup>30</sup>Na' ca nac mos xagüed nga, le yebeje' le che'exo'je' gan' nac cho' na' cuežyaše' na' gagwxejte laye' dan' leca žaglagüe'."

**Can' gac cate' Jesúsen' gone' yela' justis che yogo' nación**

<sup>31</sup>Diosen' gwsele' neda' golja' benach, na' cate' yida' da' yoble nsa'a yela' zaca' juisyw chia' na' nchi'a yogo' angl chia' ca', cana'ch cui'a nabi'a güen juisyw can' chnabia' Dios ben' zoa yaba. <sup>32</sup>Na' yapa' yogo' bene' che yogo' nación ca' yeside' laguan'. Na' cate' ba nita' yogüe' na' la'ane' can' chon to bene' güeye xila' cate' chebeje' partle xila' ca' na' partle šib ca'. <sup>33</sup>Na' bene' ca' zjanac bene' güen lao Diosen' dan' ba gosejnilaže' neda', gwnita' legaque' cuitan' šla'a liča. Perw bene' mal ca', gwnita' legaque' cuitan' šla'a robes. <sup>34</sup>Na' neda' naca' rey yapa' bene' ca' nita' šla'a ličan': "Ba ben Xa' Diosen' cont le'e soale mbalaz. Le da' nga cont gona' nabi'a'le txen len neda' can' ba nžia bia' Diosen' cate' gwxete yežlio. <sup>35</sup>Gona' cont nabi'a'cho txen, le cate' gwdon'a' le'e benle dan' gwdagua'. Na' cate' gwbi'lda' nis, le'e benle da' güe'ja'. Na' cate' goca' ca' bene' zito' le'e bleble neda' ližlen'. <sup>36</sup>Na' cate' bi gota' da' chaza, le'e benle



da' gwyaza'. Na' cate' gocšenda', le'e bedetiple laža'. Na' cate' gota' ližya, le'e bedena'le neda'." 37 Na' bene' güen ca' yese'e neda': "Xanto', žbaten' ble'eto' le' gwdono' na' bento' da' gwdago'? Na' žbaten' gwbiłdo' na' bento' da' güe'ejo'? 38 Na' žbaten' goco' ca' bene' zito' na' blebto' le'? Na' žbaten' ble'eto' le' bi de da' čhazo' na' bento' da' gwyazo'? 39 Na' žbaten' gocšendo' o goto' ližya na' bedena'to' le'?" 40 Na' neda' naca' rey yape'gacane': "Da' li žia' le'e, bene' ca' chesejnilaže' neda' zjanaque' ca' biša' na' ca' zana'. Na' yogo' ni'a cate' beyaše'laže'le legaque', la'czla' bitec bi zjazaque' len benachen', lencze nedan' beyaše'laže'le."

41 Nach bene' ca' nita' šla'a robesle, bene' mal ca', yape'gacane': "Le cuas ca'ale. Ba žia' bia' chele cuiayi'le yela' güen da' mal chelen'. Le šja'ac lo yi' gabił dan' bi cheyol, yi' dan' bxen Diosen' cont saca'zi' Satanás toli tocane len da' xigüe' ca' cheson xšinen. 42 Le šja'ac lo yi' gabiłen', le cate' gwdon'a' bitw beñle dan' gagua'. Cate' gwbiłda' bitw beñle da' ye'eja'. 43 Cate' goca' ca' bene' zito' bitw bleble neda' ližle. Cate' bi gota' da' čhaza' bitw beñle da' čhaza'. Cate' gocšenda' na' cate' gota' ližya, bitw bedena'le neda'."

44 Nach legaque' lecze yosyoži'e xtižan' yesene': "Xanto', žbaten' bi beyaše'to' le' cate' gwdono' o gwbiłdo', o goco' bene' zito', o bi gota' da' čhazo', o gocšendo', o goto' ližyan'?" 45 Na' yeyož yese'e neda' ca' nach yape'gacane': "Lagüe' dan' bi beyaše'laže'le bene' ca' chesejnilaže' neda', la'cze bibi zjazaque' len benachen', da'n'an' lencze nedan' bi

beyaše'laže'le." 46 Nach bene' mal ca' yesezaca'zi'e toli tocane. Perw bene' ca' chesone' güen lao Diosen' yesezoe' mbalaz toli tocane.

### Bosoxi'e nac yesone' yesezene' Jesúsen'

(Mr. 14:1-2; Lc. 22:1-2; Jn. 11:45-53)

**26** Cate' beyož be' Jesúsen' diža' ca', gože' bene' ca' gwleje' cont zjanaque' txen len le':  
2—Ba nezele yechope žazen' gala' lni pascw chechon'. Na' cana' gaca' lo na' bene' ca' cheseque'ede' neda' na' yesote' neda' yosode'e neda' to le'e yag cruz, neda' naca' ben' gwseła' Diosen' golja' benach.

3 Nach bxož gwnabia' ca' na' bene' ca' chososed chosolo'e dan' bzož da' Moisésen' na' bene' gole blao ca' chesenabi'e nación Israel chechon' besedobe' chy'o liž bxož blao ben' le Caifás. 4 Na' cheseyiljwlaže' naclen' yesone' yeseziye'e Jesúsen' cont yesezene'ne' yesote'ne'. 5 Na' gosene':

—Bi senchone' lo lnin' cont ca yesebec bene' žaš.

### To no'ole bzoe' set zix yichj Jesúsen'

(Mr. 14:3-9; Jn. 12:1-8)

6 Nach goquen' Jesúsen' len bene' ca' gwleje' cont zjanaque' txen len le' nite' Betania liž Simón ben' güe' yizgüe' da' nzi' lepra. 7 Na' šlac chi' Jesúsen' cho'a mesen', bžin to no'ole noxe' to de yejese ga chož set da' chla' zix da' leca chzaca' la'ay. Na' no'olen' bzoačhočhje' seten' yichj Jesúsen'. 8 Na' bene' ca' zjanaque' txen len Jesúsen' cate' besele'ede' can' ben' no'olen' beseže'e na' gosene':



—¿Bixchen' con benditjde' set zix nga? <sup>9</sup>Ša no bete' len, yesonen mechw xen na' yosonežjuen' gaclenen bene' yaše'.

<sup>10</sup>Jesúsen' gocbe'ede' bin' gosene' nach gože' legaque':

—¿Bixchen' chnele che no'olen'? Dan' bene' len neda' nga naquen güen. <sup>11</sup>Le bene' yaše' ca' bate'teze nita'cze' len le'e, san nedan' bich soa' yesša len le'e. <sup>12</sup>Dan' bguazje'nda' set zixen' bene' dan' cheya'la' yesone' len neda' cate' gaša'. <sup>13</sup>Da' li žia' le'e, doxen yežlio gate'teze šjasedixjue' bene' diža' güen dan' chzejni'in chia', decze de yesene' can' ben no'ol nga, cont šjasyeze'ede'ne'.

**Judas Iscariote bene' Jesúsen' lo na' bene' chesegue'ede' le'**

(Mr. 14:10-11; Lc. 22:3-6)

<sup>14</sup>Gwde da' quinga, Judas Iscariote ben' goque' txen len bene' šižinw ca' ben' gwlej Jesúsen' cont zjanaque' txen len le', gwyje' jaje'e bxyz gwnabia' ca'. <sup>15</sup>Na' ježe' legaque':

—¿Gaca'te' gonle neda' cont gwdia' Jesúsen' lo na'le'?

Nach bosoxi'a bene' ca' yosonežjue'ne' šichoa mechw plata na' bosonežjue'nen'. <sup>16</sup>Nach cana' Judasen' gwzologüe' gw diljwlaže' nac gone' gwdie' Jesúsen' lo na'gaquen'.

**Jesúsen' blo'ede' legaque' can' yesone' šjasyeza'laže' yela' got chen'**

(Mr. 14:12-25; Lc. 22:7-23;

Jn. 13:21-30; I Co. 11:23-26)

<sup>17</sup>Na' bžin ža chala' lni caten' chesagüe' yetextil dan' bibi levadura yo'o, na' ža nechw che lnin' bene' ca'

zjanaque' Jesúsen' txen ja'aque' gan' zoe' na' gos'ene':

—¿Gan' che'ndo' šjasini'ato' cont gagwcho xše' che pascon'?

<sup>18</sup>Nach Jesúsen' gože' legaque':

—Le'e šja'ac ciudan' gan' zoa to bene' byo ben' nombia'cho na' ye'lné': “Maestron' že' ba zoa žin ža gac da' cheya'la' gac che', na' ližo' nga che'nde' gagwliento'ne' xše' lni pascon'.”

<sup>19</sup>Nach bene' ca' gosone' can' gož Jesúsen' legaque', jasesini'e xše' že' lina'.

<sup>20</sup>Na' cate' beyož gwxa gwbiž, Jesúsen' len bene' šižinw ca' gwleje' cont zjanaque' le' txen gosebi'e cho'a mesen' gosagüe'. <sup>21</sup>Na' šlac chesagüen' gož Jesúsen' legaque': —Da' li žia' le'e, to le'e gwdele neda' lo na' bene' ca' chesegue'e neda'.

<sup>22</sup>Nach legaque' besyeyaše'laže'de', nach gosezologüe' tgüjeje' tgüjeje' gosenabde' le' gose'ene':

—Xana', ¿nedan' gona' ca'?

<sup>23</sup>Nach gože' legaque':

—To ben' chagw len neda' txen toz lo' ye'en, le' gwdie' neda' lo na' bene' ca'. <sup>24</sup>Na' gac chia' can' nyoj le'e Xtiža' Diosen', neda' naca' ben' gwse'la' Diosen' golja' benach, perw nyaše'chguaze nac ben' gwdie' neda' lo na' bene' ca'. Yejni'acle ša bi golje'.

<sup>25</sup>Nach Judasen' ben' za' gwdie' Jesúsen' lo na' bene' ca' gože'ne':

—Maestrw, ¿nedan' gwdia' le' lo na' bene' ca'?

Jesúsen' gože'ne':

—Le len'.

<sup>26</sup>Na' šlac chesagüen', Jesúsen' gwxi'e to yetextilen' na' beyož be'e yela' choxcen che Dios, bzojjen' na'

bnežjuen' bene' ca' zjanaque' le' txen, gože' legaque':

—Le gagon'. Lenna' cuerp chian'.

<sup>27</sup>Nach be\_xue' to vas gan' yože nis uvasen', na' beyož be'e yela' choxclen che Dios boznežjuen' legaque', goze'ene':

—Yogo'le, le ye'ej late' güeje dan' yože lo' vas nga. <sup>28</sup>Da' nga xchena' na' chzanlažan' laljen neche xtoła' yogo'loł benačh. Na' laljen cont solao gac da' cob dan' gwna Diosen' gone' gaclene' benachen'. <sup>29</sup>Chnia' le'e, bich ye'aja' nis uvas na'a. Cate'ch žin ža ba zoacho txen gan' zoa Xa' Diosen' chnabi'e, cana' ye'ejan' da' yoble.

**Jesúsen' gwne' Pedroa' bi chebe' še nombi'e le'**

(Mr. 14:26-31; Lc. 22:31-34; Jn. 13:36-38)

<sup>30</sup>Na' beyož gosonxene' Diosen' len to da' gosole', nach gosa'aque' ja'aque' Ya'a Olivos. <sup>31</sup>Na' šlac zjangüe'e nezen' Jesúsen' gože' legaque':

—Na'aže' yogo'le cuejyichjle neda' neche dan' gac chian'. Le nyojcen le'e Xtiža' Diosen' žan: "Gota' bene' güeye' xilan' na' xila' ca' yesaslasba'."

<sup>32</sup>Perw na' cate' yosban Diosen' neda' ladjo bene' guat ca', yobch yeya'a Galilea ca' le'e.

<sup>33</sup>Nach Pedroa' gože' Jesúsen':

—La' yogo' bene' quinga yesebejyichje' le', neda' gwbat gona' ca'.

<sup>34</sup>Jesúsen' gože' le':

—Da' li žia' le', bina' cuež jean' na'aže' cate' gac šon ni'a bi chchebo' še nombi'o neda'.

<sup>35</sup>Nach Pedroa' gwne':

—La'czla' še chonen byen guatlencza' le', gwbat nia' bi nombi'a le'.

Na' lecze ca' yogo' bene' šižinw ca' zjanaque' Jesúsen' txen gosene' ca'.

**Jesúsen' bol' güiže' Diosen' to latje dan' nzi' Getsemaní**

(Mr. 14:32-42; Lc. 22:39-46)

<sup>36</sup>Nach besežine' latje gan' nzi' Getsemaní, na' Jesúsen' gože' bene' ca' zjanaque' le' txen:

—Ngaze le cue' šlac ša'a na'le šjal güiža' Diosen'.

<sup>37</sup>Na' gwche'e Pedroa' len chop xi'in Zebedeo, Jacobon' len Juanna'. Na' Jesúsen' gwzolao gocyaše'chgüede', na' benchgüe' xbab. <sup>38</sup>Nach gože' legaque':

—Lo' yichjlažda'oguan' chacyaše'chgüeda', chacda' con gatcza' catequen' chžaglagua'. Nga le yega'an bi tasle, le na' txen len neda'.

<sup>39</sup>Nach Jesúsen' gwžialagüe' yelate' na' jačhaze' lo yon' coscho'ale nach bol' güiže' Diosen', gwne':

—Xa', še guac ten ca'ale, benšca cont bi saca'zi'a na' bi yesote'nda' can' ba zoa gaca'. Perw bi chnaba' gac da' nia' neda', san gac can' nao' le'.

<sup>40</sup>Nach beyeje' gan' nita' bene' ca' šone na' ble'ede' zjanite' chesetase'. Na' gože' Pedroa':

—ČNe šlož dao' ca' goc cuejle bišgal len neda'? <sup>41</sup>Bi tasle na' le yol güiž Dios cont bi gon gwxiyen' le'e gan'. Nežda' che'nele na'zle len neda' perw bi chzoele.

<sup>42</sup>Na' gosze'e gan' nite' na' da' yoble jal' güiže' Diosen', gwne':

—Xa, še gac ten ca'ale, benšca cont bi saca'zi'a na' bi yesote'nda', perw gac con can' che'ndo' le'.

<sup>43</sup>Na' bezyeje' gan' niten' na' da' yoble ble'ede' chesetase' le ba chesežode' yejlagüen' bišgal. <sup>44</sup>Na' gwze'e da' yoble gan' nite'na' jal güiže' Diosen' da' gwyone nī'a, na' goznacze' da' yoble can' ba gwnen'.

<sup>45</sup>Na' bezžine' gan' nita' bene' ca' šone nach gože' legaque':

—Na'ach guaque tasle na' yezi'laže'le. Ba gole gwde to bene' neda' lo na' bene' güen da' xinj ca', neda' naca' ben' gwsela' Diosen' golja' benačh. <sup>46</sup>Le chas. Le yeyo'o. Ba za' ben' gon neda' lo na'gaque'.

**Judasen' bdie' Jesúsen' lo na' bene' chesegue'ede' le'**

(Mr. 14:43-50; Lc. 22:47-53; Jn. 18:2-11)

<sup>47</sup>Ne' choe'te Jesúsen' dižan' ca' cate' bžin Judas ben' goque' txen len bene' šižinw ca' gwlej Jesúsen' cont zjanaque' le' txen. Na' zan bene' zja'ac len le' zjanoxe' no yag, no spada, bene' goseseja' bχoz gwnabia' ca' na' bene' gole blao ca' chesenabi'e nación Israel chechon'.

<sup>48</sup>Na' Judas ben' bdie' le' lo na' bene' ca', gože' legaque' nac yesenezde' non' yesezene', gwne':

—Ben' gwnopa' xague', le'na' Jesús. Le sene'.

<sup>49</sup>Nach la' gwbiga'te' cuit Jesúsen', gože'ne':

—Patiox, Maestrw.

Na' bnope'ne'. <sup>50</sup>Jesúsen' gože'ne':

—Migw chia', žbixčhen' zao' nga?

Nach la' gosebiga'te' bene' ca' gosezene' Jesúsen' na' goseče'ene'.

<sup>51</sup>Na' to ben' nac txen len Jesúsen' gwleje' spada čhen' na' gwдынen'

mos če bχoz blaon' gwčhogte' šla'a naguen'. <sup>52</sup>Nach Jesúsen' gože'ne':

—Bego'o spada čhion' lo' liženna', le yogo' bene' chesote' bene' len spada, lecze len chesatlene'. <sup>53</sup>žBi nezdzo' guac nabda' Xan' cont la' sela'te' angl zan juisyw bene' yesaclene' neda'? <sup>54</sup>Perw še gona' ca' žnacxe gac dan' cheyla' gac dan' nyoj Xtiža' Diosen' žan quinga gaquen'?

<sup>55</sup>Nach Jesúsen' gože' bene' ca' zjasezen le':

—žBixčhen' nonle neda' ca to bene' gwban za'acle zedexi'le neda' len spada len yag? Yogo' ža gwchi'a chy'o yodao' blaon' bsd blo'eda' bene' že'na' na' bi gwzenle neda'. <sup>56</sup>Perw chac da' qui cont chac can' ža Xtiža' Diosen' dan' bosozoj da' bene' gosoe xtižen' cani'.

Nach yogo' bene' ca' zjanaque' Jesúsen' txen bosoxonje' gosebejyichje'ne'.

**Goseče'e Jesúsen' lao bene' ca' chesenabia' nación Israelen'**

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup>Na' bene' ca' gosezen Jesúsen' goseče'ene' lao Caifás ben' nac bχoz blao, gan' ba zjanžag bene' ca' chososed chosolo'e dan' bzoj da' Moisésen' na' len bene' gole blao ca' chesenabi'e nación chechon'.

<sup>58</sup>Nach Pedroa' na'ogüe' Jesúsen' zito' zito'le bžinte' liž bχoz blaon', na' gwyo'e chy'ona' gwchi'e len bene' ca' chesape' yodao' blaon', le goclaže' le'ede' naquen' zelao gac če Jesúsen'.

<sup>59</sup>Nach yogo' bχoz gwnabia' ca' na' yezica'chle bene' gole blao

ca' chesenabi'e naci<sup>o</sup>n chechon'  
cheseviljwlaže' bi diža' güenlaže'  
yeso'e che Jesúsen' cont yesote'ne'.

<sup>60</sup>Perw goc sša bitw besyeželde' bi  
diža' güenlaže' yosode'ede' le' cont  
gosoži'e'ne' xya la'czla' bene' zan  
gosenite' gosene' diža' güenlažen'  
contr le'. Gwde na' besechoj  
yechope bene' na' bedilen can'  
gosenen'. <sup>61</sup>Quinga gosene':

—Benga gwne': "Neda' guac  
yochinja' yodao' blao gan'  
chonxenko Diosen', na' šone žaze  
yeyonan."

<sup>62</sup>Nach gwzoža' b<sup>x</sup>oz blaon' gože'  
Jesúsen':

—¿Bibi de bi nao' ca nac da' nga  
chosocuiš bene' quinga le'?

<sup>63</sup>Bitwbi gwna Jesúsen'. Nach gož  
b<sup>x</sup>oz blaon' le':

—Chnia' le' gwna neto' še le  
len' Cristo ben' nac dogualje Xi'in  
Diosen', ben' gwleje' cont yedenabi'e.  
Na' Diosen' ben' zoa toli' tocane  
cue'e da' bal'i še led'o' can' žon'.

<sup>64</sup>Jesúsen' gože'ne':

—Le can' žale nan' naca'. Diosen'  
gwsele' neda' golja' benach. Na'  
chnia' le'e, gwžin ža le'ele neda'  
chi'a cuit Diosen' ben' nape  
la'zelagüe yela' guac xen, na' nabi'a  
txen len le', na' le'ele yetja' yaban' to  
lo' bejw.

<sup>65</sup>Cate' bene b<sup>x</sup>oz blaon' xtiža'  
Jesúsen', gwšo' gwcheza'te xen, le'  
par le' da' mal juisyon' gwna Jesúsen'  
cui'e cuit Diosen' nabi'e. Nach gwne':

—Ba benecho na'a ba gwne' che  
Diosen' dan' gwne' ca'. Noch no  
chyažje no gagw xya che'. <sup>66</sup>¿Nac  
žale che'?

Nach bene' ca' bosyoži'en  
gose'ene':

—Cheyala' gate' dan' chon cuine'  
ca Dios.

<sup>67</sup>Nach bosoji'e xene' cho'alao  
Jesúsen', na' gosebaže'ne', na'  
bale' gosegape' xague'na'. <sup>68</sup>Nach  
gose'ene':

—Še len' naco' Criston', gwneya'ašč,  
gwna neto', ¿non' chgapa' le'?

### Pedroa' bi gwchebe' še nombi'e Jesúsen'

(Mr. 14:66-72; Lc. 22:56-62;

Jn. 18:15-18, 25-27)

<sup>69</sup>Na' šlac chac da' quinga, chi'  
Pedroa' chy'ona', cate' bžin to  
no'ole güen žin che Caifásen',  
gože'ne':

—Lencze le' naco' txen len Jesús  
bene' Galilean'.

<sup>70</sup>Na' lao yogo' bene' ca' že' na',  
Pedroa' bitw gwchebe' še naque'  
txen len Jesúsen', na' gože' no'olen':

—Bi nezda' bi dižan' cho'o.

<sup>71</sup>Gwde beyož gože' no'olen' ca'  
beyeje' cho'a puert na'le, na' bezle'e  
yeto no'ole güen žinna' le', na' goze'e  
bene' ca' že'na':

—Lecze len benga naque' txen len  
Jesús bene' Nazareten'.

<sup>72</sup>Da' yoble bitw gwchebe' še  
naque' txen len Jesúsen', nach  
gwne':

—Na' zoa Diosen' cue'e da' bal'i  
bitw nombi'a bena' žo' ca'.

<sup>73</sup>Na' goccze šlož, gosebiga' bene'  
ca' že'na' goseze'e Pedroa':

—Da' licze, naco' txen len legaque',  
le nacbía' chnio' can' chesene bene'  
Galilea ca'.

<sup>74</sup>Nach Pedroa' chop šone ni'a  
gwne':

—Diosen' gone' ga saca'zi'a še  
chonlaža' dan' žia' bi nombi'a bena'.

Na' la' gwchežte to jea. <sup>75</sup>Nach jayze'e Pedroa' can' gož Jesúsen' le': "Bina' cuež jean' cate' gac šone ni'a bi chchebo' še nombi'o neda.'" Nach beze'e leca gwchežyaše'.

### Goseche'e Jesúsen' lao Pilaton'

(Mr. 15:1; Lc. 23:1-2; Jn. 18:28-32)

**27** Na' cate' gwyeni', yogo' bχoz gwnabia' ca' na' bene' gole blao ca' chesenabia' nación chechon' besyedobe' na' gosechoglagüen' yesote' Jesúsen'.  
<sup>2</sup>Nach bosocheje'ne' na' goseche'ene' jasesane'ne' lo' na' gobernador Poncio Pilato.

### Judasen' beyot cuine'

<sup>3</sup>Na' Judasen' ben' bdie' Jesúsen' lo' na' bene' ca', cate' gocbe'ede' ba gosechoglagüen' yesote' Jesúsen', betinjde' dan' bdie' le' lo' na' bχoz gwnabia' ca' na' bene' gole blao ca'. Nach gwyeje' laogaquen' par bonežjue' legaque' šichoa mechw platan'.  
<sup>4</sup>Nach gože' legaque':  
 —Malen' bena' bdia' lo' na' len' to bene' bi nape' doła'.

Na' gose'ene':

—Bitwbi doła' nap neto' dan' beno' ca'.

<sup>5</sup>Nach Judasen' bozale' mechw ca' lo' yodao' blaon', nach beze'e na' jaylo'o do yene' beyot cuine'.

<sup>6</sup>Beyož beza' Judasen', bχoz gwnabia' ca' bosyotobe' mechon'. Na' gose' lježe':

—Bitw gac co'ochon lo' caj gan' yo'o mechw che yodaon', le' naquen mechw dan' gwdixjwcho cont yega'a yela' mban che to bene'.

<sup>7</sup>Na' bosoxi'e yesezi'e len mechon' to yežlio dan' de che to bene' güen

yeso'. Na' gosezi'en par to capsantw ga yosocuaše' bene' zito'.  
<sup>8</sup>Na' yežlion' ne' nzin' Yežlio Chen ža na'aža, le' gosezi'en len mechw dan' goseyixjue' cont gosote' Jesúsen'.  
<sup>9</sup>Can' goc cont goc can' bzoj da' Jeremías ben' be' xtiža' Diosen' cani', gan' žan: "Besyezi'e šichoa mechw platan', dan' gosena bene' Israel zaca' bena'.  
<sup>10</sup>Na' gosezi'e yežlio che to bene' güen yeso', can' gwna Xancho Diosen' neda'."

### Bosocuiše' Jesúsen' lao Pilaton'

(Mr. 15:2-5; Lc. 23:3-5; Jn. 18:33-38)

<sup>11</sup>Na' goseche'e Jesúsen' lao gobernadore' na' šlac zeche' lagüen', gobernadore' gože'ne':  
 —¿Len' naco' rey che bene' Israel?  
 Nach Jesúsen' boži'e xtižen', gwne':

—Can' gwnao'na', can' naquen.

<sup>12</sup>Na' cate' bχoz gwnabia' ca' na' bene' gole blao ca' chesenabia' nación chechon' bosocuiše' Jesúsen', bitw bi gwne'.  
<sup>13</sup>Nach Pilaton' gože'ne':

—¿Bi chendo' catec da' zan xya nga chesagüe' chio'?

<sup>14</sup>Perw Jesúsen' ne' to xtiže'na' bitw boži'e, na' bebanechgüe gobernadore'.

### Gosechoglagüen' yesote' Jesúsen'

(Mr. 15:6-20; Lc. 23:13-25; Jn. 18:38 - 19:16)

<sup>15</sup>Na' gota' costumbr, gobernadore' gwsane' to bene' de ližya cate' čala' lni' pascw checho, con bene' yesenab bene' gualaž chechon'.  
<sup>16</sup>Na' ližya na' de to bene' chzechgua che' naque' bene' güen da' xinj, na' le' Barrabás.  
<sup>17</sup>Nach Pilaton' gože' bene' ca' zjanžagen':

—¿Noe' bene' quinga chaclaže'le gwsana'? ¿Gwsana' Barrabás še Jesús nga ben' chesene' naque' Cristo ben' gwlej Diosen' cont yedenabi'e?

<sup>18</sup>Gocbe'e Pilaton' dan' chesacxi'a b̄xoz gwnabia' ca' Jesúsen', da'nan' bosodie' le' lo ne'en.

<sup>19</sup>Ca' chi' Pilaton' gan' chone' yela' justisen', cate' bžin to rson da' gwseła' no'ol chen', gože'ne': "Bitw bi gondo' bena', le bibi doła' nape'. Nže'e gwneda'ne' yel na' bžaglaochgua' neče dan' chac che bena'."

<sup>20</sup>Na' b̄xoz gwnabia' ca' na' bene' gole blao ca' chesenabi'e nación chechon' gosego'oyele' bene' ca' že'na' cont yesenabe' gwsane' Barrabásen' na' yesenabe' yesote' Jesúsen'. <sup>21</sup>Nach gobernadore' gože' legaque' da' yoble:

—¿No bene' quinga chope chaclaže'le gwsana'?

Nach gose'ene':

—Barrabásna'.

<sup>22</sup>Pilaton' gože' legaque':

—¿Bixe gona' len Jesús nga ben' chesene' naque' Cristo ben' gwlej Diosen' cont yedenabi'e?

Na' yogüe' gose'ene':

—iBde'e le'e yag cruz!

<sup>23</sup>Nach gož gobernadore' legaque':

—¿Bixe da' xinj nonen'?

Na' legaque' da' yoble bososya'achgüe' gose'ene':

—iBde'e le'e yag cruz!

<sup>24</sup>Gocbe'e Pilaton' bicze bi gac gone'. Ba chyal'a'ch chesone' žaš juisyw. Nach gwsele' to bene' jaxi'e nis cont bone'e lao bene' ca' že'na' na' gože' legaque':

—Bibi da' xinj non benga. Bitw naquen xbagá' dan' gotlene', xbagá' le'e naquen še ba betwlene'.

<sup>25</sup>Nach yogo' bene' ca' gose'ene':

—Xbagá' neto' na' xbagá' xi'into' naquen che yela' got che benga.

<sup>26</sup>Nach bsan Pilaton' Barrabásen' can' gosenaben'. Perw na' bene' mandadw gosot goseyin soldadw che' ca' Jesúsen', nach bene' le' lo na'gaque' cont yosode'ene' le'e yag cruzen'.

<sup>27</sup>Nach soldadw che' gobernadore' goseche'e Jesúsen' lo' yo'o che gobernadore', nach bosyotobe' yogo' soldadw ca'.

<sup>28</sup>Na' goseyine' xalana' Jesúsen' na' bosoguacue'ne' to lache' xna' ca' dan' chesaz rey ca'. <sup>29</sup>Na' gosone' to corona de xis yeše' bosozoen' yichjen', na' ne'e licha bosogoxe'ne' to xis. Na' bosozoa xibe' lagüen' par gosonle' che', nach gose'ene':

—iViva rey che bene' Israel!

<sup>30</sup>Nach bosoži'ene' xene', na' besyeque'e xis dan' noxen' na' bosozeten' yichje'. <sup>31</sup>Na' beyož gosonle' che', besyeque'e lache' xnan' dan' bosoguacue'nen' na' bosyoguacue'ne' xacze'. Nach goseche'ene' cont jasede'ene' le'e yag cruzen'.

**Bosode'e Jesúsen' le'e yag cruzen'**

(Mr. 15:21-32; Lc. 23:26-43; Jn. 19:17-27)

<sup>32</sup>Nach besechoje' ciudan' na' besyežague' to bene' Cirene le Simón na' gosone' byen bosogüe'ene' yag cruz che Jesúsen'.

<sup>33</sup>Na' besežine' to latje gan' nzi' Gólgota, zeje diža' latje che žit yichj bene' guat. <sup>34</sup>Na' bosonežjue' Jesúsen' vino da' nchixe to da' zla'

par ye'ejen', perw le' con bnixen',  
bitw güe'ejen'.

<sup>35</sup>Na' cate' beyož bosode'ene' le'e  
yag cruzen', soldadw ca' gosone' rifa  
cate' besyele'e xalane' cont gota'bia'  
noe' yechelen'. Na' dan' gosone' ca' goc  
can' bzoj da' ben' be' xtiža' Diosen' cani',  
gwne': "Yesyele'e xalanan' na' yesezi'  
che che', yesonen' rifa." <sup>36</sup>Nach gosebi'e  
gosape'ne'. <sup>37</sup>Na' yichj yag cruzen' gan'  
de'ena' bosozoje' dan' bcuiš le', na' žan:  
"Benga Jesús rey che bene' Israel ca'."

<sup>38</sup>Na' lecze cana' bosode'e chope bene'  
gwban le'e yechope yag cruz. Toe' gwda'  
cuit Jesús'en' licha' na' yetoe' cuite' robes.  
<sup>39</sup>Na' bene' ca' gosede gan' da' Jesús'en'  
gason yichjlagüe' dan' leca besegue'ede'  
le', na' gosezi'diže' le', <sup>40</sup>gose'ene':

—Len' gwnao' yochinj'jo' yodao'  
blaon' na' šone žaze yeyonon', bosla  
cuino'. Še len' naco' doguale Xi'in  
Diosen', beyetj le'e yag cruzen'.

<sup>41</sup>Na' len bxož gwnabia' ca' na'  
len bene' ca' chososed chosolo'e  
dan' bzoj da' Moisés'en' na' len bene'  
fariseo ca', na' len bene' gole blao ca'  
chesenabi'e nación chechon', yogüe'  
gosezi'diže'ne' na' gosene':

<sup>42</sup>—iYezica'chle bene' bosle' na' bi  
chac yosla cuine! Še naque' rey che chio'  
bene' Israel, yeletj cuine' le'e yag cruzen'  
na'a na' šejle'cho che'. <sup>43</sup>Le' chejnilaže'  
Diosen', le gwne': "Dogualje Xi'in Dios  
neda'." iNa' le'echo yosla Diosen' le' na'a  
še chacde' le'!

<sup>44</sup>Na' bene' gwban ca' zjada' le'e  
yag cruzen' chop la'a cuiten', lecze  
gosezi'diže' le'.

#### Can' goc cate' got Jesús'en'

(Mr. 15:33-41; Lc. 23:44-49; Jn. 19:28-30)

<sup>45</sup>Na' do guagwbiz doxen yežlion'  
goc chol bžinte cheda šone. <sup>46</sup>Na'

do cheda šone Jesús'en' bosye'e zižje  
gwne':

—Elí, Elí, ¿lama sabactani? (Zeje  
diža: Dios chia', Dios chia', ¿bixchen'  
ba gwlejiychjo' neda'?)

<sup>47</sup>Na' bał bene' ca' zjanita' na'  
gosende' na' gosene':

—Le gwzenag, benga chol güiže'  
da' Elías ben' be' xtiža' Diosen' cani'.

<sup>48</sup>Nach la' bchojte to bene'  
gwyesese' jaxi'e to esponja na'  
bzažeden' vino zichj na' bzoen' to  
lao xis tone nach jažiguen' cho'a  
Jesús'en' cont xopen'. <sup>49</sup>Na' yebałe'  
gose'e bena':

—Cuezcho, yešc še güide Elías'en'  
yosle'ne'.

<sup>50</sup>Nach da' yoble Jesús'en' bosye'e  
zižje na' gote'. <sup>51</sup>Na' ca hora' lache'  
da' ze lo' yodao' blaon' bcheza'  
gacholen gwza'te yichjen bžinte  
che'e. Na' gwxo'chgua gosoxjte  
yej ca'. <sup>52</sup>Na' lecze beseyaljo ba che  
bene' ba gosat. Na' zan da' bene'  
ca' gosejnilaže' Diosen' besyebane'  
ladjo bene' guat ca'. <sup>53</sup>Nach caten'  
ba beban Jesús'en' ladjo bene' guat  
ca', besyechoje' lo' ba chegaquen'  
na' jaya'aque' jasele'elagüe' ciuda  
Jerusalén. Na' zan bene' besele'ede'  
legaue'.

<sup>54</sup>Na' ca nac xan soldadw ca' na'  
bene' ca' nche'e, bene' nita' chesape'  
Jesús'en', cate' besele'ede' can' gwxo'  
na' bichle da' ca' goc, besežebchgüe',  
na' gosene':

—Da' li le benga goc dogualje Xi'in  
Dios.

<sup>55</sup>Na' lecze nita' zan no'ole ladjo  
bene' ca' na' goseze' zito' chesene'e  
can' chaquen'. No'ol ca' gosa'ogüe'  
Jesús'en' cate' beze'e distritw  
Galilean' par chesaclene' le' len



bi da' chyažjde'. <sup>56</sup>Na' len no'ol ca' María bene' Magdala, na' lecze María ben' nac xna' Jacobo na' José, na' lecze ca' xna' Jacobo na' Juan, xi'in Zebedeo.

### Bosocuaše' Jesúsen'

(Mr. 15:42-47; Lc. 23:50-56; Jn. 19:38-42)

<sup>57</sup>Na' gwzoa to bene' gwni'a bene' ciuda Arimatea le' José na' ba gwzolao chzenague' che Jesúsen'. Na' cate' ba chxoá gwbiž <sup>58</sup>Josén' gweje' lao Pilaton' jaynabe' cuerp che Jesúsen'. Na' Pilaton' bene' mandadw bosyonežjue'ne' cuerp chen'. <sup>59</sup>Nach Josén' bego'o lo ne'e cuerp che Jesúsen' na' blaže'ne' to lache' xen da' nyach. <sup>60</sup>Na' gwlo'e cuerp chen' to lo' bloj cobe che' da' gwche'ene' le'e yej. Na' blole' to yej xen cho'a blojen' cont bseyjon len. Nach beze'e. <sup>61</sup>Na' María bene' yež Magdalan' na' yeto María yoble jasechi'e cho'a blojen'.

### Bosozoe' bene' chesape' gan' jasecuaše' Jesúsen'

<sup>62</sup>Na' beteyo, gwde žan' caten' chososini'e par ža che Diosen', besedobe bxož gwnabia' ca' na' bene' fariseo ca' na' ja'aque' gan' zoa Pilaton'. <sup>63</sup>Na' gose'ene':

—Bene', ba jaysalaže'to' can' gwna da' bene' gwxiyen' cate' ne' mbane', gwne': “Yeyon ža yebana' ladjo bene' guat ca'.” <sup>64</sup>Da'nan' gwseła'sča bene' šjasedape' cho'a blojen' gan' jasecuaše'nen' cont bi šja'ac bene' ca' gosaque' Jesúsen' txen šže'le šjasyeleje' cuerp chen' na' yese'e bene' le' bebane' ladjo bene' guat ca'. Le še yesaque bene' ba bebane' ladjo bene' guat ca', gonchen malech

clel ca len diža' dan' gwdis'e gwne' Diosen' gwsele' le'.

<sup>65</sup>Nach Pilaton' gože' bene' ca': —Goṇa' le'e soldadw ca'. Le che'e cont yesape' ga zelao yesezoede'.

<sup>66</sup>Nach ja'aque' len soldadw ca' na' bosochiše' sey le'e yej dan' da' cho'a blojen', na' bosonite' soldadw ca' gosapen'.

### Jesúsen' bebane' ladjo bene' guat ca'

(Mr. 16:1-8; Lc. 24:1-12; Jn. 20:1-10)

**28** Na' cate' beyechj ža che Dios, bał dmigw María bene' Magdala len María ben' yeto ja'aque' jase'e gan' bosocuaše' Jesúsen'. <sup>2</sup>Na' leca gwxo', le angl che Xanchon' betje' yaban', na' bžine' gwque'e yej dan' nseyjw cho'a blojen', na' gwchi'e lo yeja'. <sup>3</sup>Na' anglen' leca chactit cho'alagüen' cacze ga chep yes na' xalanen' naquen šiš xila' juisyw ca' nac beye'. <sup>4</sup>Na' cate' besele'e bene' gop ca' le', leca gosexize' besežebe' na' gosebix'e gosatte' šlat. <sup>5</sup>Perw na' anglen' gože' no'ol ca':

—Bitw žeble. Neda' nezda' Jesúsen' ben' bosode'e le'e yag cruz nan' cheyiljwle. <sup>6</sup>Nono de nga. Ba bebane' ladjo bene' guat ca', can' gwnacze'. Na' le da, le na' latje nga gan' gosegüe'e cuerp chen'. <sup>7</sup>Bedao' le šjaya'ac le šjaydixjue' bene' ca' zjanaque' Jesúsen' txen ye'gaclene' ba bebane' ladjo bene' guat ca'. Na' ye'gaclene' gwyobech Jesúsen' yežine' Galilean' clel ca' legaque', na' Galilean' na' yesele'ede'ne'. Can' gwna Diosen' zedetixjue'eda' le'e.

<sup>8</sup>Nach no'ol ca' la' besyeya'actie' cho'a blojen' do chesežebze' perw leca chesyebede', zjaya'acese'



zjasyedixjue'ede' bene' ca' zjanaque' Jesúsen' txen can' goca'. <sup>9</sup>Na' šlac zjaya'aque' besyežague' Jesúsen' chanez. Nach bguape' legaque' tiox.

Na' no'ol ca' gosebigue' gan' zoa Jesúsen' bosozoa xibe' lagüen', na' goseyele' ni'e tantw besyebede', na' gosonxene' le'. <sup>10</sup>Jesúsen' gože' legaque':

—Bitw žeble. Le šjaydixjue'e bene' lježcho ca', cheyała' šjaya'aque' Galilean' cont yesele'ede' neda'.

**Bene' gop ca' jasyedixjue'ede'  
bhoz ca' can' ba goca'**

<sup>11</sup>Na' šlac zjaya'ac no'ol ca' ciudan', bał soldadw ca' bene' ca' gosape' gan' bosocuaše' Jesúsen' jaya'aque' ciudan' jasyedixjue'ede' bhoz gwnabia' ca' doxen can' ba goquen'.

<sup>12</sup>Nach besedobe bhoz gwnabia' ca' len bene' gole blao ca' chesenabia' nación chechon' na' bosoxi'e nac yesone' ca' nac dan' gose' soldadw ca' legaque'. Na' bosonežjue' soldadw ca' da' zcha'o mechw. <sup>13</sup>Gose'e legaque':

—Še no nabe le'e bin' goquen', na' ye'gaclene' šeže'le šlac chtasle bene' ca' gosaque' le' txen besyebje' cuerp chen' lo' blojen' na' besyeyo'en ga yoble. <sup>14</sup>Na' še gobernadoren' yende' diža' quinga, neto' šjaša'ljento'ne' cont bi že'e le'e na' cont bi gote' le'e.

<sup>15</sup>Na' soldadw ca' gosezi'e mechon' dan' bosonežjue' legaquen', nach gosone' con can' gose'e legaque'. Na' ža na'aža yogo' can' gosena soldadw ca' ne' chesene' doxen gan' nita' bene' Israel gualaž chechon'.

**Jesúsen' gože' legaque' yeso'e xtize'na'  
yogo' nación**

(Mr. 16:14-18; Lc. 24:36-49; Jn. 20:19-23)

<sup>16</sup>Nach bene' ca' zjanaque' Jesúsen' txen, bene' ca' šnej, jaya'aque' Galilean' cont jasyešague' Jesúsen' to lo ya'a gan' gože' legaque' yesyežague'. <sup>17</sup>Na' cate' besele'ede' Jesúsen' gosonxene'ne'. Perw bia'cze to chope' gosacžejlaže' še le'na'.

<sup>18</sup>Nach gwbiga' Jesúsen' gan' nite'na' na' gože' legaque':

—Ba ben Diosen' lo na' doxen yela' chnabian' dan' de yaban' na' yežlion'. <sup>19</sup>Da'nan' le šja'ac le šjased le šjalo'e bene' ca' že' yogo'lol nación cont yesejnilaže' neda'.

Na' le gwzoe' nis cont yosolo'e le chesejnilaže' Xacho Diosen', na' chesejnilaže' neda' naca' dogualje Xi'ine', na' lencze Spiritw che'na'.

<sup>20</sup>Na' gwsed gwlo'elne' cont yesone' yogo'lol dan' ba bena' mandadw gonle. Neda' zoacza' len le'e yogo' ža, na' ca'cze ne' soa' len le'e cate'ch te che yežlion'. Da' na'zen' chzoja' na'a.

# DIŽA' GÜEN DAN' BZOJ SAN MARCOS

Juan ben' bzoa bene' nis  
gwdixjue'ede' diža' güen che Diosen'  
latje daš

(Mt. 3:1-12; Lc. 3:1-9, 15-17; Jn. 1:19-28)

**1** Qui goc cate' gwxe xtiža'  
Jesucristo ben' nac dogualje  
Xi'in Dios.

<sup>2</sup>Da' Isafas ben' be' xtiža' Diosen'  
cani' bzoje' da' nga, žan:

Chselā' to bene' cuialagüe'  
laoguoñ' güe'e xtižon',  
cont ba zjanita' bene'  
yosozenague' chio' cate' šejo'.

<sup>3</sup>Bena' chne' zižje latje dašen' že':

“Le gonšagüe' yichjlažda'olen'  
cont gwzenagle che Xanchon'  
cate' yide';

le cuejyichj da' malen' chonle  
cont yichjlažda'olen' gaquen  
ca to nez da' ba gosonšagüe'.”

<sup>4</sup>Ca' goquen', Juan ben' chzoa  
bene' nis bžine' latje dašen' na'  
gože' bene' ca' besežag na' cheyala'  
yesyetinjde' xtołā'gaque' na' yesezoe'  
nis cont nitlao xtołā'gaque'. <sup>5</sup>Zan  
bene' za'ac do distritw Judea na'  
ciuda Jerusalén bosozenague' che  
diža' dan' chyixjue'ede'. Na' cate'  
gosexoadole' bi da' xinj zjanone',  
Juanna' bzoje' legaque' nis lo' yegw  
Jordán.

<sup>6</sup>Xalana' Juanna' goquen de yiša' xa  
camello na' da' bchej lsine' goquen  
de yid, na' gwdagüe' biše'zo len šina'  
beser yixe'. <sup>7</sup>Na' gwdixjue'ede' bene'  
xtiža' Diosen', gwne':

—Coža' na' za' za' to bene' zaca'che' ca  
neda', na' da' nacchgüe' bene' zaca', bi  
zaca' gona' xmandadoe' lechja' no xele'.

<sup>8</sup>Neda' ba bzoa' le'e nis, perw ben' za'  
zan' gone' cont soa Spiritw che Diosen'  
lo' yichjlažda'olen' nabian' xbab chele.

Jesúsen' gwzoe' nis

(Mt. 3:13-17; Lc. 3:21-22)

<sup>9</sup>Ca tiempa' Jesúsen' gwze'e lagüe  
yež Nazaret da' chi' ga mbane distritw  
Galilea, na' Juanna' bzoje' le' nis  
lo' yegw Jordán. <sup>10</sup>Na' šlac chechoj  
Jesúsen' lo' nisen', Jesúsen' ble'ede'  
byaljw yaban' gan' zoa Diosen', na'  
Spiritw che Diosen' betjen jasoan len  
le', na' ca hora' Spiriton' naquen ca nac  
ngolbex. <sup>11</sup>Na' gosende' gwne Dios ben'  
zoa yaba gwne':

—Len' naco' Xi'ina' bene' chacchgüeda',  
na' chebe chezaque'laže'chgüeda' chio'.

Satanásen' goclažen' co'oyelan'

Jesúsen' cont gone' da' mal

(Mt. 4:1-11; Lc. 4:1-13)

<sup>12</sup>Nach Spiritw che Diosen' benen  
cont la' gwwejte Jesúsen' latje daš.

<sup>13</sup>Na' gwzoe' latje dašen' choa ža ladjo be znia ca'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. Nach beyoža' jasadlen angl che Diosen' le'.

**Jesús'en' gwzoloa chyixjue'ede' xtiža'**  
**Diosen' distritw gan' nzi' Galilea**  
*(Mt. 4:12-17; Lc. 4:14-15)*

<sup>14</sup>Beyož gosegüe'e Juanna' ližya, Jesús'en' beze'e beyeje' Galilea gan' jatixjue'ede' diža' güen, gwne' Diosen' nabi'e yichjlaždao' bene' ca' yosozenag che'. <sup>15</sup>Jesús'en' gwne': —Ba bžin ža cate' Diosen' nabi'e yichjlaždao' bene' yosozenagüe' che'. Le yetinje xtolal'en' na' le šejle' diža' güen che Diosen' da' chyixjue'eda'.

**Jesús'en' goxe' tap bene' gwxen bel**  
**šja'aclene' le' txen**  
*(Mt. 4:18-22; Lc. 5:1-11)*

<sup>16</sup>Jesús'en' chde' do cho'a nisdao' che Galilean' cate' ble'ede' chope bene' gwxen bel, Simón na' bene' biše' Andrés. Na' zjanite' chosozale' yixjw dan' chesezende' belen' lo' nisa'. <sup>17</sup>Na' gož Jesús'en' legaque': —Le šo'o len neda'. Nacle bene' gwxen bel na' chbejle belen' lo' nisen', perw na'a gona' cont gaxle bene' yesyechoje' lo da' malen'.

<sup>18</sup>Nach la' bosocua'ante yixjw chen' na' jasa'aclene' le'.

<sup>19</sup>Na' Jesús'en' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e lo' barcw chesyeyonšagüe' yixjw chegaquen'. <sup>20</sup>Na' Jesús'en' lecze goxe' legaque' šja'aclene' le' na' bosocua'ane' Zebedeon' ben' nac xagaque lo' barcon' len bene' ca'

chesaclen le', nach ja'aque' len Jesús'en'.

**To bene' gwyo'o gwyaze' da' xigüen'**  
*(Lc. 4:31-37)*

<sup>21</sup>Besežine' yež da' nzi' Capernaum, na' ža che Dios Jesús'en' gwyo'e lo' yodao' da' zoa na' na' gwzologüe' bsed blo'ede'. <sup>22</sup>Bene' ca' že' na' besyebande' can' bsed blo'ede', le can' bzejni'iden' nacbia' nezde' cayanen' nac xbab che Diosen', gague bzejni'ide' can' chosozejni'i ben' chosolo'e ley dan' bzoj da' Moisés. <sup>23</sup>Na' lo' yodaon' zoa to bene' yo'o nyaze' da' xigüen', na' bosye'e gwne':

<sup>24</sup>—¿Bixchen' chgoša' chlaže' chio' len neto', Jesús bene' Nazaret? ¿Zedežiyayo'o neto'? Neda' nombi'a le' na' nezda' naco' bene' laždao' xilaže' juisyw bene' gwseja' Dios.

<sup>25</sup>Nach Jesús'en' gože' da' xigüen': —iŠšago', bechoj lo' yichjlaždao' benga!

<sup>26</sup>Na' da' xigüen' benen' cont gwchole' bena', nach chosya'adiachguan bechojen lo' yichjlažda'ogüen'. <sup>27</sup>Yogo' bene' ca' že' na' besyebande' na' gose' lježe': —¿Bixen' chac? ¿Bixe da' coben' chlo'e benga? iNacbia' nape' yela' chnabia' na' yela' guac, le da' xigüe' ca' chesonen da' že'!

<sup>28</sup>Na' ca' nac dan' ben Jesús'en' bedao'nez gos gwlaže dižan' doxen lagüe yež ca' gan' mbane Galilea.

**Jesús'en' beyone' taobi'in che Simón Pedro**

*(Mt. 8:14-15; Lc. 4:38-39)*

<sup>29</sup>Cate' besyechoje' lo' yodaon', Jesús'en' len Jacobo na' len Juan

ja'aque' liž Simón na' Andrés. <sup>30</sup>Na' taobi'lin che Simónna' die' che'ede' xla; na' gose'e Jesúsen':

—Benga die' che'ede'.

<sup>31</sup>Nach jabiga' Jesúsen' na' beɣue' taquen' gwliše'ne'. Na' la' beyactede', nach bsini'e da' gose'ej gosagüe'.

**Jesúsen' beyone' zan bene' chese'ede'**

(Mt. 8:16-17; Lc. 4:40-41)

<sup>32</sup>Cate' ba gwxa gwbizen' na' ba gwɣin, jasesane' lao Jesúsen' zan bene' chese'ede' na' bene' zjajo'o zjanyaze' da' xigüen'. <sup>33</sup>Na' do yež bene' besedop besežague' cho'a yo'o gan' zoa Jesúsen'. <sup>34</sup>Na' Jesúsen' beyone' bene' chese'ede' gwde gwdele yižgüe' na' bebeje' zan da' xigüe' da' zjajo'o zjanyaz bene', perw bitw bi'e latje bi yesenan, le legaquen zjanezen non nac le'.

**Jesúsen' chyixjue'ede' xtiža' Diosen' Galilea**

(Lc. 4:42-44)

<sup>35</sup>Šba| cate' ne' nac choljesúsen' gwyase' na' gwze'e gwyeye' ga nono nla' na' bo| güiže' Diosen'.

<sup>36</sup>Simón na' bene' lježe' ca' ja'aque' jasyediljue'ne'. <sup>37</sup>Na' cate' besyeželde'ne' gose'ene':

—Yogo'ze bene' cheseyiljue' le'.

<sup>38</sup>Perw Jesúsen' gože'ne':

—Le šo'o ga yoble ga nac gala'ze cont lecze šjatixjue'eda' xtiža' Diosen' na', le da'nana' ba gwza'a.

<sup>39</sup>Can' goc, Jesúsen' gwde' doxen gan' mbane Galilea gwdixjue'ede' xtiža' Diosen' to to yodao' che neto' bene' Israel, na' bebeje' da' xigüe' da' yo'o nyaz bene'.

**Jesúsen' beyone' to bene' che'ede' lepra**

(Mt. 8:1-4; Lc. 5:12-16)

<sup>40</sup>To bene' che'ede' yižgüe' dan' nzi lepra jabigue' gan' zoa Jesúsen' na' bzoa xibe' gože'ne':

—Še chaclažo', guac yeca'o yižgüe' dan' che'edan'.

<sup>41</sup>Na' Jesúsen' beži'ilaže'de' le' na' beɣue'ne' gwne':

—Chaclaža' yeyacdo'. Beyaque.

<sup>42</sup>Cate' gwne' ca' la' bega'ate yižgüen' na' beyacde'. <sup>43</sup>Nach Jesúsen' besele'ne' liže', bene' mandadw, gože'ne':

<sup>44</sup>—Notno yo'o can' ba beyona' le', con gwyej jana' bɣoza' cont le'ede' bach beyacdo', na' bnežjw da' cheya|a' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

<sup>45</sup>Perw ben' bi bchejde', yogo'ze bene' gože' can' goca'. Da'nana' Jesús'a bich goc šeje' con ca nla'ze gate'teze yež, san con gwde' do yixe', na' bia'cze bene' za'ac yogo'ze yež jasene'e le'.

**Jesúsen' beyone' to bene' bi chda sla'a ni'a ne'e**

(Mt. 9:1-8; Lc. 5:17-26)

**2** Gwde to chop ža, Jesúsen' beyeye' da' yoble yež dan' nzi Capernaum, na' bene' Capernaum ca' gosenezde' bežine' to yo'o ga ba gwzoacze'. <sup>2</sup>Na' bedao'nez besežag bene' zan, necach gosezaque' yesenite' lo' yo'on'a ne cho'a yo'on, nach Jesúsen' gwdixjue'ede' xtiža' Diosen' len legaque'. <sup>3</sup>Nach

besežin xonj beŋe' cont jasesane' lao Jesúsen' to beŋe' xinj beŋe' bi chda šla'a ni'a ne'e; tap beŋe' zjano'ene'. <sup>4</sup>Perw bi chac yesežine' gan' zoa Jesúsen' catec chy. Nach goseque'e tej dan' ncu'a' yichj yo'on na' beseletje' le' na'le to lo cam dao'. <sup>5</sup>Na' cate' Jesúsen' gocbe'ede' can' chesejnilaže'nen', gože' beŋe' güe'na': —Xi'ina', ba bezi'xena' xtolon'.

<sup>6</sup>Ba| beŋe' chososed chosolo'e ley dan' bzoj da' Moisésen' zjachi'e na', na' gosone' xbab: <sup>7</sup>“¿Bixchen' chna bengaca' le chon cuine' ca Dios. Nono zoa beŋe' gac yezi'xene' xto|a' beŋač. Toz Diosen' gac yezi'xenen'.” <sup>8</sup>Perw Jesúsen' chache'eczed'e can' nac xbab čhegaquen', na' gože' legaque':

—¿Bixchen' chzalaže'le ca'? <sup>9</sup>Še yapa'ne': “Ba bezi'xena' xto|o'na'”, bi nezele še napa' ye|a' gwnabia' cont yezi'xena' xto|e'na', san še yapa'ne': “Gwyas, beyoa' xcamon'”, na' nacbia' še napa' ye|a' guac gac can' gwnian'. <sup>10</sup>Perw neda' naca' ben' gwse|a' Dios golja' beŋač, gwlo'eda' le'e na'a zoa' yežlio nga napa' ye|a' gwnabia' cont yezi'xena' xto|a' beŋač.

Nach gože' beŋe' xinja':

<sup>11</sup>—Chapa' le', beyas, beyoa' xcamon' na' beyej ližo'.

<sup>12</sup>La' beyaste beŋe' xinja' cheseŋa'te beŋe' ca' nita'na' na' beyoa' xcamen'. Da'nana' yogo' beŋe' ca' besyebande' na' gosoe ye|a' choxclen čhe Diosen', gosene':

—Bina' le'echo ye|a' guac dan' nac ca'.

**Jesúsen' goxe' Leví cont gwejlene'ne'**

(Mt. 9:9-13; Lc. 5:27-32)

<sup>13</sup>Da' yoble gwej Jesúsen' cho'a nisdao' na' beŋe' zan besedobe' gan'

zeje' na' bsed blo'ede' legaque' xtiža' Diosen'. <sup>14</sup>Na' Jesúsen' gwdie' latje gan' chi' Leví xi'in Alfeo chchixjue' impuesto, na' cate' ble'ede' le' na' gože'ne':

—Da len neda'.

Nach gwzoža' Levín' na' gwejlene'ne'.

<sup>15</sup>Na' gwdena' goquen' chi' Jesúsen' liž Levín' na' güe'ej gwdagwlene'ne' txen len zan beŋe' güečhixjw na' len yeba| beŋe' güen da' xinj, na' len beŋe' ca' zjanaque' Jesúsen' txen, le zan beŋe' zja'ac zjanao' le'. <sup>16</sup>Perw na' beŋe' ca' chososed chosolo'e ley dan' bzoj da' Moisés na' beŋe' fariseo ca' cate' besele'ede' che'ej chagüe' txen len beŋe' ca', gose'e beŋe' ca' zjanaque' Jesúsen' txen: —¿Nacxečen' ben' chsed chlo'e le'e che'ej chagwlene' txen beŋe' güečhixjw na' yeba| beŋe' güen da' xinj ca'?

<sup>17</sup>Cate' Jesúsen' bende' can' gosene' na' gože' legaque':

—Beŋe' bi chesacšene bi cheseyažjde' beŋe' güen rmed. Beŋe' chesacšende', legaquen' cheseyažjde' beŋe' güen rmed. Gague beŋe' ba zjanaque' beŋe' güen len Diosen' zedenyoeda' cont yesyetiŋjde' xtolen', san beŋe' güen da' xinj. Legaquen' zjazaca'lebe' ca beŋe' cheseyažje beŋe' güen rmed.

**Goseŋabde' Jesúsen' bixchen' beŋe' zjanaque' le' txen bi chesone' gwbas**

(Mt. 9:14-17; Lc. 5:33-39)

<sup>18</sup>To ža cate' beŋe' ca' zjanaque' txen len Juanna' na' beŋe' zjanaque' txen len beŋe' fariseo ca' gosezo'e gwbas, ba| beŋe' jasa'aque' jaseŋabde' Jesúsen':

—Bene' ca' zjanaque' txen len Juanna' na' bene' ca' zjanaque' txen len bene' fariseo ca' chesone' gwbas, na' bene' ca' zjanaque' txen len le' bi chesone' gwbas. ¿Bixchen'?

<sup>19</sup>Na' Jesúsen' gože' legaque':

—¿Guaque yesezoa gwbas bene' chaxe' to ga chac yela' güešagna' šlac ben' bšagnan' zoalene' legaque'? Še zoa ben' bšagnan', bi gac yesone' gwbas. <sup>20</sup>Perw žin ža cate' bich zoe' len legaque', cana'ch yesone' gwbas. Na' ca'czen' naquen len neda' na' len bene' ca' zjanaque' neda' txen.

<sup>21</sup>'Nono zoa bene' yode'e to lache'exo' na' yezoen' to lache' cobe, le lache' coben' yeben' cate' chiben' na' šon' lache' golen', na' gan' žon'na' gacchen da' xen. <sup>22</sup>Neca zoa bene' chgue'e vino cobe lo' bzod yide'exo', le vino coben' chšon' yide'exon' na' chbiayi' vinon' len yida'. San chesegue'e vino coben' lo' yid cobe cont bibi gaquen.

**Bene' ca' zjanaque' Jesúsen' txen chesalje' dao ža che Dios**

(Mt. 12:1-8; Lc. 6:1-5)

<sup>23</sup>To ža che Dios Jesúsen' gwdie' to ga nyaž trigw, na' bene' ca' zjanaque' le' txen gosezolagüe' chesalje' dao che trigon' šlac gosodie' gan' nyaženna'. <sup>24</sup>Nach bene' fariseon' gose'e le':

—Gwnašc' ¿bixchen' cheson bene' ca' zjanaque' le' txen žin da' bi cheyala' yesone' ža che Dios?

<sup>25</sup>Na' Jesúsen' gože' legaque':

—¿Bina' gwlable can' ben da' rey David to ža cate' le' na' bene' lježe' ca' gosodone'? <sup>26</sup>Gwyo'o Davin' ga nac liž Dios cate' da' Abiatar goque' bxoz blao, na' gwdagüe' yetextil da'

nac che Dios da' bi chac gagw bene' bi nac bxoz, na' lecze bnežjue' che bene' zja'ac len le'.

<sup>27</sup>Lecze gož Jesúsen' legaque':

—Diosen' gwleje' to ža cate' bi yeson benachen' žin cont gaclenen benač, gague gwleje' benachen' cont yesonxene' ža chen'. <sup>28</sup>Da'nan' naquen lo' na' nia' bi da' nac güen goncho lente cate' nac ža che Dios, neda' naca' ben' gwseja' Diosen' golja' benač.

**Jesúsen' beyone' to bene' nxo'on šla'a taque'**

(Mt. 12:9-14; Lc. 6:6-11)

**3** Yeto ža che Dios Jesúsen' gwyo'e da' yoble to lo' yodao' che neto' bene' Israel na' ca hora' ba chi' to bene' nxo'on šla'a taque'. <sup>2</sup>Na' bene' ca' že' lo' yodao'na' chosogüia chesene'e Jesúsen' še yeyone' bena' žan' nac ža che Dios cont de da' yosode'ede' yesagüe' xya che'. <sup>3</sup>Nach Jesúsen' gože' ben' nxo'on taquen':

—Gwzoža' na' gwzecha nga.

<sup>4</sup>Nach gwñabde' bene' ca' yezica'chle:

—¿Bi da' cheyala' goncho ža che Dios? ¿Goncho da' güen, še goncho da' mal? ¿Cheyala' yoslacho bene', še cheyala' gotchone'?

Perw na' legaque' gosenite' šižize.

<sup>5</sup>Nach Jesúsen' gwñe'e legaque', bže'e can' gosone' xbab, na' lecze gocyaše'laze'de' dan' bi gosejle'e che', nach gože' ben':

—Blj naon'.

Na' blien', na' taquen' beyaquen binlo. <sup>6</sup>Nach besyežaš bene' fariseo ca' na' gosezolagüe' chosoxi'e len bene' ca' zjada' Herodes naquen' yesone' yesote' Jesúsen'.

**Zan beṇe' nita' cho'a nisaдон'**

<sup>7</sup>Nach Jesúsen' gwyeje' cho'a nisaдон' len beṇe' ca' zjanaque' le' txen, na' zan beṇe' Galilea ja'ac len le'. <sup>8</sup>Na' zan beṇe' za'aque' Judea, na' Jerusalén, na' Idumea, na' yešl'a'a yegw Jordán, na' gan' mbane Tiro na' Sidón goside' bedeseṇe'e le' cate' gosenezde' yeł'a' guac da' chonen'. <sup>9</sup>Da'n'an' Jesúsen' gože' beṇe' ca' zjanaque' le' txen yeseyiljue' to barcw dao' gan' cuie' cont bi yosoči beṇe' ca' zjanžaga' le', <sup>10</sup>le beṇe' zan ba beyone', na' beṇe' ca' ne' chese'ede' chosožiga' lježe' nac gac yesoxe'ne'. <sup>11</sup>Na' beṇe' ca' zjajo'o zjanyaz da' xigüen' cate' chesele'ede' Jesúsen' chosozoa xibe' lagüen' na' da' xigüe' ca' chososya'an chese'en le':

—Len' naco' dogualje Xi'in Dios.

<sup>12</sup>Perw Jesúsen' gwdile' legaquen na' bene' mandadw bi yesenan no nac le'.

**Jesúsen' gwčhie' beṇe' šižinw ca' gosaque' txen len le'**

(Mt. 10:1-4; Lc. 6:12-16)

<sup>13</sup>Beyoža' Jesúsen' gwlo'e' to lo ya'a na' goxe' bał beṇe' goclaže' šja'aclene' le', nach gosa'aque' ja'aque' gan' zoen'. <sup>14</sup>Nach gwleje' šižinw beṇe' yesenita' len le', cont sele' legaque' šjasedixjue'ede' xtižen'. <sup>15</sup>Na' bnežjue' legaque' yeł'a' guac cont yesyeyone' beṇe' güe' na' yeł'a' gwnabia' cont yesyebje' da' xigüe' da' yo'o nyaz beṇe'. <sup>16</sup>Šižinw beṇe' quin' gosac: Simón ben' lecce gože'ne' Pedro; <sup>17</sup>Jacobo len beṇe' biše' Juan beṇe' ca' zjanac xi'in Zebedeo, na' bsi'e' legaque'

Boanerges, zeje diža' beṇe' zjanac ca' yi' gwzio' cate' chašjw chtinen; <sup>18</sup>nach Andrés, na' Felipe, na' Bartolomé, na' Mateo, na' Tomás, na' Jacobo xi'in Alfeo, na' Tadeo, na' Simón ben' gwde'e beṇe' ca' zjanzi' cananista, <sup>19</sup>na' Judas Iscariote ben' gwdechle' bdie' Jesúsen' lo na' beṇe' ca' cheseque'ede' le'.

**Gosene' Jesúsen' bebeje' da' xigüe' len yeł'a' guac čhe Beelzebú**

(Mt. 12:22-32; Lc. 11:14-23; 12:10)

Beyoža' Jesúsen' len beṇe' ca' zjanaque' le' txen goso'e' lo' yo'o gan' zoe' ca' hora', <sup>20</sup>na' da' yoble besežagchgua beṇe', neca' goc yes'e'ej yesagw Jesúsen' len beṇe' ca' zjanaque' le' txen. <sup>21</sup>Na' cate' goseneze biše' ljež Jesúsen', ja'aque' cont yesyečhe'ene', le' gosene' chactonte'.

<sup>22</sup>Nach beṇe' ca' bososed bosolo'ede' ley dan' bzoj da' Moisés gosa'aque' Jerusalén na' ja'aque' distritw Galilea gan' chsed chlo'e' Jesúsen' na' gose'e beṇe' ca' že'na':

—Benga yo'o nyaze' Beelzebú dan' chnabia' da' xigüe' ca', na' Beelzebún' chaclenen le' cont chebeje' da' xigüe' zjajo'o zjanyaz beṇe'.

<sup>23</sup>Nach Jesúsen' goxe' beṇe' ca' na' bsed blo'ede'ne' gwne':

—čNac gon Satanás dan' chnabia' da' xigüe' ca' yebejen lecce da' xigüe'? <sup>24</sup>Še to gobiern' choje' čhop šon cuenle' na' yeyoža' yesedile' legacze', gobiernna' bi sibi'e. <sup>25</sup>Na' še beṇe' že' toz yo'o yesechoje' chople na' yesedile' legacze', gague sša yesenite' txen. <sup>26</sup>Na' še Satanásen' len da' xigüe' čhen yesechojen chople na' yesedilen, lecce bi sibian', san na' yeyož yedon.



<sup>27</sup>'Nono gac šo'e lo' yo'o che to bene' gual na' que'e bi da' de che' še cbi zgua'tec gwcheje' bene' gual na', lete gone' ca' nach gac que'e bi da' de che'.

<sup>28</sup>'Da' li žia' le'e, yogo' da' xinj da' chon benach na' yogo' diža' bya' da' yesene', Diosen' yezi'xene' chen še yesyetinjde'. <sup>29</sup>Perw note'teze bene' ne' yela' ya' che Spiritw che Dios, gwbat yezi'xen Diosen' che', san de dola' che' toli tocane.

<sup>30</sup>Gwne' ca' dan' gosene' che' yo'o nyaze' da' xigüe'.

**Xna' Jesúsen' na' bene' biše' gosaxe'ne'**

(Mt. 12:46-50; Lc. 8:19-21)

<sup>31</sup>Na' bžin xna' Jesúsen' len bene' biše', na' gosenite' chyo'ole gosaxe' le'. <sup>32</sup>Na' bene' ca' zjanita' cuit Jesúsen' gose'ene':

—Xna'o len bene' bišo' ca' zjanite' chyo'o na' chesyeyiljue' le'.

<sup>33</sup>Nach Jesúsen' gože' legaque':  
—¿Nezele non' nac xna'a na' no zjanac biše' lježa'?

<sup>34</sup>Nach gwne'e bene' ca' zjachi' cuite'na', na' gwne':

—Bene' quin' zjanac xna'a na' zjanaque' biše' lježa'. <sup>35</sup>Le note'teze bene' chone' da' chna'laže' Dios, bena' nac bene' biša', bene' zana', lecze naque' xna'a.

**Jempl che bene' goz trigo**

(Mt. 13:1-9; Lc. 8:4-8)

**4** Yeto ža yoble gwzolao Jesúsen' chsed chlo'ede' cho'a nisaon', na' besežagchgua bene' zan juisyw gan' chi'ena'. Na' da' besežagchgua bene' zan, benten byen gwyo'o Jesúsen' to lo' barcw dao' da' chda' lo nisaon' cho'a yo bižen' na'

gwchi'e lo'enna', na' yogo' bene' ca' gosenite' cho'a nisaon' ga nac yo biž. <sup>2</sup>Nach da' zan da' bsd blo'ede' legaque' len jempl da' bi'e. Na' bzejni'ide' legaque', gwne':

<sup>3</sup>—Le gwzenag da' nga: To bene' güen žin jeze' trigw. <sup>4</sup>Na' šlac zeje' chose' trigon', late' bin che trigw dan' chazen' jasechazen chanez nach be ca' žia xil be chaš le'e yaba gosagwban'. <sup>5</sup>Yelaten' jasechazen ga nac lo yej, ga bibi yotec zoa, na' da' nga byob blan' le bi jasechazen ga nac sitjw. <sup>6</sup>Perw cate' bla' gwbiža' na' bzeyen len na' gwbižen, le gague yo'otec loenna' sitjon'.

<sup>7</sup>Yelaten' jasechazen ga nac lo yag yeše', na' yag yešen' gosecha'on na' bosololen' len, na' bibi gosebian.

<sup>8</sup>Perw na' yelaten' jasechazen ga nac yo šagüe'. Da' nga beselan' na' gosecha'on na' leca güen gosebian, balen gosebian do šichoa güeje to ton, balen gayon, na' yebalen do to gayoa.

<sup>9</sup>Na' gože' legaque':

—Le'e žia nagle da' chene, le gwzenag xtiža'na'.

**Bichen' bzejni'ide' bene' len jempl**

(Mt. 13:10-17; Lc. 8:9-10)

<sup>10</sup>Gwdena' cate' ba besyeya'ac bene' zan ca', bene' ca' zjanita' gała'ze len le' na' len bene' šižinw ca' zjanaque' le' txen, gosenabde' le' bi zejen jempl dan' bi'en. <sup>11</sup>Na' gože' legaque':

—Nono na' neze can' nac yela' gwnabia' che Diosen', perw ba chone' cont le'e chejnilaže'lene' nezelen. Na' bene' bi chesaclaže' yesejnilaže' Diosen', choe'lengaca'ne' xtižen' len jempl. <sup>12</sup>Chona' ca' cont



yesele'ede' can' chonan' na' bitw  
yesacbe'ede' bi zejen, na' cont  
yesende' xtižan' na' bi yesejni'iden',  
na' neca yesyetinjde', neca yezi'xen  
Diosen' xtolen'.

**Jesúsen' bzejni'ide' bi zejen jempl che  
ben' ben goza'**

(Mt. 13:18-23; Lc. 8:11-15)

<sup>13</sup>Nach gože' legaque':

—¿Bi chejni'ile jempl nga?

¿Nacxe gac šejni'ile jempl yoble  
da' güe'lena' le'e? <sup>14</sup>Ben' ben  
goza' naque' ca ben' choe' xtiža'  
Diosa'. <sup>15</sup>Na' bal bene' zjanaque'  
ca bin dan' beselažo' chanez, le  
chosozenague' cate' chas chlalje  
xtiža' Diosen', na' ca cheyoža' la'  
chžinte Satanásen' dan' chnabia' da'  
xigüe' ca' na' chebejen xtiža' Diosen'  
dan' ba yo'o yichjlažda'ogüen'.

<sup>16</sup>Yebal bene' zjanaque' ca bin  
dan' beselažo' ga nac lo yej na' bi  
ben loen. Legaque' chesyebede'  
chosozenague' xtiža' Diosen', <sup>17</sup>perw  
šložga chesezibi'e, na' cate' chesac  
bi da' mal chegaque' o bichle  
chesone bene' legaque' neče da'  
chosozenague' xtiža' Diozen', la'  
chesebejyichjten'. <sup>18</sup>Na' yebal'  
zjanaque' ca bin dan' besego'onen  
ga nac lo yag yeše'. Chosozenague'  
xtiža' Diosen', <sup>19</sup>na' šlac zjambane'  
chesyelal chesyžejde', na' da'  
chesaclaže' yeseni'e chziye'en  
legaque' na' chesezelaže' yogo'ze  
da' de yesata' che'. Yogo' da' qui bi  
choen' latje yega'an xtiža' Diosen'  
lo' yichjlažda'ogüen' na' da'nan' bi  
chesejnilaže' le' ca cheyala'. <sup>20</sup>Perw  
na' nita' bal bene' chosozenague'  
xtiža' Diosa' na' chesejnilaže'  
le' do yichj do laže', bene' qui

zjazaca'lebde' ca bin dan' beselažo'  
lo yo šagüe'. Bal' zjanaque' ca bin  
dan' gosebian šichoa güeje to ton,  
na' yebal' ca da' ca' bexoen' gayon,  
o ca no da' ca' bexoen' to gayoa  
güeje to ton.

**Jempl che yi' dan' chguala'cho**

(Lc. 8:16-18)

<sup>21</sup>Lecze gože' legaque':

—Cate' chguala'cho to yi'

¿gw dosa'chon to caj o gwzoachon  
xan cam? Bi choncho ca', san  
chguala'cho yin' na' chzoachon  
sibe cont gwsenin'. <sup>22</sup>Na' da' ngaše'  
chia' neda' na'a, lenna' gwlo'elaon,  
na' da' nono na' neze chia', žin ža  
yesenezden'. <sup>23</sup>Le'e žia nagle da'  
chene, le gwzenag xtižan'.

<sup>24</sup>Lecze gože' legaque':

—Le gwzenag da' quingan' da'  
chzejni'ida' le'e. Le con can' chonle  
len len, can' gon Diosen' len le'e. Na'  
gonchcze' cont soachle mbalaz da'  
chzenagle che'. <sup>25</sup>Le še chzenagle  
xtižen' gwzejni'ichde' le'e, perw  
na' še bi chzenaglen, da' daon' ba  
nezele yeyanlaže'len.

**Jempl che bin dan' chlan'  
na' chcha'on**

<sup>26</sup>Lecze gwna Jesúsen':

—Yela' gwnabia' che Diosen'  
zaca'leben ca dan' chac cate' to  
bene' chaze' bite'teze bin lo yo.  
<sup>27</sup>Chjaytase' na' chebane' cheyase',  
chde ža yel, na' chla' dan' gozen' na'  
chcha'on, perw le' bi neзде' naquen'  
chac. <sup>28</sup>Le to gualazze yežlio  
nan' chonen len, zgua'tec chla'  
lbe'edagüen', nach chlan' dao, na'  
cheyoža' chbian da' cheyala' cuian.  
<sup>29</sup>Na' cate' ba gol dan' chbianna' na'

chja'aque' chjasyexi'en, le ba bžin  
cho'a gwlap.

### Jempl che biñ che xomdas

(Mr. 13:31-32; Lc. 13:18-19)

<sup>30</sup>Nach lecze gwna Jesúsen':

—Gonchcho xbab bi ca da'

zaca'lebe yela' gwnabia' che Diosen'  
na' güe'cha' jempl cont nezele šanch  
bene' yosozenag che' cont nabi'e  
yichjlažda'ogaque'. <sup>31</sup>Naquen ca  
to biñ che xomdas da' chyaž lo yo.  
Len chnabia' nac da' dao' len biñ  
ca' chazcho lo yežlion'. <sup>32</sup>Perw cate'  
bačh nyažen, chcha'on na' chaquen  
da' xench lao yixe' cuan ca', na' da'  
xenchgua chac xol che xozenna', na'  
lente byin dao' ca' chesyezi'laže'ba'  
lo xozenna'.

### Jesúsen bgone' žin jempl

(Mt. 13:34-35)

<sup>33</sup>Can' blo'e Jesúsen' xtiža' Diosen'  
yogo' ni'a, bi'e zan jempl ca che ben'  
goza' na' che biñ ca', con ga zelao  
goc gosejni'ide'. <sup>34</sup>Bitwbi bzejni'ide'  
legaque' sin ca be'e jempl, nach cate'  
bich nita' bene' zan ca', bzejni'ide'  
bene' ca' zjanaque' le' txen bi zejen  
yogo' da' ca'.

### Jesúsen' bebeczie' be' bdono' len nisdao'

(Mt. 8:23-27; Lc. 8:22-25)

<sup>35</sup>Leze lo žana' cate' gwxin,

Jesúsen' gože' bene' ca' zjanaque' le'  
txen:

—Le šo'o laga'cho yešla'a nisdao'.

<sup>36</sup>Nach bosyocua'ane' yezica'chle  
bene' ca' že' gan' ba bsd blo'ede'  
na' gosa'aque' lo' barcw daon' gan'  
ba yo'ocze Jesúsen'. Na' yeba' bene'  
lecze ja'aclene' legaque' len yeto

čhop barcw dao'. <sup>37</sup>Na' gwzolao  
gwyechjchgua to be' bdono' na'  
nisdao' leze chas chatan', na'  
gwzolao cheyož nis lo' barcon'.

<sup>38</sup>Jesúsen' ba chtase' xante barcon'  
to lo xcogue' caten' goc ca'. Na'  
bosyosbane' le' gose'ene':

—iMaestro! ěBibi de chza'lažon' še  
ba gwdebe nisdao' chio'?

<sup>39</sup>Nach gwyas Jesúsen' na' gwdile'  
be' bdonon' na' gože' nisdao':

—iŠižize! iŠižize!

Na' bebeži be' bdonon' na'  
beyataži nisdao'. <sup>40</sup>Nach Jesúsen'  
gože' bene' ca' zjanaque' le' txen:

—ěBixchen' chžebtecle?

ěNacxechen' bi chejle'le chia'?

<sup>41</sup>Legaque' besežebchgüe' na' gose'  
lježe':

—ěNoxe benga? lente be' bdono'  
na' len nisdao' chosozenaguen che  
da' že'.

### Bene' Gadara yo'o nyaze' da' xigüe'

(Mt. 8:28-34; Lc. 8:26-39)

**5** Besežine' šla'a nisdao' gan'  
mbane Gadara, <sup>2</sup>na' cate' bechoj  
Jesúsen' lo' barcon' to bene' yo'o  
nyaz da' xigüen' bchoje' lo' capsantw  
na' jašague' le'. <sup>3</sup>Bena' ba zoacze'  
capsantw na'le na' nono chzoe goxe'  
le', ne len gden ca gosezoede' le'. <sup>4</sup>Da'  
zan ni'a bosochje' ni'a ne'e gden,  
perw bia'cze gwchoguen', con bzojx  
btinen', na' nono gwzoe le'. <sup>5</sup>Yogo' ža  
yogo' yel gwde' bosya'adie' do lo ya'a  
na' do ladjo ba ca' na' tža tža chone'  
zi' cuine' len yej. <sup>6</sup>Na' cate' ble'ede'  
Jesúsen' zito' gwyejse'e' jazoa xibe'  
lagüen', <sup>7</sup>na' da' xigüen' benen cont  
bosya'adie' gože' le':

—ěBixchen' chgoša' chlaže' chio'  
len neda', Jesús? Naco' dogualje

Xi'in Dios bene' nape la'zelagüe yela' chnabia' xen. Neche Dios chneyoeda' le' bi gwsaco' neda'.

<sup>8</sup>Da' xigüen' benen cont gwna ben' ca' dan' gož Jesúsen' len:

—Da' xigüe', bsan benga.

<sup>9</sup>Na' gwnabe Jesúsen' len:

—¿Bi lio'?

Na' boži'in xtižen':

—Legión lia', le nac zanto'.

<sup>10</sup>Na' goseneyoen Jesús'a bi yeselen' zito' cate' yesyežašen' yichjlaždao' ben'. <sup>11</sup>Na' gała'ze lo ya'ana' chesaš zan coš chesagwba'.

<sup>12</sup>Nach da' xigüen' goseneyoen le':

—Gwseła' neto' gan' nita' coš

ca' na' ben' latje šjajo'oto' lo' yichjlažda'oban'.

<sup>13</sup>Nach Jesúsen' bnežjue' latje, na' besyechoj da' xigüen' lo' yichjlaždao' bena' na' jasyeyo'on yichjlaždao' coš ca'. Nac ca do chop mil cošen'. Na' besyeyetjses coš ca' le'e ya'a gan' nita'ban' na' jaselažo'ba' lo' nisdao' ga gosatba' gose'ejba' nis.

<sup>14</sup>Nach bene' ca' chosoyoe' cošen' bosyoxonje' jasyeyeže' bene' lagüe yež len bene' chaš yixe' can' goca'. Na' ja'ac bene' jasene'e bixen' goc. <sup>15</sup>Cate' besežine' gan' zoa Jesúsen' besele'ede' ben' ba gwyo'o gwyaz da' xigüen', na' na'a ba chi'e nyaz xałane' na' ba bezoa yichjlažda'ogüen' binlo. Na' besežebe'. <sup>16</sup>Na' bene' ca' besele'ede' can' goquen' gosole' diža' che dan' goc len ben' gwyo'o gwyaz da' xigüen', lez ca' dan' goc len coš ca'. <sup>17</sup>Nach gosezolagüe' gosata'yoede' Jesúsen' yeze'e lažgaquen'.

<sup>18</sup>Na' cate' beyo'o Jesúsen' lo' barcon' ben' ba gwyo'o gwyaz da' xigüen' gota'yoede' Jesúsen' šejlene'

le'. <sup>19</sup>Perw Jesúsen' bi be'e latje, san gože' le':

—Beyej ližo' na' jayež bene' lo' yo'o chio' na' no bene' migw chio' yogo' da' güen da' ba ben Xancho Diosen' len le' na' catec ba beyaše' beži'ilaže'de' le'.

<sup>20</sup>Na' beza' ben' na' gwzologüe' cho'e diža' yež ca' gan' mbane distritw Decápolis yogo' can' ben Jesúsen' len le', na' yogo' bene' gosene xtižen' besyebande'.

**Bi' no'ol che Jairo, na' no'ol ben' gwdane' xa Jesúsen'**

(Mt. 9:18-26; Lc. 8:40-56)

<sup>21</sup>Cate' bežin Jesúsen' cho'a nisdao'n zeze'e lo' barcw daon' dan' zeza' šla'a nisdao'n, bene' zan ja'aque' gan' bežinen', na' Jesúsen' bega'ane' cho'a nisdao' na'ze. <sup>22</sup>Nach bžin to ben' nac bene' gwnabia' che yodao' che yežna', lie' Jairo. Cate' ble'ede' Jesúsen' bzoa xibe' lagüen' <sup>23</sup>na' gota'yoechgüede'ne' gože'ne': —Xi'ina' no'ole ba chatbe'. Benšca goclen yo'o xoa taco' yichjbe' cont yeyaquebe' na' bi gatbe'.

<sup>24</sup>Nach Jesúsen' gwyejlene' le'. Na' bene' zan ja'acch, na' bosochichgüe' le'. <sup>25</sup>Ladjo bene' ca' len to no'ol che'ede', ba goc šižinw iz chzoe' gwba'o'. <sup>26</sup>Ba bžaglaochgüe' jen cuine' rmed len zan bene' güen rmed ca', na' ba benditje' yogo' xmechue' da' de, perw bitwbi gwxi'czen, san chyałalen'. <sup>27</sup>Cate' bende' cheso'e xtiža' Jesúsen', no'olna' gwdie' ladjo bene' ca' na' bžine' čože'le Jesúsen' na' gwdane' xen'. <sup>28</sup>Le bene' xbab, gwne': "Con še ba gwdana' xen' nach yeyactecza'." <sup>29</sup>Na' da' li cate'

gwdane' xen' la' gwlezte gwbao' dan' zoen', na' no'olen' gocbe'ede' ba bega'a yižgüe' chen'. <sup>30</sup>Na' Jesúsen' la' gocbe'etede' to bene' ba beyacde' len yela' guac chen', nach gwyechje' gwne'e bene' ca' nita' cože'le, na' gwnabde' legaque':

—¿Non' gwdan xan'?

<sup>31</sup>Nach bene' ca' zjanaque' Jesúsen' txen gose'ene':

—Ba ble'eczedo' ca chosochie' le', ðbixchen' chnabo' non' gwdan xaon'?

<sup>32</sup>Perw Jesúsen' chne'e nile na'le cont le'ede' non' gwdan xen'. <sup>33</sup>Nach no'olen' nezde' can' ba goc che' na' do chaž chžebe' gwyeye' jazoa xibe' lagüen' na' gože'ne' yogo' da' li. <sup>34</sup>Na' Jesúsén' gože'ne':

—Xi'ina', ba beyacdo' dan' chejnilažo' neda'. Beyej binlo, na' bich bi gacdo' len yižgüe' chion'.

<sup>35</sup>Ne' choe'te Jesúsen' dižan' ca' cate' besežin bene' gosa'ac liž xan yodaon', na' gosi'e xa bi' no'ol daon':

—Ba got bi' chion', ðbixchen' choncho' zed Maestro nga?

<sup>36</sup>Perw Jesúsen' bi bene' cuent dan' chesena bene' ca', na' gože' xan yodaon':

—Bitw žebo', con gwyejle' chia'.

<sup>37</sup>Na' bi bi'e latje šja'aclen bene' zan le' gan' xoa bi' no'olen', san Pedro, Jacobo na' Juan bene' biše' Jacobo, bene' ca'ze ja'aclen le'. <sup>38</sup>Na' cate' besežine' liž xan yodaon', ble'ede' ba chi' žaš chesosye'e chesebeže'. <sup>39</sup>Nach gwyo'e na' gože' legaque':

—¿Bixchen' mbeacle žaš chbežle? Bi no'ol daon' bina' gatbe', san chtasben'.

<sup>40</sup>Perw bosoxiže' gosonle' che'. Nach Jesúsén' bešaše' yogo'lole',

na' gwche'e xaxna'be' na' bene' ca' zja'aclen le' na'ze na' goso'e len le' gan' de bi' no'ol daon'. <sup>41</sup>Na' bexue' taca'ben' na' gože'be':

—Talita, cumi —zeje diža': Bi' no'ole, chapa' le' beban na' beyas.

<sup>42</sup>Nach bi' no'ol daon' la' beyastebe' na' goc beza'be', le šižinw izegueben'. Na' bene' ca' besele'e leca besyežejde' can' goca'. <sup>43</sup>Perw Jesúsen' gože' legaque' nono yese'e ca', na' gože' legaque' yeso'e bi' no'ol daon' da' gagwbe'.

### Jesúsen' bežine' distritw gan' chi' yež Nazaret

(Mt. 13:53-58; Lc. 4:16-30)

**6** Na' beza' Jesúsen' na' bežine' laže', na' bene' ca' zjanaque' le' txen ja'aclene' le'. <sup>2</sup>Na' cate' bžin ža che Dios, Jesúsen' gwzologüe' bsd blo'ede' lo' yodaon'. Na' bene' zan bene' gosende' xtižen' besyebande' na' gosene':

—¿Nacxe chaquen' cho'e diža' ca'? ¿Bi yela' sinan' nezde'? na' inacxechen' chac chone' yela' guac ca'? <sup>3</sup>Benga chonšagüe' yag na' naque' xi'in María. Nombia'chwne' na' bene' biše' Jacobo, José, Judas na' Simón, na' lecze bene' zane' ca' nite' lažcho nga.

Na' da' zjanombi'ene' nan' bi gosaclačže' yesejle'e che'. <sup>4</sup>Nach Jesúsén' gože' legaque':

—Yogo'ze bene' chesonxene' bene' choe' xtiža' Diosen', perw bene' gualaž che', bene' biše' lježe' na' bene' lo' yo'o che' bi chosozenague' che'.

<sup>5</sup>Na' ne to yela' guac ca' goc gone' na', lete gwxxoa taquen' yichj to chop bene' güe' na' beyone' legaque'.

<sup>6</sup>Na' bebande' dan' bi gosejle' bene' che'. Na' gwdechle gwda Jesúsen' bsed blo'ede' to to yež dao' ca' nita' gala'ze.

**Jesúsen' gwsele' bene' ca' zjanaque' le' txen jasedixjue'ede' xtiža' Diosen'**

(Mt. 10:5-15; Lc. 9:1-6)

<sup>7</sup>Na' goxe' bene' šižinw ca' na' gwsele' chop güeje' to to yež, na' bnežjue'ne' yela' gwnabia' cont goc besyebeje' da' xigüe' lo' yichjlaždao' bene'. <sup>8</sup>Na' cate' za' yesa'aque' gože' legaque' bibi yesoxe' chanez, ne bzod, ne yetextil, ne mechw, con yesoxe' to xis da' yosochiše'. <sup>9</sup>Na' yosoleje' yel perw bi yesoe' yeto xcamise'. <sup>10</sup>Na' lecze gože' legaque':

—Cate' žinle to liž bene', na'ze yega'ñle šlac zoale lagüe yeža', cate'ch yeza'le yeža' cana'ch yeza'le latja'. <sup>11</sup>Na' še zoa ga bi yosolebe' le'e neca yosozenague' chele, cate' yeza'le na' le cuiibe ni'alen' yo bište cont nacbia' malen' chesone' bi chosozenague' xtiža' Diosen'. Da' li žia' le'e cate' žin ža gac juisyw bene' ca' bi yosolebe' le'e yesacche' castigw clal ca bene' Sodoma na' bene' Gomorra.

<sup>12</sup>Nach gosa'aque', na' goseyixjue'ede' cheyala' yesyedinje xtola' benachen'. <sup>13</sup>Leze besyebeje' da' xigüe' da' yo'o nyaz bene', na' zan bene' güe' goseyebene' set na' besyeyacde'.

**Gosote' Juan ben' bzoe' bene' nis**

(Mt. 14:1-12; Lc. 9:7-9)

<sup>14</sup>Na' ca nac rey Herodes, gwnezde' can' chesone', le yogo'ze bene' gosende' can' ben Jesúsen'. Na' Herodesen' gwne':

—Juan ben' bzoe' bene' nisen' ba beban ladjo bene' guat ca'. Da'nana' chaque' chone' yela' guac.

<sup>15</sup>Yebale' bene' gosene':

—Naque' ben' be' xtiža' Diosen' cani', ben' le Elías.

Na' yebale' gosene':

—Naque' con to bene' choe' xtiža' Dios ca bene' ca' gosoe' xtiža' Diosen' cani'te.

<sup>16</sup>Cate' Herodesen' bende' dižan' nac ca' na' gwne':

—Bengan' Juan ben' gwchogbi'an gosechogue' yene', na' na'a ba bebane' ladjo bene' guaten'.

<sup>17-18</sup>Le Herodesen' beque'e

Herodías na' gwzoalene' le' goque' xo'ole' la'czla' Herodíasna' naque' xo'ole Felipe biše'na'. Na' Juanna' gože' Herodesen':

—Bi cheyala' soalen no'ol che bene' bišon'.

Da'nana' Herodesen' gwchogbi'en gosezene' Juanna' na' bosocheje'ne' len gden lo' yo'o ližya gan' gosegüe'ene'.

<sup>19</sup>Can' goc Herodíasna' bgue'ede' Juanna' na' goclaze' gote'ne', perw bi goc. <sup>20</sup>Le Herodesen' gwnezde' Juanna' naque' to bene' chon da' zej to licha na' to bene' yo'o lo na' Dios, nachen' Herodesen' bžebe' Juanna' na' bi be'e latje bi gone Herodíasen' le'. Na' la'czla' bi gwyejni'iteque Herodesen' dan' bšalj Juanna', con bebede' bzenague' che'. <sup>21</sup>Perw Herodíasen' beyiljwlaže' nac bene' cate' ben Herodesen' lni' gola' ža le', bsini'e xše' da' gwdagüe' len bene' gwnabia' che' ca' na' no xan soldadw ca' na' nochle bene' blao že' distritw Galilean'. <sup>22</sup>Bi' no'ol che Herodíasen' gwyo'obe' bya'abe' gan' gosagüe'

xšen' na' beca'a Herodesen' can'  
bya'aben', lez ca' ben' gosagw len le'  
xšen'. Na' reyna' gože' bi' no'ola':

—Gwṇabe neda' con da' žan čhio'  
na' gonan'.

<sup>23</sup>Na' lecze gože'be':

—Diosen' naque' testigw čhia' gonā'  
le' con da' nabdo'nda', la' gašjo yež  
ca' gan' mbanda' chnabi'a.

<sup>24</sup>Na' bechojbe' na' gožbe' xna'ben':

—čBi nabda'ne'?

Na' le' gože'be':

—Gwṇab yichj Juan ben' chzoe'  
bene' nis.

<sup>25</sup>Na' la' beyo'otebe' gan' chi'  
reyna' na' gožbe'ne':

—Che'nda' netecna'a gonō' neda' to lo'  
platw yichj Juan ben' chzoa bene' nis.

<sup>26</sup>Na' ne late'ze bi gwyazlaže'  
reyna' gone' can' gož no'ol güegon'  
le', perw bachle gwne' lao bene' ca'  
jasa'ac llin' Diosen' naque' testigw  
če' gwnežjue'be' bite'teze nabebe'  
le', da'nan' bi bžone' gac dan'  
gwṇabebe' le'. <sup>27</sup>Nach la' gwsela'te  
reyna' to soldadw na' gože'ne' šjaxi'e  
yichj Juanna'. <sup>28</sup>Na' gwey soldadon'  
lo' yo'o ližyan' na' jachogue' yen  
Juanna', na' bžie' yichje' to lo' platw  
jasanen' bnežjuen' bi' no'ola', na' bi'  
nga bnežjwben' xna'be'.

<sup>29</sup>Cate' goseneze bene' ca'  
zjanaque' txen len Juanna', jasexi'e  
cuerp čhen' cont bosocuaše'ne'.

**Jesúsen' bguagüe' gayo' mil bene'**

(Mt. 14:13-21; Lc. 9:10-17; Jn. 6:1-14)

<sup>30</sup>Beyoža' postlw ca' besyežague'  
len Jesúsen' na' gose'ene' bica' da' ba  
gosone' na' da' ba bosolo'ede'. <sup>31</sup>Na'  
Jesúsen' gože'ne':

—Le da, le šo'o ga nac lchojiže'  
yezi'laže'cho late'.

Gwne' ca' le chep chetj chac  
bene', neca chac latje yesagüe'.

<sup>32</sup>Nach Jesúsen' len postlw če'  
ca' gosa'aque' ja'aque' legacze' to  
lo' barcw, ja'aque' ga nac lchojiže'.

<sup>33</sup>Perw zan bene' besele'ede'

gosa'aque' na' besyeyombi'e Jesúsen',  
na' zan yež bene' ca' bosoxonjsese'  
na' byobch besežine' ca' Jesúsen'.

<sup>34</sup>Na' cate' Jesúsen' bchoje' lo'  
barcon' ble'ede' ba besežag bene'  
zan na' beyaše' beži'ilaže'de' legaque',  
le nite' ca' nita' no xila' be nono de  
gwyoeba'. Nach gwzolaogüe' bsd  
blo'ede' legaque'. <sup>35</sup>Cate' ba zoa xin,  
bene' ca' zjanaque' le' txen gose'ene':

—Ba zoa xin, na' latj gan' zoacho  
nga naquen latj daš. <sup>36</sup>Na' besela'  
bene' quinga cont šja'aque' ga že'  
bene' do ranšw na' do yež dao'  
ca' dan' nyechj mbi'i šjasexi'e da'  
yesagüe', le bibi de yesagüe'.

<sup>37</sup>Na' Jesúsen' gože'ne':

—Le'e le güe'e da' yesagüe'.

Na' legaque' gose'ene':

—Bi de laxjwto' če' čhop gayoa ža  
žin cont šjaxi'to' da' güe'to' legaque'  
yesagüe'.

<sup>38</sup>Jesúsen' gože'ne':

—čGaca' yetextilen' de čhele? Le  
šja'ac le šjana'.

Cate' gosenezde' na' gose'ene':

—De gayo' yetextil na' yechop bel  
ya'a.

<sup>39</sup>Nach gože' bene' ca' yesebi'e to xonj  
güeje' lo' yixyen'. <sup>40</sup>Na' gosebe' to gayoa  
güeje' na' yeba'le' šiyon güeje'. <sup>41</sup>Nach  
Jesúsen' gwxi'e yetextil ca' gayo' na'  
bel ya'an čhope, na' gwne'e le'e yaba  
bi'e yela' choxclen če' Dios na' bzoxje'  
yetextilen' bi'en bene' ca' zjanaque' le'  
txen cont goseyisen' len bene' ca'. Leze  
gwdise' bel ya'a ca' čhop lao yogo'lol

bene' ca'. <sup>42</sup>Na' yogüe' gosagüen' na' goseljde'. <sup>43</sup>Beyoža' bososše'e yešiz̄inw žome yetextil bixjw na' len late' güeje bel da' bega'an. <sup>44</sup>Na' bene' ca' gosagw yetextilen' gosaque' gayo' mil bene' byo, bi cuent no'ol ca' len bidao'.

**Jesúsen' gwze'e lo nis**

(Mt. 14:22-27; Jn. 6:16-21)

<sup>45</sup>Gwdena' Jesúsen' bene' byen besyeyo'o bene' ca' zjanaque' le' txen lo' barcon' cont yesyelaga'zegue' nisaon' na' yesežine' Betsaida, šlac le' za' chesele' bene' ca' žena' ližgaque'. <sup>46</sup>Na' cate' beyož bzede' bene' ca' diža', gwyje' lo ya'an boł güiž'e Dios. <sup>47</sup>Na' ca nac barcon', cate' goc choł ba zejen gachol nisaon', na' toze Jesúsen' ne' zie' ga nac yo biž. <sup>48</sup>Na' ble'ede' bi chac yosyose'en binlo, le ben' chečhjen clele na' bi choen' latje sa' barcon'. Na' šbał beyetj Jesúsen' ya'ana' na' gwze'e lo nisen' ba zej gale' gan' zja'aquen', na' ba zoa teze' gan' zjaya'aquen' <sup>49</sup>cate' besele'ede' le' chze'e lo nisen'. Na' gosacde' še da' chda chelen'. Na' bososye'e. <sup>50</sup>Le yogüe' besele'ede'ne' na' besežebe'. Perw le' la' boł güižte' legaque', gože'ne':

—Le gonchach laže'le; nedan', bitw žeble.

<sup>51</sup>Nach gwyo'e lo' barcw gan' zjaya'ac bene' ca', nach gwchež'i ben'. Na' legaque' leca besyebande' na' besyežejde', <sup>52</sup>le bi gosejni'ide' dan' bene' yela' guac len yetextil ca', na' bina' yesejnilaže' le'.

**Jesúsen' beyone' bene' güe' ca' že' Genesaret**

(Mt. 14:34-36)

<sup>53</sup>Na' goselague' nisaon' na' besežine' yežlio gan' nzi' Genesaret,

na' bosocheje' barcon' cho'a nisaon'. <sup>54</sup>Na' cate' beyož besyechoje' lo' barcon' bene' ca' la' besyeyombia'te' Jesúsen'. <sup>55</sup>Na' ja'acese' doxen gan' mbane Genesaret, na' do lo cam dao' zjanxoe' bene' güe' ca' jasesane'ne' gan' zjanezde' zoa Jesúsen'. <sup>56</sup>Na' gate'teze gwyej Jesúsen', do yixe', do yež, con goseyixjue' bene' güe' ca' do chanez na' goseneyoede' Jesúsen' gwnežjue' latje yesoxe' la'ch late'ze xni'a xen', na' yogo' bene' gosoxen' besyeyacde'.

**Dan' chchoj lo' laždao' benačhen' chonen cont laždagüen' bi naquen xilaže' len Diosen'**

(Mt. 15:1-20)

**7** Nach bene' fariseo ca' na' len bene' ca' bososed bosolo'e dan' bzoj da' Moisés gosa'aque' Jerusalénna' na' ja'aque' gan' zoa Jesúsen'. <sup>2</sup>Na' besele'ede' bał bene' ca' zjanaque' Jesúsen' txen con gosagüe' neca bosyone'e zan ni'a can' chesacde' cheyała' yesone', na' da'nan' gosezi'diže' legaque'. <sup>3</sup>(Le bene' fariseo ca' na' yogo' bene' Israel gualaž čheto' ca' chesonxene' costumbr ca' da' bosyocua'anlen da' xoxxta'oto' ca' neto' bi yesagüe' še bina' yosyone'e zan ni'a. <sup>4</sup>Na' cate' yesyežine' lagüe ya'a, bi yesagüe' še bina' yosyone'e, na' da' zanch costumbr da' zjana'ogüe', ca no yeseyibe' xiga' ga chese'eje' nis, no yeso' xguague, no yeso' ya na' no xcame'.) <sup>5</sup>Nach bene' fariseo ca' na' bene' ca' bososed bosolo'ede' dan' bzoj da' Moísesen' gosenabde' le':

—¿Bixchen' bi cheson bene' ca' zjanaque' le' txen can' goson bene' gol ca'? san con chesagüe' sin cbi chosyone'e zan ni'a.



<sup>6</sup>Jesúsen' gože' legaque':

—Chonle cayanen' bzoj da'  
Isafasen' che le'e nacle bene' gwxiye'  
gan' bzoje', žan':

Bene' qui chesonxene' neda' len  
diža' cho'a,  
perw bi chesonxene' neda' len  
lažda'ogaque'.

<sup>7</sup>Bibi zejen dan' chesonxene'  
neda',

le dan' chososed chosolo'eden'  
naquen da' chnalaže'  
benachze.

<sup>8</sup>Bi chonle ca chnalaže' Dios, san  
na'ole can' ža benachen' cheyla'  
gonle, chyible no yeso' xguague, no  
xiga' ga che'ejle nis, na' da' zanch da'  
chonle.

<sup>9</sup>Qui gožch Jesúsen' legaque':

—Chbejyichjle da' non Diosen'  
mandaw gonle cont na'ole  
costumbr che benach. <sup>10</sup>Da'  
Moisésen' gwne': "Le gap bala'an  
xaxna'le", na' "Note'teze' še chžia  
chnite' xaxne'e, cheyla' gate'."

<sup>11</sup>Perw le'e žale to bene' guac ye'e  
xaxne'e: "Bibi de gona' gaclena'  
le'e, le yogo' da' de chia' naquen  
Corbán" (zeje diža', ba bnežjuen' lo  
na' Dios). <sup>12</sup>Na' žale cate' to bene' že'  
ba naquen lo na' Diosen' nach bich  
cheyla' gaclen xaxne'e. <sup>13</sup>Dan' žale  
ca' chzoale ca'ale dan' ža Diosen' na'  
con chonxenle costumbr gole che  
da' xozxta'ole ca'. Na' da' zanch dan'  
nac ca' chonle.

<sup>14</sup>Da' yoble gox Jesúsen' bene' ca',  
na' gože' legaque':

—Yogo'le le gwzenag chia', na' le  
šejni'i. <sup>15</sup>Bite'teze da' ye'ej gagw  
benachen', bi nacho len chonen cont  
lažda'ogüe' bi naquen xilaže' len  
Diosen'. Dan' chchoj lo' lažda'ogüen',

lenna' chonen cont lažda'ogüe' bi  
naquen xilaže' len Diosen'. <sup>16</sup>Le'e  
žia nagle da' chene, le gwzenag  
xtiža'na'.

<sup>17</sup>Cate' bsan Jesúsen' bich  
bšaljlene' bene' ca' na' beyo'e lo'  
yo'o, nach bene' ca' zjanaque' le'  
txen gosenabde' le' bi zejen dan'  
gože' legaque'. <sup>18</sup>Na' Jesúsen' gože'  
legaque':

—čLecze len le'e bi chejni'ile?  
čBi chejni'ile gague da' ye'ej gagw  
benachen' chonen cont lažda'ogüe'  
bi naquen xilaže' len Diosen'? <sup>19</sup>Le  
da' che'ej chagw benachen' gague  
cho'on lo' lažda'ogüen', san lo' li'en  
cho'on, na' chžin hor cheden.

Na' da' gwne' ca' zeje diža'  
bite'teze yela' guagw nacczen xilaže'.

<sup>20</sup>Na' lecze gwne':

—Xbab da' yo'o lo' yichjlaždao'  
benachen', lenna' chonen cont  
lažda'ogaque' bi zjanaquen xilaže'  
len Diosen'. <sup>21</sup>Le lo' yichjlaždao'  
benachen' chchoj xbab mal ca da' žan  
yesone' da' quinga: yesata'lene' no'ole  
bi nac xo'olgaque' o bene' byo bi nac  
bene' chegaque', gwzoo xtogaque',  
yesote' bene', <sup>22</sup>yesone' gwban,  
yesezelaže' gata' chegaque' da' de  
che bene' yoble, yesone' da' mal,  
yeseziye'e bene', yesone' bichle da'  
nac da' yela' zto', yesacxi'ede' bene',  
yesezeye'e che bene', yesaque' bene'  
ya'laže', yesone' xbab da' bi zaca'.  
<sup>23</sup>Yogo' da' mal qui chesechojen lo'  
laždao' benach na' chonen cont bi  
nac lažda'ogaque' xilaže' len Diosen'.

**To no'ol zito' gwejnilaže' Jesúsen'**

(Mt. 15:21-28)

<sup>24</sup>Na' beza' Jesúsen' na' gweje'  
distritw gan' mbane ciuda Tiro na'



ciuda Sidón. Na' gwyo'e to lo' yo'o na' goclaže' nono neze, perw bi goc gone' cont bi gosenezde'. <sup>25</sup>Cate la' gwnezete xna' to bi' no'ole bi' yo'o nyazbe' da' xigüen', na' gwyeye' na' bzoa xibe' xni'a Jesúsén'. <sup>26</sup>No'olen' goque' bene' zito', no'ole Sirofenicia. Gwyeye' gwñabde' Jesúsén' yebeje' da' xigüe' yo'o nyaz bi' no'ol chen'.

<sup>27</sup>Na' Jesúsén' gože'ne':

—Yogo'ze bene' zgua'tec chnežjue' da' chagw xi'ine'. Bi naquen güen yeque'e yela' guagw che xi'ine' na' gwnežjue' yesagw beco' ca'.

<sup>28</sup>Na' no'olen' gože'ne':

—Leczedo' can' gwnaon' Xana', perw lecze guaqué gagw beco' be chi' xan mes bla'a da' chlažo' lo' yo.

<sup>29</sup>Nach Jesúsén' gože'ne':

—Nacczen can' gwnaon', guac yeyejo', ba bechoj da' xigüen' yo'o nyaz bi' no'ol chion'.

<sup>30</sup>Cate' bežin ližen' ble'ede' de bi' no'ol daon' to lo' cam, na' ba bechoj da' xigüen' yo'o nyazbe'.

**Jesúsén' beyone' to bene' cuež,  
bene' lecze bi goc nie'**

<sup>31</sup>Jesúsén' bezse'e gan' mbane Tiro na' gwdie' gan' nzi' Sidón na' yež ca' gan' mbane Decápolis, na' bežine' cho'a nisdao' che Galilea. <sup>32</sup>Na' jasesane' to bene' byo bene' cuež na' bi goc nie', na' gosenabe' xoa na' Jesúsén' yichje'. <sup>33</sup>Nach Jesúsén' gwche'ene' late' lchojiže' ga nono bene' nita', na' bde xbene' lo' nague' na' bži'en xene' na' gwdane' ložen'. <sup>34</sup>Nach gwne'e le'e yaba, bebande', na' gwne':

—iEfata! —zeje diža': iByaljo!

<sup>35</sup>Nach nag bena' besyeyaljon na' goc bende', na' lecze beyac ložen'

na' goc gwnie' binlo. <sup>36</sup>Na' Jesúsén' gože' bene' ca' nono yes'e ca', perw la'czla' gože' legaqué ca', nachle gosole diža' can' goca'. <sup>37</sup>Na' leca besyebande', na' gosene':

—Yogon' chone' binlo; chacte chone' cont chesyeyene bene' cuež ca' na' bene' ca' bi chac yesene' chesyenie'.

**Jesúsén' cho'e da' chagw tap mil  
bene'**

(Mt. 15:32-39)

**8** Ca tiempa' besežagchgua bene' zan na' bibi de yesagüe'. Nach Jesúsén' goxe' bene' ca' gwleje' cont zjanaque' txen len le' na' gože' legaqué':

<sup>2</sup>—Cheyaše'da' bene' qui, le ba goc šone ža zjanite' nga len neda' na' bibi de yesagüe'. <sup>3</sup>Še yesela'ne' ližgaqué' na' bina' yesagüe', chanez yesego'one' yesecholdé', le bale' za'aque' zito'.

<sup>4</sup>Nach bene' ca' zjanaque' le' txen gose'ene':

—¿Nacxe goncho güe'chone' da' yesagüe' latje nga ga nono bene' nita'?

<sup>5</sup>Na' Jesúsén' gwñabde' legaqué':

—¿Gaca' yetextilen' de chele?

Na' legaqué' gose'ene':

—Gažen.

<sup>6</sup>Nach bene' mandadw yesebe' yogo'lol ben' nitan' lo' yo, na' gwxi'e da' gaž yetextil ca' na' be'e yela' choxclen che Dios, nach bzojjen' bnežjue' bene' ca' zjanaque' le' txen na' legaqué' goseyisen' che yogo'lol bene' nita' na'. <sup>7</sup>Leze zjano'e to chop bel ya'a, na' Jesúsén' be'e yela' choxclen che Diosen' che bel ya'a ca' na' leze goseyisen' che yogo'lol bene'.

<sup>8</sup>Na' yogüe' gosagüe' na' goseljde'.  
Gwdena' bososše'e yegaže žome len  
late' güeje yela' guagw da' bega'an.  
<sup>9</sup>Beñe' ca' gosagon' zjanaque'  
ca do tap mil beñe'. Cate' ba  
besyedagüe', Jesúsen' gože' legaque':  
—“Nayežagcho”, <sup>10</sup>na' gwo'e lo'  
barcon' len beñe' ca' zjanaque' le'  
txen na' gweje' do gan' mbane yež  
da' nzi' Dalmanuta.

**Beñe' fariseo ca' gosaclačže' gon  
Jesúsen' to yela' guac da' yesele'ede'  
le'e yaba**

(Mt. 16:1-4; Lc. 12:54-56)

<sup>11</sup>Na' beñe' fariseo ca' gosezolağüe'  
chesediłdıže' len Jesúsen'. Na' da'  
gosaclačže' yesagüe' xya che' nach  
gosenabde'ne' gone' to yela' guac da'  
yesele'ede' le'e yaba cont yesenezde'  
še da' licze Diosa' gwsele' le'.  
<sup>12</sup>Jesúsen' bebanchgüede' na' gwne':  
—Ba ble'ele chona' yela' guac.  
¿Bixchen' chñable to yela' guac da'  
le'ele cont nezele še Diosen' gwsele'  
neda'? Da' li žia' le'e, bitwbi gona'  
da' le'ele.

<sup>13</sup>Nach bcua'ane' legaque' na'  
beyo'e lo' barcon' beze'e beyeje'  
yešla'a nisdaon'.

**Levadura che beñe' fariseo ca'**

(Mt. 16:5-12)

<sup>14</sup>Beñe' ca' zjanaque' Jesúsen' txen  
gosanlačže' yeso'e da' yesagüe', na'  
totec yetextil zjano'e lo' barcon'.

<sup>15</sup>Na' Jesúsen' gože' legaque':  
—Le gon xbab, le gwsaca' len  
levadura che beñe' fariseo ca' na'  
len levadura che Herodes.

<sup>16</sup>Nach gosenabe lježe' bixchen'  
gwne' ca', na' gose' lježe':

—Gwne' ca' le gague bi yetextil  
checho den'.

<sup>17</sup>Jesúsen' gocbe'ede' xbab dan'  
chesone' na' gože'ne':

—¿Bixchen' chacčejláže'le da' bibi  
yetextil de? ¿Bina' šejni'ile, neca  
chacbe'ele? ¿Nac chach lažda'olen'  
bi chejle'le? <sup>18</sup>¿Bi chle'ele len  
yejlaole, neca chenele len nagle? ¿Bi  
chjayze'ele? <sup>19</sup>Gwdisa' gayo' yetextil  
na' goquen che gayo' mil beñe', na'  
¿bi chjayze'ele yebale žome goc da'  
becho'onen da' botoble?

Na' legaque' gosene':

—Šižinw žome becho'onen da'  
botobto'.

<sup>20</sup>—¿Chixe caten' gwdisa' gaže  
yetextilen' lao tap mil beñe'?  
¿Yebale žome gwža'te dan'  
botoblen'?

Na' gosene':

—Gaže žomen'.

<sup>21</sup>Nach gože' legaque':

—¿Bina' šejni'iczele na'a cho'a diža'  
che dan' chososed chosolo'e beñe'  
fariseo ca'?

**Jesúsen' beyone' to beñe'**

**lchoł beñe' Betsaida**

<sup>22</sup>Gwdechle besežine' Betsaida na'  
jasesane' to beñe' lchoł lao Jesúsen',  
na' gosata'yoede' le' yeyone' le'.

<sup>23</sup>Na' bexue' taca' beñe' lchoła' na'  
gwleje'ne' yež. Nach gwdebe' xene'  
yejlagüen' na' gwxo'a taquen' yichje'  
na' gwñabde'ne' še chle'ede' late'.

<sup>24</sup>Beñe' lchoła' gwñe' na' gwne':

—Chle'eda' beñe', na' chle'eda'ne'  
ca yag, perw chesa'aque'.

<sup>25</sup>Nach Jesúsen' bexoa taque'  
yejlagüen' da' yoble, na' gwña'yane'  
ben' na' beyaque', bele'etede' yogo'

binlo. <sup>26</sup>Nach Jesúsen' besele' le' liže', gože'ne':

—Bi yeyo'o lagüe yežen', neca no yo'o da' nga.

**Pedron' gwne' Jesúsen' naque' Cristo ben' gwlej Diosen' cont nabi'e**

(Mt. 16:13-20; Lc. 9:18-21)

<sup>27</sup>Gwdena' gwyej Jesúsen' len bene' ca' zjanaque' le' txen yež dao' ca' zjachi' do ga mbane ciuda da' nzi' Cesarea de Filipino. Na' chanez gwñabde' bene' ca' zja'aclen le':

—¿Bi chesena bene'? ¿Non' naca' neda'?

<sup>28</sup>Legaque' gose'ene':

—Ba!e' chesene' naco' Juan ben' bzoa bene' nis, yeba!e' chesene' naco' Elías, na' yeba!e' chesene' naco' yeto bene' be' xtiža' Dios cani'.

<sup>29</sup>Na' gwñabde' legaque':

—¿Chixe le'e? ¿no žale naca'?

Pedron' gože' le':

—Len' naco' Cristo ben' gwlej Diosen' cont nabi'o.

<sup>30</sup>Nach Jesúsen' gože' legaque' nono yes'e ca'.

**Jesúsen' gwdixjue'ede' gate'**

(Mt. 16:21-28; Lc. 9:22-27)

<sup>31</sup>Na' gwzola' Jesúsen' bzejni'ide' legaque' can' gac chen', gože'ne':

—Da' zan da' saca'zi'a neda' naca' ben' gwsela' Diosen' golja' beñach. Na' bene' blao ca' chesenabia' nación chechon' na' bñoz gwnabia' ca' na' bene' ca' chososed chosolo'e dan' bzoj da' Moisés bi yesele'ede' neda' güen da' bi chesejle'e chia', na' yesote' neda', perw gacch šone' ža yebana' ladjo bene' guat ca'.

<sup>32</sup>Da' nga gwnen' zaca'laon. Na' Pedron' gwche'e Jesúsen' ga nac

lchojiže' na' gwzola'güe' chdile' le' dan' gwne' ca'. <sup>33</sup>Perw Jesúsen' gwyechje' na' gwne'e bene' ca' zjanaque' le' txen, na' gwdile' Pedron', gože'ne':

—iGwcuase ca'ale Satanás! Bi nsa'o xbab che Diosen' san nsa'o xbab che beñach.

<sup>34</sup>Nach Jesúsen' goxe' bene' ca' zjanaque' le' txen na' yezica'chle bene' na' gože'ne':

—Note'teze bene' še chaclaže' gaque' neda' txen, cheya!a' chojyichj cuine', la'cz!a' saca'zi'e, na' gone' can' nia' neda'.

<sup>35</sup>Note'teze bene' chacde' gone' cont bi saca'zi'e o cont nono yesot le', benan' cuiayi', na' note'teze bene' chzan!aže' cuine' saca'zi'e o gate' ne chia' neda' o neche xtiža' Diosen', ba de yela' mban che' to!i tocanē. <sup>36</sup>¿Bixe zejenna' to bene' nabi'e doxen yežlion' na' cuiaye'e bi gata' yela' mban che' to!i tocanē? <sup>37</sup>Le bi zoa nacle gon beñachen' chixjue' cont gata' yela' mban che' to!i tocanē. <sup>38</sup>Bene' ca' že' na'a bi chesejnilaže' Diosen' na' chesonchgüe' da' xinj. Na' note'teze bene' še cheto'ede' par ye'e lježe' chejnilaže' neda', na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Dios golja' beñach. Yeto'eda' che' cate' yida' da' yoble nsa'a yela' zaca' juisyw che Xa' Diosen' na' nchia' bene' ca' zjanac angl che'.

**9** Lecze gož Jesúsen' legaque': —Da' li žia' le'e, balle nita'le nga na'a bina' gatle cate' žin ža le'ele Diosen' gwlo'e yela' guac xen chen' can' chnabi'en.

**Bša' Jesúsen' ca goque'***(Mt. 17:1-13; Lc. 9:28-36)*

<sup>2</sup>Gwde xop ža, Jesúsen' gwche'e Pedro, Jacobo na' Juan na' ja'aque' to lo ya'a sibe, na' nono nochle ja'ac len legaque'. Na' nite' besele'ede' bža' ca goc Jesúsen'. <sup>3</sup>Xalane' goquen da' šiš xila', gocten ca da' chactite; la' chibcho lache' yežlio nga bi yechojen gaquen šiš xila' catequen' goc xalanen'. <sup>4</sup>Na' concze besele'ede' da' Elías na' da' Moisés chosošalje' len Jesúsen'. <sup>5</sup>Nach Pedron' gože' Jesúsen':

—Maestro, iľeca güenna' zoacho nga! Gonto' šone ranšw, to chio', to che Moisés, na' yeto che Elías.

<sup>6</sup>Le bene' ca' zja'aclen Jesúsen' besežebchgüe', na' Pedroa' bi chacbe'ede' bin' že'. <sup>7</sup>Nach gwche' to bejw gan' niten' gwyechjen legaque', na' lo' bejon' gosende' gwna Diosen':

—Bengan' Xi'ina' bene' chacda'; le gwzenag che'.

<sup>8</sup>Na' cate' gosene'e cue'ej cuiten' notno besele'ede', san toze Jesúsen' zie'.

<sup>9</sup>Na' šlac chesyeyetje' lo ya'an, Jesúsen' gože' legaque' notno yesi'e ca nac dan' besele'eden'. Gože'ne':

—Cate'ch ba bebana' ladjo bene' guat ca', nedan' naca' ben' gwseła' Dios golja' benach, cana' güe'le diža' chen.

<sup>10</sup>Da'nan' gosezoe' šize, nono gose'e ca', perw na' gosenabe lježe' bi zejen dan' gwne' yebane' ladjo bene' guat ca'. <sup>11</sup>Nach gose'e Jesúsen':

—Bene' ca' chososed chosolo'e dan' bzoj da' Moisés chososedde' neto' chesene' zgua'tec da' Elías ben'

gwzoa cani' cheyała' yide' da' yoble cate' za' yedenabia' ben' seła' Diosen'. ěBixchen' chesene' ca'?

<sup>12</sup>Na' boži'e xtižen':

—Da' liczen' zgua'tec Elíasna' yide' na' yeyo'e xneze yogo'loł da' de yežlio nga. ěNezele bin' ža gan' nyoj Xtiža' Diosen' chia' neda' naca' ben' gwseła' Dios golja' benach? Žan saca'zi'a na' bene' zan bi yesejnilaže' neda'. <sup>13</sup>Na' žia' le'e, Elías ba bide' na' gosonde' le' con ca gosacłaže', can' nyoj le'e Xtiža' Diosen' žan can' cheyała' gac che'.

**Jesúsen' beyone' to bi' yo'o nyazbe' da' xigüe'***(Mt. 17:14-21; Lc. 9:37-43)*

<sup>14</sup>Gwdena' besyežine' gan' nita' yezica'chle bene' ca' zjanaque' Jesúsen' txen, na' besele'ede' bene' zan zjanita' zjanyechjde' legaque', na' len bene' ca' chososed chosolo'ede' dan' bzoj da' Moisés chesediľdiže' len legaque'. <sup>15</sup>Na' cate' bene' ca' besele'ede' Jesúsen', yogüe' besyežejde' na' ja'acses'e bosoguape' le' tiox. <sup>16</sup>Nach gwnabde' legaque':

—ěBin' chdiľdiža'le len bene' ca'?

<sup>17</sup>Na' to bene' nchixe bene' ca' boži'e xtižen', gwne':

—Maestro, zedesana' bi' chia' nga, yo'o nyazbe' da' xigüe' na' benen cont bi chac nebe'. <sup>18</sup>Gate'teze chdabe' chzenen lebe' na' chcho'onen lebe' lo yo, na' chbia bžina' cho'abe' na' chagwxej laybe'. Na' ca' zej chedo fuerz chebe'. Na' ba gwnaba' lao bene' qui zjanaque' le' txen yesyebeje' da' xigüe' yo'o nyazbe', perw bitw gosaque'.

<sup>19</sup>Na' Jesúsen' gože' bene' ca' že'na':

—iLe'e be<sub>ne</sub>' bi chejnilaže'!  
 ěŠna chyažjen soalena' le'e cont  
 šejnilaže'le? ěBatca' zelao na'lagua'  
 le'e? Le yedesambe' nga.

<sup>20</sup>Na' jasesane'be', na' cate' da'  
 xigüen' ble'en Jesúsen', benen  
 gwyazbe' šon, na' gwbi<sub>x</sub>be' lo  
 yo, chbi<sub>x</sub> chtolbe' na' chbia bžina'  
 cho'abe'. <sup>21</sup>Nach Jesúsen' gw<sub>n</sub>abde'  
 xaben':

—ěBa<sub>l</sub> iz ba goc chacbe' ca'?

Na' xaben' gwne':

—Cate' nacbe' bida'ote gwzolao  
 chacbe' ca'. <sup>22</sup>Na' zan ni'a da'  
 xigüen' chza<sub>l</sub>an' lebe' lo yi' na' lo  
 nis cont goten lebe'. Da'n<sub>a</sub>n' še guac  
 yeyono'be', beyaše'šque neto' na'  
 beyombe'.

<sup>23</sup>Jesúsen' gože'ne':

—Cheya<sub>l</sub>a' šejnilažo' neda', le yogo'  
 da' chzelaže' be<sub>ne</sub>' chesejnilaže'  
 neda' chaquen.

<sup>24</sup>Nach xaben' gwne' zižje:

—iChejnilaža' le', goclen neda'  
 šejnilaže'cha'!

<sup>25</sup>Na' cate' Jesúsen' ble'ede'  
 chesežagchgua be<sub>ne</sub>', gwdile' da'  
 xigüen' gožen':

—Da' xigüe', le' chono' cont bi' nga  
 bi chenebe' na' bi chac nebe', neda'  
 žia' yechojo'. Bsan bi' nga, na' bich  
 yeyo'o yichjlažda'oben'.

<sup>26</sup>Na' da' xigüen' benen ga  
 bosya'abe' na' benen ga gwyazbe'  
 ca yeto šon, nach bechojen. Na' bin'  
 bega'anbe' ca bi' guat, na' zan be<sub>ne</sub>'  
 gosene' gotben'. <sup>27</sup>Perw Jesúsen'  
 be<sub>x</sub>ue' taca'ben' cont beyasbe', nach  
 gwzechabe'.

<sup>28</sup>Nach cate' Jesúsen' gwyo'e  
 to lo' yo'o, be<sub>ne</sub>' ca' zjanaque' le'  
 txen gosebeje' le' ca to lchojiže' na'  
 gosena<sub>b</sub>de' le':

—ěBix<sub>ch</sub>en' bi goc neto' yebejto' da'  
 xigüen'?

<sup>29</sup>Na' gože'ne':

—Cont yechoj da' xigüen' nac ca'  
 cheya<sub>l</sub>a' gonle gwbas na' soatezle  
 yo<sub>l</sub> giüžle Dios.

**Da' yoble Jesúsen' gwne' gate'**

(Mt. 17:22-23; Lc. 9:43-45)

<sup>30</sup>Cate' besyeya'aque' na', besyedie'  
 distritw Galilea. Na' Jesúsen'  
 goclaže' nono yeseneze, <sup>31</sup>le  
 chzejni'ide' be<sub>ne</sub>' ca' zjanaque' le'  
 txen, che'e lega<sub>q</sub>ue':

—Nedan' naca' ben' gwsela' Dios  
 golja' be<sub>n</sub>ach, yosodie' neda' lo na'  
 be<sub>ne</sub>' yesote'nda', perw yeyon' ža  
 yebana' ladjo be<sub>ne</sub>' guat ca'.

<sup>32</sup>Perw bi gosejni'ide' bin' gože'  
 lega<sub>q</sub>ue', na' besežebe' yesena<sub>b</sub>de'ne'.

**Gosedil<sub>d</sub>iže' gosene' noen' nac be<sub>ne</sub>'  
 blaoch**

(Mt. 18:1-5; Lc. 9:46-48)

<sup>33</sup>Na' besežine' ciuda da' nzi'  
 Capernaum, na' cate' besežine' yo'o  
 gan' zoa Jesúsen' gw<sub>n</sub>abde' lega<sub>q</sub>ue':

—ěBix<sub>ch</sub>en' chdil<sub>d</sub>iža'le chanez?

<sup>34</sup>Perw con gosenite' šižize, le  
 chanezan' gosedi<sub>l</sub>iže' gosene' noen'  
 nac be<sub>ne</sub>' blaoch. <sup>35</sup>Nach Jesúsen'  
 gwchi'e na' goxe' be<sub>ne</sub>' šiži<sub>n</sub>w ca'  
 zjanaque' le' txen, na' gože' lega<sub>q</sub>ue':  
 —Še no le'e chaclaže'le gacle be<sub>ne</sub>'  
 žialao, cheya<sub>l</sub>a' gonle xbab bibi  
 zaca'teclé, na' cheya<sub>l</sub>a' gon cuinle  
 ca xmos yogo' be<sub>ne</sub>' lježle.

<sup>36</sup>Nach be<sub>x</sub>ue' to bidao' na'  
 bzeche'be' gachol' lega<sub>q</sub>ue', na'  
 gwlene'be' na' gože' lega<sub>q</sub>ue':

<sup>37</sup>—Note'teze be<sub>ne</sub>' chone' güen  
 len to bidao' ca bi' nga ne<sub>č</sub>e da'  
 chejnilaže' neda', choncze' güen len

neda'; na' noteze' chon güen len neda', choncze' güen len Dios ben' gwseła' neda'.

**Beñe' bi chon chio' contr, txencza' chone' chio'**

(Mt. 10:42; Lc. 9:49-50)

<sup>38</sup>Nach Juanna' gože'ne':

—Maestro, bežagto' to beñe' cho'e lao' na' chebeje' da' xigüe' da' yo'o nyaz beñe', na' bžonto' gone' ca', le bi chone' chio' txen.

<sup>39</sup>Na' Jesúsen' gwne':

—Bi gwžonle gone' ca', le gague zoa to beñe' gone' yeła' guac cho'e lan', yeyoža' ne' yeła' ya' chia'. <sup>40</sup>Le beñe' bi chone' chio' contr, txencza' chone' chio'. <sup>41</sup>Chnia' le'e to da' zejen, note'teze beñe' gone' le'e la' to xiga'ze nis da' ye'ejle neche chejnilaže' neda' na' neche nezde' le'e nacle txen len neda', Diosen' gone' cont soacze' mbalaz da' ba goclene' le'e.

**Bitw co'yeła'cho beñe' gone' da' xinj**

(Mt. 18:6-9; Lc. 17:1-2)

<sup>42</sup>'Note'teze beñe' chon cont lažo' to beñe' za' gwzolağüe' chejnilaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nisdawn' clcl ca da' gone' cont lažo' beñe' yoble gone' da' xinjen'. <sup>43</sup>Na' še yena'len' chonen cont gonle da' xinj, cheyała' cuejyichjle da' malen' chonle. Yejni'a bibi na'le zoa clcl ca gonle da' xinjen' len len. Na' yejni'a šjayzoale len Diosen' toli tocane bi zoa šla'a taca'le clcl ca yeyejle lo yi' gabil dan' bi cheyol chenit nya' cuerp chelen'. <sup>44</sup>Na' gabilen' neca chesat bzogan', neca cheyol yin'.

<sup>45</sup>Na' še ni'alen' chonen ga gonle da' xinj, lecze cheyała' cuejyichjle da' malen' chonle. Yejni'a bibi ni'alen' zoa clcl ca gonle da' xinjen' len len. Na' yejni'a šjayzoale len Diosen' toli tocane bi zoa šla'a ni'alen', clcl ca yeyejle lo' yi' gabil dan' bi' cheyol chenit nya' cuerp chelen'. <sup>46</sup>Na' gabilen' bzoga' ca' bi chesatba', neca cheyol yin'. <sup>47</sup>Na' še yejlaolen' chonen cont gonle da' xinj, cheyała' cuejyichjle da' malen' chonlen'. Yejni'a bibi yejlaolen' žia clcl ca gonle da' xinjen' len len. Na' yejni'a šjayzoale len Diosen' toli tocane zoa šla'aze yejlaole clcl ca yežinle lo yi' gabilen' žia chop la'a yejlaolen'. <sup>48</sup>Ca nac gabilen', bi chesat bzogan', neca cheyol yin'.

<sup>49</sup>'Le dan' chyi chzaca'le yežlio nga chzejni'in le'e cont bi yeyejle lo yi' gabil. Na' da' chyi chzaca'le zaca'leben ca zede' da' cheyała' chixe' yezj yogo' ni'a cate' chjasesane' yezj lao Diosen'. <sup>50</sup>Na' zeden' naquen güen, perw še bich bi zxi' naquen, žnacxe goncho cont yeyaquen zxi' da' yoble? Na' le'e cheyała' gwyo gwchejlaže'le dan' chyi chzaca'le na' cheyała' soale binlo tole yetole, na' še soale ca', zaca'leble ca to yeła' guagw da' yo'o zede'.

**Jesúsen' bzejni'ide' bi cheyała' yela'acho len no'ol checho**

(Mt. 19:1-12; Lc. 16:18)

**10** Jesúsen' bez'e'e Capernaum na' gwyejche' gan' mbane distritw Judean' na' yešla'a yegw Jordánna'. Na' da' yoble besežag beñe' zan gan' zoen' na' lecze da' yoble bsd blo'ede' legaque' con can'

choncze'. <sup>2</sup>Nach ba<sub>l</sub> bene' fariseo ca' ja'aque' gan' zoa Jesúsen' gosac<sub>l</sub>aže' yesebeje'ne' diža' da' yosoc<sub>h</sub>ine' cont yosožie'ne' xya c<sub>h</sub>ol, na' gosenabde'ne' še guac to bene' yele'e len no'ol che'.

<sup>3</sup>Na' Jesúsen' boži'e xtižen', gwne':

—Ca nac dan' bzoj da' Moisésen', žnac bene' mandadw gon<sub>l</sub>e?

<sup>4</sup>Legaque' gosene':

—Moisésen' gwne' cate' to bene' yele'e len no'ol c<sub>h</sub>en' cheya<sub>l</sub>a' c<sub>h</sub>as to yiš da' gwnežjue' no'ol c<sub>h</sub>e' ga güe'en diža' besyele'ena'.

<sup>5</sup>Nach Jesúsen' gože' legaque':

—Moisésen' gwne' gac gon<sub>l</sub>e ca' lagüe dan' nacle bene' güedenag len Diosen'. <sup>6</sup>Perw cate' gwxe yežlion', cate' bxe Diosen' yogo' da' de, bi goquen ca'. Le nyojen žan: “Bene' legaque', to bene' byo na' to no'ole.”

<sup>7</sup>“Da'nan' bene' byon' gwsane' xax<sub>n</sub>e'e cont soalene' no'ol c<sub>h</sub>en',

<sup>8</sup>na' chope' yesaque' ca toz bene'.” Na' ca' bich yesac c<sub>h</sub>ope' san toze'.

<sup>9</sup>Da'nan' bi cheya<sub>l</sub>a' yesyele'e, <sub>l</sub>e Diosen' ba bcode' legaque'.

<sup>10</sup>Cate' besyežine' yo'o, bene' ca' zjanaque' <sub>l</sub>e' txen da' yoble gosenabde'ne' bi zejen dan' ba gwne'.

<sup>11</sup>Na' Jesúsen' gože' legaque':

—Note'teze bene' chele'e len no'ol c<sub>h</sub>e' na' cheque'e no'ol yoble, chone' da' xin<sub>j</sub>, <sub>l</sub>e toz ca naquen šaca' gata'lene' no'ol c<sub>h</sub>e bene' yoble.

<sup>12</sup>Na' še no'olen' c<sub>h</sub>sane' bene' c<sub>h</sub>en' na' cheque'e bene' yoble, <sub>l</sub>ecze toz can' nac da' xin<sub>j</sub> da' chonen'.

**Jesúsen' gw<sub>n</sub>abde' Diosen' gac güen che bidao' ca' besežag**

(Mt. 19:13-15; Lc. 18:15-17)

<sup>13</sup>Nach jasesane' bi' bixjw lao Jesúsen' cont xoa ne'e yichjgacbe',

perw bene' ca' zjanaque' <sub>l</sub>e' txen gosedi<sub>l</sub>e' bene' ca' zjanč<sub>h</sub>e'ebe'. <sup>14</sup>Na' cate' ble'e Jesúsen' can' gosonen' na' bže'e legaque' na' gože'ne':

—Le güe' latje yesid bidao' ca' lagua' nga na' bi gwžon<sub>l</sub>e, <sub>l</sub>e bene' ca' zjanac ca bidao' quinga, legaque' chosozenague' c<sub>h</sub>e Diosen' cont c<sub>h</sub>nabi'e yichjlažda'ogaque'. <sup>15</sup>Da' <sub>l</sub>i žia' le'e, note'teze bene' cheya<sub>l</sub>a' yosozenague' c<sub>h</sub>e Diosen' ca cheson bidao' cate' chosozenagbe' c<sub>h</sub>e xax<sub>n</sub>a'be', <sub>l</sub>e bene' bi yosozenague' ca', gwbat nabia' Diosen' yichjlažda'ogaque'.

<sup>16</sup>Nach gw<sub>l</sub>ene' to to bidao' ca' na' gw<sub>n</sub>abde' Diosen' gac güen c<sub>h</sub>ebe', gw<sub>x</sub>oa taquen' yichjbe'.

**To bene' güego' bšaljlene' Jesúsen'**

(Mt. 19:16-30; Lc. 18:18-30)

<sup>17</sup>Cate' Jesúsen' gwze'e ngüe'e nez, c<sub>h</sub>xon<sub>j</sub>ses to bene' jazoa xibe' lagüen' na' gw<sub>n</sub>abde'ne':

—Maestro, le' naco' bene' güen. žBi cheya<sub>l</sub>a' gona' cont gata' yela' mban c<sub>h</sub>ia' to<sub>l</sub>i tocan<sub>e</sub>'?

<sup>18</sup>Jesúsen' gože'ne':

—žBixc<sub>h</sub>en' žo' naca' bene' güen? Toze bene' güen zoa, na' <sub>l</sub>en' Dios.

<sup>19</sup>Le' nezd<sub>o</sub>' da' none' mandadw goncho: “Bi gata'len<sub>l</sub>e no'ol bi nac no'ol c<sub>h</sub>ele o bene' byo bene' bi nac bene' chele; nono gotle; bi cuan<sub>l</sub>e; bi güe'le diža' güenlaže' c<sub>h</sub>e bene' <sub>l</sub>ježle; bi siye'le bene'; <sub>l</sub>e gap bala'an xax<sub>n</sub>a'le.”

<sup>20</sup>Na' boži'e xtižen':

—Maestro, yogo' da' quinga c<sub>h</sub>zenaga', gwzolagua' chonczan' cate' ne' nactia' bidao'.

<sup>21</sup>Jesúsen' gw<sub>n</sub>e'e bene' güegon' na' chacde' <sub>l</sub>e', na' gože'ne':



—Zoa to da' ne' chyažjen gono': šjayeto' yogo' da' de chio' na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen' da' zaca'ch gata' chio'. Na' še ba beyož beno' can' žia' le', nach yo'o gaco' neda' txen la' saca'zi'o.

<sup>22</sup>Na' cate' bene ben' dan' gwna Jesús'en', godce' leca zdebe naquen gone' can' gože'ne', na' beza'yaše', le bene' gwni'achgua goque'.

<sup>23</sup>Nach Jesús'en' gwne'e do cue'ej cuite' na' gože' bene' ca' zjanaque' le' txen:

—Leca zdeb naquen to bene' gwni'a gwzenague' che Diosen' cont Diosen' nabi'e yichjlažda'ogüe'.

<sup>24</sup>Na' bene' ca' zjanaque' le' txen besyebande' can' gwnen', perw Jesús'en' goze'e legaque':

—Xi'ina', bene' chesacde' zaca'chgua yla' gwni'a chegaquen', leca zdebe naquen yosozenague' che Diosen' cont nabi'e yichjlažda'ogaquen'. <sup>25</sup>Bedao'ch te to be xen be nzi' camello to lo' nag yeše' cled ca to bene' gwni'a gwzenague' che Dios cont Diosen' nabi'e yichjlažda'ogüe'.

<sup>26</sup>Cate' gosende' dan' gwne', leca besyebande' na' gose' lježe':

—¿Noxen' šjayzoa len Diosen' še ca'?

<sup>27</sup>Jesús'en' gwne'e legaque' na' gože'ne':

—Bibi de da' gac yeson benachen' cont šjasyenite' len Diosen', perw Diosen' guac gonen'; le bi zoa da' nacho da' bi gac gon Dios.

<sup>28</sup>Nach Pedron' gože'ne':

—Neto' ba gwlejyichjto' yogo' da' de cheto' cont nacto' le' txen.

<sup>29</sup>Jesús'en' boži'e xtižen':

—Da' li žia' le', note'teze bene' ba gwlejyichje' liže', bene' biše', zane', xe', xne'e, no'ol che', xi'ine', o yežlio che' ne chia' neda' na' neche chzenague' xtižan', <sup>30</sup>yežlio nga yonežjo Diosen' le' to gayoa ca'te'le, yo'o, biše', zane', xne'e, xi'ine' na' yežlio, la'czla' yesebe'na'ogüe' le'. Na' cate' yežine' yaban' gata' yla' mban' che' tolí tocane'. <sup>31</sup>Perw zan bene' zjanaque' bene' žialao na'a, gwžin ža cate' yesaque' bene' bzebe; na' bene' zjanaque' bene' bzebe na'a, gwžin ža cate' yesaque' bene' žialao.

**Da' yoble Jesús'en' gwne' yesote'ne'**

(Mt. 20:17-19; Lc. 18:31-34)

<sup>32</sup>Zjangüe'e nez zja'aque' bso dan' zoa gala'ze Jerusalenna' na' Jesús'en' žialagüe' lao bene' ca' zjanaque' le' txen. Le legaque' chesyebande' na' do chesežebze' zjana'ogüe' le'. Nach da' yoble Jesús'en' goxe' bene' šižinw ca' ca'ale ga nac lchojiže' na' gože' legaque' can' gac chen'. <sup>33</sup>Gože'ne':

—Na'a ba zejcho Jerusalén gan' yesone' neda' lo na' bxož gwnabia' ca' na' lo na' bene' ca' chososed chosolo'ede' dan' bzoj da' Moisés, na' yesechoglagüen' chia' yesote' neda' na' yesone'nda' lo na' bene' bi zjanaque' bene' Israel, nedan' naca' ben' gwsel'a' Dios golja' benach'. <sup>34</sup>Yesezi'diže' neda', yesot yeseyine' neda', gosoži'enda' xene', na' yesote' neda', perw yeyon ža yebana' ladjo bene' guat ca'.

**Jacobo na' Juan gosenabe' to goclen lao Jesús'en'**

(Mt. 20:20-28)

<sup>35</sup>Nach Jacobo len Juan, bene' ca' zjanac xi'in Zebedeo, gosebigue' cuit Jesús'en' na' gose'ene':



—Maestro, chaclaže'to' gono' to  
goclen da' nabto'.

<sup>36</sup>Na' gwṇabe Jesúsen' legaque':

—¿Bi che'nele gona'?

<sup>37</sup>Na' gose'ene':

—Ben cont cue'to' šla'a güeje  
cuito'na' cate' solao nabi'o.

<sup>38</sup>Nach Jesúsen' gože'ne':

—Le'e cabi nezele bi dan' chṇable.  
¿Gwčhejlaže'le tele yela' zi' yela' ya'  
ca dan' tia' neda' na' gac čhele can'  
gac čhia'?

<sup>39</sup>Legaque' gose'ene':

—Gwčhejlaže'to'.

Na' Jesúsen' gože' legaque':

—Da' licze tele yela' zi' yela' ya' ca  
dan' tia' neda' na' gac čhele can' gac  
čhian'. <sup>40</sup>Perw bi naquen lo' na' nia'  
non' cue' cuitan' cate' žin ža nabi'a,  
san yesebe' bene' ba mbej Diosen'  
gaquen čhe'.

<sup>41</sup>Cate' yeši bene' ca' zjanaque'  
le' txen gosende' xtiža'gaquen',  
beseloque' Jacobon' na' Juanna'.

<sup>42</sup>Perw Jesúsen' goxe' yogüe'  
cont gosebigue' laogüen' na' gože'  
legaque':

—Nezeczele bene' zjambeje' cont  
chesenabi'e to to nación na' bene'  
blao ca' chesone' byen chosozenag  
bene' čhegaque'. <sup>43</sup>Perw bi  
naquen ca' len le'e. San note'tezle  
chaclaže'le gacle bene' blao,  
cheyala' gwzexjwlaže'le gaclenle  
bene' lježle. <sup>44</sup>Na' note'tezle  
chaclaže'le gacle bene' žialao,  
cheyala' gon cuinle ca xmos yogo'  
bene' lježle. <sup>45</sup>Le lencze neda',  
gwseła' Diosen' neda' golja' benach,  
gague za'a cont yesaclen bene'  
neda', san za'a cont gaclena' bene',  
na' gwnežjw cuina' yesote' neda'  
neče xtola' benachen'.

**Jesúsen' beyone' to bene' lchol ben'  
gože' Bartimeo**

(Mt. 20:29-34; Lc. 18:35-43)

<sup>46</sup>Nach besežine' Jericó. Na' cate'  
Jesúsen' ba beze'e ciudan' len bene'  
ca' zjanaque' le' txen na' len yezanch  
bene', do cho'a ciudan' chi' to bene'  
lchol chanez chṇabe' yosonežjo  
bene' le' con gaca' da' chesezande'.  
Bena' le' Bartimeo na' naque' xi'in to  
bene' le' Timeo. <sup>47</sup>Na' bene' lchola'  
cate' gocbe'ede' gwde Jesús bene'  
Nazaret gan' čhi'ena', gwzologüe'  
gwne' zižje gwne':

—iJesús, xi'in diaža čhe da' rey  
David, beyaše'laže'sca neda'!

<sup>48</sup>Bene' zan gosedi'e le' cont bich  
yosye'e, perw bosya'adiache' gwne':  
—iXi'in diaža čhe da' rey David,  
beyaše'laže'sca neda'!

<sup>49</sup>Nach Jesúsen' gwleze' na' gwne':  
—Le gaxe'.

Nach gosaxe' bene' lchola' na'  
gose'ene':

—Benčachlažo', gwzoža', le chaxe'  
le'.

<sup>50</sup>Nach gwcho'one' lache' da' nṇoa  
cože' na' bxite' jabigue' lao Jesúsen'.

<sup>51</sup>Nach Jesúsen' gwṇabde' le':

—¿Bi chaclažo' gonda' le'?

Bene' lchola' boži'e xtižen':

—Maestro, che'nda' yele'eda'.

<sup>52</sup>Nach Jesúsen' gože'ne':

—Guac yeyejo'. Dan' chejnilažo'  
neda' ba beyac yejlagon'.

Na' la' bele'ete bene' lchola', na'  
gwda'ogüe' Jesúsen'.

**Jesúsen' gwyo'e ciuda Jerusalén**

(Mt. 21:1-11; Lc. 19:28-40; Jn. 12:12-19)

**11** Cate' ba zoa yesežine'  
Jerusalén, besežine' gan'

zjachi' yež dan' zjanzi' Betfagé na' Betania na' gan' zoa ya'a da' nzi' Ya'a Olivos. Na' Jesúsen' gwsele' chop bene' ca' zjanaque' le' txen mandadw, <sup>2</sup>gožgaque'ne':

—Le šja'ac yež dan' chi' gála'ze, na' cate' žinlen' na' yeželele to burr dao' da'ba' yag be nono na' cuia. Le sežba' na' le che'ba' nga. <sup>3</sup>Na' še no chnab bičen' chonle ca', le ye'e: “Xanto' chyažjde'ba'”, na' la' gwzantecze'ba'.

<sup>4</sup>Nach gosa'aque', na' besele'ede' burron' da'ba' yag to cho'a yo'o cuit ga xoa to nez, na' goseseže'ba'.

<sup>5</sup>Na' bał bene' ca' nita' na' gose'ene':

—¿Bixen' chonle? ¿Bixčen' chsežle burron'?

<sup>6</sup>Nach bosyoži'e xtižen' can' gož Jesúsen' legaque', na' goso'e latje goseseže'ba' cont goseche'eba'.

<sup>7</sup>Nach goseche'e burron' lao Jesúsen' na' gosexoa xagaque' cože'ban' na' gwžia Jesúsen' leba'. <sup>8</sup>Na' bene' zan gosonxene' Jesúsen' goseyixjw no xagaque' lo nez cont blej burron' len na' yebałe' gosechogue' xoze' yag na' goseyixjuen' lo neza'.

<sup>9</sup>Bene' zjažialao na' lecze bene' za'ac cože' gosezologüe' bososye'e, gosene':

—iLeca zaca'chgua benga! iMbalaz ben' za' nga nseła' Xancho Diosen' le' cont nabi'e! <sup>10</sup>iMbalaz yela' gwnabia' che' da' nse'e, le' nabi'e ca da' xozxta'ocho David! iLeca zaca'chgua Dios ben' zoa yaban'!

<sup>11</sup>Can' goc, Jesúsen' gwyo'e Jerusalén, na' lecze gwyo'e chy'o che yodao' blaon'. Na' beyož gwne'e yogo'lol da' de na', beyeje' Betania

len bene' šižinw ca' ba gwleje' cont zjanaque' le' txen, le ba zoa gał.

**Jesúsen' gwne' gacxi'a yag yixgüigw da' bibi žia**

(Mt. 21:18-19)

<sup>12</sup>Beyečj ža cate' besyeya'aque' Betania, Jesúsen' gwdone'. <sup>13</sup>Na' zito' ble'ede' to yag yixgüigw da' žia lağa', na' jan'e'e še žia yaguen' yixgüigw, na' bibi bželde', san lağa'ze ca' da' žian, le gague canan' chesebia yixgüigon'. <sup>14</sup>Nach Jesúsen' boł güiže' yag yixgüigon', gožen':

—Noch no gagw da' chbio' le'.

Na' bene' ca' zjanaque' le' txen gosende' can' gwnen'.

**Jesúsen bešaše' bene' ca' cheson ya'a chy'o yodaon'**

(Mt. 21:12-17; Lc. 19:45-48; Jn. 2:13-22)

<sup>15</sup>Gwdena' besežine' Jerusalén. Na' cate' gwyo'o Jesúsen' chy'o yodao' blaon', gwzologüe' bešaše' bene' ca' chesote' na' bene' chesa' na'. Na' bchiže' xmes bene' ca' chosoša' mechw na' yag ga chesebe' bene' ca' chesote' ngolbex. <sup>16</sup>Na' bi be'e latje yesexoa xnez bene' zjanoa' yoa' chy'o yodaon'. <sup>17</sup>Na' bsed blo'ede' bene' ca' že' na', gože'ne':

—Nyojcze Xtiža' Diosen' žan:

“Yesene' ližan' naquen latje gan' šja'ac bene' yogo' nación yosol güiže'nda'”, perw le'e ba benlen ca to latje ga že' bene' gwban.

<sup>18</sup>Na' bxož gwnabia' ca' na' bene' ca' chososed chosolo'e dan' bzoj da' Moisés gosende' can' gwnen', na' goseyiljwlaže' nacle yesone' yesote'ne'. Ba chesežebe' Jesúsen', le yogo' bene' besyežejde' can'

bsed blo'eden'. <sup>19</sup>Perw na' cate' gol,  
Jesúsen beze'e ciudan'.

**Gwbiž yag yixgüigon'**

(Mt. 21:20-22)

<sup>20</sup>Beyečj ža šezil, gosodie' na'  
besele'ede' yag yixgüigon' ba  
gwbižen lente loen. <sup>21</sup>Nach Pedron'  
jayze'ede' na' gože' Jesúsen':

—Maestro, gwna' yag yixgüigw  
dan' gwnao' gacxi'an, ba gwbižen.

<sup>22</sup>Jesúsen' boži'e xtižen':

—Le šejnilaže' Dios. <sup>23</sup>Da' li žia'  
le'e, note'teze bene' ye'e ya'a nga:  
“Gwcuase nga na' jayzoa lo' nisdao’”,  
še bi chacžejlaže' lo' yichjlažda'ogüe',  
san chejnilaže' Diosen', guacczen.

<sup>24</sup>Da'nana' žia' le'e, yogo'te da'  
nable cate' choj güižle Dios, le  
šejle' gwaqueczen, na' le gacczen.

<sup>25</sup>Na' cate' choj güižle Dios, še zoa  
da' chac chele len bene' yoble, le  
yezi'xen che', cont lecze ca' Xacho  
Dios ben' zoa yaba yezi'xene' che  
xtola'le. <sup>26</sup>Perw še le'e bi yezi'xenle  
che bene', Xacho Dios bene' zoa  
yaba bi yezi'xene' che xtolala'le.

**Yela' gwnabia' che Jesúsén'**

(Mt. 21:23-27; Lc. 20:1-8)

<sup>27</sup>Nach ja'aque' Jerusalén da'  
yoble, na' šlac chda Jesúsén' chyo'o  
yodao' blaon' jasebiga' bžoz gwnabia'  
ca' na' bene' ca' chososed chosolo'e  
dan' bzoj da' Moisés na' len bene'  
gole blao' ca' chesenabi'e naciónna'.

<sup>28</sup>Na' gosenabde' le':

—¿Bi yela' gwnabia' napo' chono'  
da' qui? ¿No ben yela' gwnabian'  
cont chonon'?

<sup>29</sup>Jesúsen' boži'e xtižen', gwne':

—Leze de to da' nabda' le'e na' še  
yoži'ile xtižan', nach nia' le'e bi yela'

gwnabia' chonlendan'. <sup>30</sup>¿No gwseła'  
da' Juanna' bzo'e bene' nis? ¿Dios  
nan' gwsele'ne' še benachen'? Le  
yoži'i xtižan'.

<sup>31</sup>Nach legacze' gose' lježe':

—Še ye'chone' Dios gwsele' le', na'  
ye'e chio': “¿Bixchen' ca gwyejle'le  
che'?” <sup>32</sup>Bi gac ye'chone' benach  
gwseła' le'.

Gosene' ca' da' besežebe', le  
yogo'te bene' že' na' gosejle'e Diosen'  
gwsele' da' Juanna' be'e xtiže'na'.

<sup>33</sup>Nach gose'e Jesúsén':

—Bi nezeto'.

Nach Jesúsén' gože' legaque':

—Lecze neda' bi yapa' le'e bi yela'  
gwnabian' chonlenda' da' ca'.

**Jempl che bene' güen žin ben'**

**gosaque' bene' mal**

(Mt. 21:33-46; Lc. 20:9-19)

**12** Nach Jesúsén' gwzola'güe'  
choe'lene' legaque' diža'  
chzoe' jempl, na' gože' legaque':

—Gwzoa to bene' goze' to cue'  
xen yag uvas na' gwlo'en le'ej. Na'  
bene' to ga yesesie' uvasen' cont  
choj xisen', na' bene' yeto da' sibe  
ca to campanario ga yesecua' bene'  
yosogüia yesene'e yag ca'.

'Nach bcua'ane' yežlion' lo na'  
bene' yesonšie' yag uvasen', na'  
gwze'e gwyeje' zito'. <sup>2</sup>Na' cate' bžin  
ža yosyotobe' cosešen', gwsele' to  
xmose' lao bene' ca' nac lo na'gaque'  
yag uvasen' cont yosonežjue'ne' to  
tlacw coseš dan' yesyezi'en. <sup>3</sup>Perw  
na' bene' ca' gosezene' mosen'  
gosot goseyine'ne', na' to ga'alze'  
bosyose'ene' bibi gosone'ne'. <sup>4</sup>Nach  
xan yežlion' da' yoble gwsele' yeto  
xmose'; perw benga bosozie'ne' yej,  
gosone' güe' yichje' na' gosonde' le'

zgot. <sup>5</sup>Nach xan yežlion' gwsela'che' yetoe', na' benga gosottecze'ne'. Gwdena' gwsela'che' bene' zan, na' bale' gosot goseyine' le' na' yebale' gosottecze'ne'.

<sup>6</sup>Ne' zoa yeto bene' bina' sele', bena' xi'ine' bene' chacchgüede', na' zebte gwsele' le', le bene' xbab: "Yesezi'e xtižen." <sup>7</sup>Perw bene' ca' gose' lježe': "Bengan' yega'anlene' yežlio nga cate' gat xen'. Le da gotchone' cont yega'anlenchon."

<sup>8</sup>Na' gosezene'ne', gosote'ne', na' besyebje' cuerp chen' gan' že' yag ca', bosozalen' ga yoble.

<sup>9</sup>Nach Jesús'en' gwnabe': —¿Bi chaquele? ¿Nacxe gon xan yežlion' len bene' ca' bocua'anlene' yag uvas chen'? Šeje' šjetoe' legaque', na' yodie' yežlion' lo na' bene' yoble.

<sup>10</sup>¿Bina' gwlable ga nyoj Xtiža' Diosen'? žan quinga: Yej dan' bi gosaclačže' bene' güen yo'o ca' yosočhine', len ba naquen yej squin.

<sup>11</sup>Da' nga ben Xancho Dios, na' naquen to da' yežejecho.

<sup>12</sup>Nach gosaclačže' yesezene' Jesús'en', le gosacbe'ede' be'e jemplna' neche dan' bi chesejnilaže' le'. Perw besežebe' še bi yesone bene' ca' nžaguen' legaque', da'n'an' bosocua'ane'ne' na' besyeya'aque'.

### Ca nac che dan' cheyala' gaxjw

(Mt. 22:15-22; Lc. 20:20-26)

<sup>13</sup>Gwdena' gosesele' bal' bene' fariseo na' bal' bene' ca' goseda' Herodes cont yesebeje' Jesús'en' diža' da' yosode'ede' cont yesagüe' xya che'. <sup>14</sup>Bene' ca' ja'aque' na' gose'ene':

—Maestro, nezeto' zoatezo' cho'o diža' li na' bi chono' cuent bi

ža bene', le toze can' chono' len note'teze bene'. Na' nezeto' diža' li cho'o chsed chlo'edo' bene' can' chazlaže' Diosen' goncho. Da'n'an' zedenabeto' le' žnaquen binlo no čhixjo da' cheyala' čhixjo che ben' nac la'zelagüe bene' gwnabia' ben' chi' Roma? ¿Gwdixjwton', še bi čhixjwton'?

<sup>15</sup>Jesús'en' gocbe'ede' gague do lažen' chese'ene' ca', san chesačlačže' yesonlede' le' len xtiža'gaquen', nach gože'ne':

—¿Bixchen' chačlačže'le yoslažo'le neda' len xtižan'? Le gon' neda' to mechw cont na'an.

<sup>16</sup>Na' goso'enen', na' cate' ble'eden' na' Jesús'en' gwnabde' legaque': —¿No lao dan' da' le'e mechw nga' na' žno la dan' nyoj le'en ni?

Nach bosoyoži'en gose'ene': —Čhe César ben' nac la'zelagüe bene' gwnabian' ben' chi' ciuda Roman'.

<sup>17</sup>Nach Jesús'en' gože'ne': —Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

Na' besyebande' can' boži'e xtižen'.

### Gosenabde' le' bi zejen dan' yesyeban bene' guat ca'

(Mt. 22:23-33; Lc. 20:27-40)

<sup>18</sup>Nach besežin bal' bene' saduceos gan' zoa Jesús'en'. Bene' ca' chesene' bene' guaten' bich yesyebane'. Nach gosenabde' le', gose'ene':

<sup>19</sup>—Maestro, da' Moisés'en' bzoje' can' cheyala' goncho, gwne' še to bene' byo gate' na' chzeb no'ol čhen' perw na' nono bi' güezeb chga'an, na' bene' biše' ben' ba got cheyala' yošagna'lene' no'ol güezeba'

cont yesenita' xi'inq diaža che da' bišen'. <sup>20</sup>Gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. <sup>21</sup>Na' bene' gwchopa' bošagna'lene' no'ol güezeba', na' lecze gote' nono xi'ine' gwnita'. Lecze ca' goc len bene' gwyona'. <sup>22</sup>Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. Gwde gosat yogo'loł bene' ca', ca' beyožen got len no'ola'. <sup>23</sup>Gož neto', cate' yesyebane' ladjo bene' guat ca' žnox bene' ca' soalene' no'ola' ca' xo'ole'? le yogo' bene' gaža' bosošagna'lene' le'.

<sup>24</sup>Nach Jesúsen' boži'e xtižen', gwne':

—Clelen' chonle xbab dan' žale ca', le bi nezele can' ža Xtiža' Dios da' nyojen, neca nombia'le yela' guac chen'. <sup>25</sup>Cate' yesyeban bene' guat ca' bich yosošagna' bene', neca yosonežjo xi'ine' no'ol gwšagne'e, le yesaque' ca' angl bene' zjazoa yaba. <sup>26</sup>Na' ca' nac dan' yesyeban bene' guat ca', žbina' gwlable gan' bzoj da' Moisés, can' gož Diosen' le' caten' boł güižne' to lo yag yeše' dao' da' chey? Gože'ne': "Neda' naca' Dios ben' chonxen Abraham, ben' chonxen Isaac, na' ben' chonxen Jacob." <sup>27</sup>Bene' guat ca' bi chesonxene' Diosen', san bene' zjamban. Na' ca' nac le'e, leca clelen' chonle xbab.

**Da' nac da' žialao da' cheyała' goncho**

(Mt. 22:34-40)

<sup>28</sup>Leze bžin to bene' bsed blo'ede' ley dan' bzoj da' Moisés, bene' bende' caten' chesežeše' len Jesúsen', na' nezde' boži'icze Jesúsen'

xtiža'gaquen' binlo. Na' bena' gwñabde'ne':

—žNon' nacch da' žialao da' zjanyojen da' ža Diosen' cheyała' goncho?

<sup>29</sup>Jesúsen' boži'e xtižen' gože'ne':

—Da' nga nacch da' žialao lao yogo'lołen, žan: "Le gwzenag bene' Israel gualaž chia', toze Xancho Dios naque' bene' zaca' gonxenko. <sup>30</sup>Da'nan' cheyała' gaquecho Xancho Diosen' con ca' zelao chejni'icho, do yichj do laže'cho, do fuerz valor checho." Lenña' naquen da' žialao lagüe da' ca' ža Diosen' cheyała' goncho. <sup>31</sup>Na' da' gwchopen' zejgałan' ca', gan' žan: "Cheyała' gague lježcho ca' chaque cuincho." Bich bi de da' že' cheyała' goncho da' zaca'ch ca' da' qui.

<sup>32</sup>Nach ben' chsed chlo'e dan' bzoj da' Moisésen' gwne':

—Ca'yanen' naquen, Maestro. Da' licze can' gwnaon'. Toze Xancho Dios zaque' gonxenchone', na' noch no' zoa bene' zaca'ch ca' le'. <sup>33</sup>Na' še gaguecho Dios, con ca' zelao chejni'icho, do yichj do laže'cho, do fuerz valor checho, na' gague lježcho ca' chaque cuincho, lenña' zaca'chen ca' yogo' da' choncho chotcho no' beyixe' na' chzeychoba' chonxenko Diosen'.

<sup>34</sup>Nach cate' gocbe'e Jesúsen' boži'icze xtižen' to licha, gože'ne':

—Gague da' xen chyažjen cont nabdo' Diosen' nabi'e yichjlažda'oguoñ.

Na' ne yetoe' bich beseyaxjde' bichle yesenabde' Jesúsen'.

**Criston' naque' xi'inq diaža che da' rey David**

(Mt. 22:41-46; Lc. 20:41-44)

<sup>35</sup>Jesúsen' bsed blo'ede' chy'o yodaon', gwne':

—¿Nacxe<sub>ch</sub>en' bene' ca' chososed chosolo'e dan' bzoj da' Moisés chesene' Criston' ben' gwlej Diosen' cont yedenabi'e naque xi'in diaža che da' rey David? <sup>36</sup>Cuin Daviden' gwne' can' blo'e S<sub>pir</sub>itw che Diosen' le':

Xancho Dios gože' Xanan':  
“Gwche'edo' cuita' nga nabi'acho txen,

na' gona' cont yogo' no chesegue'e le' yosozexjw yichje' yosozenague' chio.”

<sup>37</sup>¿Nacxe gac nacho Criston' naque' xi'in diaža che da' David? le' cuin Davin' gože' le': “Xana”.

Na' zjanyanchgua bene' ca' chosozenag xtižen', na' besyebede' xtižen'.

**Jesúsen' bcuiše' bene' ca' chososed chosolo'e ley dan' bzoj Moisés**

(Mt. 23:1-36; Lc. 11:37-54; 20:45-47)

<sup>38</sup>Jesúsen' caten' chsed chlo'ede' legaque' gwne':

—Le gwsaca' cont bi gonle can' cheson bene' ca' chososed chosolo'e dan' bzoj da' Moisés, le chesyebede' chesaše' zjanyaze' lache' ton, na' chesyebede' chesap bene' legaque' bala'an cate' chesyěžague' lagüe ya'a. <sup>39</sup>Chesyebede' cheseb'e gan' chesebe' bene' blao cate' chja'aque' yodao' na' cate' chac lni. <sup>40</sup>Legaque' cheseque'e yo'o che no'ol güezeb ca', na' cate' chosol güiže' Dios, sša cheso'e diža' cont yesaque bene' leca chesonxene' Diosen'. Bene' can' yesacche' castigw clal ca' yezica'chle bene' güen da' xinj.

**To no'ol güezebe be'e Diosen' xmechue'**

(Lc. 21:1-4)

<sup>41</sup>Na' šlac zoa Jesúsen' chy'o yodaon', gwchi'e gała'ze gan' xoa caj

gan' chesegüe'e mechw che yodaon', na' chne'e can' chesego'o bene' mechw. Na' zan bene' gwñi'a ca' chesegüe'e da' zcha'o mechw. <sup>42</sup>Ca' chac, cate' bžin to no'ol güezebe bene' yaše', gwlo'e chop mechw dao' da' bibi zaca'tec. <sup>43</sup>Nach Jesúsen' goxe' bene' ca' zjanaque' le' txen na' gože'ne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch len Diosen' clal ca' yogo' bene' ca' chesego'o mechw lo' cajen', <sup>44</sup>le' yogo' legaque' chesegüe'e da' checho'onen lo' yela' gwñi'a chegaquen', perw no'ol nga, lo' yela' yaše' yela' zi' che' gwlo'e yogo' da' de che' da' chacbanlende'.

**Jesúsen' gwne' gwžin ža yosyočinje' yodao' blaon'**

(Mt. 24:1-2; Lc. 21:5-6)

**13** Cate' cheza' Jesúsen' yodao' blaon' to bene' ca' zjanaque' le' txen gože'ne':

—iMaestro, gwñašc catec xdan zjanac yej qui na' yo'o qui!

<sup>2</sup>Na' Jesúsen' boži'e xtižen', gože'ne':  
—Ca' nac yo'o xen qui chle'echo, žin ža cate' ne' to yej da' zjancua' nga ca' yega'an zjancua' cože' lježen. Yogon' yosyočinje'.

**Can' gac cate' ba zoa yeyož yežlion'**

(Mt. 24:3-28; Lc. 21:7-24; 17:22-24)

<sup>3</sup>Nach ja'aque' Ya'a Olivos gan' nla' yodao' blaon'. Na' cate' ba chi' Jesúsen' lo' ya'an len Pedro na' Jacobo, na' Juan na' Andrés, bene' ca' zjanaque' le' txen, legaque' gos'ene' šižize:

<sup>4</sup>—Che'neto' nao' neto' batcan' gac da' ca'. ¿Nac gac nezeto' cate' ba zoa gac yogo' da' ca'?

<sup>5</sup>Jesúsen' boži'e xtižen', gwne':  
—Le gwsaca' cont nono siye'  
le'e. <sup>6</sup>Le bene' zan yesaš yežlio  
nga yesaclaže' yosolane' xlatja'  
nga, yesene': "Nedan' naca' Cristo  
ben' gwlej Diosen' cont nabi'e." Na'  
yeseziye'e bene' zan.

<sup>7</sup>Na' cate' yenele chac gwdile  
nile nale, o yenele guac gwdile, bi  
žeble, le can' cheyala' gac. Perw  
gague lenna' nacho ba bžin ža  
yeyož yežlion'. <sup>8</sup>Le yesedił to yež  
len yeto yež yoble na' to nación len  
yeto nación yoble, na' zan cuen ga  
xo'chgua lo yežlion', na' gata' gwbin  
na' yesebec bene' žaš. Na' da' qui  
gac cate' za' solao gata' yela' zi'.

<sup>9</sup>Na' le gwsaca' can' gonle, le  
yesone' le'e lo na' bene' gwnabia' ca'  
cont yesot yeseyine' le'e lo' yodao'  
čhegaquen', na' dan' chejnilaže'le  
neda' nita' bene' yeseče'exoxje'  
le'e no lao rey no lao nochle bene'  
gwnabia', na' can' güe'lenle legaque'  
xtižan'. <sup>10</sup>Le za' te che yežlion', xtiža'  
Diosen' cheyala' gas laljen doxen  
yežlion'. <sup>11</sup>Na' cate' yesezene' le'e  
na' yeseče'e le'e lao bene' gwnabia'  
ca', bi cuec yichjle nac yoži'ile  
xtiža'gaquen', neca gonlen xbab. San  
le na con da' ye' Diosen' le'e nale lo  
hor na'teze, le gague le'eczen' nele,  
san Spiritw che Diosen' gonen ga  
nale bin' cheyala' nale. <sup>12</sup>Cana' bal  
benach yesechje' yesone' bene' biše'  
golje' lo na' bene' yesot legaque',  
na' nita' bene' yesone' xi'ingaque'  
lo na' bene' yesot legacbe', na' nita'  
bene' yesone xaxne'e lo na' bene'  
yesot legaque'. <sup>13</sup>Yogo'ze bene'  
yeseque'ede' le'e dan' chejnilaže'le  
neda', perw note'tez le'e gwyo  
gwchejlaže'le cont bi cuejyichjle

dan' chejnilaže'le neda' žin žate  
gatle, nach šjayzoale len Diosen'.

<sup>14</sup>Da' Daniel ben' gwduxjue'ede'  
xtiza' Dios bzoje' che da' zbanchgua  
da' gwxiñjen latje gan' chonxencho  
Diosen'. Na' cate' le'e le'ele ba zoa  
dan' gan' bi cheyala' soan, cana'  
bene' yesenita' distritw Judea  
cheyala' yosoxonje' šja'aque' do  
ya'adao'. (Bene' gwlaben' cheyala'  
šejni'iden'.) <sup>15</sup>Na' bene' chda do  
yichjo' che liže' žana', bi yeyetje'  
yotobe' xšinłaze' ca' že' ližen',  
con yoxonje'. <sup>16</sup>Na' bene' chda  
yixe' bi yeyej liže' šjayxi' xalane'.  
<sup>17</sup>iNyāše'chguaze zjanac no'ol  
ca' zjanoa' xi'in, na' no'ol ca' ne'  
chosoguaže' bidao' lo ža ca'! <sup>18</sup>Le  
nab lao Dios bi yažjen gwxonjle  
caten' chac zag, <sup>19</sup>le yesaquen ža  
da' leca yesale' bene'. Cate' bxete  
Diosen' yežlio na' ža na'aža nono na'  
gale' ca', neca žinłazen' yesale'de' ca'  
da' yoble. <sup>20</sup>Na' šaca' Xancho Diosen'  
bi yozaše' žan' yesac ca', notno yela,  
perw yozašen' neče chacde' bene'  
ca' chesejnilaže' le', bene' ba gwleje'  
zjanaque' xi'ine'.

<sup>21</sup>Cana' še no ye' le'e: "Le na'šč,  
nga zoa Cristo ben' gwlej Diosen'  
cont nabi'e", o "Le na'šč, na' zoe'",  
bi šejle'le. <sup>22</sup>Le yesaš bene' gwxiye'  
bene' yesaclaže' yosolane' xlatja'  
nga, na' yeson cuine' ca' bene'  
chesoe' xtiža' Dios. Na' yesone' yela'  
guac da' yesele'e bene' na' bichle da'  
zaca' yesyebande' cont yeseziye'e  
legaque', na' len bene' ca' ba gwlej  
Diosen' zjanaque' xi'ine' yesaclaže'  
bene' gwxiye' ca' yeseziye'e šaca' gac  
yeseziye'e legaque'. <sup>23</sup>Perw ca nac  
le'e, le gwzenag, le ba gwduxjue'eda'  
le'e yogo' can' gac.



**Can' gac cate' ben' gwseła' Diosen'  
golje' beṇaḥ yide' da' yoble**

(Mt. 24:29-35, 42-44; Lc. 21:25-36)

<sup>24</sup>Perw ca nac ža ca' cate' yeyož gałe'le can' gwnia', gwbižen' yeyaquen chōl na' bion' bich gwseṇin'. <sup>25</sup>Na' beljw ca' yeselažon' le'e yaban', na' yogo' da' chle'echo le'e yaban' yesaquen ca chac yežlion' cate' chxo'. <sup>26</sup>Nach beṇe' že' yežlion' yesele'ede' neda' naca' ben' gwseła' Diosen' golja' beṇaḥ za'a ladjo bejon' len yela' guac xen na' yela' beṇe' zaca' juisyw chian'. <sup>27</sup>Nach sela' angl chian' yosyotobe' yogo' beṇe' ca' ba gwleja' cont zjanaque' neda' txen gate'teze nite' doxen lo yežlion', ga zelao nac zito'.

<sup>28</sup>Le gwzenag che jempl nga che yag yixgüigon': Cate' ba chzolao chebešjw yaguen' na' chelan' laga' che'eṇ dao', nezele ba za' lağüe ba. <sup>29</sup>Na' lecze cate' le'ele ba chac da' mal ca' ba gwnia', cana'ch nezele ba za' juisyw, ba zoa gała'. <sup>30</sup>Da' li žia' le'e, biṇa' yenit diaža che le'e nita'le na'a cate' yeyož gac yogo'loł da' ca'. <sup>31</sup>Le'e yaban' na' yežlion' yesede chen, perw ca nac xtižan', gague da' te cbi gac can' žanna'.

<sup>32</sup>Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nezda'. Toze Xa' Dios neze.

<sup>33</sup>Da'n'an', le soa le cueze, le güia le na', na' le soateze yoł güižle Dios, le nono neze batcan' žin ža.

<sup>34</sup>Naquen ca nac che to beṇe' šeje' zito', na' cate' za' se'e choṇ liž xlatje' lo na' beṇe' güen žin che', cho'e žin da' yeson to toe', na' chzoe' beṇe' chape' cho'a yo'ona'. <sup>35</sup>Le soa le

cueze ca beṇe' chesape' liže'na', le bi zjanezde' batcan' yela' xan yo'on, še cate' ba zoa gał, še chel, še cate' chbež jea, še cate' ba gwyeni'. <sup>36</sup>Le xož yele'e zejzenez na' yedole'de' legaque' chesetase'. <sup>37</sup>Da' nga žia' le'e leze žiczán' par yogo'loł beṇe'. Le soa le cuez batcan' žin ža.

**Bosoxi'e yesezene' Jesúsen'**

(Mt. 26:1-5; Lc. 22:1-2; Jn. 11:45-53)

**14** Yechop ža za' gała' pascw na' lṇi dan' chesone' caten' chesagüe' yetextil dan' bibi levadura yo'on. Na' bḅoz gwnabia' ca' na' beṇe' ca' chososed chosolo'e dan' bzoj da' Moisés cheseyiljwlaže' nac yesone' yeseziye'e Jesúsen' cont yesezene'ne' yesote'ne'. <sup>2</sup>Perw gosene':

—Bi senchone' lo lṇin' cont ca yesebec beṇe' žaš.

**To no'ole bzoe' set zix yichj Jesúsen'**

(Mt. 26:6-13; Jn. 12:1-8)

<sup>3</sup>Na' goquen' Jesúsen' zoe' Betania liž Simón ben' güe'e yižgüe' da' nzi' lepra. Na' šlac chi' Jesúsen' cho'a mes, bžin to no'ole noxe' to de yejese ga chož set da' chla' zix, naquen dogualje da' bchoj lo yag yej da' nzi' nardo, na' zaca'chguan la'ay. Na' bzojje' gan' yož seta' na' bzoačhočhje' seta' yichj Jesúsen'. <sup>4</sup>Na' bał beṇe' ca' zjanita' na' beseže'e, na' gose' lježe': —čBixchen' benditjde' set zix nga? <sup>5</sup>Ša no bete' len güesonen ca no laxjw mos da' gone' gan tğüiz, na' gwnežjuen' gaclenen beṇe' yaše'.

Na' beseloque' no'ola'.

<sup>6</sup>Perw Jesúsen' gwne':

—Jayen'. čBixchen' chnele che no'olen'? Dan' bene' len neda' nga

naquen güen. <sup>7</sup>Le bene' yaše' ca' bate'teze nita'cze' len le'e, na' gwaque gonle len le'gaque' da' güen cate' žan chele, san neda' bich soacza' yesša len le'e. <sup>8</sup>No'ole nga bene' da' zelao gwzaque'de'. Ba bguazje' neda' set zix can' cheyała' yesone' len neda' cate' gaša'. <sup>9</sup>Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de šjasyeze'ede' can' ben no'ol nga.

**Judas gwchoglaže' gwdie' Jesúsen' lo na' bene' ca' chesegue'e le'**

(Mt. 26:14-16; Lc. 22:3-6)

<sup>10</sup>Nach Judas Iscariote, ben' goque' txen len bene' ca' šižinw ben' gwlej Jesúsen' cont zjanaque' le' txen, gwyeje' jane'e bɔz gwnabia' ca' cont yosoxi'e nac gone' gwdie' Jesúsen' lo na'gaque'. <sup>11</sup>Cate' gosende' xtiža' Judasen', besyebede' na' gose'ene' yeso'ene' mechw. Nach Judasen' gwzologüe' gwdiljwlaže' nac gone' gwdie' Jesúsen' lo na'gaque'.

**Xše' dan' gosagüe' len Xanchon'**

(Mt. 26:17-29; Lc. 22:7-23; Jn.

13:21-30; 1 Co. 11:23-26)

<sup>12</sup>Na' bžin ža čala' lni caten' neto' bene' Israel chagwto' yetextil dan' bibi levadura yo'o. Naquen ža nechw che lni pascw cate' chotto' xila' dao', cont šjayza'laže'to' can' bosla Diosen' da' xozxta'oto' ca' lo na' bene' Egipto ca'. Na' bene' ca' zjanaque' Jesúsen' txen gosenabde' le':

—čGa che'ndo' šjasini'ato' cont gagwcho xše' che pascon'?

<sup>13</sup>Nach gwsele' chop bene' ca' na' gože'ne':

—Le šja'ac ciudan', na' yežagle to bene' byo no'e to che'e nis. Le šejlene', <sup>14</sup>na' gan' yežinen', le ye' xan yo'on: "Maestrona' že: Gonšco' to yo'o gan' gagwto' xše' ža lni nga len bene' ca' zjanaque' neda' txen." <sup>15</sup>Nach gwlo'ede' le'e to cuart xen dan' zoa yichjen na'ale gan' de yogo' da' čhyažjecho. Na' le gwsini'a cont gagwcho na'.

<sup>16</sup>Na' gosa'ac bene' ca' čhope, na' besežine' ciudan', na' yogo' can' gož Jesúsen' le'gaque' goc, na' bososini'e xše' že' lni'.

<sup>17</sup>Cate' beyož gwxo'a gwbiž, bžin Jesúsen' len bene' šižinw ca' gwleje' cont zjanaque' le' txen. <sup>18</sup>Na' gosebi'e gosagüe' xše'. Na' šlac chesagüen', Jesúsen' gože' le'gaque': —Da' li' žia' le'e, to le'e chagwle len neda' txen, gwdele neda' lo' na' bene' ca' chesegue'e neda'.

<sup>19</sup>Nach le'gaque' besyeyaše'laže'de' na' gosezologüe' tgüeje' tgüeje' gosenabde' le' gosene':

—čNedan' gona' ca'?

Na' yetoe' leze gwne':

—čNedan' gona' ca'?

<sup>20</sup>Na' Jesúsen' gože'ne':

—Ladjo le'e bene' šižinw, to bene' chagw len neda' txen toze lo' ye'en gon ca'. <sup>21</sup>Na' gac chia' can' nyoj le'e Xtiža' Diosen', neda' naca' ben' gwseła' Diosen' golja' benač. Perw inyaše'chguaze nac ben' gwdie' neda' lo na' bene' ca'! Yejni'acle ša bi goljen'.

<sup>22</sup>Na' šlac chesagüe', Jesúsen' gwxi'e to yetextilen', na' beyož be'e yela' choxcen che Dios, bzoxjen', na' bnežjuen' le'gaque', gwne':

—Le gagon'. Lenna' cuerp chia'.

<sup>23</sup>Nach bexue' to vas gan' yože nis uvasen' na' beyož be'e yela' choxcen

che Dios, be'en legaue', na' yogüe' gose'eje' late' güej dan' yože lo' vassen'. <sup>24</sup>Na' gože' legaue':

—Da' ngan' xčhena' na' chzanlažan' lajjen neche yogo'lo' be'načh. Na' lajjen cont solao gac da' coben' da' gwna Diosen' gone' gaclene' be'načh. <sup>25</sup>Da' li žia' le'e, bich ye'aja' xis uvas na'a. Cate'ch žin ža ba zoacho txen gan' chnabia' Diosen', canan' ye'ejan' da' yoble.

**Jesúsen' gwne' Pedroa' bi čhebe' naque' le' txen**

(Mt. 26:30-35; Lc. 22:31-34; Jn. 13:36-38)

<sup>26</sup>Beyož gosole' gosonxene' Diosen' nach gosa'aque' ja'aque' Ya'a Olivos.

<sup>27</sup>Nach Jesúsen' gože'ne':

—Na'aže' yogo'le cuejyichjle neda' neche dan' gac čhian'. Le nyojczen le'e Xtiža' Diosen', žan: “Gota' bene' güeyoe xilan' na' xila' ca' yesaslasba'.” <sup>28</sup>Perw cate' yosban Diosen' neda' ladjo bene' guat ca', yobch yeya'a Galilea ca' le'e.

<sup>29</sup>Nach Pedron' gože'ne':

—La' yogo' bene' quinga yesebejyichje' le', neda' bi gona' ca'.

<sup>30</sup>Perw Jesúsen' gože'ne':

—Da' li žia' le', bina' cuež jean' chop ni'a na'aže' cate' gac šon ni'a bi chčhebo' še nombi'o neda'.

<sup>31</sup>Perw Pedroa' do laže' gwne':

—Lacžla' še chonen byen guatlencza' le', gwbat nia' bi nombia' le'.

Na' lecze ca' gosena' yogüe'.

**Jesúsen' bol' güiže' X'e' Dios Getsemaní**

(Mt. 26:36-46; Lc. 22:39-46)

<sup>32</sup>Nach besežine' latje gan' nzi' Getsemaní, na' Jesúsen' gože' bene' ca' zjanaque' le' txen, gože'ne':

—Ngaze le cue'edo' šlac neda' šjel güiža' Dios.

<sup>33</sup>Na' gwčhe'e Pedro, Jacobo na' Juan, na' gwzolaon da' juisyw da' gocde' lo' yichjlažda'ogüen' na' benchgüe' xbab. <sup>34</sup>Na' gože' legaue':

—Lo' yichjlažda'ogua' nga chacyaše'chgüeda', chacda' gatcza' catequen' chžaglagua'. Nga le yega'an' na' le soa le na' txen len neda'.

<sup>35</sup>Nach Jesúsen' gwžialagüe' yelate' na' jačhaze' cosčo'ale lo yon' gw'na'bd'e' Dios še guac ten ca'ale bi gac can' ba zoa gac čhe'. <sup>36</sup>Gože' Diosen':

—Xa', bibi de da' nacho da' bi chac gono'. Benšca cont bi saca'zi'a na' bi yesote'nda', perw bi chnaba' gac da' žia' neda', san gac da' nao' le'.

<sup>37</sup>Nach beyeje' gan' nita' bene' ca' šone, na' ble'ede' zjanite' chesetase'. Na' gože' Pedron':

—Simón čhtason'? čNe šlož da'oze ca' goc cuejo' bišgal len neda'? <sup>38</sup>Bi tasle, san le yol güiž Dios cont bi gon gwxiyen' le'e gan. Da' li lo' yichjlažda'olen' chna'laže'le gonle da' nac binlo, perw cuerp čhelen' bi chzoeczen.

<sup>39</sup>Nach gweje' da' yoble na' bol' güiže' Dios na' da' yoble gože'ne' dan' ba gožcze'ne' tni'a. <sup>40</sup>Nach bezeje' gan' niten', na' da' yoble ble'ede' chesetase', le yejlagüen' chesexa' chesežoden' bišgal. Na' bi besyežellaže' nac yosyoži'e xtižen'. <sup>41</sup>Na' da' gwyone ni'a gweje' na' bezžine' gan' nita' bene' ca' šone na' gože' legaue':

—čNe' chtasle? čNe' chezi'laže'le? Ba goc. Ba gole' gon to bene' neda'

lo na' bene' güen da' xinj ca', neda' naca' ben' gwseĵa' Diosen' golja' benaĉh. <sup>42</sup>Le ĉhas, le yeyo'o. Ba za' ben' gon neda' lo na'gaque'.

**Gosezene' Jesúsen' cont yeseĉe'ene'  
lao bene' gwnabia' ca'**

(Mt. 26:47-56; Lc. 22:47-53; Jn. 18:2-11)

<sup>43</sup>Jesúsen' ne' choe'te' dižan' ca' cate' bžin Judas, na' zan bene' zja'aque' len le' zjanoxe' no yag, no spada, bene' gosesela' bžox gwnabia' ca' na' bene' gole blao ca' chesenabia' nación Israel ĉeton'. (Judasen' goque' to bene' šižinw ca' gwlej Jesúsen' cont zjanaque' le' txen.)

<sup>44</sup>Na' Judasen' ba gože' legaue' nac yesenezde' non' yesezene', gwne':  
—Ben' gwnopa' xague', le'na'; le sene' na' le ĉhe'e.

<sup>45</sup>Na' cate' bžin Judasen' na' jabigue' gan' zoa Jesúsen' na' gože'ne':

—Maestro, Maestro.

Na' bnope'ne'. <sup>46</sup>Nach gosezene' Jesúsen' cont yeseĉe'ene'.

<sup>47</sup>Perw to ben' zecha cuit Jesúsen' gwlej spada ĉhen' na' gwĉen' mos ĉhe bžox blaon' gwĉhogte' šĵa'a naguen'. <sup>48</sup>Nach Jesúsen' gože' bene' ca':

—ĉNonle neda' ca to bene' gwban za'acle zedexi'le neda' len spada na' len yag? <sup>49</sup>Yogo' žaze gwzoa' len le'e bsed blo'eda' bene' chy'o'o yodao' blaon', na' bi gwzenle neda'. Perw chac da' qui cont chac can' nyoj Xtiža' Diosen'.

<sup>50</sup>Nach yogo' bene' ca' zjanaque' Jesúsen' txen bosoxonje' gosebejyichje'ne'.

**Bi' güego' bin' boxonj**

<sup>51</sup>Na' to bi' güego' na'obe' Jesúsen', na' nřoa cože'be' toze sávana. Na'

bene' ca' ba gosezene' Jesúsen' ĵecze gosenize'be'. <sup>52</sup>Perw gwlejyichje' sábanan' na' boxonjbe' ga'alyidbe'.

**Goseĉe'e Jesúsen' lao bene' ca'  
chesenabia' nación Israelen'**

(Mt.26:57-68; Lc. 22:54-55, 63-71; Jn. 18:12-14, 19-24)

<sup>53</sup>Nach goseĉe'e Jesúsen' lao bžox blaon', na' besežag yogo' bene' ca' zjanac bžox gwnabia', na' bene' gole blao ca' chesenabi'e nación ĉeton' na' bene' ca' bososed bosolo'ede' dan' bžoj da' Moisés. <sup>54</sup>Na' Pedron' na'ogüe' Jesúsen' zito' zito'le bžintie' liž bžox blaon' na' gwyo'e chy'o'ona' gwchi'e txen len bene' ca' chesape' yodao' blaon' boše'e cuine' cho'a yi'.

<sup>55</sup>Na' ca' nac bžox blaon' na' yogo' bene' ca' chesenabia' nación ĉeton', besyeyiljwlaže' bi da' yesagüe' xya ĉhe Jesúsen' cont yesote'ne', perw bi besyeželden'. <sup>56</sup>Na' zan bene' gosone' diža' güenlaže' ĉhe Jesúsen', perw bi gosene' toz ca' yesene'. <sup>57</sup>Baĵe' gosezože'e na' bososbague'ne' xya ĉhol', gosene':

<sup>58</sup>—Neto' beneto' gwne': “Neda' yochinjja' yodao' nga da' ben benaĉh, na' šone žaze yeyona' yeto yodao' da' bi gon benaĉh.”

<sup>59</sup>Perw ne' ca' ca' gosene' toz ca' yesene'.

<sup>60</sup>Nach bžox blaon' gwzože'e ladjo yogo'lole' na' gwñabde' Jesúsen':  
—ĉBi choži'o xtižen'? ĉBi dan' chosožie' le' xya?

<sup>61</sup>Perw Jesúsen' bitw bi gwne', bitw boži'e xtižen'. Na' bžox blaon' da' yoble gwñabde' le', gwne':  
—ĉNaco' le' Cristo ben' gwlej Diosen' cont nabi'e, na' Xi'in Dios ben' chonxencho?

**62** Jesúsen' gože'ne':

—Le can' naca'. Na' le'ele neda' cate' ba chi'a šla'a liča che Dios ben' nac la'zelagüe bene' gwnabia', neda' naca' ben' gwsele' golja' beṇačh. Na' le'ele yetja' ladjo bejw dan' ze le'e yaban'.

**63** Nach bṅoz blaon' gwčeza' xałane' cont nacia' bi beque'e can' gwna Jesúsen', na' gwne':

—Noch no chyažje bene' co' da' bałi. **64** Le'e ba benele chne' che Dios dan' že' ca', chon cuine' ca Dios. ěNacxe ža le'e?

Na' yogüe' gosene' nape' doła' na' cheyała' gate'.

**65** Nach bałe' gosezolagüe' chosoži'ene' xene' na' bososeyjue' lagüen' len to lache' na' gosot goseyine' le', na' gosonle' che' gose'ene':

—iGwnašc non' chot le'!

Na' bene' ca' chesape' yodao' blaon' gosot goseyine' le'.

### Pedron' bi gwčebe' še nombi'e Jesúsen'

(Mt. 26:69-75; Lc. 22:56-62;

Jn. 18:15-18, 25-29)

**66** Pedron' chi'e chyo'o che'ełe, cate' bžin to no'ole güen žin che bṅoz blaon'. **67** Na' cate' no'olen' ble'ede' le' chi'e choše'e cuine' cho'a yin', gwne'e le' na' gože'ne':

—Lencze le' naco' txen len Jesús bene' Nazaret.

**68** Perw Pedron' bi gwčebe', gwne':

—Bi nombi'ane', neca nezda' bin' žo'.

Na' beyej Pedron' jayzie' cho'a puert na'le. Nach gwčež to jea.

**69** Na' no'ol güen žinṇa' gwne'e le' da' yoble na' gože' bene' ca' nita' na':

—Benga naque' legaque' txen.

**70** Perw le' da' yoble bi gwčebe' še naque' txen len Jesúsen'. Na' gocze štit da' yoble bene' ca' nita' na' gose'e Pedron':

—Da' licze, le' naco' txen len legaque', le naco' bene' Galilea, nacia' chnio' can' chesene bene' Galilea ca'.

**71** Nach Pedron' čhop šone ni'a gwne':

—Diosen' gone' neda' castigw še chonlaža' žia' bi nombi'a bena'.

**72** Na' cate la' gwčežte jean' da' gwchope. Nach jayze'e Pedron' can' gož Jesúsen' le': “Biṇa' cuež jean' čhop ni'a cate' gac šon ni'a bi chebo' še nombi'o neda'.” Na' cate' jayze'ede' can' gož Jesúsen' le', na' gwčeže'.

### Goseče'e Jesúsen' lao Pilato

(Mt. 27:1-2, 11-14; Lc. 23:1-5; Jn. 18:28-38)

**15** Ca gwyeni', bṅoz gwnabia' ca' besežague' len bene' gole blao ca' chesenabi'e nación čheton' na' len bene' ca' chososed chosolo'e dan' bzoj da' Moisés na' len yezica'chle bene' gwnabia' ca'. Na' bosocheje' Jesúsen' na' goseče'ene' jasesane'ne' lo na' Pilato ben' nac gobernador. <sup>2</sup>Pilaton' gwṇabde'ne', gože'ne':

—ěLen' naco' rey che bene' Israel?

Jesúsen' boži'e xtižen', gwne':

—Can' gwnao'na', can' naquen.

<sup>3</sup>Na' bṅoz gwnabia' ca' da' zan da' bosocuiše'ne'. <sup>4</sup>Nach Pilaton' da' yoble gwṇabde'ne', gože'ne':

—ěBi choži'o xtiža'gaquen'? le da' zan da' chosocuiše' le'.

<sup>5</sup>Perw Jesúsen' bitw bi gwne'. Na' Pilaton' bebande' che'.

**Gosechogbi'en gat Jesúsen'**

(Mt. 27:15-31; Lc. 23:13-25;

Jn. 18:38 - 19:16)

<sup>6</sup>Na' gota' costumbr, Pilaton' gwsane' to bene' de ližya caten' čala' lni pascw che neto' bene' Israel, con to bene' yesenab bene' gualaž cheton'. <sup>7</sup>To bene' lie' Barrabás na' len yexonj bene' gosot bene' cate' besyedabague' gobiernna' zjajo'e lo' ližya len nochle bene' güen da' mal. <sup>8</sup>Nach besežag bene' na' gosenabde' Pilaton' gwsane' to bene' con can' nac costumbr čegaquen'. <sup>9</sup>Na' Pilaton' boži'e xtižagaquen' gwne':

—¿Čaclaže'le gwsana' rey che le'e nacle bene' Israel?

<sup>10</sup>Gwne' ca' le gočbe'ede' dan' chesacxi'a bχoz gwnabi'a ca' Jesúsen', da'nan' bosodie' le' lo ne'e. <sup>11</sup>Perw bχoz gwnabia' ca' bosota bosone' bene' ca' že' na' cont gosenabe' gwsane' Barrabás ben' de ližyan'. <sup>12</sup>Nach Pilaton' gwñabde' legaque':

—¿Bixe gona' len ben' žale nac rey che le'e nacle bene' Israel?

<sup>13</sup>Legaque' bososya'adie' bosyoži'e xtižen':

—iBde'e le'e yag cruz!

<sup>14</sup>Pilaton' gože' legaque':

—¿Bixe da' xinj nonen'?

Nach legaque' da' yoble bososya'achgüe' gosene':

—iBde'e le'e yag cruz!

<sup>15</sup>Nach Pilaton', cont bega'ane' güen len bene' ca', bsane' Barrabásen' can' gosenabe'. Na' bene' mandadw gosot goseyin soldadw

che' ca' Jesúsen', nach bene' le' lo na'gaque' cont yosode'ene' le'e yag cruz.

<sup>16</sup>Nach soldadw ca' goseče'ene' yeto latje dan' zoa chy'o'o che liž bene' gwnabian', na' bosotobe' yogo' soldadw ca', zjanac zane'.

<sup>17</sup>Gosechize' Jesúsen' to lache' moradw, na' gosone' to corona de xis yeše' bosozoen' yichjen'.

<sup>18</sup>Na' gosezolagüe' chesonle' che', chesosye'e:

—iViva, rey che bene' Israel!

<sup>19</sup>Na' bosozete' yichjen' xis, bosozil'ene' xene', na' bosozoa xibe' gosone' ca' bene' chesonxen le'.

<sup>20</sup>Beyož gosonle' che', besyeyine' lache' moradon' na' bosyoguacue'ne' xacze'. Nach goseče'ene' cont jasede'ene' le'e yag cruz.

**Bosode'ene' le'e yag cruz**

(Mt. 27:32-44; Lc. 23:26-43; Jn. 19:17-27)

<sup>21</sup>Na' šlac zjanče'ene' gan' yesote'ne' besyežague' to bene' yež Cirene le' Simón, xa Alejandro na' Rufo, za' zeze'e yixe', na' bosogüe'ene' yag cruz che Jesúsen'.

<sup>22</sup>Goseče'ene' Jesúsen' latje ga nzi' Gólgota, zeje dižan' Latje che Žit Yichj Bene' Guat. <sup>23</sup>Na' goso'ene' vino da' nchixe to nechw da' nzi' mirra, perw Jesúsen' bi goclaže' ye'ejen'. <sup>24</sup>Nach bosode'ene' le'e yag cruzen'. Na' soldadw ca' gosone' rifa cate' besyele'e xalana' Jesúsen' cont bla' bi besyechel to toe'.

<sup>25</sup>Cheda ga šezille caten' bosode'ene' le'e yag cruz. <sup>26</sup>Na' yichj yag cruzen' bosozoe' dan' bosozoje' choen' diža' bixčen' gosote'ne'. Qui nyojen, žan: “Rey che Bene' Israel.” <sup>27</sup>Txen len Jesúsen' lecze bosode'e

le'e yag cruz ye<sub>h</sub>ope bene' gwban, toe' šla'a licha, na' yetoe' šla'a robes. <sup>28</sup>Na' da' gosone' ca', goc ca' nyoj Xtiža' Diosen', žan: "Gosone'ne' ca' bene' güen da' xinj."

<sup>29</sup>Na' bene' gosede ga<sub>l</sub>a'ze gosezi'diže'ne', con chosota yichje' gosene':

—Le' gwnao' yochinjo' yodaon' na' šone žaze yeyontion'. <sup>30</sup>Bosla cuino' na' beyetj le'e yag cruza'.

<sup>31</sup>Lece ca' b<sub>x</sub>oz gwnabia' ca' na' bene' ca' bososed bosolo'e dan' bzoj da' Moisés gosezi'diže'ne', na' gose' lježe':

—Bosle' bene' yoble, perw bi chac yosla cuine'. <sup>32</sup>Le'echone' yeyetje' na'a le'e yag cruzen', nach šejle'cho naque' Cristo ben' gwlej Diosen' cont nabi'e chio' bene' Israel.

Na' lente bene' ca' bosoda'lene' le' le'e yag cruz ca' gosezi'diže'ne'.

### Can' goc caten' got Jesúsen'

(Mt. 27:45-56; Lc. 23:44-49; Jn. 19:28-30)

<sup>33</sup>Cate' bžin guagwbiž, doxen yežlion' goc cho<sub>l</sub>, bžinte cheda šone.

<sup>34</sup>Na' ca' hora' Jesúsen' gwne' zižje gwne':

—Eloi, Eloi ilama sabactani? — zeje diža': Dios chia', Dios chia', čbixchen' ba gwlejyichjo' neda'?

<sup>35</sup>Na' ba<sub>l</sub> bene' ca' zjanita' na' gosende' na' gosene':

—Le gwzenag, cho<sub>l</sub> güiže' da' Elías, ben' be' xtiža' Dios cani'.

<sup>36</sup>Nach to bene' ca' gweyjsese' na' bzažede' to esponja vino zichj na' bzoen' to lao xis tone nach jažiguen' cho'a Jesúsen' cont xopen', na' gwne':

—Cuezcho, yešque güid Elíasen' yeletje' le'.

<sup>37</sup>Nach Jesúsen' bosye'e zižje, na' gote'. <sup>38</sup>Na' lache' da' ze lo' yodao' blaon' bcheza' gacholen, gwza'te yichjen bžinte che'e<sub>l</sub>e. <sup>39</sup>Na' xan soldadw ca' zie' lao Jesúsen', na' cate' bende' can' bosye'en na' ble'ede' can' gotten', gwne':

—Da' li le bengan' goc dogualje Xi'in Dios.

<sup>40</sup>Lece ba<sub>l</sub> no'ole zjanite' zito'le chesene'e. Na' len legaque' zjanita' María no'ole Magdala, na' Salomé, na' María xna' Jacobo bene' naše'te, na' lece goque' xna' José. <sup>41</sup>No'ol qui gosa'ogüe' Jesúsen' na' gosaclene' le' cate' chsed chlo'ede' bene' ca' že' distritw Galilea. Na' yezanch no'ol zjanita' na', bene' ja'aclene' le' txen Jerusalén.

### Bosocuaše' Jesúsen'

(Mt. 27:57-61; Lc. 23:50-56; Jn. 19:38-42)

<sup>42</sup>Žana' goquen žan' bososini'e par ža che Dios cate' bi de lsens yesone' žin. Na' cate' ba chxo'a gwbiž, <sup>43</sup>to bene' le' José, bene' ciuda Arimatea, beyaxjde' gwyeje' lao Pilaton' na' jaynabe' cuerp che Jesúsen'. José goque' to bene' zaque' lao bene' ca' gosenabi'e nación Israel cheton', na' ba zoe' chbeze' batcan' solao nabia' ben' se<sub>l</sub>a' Diosen'. <sup>44</sup>Pilaton' bebande' dan' ba gote', na' goxe' xan soldadw ca' cont gw<sub>n</sub>abde' le' še da' li ba gote'. <sup>45</sup>Na' cate' xan soldadw ca' gože' le' le can' ba goc, Pilaton' bnežjue' latje beyoa' Josén' cuerp che' Jesúsen'. <sup>46</sup>Nach Josén' gwzi'e to lache' xen, beletje' cuerp che' Jesúsen' na' bolažen' len. Na' la' jase<sub>l</sub>o'ote' le' to lo' bloj da' nche'ene' le'e yej xen, na' blo<sub>l</sub>e' to yej cho'a blojen' cont bseyjon len.



<sup>47</sup>Na' Maríá no'ole Magdalan' len Maríá xna' Josén' besele'ede' gan' bosocuaše'nen'.

**Beban Jesúsén' ladjo bene' guat ca'**

(Mt. 28:1-10; Lc. 24:1-12; Jn. 20:1-10)

**16** Cate' gwde ža che Diosen', Maríá no'ole Magdalan', Maríá xna' Jacobo, na' Salomé gosezi'e da' chla' zix cont šjaselo'en cuerp che Jesúsén'. <sup>2</sup>Na' šezildao' ža dmigw besežine' cho'a ban', cate' za' chla' gwbiž. <sup>3</sup>Na' za' yesežine' gose' lježe':

—žNoxe ca'a yej xen dan' da' cho'a blojen'?

<sup>4</sup>Perw cate' besežine' na' gosene'e, besele'ede' yej xen dan' da' cho'a blojen' ba bga'an. <sup>5</sup>Nach goso'e lo' blojen', na' besele'ede' chi' to bene' xcuide' šla'a licha, nyaze' to lache' ton' da' šiš. Na' besežebe'. <sup>6</sup>Na' bena' gože'ne':

—Bitw žeble. Cheyiljwle Jesús bene' Nazaret ben' bosode'e le'e yag cruz. Perw ba bebane'; notoch no nla' nga. Le na' gan' gosexoe'ne'. <sup>7</sup>Le šjaya'ac na' le ye' bene' ca' gosaque' le' txen, na' len Pedron', gwyobech Jesúsén' yežine' Galilea clél ca' legaque'. Na' Galilean' na' yesele'ede'ne' can' gwnacze'.

<sup>8</sup>Nach no'ol ca' chosyoxonjsese' besyeya'aque' cho'a blojen', le chesexiztite' besežebe'. Na' notno gose'e ca', le besexožde'.

**Jesúsén' blo'elagüe' Maríá no'ole Magdala**

(Jn. 20:11-18)

<sup>9</sup>Beyož beban Jesúsén' ladjo bene' guat ca' šezildao' ža dmigw, Jesúsén' blo'elagüe' da' nechw len

Maríá no'ole Magdalan', ben' bebeje' gaž da' xigüe' yo'o nyaze'. <sup>10</sup>Na' Maríá nga jatixjue'ede' bene' ca' ba gosanita' len le'. Zjanita'yaše' na' chesebeže' cate' bžine'. <sup>11</sup>Na' cate' gosende' be'e diža' mban Jesúsén' na' gosende' be'e dižan' can' ba ble'ede'ne', bi gosejle'e.

**Jesúsén' blo'elagüe' len čhop bene' ca' gosaque' le' txen**

(Lc. 24:13-35)

<sup>12</sup>Beyož goc ca', čhop bene' ca' gosaque' Jesúsén' txen zjangüe'e nez yixe' cate' Jesúsén' blo'elagüe' legaque', na' nža'le besele'ede'ne'.

<sup>13</sup>Lecze legaque' ja'aque' jasedixjue'ede' bene' yezica'chle, perw neca gosejle'e čhegaque'.

**Da' bgon Jesúsén' yeson bene' ca' chsejnilaže'ne'**

(Mt. 28:16-20; Lc. 24:36-49; Jn. 20:19-23)

<sup>14</sup>Gwdena' bene' šnej ca' gwlej Jesúsén' cont zjanaque' le' txen zjachi'e cho'a mes chesagüe' cate' blo'elagüe' len legaque'. Na' gwdile' legaque' da' bi chesejnilaže' le' do yichj do laže' na' zjanaque' laždao' čhačh, le bi gosejle'e che bene' ca' besele'ede'ne' ba bebane' ladjo bene' guat ca'. <sup>15</sup>Na' gože' legaque':

—Le šja'ac doxen yežlio, na' le šjatixjue'e diža' güen čhia' len yogo'lo' bene'. <sup>16</sup>Bene' ca' yesejnilaže' neda' na' yesezoe' nis, gata' yela' mban čhegaque' toli tocanē. Perw bene' bi chesejnilaže' neda', yesebiaye'e. <sup>17</sup>Na' bene' ca' chesejnilaže' neda', yesyega'anlene' da' qui: Yeso'e la' na' yesyebje' da' xigüe' yo'o nyaz bene'; yesenie' diža' cobe da' bi žjansede'; <sup>18</sup>na' še

yesoxe' no be<sub>l</sub> znia, o še yese'eje' da'  
 nac venen, bibi yesacde'; na' lecze  
 yesexoa taque' yichj bene' chese'e  
 na' yesyeyacde'.

**Begüe Jesúsén' yaba**

*(Lc. 24:50-53)*

<sup>19</sup>Beyož bšaljlene' legaque',  
 Xancho Jesúsén' begüe' yaba,

na' gwchi'e cuit Diosen'  
 šla'a licha. <sup>20</sup>Na' bene' ca'  
 zjanaque' le' txen besežaše' na'  
 jasedixjue'ede' diža' güen che'  
 doxen. Na' cuin Xancho Jesúsén'  
 goclene' legaque' gosone' ye<sub>l</sub>a'  
 guac cont gosejle' bene' le' nac  
 da' li dižan' gosoen. Da' na'zen'  
 chzoja'.

# DIŽA' GÜEN DAN' BZOJ SAN LUCAS

Da' nga bzoj Lucasen' par Teófilo

**1** <sup>1-4</sup>Teófilo, naco' bene' zaca' na' chzoja' le' diža' quinga cont nezdó' da' li ca nac da' ba bosozejni'ide' le' che da' ca' ba gosac. Bene' zan bač bosozoje' che Jesúsen', goso'e diža' che da' ca' bene', con can' bosozejni'i bene' ca' neto', bene' ca' besele'ede' can' gwzolaon cate' goljte Jesúsen'. Na' bene' ca' gosende' na' besele'ede' can' goquen' bososed bosolo'ede' bene' yoble diža' güen che'. Na' neda' cate' beyož gwnabyoža' can' goquen' na' gwyazlaža' gwzojan' tcho'a cont nezdó', Teófilo.

To angl gwdixjue'ede' galje Juan

<sup>5</sup>Ca tiemp caten' gwnabia' rey Herodes distritw gana' nzi' Judea, na' gwzoa to bžoz che bene' Israel ca' bene' le Zacarías. Bene' žin len to xonj bžoz bene' zjale Abías. Na' no'ol che Zacarías le Elisabet, na' naque' diaža che da' bžoz Aarón. <sup>6</sup>Na' Zacarías len Elisabeten' zja'accze' to liča len Diosen' na' gosonyane' yogo'lol da' non Xancho Diosen' mandadw da'na' noy le'e ley che'na'. <sup>7</sup>Na' nono xi'ingaque' nita' neče Elisabeten' naque' no'ol güiž. Na' chopte' ba zjanaque' bene' gole.

<sup>8</sup>Na' goquen' beyala' Zacaríasen' len bene' lježe' ca' bene' ca' zjanaque' bžoz cont yesone' da'na' besyeyale' yesone' yesonxene' Dios. <sup>9</sup>Na' bžoz ca' yogo' ni'a chesone' rifa cont chata'bia' noe' choj gwzeye' yal lo' yodao' blao čegaque' gan' chesonxene' Xancho Diosen'. Na' bchoj Zacaríasen' caten' gosone' rifan' bzeye' yala' lo' yodao'na'. <sup>10</sup>Na' šlac bzeye' yala' gosenita' yogo'lol bene' zan ca' chy'ole bosol güiže' Diosen'. <sup>11</sup>Na' to angl bene' gwsela' Xancho Dios blo'elagüe' Zacaríasen', na' gwzecha angla' cuit mesa' lichale gan' chosozeye' yala'. <sup>12</sup>Na' cate' ble'e Zacaríasen' anglen', benit bečol lo' yichjlažda'ogüe' na' bžebchgüe'. <sup>13</sup>Perw anglen' gože' le': —Bitw žebo' Zacarías. Dios' ba bzenague' che dan' gwnabdo'ne', na' no'ol čio' Elisabeten' sane' to xi'ino', na' gwsio'be' Juan. <sup>14</sup>Na' so' mbalaz na' yebedo' na' lecze bene' zan yesyebede' še ba goljbe'. <sup>15</sup>Gacbe' to bene' blao lao Diosen'. Bitw ye'ejbe' vino ne bichle da' chžože bene'. Na' cate' za' galjtebe' ba yo'o Spiritw che Dios' lo' yichjlažda'obe' nabi'an lebe'. <sup>16</sup>Na' gombe' cont zan bene' Israel ca' yosoša' yichjlažda'ogüe' na' yesonxene' Xancho Diosen'

can' cheyala' yesonxene' le'. <sup>17</sup>Na' cuialaobe' lao Xanchon', na' soa Spiritw che Diosen' len lebe' can' gwzoan len da' Elíasen', na' lecz ca' yela' guac che Diosen'. Na' bene' ca' bi nita' binlo len xi'ine' ca', gombe' ga yesenite' binlo len legacbe', na' bene' güedenag ca' gombe' yosozenague' che Diosen'. Gombe' cont yesenita' bene' yesonxene' Xanchon' cate' yide'.

<sup>18</sup>Nach Zacaríasen' gože' anglen':

—¿Nac gac nezda' da' nga? Neda' naca' bene' gole na' lecz ca' no'ol chian' ba naque' bene' gole.

<sup>19</sup>Nach anglen' gože' le':

—Neda' naca' angl Gabriel bene' za' yaba. Zoa' len Diosen' na' chonxena'ne', na' gwsele' neda' zedetixjue'eda' le' diža' güen qui.

<sup>20</sup>Le' bi gac nio' na'a, le bi chejli'o xtiža' nga. Cate' žin ža gac da' nga, cana' gac yenio' da' yoble. Na' da' li gwžin ža gac can' gwnia'.

<sup>21</sup>Na' bene' ca' že' chy'ole chesebeze' Zacaríasen' besyebande' da' gwžede' lo' yodao' blaona'. <sup>22</sup>Na' cate' bechoj Zacaríasen', bene' señw len ne'e da' bi goc nie'. Nach gosacbe'e bene' ca' ble'ebande' lo' yodao'na'.

<sup>23</sup>Na' cate' beyož bdelaze' dan' bene' žin lo' yodao'na', beyej liže'.

<sup>24</sup>Gwde na' no'ol che' Elisabeten' gwchendao' bidaon' lo' le'e. Na' gayo' bio' gwzoaze'. <sup>25</sup>Na' gwne':

—Güenchguan' ba ben Xancho Diosen' len neda'. Ba bžin ža beži'ilaže'de' neda', cont bich yeson benača' xbab bibi zaca'.

**To angl gwduxjue'ede'  
galje Jesucriston'**

<sup>26</sup>Goc xop bio' noa' Elisabeten' bidaon', Diosen' besele' anglen' ben'

le Gabriel, gwyeje' to yež da'na' nzi' Nazaret gan' mbane distritw Galilea.

<sup>27</sup>Gwsele' le' gan' zoa to no'ol güego' le' María. Na' Marían' napši'ichgua cuine'. Na' to bene' le' José bačh naquen gwšagna'lene' le' cont gaque' xo'ole'. Na' Joséna' naque' diaža che rey David ben' gwzoa cani'. <sup>28</sup>Na' bžin to angl bene' za' yaban' gwyo'e gan' zoa María na' gože'ne':

—Patiox. Xancho Diosen' nži'ide' le' na' zoe' len le'. Na' gone' cont so' mbalazch ca yogo'lo' no'ole yezica'chle.

<sup>29</sup>Cate' ble'e Marían' anglen', bebanchgüede' ca nac dižan' dan' gože' le'. Na' bene' xbab bi zejen dan' gwne' caten' bguape'ne' tiox. <sup>30</sup>Na' anglen' gože'ne':

—Bitw žebo' María, Diosen' nži'ide' le'. <sup>31</sup>Na'a gua' xi'ino' to bi' byo dao', na' sano'be', na' go'o labe' Jesús.

<sup>32</sup>Na' Jesús'en' gaque' to bene' blao na' benačhen' yososi'ene' Xi'in Dios, Dios ben' naque' la'zelagüe bene' blao. Na' Xancho Diosen' gone' cont nabi'e nación Israel chele ca gwnabia' da' xozxta'ogüe' rey David. <sup>33</sup>Na' le' nabi'e nación Israelen' toli tocanē, na' gwbat te yela' gwnabia' čhen'.

<sup>34</sup>Nach gož Marían' angla':

—¿Nacxe gac sana' bdaon'? Bitw nžaga' bene' byo.

<sup>35</sup>Nach gož angla' le':

—Spiritw che Diosen' yiden gana' zo'na', na' yela' guac che Diosa' soan len le', Dios ben' naque' la'zelagüe bene' blao. Da'nan' bidaon' za' galje gacbe' laždao' xilaže' na' yososi'ebe' Xi'in Dios. <sup>36</sup>Na' bene' xna'o Elisabeten' lecze bačh gwchendao' bidao' lo' le'e la'czla' ba naque' bene'

gole. Ba goc xop bio' no'e to bi' byo dao', len gosene' naque' no'ole güiž.

<sup>37</sup>Bibi de da' n̄acho da' cbi gac gon Dios.

<sup>38</sup>Nach gož Marían' anglen':

—Ni zoa' naca' xmos Xana' Diosen'. Gacšca chia' con can' ba gwnao'.

Nach beza' anglen' gan' zoa Marían'.

### Marían' jañe'e Elisabeten'

<sup>39</sup>Gwde na' la' gweyjte Marían'

to yež da' žia to lo ya'a gan' mbane distritw Judean', <sup>40</sup>na'

bžine' liž Zacaríasen'. Na' gwyo'e

bguape' Elisabeten' tiox. <sup>41</sup>Na'

cate' Elisabeten' bende' chol' güiž

Marían' le', nach gocbe'ede' chxite'

chžia bidaon' lo' le'e. Na' Spiritw

che Diosen' gwnabian' yichjlaždao'

Elisabeten' <sup>42</sup>na' gwne' zižje da'

bebechgüede', gože' Marían':

—Zo' mbalazch ca yogo'lol' no'ole

yezica'chle. Na' lecze bidaon' no'ona'

soabe' mbalaz. <sup>43</sup>Chebanda' le'

naco' xna' Xana' zedena'o neda'.

<sup>44</sup>Con cate' benda' chguapo' neda'

tiox, bidao' chian' lecze bebebe',

bxite' bžiabe' lo' lian'. <sup>45</sup>Zo' mbalaz

da' gweyeli'o gac can' gwna xtiza'

Diosen' dan' gož anglen' le'.

<sup>46</sup>Nach Marían' gwne':

Chonxena' Xancho Diosen' do

yichj do laža'.

<sup>47</sup>Na' do yichj do laža'

chebechgüeda' Dios ben'

bebeje' neda' lo da' malen'.

<sup>48</sup>Ba beyaše'de' neda' naca' xmose'

la'czla' bibi zaca'.

Na' na'a bene' yesenita' toli tocane

yesene' neda' zoa' mbalaz.

<sup>49</sup>Dios ben' chac chon da' nono

gac gon ba bene' da' güen

juisyw len neda'.

Toz len' naque' bene' laždao' xilaže' juisyw.

<sup>50</sup>Na' note'teze bene' chesape'

le' bala'an̄ do yichj do laže',

Diosen' cheži'ilaže'de' legaque'.

Cheži'ilaže'de' bene' že' na'a

na' yeži'ilaže'de' xi'in̄ diaža

chegaque' ca'.

<sup>51</sup>Bach blo'e Diosen' benachen'

yeļa' guac che'.

Na' ba bolague' bene' ya'laže' ca'.

<sup>52</sup>Ba bene' cont bene' gwnabia' ca'

bich yesenabi'e.

Na' bene' bi naque' bene' blao,

Diosen' ba bnežjue' latje

yesaque' bene' blao.

<sup>53</sup>Na' bene' chesedon, Diosen' ba

bnežjue' legaque' da' zan da'

güen.

Na' bene' gwni'a ca', ba bose'e

legaque', bibi bonežjue'

legaque'.

<sup>54</sup>Nach ba goclene' chio' bene'

Israel naccho ca xmose'.

Ba blo'ede' bitw ganlaže' chio',

san ba cheyaše' cheži'ilaže'de'

chio'.

<sup>55</sup>Ba bene' can' gože' da' Abraham

len yezica'chle da' xoxxta'ocho.

Na' soacze' yeyaše' yeži'ilaže'de'

xi'in̄ diaža che da' Abrahanna'

tolī tocane.

<sup>56</sup>Na' cate' ba goc šone bio' zoa

Marían' len Elisabeten', nach

Marían' beyej liže'.

### Golje Juan bene' bzoe' bene' nis

<sup>57</sup>Na' cate' bžin ža san Elisabeten',

gwzane' bi' byo dao'. <sup>58</sup>Na' cate'

goseneze bene' gualič chegaquen'

na' diaža chegaquen' Xancho Diosen'

ba beyaše' beži'ilaže'de' Elisabeten',

nach besyebchgüede' len le'. <sup>59</sup>Na'

goc xono' ža goljbe' na' jasezoe'be'  
señw dan' že' circuncióñ can'  
gosone' len yogo' bi' byo dao' bi'  
gosaljbe' lo diaža che da' Abraham.  
Na' gosaclaže' si' labe' Zacarías can'  
le xaben', <sup>60</sup>perw xñabe' gwne':  
—Bi gac. Cheyała' si'be' Juan.

<sup>61</sup>Na' legaque' gose'ene':  
—Notno diaža chele nita' beñe'  
zjale ca', neca xoxxta'ole.

<sup>62</sup>Na' gosone' señw gosenabde'  
xaben' nac che'nde' si' labe'. <sup>63</sup>Nach  
bene' señw gwñabe' to yagla' dao'  
da' bzoje': "Si' labe' Juan." Na' yogüe'  
besyebande'. <sup>64</sup>Beyož bzoje' da'na',  
la' gocte beñie', nach la' gwzolaote  
be'e diža' benxene' Diosen'. <sup>65</sup>Na'  
besyebane beñe' gualiž chegaquen'.  
Na' xtiža'gaquen' gos gwłaljen doxen'  
yež ca' zjachi' lo ya'ana' gan' mbane  
distritw Judean'. <sup>66</sup>Na' yogo'lol  
beñe' gosende' dižan' gosone' xbab  
lo' yichjlažda'ogüe' che da' ca', na'  
gosene':

—¿Bixe gon bdao'na'?

Gosene' ca' le gosenezde' zoacze  
Xancho Diosen' len lebe'.

### Diža' da' be' Zacarías

<sup>67</sup>Nach gwnabia' Spiritw che  
Diosen' yichjlaždao' Zacaríasen',  
nach be'e xtiža' Diosen', gwne':

<sup>68</sup>Chonxena' Xancho Dios ben'  
chonxen chio' beñe' Israel.  
Cheyaše' cheži'ilaže'de' chio'  
naccho nación che' na' ba  
chsele' bene' yebej chio' lo da'  
malen'.

<sup>69</sup>Na' bena' bač za' cont yebej  
chio' lo da' malen', naque'  
beñe' gwnabia' gual,  
na' naque' xi'in diaža che da' rey  
David ben' goc xmos Diosen'.

<sup>70</sup>Chac can' gwna Diosen' len  
cho'a da' beñe' ca' gwsele'  
cani', beñe' gosac lo ne'e  
goso'e xtižen'.

<sup>71</sup>Ba za' ben' gwne' yosle' chio' lo  
na' yogo' beñe' chesegue'e  
chio'.

<sup>72</sup>Chac can' gože' da' xoxxta'ochó  
ca' yeyaše' yeži'ilaže'de'  
legaque'.

Bi chanlaže', san chone' yogo' da'  
ba gwne' gone' gaclene' chio'.

<sup>73</sup>Diosen' chone' can' gwlo'e da'  
bałi lao da' xoxxta'ochó da'  
Abraham gože'ne' gaccze can'  
gwnen'.

<sup>74-75</sup>Gwne' yosle' chio' lo na' beñe'  
chesegue'ede' chio'.

Nach gac lažda'ochon' xilaže' lao  
le' na' gonxenchone' sin cbi  
žebcho,

na' šejcho liča gonxenchone'  
šlac de yela' mban checho.

<sup>76</sup>Nach Zacaríasen' gože' bdao'  
čen':

Bdao' chia', beñach yesene' chio'  
naco' beñe' choe' xtiža' Dios,  
Dios ben' naque' la'zelagüe  
beñe' blaó.

Yesene' ca' da' cuialaguo' lao  
Xancon' na' go'o xtižen' cont  
nita' beñe' yosozenague' che'  
cate' yide'.

<sup>77</sup>Gwsed gwlo'edo' neto' can'  
chaclaže' Diosa' yebeje' chio'  
naccho nación che' lo da' mala'  
na' yezi'xene' xtoła'chon'.

<sup>78</sup>Diosen' cheyaše' cheži'ilaže'de'  
chio',  
le len' gwlo'e be'ni' che' lo'  
laždao' chio' beñach.

<sup>79</sup>Cue'e be'ni' che' lo' yichjlaždao'  
chio' naccho ca beñe' chaš

ga nac chol, chio' chžebcho  
gatcho.

Na' gwzejni'ide' chio' benač  
naquen' soa cuezcho yežlio  
nga.

Can' be' Zacaríasen' xtiža' Diosen'.

<sup>80</sup>Na' Juanna' zej chcha'obe' zejte  
chac yichjlažda'oben' can' chazlaže'  
Diosen'. Na' jasoe' latje daš. Na'ate  
zoe' cate' gwzolažüe' gwdičjue'ede'  
xtiža' Diosen' len bene' Israel ca'.

### Caten' golje Jesúsen'

(Mt. 1:18-25)

**2** Na' lecž šlac gwnabia' rey  
César Augusto, bene' mandadw  
gwyas to censo cont nezde' bał  
bene' že' to to yež da' zjachi' doxen  
yežlio gan' chnabi'e. <sup>2</sup>Na' lecž cana'  
Cirenio naque' gobernador gan' nzi'  
Siria. Na' naquen' da' nechw bchele'  
bał bene' že' to to yež. <sup>3</sup>Na' yogo'loł  
bene' jaya'aque' lažgaque' jasyede  
cuente' cuine' cont bosochele' le'.  
<sup>4</sup>Na' José naque' diaža che da' rey  
David. Da'n'an' beze'e Nazaret gan'  
mbane distritw Galilea, beyeje' yež  
Belén dan' nac laž da' rey David. Na'  
chi' yež Belén gan' mbane distritw  
Judea. <sup>5</sup>Beyeje' jayde cuine' cuente  
na' zenche'e no'ol che' Marían' perw  
bina' yeseca'a lježe'. Na' Marían' ba  
no'e bdao'. <sup>6</sup>Na' šlac nite' Belén bžin  
ža sane'. <sup>7</sup>Na' gwxxane' bi' nechw,  
to bi' byo dao', na' btobe'be' lache'  
na' gwlo'ebe' ga chesagw beyix'e,  
da' bich bi latje yo'o mesónna' par  
legaque'.

Angl ca' bosozende' bene' güeyoe  
xila' ba golje Jesúsen'

<sup>8</sup>Na' že'na' yix'e' che yež Belén  
na'ate že' bene' güeyoe xila' chesape'

xila' chen'. <sup>9</sup>Na' to angl bene' gwsela'  
Xancho Diosen' bžine' gan' nita'  
bene' güeyoe xila' ca', na' be'ni' che  
Xancho Diosa' gwyechjen bsenin'  
gan' nite'na'. Na' besežebchgüe'.

<sup>10</sup>Na' gož angla' legaque':

—Bitw žeble. Na'a chixjue'eda'  
le'e to diža' güen da' yesebechgüe  
yogo'loł bene'. <sup>11</sup>Na'aža lo yež che  
rey David ba golje bena' gac yebeje'  
benachen' lo da' mal. Naque' Cristo,  
na' zeje diža' naque' ben' gwsela'  
Dios cont nabi'e, na' lecze naque'  
Xancho. <sup>12</sup>Cont yeželele bdao'na',  
quina naquen: bdao'na' ba ntobe'be'  
lache' na' debe' gan' chesagw beyix'e'  
ca'.

<sup>13</sup>Beyož gwna angla' ca' la'  
besežinte bene' zan angl gan' zoa  
angl nechua', za'aque' gan' zoa  
Diosen'. Na' chesonxene' Diosen'  
chesene':

<sup>14</sup>iChonxencho Diosa' ben' zoa  
yaba,  
na' lo yežlio yesezoa yesebez  
benachen' binlo, con bena'  
cheson can' chazlaže' Diosen'.

<sup>15</sup>Na' cate' besyeya'ac angl ca'  
zjaya'aque' yaba, na' bene' güeyoe  
xila' ca' gose' lježe':

—Yeyejcho Belén šjayna'cho  
dan' ba goc can' nac dan'  
gwsela' Xancho' angl quinga  
bedesedixjue'ede' chio'.

<sup>16</sup>Na' beseya'acs bene' güeyoe  
xila' ca' jaya'aque' Belén. Na'  
besyeželde' Marían' len Josén' na'  
len bdao'na'. Na' bdao'na' debe'  
gan' chesagw beyix'e' ca'. <sup>17</sup>Beyož  
besele'ede' can' ba goquen, na'  
goso'e diža' che bdao'na' len bene'  
ca' yezica'chle ca nac dan' gož  
anglen' legaque'. <sup>18</sup>Na' yogo'loł bene'



ca' gosende' diža' dan' gosoe' bene' güeyoe xila' ca' besyebande'. <sup>19</sup>Na' lecze Marían' gwlo'o yichje' yogo'loł diža' dan' gosoe' bene' güeyoe xila' ca' na' bene' xbab lo' yichjlažda'ogüe' bi zejen. <sup>20</sup>Nach besyeya'ac bene' güeyoe xila' ca' chesonxene' Diosen'. Na' cheso'e diža' nacchgua Diosen' bene' güen da' ba goc yogo'loł da' ba gosende' na' besele'ede' dan' gož anglen' legaque'.

**Diaža che Jesúsen' jasesane'be'  
lo' yodao' blaona'**

<sup>21</sup>Cate' goc xono' ža golje bdao'na' jasezoe'be' señw da'na' nzi' circuncisión, na' bososi'e lab'e Jesús, can' ben anglen' mandadw cate' za' gua' Marían' lebe'.

<sup>22</sup>Na' cate' gwde ba beyac Marían' xilaže' len bdao'na' con can' bzoj da' Moisésen', nach ja'aque' ciuda Jerusalén goselene'be' jasesane'be' lao Xancho Diosen'. <sup>23</sup>Gosone' can' nyoj ley che' dan' ža: "Yogo' bi' byo dao' bi' nechw cheyała' gache' lo na' Dios." <sup>24</sup>Nach gosonxene' Diosen', gosone' can' ža ley che Xancho Dios dan' žan: "'Cheyała' gotle čop ngolbex o čhope plomxtil."

<sup>25</sup>Na' Jerusalénna' gwztoa to bene' le' Simeón. Benan' gwyejcz'e bene' da' güen lao Diosen' na' benxene' le', na' gwleze' batcan' yid Cristo ben' seła' Xancho Diosen' cont yebeje' bene' Israel ca' lo da' mal. Na' Spiritw che Diosen' gwyo'on lo' yichjlaždao' Simeón, <sup>26</sup>na' bzejni'in le' bi gate' še bina' le'ede' Criston'. <sup>27</sup>Na' Spiriton' benen cont gwyeje' yodao' blaona', na' zoe' yodao'na' cate' besežin xaxna' Jesúsen' zjano'ebe' cont yesone' len lebe'

can' non ley čegaquen' mandadw. <sup>28</sup>Nach Simeónna' gwlene'be' nach benxene' Diosen', gože'ne':

<sup>29</sup>Xana' Dios, bačh goc can' gwnaon'.

Ben latje yeyeda' binlo gana' zo'na', neda' naca' xmoso'.

<sup>30</sup>Ba ble'eda' bena' zedyelej neto' lo da' mal.

<sup>31</sup>Naque' bene' gwnalažo' gwseło' neče yogo'loł benačh.

<sup>32</sup>Na' cue'e be'ni' che' lo' yichjlaždao' bene' cbi zjanaque' bene' Israel.

Na' gaque' la'zelagüe bene' zaca' len neto' bene' Israel.

<sup>33</sup>Nach xaben' len xna'ben' besyebande' ca diža' chebe' dan' be' Simeónna'. <sup>34</sup>Na' Simeónna' gw nabde' Diosen' cont gac güen čegaque'. Na' gože' Marían':

—Bene' Israel ca' yesejnilaže' xi'ino' nga yesenite' mbalaz, na' bene' Israel ca' cbi yesejnilaže'ne' bi yesenite' mbalaz. Zedelo'ede' benačhen' can' chaclaže' Diosen' goncho, perw zane' bi yesejle' che'. <sup>35</sup>Nach Diosen' gwlo'e non' chzenag che' na' non' cbi chzenag. Na' cacze chac ga chaz cwšiyw gac lo' yichjlažda'oguo' catequen' žaglaguo' len da' gac che'.

<sup>36</sup>Na' lecze yodao' blaona' gwztoa to no'ole le Ana, na' cho'e xtiža' Diosen'. Naque' xi'in da' ben' le' Fanuel na' naque' diaža che da' Aser. Bšagne'e cate' naque' no'ol güego', perw na' gaž izga gwzcoalene' bene' che' na' gote', na' bga'ane' güezebe. Na' Anan' ba naque' to bene' gole, <sup>37</sup>taplalj tap izde'. Bicze chechoje' yodao' blaona'. Leca chonxene' Xancho Diosen' do ža do

yel, gwzoatie' tgüeje bene' gwbas na' con gwzoachgüe' boļ giüize' Diosen'.  
<sup>38</sup>Na' goquen' gwbiga' Anan' gan' zoa Josén' len Marían' lo' yodao'na' na' be'e yela' choxclen che Diosen' bach gwsele' Jesúsén'. Na' be'e diža' che Jesúsén' len yogo' bene' ca' že' Jerusalén ben' chesebeze' batca' seļa' Diosen' ben' yebeje' legaque' lo da' malen'.

### Jaya'aque' Nazaret

<sup>39</sup>Nach Josén' len Marían' cate' beyož gosone' yogo'loļ dan' non ley che Xancho Diosen' mandadw yesone', jaya'ac lažgaque' Nazaret gan' mbane distritw Galilea. <sup>40</sup>Na' Jesúsén' zej chcha'ogüe' na' zej chchachlaže'. Na' ca zej chcha'ogüe' na' zej chejni'ichde', na' Diosen' nži'iláže'de'ne'.

### Can' ben Jesúsén' chašil yodao' blaona'

<sup>41-42</sup>Na' xaxne'e ca' yogüiz chja'aque' ĩni da' chala' Jerusalén chjaseze'ede' can' goc cate' Diosen' betue' bi' nechw che yogo' bene' Egipto na' bosle' bene' Israel. Šižinw ize Jesúsén' cate' goseche' xaxne'en le' ja'aque' ĩnin' Jerusalén. <sup>43</sup>Na' cate' gwde ĩnina' besyeya'aque', perw Jesúsén' bega'ane' ciuda Jerusalén. Na' xne'ena' len Joséna' bi gosacbe'ede'. <sup>44</sup>Con gosacde' ba zjayde' txen len bene' ca' nžaggaque'. Na' tža nez ba gosa'aque' cate' gwzolao chesyeyiljue'ne' ladjo diaža chegaque' na' no bene' xmigüe',  
<sup>45</sup>perw bitw besyeželde' le'. Nach besyebi'e jaya'aque' Jerusalénna' da' yoble cont šjasyediljue' le'.

<sup>46</sup>Na' beyoņ žach besyeželde' Jesúsén' chašil yodao' blaona',

chi'e gachol bene' ca' chososed chosolo'ede' dan' bzoj da' Moisés. Jesúsén' chzenague' xtiža'gaquen' na' zanen chnabde' legaque'. <sup>47</sup>Na' yogo'loļ bene' ca' chosozenague' xtiža' Diosen' da' cho'e chesyebande' can' chejni'ide' na' can' choži'e xtiža' bene' ca' zjansed dan' bzoj da' Moisés. <sup>48</sup>Na' cate' besele'e xaxne'en le', besyebande', na' xne'en gože' le': —Xi'indagua, žbixchen' chondo' neto' ca'? Xao' nga na' neda' ba gwdato' beyiljwto' le', na' da' juisyw ba ble'eto'.

<sup>49</sup>Jesúsén' gože' legaque': —žBichen' beyiljwle neda'? žBi nezele liž Xa' ngan' cheyala' soa'?  
<sup>50</sup>Perw xaxne'e bitw gosejni'ide' bi zejen dan' gože' legaque'.

<sup>51</sup>Na' beyeje' yež Nazaret len xaxne'e bzenague' chegaque'. Na' gwlec yichj xne'ena' yogo'loļ dan' goca'. <sup>52</sup>Na' ca' chac zej chejni'iche Jesúsén' na' zej gwcha'oché', na' Diosen' len benača' zej chesazlaže'che' le'.

### Juan gwdixjue'ede' diža' güen che Diosa'

(Mt. 3:1-12; Mr. 1:1-8; Jn. 1:19-28)

**3** Cate' lo iz šino' dan' chnabia' César Tiberio doxen ga mbane nación Roma, izna' goc Poncio Pilato gobernador che distritw Judea, na' goc Herodes gobernador che distritw Galilea. Na' bene' biše' Herodesen', ben' le Felipe, goque' gobernador che distritw Itorea na' che distritw Traconite. Na' goc Lisantias gobernador che distritw Abilinia. <sup>2</sup>Nach lecze izna' Anás na' Caifás gosacche' bxož blao che bene' Israel. Izna' Juan ben' naque'

xi'in Zacarías gwzoe' to latje daš.  
 Nach Diosen' be'lene' Juanna' diža'.  
<sup>3</sup>Na' Juanna' gwyeye' yogo'lol' yež  
 dan' nita' gala'ze yegw Jordán,  
 jatixjue'ede' yogo'lol' bene' cheyała'  
 yesyetinjde' xtola'gaque' na' yesezoe'  
 nis cont nitlao xtola'gaquen'.  
<sup>4</sup>Juanna' bene' dan' bzoj da' Isafas  
 ben' be' xtiža' Diosen' cani'te, gana'  
 žan:

Bena' chne' zižje latje dašen', že':  
 "Le gonšagüe' yichjlažda'olen'  
 cont soale gwzenagle che  
 Xanchon' cate' yide',  
 le cuejyichj da' malen' chonle  
 cont yichjlažda'olen' gaquen  
 ca to nez da' ba gosonšagüe'.

<sup>5</sup>Gwžin ža cate' yogo' ya'a yegw  
 ca' yesyeyaquen laše',  
 na' no nez da' nacchgua bxoca'  
 yesyeyaquen licha,  
 na' no nez da' nžaš nche'ene  
 yesyeyaquen ba'a.

<sup>6</sup>Na' yogo'lol' bene' yesacbe'ede'  
 can' chaclaže' Diosen' yebeje'  
 benachen' lo da' mal."

<sup>7</sup>Na' bene' zan ja'aque' gan' gwzoa  
 Juanna' cont gwzoe'ne' nis. Na'  
 Juanna' gože' legaque':

—Le'e nacchguale bene' zgot  
 na' bene' gwxiye'. ¿Chaquale  
 guac yelale lao castigw dan' sela'  
 Diosen' caten' gone' yela' justis  
 che benachen'? <sup>8</sup>Še da' li ba  
 betinjjele xtola'le, cheyała' gonle  
 da' nac güen cont yesacbe'e bene'  
 ba boša' yichjlažda'olen'. Na' bitw  
 gonle xbab gaquale Diosen' bitw  
 gone' le'e castigw che xtola'len'  
 lagüe da' nacle xi'in diaža che  
 da' Abrahanna'. Bitw nacho leca  
 chyažje Diosen' le'e. Guac gone'  
 cont yej quinga yesyeyaquen xi'in

diaža che da' Abrahanna'. <sup>9</sup>Ca nac  
 le'e, še bi chonle can' chazlaže'  
 Diosen', zaca'leble ca to yag frut da'  
 bibi chbia. Na' yogo'te yag frut da'  
 bibi chbia, chog xan yaga' len na'  
 gwzeyen'.

<sup>10</sup>Nach bene' ca' chosozenag  
 xtiže'na' gosenabde' Juanna',  
 gose'ene':

—¿Bica' da' cheyała' gonto'?

<sup>11</sup>Na' gože' legaque':  
 —Ben' nape' chope camis cheyała'  
 gwnežjue' ton che bene' bi de che'.  
 Na' lecze ca' che ben' de da' gagüe',  
 cheyała' gwnežjue' che ben' bi de  
 gagüe'.

<sup>12</sup>Na' cate' to chope bene'  
 güechixjw ca' jasebigue' cont gwzoa  
 Juanna' legaque' nis, na' gose'ene':  
 —Maestrw, ¿bica' da' cheyała'  
 gonto'?

<sup>13</sup>Na' gože' legaque':  
 —Bitw gwchixjwchle ca da'  
 cheyała' yeseyixjue'.

<sup>14</sup>Na' to chope bene' ca' zjanac  
 soldadw lecze gosenabde' le',  
 gose'ene':

—¿Chix neto'? ¿Bica'ch da' cheyała'  
 gonto'?

Na' Juanna' gože' legaque':  
 —Bitw ca'ale da' de che bene', na'  
 neca gonlaže'le len da' yosbague'le  
 bene' cont ca'ale xmechwgaque'. Le  
 gon banez len laxjwle.

<sup>15</sup>Na' bene' ca' gosezoe' lez yid  
 Cristo ben' naquen sela' Diosen'  
 yedenabi'e, na' gosacde' še Juanna'  
 naque' Cristo. <sup>16</sup>Na' Juanna'  
 gocbe'ede' xbab chegaquen' na' gože'  
 yogo'lol'e':

—Neda' da' li chzoa' le'e nis, perw  
 za' yid bena' gon cont soa Spiritw  
 che Diosen' lo' yichjlažda'olen'

nabian' le'e. Na' Spiriton' naquen ca yi', na' gwxi gwloan yichjlažda'ole. Bena' za' za' zaca'che' ca neda', na' da' nacchgüe' bene' zaca' bitw zaca' gona' xmandadoe' lechja' no xele'. <sup>17</sup>Benan' gone' len benachen' can' choncho cate' chdecho trigon' lo' rner. Chtobcho trigon' chgo'ošagüe'chon na' chzeycho yix beben'. Na' bene' chesejnilaže' Diosen', yotobe' legaque' cont šjasyenite' txen len le', na' bene' bi chesejnilaže' le', sele' legaque' lo yi' gabiļen' dan' cbi cheyol chenit.

<sup>18</sup>Da' zanch da' gwna Juanna' gwduxjue'ede' legaque' diža' güen, na' gwneyoede' legaque' yesejle'en. <sup>19</sup>Nach Juanna' gwdiļe' gobernador Herodes ca nac da' mal da' bene' beque'e Herodías ca xo'ole', le Herodíasna' naque' xo'ole Felipe bene' biše' Herodesen'. Na' Juanna' lecze be'e diža' yogo'loļ da' mal dan' ba ben Herodes. <sup>20</sup>Na' Herodesen', gualaz da' gwzenague' che Juanna', benche' yeto da' mal, gwlo'e Juanna' ližya.

### Can' goc caten' gwzoa Jesúsen' nis

(Mt. 3:13-17; Mr. 1:9-11)

<sup>21</sup>Nach šlac chzoa Juanna' bene' nis, bene' zan ja'ac cont bzoe' legaque' nis. Na' len Jesúsen' gwzoe' nis. Na' lo hora' Jesúsen' boļ güiže' Diosen' na' la' byaljwte yaba gan' zoa Diosen'. <sup>22</sup>Na' betj Spiritw che Diosen' bžinen gwzoan len le', na' ca hora' Spiriton' naquen ca to ngolbex. Na' gosende' gwne Dios ben' zoa yaban', gwne:

—Le' naco' Xi'ina' bene' chacchgüeda', na' chebe chezaquelaže'chgüeda' chio'.

### Diaža che Jesúsen'

(Mt. 1:1-17)

<sup>23</sup>Na' ca do šichoa ize Jesúsen' cate' gwzolao bene' yogo'loļ da' zedeyene'. Na' bene' ca' gwnita' na' gosone' xbab še naque' xi'in Joséna'. Josén' naque' xi'in Elí, <sup>24</sup>na' Elí naque' xi'in Matat, na' Matata' naque' xi'in Leví, na' Levína' naque' xi'in Melqui, na' Melquin' naque' xi'in Jana, na' Janan' naque' xi'in yeto ben' le' José. <sup>25</sup>Na' Joséna' naque' xi'in Matatías, na' Matatíasen' naque' xi'in Amós, na' Amósen' naque' xi'in Nahum, na' Nahunna' naque' xi'in Esli. Na' Eslin' naque' xi'in Nagai, <sup>26</sup>na' Nagain' naque' xi'in Maat, na' Maata' naque' xi'in Matatías, na' Matatíasen' naque' xi'in Semei, na' Semein' naque' xi'in José, na' Josén' naque' xi'in Judá. <sup>27</sup>Na' Judán' naque' xi'in Joana, na' Joanan' naque' xi'in Resa, na' Resan' naque' xi'in Zorobabel, na' Zorobabelen' naque' xi'in Salatiel, na' Salatielen' naque' xi'in Neri, <sup>28</sup>na' Nerin' naque' xi'in Melqui, na' Melquin' naque' xi'in Adi, na' Adin' naque' xi'in Cosam, na' Cosanna' naque' xi'in Elmodam, na' Elmodanna' naque' xi'in Er. <sup>29</sup>Na' Era' naque' xi'in Josué, na' Josué'n' naque' xi'in Eliezer, na' Eliezeren' naque' xi'in Jorim, na' Jorinna' naque' xi'in Matat. <sup>30</sup>Na' Mataten' naque' xi'in Leví, na' Levín' naque' xi'in Simeón, na' Simeóna' naque' xi'in Judá, na' Judán' naque' xi'in José, na' Josén' naque' xi'in Jonán, na' Jonánna' naque' xi'in Eliaquim. <sup>31</sup>Na' Eliaquinna' naque' xi'in Melea, na' Melean' naque' xi'in

Mainán, na' Mainánna' naque' xi'in Matata, na' Matatan' naque' xi'in Natán. <sup>32</sup>Na' Natánna' naque' xi'in David, na' Davida' naque' xi'in Isaí, na' Isaín' naque' xi'in Obed, na' Obeda' naque' xi'in Booz, na' Boozen' naque' xi'in Salmón, na' Salmónna' naque' xi'in Naasón. <sup>33</sup>Na' Naasónna' naque' xi'in Aminadab, na' Aminadaba' naque' xi'in Aram, na' Aranna' naque' xi'in Esrom, na' Esronna' naque' xi'in Fares. Na' Faresen' naque' xi'in Judá, <sup>34</sup>na' Judán' naque' xi'in Jacob, na' Jacoben' naque' xi'in Isaac, na' Isaaquen' naque' xi'in Abraham, na' Abrahanna' naque' xi'in Taré, na' Tarén' naque' xi'in Nacor. <sup>35</sup>Na' Nacoren' naque' xi'in Serug, na' Seruga' naque' xi'in Ragau, na' Ragaun' naque' xi'in Peleg, na' Peleguen' naque' xi'in Heber. Na' Heberen' naque' xi'in Sala, <sup>36</sup>na' Salán' naque' xi'in Cainán, na' Cainánna' naque' xi'in Arfaxad, na' Arfaxaden' naque' xi'in Sem, na' Senna' naque' xi'in Noé, na' Noén' naque' xi'in Lamec. <sup>37</sup>Na' Lamequen' naque' xi'in Matusalén, na' Matusalénna' naque' xi'in Enoc, na' Enoca' naque' xi'in Jared, na' Jareden' naque' xi'in Mahalaleel. Na' Mahalaleela' naque' xi'in Cainán, <sup>38</sup>na' Cainánna' naque' xi'in Enós, na' Enósen' naque' xi'in Set, na' Seta' naque' xi'in Adán, na' Adánna' naque' xi'in Dios.

**Satanásen' goclažen' co'oyelan'  
Jesúsen' cont gone' da' mal**

(Mt. 4:1-11; Mr. 1:12-13)

**4** Na' Spiritw che Diosen' gwnabian' yichjlaždao'

Jesúsen'. Na' Jesúsen' beze'e cho'a yegw Jordán, na' Spiritua' benen cont gwyeje' latje daš. <sup>2</sup>Choa ža gwzoe' latje dašen' na' lao choa žan' bicze bi gwdagüe'. Na' cate' gwde choa žan' gwdone'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. <sup>3</sup>Nach gož Satanásen' le':

—Še le' naco' Xi'in Dios, gož yej nga yeyaquen yetextil.

<sup>4</sup>Na' gož Jesúsen' len:

—Nyojcze Xtiža' Diosa' žan:

“Gague yela' guagw na'zen' chyažje chio' benach cont gac bancho, san lecze chyažjecho yogo'lol diža' dan' ža Diosen'.”

<sup>5</sup>Na' gwche' Satanásen' le' to lo ya'a sibe na' bedao'nez blo'en le' yogo'lol nación da' zjachi' yežlio.

<sup>6-7</sup>Nach gožen le':

—Doxen yela' gwnabia' da' de yežlio nga naquen lo na' cont gwnežjuan' con no che'nda'. Še le' gwzoa xibo' gonxeno' neda', nach gona' le' yela' gwnabia' che nación ca' zjachi' yežlio nga na' len yela' zaca' yela' xdan che nación ca'.

<sup>8</sup>Nach Jesúsen' gože' Satanásen':

—Becuas ca'ale Satanás. Nyojcze Xtiža' Diosen' žan: “Cheyala' šejnilaže'cho Xancho Diosen' na' toz le' gonxencho.”

<sup>9</sup>Nach Satanásen' gozche'en le' ciuda Jerusalén. Na' bcuen le' yichjo' yodao' blao gan' nac la'zelagüe sibe, na' gožen le':

—Še len' naco' dogualje Xi'in Dios, nga boslažo' cuino', <sup>10</sup>le' nyojcze Xtiža' Diosen', žan:

Sela' Diosen' bene' ca' zjanac angl che' yesaclene' le' na' yesape' le',

<sup>11</sup> yesoxe' le' cont bi chego' no yej.

<sup>12</sup> Nach Jesúsen' gožen':

—Lecz ca' nyoj Xtiža' Diosen' žan:  
“Bitw goncho Xancho Diosen' prueba  
še lede' can' žen'.”

<sup>13</sup> Beyož gota'bia' bi gwzoe  
Satanásen' co'oyelan' Jesúsen' gone'  
da' mal, nach becuasen šlož len le'.

**Jesúsen' gwzologüe' chyixjue'ede'  
diža' güen che Diosen' distritw  
Galilea**

(Mt. 4:12-17; Mr. 1:14-15)

<sup>14</sup> Nach Jesúsen' beyeje' distritw  
Galilea, na' yela' guac che Spiritw  
che Diosen' gwzoan len le'. Na'  
yogo'lo' beňe' že' yež ca' zjachi'  
doxen Galilea gosenezde' che  
Jesúsen'. <sup>15</sup> Na' Jesúsen' bsd blo'ede'  
legaque' lo' yodao' chegaquen, na'  
yogo'lo' beňe' ca' gosonxene' le'.

**Bežin Jesúsen' Nazaret**

(Mt. 13:53-58; Mr. 6:1-6)

<sup>16</sup> Na' bežin Jesúsen' yež Nazaret  
gan' gwcha'ogüe', na' gwyo'e  
yodao' ža che Dios can' ba yolagüe'  
chone', na' gwzechede' cont gwlab'e'.  
<sup>17</sup> Na' ben' yo'o lo ne'e yodao'na'  
bnežjue'ne' yiš da' ndobe gan' nyoj  
dan' bzoj da' Isafas ben' be' Xtiža'  
Diosen' cani'te. Na' Jesúsen' bzaše'  
yišen' na' beželde' ga nyojen žan:

<sup>18</sup> Zoa Spiritw che Diosa' len neda',  
na' Diosen' gwleje' neda' zedeya'  
diža' güen len beňe' yaše'.  
Na' gwsele' neda' zedeyena'  
cont yesyeyaclaže' beňe' ca'  
chesacyaše'de'.  
Na' za'a cont gwsana' beňe' ca'  
zjade ližya.  
Na' zedeyena' cont yesyele'e  
beňe' lchol.

Na' beňe' chy chzaca', zedeyena'  
cont noch no yosoči  
yososaque' legaque'.

<sup>19</sup> Na' zedetixjue'eda' ba bžin ža  
gaclen Diosen' beňachen'.

<sup>20</sup> Jesúsen' botobe' yišen' na'  
bonežjuen' ben' yo'o lo ne'e yodaon'  
na' gwchi'e. Na' yogo' beňe' ca' nita'  
yodaon' la' gosena'tie' le'. <sup>21</sup> Nach  
gwzolao be'e diža' gwne':  
—Ža na'aža ba chac can' ža Xtiža'  
Diosen' dan' ba benele nga.

<sup>22</sup> Na' yogo' beňe' ca' gosende' diža'  
dan' be'e besyebande' catec mba nac  
xtiža' Jesúsen'. Na' gosenie' güen  
che' na' gose' lježe':

—¿Gague benga xi'in Josén'?

<sup>23</sup> Nach gož Jesúsen' legaque':

—Ye'ljale neda' can' ža diža' dan'  
de: “Beňe' güen rmed le', beyon  
cuino'.” Na' lecze ye'ljale neda':  
“Dan' chesene' beno' yež Capernaum  
da' bebane beňe', lecz can' cheya'la'  
gono' lažcho nga.”

<sup>24</sup> Nach goze'e legaque':

—Da' li chnia' le'e, beňe' gualaž  
che note'teze beňe' choe' xtiža'  
Diosen' bitw chesezi'e che'. <sup>25</sup> Ca  
tiemp che da' Elías ben' be' xtiža'  
Diosen' cani', bibi yejw goc šon  
iz yo gašje na' goc gwbin juisyw  
chegaque' doxen gan' zelao mbane  
Israel. Naquen da' li gwnita' zan  
no'ol güezebe yež ca' gan' mbane  
Israel ca tiempa', <sup>26</sup> perw Diosen' bi  
gwsele' Elíasen' cont gaclene' ne to  
beňe' güezeb ca'. Gwsele' le' yeto  
yež yoble gan' nzi' Sarepta gan'  
mbane ciuda Sidón cont goclene' to  
no'ol güezebe. <sup>27</sup> Na' lecz ca' tiemp  
che da' Eliseo ben' be' xtiža' Diosen'  
cani', gwnita' zan beňe' Israel beňe'  
gosacšene len yižgüe' da' nzi' lepra.

Ne to legaque' bi beyon Eliseon'.  
Toz bene' zito' bene' Siria, ben' le'  
Naamán, beyon Eliseon'.

<sup>28</sup>Na' yogó' bene' ca' že'  
yodao'na' cate' gosende' dan' gwna  
Jesúsen' beseža'achgüe'. <sup>29</sup>Na' la'  
besyezoža'te' na' besyebeje' Jesúsen'  
yežen', na' goseche'ene' to lo ya'a da'  
zoa gała'ze, gosacłaže' yososłažo'e'ne'  
lo ya'a na'ate, <sup>30</sup>perw bibi goc  
yesonde' le'. Con beza' Jesúsen'  
bedie' gachoł gaque'.

**Jesúsen' bebeje' da' xigüe' dan' yo'o  
yichjlaždao' bene'**

(Mr. 1:21-28)

<sup>31</sup>Na' jasoe' yež Capernaum  
gan' mbane Galilean', na' ža  
che Dios bsed blo'ede' bene' ca'  
že' lo' yodao'na'. <sup>32</sup>Na' bene' ca'  
besyebande' ca' nac dan' bsed  
blo'eden', le' bzejni'ide' cacze to  
bene' nezdde' cayanen' nac xbab che  
Diosen'.

<sup>33</sup>Lo' yodao'na' gwzoa to bene'  
yo'o nyaze' da' xigüen'. Na' bosye'e  
gwne':

<sup>34</sup>—¿Bixchen' chgoša' chłaže'  
chío' len neto', Jesús bene' Nazaret?  
¿Zedežiayo'o neto'? Neda' nombi'a le'  
na' nezdde' naco' bene' laždao' xilaže'  
juisyw ben' gwseła' Diosen'.

<sup>35</sup>Nach Jesúsen' gwđile' da' xigüen'  
na' gožen':

—iSšago! Bechoj yichjlaždao'  
benga.

Na' bchix da' xigüen' bena' gachoł  
bene' ca' že'na' nach bechojen.  
Perw bitw benen le' zi'. <sup>36</sup>Na' leca  
besyebane yogó' bene' ca', nach gose'  
lježe':

—¿Bixen' chac? ¿Bixe da' coben'  
chlo'e benga? Nacbia' nape' yela'

chnabia' na' yela' guac, le chone'  
mandadw na' la' chechojte da' xigüe'  
da' yo'o nyaz bene'.

<sup>37</sup>Na' ca' nac dan' ben Jesúsen' gos  
gwłalje dıžan' doxen lagüe yež ca'  
zjachi' do na'.

**Jesúsen' beyone' taobi'in che  
Simónna'**

(Mt. 8:14-15; Mr. 1:29-31)

<sup>38</sup>Na' cate' beze'e yodao'na', na'  
gwyeje' liž Simón. Na' taobi'in che  
Simónna' chacsende', yo'e da' la'. Na'  
bosol güiže' Jesúsen' cont yeyone' le'.  
<sup>39</sup>Na' Jesúsen' gwzeche' cuite' gan'  
die', na' bcheque' gwđile' da' lan'  
cont bechojen. Nach taobi'in che  
Simónna' la' gwyastie' na' bsiñ'e da'  
gose'ej gosagüe'.

**Jesúsen' beyone' bene' zan**

(Mt. 8:16-17; Mr. 1:32-34)

<sup>40</sup>Na' cate' ba chxoa gwbižen'  
goseche'e con yogó' bene' chese'e  
yižgüe' jasesane' legaque' lao  
Jesúsna'. Na' Jesúsen' gwxoa ne'e  
yichj to toe' na' beyone' legaque'.

<sup>41</sup>Na' lecz ca' bebej Jesúsen' da'  
xigüe' da' yo'o yichjlaždao' bene'  
zan. Na' besyechojen gosenen zižje,  
gosenan:

—Le' naco' Xi'in Dios.

Na' Jesúsen' gwđile' legaquen  
na' bitw be'e latje bi yesenan, le  
gosenezen naque' Cristo ben' gwlej  
Diosen' cont yedenabi'e.

**Jesúsna' gwde' doxen Galilean' bsed  
blo'ede'**

(Mr. 1:35-39)

<sup>42</sup>Na' beteyo cate' gwye'ni', beze'e  
na' beyeje' to latje ga nono nła'. Na'  
bene' ca' besyeyiljue'ne' na' ja'aque'



gan' zoen'. Na' gosaclačže' yosozague'  
Jesúsen' cont bi yeze'e. <sup>43</sup>Na'  
Jesúsen' gože' legaque':

—Lecz ca' bene' ca' nita' yež  
yoble cheyała' šjalo'eda'ne' cont  
yosozenague' che Diosen' na' nabi'e  
yichjlažda'ogaque'. Diosen' gwsele'  
neda' cont šjatixjue'eda' legaque'  
xtižen'.

<sup>44</sup>Ca' goquen', Jesúsen' gwde'  
to to yež che distritw Galilea na'  
bsed blo'ede' bene' ca' lo' yodao'  
čhegaquen'.

#### Gosezene' be zan bel ya'a

(Mt. 4:18-22; Mr. 1:16-20)

**5** Na' šlac zecha Jesúsen' cho'a  
nisdao' da'na' nzi' Genesaret,  
besežag bene' zan na' bosochite'  
Jesúsen' da' gosaclačže' yosozenague'  
xtiža' Diosen' dan' bi'e cho'a nisdaon'.

<sup>2</sup>Na' Jesúsen' ble'ede' chope barcw  
dao' cho'a nisdaon'. Na' bene' gwxcn  
bel ca' ba besyežaše' lo' barcon' ba  
chesyeyibe' yixjw bel čhegaquen'.

<sup>3</sup>Na' Jesúsen' gwyo'e lo' barcw che  
Simónna' na' gw nabde' le' bosožigue'  
barcon' yelate' lo' nisen'. Na' Jesúsen'  
gwchi'e lo' barcon' blo'ede' bene' ca'  
že'na'. <sup>4</sup>Cate' beyož bi'e dižan' na'  
gože' Simónna':

—Le gwžiga'ch barcon' yelate'  
gan' nac sitjw, na' le gwzala' yixjw  
čhelen' na' senle belen'.

<sup>5</sup>Nach Simónna' gože' Jesúsen':  
—Maestrw, ba bento' žin do yel  
na' ne to nono bdoła'. Perw le' ba  
gwnao' yezolaoto', na' gwzala'to'  
yixjw ca' da' yoble.

<sup>6</sup>Na' beyož bosozala' yixjw  
čhegaquen' zjanyicoco'ten belen',  
yeleze ca' yesyecheza'ten. <sup>7</sup>Na'  
bene' ca' zjanita' lo' barcw che

Simónna' gosone' señw gosaxe' bene'  
lježen' že' yeto lo' barcw yoble  
cont yesaclene' legaque' yesyebeje'  
yixjon'. Yelez ca' gwdebe nisen'  
chopte barcw ca' dan' gosegü'e bel  
zan lo'enna'. <sup>8</sup>Nach Simónna', ben'  
lecz le' Pedro, cate' ble'ede' da'na'  
goquen' na' bzoa xibe' lao Jesúsen'  
gože' le':

—Xana', neda' naca' to bene' mal,  
bibi zaca' par so' nga len neda'.

<sup>9</sup>Gwne' ca' le le' txen len  
bene' lježe' ca' že' lo' barcon'  
besyebanchgüede' da' gosezene'  
bel zanna'. <sup>10</sup>Lecz ca' besyebane  
xi'in ben' le Zebedeo, zjanac chop  
biše'tie', Jacobo len Juan. Bene' ca'  
chesone' žin len Simónna'. Nach  
Jesúsen' gože' Simónna':

—Bitw žebo'. Le' naco' bene' gwxcn  
bel, na' chebejo' belen' lo' nisen';  
perw na'a gona' cont gaxle bene'  
yesyechoje' lo' da' malen'.

<sup>11</sup>Na' cate' besyežinlene' barcon'  
yo biž, nach gosebejyichje' barcon'  
len yogo' xšinlaže' ca' na' ja'aclene'  
Jesúsen'.

#### Jesúsen' beyone' to bene' che'ede' yižgüe' dan' nzi' lepra

(Mt. 8:1-4; Mr. 1:40-45)

<sup>12</sup>Na' šlac Jesúsen' zoe' to yež na'  
bžin to bene' che'ede' to yižgüe' dan'  
nzi' lepra. Na' bena' cate' ble'ede'  
Jesúsen', bzoa xibe' lagüe' na' bol  
güiže'ne' gože'ne':

—Xana', še chaclažo', guac yeca'o  
yižgüe' dan' che'eda' nga.

<sup>13</sup>Nach Jesúsen' bli' ne'e na'  
gwxcn yichje' na' gože' le':

—Chaclaža' yeyacdo'. Beyaque.

Nach la' bega'ate yižgüe' dan'  
che'eden'. <sup>14</sup>Nach Jesúsen' bene'

mandadw gože' le' notno ye'e can' ba beyone' le'. Na' gože' le':

—Con gwyej jaṇa' bxoza' cont le'ede' baḥ beyacdo'. Na' bnežjo da' cheyaḷa' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

<sup>15</sup>Na' tža tža gos gwlaḷje diža' ca nac yeḷa' guac dan' ben Jesúsén'. Na' besedob bene' zan cont bosozenague' xtiža' Jesúsén' na' cont beyone' legaque' len bite'teze yižgüe' da' chese'ede'. <sup>16</sup>Nach Jesúsén' bchoje' to ši'i güeje jaḷ güiže' Diosen' to latje daš.

**Jesúsén' beyone' to bene' bi chda  
šḷa'a ṇi'a ne'e**

(Mt. 9:1-8; Mr. 2:1-12)

<sup>17</sup>Nach to ža zoa Jesúsén' to yo'o gan' chsed chlo'ede' bene'. Na' gaḷa'ze zjanita' zan bene' Israel bene' zjanzi' fariseo. Na' lecze zjachi' yeto cuen bene' ca' chososed chosolo'ede' dan' bzoj da' Moisés. Bene' ca' že'na' za'aque' yogo'loḷ yež ca' gan' mbane distritw Galilea len distritw Judea, na' lecze baḷe' za'aque' ciüda Jerusalén. Na' bosozenague' diža' da' be' Jesúsén'. Na' yeḷa' guac che Xancho Diosen' zoan len Jesúsá' na' beyone' bene' güe' ca'. <sup>18</sup>Na' besežin xonj bene' zjanlene' to bene' xinj, bene' bi chda šḷa'a ṇi'a ne'e, zjanxoe' le' to lo cam dao'. Na' gosacḷaže' yesedie' šjasesane' le' lao Jesúsá'.

<sup>19</sup>Na' da' že'chgua bene' zan bi goc latje yesedie' šjasesane' bene' güen' lao Jesúsén'. Nach bene' ca' gosepe' yichjo'ole gosesaljue' goseque'e tej na' beseḷetje'ne' len xcame'na'

gachol bene' ca' že' lo' yo'ona' cont bžine' lao Jesúsén'. <sup>20</sup>Cate' gocbe'e Jesúsén' gosejnilaže' le' na' gože' bene' güe'na':

—Xi'ina', ba bezi'xena' xtoḷon'.

<sup>21</sup>Na' bene' ca' chososed chosolo'e dan' bzoj Moisésá' na' bene' fariseo ca' gosene':

—¿Non' chaque benga naque' chne' ca'? Chon cuine' ca' Dios. Le nono zoa bene' gac yezi'xene' xtoḷa' benaḥen'. Toz Diosen' gac yezi'xenen'.

<sup>22</sup>Jesúsén' gocbe'ede' ca' nac da' cheseza'laže' na' gože' legaque':

—¿Bičhena' chza'laže'le ca' lo' yichjlažda'ole? <sup>23</sup>Še yapa'ne': “Ba bezi'xena' xtoḷo'na'”, bi nezele še napa' yeḷa' gwnabia' cont yezi'xena' xtoḷe'na'. San še yapa'ne': “Gwyas na' gwda”, na' nacbia' še napa' yeḷa' guac gac can' gwnian'. <sup>24</sup>Na'ach gona' cont gacbe'ele napa' yeḷa' gwnabia' cont yezi'xena' xtoḷa' benaḥ, neda' naca' bena' gwsela' Diosen' golja' benaḥ.

Nach gože' bene' xinja':

—Chapa' le' beyas, beyoa' xcamon', na' beyej ližo'.

<sup>25</sup>Nach la' beyaste bene' xinja', chesena'te bene' ca' nita'na'. Nach beyoa' xcamen' na' beze'e zjayda liže' chonxene' Diosen'. <sup>26</sup>Na' yogo'loḷ bene' ca' že'na' besyebande' yeḷa' guac che Jesúsén' dan' bene'na'. Nach gosonxene' Diosen', na' do chesežebe' gose' lježe':

—Da' yebanecho da' ca' ba ble'echo na'aža.

**Jesúsén' gwleje' Leví cont goque' le'  
txen**

(Mt. 9:9-13; Mr. 2:13-17)

<sup>27</sup>Gwdena' beza' Jesúsén' na' ble'ede' to bene' güeḥxijw bene' le'

Leví, chi'e latje gan' chchixjue'. Na' Jesúsen' gože' le':

—Da len neda'.

<sup>28</sup>Nach gwzoža' Levín' gwlejyichje' yogo' xšinlaze' na' gwejlene' Jesúsen'.

<sup>29</sup>Nach Levína' bene' to lni xen ližen' par Jesúsen', na' ja'ac bene' zan bene' güechixjw ca' na' bene' yezica'chle na' gosebe'lene' le' cho'a mesen' gosagüe'. <sup>30</sup>Na' bene' ca' chososed chosolo'ede' dan' bzoj Moisésen' na' len bene' fariseo ca' gosacyožlene' bene' ca' zjanaque' Jesúsen' txen, gose'e legaque':

—¿Nacxečen' che'ej chagwle txen len bene' güechixjw na' yebale bene' güen da' xinj ca'?

<sup>31</sup>Jesúsen' gože' legaque':

—Bene' cbi chesacšene bitw cheseyažjde' bene' güen rmed. Bene' ca' chesacšene, legaquen' cheseyažjde' bene' güen rmed.

<sup>32</sup>Gague bene' ba zjanaque' bene' güen len Diosen' zedeneyoeda' cont yesyetinjde' xtolen', san bene' güen da' xinj. Legaque' zjanaque' ca bene' cheseyažjde' bene' güen rmed.

**Gosenabde' Jesúsen' bixchen' cbi gwleje' tgüeje ža gwbas**

(Mt. 9:14-17; Mr. 2:18-22)

<sup>33</sup>Nach bal bene' gose'e le':

—Bene' ca' zjanaque' txen len Juan na' bene' zjanaque' txen len bene' fariseo ca' chesonchgüe' gwbas chosol güiže' Diosen'. Perw na' bene' ca' zjanaque' le' txen chese'ej chesagüe'. ¿Bixchen'?

<sup>34</sup>Nach gož Jesúsen' legaque':

—¿Guac yesezoa gwbas bene' chaxe' to ga chac yela' güešagna' šlac ben' bšagnan' zoalene' legaque'?

Bi gac. <sup>35</sup>Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

<sup>36</sup>Na' Jesúsen' be'e jempl nga bzejni'ide' legaque':

—Notno zoa bene' cheza' xe' da' cobe na' yode'en de'exo'. Še gone' ca' gwžiaye'e xe' da' coben' na' xe' de'exon' bitw gac leben len lache' coben'. <sup>37</sup>Na' neca zoa bene' chgue'e vino cobe lo' bzod yide'exo', le vino coben' chšon' yide'exon' na' lalje vino na' yesebiayi' chopen.

<sup>38</sup>Cheyalā' yesegue'e vino coben' lo' yid cobe cont bibi gaquen. <sup>39</sup>Na' ca nac bene' bach yolagüe' che'eje' vino golen', bitw ye'nde' ye'eje' vino coben', san že: “Vino golen' nacchen güen.”

**Bene' ca' zjanaque' Jesúsen' txen goselechje' trigon' gosagüen' ža che Dios**

(Mt. 12:1-8; Mr. 2:23-28)

**6** Na' to ža nac ža che Dios, Jesúsen' gwdie' gan' nyaž trigw len bene' ca' zjanaque' le' txen. Nach bene' ca' zjanaque' le' txen goselechje' trigon' na' gosexoben' gosagüen'. <sup>2</sup>Na' besele'e bal bene' fariseon' can' gosone' na' gose'e legaque':

—¿Bichen' chonle da' bi de lsens goncho ža che Dios?

<sup>3</sup>Na' Jesúsen' gože' legaque':

—¿Bina' gwlable can' ben da' rey David to ža cate' le' na' bene' lježe' ca' gosedone'? <sup>4</sup>Gwyo'o Davin' liž Dios na' jaxi'e yetextil da' nac che Dios da' bi chac gagw bene' bi nac bxoz, na' gwdagüen', na' lecze bnežjue' che bene' zja'ac len le'.

<sup>5</sup>Na' lecz ca' gwna Jesúsen':

—Naquen lo na' nia' bi da' nac  
güen goncho cate' nac ža che Dios,  
neda' naca' ben' gwsela' Diosen'  
golja' benach.

**Beyac to bene' nxo'on šla'a taque'**

(Mt. 12:9-14; Mr. 3:1-6)

<sup>6</sup>Na' yeto ža che Dios gozeje' lo  
yodaon' na' bsd blo'ede' bene' ca'  
že'na'. Na' ladjo bene' ca' zjaže'na'  
yo'o to bene' nxo'on taque' licha.

<sup>7</sup>Na' bene' ca' chososed chosolo'e  
dan' bzoj da' Moisés na' bene'  
fariseo ca' chosogüia chesene'e  
Jesúsen' še yeyone' bena' ža che  
Dios cont de da' yosode'ede' yesagüe'  
xya che'. <sup>8</sup>Na' gocbe'e Jesúsen' can'  
chesone' xbaben', na' gože' ben'  
nxo'on taque':

—Gwoža' na' gwzecha nga gachol.

Nach bena' bžine' gwzeche'  
lagüen'. <sup>9</sup>Na' Jesúsen' gože' bene' ca'  
že'na':

—¿Bi da' cheyala' goncho ža che  
Dios? ¿Goncho da' güen, še goncho  
da' mal? ¿Cheyala' yoslacho bene',  
še gwžiyi'chone'?

<sup>10</sup>Jesúsen' gwne'e yogo'te ben'  
že'na', nach gože' ben' nxo'on taque':

—Bli naon'.

Nach blien' na' taquen' beyaquen  
binlo. <sup>11</sup>Na' bene' ca' chososed  
chosolo'e leyna' na' len bene'  
fariseon' leca beseže'e na' gwzoloa  
bosoxi'e nacle yesone' len Jesúsen'.

**Jesúsen' gwleje' šižinw postlw**

(Mt. 10:1-4; Mr. 3:13-19)

<sup>12</sup>Na' to ža gwyej Jesúsen' to lo  
ya'a jel güiže' Diosen'. Na' do yel  
be'lene' Diosen' diža'. <sup>13</sup>Na' cate'  
gwe'ni', goxe' bene' ca' zjanaque'

le' txen, nach gwleje' šižinue' na'  
bsi'e legaque' postlw. <sup>14</sup>Bene' qui  
gwleje': Simón ben' bsi'e Pedro, na'  
bene' biše' Andrés, na' Jacobo, na'  
Juan, na' Felipe, na' Bartolomé, <sup>15</sup>na'  
Mateo, na' Tomás, na' Jacobo xiin  
Alfeo, na' Simón ben nac cananista,  
<sup>16</sup>na' Judas bene' biše' Jacobo, nach  
Judas Iscariote ben' bdie' Jesúsen' lo  
na' bene' chesegue'ede' le'.

**Jesúsen' bzejni'ide' bene' zan**

(Mt. 4:23-25)

<sup>17</sup>Na' beyetje' lo ya'an len legaque'  
na' gwzeche' ga nac to laše' len  
bene' ca' zjanaque' le' txen. Na' lecze  
nita' bene' zan bene' za'ac doxen  
Judean', do ciuda Jerusalénna' na'  
do gan' mbane yež ca' zjanzi' Tiro  
na' Sidón. Na' Tiro len Sidón zjachin'  
cho'a nisdao'. Na' len bene' ca'  
nita' chosozenague' xtiža' Jesúsen'  
zjanchixe bal bene' chese'e yižgüe'.  
Na' Jesúsen' beyone' legaque'. <sup>18</sup>Na'  
bene' ca' zjajo'o zjanyaz da' xigüen'  
yichjlažda'ogaque', Jesúsen' bebejen'.  
<sup>19</sup>Na' yogo' bene' goseyiljue' nacle  
yesone' cont yeselapa' na'gaquen'  
le', le gosenezde' nape' yela' guac  
cont yega'a yižgüe' chegaquen' še  
yesechele'ne'.

**Non' zoa mbalaz na' non' cbi zoa**

**mbalaz**

(Mt. 5:1-12)

<sup>20</sup>Na' Jesúsen' gwlis lagüe' gwne'e  
bene' ca' zjanaque' le' txen na' gože'  
legaque':

—Mbalaz zoa le'e bene' yaše', le'e  
chzenagle che Diosen' cont chnabi'e  
yichjlažda'olen'.

<sup>21</sup>'Mbalaz zoa le'e chdonle na'a,  
gwžin ža cate' bich tonle.

'Na' mbalaz zoa le'e chbežle na'a, gwžin ža cate' gwxižle.

<sup>22</sup>'Neda' naca' ben' gwsela' Diosen' golja' be<sup>n</sup>a<sup>ch</sup>. Na' mbalaz soale še dan' chejnilaže'le neda' chesegue'e be<sup>n</sup>e' le'e, na' chesyebeje' le'e lo' yodao' chegaque', na' cheseneye'e chele, na' chesene' nacle be<sup>n</sup>e' mal. <sup>23</sup>Le yebechgüe cate' chac da' quinga, na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xozxta'ogaque' len da' be<sup>n</sup>e' ca' goso'e xtiža' Diosen' cani'.

<sup>24</sup>'Na' nyaše'chguaze nac le'e be<sup>n</sup>e' gw<sup>n</sup>i'a. Chac güen chele na'a, perw gague toli tocanen' gac chele ca'.

<sup>25</sup>'Nyaše'chguaze nac le'e dechgua da' chagwle na'a. Gwžin ža cate' bich bi gata' chele.

'Nyaše'chguaze nac le'e chxižle na'a. Gwžin ža cate' yegüine'le na' cuežyaše'le.

<sup>26</sup>'Nyaše'chguaze nac le'e chesonxen yogo'lo<sup>l</sup> be<sup>n</sup>e' le'e. Ca'czen' goson da' xozxta'ogaque', gosonxene' be<sup>n</sup>e' ca' goseziye'e gosene' cheso'e xtiža' Diosen' cani'.

### **Cheya<sup>l</sup>a' gaquecho be<sup>n</sup>e' chesegue'ede' chio'**

(Mt. 5:38-48; 7:12)

<sup>27</sup>'Le'e chzenagle chia'a, cheya<sup>l</sup>a' gaquele be<sup>n</sup>e' chesegue'ede' le'e. Cheya<sup>l</sup>a' gonle da' güen len be<sup>n</sup>e' ca' chesegue'ede' le'e. <sup>28</sup>Le nab cont be<sup>n</sup>e' chesegue'ede' le'e nite' mbalaz. Le soa le nabe Diosen' gaclene' be<sup>n</sup>e' chososaca'zi' le'e.

<sup>29</sup>Še to be<sup>n</sup>e' chaze' šla'a xaga'le, le güe' dan' yeš<sup>l</sup>a'a. Še to be<sup>n</sup>e' que'e xadon chele, le güe' latje lechje' len

xcamisle. <sup>30</sup>Note'teze be<sup>n</sup>e' bi dan' nabde' le'e, le gwnežjon. Še to be<sup>n</sup>e' que'e bite'teze da' de chele, bitw ye<sup>n</sup>ablen. <sup>31</sup>Con yogo' da' güen da' chaclaže'le yeson be<sup>n</sup>a<sup>ch</sup>en' len le'e, lecze ca' cheya<sup>l</sup>a' gonle len legaque'.

<sup>32</sup>Še chaquele šinze be<sup>n</sup>e' chacde' le'e na' bi chaquele be<sup>n</sup>e' yoble, žbix<sup>ch</sup>en' chaquele chebe Diosen' can' chonle? Ca'cze cheson be<sup>n</sup>e' güen da' mal ca'. <sup>33</sup>Lecze še chonle da' güen len be<sup>n</sup>e' ca' cheson da' güen len le'e na' bi chonle güen len be<sup>n</sup>e' yoble, žbix<sup>ch</sup>en' chaquele chebe Diosen' can' chonle? Ca'cze cheson be<sup>n</sup>e' güen da' mal ca'.

<sup>34</sup>Še chbejle bi da' chbejle len be<sup>n</sup>e' chaquele yesyeyonen' le'e, žbix<sup>ch</sup>en' chaquele chebe Diosen' can' chonle? Ca'cze cheson be<sup>n</sup>e' güen da' mal ca', chesebeje' bi dan' chesebej lježgaque', na' nite' lez yosyonežjuen'. <sup>35</sup>Perw na' le'e, le soa le gague be<sup>n</sup>e' chesegue'ede' le'e, na' le soa le gon da' güen. Na' le soa le cuej bi dan' cuejle, perw bitw soale lez yesyeyonen'. Še gonle ca dan' ba gw<sup>n</sup>ia' le'e, gwlo'ele nacle xi'in Dios ben' nac la'zelagüe be<sup>n</sup>e' bla<sup>o</sup>, na' Diosen' güebi'icze' güen len le'e. Le'na' naque' be<sup>n</sup>e' šagüe' len be<sup>n</sup>e' ca' bi cheso'e ye<sup>l</sup>a' cho<sup>x</sup>c<sup>l</sup>en che' na' len yezica'chle be<sup>n</sup>e' güen da' mal ca'. <sup>36</sup>Na' ca' Xacho Diosen' ben' zoa yaba cheyaše' cheži'ilaže'de' yogo' be<sup>n</sup>a<sup>ch</sup>en', ca'cze cheya<sup>l</sup>a' yeyaše' yeži'ilaže'le ljež be<sup>n</sup>a<sup>ch</sup>len'.

### **Bitw zaca'cho nacho be<sup>n</sup>e' zjanape' dola'**

(Mt. 7:1-5)

<sup>37</sup>'Bitw gonle xbab zaca'le nale be<sup>n</sup>e' zjanape' dola'. Še nale

che bene' zjanape' doła', ca'cze Diosen' ne' le'e nape doła'. Na' bibi yosbaga'le bene' cont Diosen' bibi yosbague'de' le'e. Le soa le yezi'xen che bene' cont Diosen' yezi'xene' chele. <sup>38</sup>Le soa le gwnežjwo bi da' gwnežjwle bene' na' Diosen' güeyon'cze' chele. Bał bene' leca nała' chosochixe' bi dan' chesote', chosochiše' lao yagarm chegaquen' na' chesebiben' na' chosozaoya'aten'. Ca'czen' cheyała' gonle gwnežjwle bi dan' cheseyažje bene' na' lecz ca' gon Diosen' len le'e.

<sup>39</sup>Nach Jesúsen' be'lene' bene'

že'na' to jempl, gwne':

—¿Guaque to bene' lchoł cue'e nez yeto bene' lchoł? Bi gac. Le nezecho chopte' šjasebixe' to lo' yechw. <sup>40</sup>Ca nac cate' to bene' chsede' len to maestrw, bi nacho naque' bene' blaoch ca maestra'. Na' la'czła' še ben' chseda' gwda' yichje' yogo'loł dan' blo'e maestron' le', bitw naque' bene' sina'ch ca maestra'.

<sup>41</sup>¿Bixchen' chna'le beb dao' dan' yo'o lo' yejlao bene' lježle, na' bi chacbe'ele naquech beb xen dan' yo'o lo' yejlaolen'? <sup>42</sup>Na' še le'e yo'o to da' xen lo' yejlaolen' čnacxechen' che'le bene' lježlen': "Ben yebeja' beb dao' dan' yo'o lo' yejlaguon'?" iBene' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlao bene' lježle.

**Dan' choncho chlo'en bin' yo'o lo' yichjlažda'ochon'**

(Mt. 7:17-20; 12:34-35)

<sup>43</sup>Bitw nacho to yag frut güen chbian frut da' bi nac güen, na' neca nacho dan' bi nac güen chbian

da' nac güen. <sup>44</sup>Con can' nac da' chbia to to yaguen' nezecho bi yaga'. Yag yeše' bitw chbian da'na' nzi' yixgüigw. Lecz ca' yag bisga'a bi chbian uvas. <sup>45</sup>To bene' laždao' ži'ilaže' chone' da' güen, le ca' ža lo' yichjlažda'ogüe' nan' chone'. Na' ben' chon da' mal, chone' ca' lagüe dan' chzenague' che laždao' xi'a che'na'. Na' yogo'te diža' dan' chchoj cho'achon', lo' yichjlažda'ochon' za'aquen.

**Chope bene' na' yo'o da' chon to toe'**

(Mt. 7:24-27)

<sup>46</sup>¿Bichen' che'le neda: "Xana'", na' bi chonle can' nona' mandadw? <sup>47</sup>Na'a nia' nac zaca'lebe bene' nao' neda' na' chzenague' xtiža' na' chone' can' nona' mandadw. <sup>48</sup>Naque' ca to bene' ben yo'o na' gwche'ene' sitjw gwleque' lene yo'on da' nac da' gual. Cate' betjchgua yegw gwyechjen liže'na', na' bitw bebixen cuiayin', le gwzoachachchguan. <sup>49</sup>Na' yogo' bene' chende' xtiža'na' na' bi chone' can' žia'na' naque' ca yeto bene' ben yo'o, con benen' lo yo na'ze na' bibi lenen gwleque'. Na' cate' betjchgua yegw gwyechjen liže'na', na' bebixen gwžiai'yite yo'on.

**Jesúsen' beyone' xmos to xan soldadw**

(Mt. 8:5-13)

**7** Na' cate' beyož be' Jesúsen' diža' len bene' ca', beyeje' yež Capernaum. <sup>2</sup>Na' zoa to xan soldadw bene' bitw naque' bene' Israel. Na' zoa to xmose' chacšenchgüede', na' yelez ba de' par gate'. Na' xan soldadon' chacchgüede' le'. <sup>3</sup>Na' cate' xan

soldadon' bende' diža' che Jesúsen',  
gwsele' ba| bene' gole blao che  
bene' Israel cont jaseñabde' Jesúsen'  
šeje' liže' yeyone' xnose'. <sup>4</sup>Nach  
cate' besežine' gan' zoa Jesúsen',  
gosenabde' le' gaclene' xan  
soldadon'. Na' gose'e Jesúsen':

—Xan soldadon' naque' to bene'  
zaque' gacleno', <sup>5</sup>le chacde' chio'  
bene' Israel, na' le' bene' yodao'  
čheto' nga len xmechue'.

<sup>6</sup>Nach gwyej Jesúsen' len legaque',  
perw za' yesežine' liže'na' cate'  
gwse|a' xan soldadon' ba| bene'  
migw che' lao Jesúsen' na' gose'ene':

—Xan soldadon' že' bitw gwša'a  
yichjo' yido' liže'na', le nezde' bitw  
zaque' cont šo' liže'na'. <sup>7</sup>Da'n'an' bitw  
beyaxjde' yide' nabde' le' gacleno'ne'.  
Con che'nde' gonšco' mandadw  
yeyaque xnose'na'. <sup>8</sup>Xan soldadon' že'  
zoa bene' chnabia' le' perw lecze nita'  
soldadw che' na' chnabi'e legaque'. Na'  
cate' che'e toe': "Gwyej", na' cheje', na'  
cate' che'e yetoe': "Da", na' chide', na'  
cate' che'e xmosen': "Da' nga gono",  
na' chonen'. Na' nezde' con nao' yeyac  
xnose'na' na' yeyacde'.

<sup>9</sup>Na' Jesúsen' cate' bende' diža'  
dan' gose' bene' migw che xan  
soldadon' le', bebande' na' beyechje'  
gože' bene' zan ca' zjanao' le':

—Žia' le'e ne toze bene' Israel bina'  
šejnilaže' neda' ca chejnilaže' benga  
bi naque' bene' Israel.

<sup>10</sup>Nach jaya'ac bene' ca' gwse|a'  
xan soldadon'. Cate' besyežine'  
liže'na' ba beyaque xmosen'.

**Jesúsen' bosbane' xi'in  
to no'ole güezebe**

<sup>11</sup>Jesúsen' gwyeye' to yež dan' nzi'  
Naín len bene' ca' zjanaque' le' txen

na' zan bene' yoble. <sup>12</sup>Ba zja'aque'  
ga|a'ze par yesežine' cho'a puert che  
yežna' cate' besele'ede' chesechoj  
xonj bene' cho'a puerten' zjan|ene'  
to bene' guat. Na' ben' goten' naque'  
bene' tliša', na' xne'en naque' no'ole  
güezebe. Na' bene' zan bene' lo  
yeža' zja'ac|ene' xna' bene' guaten'.

<sup>13</sup>Na' cate' ble'e Xanchon' no'olen',  
beyaše'de' le' na' gože'ne':

—Bitw cuežo'.

<sup>14</sup>Nach gwyeye' ja|oa ne'en lo  
yagla' gan' xoa bene' guata'. Nach  
bene' ca' zjan|en le' gosebeze'. Na'  
gože' bene' guata':

—Bene' güego', neda' žia', beyas.

<sup>15</sup>Nach bene' guaten' gwchi'e na'  
gwzola|güe' benie'. Na' Jesúsen' beyone'  
le' lo na' xne'e. <sup>16</sup>Na' yogo'lol bene'  
ca' besežebe' dan' beban bene' guata'  
nach gosonxene' Diosen' gosene':

—Ba bla' to bene' blao ga zoacho,  
bene' choe' xtiža' Diosen', na' Diosen'  
ba gwse|e'ne' cont gaclene' chio'  
naccho nación che'.

<sup>17</sup>Ca nac dan' ben Jesúsen' gos  
gw|alj diža' čhen' doxen Judea na'  
yogo'lol yež ca' dan' zjanita' ga|a'ze.

**Juanna' gwse|e' čhope ben' gosaque'  
le' txen gan' zoa Jesúsen'**

(Mt.11:2-19)

<sup>18</sup>Nach bene' ca' zjanaque' txen  
len Juanna' jaseye'lene' le' diža'  
yogo'lol ca' nac dan' chon Jesúsen'.  
Nach gox Juanna' čhope bene' ca'  
<sup>19</sup>nach gože' legaque':

—Le šja'ac gan' zoa Jesúsen' na'  
ye'lne': "¿Len' naco' ben' chbezto'  
se|a' Diosen' o še cheyala' cuezchto'  
yid bene' yoble?"

<sup>20</sup>Nach bene' ca' čhope cate'  
besežine' gan' zoa Jesúsen' gose'ene':



—Juan ben' chzoa bene' nis gwsele' neto' laguo' nga nabeto' le' še len' naco' ben' chbezto' sela' Diosen' o še cuezchto' yid bene' yoble.

<sup>21</sup>Šlacte ne' nita' chope bene' ca', Jesúsén' beyone' bene' zan bene' ca' chesacšene na' bene' chese'ede' yižgüe' gual. Lecze bebeje' da' xigüe' da' zjajo'o zjanyaz yichjlaždao' bene' zan. Na' bene' cont besyele'e zan bene' lchol. <sup>22</sup>Nach Jesúsén' boži'e xtiža' bene' ca' gwseła' Juanna' lagüe'na', gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele. Ba ble'ele chona' cont chesyele'e no bene' lchol, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen len bene' yaše' ca'.

<sup>23</sup>Mbalaz zoa bene' chejle'e chia' na' bi chdebde'.

<sup>24</sup>Na' cate' besyeya'ac bene' ca' gwseła' Juanna', nach Jesúsén' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen? ¿Šayichj šayen chaque'? Bi naque' ca'. <sup>25</sup>¿Nac naque' caten' jale'elne'? ¿Nyaze' lache' šagüe'? ¿še bitw' le bene' ca' zjanyaz lache' šagüe' na' chesenite' chese'ej chesagwšagüe' na' chesone' legr, bena' nita' yo'o güenchgua, ca no liž bene' gwnabia'.

<sup>26</sup>¿Noxen' jale'ele? ¿Naque' to bene' choe' xtiža' Diosen'? Da' li naque' to bene' choe' xtiža' Dios, perw chnia' le'e, zaca'che' ca note'teze bene' choe' xtiža' Dios. <sup>27</sup>Che benga nyojen le'e Xtiža' Diosen' žan:

Neda' Dios sela' to bene' cuialagüe' laguo' güe'e xtižon' cont cate' yido' ba nita' bene' yesonxene' le'.

<sup>28</sup>Chnia' le'e, notech no benach na' soa bene' naquech bene' blaoch ca Juanna'. Perw na' note'teze bene' gwzenague' che Diosen' cont Diosen' nabi'e yichjlažda'ogüe', laczla' bi naque' bene' blao, gwžin ža cate' šejni'ichde' chia' clel ca Juanna'.

<sup>29</sup>Ba bzoa Juanna' bene' zan nis na' len ba bene' güečhixjw. Na' yogo' bene' ca' gosacbe'ede' Diosen' zejczje' to licha dan' gwsele' Juanna' jatixjue'ede' legaque' yesyetinjde' xtola'gaque'. <sup>30</sup>Perw na' bene' fariseo ca' na' bene' ca' chososed chosolo'e dan' bzoj da' Moisés, goson yichjlaogaquen' cbi besyetinjde' xtola'gaquen' can' goclaze' Diosen'. Bi gosaclaze' gwzoo Juanna' legaque' nis. <sup>31</sup>Nach Jesúsén' gože' legaque':

—¿No gwsaca'lebda' le'e zoale na'a? ¿No chon can' chonlen'?

<sup>32</sup>Nacle ca bidao' neche bicze bi de chlebele. Can' zjanac bidao' ca', cate' nita'be' gan' chac ya'a chese' lježbe: “Ba bcuežto' bžejo, neca bya'ale, na' ba bilyaše'to, neca gwchežle.”

<sup>33</sup>Juan ben' chzoa bene' nis bide' laole nga, bitw güe'ej gwdagwšagüe' can' chese'ej chesagw bene' yoble, na' neca güe'ej'e' vino, nach gwnale che: “Yo'o nyaz da' xigüen' yichjlažda'ogüe'.” <sup>34</sup>Na' neda', chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw, neda' naca' ben' gwseła' Diosen' golja' benach. Na' lecze žale naca' migw che bene' güečhixjw ca' na'

migw che nochle bene' güen da' xinj. <sup>35</sup>Perw na' bene' chosozenag che Diosen' zjanape' to yela' sina' na' chesone' cont nacbia' Diosa' naque' la'zelagüe' bene' sina'.

**Jesúsen' gwyeye' liž  
Simón bene' fariseo**

<sup>36</sup>To bene' fariseo goxe' Jesúsen' šeje' liže' cont yesagüe'. Na' bžin Jesúsen' liž bena' na' gwchi'e cho'a mesen'. <sup>37</sup>Na' to no'ole lo ciudan', no'ole zle', gwnezde' bžin Jesúsen' liž bena'. Na' Jesúsen' len bene' ca' yezica'chle ba nite' cho'a mesen' cont yesagüe', cate' bžin no'olen'. Na' no'olen' noxe' to da' nac de yejese da' yože set da' la'zelaoze chla' zix. <sup>38</sup>Na' jabigue' gala'ze xni'a Jesúsen' na' gwcheže' na' nis xchež chen' bžonen ni'a Jesúsen' gwbisen. Na' bxie' ni'ena' len yiša' yichje' na' bnopen' na' gwdeben' set zixen'. <sup>39</sup>Na' ben' goxe' Jesúsen' ližen', cate' ble'ede' can' chon no'ola' na' godc': "Šaca' benga naque' to bene' choe' xtiža' Dios, guacbe'ede' no'olen' chgan ni'ena' naque' no'ole zle'".

<sup>40</sup>Nach Jesúsen' gože'ne':

—Simón, de to da' che'nda' yapa' le'.

Nach Simónna' gože' Jesúsen':

—Gwnan Maestrw.

<sup>41</sup>Jesúsen' gože'ne':

—Gwzoa to bene' na' nita' chope bene' chesale' xmechue'. Toe' chale' gayo' gayoa mechw da' nzi' denario, na' ben' yeto chale' šiyon mechw lecze denario. <sup>42</sup>Na' chopte bene' ca' ne toe' ca' de chegaque' cont yesyeyixjue' xyan'. Na' ben' gwlej mechon' gwlejšyichje' dan' chesale' chen'. Gwnašc neda', čnoe' bene' ca' chope' gosacchde' che'?

<sup>43</sup>Nach Simónna' gože'ne':

—Šeca ben' goc xya chen' da' xench na' gwlejšyichjen.

Jesúsen' gože'ne':

—Da' li can' ba gwnao'na' naquen.

<sup>44</sup>Nach Jesúsen' gwyečhje' gwne'e no'ola' na' gože' Simónna':

—čChle'edo' no'ole nga? Neda'

ba gwo'a ližo' nga na' bi beño' nis chib ni'a, perw no'ole nga ba gwdebe' ni'an' len nis xchež chen' bxien' len yiša' yichje'. <sup>45</sup>Bi bnopo' neda', perw na' no'ole nga cate' bla'atia' gwzolagüe' chnope' ni'a nga.

<sup>46</sup>Bi gwdebo' set yichja', perw no'ole nga ba gwdebe' set zix ni'a nga.

<sup>47</sup>Na' žia' le', xtola'na' gosaquen da' zan, perw ba bezi'xena' che'. Da'n'an' chacchgüede' neda'. Bene' bi žinlaže' xtolen' ca' xtola' no'ole nga, cate' yezi'xena' che' bitw gactecde' neda'.

<sup>48</sup>Nach gože' no'olen':

—Ba bezi'xena' xtola'na'.

<sup>49</sup>Nach bene' ca' chesagw len Jesúsen' txen lo mesen' gwzolao chese' lježe':

—čNox benga chacde' le'na' chezi'xene' xtola' benachen'?

<sup>50</sup>Nach gož Jesúsen' no'ola':

—Dan' chejniłažo' neda' da'n'an' ba de yela' mban chio' toli' tocane. Beyej to šagüe' to güen.

**No'ol ca' gosaclene' Jesúsen'**

**8** Na' gwdechle gwyej Jesús'a' zan ciuda na' zan yež jatixjue'ede' diža' güen, gwne' Diosen' nabi'e yichjlaždao' bene' yosozenague' che'. Na' zja'aclen bene' šižinw ca' le', bene' ca' zjanzi' postlw. <sup>2</sup>Nach to xonj no'ole lecze zja'aclene' Jesúsen' bene' ca' ba beyone'. Bale' ba bebeje' da' xigüe' da' zjajo'o zjanyaz lo'

yichjlažda'ogaque' na' yebałe' ba beyone'ne' cate' gosacšende'. Na' toe' lie' María beñe' Magdala, bebej Jesús'en' gaže da' xigüe' gwyo'o gwyaz yichjlažda'ogüe'na'. <sup>3</sup>Nach ľecze len ben' le Juana, xo'ole ben' le Chuza, na' Chuzan', gwyo'o lo ne'e liž rey Herodes na' yežlio che' ca'. Na' ľecze len ben' le Susana gwejlene' Jesús'en', na' yezan beñe' yezica'chle. Na' no'ol ca' bosochine' bite'teze da' gota' čhegaque' cont bosonežjue' dan' byažje Jesús'en' len beñe' ca' zjanaque' ľe' txen.

### Jempl che beñe' goz trigon'

(Mt. 13:1-9; Mr. 4:1-9)

<sup>4</sup>Na' beñe' zan besežag gan' zoa Jesús'en' beñe' za'ac to to yež ca'. Na' be'e to jempl, gwne':

<sup>5</sup>—To beñe' güen žin jeze' trigw na' šlac zeje' chose' trigon' late' biñ jasechazen do cho'a nezen', na' bosolej bosošořj beñe' len, na' be žia xil be chaš ľe'e yaba gosagwban'. <sup>6</sup>Yelaten' jasechazen ga nac lo yej, na' cate' beselan' na' gosebizen, ľe gague bi gopa' den'. <sup>7</sup>Yelaten' jasechazen ga nac lo yag yeše', na' gosecha'on txen, na' bosolole' yag yeše' ca' len. <sup>8</sup>Perw na' yelaten' jasechazen ga nac yo šagüe' na' beselan', na' bałen gosebian to gayoa güeje.

Na' beyož be'e diža' quinga gwne' zižje gože' ľegaque':

—Le'e žia nagle da' chene, ľe gwzenag xtiža'na'.

### Jesús'en' gwne' bixchen' bi'e jempl cate' bzejni'ide' beñe'

(Mt. 13:10-17; Mr. 4:10-12)

<sup>9</sup>Nach beñe' ca' zjanaque' Jesús'en' txen gosenabde' ľe' bi zejen jempl

da' ba bi'e. <sup>10</sup>Na' gož Jesús'en' ľegaque':

—Nono na' neze can' nac yela' gwnabia' che Diosen'. Perw ba chone' cont le'e chejnilaže'lene' nezenen. Perw beñe' bi chesaclaže' yesejnilaže'ne', chzejni'igacda'ne' len jempl. Chona' ca' cont yesele'ede' can' chonan' na' bitw yesacbe'ede' bi zejen, na' cont yesende' xtižan' na' bi yesejni'iden'.

### Jesús'en' bzejni'ide' bi zejen jempl che beñe' goz trigon'

(Mt. 13:18-23; Mr. 4:13-20)

<sup>11</sup>'Na' ca nac jempl nga zejen quinga: Ca dan' byažen zejen xtiža' Dios. <sup>12</sup>Na' biñ dan' besego'onen chanezen', zejen bene' ca' chesende' xtiža' Diosen', perw na' chžin Satanás dan' chnabia' da' xigüe' ca' chebejen xtiža' Diosen' lo' yichjlažda'ogaque' cont bi yesejnilaže' ľe' na' bi gata' yela' mban čhegaque' toli' tocane. <sup>13</sup>Na' biñ dan' besego'on ga nac lo yej zjanaquen ca beñe' chesyebede' xtiža' Diosen', perw zjanaque' ca to da' bibi loe chon, šložga chesejľe'e che xtiža' Diosen', na' cate' chac bi da' mal čhegaque' ľa' chesebejyichjte' xtižen'. <sup>14</sup>Na' biñ dan' besego'onen ga nac lo yag yeše', zejen ca beñe' ca' ba gosende' xtiža' Diosen', perw šlac zjambane' chesyela' chesyěžejde' na' chese'nde' yeseni'e, na' chesede' chesonteze' con da' žazen čhegaque'. Na' da' qui bi choen' latje yega'an xtiža' Diosen' lo' yichjlažda'ogaque' na' da'n'an' bi chesejnilaže' ľe' ca cheyała'. <sup>15</sup>Na' da' ca' besego'onen lo yo šagüen', zejen ca beñe' cate' chesende' xtiža' Diosen' chesezi'en chesonen' čhegaque', na' chesejnilaže'

le' do yichj do laže', na' chesechejde' bite'tez dan' chac chegaque' cont chesone' can' che'ne Diosa'.

**Jempl che yi' dan' chguala'cho**

(Mr. 4:21-25)

<sup>16</sup>Na' Jesús'en' gwne':

—Notno gwguala' to yi' na' gw dosen' to yeso', na' nēca gwcuāše' yin' xan xcame'. San chde'en le'e ze'e cont gwseñin' len yogo'lo' beñe' yeso'o lo' yo'o. <sup>17</sup>Le yogo'lo' da' ngaše' chia' neda', lenna' gwlo'elaon, na' yogo'lo' da' nono na' neze chia', žin ža yesenezden' na' yesejni'iden'.

<sup>18</sup>Le gwzenag da' quinga da' chzejni'ida' le'e, le note'teze beñe' chzenague' xtiža' Diosen' gwzejni'ich Diosen' le', perw na' note'teze beñe' bi chzenague', da' daon' chacde' ba nezde', yeca'a Diosen' len.

**Xna' Jesús'en' len beñe' biše' ca' besežine' gan' zoe'**

(Mt. 12:46-50; Mr. 3:31-35)

<sup>19</sup>Na' xna' Jesús'en' len beñe' biše' ca' besežine' gan' zoa Jesús'en', gosaclašē' yeso'e, perw catec beñe' zan že' gague goc latje yesežine' lagüe' na'ate.

<sup>20</sup>Na' to ben' ze na' gože' Jesús'en':  
—Xna'o len beñe' bišo' ca' zjanite' chyo'o na' chesaclašē' yedesene'e le'e.

<sup>21</sup>Na' Jesús'en' gože' legaque':  
—Beñe' ca' chosozenag xtiža' Diosen' na' chesezi'e cho'alao xtižen', beñe' can' zjanaque' xna'a na' biša'.

**Jesús'en' bcueze' be' bdono' lo' nisdao'**

(Mt. 8:23-27; Mr. 4:35-41)

<sup>22</sup>Na' goc to ža Jesús'en' gwyo'e to lo' barcw len beñe' ca' zjanaque' le' txen. Na' gože' legaque':

—Laga'cho yešla'ale nisdao'.

Nach bosose'e barcon'. <sup>23</sup>Šlac zejen lo' nisen' gwtas Jesús'en'. Nach gwzolao gwyechj to be' bdono' lo' nisdao', na' gwzolao cheyož nis lo' barcon'. Na' besexožde' yesebiaye'e. <sup>24</sup>Nach bosyosbane' Jesús'en' gose'e le':

—iMaestrw! iMaestrw! Bačh chbiayi'cho.

Nach gwyase' na' gwdi'le' be' bdono' len nisdao', na' la' gosebe'žiten. <sup>25</sup>Na' gože' legaque':  
—¿Nacxechen' bi chejle'le' chia'?

Nach legaque' besežebe' len besyebande'. Nach gose' lježe':  
—¿Noxe benga? lente be' bdono' na' len nisdao' chosozenaguen che da' že'.

**To beñe' Gadara yo'o nyaze' da' xigüe'**

(Mt. 8:28-34; Mr. 5:1-20)

<sup>26</sup>Na' besežine' laž beñe' Gadara ca', to yež da' chi' šla'a distritw Galilean', laga'cho nisdao'. <sup>27</sup>Na' cate' bechoj Jesús'en' lo' barcoa', to beñe' lo' yežna' jašague' le'. Ba gwža yo'o nyaz da' xigüen' yichjlaždao' bena'. Na' ba chde' con gague bi xe' chazche', na' bich zoe' liže', con ba zoe' do capsantwle. <sup>28-29</sup>Na' beñe' gualaž che' ca' bosocheje' ni'a ne'e len gden na' gosape' le'. Na' da' xigüe' ca' gosonen cont bzoj btine' gdenna' zan ni'a. Na' gosonen cont gwyeye' ga nono beñe' zjanla'. Na' bena' cate' ble'ede' Jesús'en' na' bzoa xibe' lagüen'. Na' bosye'e zižje gwne':

—¿Bixchen' chgoša' chlaže' chio' len neda', Jesús? Le' naco' dogualje Xi'in Dios ben' nape' la'zelagüe' yela' gwnabia' xen. Chneyoeda' le' bi gwsaco' neda'.

Gwne' ca' dan' ben Jesúsen' mandaw yechoj da' xigüen' yichjlažda'ogüen'. <sup>30</sup>Nach Jesúsen' gože' da' xigüen' yo'o nyaz yichjlaždao' bena':

—¿Bi lio'?

Nach da' xigüen' gwnan:

—Legión lia'.

Gwnan ca' le zjanaquen da' zan zjajo'on yichjlažda'ogüen'. <sup>31</sup>Nach da' xigüe' ca' gosata'yoen Jesúsa' bi yeselen' lo yi' gabił. <sup>32</sup>Na' to ya'a da' zoa gałaze chesaš zan coš chesagwba'. Nach da' xigüe' ca' gosata'yoen Jesúsen' gwnežjue' latje šjaseyo'on yichjlaždao' coš ca'. Na' Jesúsen' bnežjue' latje. <sup>33</sup>Nach besyechojen yichjlaždao' bena' na' jaseyo'on yichjlaždao' coš ca'. Na' besyeyetjses coš ca' le'e ya'a gan' nita'ba' na' jaselažo'ba' lo' nisdao' ga gosatba' gose'ejba' nis.

<sup>34</sup>Na' bene' ca' chosoyoe' cošen' besele'ede' dan' ba goquen' bosyoxonje' jasyeyeže' bene' lagüe yež len bene' chaš yixe', gose'e legaque' can' ba goquen. <sup>35</sup>Nach ja'ac bene' jasene'e bixen' goc. Na' cate' besežine' gan' zoa Jesúsen' besele'ede' bena' ba gwyo'o gwyaz da' xigüen', na'a ba chi'e gałaze cuit Jesúsen' nyaz xałane', na' ba bezoa yichjlažda'ogüe' binlo. Na' besežebe'. <sup>36</sup>Na' bene' ca' besele'ede' can' goquen' gosoe' diža' che dan' goc che bena' gwyo'o gwyaz yichjlažda'ogüe' da' xigüen' na' can' ba beyaque'. <sup>37</sup>Nach yogo'loł bene' ca' že' gan' mbane yež Gadaran' jasetayoede' Jesúsen' yeze'e lažgaquen', le besežebchgüe'. Nach Jesúsen' beyoe' lo' barcon' cont yeze'e. <sup>38</sup>Na' bena' beyaque' cate'

Jesúsen' bebeje' da' xigüe' ca' gosoe' gosazen yichjlažda'ogüe', gota'yoede' le' gwnežjue' latje šejlene'ne'. Perw Jesúsen' bi be'e latje, san gože'ne':

<sup>39</sup>—Beyej ližo' na' jayež bene' lo' yo'o chio' yogo' da' güen da' ba ben Diosen' len le'.

Nach beza' ben' na' gwzologüe' cho'e diža' doxen yežen' yogo' can' ba ben Jesúsen' len le'.

**Jesúsen' beyone' xi'ın Jairo na' beyone' yeto no'ole bene' gwdane' xe'**

(Mt. 9:18-26; Mr. 5:21-43)

<sup>40</sup>Na' cate' Jesúsen' bełague' nisdan', bene' zan ba nita' chesebeze' le'. Chesyebechgüede' da' bežine' na'. <sup>41</sup>Na' bžin to bene' le' Jairo, ben' nac to bene' gwnabia' che yodao' che yežna'. Na' bzoa xibe' lao Jesúsen' gota'yoede' le' šejlene' le' liže', <sup>42</sup>le ba zoa gat bi' no'ol che'. Nacbe' bi' tliša', na' šižinw izgubebe'. Na' šlac zej Jesúsen' len le', bene' zan gosebiadi'e le' na' bosochichgüe' le'.

<sup>43</sup>Na' len to no'ole ba goc šižinw iz chzoe' gwba' na' ba benditje doxen xmechue' len bene' güen rmed ca'. Na' notno goc gon le' rmed. <sup>44</sup>Na' gwbiga' no'olen' cože' Jesúsen' na' gwdane' lox xen', nach la' gwlezte gwba' dan' zoen'.

<sup>45</sup>Na' gwna Jesúsen':

—¿Non' gwdan neda'?

Na' ne toe' ca' gosechebe' še ba gosegane' le'. Nach Pedron' len bene' ca' zja'aclen Jesúsen' gose'e le':

—Maestrw, bene' zan bene' za'ac nga chosochie' le' na' chosožigue' le' nile na'le. ¿Bixchen' chnabo' no gwdan xaon'?

<sup>46</sup>Nach Jesúsen' gože' legaque':

—To beṇe' ba gwdane' neda'.  
Chacbe'eda' ba beyacde' len yeḷa'  
guac chia'na'.

<sup>47</sup>Nach no'olen' cate' gocbe'ede'  
cbi bgaše' dan' benen', nach  
gwbigue' lao Jesús'en' do chaž  
chžebe' na' bzoa xibe' lagüe'na',  
be'e diža' lao yogo' beṇe' ca' že'na'  
bixchen' gwdane' le' na' can' goc  
la' beyactede'. <sup>48</sup>Nach gož Jesúsa'  
no'ola':

—Xi'ina', ba beyacdo' dan'  
chejnilažo' neda'. Beyej binlo'.

<sup>49</sup>Ne' choe'te Jesúsa' dižan' ca'  
cate' bžin to beṇe' gwza' liš Jairo  
ježe' le':

—Ba got bi' no'ol dao' chion'. Bich  
gondo' Maestroa' zed'.

<sup>50</sup>Perw cate' bene Jesúsen', na'  
gože' Jairo':

—Bitw žebo', con gwyejnilaže'  
neda' na' yeyaquee'.

<sup>51</sup>Na' cate' besežine' liš Jairona',  
Jesúsen' bi be'e latje yeso'o zan  
beṇe' ca' zja'aclen le', san Pedro, len  
Juan, len Jacobo, na' len xaxna' bi'  
guat na'ze goso'o. <sup>52</sup>Na' ba chi'chgua  
žaš na' yogo' beṇe' ca' že'na'  
chesebežchgüe'. Na' Jesúsen' gože'  
legaque':

—Bitw cuežle'. Biṇa' gatbe', san  
chtasbe'.

<sup>53</sup>Na' bosoxiže' gosonle' che' da'  
zjanezde' ba gotbe'. <sup>54</sup>Perw Jesúsen'  
beṅue' taca' bi' no'ol guaten' na' bol  
güiže'be' gože'be':

—No'ol dao', beyas'.

<sup>55</sup>Nach bebambe', la' beyastebe'.  
Na' Jesúsen' bene' mandadw  
yeso'ebe' da' gagwbe'. <sup>56</sup>Na'  
xaxna'be' besyebanchgüede'. Perw  
Jesúsen' bene' mandadw bi yeso'e  
diža' can' goca'.

**Jesúsa' gwsele' beṇe' šižinw ca'  
jasedixjue'ede' xtižen'**

(Mt. 10:5-15; Mr. 6:7-13)

**9** Jesúsen' botobe' beṇe' šižinw  
ca' gwleje' cont zjanaque' le'  
txen na' bnežjue' legaque' yeḷa'  
gwnabia' na' yeḷa' guac cont goc  
besyebeje' da' xigüe' lo' yichjlaždao'  
beṇe', na' lecze ca' besyeyone' beṇe'  
ca' chesacšene'. <sup>2</sup>Na' lecze bene'  
mandadw šjasedixjue'ede' Diosa'  
nabi'e yichjlaždao' beṇe' yosozenag  
che'. Na' bene' mandadw yesyeyone'  
no beṇe' güe'. <sup>3</sup>Na' gože' legaque':  
—Bibi goxe'le tnez'. Bitw goxe'le  
xis da' gwchiše'le, neca gual'e bzod',  
ne yet', ne mechw', na' bitw gual'e  
yeto xcamisle'. <sup>4</sup>Cate' žinle to liš  
beṇe', na'ze yega'anle šlac zoale  
lagüe yeža'; cate'ch yeza'le yeža',  
cana'ch yeza'le latja'. <sup>5</sup>Na' še zoa ga  
bi yosolebe' le'e, cate' yeza'le na', le  
cuibe ni'alen' yo bište cont nacbia'  
malen' chesone' bi chosozenague'  
xtiža' Diosen'.

<sup>6</sup>Nach beṇe' šižinw ca' ja'aque'  
to to yež', na' gate'teze ja'aque'  
jasedixjue'ede' diža' güen che  
Jesúsen' na' besyeyone' no beṇe'  
güe'.

**Ba gosote' Juan ben' bzoa beṇe' nis**

(Mt. 14:1-12; Mr. 6:14-29)

<sup>7</sup>Na' gobernador Herodes goque'  
tole bende' yogo'lol da' güen da'  
chon Jesúsen'. Gocžejlaže', le bal  
beṇe' gose'e le' ba beban da' Juan  
ladjo beṇe' guat ca'. <sup>8</sup>Na' yebale'  
gosene' šeca da' Elías ben' be' xtiža'  
Diosen' cani' ba bela' yežlio nga da'  
yoble'. Yebale' chesene' yeto beṇe'  
be' xtiža' Diosen' cani'te ba bebane'

ladjo be<sub>ne</sub>' guat ca'. <sup>9</sup>Na' Herodesen' gwne':

—Neda' bena' mandadw gose<sub>ch</sub>ogue' yen Juanna', perw činoxen' chon da' güen ca dan' chesoe' be<sub>ne</sub>' diža'?

Na' gwdiljwlaže' nacle gone' cont le'ede' Jesúsen'.

**Bguagw Jesúsen' gayo' mil be<sub>ne</sub>'**

(Mt. 14:13-21; Mr. 6:30-44; Jn. 6:1-14)

<sup>10</sup>Na' cate' besyežin postlw ca' gan' zoa Jesúsen' nach gose'e le' can' ba gosonen'. Na' gw<sub>ch</sub>i'e lega<sub>cz</sub>e' na' ja'aque' to latje gan' mbane yež Betsaida. <sup>11</sup>Cate' gosacbe'e be<sub>ne</sub>' ca' nita' gan' zoa Jesúsen' ba gosa'aque' len be<sub>ne</sub>' ca' zjanaque' le' txen, nach zja'aque' zjana'ogüe' lega<sub>qu</sub>e'. Jesúsen' blebe' lega<sub>qu</sub>e' na' bsed blo'ede' lega<sub>qu</sub>e' Diosen' nabi'e yichjlaždao' be<sub>ne</sub>' yosozenag che', na' beyone' be<sub>ne</sub>' ca' chesacšene.

<sup>12</sup>Cate' gwzolao gw<sub>xo</sub>a gwbižen', nach be<sub>ne</sub>' šižinw ca' zjanaque' Jesúsen' txen gose'ene':

—Besela' be<sub>ne</sub>' quinga cont šjaya'aque' ga že' be<sub>ne</sub>' do ranšw na' do yež ca' dan' nye<sub>ch</sub>j mbi'i cont yeseyiljue' ga yesetase' na' yeseyiljue' da' yes'e'ej yesagüe', le ca nac latje gan' zoacho nga, naquen to latje daš.

<sup>13</sup>Perw na' gož Jesúsen' lega<sub>qu</sub>e':

—Le'e le güe'e da' yesagüe'.

Na' gose'e le':

—Gayo'ga yetextil na' yechopga bel ya'a de checho, lete še si'chon cont gaquen yesagw yogo'lol be<sub>ne</sub>' quinga.

<sup>14</sup>Gosene' ca' le že' ca gayo' mil be<sub>ne</sub>' byo, bi cuent no'ol ca' len bidao'. Nach Jesúsen' gože' be<sub>ne</sub>' ca' zjanaque' le' txen:

—Le gon mandadw yesebe' šiyon güej be<sub>ne</sub>' ca'.

<sup>15</sup>Nach gosone' mandadw gosebe' yogo' be<sub>ne</sub>' ca', <sup>16</sup>na' Jesúsen' gwxi'e gayo' yetextilen' na' chope bel ya'ana', na' gw<sub>ne</sub>'e yabale, be'e yela' cho<sub>x</sub>clen che Diosen' na' bzoxjen' na' be'en be<sub>ne</sub>' šižinw ca' cont goso'e che to to be<sub>ne</sub>' ca'. <sup>17</sup>Na' gosagüen' ca gosljde'. Nach bososše'e šižinw žome len yetextil bixjw na' len late' güeje bel da' bega'an.

**Pedron' gwne' Jesúsen' naque' be<sub>ne</sub>'  
gwse<sub>la</sub>' Dios**

(Mt. 16:13-19; Mr. 8:27-29)

<sup>18</sup>Na' gozac yeto, be<sub>ne</sub>' ca' zjanaque' Jesúsen' txen zjanite' len le' lchojiže, na' Jesúsen' cho<sub>l</sub> güiže' Diosen'. Nach gože' lega<sub>qu</sub>e':

—¿Bi chesena be<sub>ne</sub>'? ¿Non' naca' neda'?

<sup>19</sup>Na' gose'e le':

—Ba<sub>le</sub>' chesene' naco' da' Juan ben' bzoe' be<sub>ne</sub>' nis. Na' yeba<sub>le</sub>' chesene' naco' Elías ben' be' xtiža' Diosen' cani'. Na' yeba<sub>le</sub>' chesene' naco' yeto be<sub>ne</sub>' be' xtiža' Diosen' cani' ben' ba beban ladjo be<sub>ne</sub>' guat ca'.

<sup>20</sup>Nach gože' lega<sub>qu</sub>e':

—¿Chixe le'e? ¿No žale naca'?

Na' gož Pedron' le':

—Len' naco' Cristo ben' gwlej Diosen' cont yedenabi'o.

**Jesúsen' gwdixjue'ede' gate'**

(Mt. 16:20-28; Mr. 8:30 - 9:1)

<sup>21</sup>Nach Jesúsen' gože' lega<sub>qu</sub>e' nono yes'e'e naque' ben' gwlej Diosen' cont yedenabi'e. <sup>22</sup>Na' gože' lega<sub>qu</sub>e':

—Da' zan da' saca'zi'a, neda' naca' ben' gwse<sub>la</sub>' Dios golja' be<sub>na</sub>ch.



Na' bene' gole blao ca' chesenabia' naci<sup>o</sup>n chechon' na' b<sup>x</sup>oz gwnabia' ca', na' bene' ca' chososed chosolo'e ley dan' bzoj da' Moisés, bi yesele'ede' neda' güen dan' bi gosejle'e chia', na' yesote'nda', perw yeyon' ža yebana' ladjo bene' guat ca'.

<sup>23</sup>Nach gože' yogo' bene' ca' zjanaque' le' txen:

—Note'tez bene' še chaclaže' gaque' neda' txen, cheyała' cuejyichj cuine' yogo' ža, la'czla' saca'zi'e, na' gone' can' nia' neda'. <sup>24</sup>Note'tez bene' chacde' gone' cont bi saca'zi'e o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda', ba de yela' mban che' toli tocane.

<sup>25</sup>¿Bixe zejenna' to bene' nabi'e doxen yežlion' še cuiaye'e na' bi gata' yela' mban che' toli tocane?

<sup>26</sup>Na' note'tez bene' še cheto'ede' par ye'e lježe' chejnilaže' neda' na' še cheto'ede' par gwzenague' xtižan', lecce ca' neda' yeto'eda' che' par nia' naque' neda' txen, neda' naca' ben' gwsela' Diosen' golja' benach. Yeto'eda' che' cate' yida' da' yoble nsa'a yela' zaca' juisyw chia' na' yela' zaca' juisyw che' Xa' Diosen' na' che' ben' zjanac angl' che'. <sup>27</sup>Da' li žia' le'e, balle nita'le nga na'a bina' gatle cate' žin' ža le'ele gwlo'e Diosen' yela' gwnabia' chen'.

### Jesúsen' goque' ca to be'ni'

(Mt. 17:1-8; Mr. 9:2-8)

<sup>28</sup>Nag goc to xman gwna Jesúsen' ca', gwyeje' to lo ya'a jel' güiže' Diosen' na' gwche'e Pedro len Juan len Jacobo. <sup>29</sup>Na' šlac chol' güiže' Diosen' goc cho'alagüen' ca

da' bža'. Na' xalanen' beyaquen šiš xila' na' goctiten. <sup>30</sup>Na' lo hora' besežin' chop bene' gan' zoa Jesúsen', toe' da' Moisés na' yetoe' da' Elías bosošaljlene' le'. <sup>31</sup>Goso'e diža' gosene' ba zoa gat Jesúsa' Jerusalén. Na' be'ni' che Diosen' gwyečhen bsenin' legaque'. <sup>32</sup>Na' Pedron' len bene' ca' yečhope leca gosac ša tase' perw bi gosetase' na' besele'ede' Jesúsen' chactit cho'alagüen' na' zech' choelene' da' Moisésen' len da' Elíasen' diža'. <sup>33</sup>Na' cate' ba cheza' da' Moisésen' len da' Elíasen', Pedroa' gože' Jesúsen':

—iMaestrw, leca güenna' zoacho nga! Gonto' šone ranšw, to chio', to che Moisés, na' yeto che Elías.

Con gwne' ca' sin ca bene' xbab.

<sup>34</sup>Ne' choe'te Pedron' diža' cate' to bejw gwyečhen' legaque' na' besežebe' lagüe dan' goc ca'. <sup>35</sup>Na' lo' bejon' gosende' gwne' Diosen', gwne': —Benga Xi'ina' ben chacda'. Le gwzenag che'.

<sup>36</sup>Na' cate' beyož gwna Diosen' ca', besele'ede' yetoze Jesúsen'. Na' ca' beyoža' bibi diža' gosoe'lene' bene' ca' yezica'chle can' nac dan' ba gosende' na' dan' ba besele'ede'. Con gosenita'teze' šižize.

### Beyon Jesúsen' to bi' gwyo'o gwyaz da' xigüe'

(Mt. 17:14-21; Mr. 9:14-29)

<sup>37</sup>Na' beteyo cate' ba besyeyetje' ya'ana' bene' zan jasešague' legaque' gan' nite'na'. <sup>38</sup>Na' toe' gwne' žižje, gože' Jesúsen':

—Maestrw, chata'yoeda' le' gaclenšco' xi'ina' nga. Nacbe' xi'ina' tliša'. <sup>39</sup>Chnij da' xigüen' lebe' na' la' chgosya'aten lebe', chonen cont chazbe' šon na'

cont chžia bžina' cho'abe' na' chonen lebe' zi', na' cañe chsanen lebe'. <sup>40</sup>Ba gota'yoeda' bene' ca' zjanaque' le' txen cont yesyebeje' da' xigüen' yo'o nyazbe', perw bitw gosezaque'de'.

<sup>41</sup>Nach Jesúsen' gože' bene' ca' že' na':

—iLe'e bene' bi chejnilaže', chonchguale clele! ĩŠna chyažjen soalena' le'e cont šejnilaže'le? ĩBatca' zelao na'lagua' le'e?

Nach gože' xa bidao'na':

—Ben bidao' chion' nile.

<sup>42</sup>Na' šlac zjasane'be' lao Jesúsen', da' xigüen' benen cont gwyazbe' šon, na' bchix btolen lebe' lo yo. Na' Jesúsen' gwdile' da' xigüen' cont bechojen lo' yichjlažda'obe'. Nach beyaquebe'. Gwdena' beyone'be' lo na' xabe'. <sup>43</sup>Na' yogo' ben' že'na' besyebande' cate' besele'ede' yela' guac che Diosen'.

**Da' yoble Jesúsen' gwdixjue'ede' gate'**

(Mt. 17:22-23; Mr. 9:30-32)

Na' besyebande' che yogo'lo' dan' chon Jesúsen', na' šlac nite' ca', Jesúsen' gože' bene' ca' zjanaque' le' txen:

<sup>44</sup>—Le gon cont diža' nga šo'on yichjlažda'ole, na' bi ganlaže'len. Neda' gaca' lo na' ben' chesegue'enda', neda' naca' ben' gwsele' Diosen' golja' benach.

<sup>45</sup>Perw legaque' bitw gosejni'ide' diža' dan' be' Jesúsen', le naquen ca to da' ngaše' len legaque'. Na' besežebe' yesenabde'ne' bi zejen dan' gože' legaquen'.

**Gosacyože' noe' nacch blao**

(Mt. 18:1-5; Mr. 9:33-37)

<sup>46</sup>Na' bene' ca' zjanaque' Jesúsen' txen gosacyože' noe' nacch blao.

<sup>47</sup>Jesúsen' gocbe'ede' xbab dan' chesonen', na' bexue' to bidao' na' bzeche'be' cuite'na' <sup>48</sup>na' gože' legaque':

—Note'teze bene' chone' güen len to bidao' ca bi' nga neče' da' chejnilaže' neda', choncze' güen len neda'. Na' note'teze chon güen len neda' choncze' güen len Dios ben' gwsele' neda'. Na' note'tez le'e cate' chonle xbab che cuinle bibi zaca'tecle, canan' ba nacle bene' blao.

**Bene' bi chon contr chio' txenczen' chone' len chio'**

(Mr. 9:38-40)

<sup>49</sup>Nach Juanna' gože'ne':

—Maestrw, bežagto' to bene' cho'e lao' na' chebeje' da' xigüe' da' yo'o nyaz bene'. Na' bžonto' gone' ca', le bi chone' chio' txen.

<sup>50</sup>Nach Jesúsen' gože'ne':

—Bitw gwžonle gone' ca', le še to bene' bi chone' contr chio', txenczen' chone' len chio'.

**Jesúsen' gwdile' Jacobo len Juan**

<sup>51</sup>Na' lagüe' ba zoa bagwze yezi' yeca'a Diosen' le', bechoglaže' šeje' Jerusalén. <sup>52</sup>Na' gwsele' to chope bene' gosebialao lagüe'na'. Na' ja'aque' to yež gan' mbane distritw Samaria cont šjasesini'e gan' soa Jesúsen' len bene' ca' zjanaque' le' txen. <sup>53</sup>Perw bene' Samaria ca' bi bosolebe' Jesúsen' len bene' ca' nžague', le gosacbe'ede' zja'aque' Jerusalén. <sup>54</sup>Na' chope bene' ca' zjanaque' Jesúsen' txen, Jacobon' len Juanna', cate' besele'ede' can' goson bene' Samaria ca', nach gosenabde' Jesúsen':

—Maestrw, ¿che'ndo' gonto' can' ben da' Elías ben' be' xtiža' Diosen' cani', nabeto' Diosen' sele' yi' gwzeyen bene' qui?

<sup>55</sup>Nach Jesúsen' gwyechje' gwdile' legaque' gwne':

—Le'e bitw nezele non' chnabia' yichjlažda'ole. <sup>56</sup>Neda' bitw za'a cont gwziaya'a benach, san za'a cont gwnežjua'ne' yela' mban toli tocane, neda' naca' ben' gwseļa' Diosen' golja' benach.

Nach ja'aque' yež yoble.

**Can' gož Jesúsen' bene' ca' gosaclaže' yesaque' le' txen**

(Mt. 8:19-22)

<sup>57</sup>Šlac zja'aque' na', to bene' gože' le':

—Sa'lena' le' gate'teže šejo'.

<sup>58</sup>Nach gož Jesúsen' le':

—Nita' xišna' beza' na' lec chesyežin xišna' be dao' ca' zjazoa xil be chaš le'e yaba, perw bibi xišna' neda' de ga yezi'laža', neda' naca' ben' gwseļa' Diosen' golja' benach.

<sup>59</sup>Nach Jesúsen' gože' yeto bene':

—Yo'o len neda'.

Perw bena' gože' le':

—Xana', za' got xa'. Beňšca latje zgua'tec šjaycuaša'ne'.

<sup>60</sup>Na' gož Jesúsen' le':

—Bene' ca' zjanac yichjlažda'ogüe' ca che bene' guat, legaque' guaccze yosocuaše' yezica'chle bene' guat. Perw le', jatixjue'e bene' Diosa' nabi'e yichjlaždao' bene' yosozenague' che'.

<sup>61</sup>Nach lecze yetoe' gože' Jesúsen':

—Sa'lena' le' Xana', perw zgua'tec šjayzenda' xaxna'a len diaža chia'.

<sup>62</sup>Jesúsen' gože' le':

—Bene' ba gwzolao nagüe' neda', še bi ze'e do yichj do laže', o še yo'o yichje' da' ba gwdele, bi zaque' gone' xšin Diosen'. Naque' ca to bene' chne'e coscože'le šlac chgua'ane' go'ñ.

**Jesúsen' gwseļa' gayonši bene' šjasedixjue'ede' xtiže'**

**10** Na' gwdechle Xancho Jesúsen' gwleje' yegayonši bene' na' bene' mandadw yesebialagüe' šja'ac chope güeje' to to yež ga za' šej le'. <sup>2</sup>Na' cate' za' yesaque' gože' legaque':

—Chyažje bene' zan yeseyixjue'ede' xtiža' Diosen', perw to chopga bene' nita' yeseyixjue'eden'. Na' bene' yosozenag che Diosen' zjazacalebe' ca to coseš xen da' chyažje yedobe. Da'nan' le nabe Xancho Diosen' seļa'che' bene' yesaclene' chio' yotobcho coseš chen'. <sup>3</sup>Le šja'ac, le neda' chseļa' le'e šjatixjue'ele xtižen' len bene' ca' chesegue'ede' le'e. Zacalebe' ca xila' dao' ben' chja'ac gan' že' beco'yo. <sup>4</sup>Bitw gua'le bzod, ne mechw, ne yel, na' bi šele guaple bene' tiox bene' yežagle chanez. <sup>5</sup>Note'tez liž šole zgua'tec nale: “Chnablaže'šca' soa cuezle binlo len xbab dan' yo'o lo' yichjlažda'ole, le'e nita'le nga.”

<sup>6</sup>Na' še zoa to bene' chaclaže' soa cueze' binlo len yichjlažda'ogüe'na', nach gac can' gwñablaže'le cont soa cueze' binlo; perw še nono zoa bene' chaclaže' soa cueze' binlo len yichjlažda'ogüe', bi gac dan' ba gwñablaže'len'. <sup>7</sup>Na' lo' yo'o na'teže yega'ane'. Bitw tale to to yo'o. Le ye'ej le gagw bite'teže da' chesone' ye'ej gagwle. Ca to bene' güen

žin cheyała' si' laxjue', lecz ca' le'e zaca'le yesone' da' ye'ej gagwle. <sup>8</sup>Na' cate' žinle to yež ga chesonxene' le'e, le ye'ej le gagwteze da' yesone' le'e. <sup>9</sup>Le yeyon bene' güe' bene' nita' yež gan' žinle, na' le' ye'e: "Ba bžin ža gwzenagle che Diosen' cont nabi'e yichjlažda'ole." <sup>10</sup>Perw na' cate' žinle to yež ga bi yosolebe' le'e, le šja'ac la cay na' le ye'e: <sup>11</sup>"Bište che lažle nga da' žia ni'ato', cuibton' cont gwlo'eto' le'e malen' chonle bi chzenagle xtiža' Diosen' dan' choe'to'. Perw chyixjue'eto' le'e Diosen' chazlaže' gwzenagle che' cont nabi'e yichjlažda'olen." <sup>12</sup>Da' mal xen goson bene' ciuda Sodoma cani', perw žia' le'e, žan' gac juisyw bene' ca' bi bosolebe' le'e ližen', yesa'le'chde' clal ca bene' Sodomani'.

**Bene' ca' bi chosozenag xtiža'  
Jesúsen'**

(Mt. 11:20-24)

<sup>13</sup>Nach gozna Jesúsen':  
—iNyaše'chguaze gac che le'e bene' Corazín! iNyaše'chguaze gac che le'e bene' Betsaida! Bene' ca' nita' Tiro na' Sidón ba' besyetinjde' xto'la'gaque' šaca' blo'egacda'ne' yela' guac chia' ca da' ba blo'eda' le'e. Na' bosose'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e bene' ba boša' yichjlažda'ogüen'. <sup>14</sup>Saca'zi'chle clal ca bene' že' Tiro na' Sidón cate' žin ža gac juisyw. <sup>15</sup>Le'e nita'le yež Capernaum chonle xbab šeca Diosen' gonchgüe' le'e yela' bala'an. Bi gone' le'e yela' bala'an san gone' le'e castigw toli' tocane dan' bi chejle'le chia'.

<sup>16</sup>Nach Jesúsen' goze'e bene' gayonši ca':

—Bene' gwzenag xtiža'len' lecze gwzenague' xtiža'na', na' bene' goncze yichjlagüe' bi gwzenague' xtiža'len', lecze bi gwzenague' chia' neda'. Na' bene' goncze yichjlagüe' bi gwzenague' xtiža'na', lecze bi gwzenague' xtiža' Diosen' ben' gwse'la' neda'.

**Besyěžin bene' gayonši ca'**

<sup>17</sup>Bene' gayonši ca' cate' beyož jasedixjue'ede' xtiža' Jesúsen', besyežine' gan' zoen' na' besyebechgüede'. Nach gose'e Jesúsen':

—Xanto', chebechgüeto' can' goquen', le da' xigüe' ca' chosozenaguen cheto' cate' chonto' mandadw yesyechojen lo' yichjlaždao' bene' choe'to' lao'.

<sup>18</sup>Na' gože' legaque':

—Ble'eda' bedao'nez gwnit yela' gwnabia' che Satanásen' dan' chnabia' da' xigüe' ca'. <sup>19</sup>Ba bena' le'e yela' guac cont gwlej gwšošjle no bel' znia na' no bexjoni' na' cont soele Satanásen' bi gonen le'e gan. Na' bibi de da' gonen le'e zi'. <sup>20</sup>Perw bi yebele neche da' xigüen' chosozenaguen chele, san le yebe da' ba bzoj Diosen' lala' le'e libr gan' nyoj la yogo'lol' xi'ine' ca'.

**Bebechgüe Jesúsen'**

(Mt. 11:25-27; 13:16-17)

<sup>21</sup>Za' beyožte gwna Jesúsen' ca' nach ben Spiritw che Diosen' cont bebechgüede' na' bol' güiže' Diosen', gwne':

—Xa', le' chnabi'o bene' ca' že' yaba na' yežlion'. Na' chona' yela'

choxc̣len cḥio' ba bzejni'ido' bal  
bene'. Ba bzejni'ido' bene' ca'  
gosacbe'ede' cheseyažjde' no gwsed  
gwlo'e legaque'. Na' bitw bzejni'ido'  
bene' ca' cheson xbab zjanaque'  
bene' sina' na' bene' zjanejni'i. Beno'  
ca' X̣a', le can' gwyazlažo'.

<sup>22</sup>Nach gože' bene' ca' že'na':

—X̣an' ba bene' lo' na' chona' cont  
chombia' bene' le'. Le' nombia'yañe'  
neda', na' neda' nombia'yañ'a' le'. Na'  
bene' ca' ba gwleja' ba zjanombi'e  
X̣an'. Na' nono nochle zjanombia' X̣a'  
ñe neda'.

<sup>23</sup>Na' gwyechj Jesúsen' gwñe'e  
bene' ca' zjanaque' le' txen na' gože'  
legaque':

—Mbachgua zoale chle'ele neda'  
na' chle'etele da' ca' chona'. <sup>24</sup>Na'  
chnia' le'e zan bene' ca' gosole xtiža'  
Diosen' cani' len bene' zan rey  
gosaclaže' yesele'ede' dan' chle'ele  
ñ'a', perw bitw goła' yesele'eden',  
na' gosaclaže' yesende' dan'  
chenelen', perw bitw goła' yesenden'.

### Jempl che to bene' güen, bene' Samaria

<sup>25</sup>Na' gwzoža' to bene' nsedchgüe'  
ley dan' bzoj da' Moisés, goclaže'  
cueje' Jesúsen' diža' da' gwchine'  
contr le' na' gože'ne':

—Maestrw, čbi da' cheyała' gona'  
cont gata' yeła' mban chia' toli' tocane'?

<sup>26</sup>Na' gož Jesúsen' le':

—čBi nyoj le'e leyna'? čNac žan'?

<sup>27</sup>Na' ben' chejni'ichgüe' leyna'  
boži'e xtiža' Jesúsen', gože' le':

—Ley che Diosa' žan: "Cheyała'  
gaquecho X̣ancho Diosen' con  
ca zelao chejni'icho, do yichj do  
laže'cho, do fuers valor checho, na'  
gaque lježcho ca chaque cuincho."

<sup>28</sup>Nach gož Jesúsen' le':

—Da' licze can' ba gwnao'na'. Can'  
cheyała' gono' cont bano' toli' tocane'.

<sup>29</sup>Na' bena' goclaže' gwlo'ede'  
choncze' can' ža leyna', na' gože'  
Jesúsen':

—čNon' nac bene' lježa' ben'  
cheyała' gacda'?

<sup>30</sup>Na' Jesúsen' gože' le':

—To bene' beza' Jerusalén par  
yežine' yež Jericó, jasyexen bene'  
gwban le'. Na' goseyine' xałane'  
na' gosot goseyine' le'. Nach  
besyeya'aque' bosocua'ane' le' cacze  
to bene' guat. <sup>31</sup>Na' to bxoz che bene'  
Israel ca' gwdie' lo' neza', na' cate'  
ble'ede' bena' dena', nach gwcuaše' to  
šļa'ale neza' na' con gwdeze'. <sup>32</sup>Lecz  
ca' ben to diaža che da' bene' Leví  
ca'. (Xi'in diaža che da' Leví yo'lo  
lo' na'gaque' chesone' mandadw lo'  
yodao' blao.) Bena' zeje' tnez na' cate'  
ble'ede' ben' dena', na' gwcuaše' to  
šļa'ale neza' na' con gwdeze'. <sup>33</sup>Nach  
to bene' Samaria ngüe'e neza'  
nlague' xpurrue' na' bžine' gan' de  
bena', perw na' le' cate' ble'ede' ben'  
beyaše'laže'. <sup>34</sup>Na' gwbigue' gan' de'  
na' bene' le' rmed, bšone' set len vino  
lao güe' che'na' na' bchejen' lache'. Na'  
božie' le' cože' xpurrue' na' beče'e le'  
ga zoa to mesón ga gwñe'e le'. <sup>35</sup>Na'  
beteyo cate' beza' bene' Samaria,  
gwleje' mechw da' zaca' ca' chop ža  
žin na' bnežjuen' xan mesónña' ca  
laxjue', na' gože' le': "Gwñ'a' benga  
na' še žan bichle da' gono' gastw na'  
chixjuan' cate' zez'a."

<sup>36</sup>Beyož be' Jesúsen' diža' can' goc  
che ben' jasyexen bene' gwban ca',  
nach gože' bena' chsed chlo'e leyna':  
—čNac chono' xbab? čNo bene' ca'  
šone' gocde'ne' ca' bene' lježe'?

<sup>37</sup>Nach bena' chsed chlo'e leyna' gože' Jesúsen':

—Bena' beyaše' beži'ilaže'de' bena' jasyexen gwban ca'.

Nach gož Jesúsen' le':

—Lecze ca' cheyala' gono' le', yeyaše' yeži'ilaže'do' yogo'loł bene'.

### Jesúsa' jañe'e Marta na' María

<sup>38</sup>Na' gosego'oche' nez na' besyežine' to yež ga zoa to no'ole lie' Marta, na' Jesúsen' gwyeje' liže'na'. <sup>39</sup>Na' zoa to bile' le María. Na' Marían' gwchi'e cuít Jesúsen' bzenague' xtiže'na'. <sup>40</sup>Perw na' Martan' belachgüede' bsiñie' da' yesagüe'. Na' gwyeje' lao Jesúsen' na' gože' le':

—Xana', ěbi chacdo' median can' bcua'an bene' bilan' neda' toza' len mandadua'? Benšca mandaw gaclene' neda'.

<sup>41</sup>Xancho Jesúsen' gože' le':

—Marta, chi'chgua yichjo' mandadua' na' chacžejlažo' dan' nyanchguan. <sup>42</sup>María nga ba gwleje' da' naquech da' güen. Chi'e chzenague' chia', na' notno gwžon gone' ca', le len da' nacch da' žialao da' cheyala' gonle.

### Jesúsen' blo'ede' can' yosoł güiže' Diosen'

(Mt. 6:9-15; 7:7-11)

**11** Na' gwzoa Jesúsa' to latje choł güiže' Diosen'. Cate' beyož boł güiže'ne' to bene' ca' zjanaque' le' txen gože' le':

—Xanto', bzejni'i neto' nac cheyala' yoł güižto' Diosen', can' bzejni'i da' Juanna' bene' ca' gosaque' txen len le'.

<sup>2</sup>Na' Jesúsen' gože' legaque':

—Cate' yoł güižle Diosen', quinga nale:

Xato' bene' zoa yaba,  
chnabto' yogo'loł bene'  
yesonxene' le'.

Zelaže'to' nabi'o yichjlaždao'  
yogo' neto' benach.

Gacšca can' chazlažo' yežlio nga  
can' chac yabana'.

<sup>3</sup>Ca nac dan' che'ej chagwto' tža  
tža, benšca cheto' na'a.

<sup>4</sup>Na' bezi'xenšca cheto', le  
lencze neto' chezi'xento' che  
ljež benachto' bite'tez da'  
chesonde' neto'.

Na' bitw go'o latje soa da'  
gwžigan' neto' gonto' da' mal,  
san bcuase bcue'ejšca neto' len  
da' mala'.

<sup>5</sup>Nach gož Jesúsen' legaque':

—Le gon xbab še šejle liž bene'  
migw chele do chel na' ye'lné:  
“Migw chia', benšca neda' šone  
yetextil. <sup>6</sup>Ba bla' to bene' migw  
chia' bene' za' zito', na' bibi de chia'  
da' gua'ane' gagüe'.” <sup>7</sup>Na' chixe še  
migw chelen' yo'e lo' yo'ote yoži'e  
xtiža'len': “Bitw gondo' neda' zed,  
le ba nyeyjw cho'a yo'o na' ba  
deto' chtasto' len bi' cheto' ca'. Bi  
gac chasa' gona' dan' chyažjdo'.”  
<sup>8</sup>Chnia' le'e, la'czla' naque' migw  
chele, bitw ye'nde' chase' gone'  
dan' chyažjele, perw še gata'yoelne'  
šša na' chasšaze' gone' bite'tez da'  
chyažjele. <sup>9</sup>Na' chnia' le'e, še žan  
bi da' chyažjecho, chnabchon. Še  
žan to da' chaclaže'cho želecho,  
chyljwchon. Še žan chaclaže'cho  
saljw bene' cho'a yo'o che', na' necho  
cho'a yo'on cont saljue'. Na' ca'cze  
cheyala' ye'le Diosen' cate' bi da'  
chyažjele o bi da' chaclaže'le gone'.

<sup>10</sup>Na' note'tezle še bi da' nabelene', gonczen'. Na' še bi dan' che'nele gwzejni'ide' le'e, gwzejni'iczdzen'. Na' note'tezle še žan chaclaže'le gac to da' gac, yoł güižle Diosen' can' chon to bene' chnie' cho'a yo'o, nach Diosen' gone' cont gacczen.

<sup>11</sup>'Na' le'e nacle xa bidao', še xi'inle nabebe' le'e yetextil, źgwnežjwlebe' to yej? Na' še nabebe' le'e yid bel gagwbe' źgwnežjwlebe' to be xigüe'? <sup>12</sup>Na' še nabebe' le'e to žit gagwbe' źgwnežjwlebe' to be xjoni'? Cabi gonle ca'. <sup>13</sup>La' nacle bene' mal, nezczele gwnežjo xi'inle to da' güen. Nacchxe güen gon Xacho Diosen' ben' zoa yaba gwnežjue' Spiritw chen' soan lo' yichjlaždao' bene' chnab len.

**Gosene' Jesús'en' bebeje' da' xigüe' len yela' guac che Beelzebú**

(Mt. 12:22-30; Mr. 3:19-27)

<sup>14</sup>Gwzoa to bene' gwyo'o gwyaz da' xigüe' yichjlažda'ogüe' na' benen cont bi goc nie'. Na' Jesús'en' bebeje' da' xigüe' lo' yichjlažda'ogüe'na'. Na' cate' bechoj da' xigüen', na' goc benie'. Na' bene' ca' že'na' besyebanchgüede'. <sup>15</sup>Perw bale' gosene':

—Beelzebú dan' chnabia' da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' bene'.

<sup>16</sup>Na' yebale' cont gosagüe' xya che' gosenabde'ne' gone' to yela' guac da' yesele'ede' le'e yaban' cont yesenezde' še da' licze Diosa' gwsele' le'. <sup>17</sup>Perw Jesús'en' gocbe'ede' xbab dan' gosone', na' gože' legaque':

—Ša to gobiern choje' chop šon cuen na' yeyoža' yesedile'

legacze', gobiernna' bi sibi'e. Na' še bene' to lo' yo'o yesechoje' chople na' yesedile' legacze', gague šša yesenite' txen. <sup>18</sup>Na' še Satanásen' dan' chnabia' da' xigüen' len da' xigüe' chen ca' yesechojen chople na' yesedilen, lecze bi sibian', san na' yeyož yedon. Le'e chnale Beelzebún' dan' chnabia' da' xigüe' ca' chaclenen neda' cont chebeje' da' xigüe' zjajo'o zjanyaz yichjlaždao' bene'. <sup>19</sup>Šaca' naquen can' žalen', lecze zejen dan' chnabia' da' xigüe' ca' chaclenen bene' lježle ca' chesyebeje' da' xigüe' zjajo'o zjanyaz yichjlaždao' bene'. Bene' lježle ca' yes'e le'e clelen' žale. <sup>20</sup>Neda' chebeje' da' xigüe' len yela' guac che Dios, na' dan' chona' ca' chlo'en ba bžin ža Diosen' nabi'e yichjlaždao' bene' yosozenag che'.

<sup>21</sup>'Satanásen' naquen ca to bene' gual, na' neda' naccha' bene' gualch. Na' nezele cate' to bene' gual chape' ližen' len spada, bibi gac che da' de che'. <sup>22</sup>Perw cate' žin to bene' gualch ca le' na' tillene' le', nach ben' nac bene' gualch gon gan. Na' que'e spada che ben' da'na' zoe' lez gaclen le' na' ca'atie' bichle da' de che' na' chisen' len bene' migw che' ca'.

<sup>23</sup>'Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

**Da' xigüe'na' yeyo'on da' yoble lo' yichjlaždao' bene'**

(Mt. 12:43-45)

<sup>24</sup>'Na' še to da' xigüe' da' gwyo'o gwyz lo' yichjlaždao' bene' yechojen, nach lažen nile na'le



yeyiljon ga soan mbalaz. Na' še bibi latje želen, nach nan: “Da' yoblecze šjajo'a lo' yichjlaždao' ben' gan' ba gwyo'a.” <sup>25</sup>Nach yeyejen da' yoble gan' zoa ben'. Cate' le'en bač cheyone' güen, na' ba zoache' binlo, <sup>26</sup>nach šjajyoben yegaže da' xigüe' ca' da' zjanacch malech ca' len, na' txen yeso'on lo' yichjlažda'ogüe'na'. Na' še bač goc ca', gacch mal che bena' clal ca' dan' ba goc che' da' nechw.

**Mbalaz nita' bene' ca'  
chosozenag xtiža' Diosen'**

<sup>27</sup>Šlac be' Jesúsen' diža' quinga, gwzoa to no'ole gachol bene' ca' že' gan' bsd blo'ede', na' no'ola' gwne' zižje, gože'ne':

—Mbalaz zoa no'ola' gwxa' le' na' bguaže' le'.

<sup>28</sup>Perw na' Jesúsen' gože'ne':

—Nacchxe mbalaz nita' bene' ca' chosozenag xtiža' Diosen' na' chesone' can' žanna'.

**Bene' bi chosozenag che Diosen'  
chesenabe' gon Jesúsen' to yela' guac**

(Mt. 12:38-42; Mr. 8:12)

<sup>29</sup>Na' bene' zan gosebigue' gosechjde' Jesúsen', nach Jesúsen' gwne':

—Le'e zoale na'a nacchgualē bene' laždao' xi'a. Chnable gona' yeto yela' guac da' le'ele cont nezele še Diosa' gwsele' neda', perw bi gona' ca' dan' chnablena', le ba ble'ele da' ca' chona'. Lete gac chia' can' goc che da' Jonás ben' be' xtiža' Diosen' cani'. <sup>30</sup>Na' ca' dan' goc che Jonásen' blo'en bene' Níneve ca' Diosen' gwsele' le', ca'cze dan' gac chia' gwlo'en le'e zoale na'a

Diosen' gwsele' neda' golja' benačh.

<sup>31</sup>Cate' žin ža gon Diosen' castigw che yogo'lol bene' cheson da' mal, da' no'olen' gwnabi'e bene' Seba ca' yedecuiše' le'e mbanle na'a. Le' gwze'e gan' nac zito'chgua na' bide' nga cont bedezenague' diža' sina' dan' be' da' rey Salomón len le', na' neda' zoa' nga naccha' bene' blaoch ca' da' Salomón na' bitw chzenagle chia'. <sup>32</sup>Na' cate' žin ža gon Diosen' castigw che yogo'lol bene' cheson da' mal, lecze žana' yesyeban bene' Nínive ca' na' yosocuiše' le'e nita'le ža na'aža. Le' legaque' besyetingjde' xto'la'gaque' cate' da' Jonásen' gwduxjue'ede'ne' can' gwna Diosen'. Na' neda' zoa' nga naccha' bene' blaoch ca' da' Jonása' na' bi chzenagle chia'.

**Dan' bsd blo'e Jesúsen' naquen ca  
to yi'**

(Mt. 5:15; 6:22-23)

<sup>33</sup>Notno gwguala' to yi' na' gw dosen' caj, na' neca gwcašen' ga yoble ga nono le'e len, san chde'en le'e ze'e cont gwse'ni' len yogo'lol bene' yeso'o lo' yo'ona'. <sup>34</sup>Žia' yejlaocho cont le'echo. Con še bibi chaquen chle'eczecho binlo. Perw še ncholcho, bi chle'echo. Ca'czen' naquen len yichjlažda'ochon'. Še naccho bene' laždao' güen, yo'o be'ni' che Diosen' lo' yichjlažda'ochon'. Perw še naccho bene' mal, chol' nac yichjlažda'ochon'. <sup>35</sup>Da'n' le' gon cont gacle bene' laždao' güen, na' šo' be'ni' che Diosen' yichjlažda'ole. <sup>36</sup>Še nyeni' yichjlažda'olen' na' bibi da' mal yo'on, gwse'ni'czen xnezle can' chse'ni' to yi' ga nac chol.

Jesúsen' gože' bene' fariseo ca'  
zjanape' doļa' na' len bene' ca'  
chososed chosolo'e ley

(Mt. 23:1-36; Mr. 12:38-40; Lc. 20:45-47)

<sup>37</sup>Cate' beyož be' Jesúsen' diža'  
quina, to bene' fariseo gwčhe'e  
le' liže' cont yesagüe'. Na' gwyo'o  
Jesúsen' liž bene' fariseon' na'  
gwchi'e cho'a mesen'. <sup>38</sup>Na' bene'  
fariseon' bebande' ble'ede' bitw  
bona' Jesúsen' cate' za' gagüe' can'  
cheson legaque' chesacde' chebe  
Diosen' legaque' dan' chesone' ca'.

<sup>39</sup>Na' Xancho Jesúsen' gože' le':

—Le'e bene' fariseo nacle ca xiga'  
ye'en da' chčhin bene' na' chyibe'  
čožen' binlo perw bi chyibe' do lo'en.  
Chonle cont chesaque bene' nacle  
bene' güen, perw chebele chca'ale  
bi da' de che bene' na' nacle bene'  
mal juisyw. <sup>40</sup>Bicze bi chejni'ile.  
Chi' yichjle gacle xilaže' len cuerp  
čhelen'. Lecz ca' cheyaļa' cue' yichjle  
gacle xilaže' len yichjlažda'ole, le  
Diosen' ben' bene' cuerp chechon'  
lecze bene' yichjlažda'ochon'. <sup>41</sup>Le  
yeyaše' bene' na' le gwnežjo bi da'  
cheseyažjde'. Še gonle ca', nacia'  
nacle bene' laždao' xilaže'.

<sup>42</sup>'iNyaše'chguaze gac che le'e  
bene' fariseo! La'czļa' chnežjwle  
Diosen' to part lao ši part che  
yixe'güej, che yej Santa María, na'  
che bichle cuan chele, bibi zejen  
dan' bi chonle bichle da' nac da'  
güen, na' da' bi chaquele Diosen'.  
Da' nac da' žialao gonle, gonle da'  
nac güen na' gaquele Diosen'. Perw  
bi cuejyichjle gwnežjwle da' ca'  
chnežjwle Diosen'.

<sup>43</sup>'iNyaše'chguaze gac che le'e  
bene' fariseo! Chzelaže'le cue'le

lo' yodao' txen len bene' blao ca',  
na' cate' chejle do gan' chac ya'a  
chaclaže'le yesonxen bene' le'e.

<sup>44</sup>'iNyaše'chguaze gac che le'e  
chsed chlo'ele da' bzoj da' Moisés  
na' len le'e bene' fariseo! Chonle  
cont nacia' gan' xoa ba che  
bene' guaten', le ley chechon' žan  
zjanaquen zban na' bi cheyaļa'  
gwlejchon. Perw le'e nacle ca ba  
da' bi zjanacia'. Chosozenag bene'  
chele na' bi chesacbe'ede' nacle  
bene' laždao' zban.

<sup>45</sup>To bene' chsed chlo'e ley boži'e  
xtiža' Jesúsen', gože'ne':

—Maestrw, lagüe da' žo' da'  
quina, chaqueton' zi'.

<sup>46</sup>Na' gož Jesúsen' legaque':  
—Lecze ca' le'e chsed chlo'ele ley  
da' bzoj da' Moisés, inyaše'chguaze  
gac chele! Da' žale da' zan da'  
cheyaļa' yeson bene', chonle leyna'  
ca to yoa' da' nocze no do'e, to yoa'  
da' chaclaže'le yesoa' bene' yoble,  
perw le'e ne late'ze bi chaclaže'le  
gua'len.

<sup>47-48</sup>'iNyaše'chguaze gac che  
le'e chonšagüe'le cho'a ba che  
da' bene' ca' gosoe' xtiža' Diosen'  
cani! Chacle toze len da' xozxta'ole  
ca' ben' gosote' legaque'. Na' dan'  
chonle ca', zejen chazlaže'le dan'  
gosote' legaquen'.

<sup>49</sup>Da'n'an' Diosen' lao yela' sina'  
che' gwne' sele' bene' yesoe'lene'  
le'e xtižen' na' sele' postlw che' ca'  
len le'e. Na' gwne' gotle baļe' na'  
gwchi' gwsaca'le yebaļe'. <sup>50</sup>Na' da'  
li ba chonle can' gwnen'. Da'n'an'  
si'le castigw che yela' got che yogo'  
bene' ca' gosoe' xtižen' gwzolaon  
caten' gwxete yežlion' chžinten  
ža na'aža. <sup>51</sup>Zan bene' gosot bene'

yoble legaque' gwzolaozen len da' Abel ben' beyot da' biše' Caín le', na' beyožen len da' Zacarías ben' gosote' ladjo yodao' blaona' na' ladjo mes de yej dan' zoa chy'o'o yodao' gan' chesote' beyixē' cont chesonxene' Diosen'. Na' le'e mbanle na'a si'le castigw che yela' got che yogo' bene' ca'.

<sup>52</sup>'iNyaše'chguaze nac le'e chsed chlo'e'le ley che Diosen'! Bitw chzejni'ile bene' leyna' to liča can' naquen, neca chzenagle chen. Na' bene' chesaclaže' yosozenaguen', neca cho'e'le latje yosozenaguen'.

<sup>53</sup>Na' cate' beyož be' Jesúsēn' diža' quinga, nach bene' fariseo ca' na' bene' ca' chososed chosolo'e ley gosacyožchgüe' len le'. Na' gosaclaže' yesebeje' le' diža' <sup>54</sup>le gosaclaže' choj dižan' cho'e' da' yosode'ede' yesagüe' xya che'.

**Yela' güexoayag che bene' fariseo**

**12** Na' goc zan mil bene' besežague' gan' zoa Jesúsēn', catec bene' zan besežag bosolej bosošojte ni'a lježe'. Na' Jesúsēn' zgua'tec gwzolağüe' be'e diža' len bene' ca' zjanaque' le' txen, gože' legaque':

—Le gwsaca' len levadura che bene' fariseo ca'. Dan' cheseziye'e bene' cont yesacde' zjanaque' bene' güen zaca'leben ca levadura dan' chchixede' yetextil. Bitw gonle can' chesonen'. <sup>2</sup>Le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'. <sup>3</sup>Da'nān' bite'teže da' gwnale bagaše'ze, bene' zan yesenden'. Na' dan' ba gwnale

šižize lo' yo'o chelen', yogo'ze bene' yesenezden'.

**Non' cheyala' žebcho**

(Mt. 10:28-31)

<sup>4</sup>'Bene' migw chia', chyixjue'eda' le'e bitw žeble bene' ca' yesot le'e, le cate' ba gotle bich bi gac yesonde' le'e. <sup>5</sup>San zoa ben' cheyala' žeble, cheyala' žeble Diosen', le cate' bačh beque'e yela' mban chele, lecze nape' yela' chnabia' cont yeselē' le'e gabil. Da' yoble chnia' le'e, cheyala' žeble Diosen'.

<sup>6</sup>'Nezecho byin' dao' ca' bibi zjazaca'tecba', perw na' Diosen' ne toba' bi chanlaže'. <sup>7</sup>Na' ca nac chio', da' leca chaque Diosen' chio' neztede' bal yiša' yichj to tocho žia. Da'nān' bitw žeble, le zaca'ch le'e clel ca yogo' byin' dao' ca'.

**Cheyala' ye'cho bene' nombia'czcho Jesucriston'**

(Mt. 10:32-33; 12:32; 10:19-20)

<sup>8</sup>'Na' chnia' le'e, note'tez bene' še cho'e diža' len benačhen' che'ene' chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' naque' neda' txen, neda' naca' ben' gwsela' Diosen' golja' benačh. <sup>9</sup>Na' note'teže bene' še cho'e diža' len benačhen' che'ene' bitw chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' bitw naque' neda' txen.

<sup>10</sup>'Na' note'teže bene' še ne' yela' ya' chia' neda' naca' ben' gwsela' Diosen' golja' benačh, Diosen' yezi'xene' che' še yetinjdē'. Perw note'teže bene' še ne' yela' ya' che

Spiritw che Diosen', gwbat yezi'xen Diosen' che'.

<sup>11</sup>'Na' cate' yeseche'exoxje' le'e lao bene' gwnabia' che yodaon' o lao justis o še lao nochle bene' gwnabia', bi cuec yichjle nac yoži'ile xtiža'gaquen' o še nacle nale. <sup>12</sup>Lo hor na'teze gwzejni'i Spiritw che Diosen' le'e bin' cheyała' nalen'.

**Bitw cheyała' cuec yichjcho tlaoze bi da' de checho**

<sup>13</sup>To bene' bchoje' ladjo bene' zan juisyw ben' zjanžag na', na' gože' Jesúsen':

—Maestrw, gonšco' mandadw cont bene' bišan' gone' neda' bien che da' xaxna'to' da' cheyała' si'a.

<sup>14</sup>Na' Jesúsen' gože' le':

—Bitw naca' neda' juez chele. Bi cheyała' gua' neda' laze da' de chele.

<sup>15</sup>Nach gože' yogo'loł' bene' ca' že'na':

—Le gwsaca' cont bi selaže'le bi da' gata' chele yežlio nga, la' de bi de checho o la' bibi de checho bi da' chyažj chchinecho, gague da' can' nac yela' mban checho.

<sup>16</sup>Na' be'lene' legaque' to jempl, gwne':

—To bene' gwni'a gocchgua coseš che', <sup>17</sup>na' bene' xbab lo' yichjlažda'ogüe' gwne': “iNacxe gona'? Bich bi latje de ga gwžeš'agua' coseš chian'.” <sup>18</sup>Nach gozne': “Quinga gona', yochinja' yo'o gan' že' coseš chia' quinga na' gona' yo'o xench. Na' gwžeš'agua' cosešen' na' bichle da' de chia'. <sup>19</sup>Na' lagüe ba de da' yažjda' da' zan iz, bich gona' žin. Ye'ej gagwteza' con da' chaclaža' na' gona' legr.” <sup>20</sup>Perw Diosen' gože' bena': “Chono' xbab da'

bibi zaca'. Na'aže' bžin hor gato', na' žnola lo na' gac yogo' da' de chio'?”

<sup>21</sup>Can' gac che note'tez bene' še con chbec yichje' tlaoze da' de che' šlac mbane' na' bi chone' da' chazlaže' Dios.

**Diosen' chapši'e xi'ine' ca'**

(Mt. 6:25-34)

<sup>22</sup>Na' gož Jesúsen' bene' ca' zjanaque' le' txen:

—Da'nan' žia' le'e, bi gacžejlaže'le bi da' gagwle šlac mbanle, na' lecž ca' bi gacžejlaže'le che xałana'le.

<sup>23</sup>Zaca'ch yela' mban chelen' ca yela' guagw. Lecze ca' cuerp chelen', zaca'chen ca xałana'le. <sup>24</sup>Le gon xbab che bechj ca', bitw chesazba', bitw chesyelapba', neca zoa da'a xoa' chegacba', neca zoa ga ncu'a no goš chegacba' ga že' da' yesagwba', perw na' Diosen' chguagwcz'e'ba'. iNacchle zaca' le'e ca be ca' zjažia xil! <sup>25</sup>Na' ne tole bi gac yoston cuinle gašje metr še con cue' yichjle tonle. <sup>26</sup>Nezele bitw gac yoston cuinle, na' neca naquen da' zaca'. Da'nan' bi gacžejlaže'le che bica'chle da' chyažjele.

<sup>27</sup>Le gon xbab ca nac yej ca' da' zjaze yixe'. Chesecha'oczen, bibi žin chesonen, neca chesaljen do. Na' chnia' le'e, da' rey Salomón gocue' lache' güen juisyw, perw bitw bžinlaže' xałane'na' ca yela' xdan che yej ca'. <sup>28</sup>Diosen' none' xdan da' ca' ze yixen' la'czla' to chop žaze nitan' na' chosozeyen'. iNacchxe gon Diosen' len le'e gwlecze yichje' gone' yogo' da' chyažjele, le'e late' lasze chejle'le che'! <sup>29</sup>Da'nan' bitw güe'laže'le cont gata' da' ye'ej da' gagwle.

Bitw gaczejlaže'le čen. <sup>30</sup>Beñe' ca' bi chesonxene' Diosen' con chesoe'laže' čhe bi da' gata' yese'ej yesagüe' na' čhe xałana'gaque'. Perw Xacho Diosen' nezcze' bi da' ca' čhyažjele. <sup>31</sup>Cheyała' güe'laže'le gwzenagle čhe Diosen' cont nabi'e yichjlažda'olen', na' yogo' da' ca' čhyažjele, goncze Diosen' len.

**Da' zaca'ch gata' čhecho yežincho yaba**

(Mt. 6:19-21)

<sup>32</sup>Bitw žeble la'czla' nac to čople. Diosen' chbede' chnabi'e yichjlaždao' le'e chzenagle čhe' na' chaclene' le'e. <sup>33</sup>Le yeyote' da' de čele cont gata' da' gwnežjwle beñe' ca' cheseyažje. Še gonle ca', Diosen' gone' le'e da' zaca'ch na' da' cbi te čen cate' yežinle yaba gan' zoe'na'. Na' bitw gac šo' beñe' gwban que'en, na' neca gac šo' be dao' gwžiai' len. <sup>34</sup>Gan' de dan' chaquele nan' zoa yichjlažda'olen'.

**Cheyała' soa cuezcho batcan' yide Criston' yeto**

<sup>35-36</sup>Le soa le cueze batcan' yida' yeto. Le soa can' nita' beñe' chesape' liž xangaquen' šlac zeje' to yela' güešagna'. Zjanyaz xałana'gaque' na' čala' yi'. Nach cate' yežine' na' nie' cho'a yo'on, na' la' yesesaljwte' cont yeyo'e. <sup>37</sup>Mba gac čhe beñe' ca' chesebeze' batcan' yežin xangaquen'. Še nite' chesebeze' le' caten' yežinen', nach gwsini'e da' yesagüe' na' cuine' gwnežjue' legaue' dan' yese'ej yesagüe'. <sup>38</sup>Mba gac čhegaue' še chesebeze' batcan' yežine' la'czla' yežine' do chel o do šbal. <sup>39</sup>Le gon xbab čhe da' nga. Šaca' neze xan

yo'on baten' žin beñe' gwban liže'na', le gwna'ze' cont bi güe'le latje šo' bena' liže'na' cuane' xšinlazen'. <sup>40</sup>Le soa le cueze batcan' yida' da' yoble, le cate' bi chonle xbab yida', canan' yida', neda' naca' bena' gwseła' Diosen' golja' benačh.

**Mos ben' chon güen, na' mos ben' bi chon güen**

(Mt. 24:45-51)

<sup>41</sup>Pedroa' gože' Jesúsen':  
—Xanto', čho'o jempl nga par neto'ze o še par yogo'loł benačh?  
<sup>42</sup>Nach gož Xanchon' Pedroa':  
—Naquen par note'tez beñe' še chone' can' chon mos blao ben' chejni'i, ben' chon can' cheyała' gone'. Ben' chon ca', co' xane' lo ne'e ližen' cont ne'e mos ca' yezica'chle. Na' gone' da' yesagw to toe' cate' žin hor yesagüe'. <sup>43</sup>Še to beñe' mos chonteze' can' ben xanen' mandadw gone', mba soe' cate' yežin xanen'. <sup>44</sup>Da' li chnia' le'e, xanen' cue'e lo na' mosen' yogo'loł da' de čhe'. <sup>45</sup>Perw na' še mosen' gone' xbab na' ne': "Ba gwže xanan'", na' solagüe' got čhine' mosa' yezica'chle na' ye'ej gagwxate' na' sožde', <sup>46</sup>nach xane'na' yežine' to ža senyale' le' cate' bi gacbe'ede'. Na' da' bi chon mosen' can' cheyała' gone', xane'na' got čhinchgüe' le' na' gone' cont si'e castigw txen len yezica'chle beñe' bi cheson can' cheyała' yesone'.  
<sup>47</sup>'Na' mos ben' nac beñe' güedenag, la'czla' ba neзде' can' che'ne xanen' gone', bi chone' ca'. Bi zoe' chbeze' batcan' yežin xanen', na' da'n'an' xanen' got čhinchgüe'ne'.  
<sup>48</sup>Na' beñe' bi neзде' bin' non xanen' mandadw gone' na' da'n'an' chone'

da' zaca' chine' le', na' xanen' bi chintequé' le' zi'. Note'teze bene' zjanyechgua xbab, chese'go'o bene' lo' na'gaque' da' zan da' yesone', na' chonen byen yesone' yogo' da' ca' zjajo'o lo' na'gaque' yesone'.

**Yesedil bene' neche da' bid Jesúsén'**

(Mt. 10:34-36)

<sup>49</sup>Nach gwna Jesúsén':

—Dan' zedeyena' yežlio nga naquen ca to yi' da' cuéc bene'.

Na' yebeda' šaca' ba chi' yi'na'.

<sup>50</sup>Za'a cont saca'zi'a na' gata'. Na' chžaglagua' šlac chbeza' žin ža yeyož gaquen. <sup>51</sup>¿Chonle xbab bene' že' yežlio yesezoa yesebeze' binlo len lježgaque' na'a dan' ba bidan'?

Chnia' le'e, bi yesezoa yesebeze' binlo len lježgaque' na'a ba bida', san yesedile' na' yosošaše'. <sup>52</sup>Quinga solao gac na'a, še žan nita' gayo' bene' to lo' yo'o, yesedil legacze', chope' contr šone' na' šone' contr chope'. <sup>53</sup>Yesedil bene' byo len xi'ine' na' xi'ine' len le'. Na' yesedil no'olen' len xi'ine' no'ole, na' xi'ine' no'olen' len le'. Na' yesedil no'olen' len xo'oliže' na' xo'oliže' len le'.

**Bitw gosacbe'ede' bi zeje da' ca' chon Diosen'**

(Mt. 16:1-4; Mr. 8:11-13)

<sup>54</sup>Nach lecze gož Jesúsén' bene' ca' nita' na':

—Cate' chle'ele chi' bejw gan' chxoa gwbiža' na' žale: “Gac yejw”, na' chac ca'. <sup>55</sup>Na' cate' chechj be' da' za' ži'le na' žale: “Guac zeye”, na' chac zeye'. <sup>56</sup>Bene' gwxiye' le'e. Cate' chle'ele nac chac le'e yaban' na' lo' yežlion' nezele še gac yejw o še gac zeye'. ¿Bixchen' bi chacbe'ele bi

zejen da' ca' chon Diosen' tiemp nga zoacho na'a?

**Cheyala' goncho cont yezoacho binlo len bene' che'e chio' lao justis**

(Mt. 5:25-26)

<sup>57</sup>¿Bixchen' bi chonle xbab cont nezele can' cheyala' gonle? <sup>58</sup>Cate' to bene' gonle xya che' na' che'e le'e lao justis, šlac ngo'ole nezen' le yeyiljwlaže' nac gonle yezoale binlo len le' cont bi che'e le'e lao justisen'. Še bitw gonle ca', cate' žinle lao justisen' nach gone' le'e lo' na' bene' ca' yoseseyjue' le'e ližya. <sup>59</sup>Chnia' le'e bitw yebeje' le'e še bina' chixjwle doxen da' čala'le.

**Cuiayi'cho še bitw yetinjecho xtoła'chon'**

**13** Na' len bene' ca' že'na' gwnita' bal' bene' gosoe'lene' Jesúsén' diža', gose'ene' Pilaton' gwsele' soldadw che' ca' jasetue' to xonj bene' Galilea ca' na' bchixde' xchengaquen' len che beyixe' ca' ba gosote' cont yesonxene' Diosen'. <sup>2</sup>Nach boži'i Jesúsén' xtiža'gaquen' gože' legaque':

—¿Chonle xbaba' gosac čegaque' ca' lagüe dan' gosonche' da' malech clel ca' bene' Galilea ca' yezica'chle? <sup>3</sup>Chnia' le'e, bi naquen ca'. Še bitw yetinjele xtoła'le ca', lecze gwžin ža cate' cuiayi'le. <sup>4</sup>Nezele che bene' šino'šone' ca', šlac zjanite' yež Siloé gwbiže to campanaryw na' gwdenen' legaque' na' gosate'. ¿Lecze chonle xbab goc ca' dan' zjanacche' bene' mal clel ca' bene' ca' zjaže' Jerusalén? <sup>5</sup>Chnia' le'e, gague can'. Še le'e bi yetinjele xtoła'le, lecze gwžin ža cate' cuiayi'le.

**Jempl che yag yixgüigw  
da' bibi chbia**

<sup>6</sup>Na' be'lene' legaue' jempl nga, bzejni'ide'ne' cheyala' yesyetingde' xtolagaue', na' gože' legaue':

—To bene' zoa to yag yixgüigw che' gan' že' yag uvas che' ca'. Na' gwyeje' lo' yaguen' jane'e še de toga yixgüigw gagüe', perw bitw bi bželde'. <sup>7</sup>Na' gože' ben' chape' yag che' ca': “Ba chac šon iz chedena' a yag nga še chbian yixgüigw, perw bitw bi chbian. Gwchoguen, lažjw con zoan nlanen, na' neca bi chbiazen.” <sup>8</sup>Na' gož ben' le': “Xana', jayenna', za' zoašazen yetgüiz, che'ena' xanenna' na' cuecan' yo beb. <sup>9</sup>Na' še cuian yixgüigw do yetgüiz, bitec da' güen, perw še bicze bi cuian, nach chogchon.”

**Jesúsen' beyone' to no'ole že che Dios**

<sup>10</sup>Na' to že che Dios bsed blo'e Jesúsén' bene' že' to lo' yodao'.

<sup>11</sup>Na' zoa to no'ole bene' ba goc šinošone iz yo'o nyaz da' xigüen' yichjlažda'ogüe'na'. Na' ben da' xigüen' cont bdohe cuerp che'na', na' gague gocch se' to licha. <sup>12</sup>Na' cate' ble'e Jesúsén' le', goxe'ne' na' gože'ne':

—No'ole, na' a yeyacdo' yižgüe' chio' nga.

<sup>13</sup>Na' gwxo'a ne'e cuerp che no'ola', na' la' bezete' to licha. Na' no'ola' benxene' Diosén'. <sup>14</sup>Perw na' bene' gwnabia' che yodao'na' bloque' da' beyon Jesúsén' no'ole güen' že che Dios. Na' gože' bene' ca' nita' lo' yodaon':

—De xop že cont gonle žin. Le da lo že ca' cont yeyone' yižgüe' chelen'

perw bitw yidle že che Dios cont yeyacle.

<sup>15</sup>Nach Xancho Jesúsén' gože'ne':  
—Bene' gwxiye' le' len bene' lježo'.  
¿Gague lo že che Dios bia'cze chsežle go'n chele o burr chele ga zjada'ba' chjasanlba' güe'ej nis?

<sup>16</sup>No'ole nga naque' xi'in diaža che da' Abraham, na' Satanásen' dan' chnabia' da' xigüe' ca' benen cont ba bdohe cuerp chen' šinošone iz. Da'nán' nacczen licha ba beyona'ne' že che Dios.

<sup>17</sup>Cate' gwne' ca', bene' ca' chesegue'e le' gosacde' zto', perw yogo'lo' bene' ca' yezica'chle nita'na' besyebanchgüede' len yogo' dan' ben Jesúsén', le leca güen zjanac dan' benen'.

**Yela' gwnabia' che Diosén' naquen ca  
bin che xomdas**

(Mt. 13:31-32; Mr. 4:30-32)

<sup>18</sup>Nach gwna Jesúsén':

—Na' a gwlo'eda' le'e cont nezele šanch bene' yosozenag che Diosén' cont nabi'e yichjlažda'ogaue'.

<sup>19</sup>Da'nán' yela' gwnabia' che Diosén' naquen ca bin che xomdas. To bene' gozen' na' cate' blan' gwcha'on goquen yag cha'o na' be ca' zjazoa xil goson ližgacba' lo xoze' yaga'.

**Yela' gwnabia' che Diosén' naquen ca  
levadura**

(Mt. 13:33)

<sup>20</sup>Nach da' yoble gozne':

—Na' a nia' le'e yelate' nac nac yela' gwnabia' che Diosén'.

<sup>21</sup>Naquen ca levadura dan' gwlec no'olen' len to rob yezj cont gwcha'o doxenen.



**Cheyała' chiljwlaže'cho nac goncho  
cont soacho binlo len Diosen'**

(Mt. 7:13-14, 21-23)

<sup>22</sup>Na' gwda Jesúsen' bsd blo'ede' beñe' ca' že' ciuda ca' na' yež ca' gan' bedie' cont bežine' Jerusalénna'.

<sup>23</sup>Na' to beñe' gože' Jesúsen':

—Xanto', ¿con to chopze beñe' šjasyenite' len Diosen'?

Nach Jesúsen' gože' legaque':

<sup>24</sup>—Chnia' le'e, beñe' zan

chese'nde' yesenite' binlo len Diosen', perw gwžin ža cate' bich gac yesone' cont yesenite' binlo len le'. Da' nac žialao gonle, chiljwlaže'le nac gonle cont soale binlo len Diosen' <sup>25</sup>cont bi gone' len le'e ca ben to xan yo'o cate' bžin hor gwseyjuen'. Gwzože'e bseyjue', na' gwdechle besežin beñe' bososiže' le'e puert che'na' na' bich gwsaljue' cont yeso'e. Na' gose'ene': “Gwsaljwšca cont šo'to'.” Na' gože' legaque': “Bitw nombi'a le'e, neca nežda' ga za'acle.” <sup>26</sup>Can' gac che baļle. Nach solaole ye'lne':

“Güe'ej gwdagwto' len le' na' bsd blo'edo' neto' la cay lažto'.” <sup>27</sup>Perw na' da' yoble ye'e le'e: “Bitw nežda' ga beñe' le'e. Le šjaya'ac yogo' le'e beñe' güen da' mal.” Can' ye'e le'e.

<sup>28</sup>Na' le'ele Abraham na' Isaac na' Jacob na' yogo'loļ beñe' ca' gosoe' xtiža' Diosen' cani' nite' yaba gan' zoa Diosen' chnabi'e. Na' le'e bitw gac šo'lena'. Nach cuežyaše'le na' gagwxejte ļayle dan' leca žaglaole cate' gacbe'ele bich gac šo'le. <sup>29</sup>Beñe' zan beñe' za'ac doxen yežlio

yesyežine' yaba gan' zoa Diosen' chnabi'e na' yesebi'e cho'a mes yesagüe'. <sup>30</sup>Nita' beñe' zjanaque' beñe' bzebe na'a perw gwžin ža cate'

yesaque' beñe' žialao. Na' nita' beñe' zjanaque' beñe' žialao na'a, perw gwžin ža cate' yesaque' beñe' bzebe.

**Begüine' Jesúsen' neče xtoļa' beñe'  
Jerusalén ca'**

(Mt. 23:37-39)

<sup>31</sup>Lo ža na'teze baļ beñe' fariseo ca' besežine' gan' zoa Jesúsen' gose'ene':

—Cheyała' yoxonjo' nga gan' chnabia' rey Herodes, le chaclaže' gote' le'.

<sup>32</sup>Jesúsen' gože' legaque':

—Herodesen' naque' ca to beza' yela' gwxiye' chen'. Le šja'ac na' ye'lne' yeto chope žazen' soa' yebejcha' da' xigüe' ca' zjajo'o zjanyaz yichjlaždao' bene' na' yeyoncha' beñe' chesacšene. Ba zoa yeyož gona' dan' cheyała' gonan'.

<sup>33</sup>Perw ca nac dan' chona' na'a gonchczan' gwxe güižj. Gague ngan' chesote' beñe' ca' chesoe' xtiža' Diosen', san Jerusalén chesote' beñe' ca'.

<sup>34</sup>Le'e beñe' Jerusalén, chotle beñe' ca' chesoe' xtiža' Diosen' na' ca nac nochle beñe' ca' chseļa' Diosen' len le'e, chchellene' yej. Zan ni'a goclaža' yotoba' le'e ca to jed xcaca' be nche' xi'in na' chyežba' legacba', perw bitw goclaže'le. <sup>35</sup>Na' na'a ba gwlejšyichj Diosen' le'e. Na' chnia' le'e, bich le'ele neda' na'a. Cate'ch žin žana' nale: “Mbalaz ben' za' nga nseļa' Xancho Diosen' le' cont nabi'e”, cana'ch le'ele neda' da' yoble.

**Jesúsen' beyone' to beñe' de yi**

**14** Na' to ža che Dios Jesúsen' gwyeje' jatagüe' liž to

be<sub>ne</sub>' fariseo ben' nac be<sub>ne</sub>' blao.  
Na' yezica'chle be<sub>ne</sub>' fariseo ca'  
chosogüia chese<sub>ne</sub>'e bixen' goncze'  
cont gata' da' yosode'ede' yesagüe'  
xya che'. <sup>2</sup>Na' lagüe'na' zecha to  
be<sub>ne</sub>' chacšene, de cuerp chen' yi.  
<sup>3</sup>Na' gož Jesúsen' be<sub>ne</sub>' fariseo ca'  
na' be<sub>ne</sub>' ca' chososed chosolo'e ley  
dan' bzoj da' Moisés:

—¿De lsens len ley chechon'  
yeyoncho to be<sub>ne</sub>' güe' ža che Dios  
o še bitw bi lsens de?

<sup>4</sup>Perw notno boži'i xtiže'na'. Nach  
Jesúsen' be<sub>xue</sub>' na' bena' na' beyone'  
le', na' gože'ne':

—Guac yeyejo'.

<sup>5</sup>Nach gož Jesúsen' be<sub>ne</sub>' ca' že' liž  
be<sub>ne</sub>' fariseon':

—Le'e še zoa to burr o to go<sub>n</sub>  
chele na' lažo'ba' to lo' yechw sitjw,  
¿cabi la' yebejteleba' la'šaze nac ža  
che Dios?

<sup>6</sup>Na' nono goc yoži'i xtiža' Jesúsen'.

**Be<sub>ne</sub>' ca' gosaxe' gan' chac güešagna'**

<sup>7</sup>Na' ble'e Jesúsen' can' cheson  
be<sub>ne</sub>' ca' gosaxe' liž be<sub>ne</sub>' fariseon',  
gosebeje' gan' zjachi' be<sub>ne</sub>' blao ca'  
cont gosebi'ena'. Na' Jesúsen' be'e to  
jempl, gože' legaque':

<sup>8</sup>—Cate' to be<sub>ne</sub>' gaxe' le'e gan'  
chac güešagna', bitw cue'le gan'  
cheyala' cue' bene' blao ca', le še  
cue'le na', guacte yid be<sub>ne</sub>' nacch  
be<sub>ne</sub>' blao <sup>9</sup>na' xan yo'ona' ye'e le'e:  
“Le soža' cont cue' benga.” Nach do  
chaquele zto' soža'le cue'le ga yoble  
len be<sub>ne</sub>' ca' bitec bi zjazaca'. <sup>10</sup>Na'  
cate' gan' gaxe' le'e cue'le len be<sub>ne</sub>'  
bitec bi zjazaca', na' cate' yid xan  
yo'ona' na' ye'e to tole: “Be<sub>ne</sub>' migw  
chia, da cui'o len be<sub>ne</sub>' blao ca'.”  
Nach gacxenle lao be<sub>ne</sub>' ca' zjachi'

len le'e cho'a mesen'. <sup>11</sup>Le note'teze  
be<sub>ne</sub>' chonxen cuine', Diosen' gone'  
cont si'e zto' lagüen'. Na' note'teze  
be<sub>ne</sub>' chxexjwlaže' lagüen', Diosen'  
gone' cont gacxene'.

<sup>12</sup>Na' lecze gož Jesúsen' ben' goxe'  
le' ližen':

—Cate' gono' to l<sub>ni</sub> na' gaxo' be<sub>ne</sub>'  
yesagüe' len le', bitw gaxo' be<sub>ne</sub>'  
biše' lježo', be<sub>ne</sub>' migw chio' o be<sub>ne</sub>'  
zjanaque' be<sub>ne</sub>' gwn'a. Legaque'  
lecze yesaxe' le' ližgaquen', na'  
yesyegüe'e gwzon lagüe dan' ba  
goxgaco'ne' ližo'na'. <sup>13</sup>Cate' gono' to  
l<sub>ni</sub> gox be<sub>ne</sub>' yaše' na' be<sub>ne</sub>' nchog  
no n'a na'gaque', be<sub>ne</sub>' nxinj n'ie,  
na' be<sub>ne</sub>' lchol'. <sup>14</sup>Še gaxo' legaque',  
Diosen' gone' so' mbalaz, le be<sub>ne</sub>'  
ca' bi gac yesyegüe'e gwzon chio'.  
So' mbalaz cate' Diosen' yosbane'  
le' ladjo be<sub>ne</sub>' guat ca' txen len  
yezica'chle ben' ja'ac to l<sub>icha</sub> cate'  
gosebane'.

**Jempl che to be<sub>ne</sub>' ben l<sub>ni</sub> xen**

<sup>15</sup>Na' to be<sub>ne</sub>' chi' cho'a mesen'  
txen len Jesúsen' bende' xtiže'na' na'  
gože'ne':

—Mbalaz soacho gagwcho lo l<sub>ni</sub>  
da' gac caten' ba chnabia' ben' sel'a'  
Diosen'.

<sup>16</sup>Nach Jesúsen' gwne':

—To be<sub>ne</sub>' bene' to l<sub>ni</sub> xen, na'  
goxe' be<sub>ne</sub>' zan šja'ac ližen' cont  
yesagüe'. <sup>17</sup>Na' cate' bžin hor  
yesagüe', na' xan yo'ona' gwsele'  
xmosen' cont šjatobe' legaque'  
yesagüe'. Na' cate' ja<sub>ne</sub>'e to toe',  
gože' legaque': “Le šo'o, ba bsini'e  
dan' gagwchon'.” <sup>18</sup>Na' yogo'lole'  
gose'e ben' bi zjazoe' latje šja'aque'  
gan' chone' l<sub>nin</sub>. Be<sub>ne</sub>' nechon'  
gwne': “Za' gwxia' to yežlio, na'

cheyala' šjana'an. Na' ye'šco' xanon' bitw gac yida." <sup>19</sup>Na' yetoe' gwne': "Za' gwxia' gayo' cue' goḥ na' na'a šjengaca'ba' prueba. Ye'šco' xanon' si'xene' chia', bitw gac yida." <sup>20</sup>Na' yetoe' gože'ne': "Za' bšagna'. Da'nan' bitw gac yida." <sup>21</sup>Na' mosen' beyeje' na' jayeže' xanen' can' gose' bene' ca' le'. Nach xan yo'ona' ben' chon lḥin' bž'e.e. Nach gože' xmosen': "Gwyej jata to to cay na' to to nez lo ciudan', na' gwtobo' bene' yaše' na' bene' nchog ni'a na'gaque' na' bene' nxinj ni'e, na' bene' lchoḥ cont yeside' yesagüe'." <sup>22</sup>Gwde bene' ca' nach gože' le': "Xana', ba jatoba' bene' ca' ba gwnaon', na' ne' dechcze latje par bene' yoble." <sup>23</sup>Nach xane'na' gože' le': "Bchoj lo' ciudan' na' gono' byen yesid ben' nita' chanez. Na' šjaxi'o bene' ca' zjaže' yixe'. Gono' byen yeside' liža' nga yesagüe' cont yežan' bich bi latje šo'. <sup>24</sup>Na' ca' nac bene' ca' goxa' da' nechw, bich gua' latje yesagw legaque' dan' ba bsini'ana'."

**Dan' cheyala' goncho cont  
gaccho txen len Jesucriston'**

<sup>25</sup>Na' bene' zan juisyw zjana'ogüe' Jesúsen', na' gwychje' gože' legaque':

<sup>26</sup>—Note'teze bene' še chaclaže' šejnilaže' neda' na' gwzenague' chia', še bi gacchde' neda' ccl' ca xaxne'e, no'ol che', xi'ine', biše', zane', na' lente cuine', bi gac gone' neda' txen. <sup>27</sup>Na' note'teze bene' bi chzanlaže' cuine' saca'zi'e o gate' ne chia' neda', lecze bitw gac gone' neda' txen. <sup>28</sup>Še tole che'nele gonle to campanaryw, zgua'tec cue'le na' gonle xbab gwsaca'le ca do gaca' da' chyažjele cont gonlen, še gaque

xmechwle cont yeyož campanaryon'. <sup>29</sup>Še bi gwchix gwtole xbab chelna' gaca'te' dan' chyažjele, cate' ba gwlecle lenenna' na' gacbe'ele bich bi mechw de cont yeyožen, na' yogo' bene' yesele'ede' lenenna' yesezi'diže' le'e, <sup>30</sup>yesene': "Benga gwzolao chone' to campanaryw perw bitw beyož xšinen'." <sup>31</sup>Na' še to rey chone' xbab tile' len yeto rey, lecze zgua'tec gwsaque' še gwzoede' len ši mil soldadw che' gone' gan yeto rey bene' nche' galje mil soldadw. <sup>32</sup>Na' še chacbe'ede' bi gone' gan, šlac ne' zoa ben' yeto, zito', sele' ben' šjasedie' xtižen' lao rey ben' yeto yesenabe' yesyenite' binlo. <sup>33</sup>Ca' naquen len le'e, note'tezle še bi cuejyichje yogo'loḥ bi da' de chele, bitw gac gonle neda' txen.

**Cate' zeden' bich naquen xzi'**

(Mt. 5:13; Mr. 9:50)

<sup>34</sup>Zeden' naquen güen, perw na' še bich naquen xzi', čnacxe goncho cont yeyaquen xzi' da' yoble? <sup>35</sup>Bibi zacan', neca gaclenen yežlio, neca gaquen par beb, lete cho'onchon. Le'e žia nagle da' chene, le gwzenag xtiža'na'.

**Jempl che xila' ben' gocžeje**

(Mt. 18:10-14)

**15** Na' bene' güechixjw ca' na' yebaḥ bene' güen da' xinj, yogüe' gosebigue' gan' zoa Jesúsen' cont gosende' xtiže'na'. <sup>2</sup>Na' bene' fariseo ca' na' bene' ca' chososed chosolo'e ley dan' bzoj da' Moisés gosezi'diže' le', gosene':

—Benga chlebe' bene' güen da' xinj ca' na' chagwlene' legaque'.

<sup>3</sup>Nach Jesúsen' be'e to jempl, gože' legaque':

4—Še nita' to gayoa xila' chele na' gacžeje toba', žbi yocua'anle be ca' taplalj togalj gan' že'ba' latje daša' na' šjaydiljwle ben' ba goczējaena' cont yeželba'? 5Na' cate' yeželban' yebechgüele na' yexoalba' ya'axichjle yeyoa'lba'. 6Na' cate' yežin ližle, gwtoble bene' migw chele na' bene' gualiž chele na' ye'lnē: "Le yebe len neda'. Ba bežel xila' chia' ben' goczėje." 7Chnia' le'e, gwbeche Diosen' txen len angl che' ca' cate' to bene' chon da' mal yetinjde' xtole' clēl ca yesyebede' che taplalj togalj bene' zjanaque' bene' güen bene' bitw de xtoła'gaque' da' yesyētinjde'.

#### Jempl che mechw dan' gwnit

8'Na' le'e no'ole še de ši mechw plata chele na' še nit ton, la' gwguāla'tele to yi' na' gwloale lo' yo'o chele na' yeyiljwyožlen cont yeželen. 9Na' cate' yeželenna', na' yotoble no'ole migw chele ca' na' bene' gualiž chele na' ye'le legaque': "Le yebe len neda', le ba beželda' mechw chia' dan' gwnit." 10Chnia' le'e lecze chesyebe chesyēzaque' angl che Diosen' bene' zoa yaba cate' to bene' chon da' xinj chētinjde' xtole'na'.

#### Jempl che ben' benditje xi'inēn' xmechue'

11Na' lecze gože' legaque': —Gwzoa to bene' na' gwnita' chop xi'inē' bene' byo. 12Na' bžin ža bene' xcuiden' gože' xen': "Xa', ben neda' dan' cheyała' sia' da' de chio'." Nach xen' bnežjue' dan' cheyała' si'en. 13Goc to chop ža nach bene' xcuiden' btobe' yogo'lol bi da' de che'

na' gwze'e gwyeje' naciōn zito' na' zlez da' bi zaca' jene'. Na' benditjde' xmechue'na' zejlēne' da' malen'.

14Na' cate' beya xmechuen', goc to gwbin juisyw doxen naciōnna', na' bich bi gota' xmechue' cont si'e da' ye'ej gagüe'. 15Da'nan' gwyeje' gan' zoa to bene' naciōnna' gwnabe' žin, na' bena' gwsele' le' yixe' ga že' be zan xcoše' na' jayoe'ba'. 16Na' catec gwdone' goclaže' gagüe' dan' chosonežjue' chesagw coš ca', perw ne len ca bosonežjue' le' gagüe'.

17Na' beyone' to xbab šagüe', gwne': "Nita' mos zan che xan' na' dechgua da' chesagüe', na' neda' gatda' yela' chdon. 18Yeza' nga na' yeya'a gan' zoa xa' na' yapa'ne' bena' da' mal lao Diosen' na' lao le', 19na' bich zaca' gone' neda' cuent ca xi'inē', con še gone' latje gaca' ca to xmose'."

20Nach beze'e beyeje' gan' zoa xen'. Na' zito'le za' yežine' cate' ble'e xen' le' na' beyaše'de' le' na' gwza'sese' jašague'ne'. Na' gwdele'ne' bnopē'ne'.

21Nach gož xi'inē'na' le': "Xa', ba bena' da' mal lao Diosen' na' laguo' le'. Bich zaca' gono' neda' cuent ca xi'inō'." 22Na' xe'na' gože' xmose' ca': "Le šjalej tgot lache' šagüe', le guacwben', na' le šjaxi' to niy na' le co'on xbembe', na' le šjaxi' šcūe' yel na' gwdele'ni'abe'. 23Na' le šjaxi' go'n dao' ben' chane' na' le gotba' cont gagwchoba', le goncho lni.

24Xi'ina' nga ba bena'be' cuent ca to bi' guat, perw ne' zoabe' mbambe' na'a. Gwlejšyichjbe' chio', perw na'a ba bela'be'." Na' gosezolaogüe' chesone' lni.

25'Na' xi'inē' bene' nechon' zeje' yixe' cate' bežin xi'inēn' yeto ben' benditje xmechuen', na' cate' zeza'

ben' gwyej yixen', ba zoa yežine' liž xen' cate' bende' chosocueže' na' chosoye'e. <sup>26</sup>Na' goxe' to mosen' na' gwñabde' le' bixchen' chesone' l̄ni. <sup>27</sup>Na' mosen' gože'ne': "Bi' bišo'na' ba bela' na' xaon' ba betue' goñ daon' ben' chane'chgua da' bela'be' to šagüe' to güen." <sup>28</sup>Nach xi'ine' nechua' bže'e na' bi goclaže' yeyo'e liž xen'. Na' bchoj xen' na' gota'yoede' le' yeyo'e yo'o. <sup>29</sup>Perw xi'ine' bene' nechua' gože' xen': "Zan iz ba chac zoa' nga chonteza' žin con can' žo' le', na' bina' gaca' bene' güedenag. Na' ne to šib dao' cana' gono' neda' cont gota'ba' gona' l̄ni len bene' migw chia' ca'. <sup>30</sup>Na' na'a ba bela' xi'ino' nga benditjbe' yogo'lol da' bnežjo'be' gwdalembe' no'ole zle', na' beto' par lebe' goñ dao' ben' chane'." <sup>31</sup>Na' xe'na' gože'ne': "Xi'indagua, le' zoatezo' len neda', na' yogo'lol da' de naquen chio'. <sup>32</sup>Perw cheyala' goncho l̄ni nga na'a da' chbechgüecho ba bela' bi' bišon', le ba bena'be' cuent ca to bi' guat, perw na'a zoabe' mbambe'; gwlejyichjbe' chio', perw ba bela'be'."

**Jempl che to mos blao ben' benditjde' da' de che xane'**

**16** Nach gož Jesúsen' bene' ca' zjanaque' le' txen:

—Gwzoa to bene' gwñi'a na' gwzoa to mos blao che' ben' gwyo'o lo ne'e yogo'lol da' de che'. Na' bene' gwñi'ana' bende' rson xnose' blaon' ba benditjde' bi da' de che'.

<sup>2</sup>Na' xanen' goxe' le' na' gože'ne': "Ba benda' diža' can' chonon'.

Cheyala' yodio' cuent yogo'lol da' ba benditjedo' chia'. Bich gac gono'

xšinan' na'a." <sup>3</sup>Nach mosen' bene' xbaben': "¿Bixe gona' na'a? Xanan' ba cholague' neda'. Bich gac gona' xšinen', na' neca gac goncha' žin gual, na' gacda' zto' še naba' carida. <sup>4</sup>Nezda' bi gona' cont nita' bene' yesene'e neda' cate' bich chona' žin che xanan'." <sup>5</sup>Nach goxe' yogo'lol bene' ca' chesala' xmechw xane'na' tgüej tgüejje' na' gože' bene' nechw: "¿Gaca' čalo' che xana'?" <sup>6</sup>Na' bena' gože'ne': "Čala' che tap mil litrw set." Nach gož mos blaona' le': "Bedao'nez gwche'edo' na' bzoj lo cuenten' bzoan čalo' che chop mil litrwe seten'." <sup>7</sup>Gwde na' gože' bene' gwchopen': "¿Gacan' čalo' che xanan'?" Nach bena' gože'ne': "Čala' che to mil rob trigw." Nach mosen' gože' bena': "Gwche'edo' na' bzoj lo cuent chio'na' bzoan čalo' che xono' gayoa robze trigon'." <sup>8</sup>Na' xan mos gwxiyen' gocbe'ede' xmosen' leca nye'e xbab da' beyiljwlaže' nacle gone' soe' binlo len lježe' bene' ca' chesala' che xanen'. Le bene' ca' zjachi' yichje' to zleze dan' chac lo yežlion' chesonchgüe' xbab nacle yesone' len dan' zjade chegaque', perw zan bene' ba zjajo'o be'ni' che Diosen' lo' yichjlažda'ogaque' bitw chesone' xbab naclen' yosochine' dan' de chegaque'.

<sup>9</sup>Na' chnia' le'e, dan' de chele yežlio nga da' te chen', perw le gwchinen cont nita' migw chele. Na' cate' ba beya bi dan' de chele yežlio nga, nach nita' bene' yosolebe' le'e cate' yežinle yaba gan' soale toli tocan'e.

<sup>10</sup>Še to bene' chone' can' cheyala' gone' len da' bibi zaca'tec, lec ca'

gone' len da' zaca'chgua. Na' bene' bi chone' can' cheya'la' gone' len da' bibi zaca'tec, lec̄z bitw gone' can' cheya'la' gone' len da' zaca'chgua. <sup>11</sup>Še le'e bi chonle can' cheya'la' gonle len dan' de chele yežlio nga da' te chen', bitw gon̄ Diosen' le'e da' zaca'ch da' bi te che. <sup>12</sup>Dan' de chele yežlio nga, che Diosen' gague chelen'. Na' še bitw chonle can' cheya'la' gonle len da' nac che', bitw gone' le'e da' zaca'ch da' bi te chen.

<sup>13</sup>Nono mos gac gone' žin len chop xane' to ši'ize, le še gone' ca', gue'ede' to xan žin̄na' na' gacde' yetoe'; o gone' žin che toe' do yichj do laže' na' che ben' yeto gonen' do chža'alaže'ze'. Lecze ca' le'e, bitw gac gonle xšin Diosen' do yichj do laže'le na' gonte xšinle cont gacle bene' gwñi'a.

<sup>14</sup>Na' lecze nita' bene' fariseo ca' chesende' xtiža' Jesúsen', na' gosezi'diže' le', le gosaclaže' yesaque' bene' gwñi'a. <sup>15</sup>Na' gož Jesúsen' legaque':

—Le'e chonle cont benachen' chesacde' chdacze licha, perw Diosen' neze nle'ede' yichjlažda'ole, na' Diosen' chgue'ede' ba' da' chesaque benachen' zjanaquen da' žialao xen.

**Ley che Diosen' na' bene' ca' chnabia' Diosen' yichjlažda'ogaque'**

<sup>16</sup>Na' gozna' Jesúsen':

—Gwzolaon cani'te bžinten cate' bla' Juanna' bedetixjue'ede' xtiža' Diosen', ley dan' bzoj da' Moisés len dan' bosozoj yezica'chle bene' gosoe' xtiža' Diosen' bzejni'in chio' che Diosen'. Na' na'a gwzolaon len Juanna', ne' nita'cze bene'

cheseyixjue'ede' Diosen' nabi'e yichjlaždao' bene' yosozenague' che'. Na' bene' zan cheseyiljue' nacle yesone' cont nabia' Diosen' yichjlažda'ogaque'.

<sup>17</sup>La'czla' še yežlion' len da' ca' zjažia le'e yaban' yesede chegaquen, ca nac Xtiža' Diosen' dan' nyojen, ne late' daon' cbi te chen.

**Bi cheya'la' yela'acho len no'ol chechon' cont soalencho no'ole yoble**

(Mt. 19:1-12; Mr. 10:1-12)

<sup>18</sup>Note'teze bene' chele'e len no'ol che' na' cheque'e no'ole yoble chone' da' xinj, tozcze ca naquen šaca' gata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozcze ca da' xinj gone' len dan' chon bene' chata'lene' no'ol che bene' yoble.

**Bene' gwñi'a na' Lázaro**

<sup>19</sup>Nach gozna' Jesúsen':

—Gwzoa to bene' gwñi'a na' xdanchgua goc xalane'na', na' leca gwdagwšagüe' yogo' ža. <sup>20</sup>Na' to bene' yaše' le' Lázaro, yogo' ža jasedixjue' le' cho'a puert zaguan che bene' gwñi'ana' cont gwñabe' yosonežjue'ne' con gaca' da' chesezande'. Na' Lázaron' leca gwžia yežo' doxen cuerp chen'. <sup>21</sup>Na' catec gwdone' goclaže' gagüe' bla'a dao' ye'la' guagw da' beselažo' cho'a mes che bene' gwñi'an'. Na' beco' ca' ja'acba' jasele'eba' yežo' dan' gwžia cuerp che'na'. <sup>22</sup>Na' got bene' proben' nach angl bene' že' gan' zoa Diosen' besyezi' besyeque'e le' yaban' gan' zoe' na'a len da' xozxta'ocho Abraham. Na' lecze got

bene' gwñi'ana' na' bosocuaše'ne'  
<sup>23</sup>na' beyeje' lo yi' gabil. Na' šlac  
 chžaglagüe' na' gwłis lagüen' na'  
 ble'ede' zito'le nita' da' Abraham  
 len Lázaron' yabana'. <sup>24</sup>Nach bene'  
 gwñi'an' gwñe' zižje gwne': "Xa'  
 Abraham, beyaše'laže'šca neda'  
 na' gwsel'a' Lázaron' cont yosbise'  
 loža' nga len late' nis da' gwłapa'  
 xbene'na', le leca chžaglagua' lo yi'  
 nga." <sup>25</sup>Perw na' Abrahanna' gože'  
 le': "Xi'ina', bosa'laže' cate' gwmano'  
 yežlio zleze da' šagüe' da' güen  
 gota' chio', na' Lázaro nga to zleze  
 da' mal goc che'. Na' ba zoe' mbalaz  
 nga na'a na' le' chžaglaguo'. <sup>26</sup>Bi  
 gac gona' can' chaclažon', le Diosen'  
 bačh nze' to bdiñj xen ga nono gac  
 te, cont nono gac sa' nga šeje' gan'  
 zon', neca nono gac sa' gan' zon' na'  
 yide' nga." <sup>27</sup>Nach bene' gwñi'ana'  
 gože' Abrahanna': "Bene' gol dao',  
 chata'yoeda' le' gwsel'a'šca Lázaron'  
 liž xan'. <sup>28</sup>Nita' gayo' bene' biša'  
 na' che'nda' šjatixjue'ede' legaque'  
 nac yesone' cont Diosen' bi yesele'  
 legaque' latje nga gan' yesežlagläe'."  
<sup>29</sup>Na' Abrahanna' gože' le': "Decze  
 dan' bzoj da' Moisésen' na' dan'  
 bosozoj yezica'chle bene' ca' goso'e  
 xtiža' Diosen' cani'. Cheyała'  
 yosozenague' che da' ca' zjanyojen."  
<sup>30</sup>Na' gože' Abrahanna': "Bitw, bene'  
 gol dao'. Še to bene' yebane' ladjo  
 bene' guat na' güe'lene' legaque' diža',  
 nach yesyetinjde' xtoła'gaquen'."  
<sup>31</sup>Nach gož Abrahanna' le': "Še  
 bitw chosozenague' che dan' bzoj  
 da' Moisésen' na' dan' bosozoj  
 yezica'chle bene' ca' goso'e xtiža'  
 Diosen', la'czla' še yeban to bene'  
 ladjo bene' guat ca', bi yesejle'cze'  
 che Diosen'."

**Bitw cheyała' goncho cont gon bene'  
 da' xinj**

(Mt. 18:6-7, 21-22; Mr. 9:42)

**17** Na' gož Jesúsen' bene' ca'  
 zjanaque' le' t xen:

—Decze da' gonen cont lažo' bene'  
 yesone' da' xinj, perw nyaše'chguaze  
 gac che bene' chone' cont bene'  
 yoble yesone' da' xinj. <sup>2</sup>Yejni'a šaca'  
 yosocheje' yene' to yiše na' šjasezale'  
 le' lo' nisdao' clcl ca' soe' gone' cont  
 to bene' za' gwzolagüe' chejnilaže'  
 neda' lažoe' gone' da' xinj. <sup>3</sup>Da'nan'  
 le' gwsaca' cont bi gonle ga lažo'  
 bene' gone' da' xinj.

'Na' še to bene' lježle gonde' le'e mal,  
 le tile' na' še gwše'e xbab na' ne' bich  
 gone' ca', le yezi'xen che'. <sup>4</sup>La'czla' gaž  
 ni'a lao tža gone' da' mal contr bene'  
 lježen', še gaž ni'ate ne': "Ba betinjda'  
 che dan' benan', bezi'xen chia'", na'  
 cheyała' yezi'xene' che'.

**Gosaclaže' yesejle'che' che Diosen'**

<sup>5</sup>Na' gose' postlw ca' Xancho  
 Jesúsen':

—Gaclenšco' neto' cont šejle'chto'  
 che Diosen'.

<sup>6</sup>Nach gož Xancho' legaque':  
 —Xsa yag xomdas naquen da' dao'  
 riz, na' la'czla' dan' chejnilaže'le  
 Diosen' naquen ca' to xsa xomdas  
 lagüe dan' bi chejnilaže'teclne', še  
 šejnilaže'ln'e, guaque ye'le yag  
 nga: "Gwcuase nga na' jayzoa lo'  
 nisdao'", na' guaccze can' nalna'.

**Dan' cheyała' yeson mos ca'**

<sup>7</sup>Le'e še mos chelen' chgua'ane'  
 go'n, o še chyo'e xila', cate' chele'e  
 güeyeban' bitw che'ln'e: "Beyo'o  
 ngale, gwche'edo' gague' xše'." <sup>8</sup>San



che'ľne': "Bsini'a da' ye'ej gagua' na' gonon'. Te yedaguan' nach gago'." <sup>9</sup>Na' bitw cho'elne' yela' choxcľen cate' ba bene' dan' goźľene'. <sup>10</sup>Na' ľecz ca' le'e, cate' ba benľe yogo'ľoľ dan' źa Diosen' gonľe, cheyaľa' nale: "Bitw zaca'to' no gon yela' choxcľen cheto' ca dan' ba bento', ľe bento' con da' cheyaľa'cze gonton'."

**Jesúsen' beyone' ši bene'  
chese'ede' yiźgüe' da' nzi' lepra**

<sup>11</sup>Na' zej Jesúsen' Jerusalenna' len bene' ca' zjanaque' ľe' txen na' gwdie' gan' ndiľ distritw Samaria len distritw Galilean'. <sup>12</sup>Na' beseźine' to cho'a yeź dao' na' besehoj ši bene' chese'e yiźgüe' da' nzi' lepra jasešague' Jesúsen'. Na' gosezie' zito' <sup>13</sup>na' gosene' ziźje gosene':

—Maestrw Jesús, beyaše'ľaže' neto'.

<sup>14</sup>Na' Jesúsen' cate' ble'ede' ľegaque' na' goźe'ne':

—Le šjaya'ac lao bġoz ca' cont yeseňe'e le'e še ba beyacle.

Na' goquen' ľo neza' besyeyacde'. <sup>15</sup>Nach toe' cate' gocbe'ede' baġh beyaque', na' bebi'e na' gwnie' ziźje benxene' Diosen', <sup>16</sup>na' bzoa xibe' lao Jesúsen' bi'e ľe' yela' choxcľen. Ben' ben ca' naque' to bene' Samaria. <sup>17</sup>Nach gwna Jesúsen':

—Beyona' ši bene'. ¿Ganxe bene' ca' yega? <sup>18</sup>¿Toz bene' zito' nga bebi'e chonxene' Diosen'?

<sup>19</sup>Nach goź Jesúsen' bena':  
—Bezoźa' beyej to šagüe' to güen. Ba beyacdo' da' chejniľaźo' neda'.

**Yela' chnabia' che Diosen'**

(Mt. 24:23-28, 36-41)

<sup>20</sup>Na' bene' fariseo ca' gosenabde' ľe' batxen' yid ben' seľa' Diosen'

nabi'e nación Israelen'. Nach boźi'i Jesúsen' xtiźa'gaquen' gwne':

—Ca nac yela' gwnabia' che Diosen', bi naquen da' le'echo.

<sup>21</sup>Nono cheyaľa' güe' diźa' ne': "Gwna' nga chnabi'e", o "Gwna' na' chnabi'e." Le ba zoe' len le'e na'a chnabi'e.

<sup>22</sup>Nach goźe' bene' ca' zjanaque' ľe' txen:

—Gwźin źa cate' nale: "Šaca' na'a ba chnabia' ben' gwseľa' Diosen'", perw bitw gac can' nablaže'len'.

<sup>23</sup>Yesenita' bene' yesi'e le'e: "Gwna'šc nga zoa ben' gwseľa' Diosen'", o "Gwna'šc na' zoa ben' gwseľa' Diosen'." Perw bitw ga'ole ben' yesi'e le'e ca'. <sup>24</sup>Can' chac cate' chep yes, chsenin' doxen ľe'e yaban' zejzenez, ľecze can' gac cate' źin źa yida' da' yoble, neda' naca' ben' gwseľa' Diosen' golja' benaġh. Yida' zejzenez na' yogo'ľoľ bene' yesele'ede' neda'. <sup>25</sup>Zgua'tec de da' zan da' cheyaľa' saca'zi'a na' bene' ca' že' na'a bitw yesejľe'e chia'. <sup>26</sup>Lećz ca' goc ca' tiemp che da' Noé, ľecze ca' gac cate' ba zoa źin źa yida' da' yoble, neda' naca' ben' gwseľa' Diosen' golja' benaġh. <sup>27</sup>Bene' gwnita' ca' tiemp che da' Noén' gosaše' gose'ej gosagüe' gosolaže' bosošagne'e na' bosošague' na' no xi'in che' cate' bźin źa gwyo'o Noén' ľo' barcon'. Nach goc to yejwsio' juisyw. Na' gosebiayi' yogo' bene' ca' bi gososo' ľo' barcon'. <sup>28</sup>Lećz ca' goc ca' tiemp che da' Lot, bene' Sodomán' gose'ej gosagüe' gosote' bi da' de chegaque', na' gosezi'e bi da' beseyaźjde', na' gosaz gosa'ane', na' goson ľiže'. <sup>29</sup>Perw na' źan' beza' Loten' Sodomán', Diosen' bene'

cont byinj yi' na' azufre yaba na' gosebiayi' yogo'lole'. <sup>30</sup>Can' gac cate' yida' da' yoble, neda' naca' ben' gwseła' Diosen' golja' benach, na' yogo'lol bene' yesele'ede' neda'.

<sup>31</sup>'Na' ža caten' yida' še chda to bene' do yichjo'o che liže', na' xšinlaze' žen' lo' yo'o che', bi yeyetje' cont yotoben', con yoxonje'. Na' lecze ca' bene' chda do yixe', bitw gacde' yeyej liže'. <sup>32</sup>Le šjayzalaže' can' goc che no'ol che Loten'. <sup>33</sup>Note'tez bene' chacde' gone' cont cbi saca'zie' o cont nono yesot le', bena' cuiayi'. Na' note'tez bene' chzanlaže' cuine' saca'zie' o gate' ne chia' neda', ba de yela' mban che' toli tocane'.

<sup>34</sup>'Chnia' le'e, quinga gac caten' yida' da' yoble. Chope bene' zjadie' chesetase' toz cam. Toe' yeca'a Diosen' na' yetoe' yega'an. <sup>35</sup>Na' chop no'ole nite' txen chesote', toe' yeca'a Diosen' na' yetoe' yega'an. <sup>36</sup>Na' chope bene' nite' do yixe', toe' yeca'a Diosen' na' lecze yega'an yetoe'.

<sup>37</sup>Cate' gosende' diža' nga gose'e le':

—¿Gan' gac da' qui, Xanto'?

Nach Jesúsén' gože' legaque':

—Nga chonen che ben' že': "Gan' de be guat nan' chesežag šod ca'."

### Jempl che to no'ol güezeb len to juez mal

**18** Na' be'len Jesúsén' legaque' to jempl bsd blo'ede' legaque' cheyalā' nita'teze' yesonchachlaže' yosol güiže' Diosen'. <sup>2</sup>Na' gože' legaque':

—Gwche' to ciuda ga gwzoa to juez na' juezen' bi gwdape' Diosen'

bala'an na' neca gwche'yichje' še chesazlaže' benachen' can' chonen'. <sup>3</sup>Na' ciudan' gwzoa to no'ol güezeb, na' goxje cheje' lao juezen' na' che' le': "Ben yela' justis chia' len bene' chgue'ede' neda'." <sup>4</sup>Ba goc sša bi chzenague' che', perw gwdechle bene' xbab, gwne': "Bitw chapa' Diosen' bala'an na' neca chiyichja' še chesazlaže' benachen' can' chonan'. <sup>5</sup>Perw na' no'ol güezeb nga chone' neda' zed, na' na'a gaclena'ne' cont bich yide' yostoe' yela' chxenlaže' chia'."

<sup>6</sup>Nach gož Xanchon' legaque':  
—Le gon xbab che dan' gwna juezen' ben' bi zej to licha.

<sup>7</sup>Nacchxe gon Diosen' gwzenagche' che bene' ca' ba gwleje' cont zjanaque' xi'ine', bene' ca' chosol güiže' le' do ža do yel. ¿Gwleze' sša cont yosle' legaque' lo na' bene' ca' chesegue'ede' legaque'? <sup>8</sup>Chnia' le'e, Diosen' bedao'nez yosle' legaque' lo na' bene' ca'. Perw cate' neda' yida' yežlio nga yeto, neda' naca' ben' gwseła' Diosen' golja' benach, žne' nita'ch bene' chesejnlaže' neda'?

### Jempl che to bene' fariseo len to bene' güečhixjw

<sup>9</sup>Gwnita' bal' bene' gosacde' zjanaque' bene' güen lao Diosen' neche da' chesone'. Bene' ca' chesacde' bene' ca' yezica'chle bibi zjazaque' len Diosen'. Na' Jesúsén' bi'e jempl nga da' bcuišen bene' ca', gwne':

<sup>10</sup>—Chope bene' ja'ac yodao' blao jasel' güiže' Diosen', toe' bene' fariseo na' yetoe' bene' güečhixjw. <sup>11</sup>Bene' fariseon' gwzeze' bol' güiže' Diosen' na' con chonxen cuine',

gwne': "Dios, neda' chona' yela' choxclen chio' bitw chona' cana' cheson yezica'chle bene'. Bitw chca'a bi da' de che bene' yoble, na' bitw chona' bichle da' mal. Bitw chata'lena' no'ol bi nac no'ol chia', na' neca naca' bene' mal can' nac bene' güechixjw ni. <sup>12</sup>Chope ni'a to xman chona' gwbas, na' yogo'lol da' chona' gan, chbecan' ši cuen na' chnežjua' to cuen che yodao'." <sup>13</sup>Na' bene' güechixjon' gwzeteze' zito'le, neca cheyaxjde' lis lagüe' yabale. Nach chbaže' lcho'e gwne': "Dios, beyaše'laže' neda' naca' bene' güen da' xinj." Da'na'z da' gwna bene' güechixjon'. <sup>14</sup>Na' chnia' le'e, Diosen' bezi'xene' che bene' güechixjon' na' beyej liže' bibi xtole' gota'. Perw bi goc ca' len bene' fariseon'. Le note'tez bene' chonxen cuine', Diosa' gone' cont si'e zto', na' note'tez bene' chzexjwlaže' lagüen', Diosen' gone' cont gaxcene'.

### Jasesane' bidao' lao Jesúsén'

(Mt. 19:13-15; Mr. 10:13-16)

<sup>15</sup>Na' jasesane' bidao' lao Jesúsén' cont xoa ne'e yichjgacbe'. Na' cate' bene' ca' zjanaque' le' txen besele'ede' can' chesonen', gosedi'le' legaque'. <sup>16</sup>Perw na' Jesúsén' goxe' bene' ca' cont yeside' len bidao' chegaquen', na' gože' bene' ca' zjanaque' le' txen:

—Le güe' latje yesid bidao' ca' lagua' nga, bi gwžonle, le bene' ca' zjanac ca bidao' quinga, legaque' chosozenague' che Diosen' cont chnabi'e yichjlažda'ogüe'. <sup>17</sup>Na' da' li žia' le'e, note'teze bene' bi yosozenague' che Diosen' ca cheson bidao' quinga cate' chosozenagbe'

che xaxna'be', gwbat nabi'a Diosen' yichjlažda'ogaque'.

### To bene' gwni'a be'lene' Jesúsén' diža'

(Mt. 19:16-30; Mr. 10:17-31)

<sup>18</sup>To bene' gwnabia' gože' Jesúsén': —Maestrw, le' naco' bene' güen. ĩBi cheya'la' gona' cont gata' yela' mban chia' toli' tocane'?

<sup>19</sup>Nach Jesúsén' gože'ne': —ĩBixchen' žo' naca' bene' güen? Toz bene' güen zoa, na' len' Dios.

<sup>20</sup>Le' nezdo' da' none' mandadw goncho: "Bi gata'lenle no'ol bi nac no'ol chele o bene' byo bene' bi nac bene' chele. Nono gotle. Bi cuanle. Bi güe'le diža' güenlaže' che bene' lježle. Le gap bala'an xaxna'le."

<sup>21</sup>Na' gož ben' le': —Yogo'lol da' quinga gwzolagua' chonczan' cate' ne' nactia' bidao'.

<sup>22</sup>Nach cate' bene Jesúsén' xtižen' na' gože'ne':

—Zoa to da' ne' chyažjen gono', jayete' yogo' da' de chio', na' mechw dan' le'edo' chen, bnežjon bene' yaše'. Yeyoža' šejnilažo' neda' na' yo'o gaco' neda' txen. Nach še gono' ca', cate' yežino' yaba gan' zoa Diosen' da' zaca'ch gata' chio'.

<sup>23</sup>Perw na' bena' cate' beyož bende' diža' dan' gož Jesúsén' le', gocyaše'chgüede', le bene' gwni'achgua goque'. <sup>24</sup>Na' Jesúsén' gwne'e bene' gwni'ana' na' gože'ne':

—Leca zdebe naquen to bene' gwni'a gwzenague' che Diosen' cont Diosen' nabi'e yichjlažda'ogüe'.

<sup>25</sup>Bedao'ch te to be xen be nzi' camello to lo' nag yeše' clel ca to bene' gwni'a gwzenague' che Diosen' cont Diosen' nabi'e yichjlažda'ogüe'.

<sup>26</sup>Na' bene' ca' bosozenague' xtiže'na' gose'ene':

—¿Noxen' šjayzōa len Diosen' še ca'?

<sup>27</sup>Na' Jesúsen' gože' legaque':

—Da' bi gac gon benāchen', bitw nacho bi gac gon Diosen' len.

<sup>28</sup>Nach Pedroa' gože' le':

—Neto' ba gwlejyichjto' yogo' da' de cheto' cont nacto' le' txen.

<sup>29</sup>Na' gož Jesúsen' legaque':

—Da' li žia' le'e, note'teze bene' ba gwlejyichje' liže', xaxne'e, biše', xo'ole' o xi'ine' neche chzenague' che Diosen' cont Diosen' chnabi'e yichjlažda'ogüe', <sup>30</sup>yežlio nga yonežjo Diosen' le' da' nac da' zaca'ch, na' cate' yežine' yaban' gata' yela' mban che' toli tocane.

**Da' yoble gosyixjue'e Jesúsen' ba zoa gate'**

(Mt. 20:17-19; Mr. 10:32-34)

<sup>31</sup>Na' gwlejiže Jesúsen' bene' šižinw ca' gwleje' cont zjanaque' txen len le' na' gože' legaque':

—Na'a ba zejcho Jerusalenna' gan' gac yogo'lo' dan' nyoj chia' dan' bosozoj da' bene' ca' gosoe' xtiža' Diosen' cani', neda' naca' bena' gwsela' Diosen' golja' benāch.

<sup>32</sup>Gaca' lo na' bene' ca' bi zjanac bene' Israel, na' yesezi'diže' neda', na' yesene' yela' ya' chia', nach yosoži'e xene' cho'alagua'. <sup>33</sup>Yesot yeseyine' neda' na' yesote' neda', perw yeyon ža yebana' ladjo bene' guat ca'.

<sup>34</sup>Perw bene' ca' zjanaque' Jesúsen' txen bi gosejni'ide' dan' gože' legaque', le zjancho'ly yichjlažda'ogüen', da'nan' bi gosejni'iden'.

**To bene' lcho'ly bene' Jericó bele'ede'**

(Mt. 20:29-34; Mr. 10:46-52)

<sup>35</sup>Nach cate' ba zoa yežin Jesúsen' Jericó, to bene' lcho'ly chi'e chanezen'

chnabe' yosonežjo bene' le' con gaca' da' chesezande'. <sup>36</sup>Na' bende' chesede bene' zan gan' chi'ena', na' gwñabe' bin' chac. <sup>37</sup>Na' gose'ene': —Jesús bene' Nazaret chdie' laguo' nga.

<sup>38</sup>Na' bosya'adie' gwne':

—Jesús, xi'in diaža che da' rey David, beyaše'laže'sca neda'.

<sup>39</sup>Nach bene' ca' zjažialao lao Jesúsen' gosedi'e bene' lcholen', gose'e le' cheyala' soe' šize, perw nachle bosya'adiache', gwne':

—Xi'in diaža che da' rey David, beyaše'laže'sca neda'.

<sup>40</sup>Jesúsen' gwleze', nach bene' mandadw šjaxexi'e bene' lcholen' lagu'e'na'. Na' cate' gwbiga' bene' lcholen' lao Jesúsen', nach gože'ne':

<sup>41</sup>—¿Bi chaclažo' gonda' le'?

Na' bene' lcholen' gože'ne':

—Xana', benšca cont yele'eda'.

<sup>42</sup>Jesúsen' gože'ne':

—Bele'e. Dan' chejnilažo' neda' bačh beyac yejlagon'.

<sup>43</sup>Na' la' bele'ete bene' lchola' na' gwda'ogüe' Jesúsen' benxene' Diosen'. Na' lecze ca' yogo' bene' ca' bebele'ede' can' goquen' gosonxene' Diosen'.

**Jesúsen' na' Zaqueo**

**19** Nach Jesúsen' gwyo'e yež Jericó na' gwdeze' yešla'a ciudan'. <sup>2</sup>Na' zoa to bene' le' Zaqueo. Naque' bene' gwnabia' che bene' güechixjw ca', na' naque' bene' gwni'a. <sup>3</sup>Gwdiljwlaže' naclen' gone' le'ede' Jesúsen', perw bitw goc, le gwnita' bene' zan len Jesúsen' na' Zaqueon' goque' to bene' bchecw dao'. <sup>4</sup>Da'nan' gwza'sese' gwdie' lao bene' ca' cont gwyep'e' to lo yag da'

zoa gała'ze gan' te Jesúsen'. <sup>5</sup>Perw na' cate' bžin Jesúsen' xan yaguen', gwne'e lo yaguen' na' gože'ne':

—Zaqueo, bedao'nez beyetj.

Cheyała' yega'ana' ližo' na'aže'.

<sup>6</sup>Nach Zaqueon' beyetjseš' chebede'. Nach beče'e Jesúsen' liže'na' na' benxene' le'. <sup>7</sup>Perw na' bene' ca' zjanžague' len Jesúsen' cate' besele'ede' can' goquen', yogüe' gosenie' che Jesúsen' gosene':

—Ba zeje' zjazoe' to liž bene' güen da' xinj.

<sup>8</sup>Nach Zaqueon' gwzeche' na' gože' Xanchon':

—Xana', gašje dan' de chia' gwnežjuan' bene' yaše'. Na' dan' ba gwca'a che bene', gwziya'a legaque' cont goseyixjwche' da' zča'och ca dan' cheyała' yeseyixjue', yonežjwgaca'ne' tap ca'te'le.

<sup>9</sup>Na' Jesúsen' gože'ne':

—Na'aža ba ben Diosen' yela' mban chio' toli tocane len che bene' lo' yo'o chio'. Na' da' li ba naco' xi'in diaža che da' Abraham lagüe dan' ba chejnilažo' Diosen' can' ben da' xoxzta'och Abraham. <sup>10</sup>Ca nac neda', gwseła' Diosen' neda' golja' benač cont zedyediljua' note'tez bene' ba mbiayi', na' gwnežjua' legaque' yela' mban toli tocane.

**Jempl che ši bene' bnežjw xangaque' legaque' mechw xen**

<sup>11</sup>Na' šlac ne' zjanžag bene' chosozenague' diža' dan' choe' Jesúsen', be'lene' legaque' to jempl, le ba nite' gała'ze Jerusalénna' na' gosacde' la' solaote nabi'e nación Israelen'. <sup>12</sup>Nach gwne':

—To bene' blao gwyeje' to yež zito' jene' dan' cheyała' gone' cont jaxi' lo

ne'e nabi'e yež che', le gosebeje'ne' nabi'e yež chen' cate' yežine'. <sup>13</sup>Na' cate' za' se'e, gwleje' ši mos che' na' bnežjue' to toe' mechw xen. Nach gože' legaque': “Mechw nga gonele negosyw šlac bi zoa’”. <sup>14</sup>Perw bene' gualaž chen' besegue'ede' le', nach cate' beyož gwze'e, goseše' bene' lao xane'na' ben' gwnabia'che' lao yogüe', jaseže'ne': “Bitw chaclaže'to nabi'a' benga neto'.” <sup>15</sup>Perw la'czla' bi gosaclaže' bene' gualaž chen', bia'cze gwxi' lo ne'e nabi'e. Nach cate' bežin lažen' da' yoble, bene' mandaw šja'ac xmose' bene' ši ca' lagüe'na', bene' ca' bocua'anlene' xmechuen'. Goclaže' nezde' gaca' gosone' gan len mechw dan' bocua'anlene' to toe'. <sup>16</sup>Bene' nechw bžine' lagüen' na' gože'ne': “Xana', xmecho' dan' bocua'anleno' neda' benen gan ši ca'te'le ca dan' bocua'anon'.” <sup>17</sup>Nach xanen' gože'ne': “Ba beno' da' güen. Naco' mos güen. Beno' can' cheyała' gono' len da' daon' bocua'anlena' le', da'nan' gona' cont nabi'o ši ciuda.” <sup>18</sup>Na' bene' gwchopen' bžine' lao xanen' na' gože'ne': “Xana', xmecho' dan' bocua'anleno' neda' benen gan gayo' ca'te'le ca dan' bocua'anon'.” <sup>19</sup>Nach gože' le': “Le' nabi'o gayo' ciuda.” <sup>20</sup>Nach bžin yetoe' lao xane'na' na' gože'ne': “Xana', nga de xmecho' dan' bocua'anleno' neda'. Ba blažechačan' bay nga. <sup>21</sup>Bžeba' le' dan' naco' to bene' znia. Chono' gan da' bi beno' žin na' chelapo' dan' gosaz bene' yoble.” <sup>22</sup>Nach gož xanen' le': “Dan' ba gwnao' ca' chlo'en napo' doła'. Naco' mos mal. Chacdo' naca' to bene' znia, na' nezdo' chona' gan da' bi bena' žin

na' chelapa' dan' gosaz bene' yoble.  
<sup>23</sup>Na' še nezdo' chona' ca', žbichen'  
 bi gwlejo' xmechuan' bene' yoble  
 cont yezian' len yichjen na'a ba  
 bela'a?" <sup>24</sup>Nach gože' bene' ca' zjaze  
 cuite'na': "Yeca'ale xmechuan' dan'  
 bocua'anlena'ne' na' gwnežjwlen  
 ben' ba noxe' ši ca'te' ca' dan'  
 bocua'anlena'ne'." <sup>25</sup>Nach gose'e  
 le': "Xanto', ba noxe'cze' ši ca'te'  
 ca' dan' bocua'anleno'ne'." <sup>26</sup>Nach  
 gož bene' gwnabian' legaque':  
 "Chnia' le'e, ben' chon güen len  
 dan' chnežjua'ne', gwnežjua'ne' da'  
 zča'och, perw na' bena' bi chgone'  
 žin dan' chnežjua'ne', yeca'a da'  
 daon' noxe'na'. <sup>27</sup>Na' ca' nac bene'  
 ca' chesegue'ede' neda', bene' ca' bi  
 chesaclaš' nabiagaca'ne', le šjaxe'ne  
 na' gotlene' lagua' nga."

**Gosonxene' Jesús'en cate' beyo'e  
 Jerusalén**

(Mt. 21:1-11; Mr. 11:1-11; Jn. 12:12-19)

<sup>28</sup>Na' cate' beyož be' Jesús'en  
 jempl nga nach gwze'e zeje' ciuda  
 Jerusalén. <sup>29</sup>Na' cate' ba zoa  
 yesežine' yež ca' da' zjanzi' Betfagé  
 na' Betania do gan' zoa ya'a da' nzi'  
 Ya'a Olivos, na' gwsele' chop bene'  
 ca' mandaw ben' zjanaque' le' txen,  
<sup>30</sup>gože' legaque':

—Le šja'ac yež dan' chi' gała'ze,  
 na' cate' žinlen' na' yeželele to burr  
 dao' da'ba' yag, be nono na' cuia. Le  
 sežba' na' le che'ba' nga. <sup>31</sup>Še no  
 nab bixchen' chsežleba', na' ye'ln'e':  
 "Xanto' chyažjde'ba'."

<sup>32</sup>Nach bene' ca' gwseła' Jesús'en  
 gosa'aque' na' besele'ede'ba' da'ba'  
 gan' gož Jesús'en' legaque' ca'.

<sup>33</sup>Nach šlac cheseseže'ba', xamba' ca'  
 gose'e legaque':

—žBixchen' chsežle burr daon'?

<sup>34</sup>Nach bene' ca' gwseła' Jesús'en  
 gose'e legaque':

—Xanton' chyažjde'ba'.

<sup>35</sup>Nach goseche'eba' lao Jesús'en  
 na' gosexoa xagaque' cože'ban'  
 nach bosožie' Jesús'en'. <sup>36</sup>Na' šlac  
 zeje' ngüe'e nez bene' ca' zjanžag  
 gosonxene'ne', na' goseyixjw no  
 xagaque' lo nez cont blej burron'  
 len. <sup>37</sup>Nach ba zja'aque' gała'ze  
 Jerusalénna' na' besežine' gan'  
 yesyeyetje' Ya'a Olivos. Na' bene' ca'  
 zja'aclene' le' gwzolao gosonxene'  
 Diosen', zižje cheso'e diža' che  
 yogo'lol' yeła' guac da' ba besele'ede'  
 da' ben Jesús'en'. <sup>38</sup>Nach gosene':

—iMbalaz rey chechon' ben' ba za'  
 nga gwseła' Xancho Diosen' le' cont  
 nabi'e! Cheyala' gonxencho Diosen'  
 txen len bene' ca' nita' gan' zoe'na',  
 le ba bene' cont benačhen' gac  
 yesyenite' binlo len le'.

<sup>39</sup>Na' len bene' zan ca' zja'aclene'  
 Jesús'en' zja'ac bal' bene' fariseo.  
 Nach to chope' gose'e Jesús'en':  
 —Maestrw, ben mandaw len  
 bene' ca' za'ac len le' txen cont  
 yesenite' šize.

<sup>40</sup>Nach boži'i Jesús'en'  
 xtiža'gaquen', gwne':  
 —Chnia' le'e, šaca' bene' quinga  
 nite' šize, yej quinga yesosya'an  
 yesonxenen neda'.

<sup>41</sup>Cate' bžine' gała'ze Jerusalénna',  
 gwne'e ciudan', na' bene' xbab che  
 bene' lo' ciudan' na' gwchežyaše',  
<sup>42</sup>na' gwne':

—Šaca' la'ch na'aža šejni'ile nac  
 gonle cont soale binlo len Diosen',  
 perw na'a ne' ngašen'. <sup>43</sup>Gwžin ža  
 cate' bene' ca' chesegue'ede' le'e  
 yesone' to yež de yej da' šechjen

ciudan' cont nono gac yoxonj.

<sup>44</sup>Na' yesote' le'e len xi'ñle ca'. Na' yosyočhinje' ciudan' na' yesoslase' yej ca'. Ca' gac lagüe da' bi chejle'le Diosen' ba gwsele' neda' laole nga.

**Jesúsen' bebeje' bene' ca' cheson ya'a yodao' blaon'**

(Mt. 21:12-17; Mr. 11:15-19; Jn. 2:13-22)

<sup>45</sup>Jesúsen' gwyo'e chy'o yodao' blaona' na' gwzologüe' bešaše' bene' ca' chesote' na' bene' chesa'o na'.

<sup>46</sup>Na' gože' legaque':

—Nyojce Xtiza' Diosen' žan:

“Ližan' naquen to latje gan' yesol güiž bene' neda'”, perw le'e ba benlen ca to latje ga že' bene' gwban.

<sup>47</sup>Na' bsed blo'ede' bene' ca' že' yodao' blaona' yogo' ža. Na' bžoz gwnabia' ca' na' bene' ca' chososed chosolo'e dan' bzoj da' Moisésen' na' nochle bene' blao che bene' Israel ca', goseyiljwlaže' nacle yesone' yesote'ne'. <sup>48</sup>Perw bi besyeželde' nacle yesone' le' neche yogo' bene' besyebchgüede' xtize'na'.

**Yela' gwnabia' che Jesúsen'**

(Mt. 21:23-27; Mr. 11:27-33)

**20** To ža šlac chsed chlo'e Jesúsen' bene' ca' chy'o yodao' blaona' na' chyixjue'ede' diža' güen che Diosen', besežin bžoz gwnabia' ca' na' len bene' gol ca' chesenabi'e naciónna' na' bene' ca' chososed chosolo'e dan' bzoj da' Moisés. <sup>2</sup>Na' gose'e le':

—Gwnašč neto' bi yela' gwnabia' napo' chono' da' qui, na' no ben yela' gwnabian' cont chonon'.

<sup>3</sup>Na' boži'e xtiza'gaquen, gwne':

—Lecze de to da' nabda' le'e.

Le našč neda' <sup>4</sup>žnon' gwseła' da' Juanna' bzoe' bene' nis? ¿Dios nan' gwsele'ne', še benachen'?

<sup>5</sup>Na' legacze' gose' lježe':

—¿Bi nacho? Še ye'chone' Dios gwseła' le', na' ye'e chio: “¿Bixchen' ca gweyle'le che?” <sup>6</sup>Na' bi gac ye'chone' benač gwseła' le', le yogo'te bene' že' nga chesejle'e Diosen' gwsele' da' Juanna' be' xtize'na, na' yosožie' chio' yej še ye'chone' ca'.

<sup>7</sup>Na' gose'e Jesúsen':

—Bi nezeto' non' gwseła' da' Juan.

<sup>8</sup>Nach Jesúsen' gože' legaque':

—Lecz ca' neda' bi yapa' le'e bi yela' gwnabian' chonlenda' da' ca'.

**Jempl che mos mal ca'**

(Mt. 21:33-44; Mr. 12:1-11)

<sup>9</sup>Na' be'e jempl nga bzejni'ide' bene' ca' chosozenag che', gwne':

—To bene' goze' to cue' xen yag uvas na' bocua'anen' lo na' bene' ca' yesonen' žin na' gwze'e gweyje' zito' na' jasoe' sša. <sup>10</sup>Cate' bžin ža yosyotobe' cosešen', nach gwseła' to xmose' lao bene' ca' nac lo na'gaque' yag uvasen' cont yosyonežjue'ne' to tlaw coseš dan' yesyezi'en.

Na' bene' ca' nac lo na'gaque' yag uvasen' goseyine' mosen' na' to ga'alze bosyose'ene' bibi gos'ene'.

<sup>11</sup>Nach xan yežlion' gwsele' yeto mosen', na' lecze gosot goseyine' le' na' gosonde' le' zgot, na' to ga'alze bosyose'ene' bibi gos'ene'.

<sup>12</sup>Na' xan yežlion' gwseła'che' mos gwyone, na' lecze gosotlate'ne' gosone'ne' güe', na' besyebje'ne' gan' že' yag uvas ca'.



<sup>13</sup>Na' xan yežlion' gwne': "¿Nacxe gona'?" Nach beyone' xbab gwne': "Seļa' xi'ina' ben' chacchgüeda, le šeca güesezi'e xtiža' le'." <sup>14</sup>Perw bene' ca' nac lo na'gaque' yag uvasen' cate' besele'ede' xi'ine'na', gose' lježe': "Benga yega'anlene' yežlio nga cate' gat xe'. Le da gotchone' cont yega'anlenchon."

<sup>15</sup>Nach besyebje' le' gan' že' yag ca' na' gosote'ne'.

Nach Jesús'en' gwñabde' bene' ca' zjanžaguen':

—¿Nacxe gon xan yežlion' len bene' ca' bocua'anlene' yežlio chen?  
<sup>16</sup>Šeje' šjetue' legaque' na' yodie' yežlion' lo na' bene' yoble.

Na' bene' ca' že'na' cate' gosende' diža' quinga dan' be' Jesús'en' gosene':

—iCatec da' mal juisyw dan' goc!

<sup>17</sup>Na' Jesús'en' gwñachgüe' legaque' na' gwne':

—¿Bixe zejen da' nga nyojen le'e Xtiža' Diosen'? žan:

Yej dan' bi gosaclaš'e güen yo'o ca' yosočhine',

len ba naquen yej squin.

<sup>18</sup>Na' ca' nac yejna', note'tez bene' lažo' lo yeja' na' cue'žošje', na' note'tez bene' chiže' yeja' cate' lažon' na' gwšošjen le'.

### Ca nac dan' cheyaļa' gaxjw

(Mt. 21:45-46; 22:15-22; Mr. 12:12-17)

<sup>19</sup>Na' bene' ca' chososed chosolo'e dan' bzoj da' Moisés na' bxoz gwnabia' ca' la' besyeyiljwlaš'e'te nacle yesone' yesezene' Jesús'en', le gosacbe'ede' Jesús'en' be'e jemplna' neče dan' bi chesejnilaže' le'. Perw bibi gosone', le besežebe' bi yeson bene' ca' že'na' bene'

chesejle'e che Jesús'en'. <sup>20</sup>Da'n'an' gosesele' bene' yosogiüa yesene'e Jesús'en' cont yesebeje'ne' diža' da' yosode'ede' cont yesagüe' xya che' lao gobernador ben' chnabia'. Gosacde' gone' xbab do laže'gaque' chosozenague' che'. <sup>21</sup>Nach gose'e le':

—Maestrw, nezeto' diža' da' cho'o na' da' chsed chlo'edo' bene' zejen to liča. Nezeto' toz can' chono' len note'tez bene'. Na' nezeto' diža' li cho'o chsed chlo'edo' bene' can' chazlaže' Diosen' goncho. <sup>22</sup>Na' da'n'an' zedenabeto' le' ¿naquen binlo no chixjo da' cheyaļa' chixjwcho che ben' nac la'zelagüe bene' gwnabia' ben' chi' Roma, še bi?

<sup>23</sup>Na' gocbe'e Jesús'en' gague do lažen' chese'ene' ca', san chesaclaš'e' yesagüe' xya che xtižen'. Na' gože' legaque':

—¿Bixchen' chaclaže'le yoslažo'le neda' len xtižan'? <sup>24</sup>Le gwlo'e neda' to mechw. ¿No lao dan' da' le'e mechw nga? na' ¿no la' dan' nyoj le'en ni?

Nach gose'ene':

—Che César ben' nac la'zelagüe bene' gwnabia' ben' chi' ciuda Roma.

<sup>25</sup>Nach gože' legaque':

—Le gwnežjo bene' gwnabian' da' nac che bene' gwnabia', na' le gwnežjo Dios dan' nac che Dios.

<sup>26</sup>Na' bi gosezaque'de' yososlašoe' le' len xtižen' lao bene' ca' že'na'. Na' besyebande' can' boži'e xtiža'gaquen', na' bich bi gose'ene'.

### Cate' yesyeban bene' guat ca'

(Mt. 22:23-33; Mr. 12:18-27)

<sup>27</sup>Na' lecze besežin baļ bene' saduceo gan' zoa Jesús'en'. Bene' ca'

chesene' bene' guaten' bi yesyebane'.  
Nach gosenabde' le', gose'ene':

<sup>28</sup>—Maestrw, da' Moisésen' bzoje' can' cheyała' goncho, gwne' še to bene' byo gate' na' chzeb no'ol chen' perw na' nono bi güezeb chga'an, na' bene' biše' ben' ba gota' cheyała' yošagna'lene' no'ol güezeba' cont yesenita' xi'in diaža che da' bišen'.

<sup>29</sup>Na' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. <sup>30</sup>Na' bene' gwchopen' bošagna'lene' no'ol güezeba', na' lecze gote' nono xi'ine' gwnita'. <sup>31</sup>Na' bene' gwyona' lecze bošagna'lene' no'olen', na' lecze ca' goc len le'. Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. <sup>32</sup>Gwde gosat yogo'lol bene' ca', nach got len no'ola'. <sup>33</sup>Na' cate' yesyebane' ladjo bene' guat ca', ĩnox bene' ca' soalene' no'ola' ca' xo'ole?', le yogo' bene' gaža' bosošagna'lene' le'.

<sup>34</sup>Na' Jesúsén' boži'e xtiža'gaquen', gože' legaque':

—Bene' ca' nita' lo yežlio nga chosošagne'e na' lecze chosošague' na' no xi'ingaque'. <sup>35</sup>Perw na' bene' ca' chaque Diosen' zjazaque' cont yosbane' legaque' ladjo bene' guat ca' cont šjasyenite' len le' toli' tocane', caten' yesyežine' gan' zoa Diosen' bich yosošagne'e neca yosonežjo xi'ine' no'ol yosošagne'e. <sup>36</sup>Bich yesate', le yesaque' ca' angl ben' že' yaba, na' yesaque' xi'in Dios lagüe dan' ba bosban Diosen' legaque' ladjo bene' guat ca'. <sup>37</sup>Na' lecze da' Moisésen' bzoje' che dan' chesyeban bene' guat ca'. Bzoje' can' gož Diosen' le' caten' bol' güiže'ne' to lo

yag yeše' dao' da' chey. Na' gwne' Xancho Diosen' naque' Dios ben' chonxen Abraham, ben' chonxen Isaac, na' ben' chonxen Jacob.

<sup>38</sup>Na' bene' guat ca' bi chesonxene' Diosen', san bene' zjamban. Na' yogo' bene' ba gosejnilaže' Diosen', ne' zjambane' cont chesonxene' le'.

<sup>39</sup>Na' bal' bene' chososed chosolo'ede' ley dan' bzoj da' Moisés gose'e Jesúsén':

—Maestrw, binlo boži'o xtiža'gaquen'.

<sup>40</sup>Na' bich besyeyaxjde' bi yesenabde' le'.

### Criston' naque' xi'in diaža che da' rey David

(Mt. 22:41-46; Mr. 12:35-37)

<sup>41</sup>Jesúsén' gože' legaque':

—ĩNacxečen' chesena bene' Criston' ben' yedenabi'e naque' xi'in diaža che da' rey David? <sup>42</sup>Cuin Daviden' bzoje' Xtiža' Diosen' le'e libr da' nzi' Salmos, gwne':

Xancho Dios gože' Xanan':

“Gwche'edo' cuita' nga nabia'cho txen,

<sup>43</sup>na' gona' cont yogo' no chesegue'e le' yosozexjw yichje' yosozengue' chio'.”

<sup>44</sup>ĩNacxe gac naxho Criston' naque' xi'in diaža che da' rey David? le' cuin Davin' gože' le': “Xana”.

### Xtoła' bene' ca' chososed chosolo'e dan' bzoj da' Moisésen'

(Mt. 23:1-36; Mr. 12:38-40; Lc. 11:37-54)

<sup>45</sup>Bene' zan zjanžag chosozenague' cate' gože' bene' ca' zjanaque' le' txen:

<sup>46</sup>—Le gwsaca' cont bi gonle can' cheson bene' ca' chososed chosolo'e

ley dan' bzoj da' Moisés. Legaque' chesyebede' chesaše' zjanyaze' lache' ton. Na' chesyebede' chesonxen bene' legaque' cate' chesyěžague' lagüe ya'a. Chesyebede' chesebi'e gan' chesebe' bene' blao cate' chja'aque' yodao' na' cate' chac lni. <sup>47</sup>Na' chesyequ'e yo'o che no'ole güezeb ca'. Na' cate' chosol güiže' Dios, sša cheso'e diža' cont yesaque bene' leca chesonxene' Diosen'. Bene' can' chesacche' castigw clcl ca yezica'chle bene' güen da' xinj.

**To no'ole güezebe bnežjue' Diosen' xmechue'na'**  
(Mt. 12:41-44)

**21** Šlac zoa Jesúsen' chy'o yodao', gwne'e na' ble'ede' bene' gwni'a ca' gosego'o xmechwgaquen' lo' cajen' gan' chesegüe'e mechw che yodaon'. <sup>2</sup>Na' lecze ble'ede' to no'ol güezebe bene' yaše' gwlo'e chop centav dao' che'na'. <sup>3</sup>Nach Jesúsen' gwne': —Da' li žia' le'e, no'ol güezebe yaše' nga ba gwlo'och'e mechw da' zaca'ch clcl ca' yogo' bene' ca' yezica'chle. <sup>4</sup>Le yogo' legaque' chesegüe'e da' checho'onen lo yela' gwni'a chegaquen', perw no'ol nga, lo yela' yaše' yela' zi' che' gwlo'e yogo' da' de che', yogo' da' chacbande'.

**Gwžin ža yosyočinje' yodao' blaona'**  
(Mt. 24:1-2; Mr. 13:1-2)

<sup>5</sup>Na' bal bene' ca' chesejnilaže' che dan' chsed chlo'e Jesúsen' gos'o'e diža' catec xdan nac yodao' blaona' dan' gosonen' de yej xdan da' zaque' na' yo'on bi da' bosonežjo bene'. Nach Jesúsen' gwne':

<sup>6</sup>—Ca nac da' quinga chle'ele ngan', žin ža cate' ne to yej dan' zjancua' nga ca yega'an zjancua' cože' lježen. Yogon' yosyočinje'.

**Dan' gac cate' ba za' bagwze yeyož yežlion'**

(Mt. 24:3-28; Mr. 13:3-23)

<sup>7</sup>Na' gosenabde' Jesúsen' gose'ene': —Maestrw, čdo bat gac dan' žo' nga? na' čnac gac nezeto' cate' ba zoa gac yogo' da' ca'?

<sup>8</sup>Na' gwne':

—Le gwsaca' cont nono siye' le'e. Le bene' zan yesaš yežlio nga bene' yesaclaže' yosolane' xlatja' nga, yesene': “Nedan' Criston' ben' gwlej Diosen' cont nabi'a”, na': “Ba za' gac juisyw.” Perw le'e bitw gwzenagle xtiža'gaquen'. <sup>9</sup>Na' cate' yenele chac gwdi'e nile na'le o yenele chi' žaš contr bene' ca' chesenabia', bi žeble, le zgua'tec da' quinga cheyla' gac. Perw gague lenna' nacho na'tec na'a yeyož yežlion'.

<sup>10</sup>Nach gože' legaque':

—Na' yesedi'e to yež len yeto yež yoble na' to nación len yeto nación yoble, <sup>11</sup>na' zan cuen ga xo'chgua na' zan latje lo yežlion' ga gata' gwbin na' cue' yižgüe', na' yesac yela' guac da' yesele'e bene' le'e yaban' da' zaca' yesyebande', na' yesežebchgua benachen' neche dan' chac.

<sup>12</sup>Perw za' gac yogo' da' quinga cate' yesezene' le'e na' yosochi yososaque' le'e na' yesone' le'e lo na' bene' gwnabia' che yodao' chelen', na' yeseyixjue' le'e ližya. Na' yeseche'xoxje' le'e do lao rey na' do lao nochle bene' gwnabia' dan' chejnilaže'le neda'. <sup>13</sup>Na' cate' gac da' quinga güe'le xtiža'na'.

14Na' le gon xbab zoacza' chaclena' le'e, nach cate' gacle lo na' bene' ca' bi cuec yichje nacle yoži'ile xtiža'gaquen', 15le neda' gona' le'e xbab len yela' sina' chian' cont yoži'ile xtiža'gaque' sin cbi bi gac yesene'. 16Na' balle xaxna'le na' bene' biše'le na' biše' lježle na' bene' migw chele yesechje' yesone' le'e lo na' bene' chesegue'e le'e. Na' yesote' balle. 17Na' yogo'ze bene' yesegue'ede' le'e dan' chejnilaže'le neda'. 18Perw chape Diosen' le'e na' bitw güe'e latje cuiayi'le, 19na' gone' yela' mban chele toli tocane še soale gwyo gwchejle yogo'lol dan' yesonde' le'e.

20Na' cate' le'ele ba besela'ac soldadw zan cue'ej cuit Jerusalénna' ben' yesedillen le'e, canan' nezele ba zoa cuiayi' ciudadan'. 21Cana' bene' yesenita' Jerusalén cheyała' yosoxonje'. Na' bene' že' yezica'chle yež ga mbane Judea cheyała' šja'aque' do ya'adao'. Na' bene' yesenita' yixe', bi cheyała' yesone' xbab yesyeyo'e lo' ciuda. 22Cana' gwnežjo Diosen' castigw che xtola' bene' ca' že' Judean', cont gac can' nyojen le'e Xtiža' Diosen'. 23iNyaše' zjanac no'ol ca' zjanoa' xi'in na' no'ol ca' ne' chosoguaže' bidao' lo že ca'! Leca yesesaca'zi' bene' ca' že' doxen Judean', le Diosen' že'achgüe' legaque'. 24Soldadw ca' yesote' bale' lo gwdile na' yebale' yeseche'xoxje' nación ca' dan' zjachi' doxen yežlion'. Na' bene' ca' bi zjanaque' bene' Israel yosyochinje' yo'o ca' dan' že' Jerusalénna' na' yosolej yosošožen'. Perw ba bžia' Diosen' bia' žin že cate' bene' ca' bi zjanaque' bene' Israel bich yesenabi'e nación Israel.

### Yid Jesucriston' da' yoble

(Mt. 24:29-35, 42-44; Mr. 13:24-37)

25'Ca nac gwbiž, bio' na' beljw ca', gac da' yebanecho len legaquen. Na' bene' že' yežlion' yesaque' tole na' yesacžejlaže' catec sšag gon nisdan' chas chata' gaquen. 26Na' bene' že' yežlio nga yesatte' šlat yesežebchgüe' dan' gaquen, le yogo' da' chle'echo le'e yaban' yesaquen ca' chac yežlion' cate' chxo'. 27Na' cana'ch bene' že' yežlion' yesele'ede' neda' naca' ben' gwsela' Dios golja benač, za'a to lo' bejw len yela' guac xen na' yela' bene' zaca' juisyw chia'. 28Na' cate' solao gac da' quinga, le gončač laže'le na' le yebe. Ba zoa žin že yida' da' yoble yebeja' le'e lo da' malen'.

29Na' Jesús'en' be'lene' legaque' to jempl, na' gože' legaque':

—Le na'šc can' chon yag yixgüigw na' bite'teze yag yoble, 30cate' chle'ele ba chebian laga' che'en dao' nach nezele bač zoa yela' tiemp ba. 31Ca'czen' cate' le'ele ba chac da' mal ca' ba gwnia', cana'ch nezele ba zoa gwlo'e Diosen' yela' gwnabia' che'.

32'Da' li žia' le'e, bina' yenit diaža' che le'e nita'le na'a cate' yeyož gac yogo'lol da' ca'. 33Le'e yaba na' yežlion' yesede čhen, perw ca' nac xtižan', gague da' te cbi gac can' žanna'.

34'Na' le gon xbab cont bi gacle bene' lia na' bene' borrašw na' cont bi soale yelal yežejele. Bene' ca' yesac bene' lia na' borrašw na' bene' ca' yesyelal yesyežjde' bi yesebeze' batcan' gac yogo' da' quinga. 35Na' toz can' gac che bene' že' doxen yežlion', yesac yogo' da'

quina cate' nono chon xbab. <sup>36</sup>Perw yogo' ža le soa le cuez batcan' gac da' quinga na' le yol güiž Diosen' cont bibi gac chele na' gac yedyesoale len neda' naca' ben' gwseła' Diosen' golja' benach.

<sup>37</sup>Yogo' ža gwzoa Jesúsen' bsed blo'ede' bene' yodao' blao, na' yogo' že' beyeje' lo ya'a da' nzi' Ya'a Olivos. <sup>38</sup>Na' yogo' zil besežin bene' zan bosozenague' che' šlac bsed blo'ede' legaque' chy'o yodao' blao.

### Bosoxi'e cont yesezene' Jesúsen'

(Mt. 26:1-5, 14-16; Mr. 14:1-2, 10-11; Jn. 11:45-53)

**22** Na' ba zoa gala' lni pascw caten' chesagüie' yetextil da' bibi levadura yo'on. <sup>2</sup>Na' bxyz gwnabia' ca' na' bene' ca' chososed chosolo'e ley dan' bzoj da' Moisésen' beseyiljue' nacle yesone' na' bi da' yosode'ede' cont yesezene' Jesúsen' na' yesote'ne', le besežebe' še cate' bi yesone yezica'chle bene' legaque'.

<sup>3</sup>Nach Satanásen' dan' chnabia' da' xigüie' ca' gwyo'o gwyazen lo' yichjlaždao' Judas Iscarioten' ben' goque' txen len bene' šižinw ca' zjanaque' Jesúsen' txen, <sup>4</sup>na' gwyeye' jane'e bxyz gwnabia' ca' na' bene' gwnabia' che bene' ca' chesape' yodao'na' cont bosoxi'e nacle gone' gwdie' Jesúsen' lo na'gaque'. <sup>5</sup>Na' leca besyebede' na' gose'e le' yosonežjue'ne' mechw. <sup>6</sup>Na' Judasen' gwxenlaže' len legaque', na' gwzolagüe' gwdiłjwlaže' nacle gone' gwdie' Jesúsen' lo na'gaquen' cate' bi že' bene' zan.

### Jesúsen' blo'ede' legaque' can' cheyała' yesone' šjasyeza'laže' dan' gaten'

(Mt. 26:17-29; Mr. 14:12-25;

Jn. 13:21-30; I Co. 11:23-26)

<sup>7</sup>Na' bžin ža gala' lni caten' chesagüe' yetextil dan' bibi levadura

yo'o. Naquen ža cate' chesote' xila' dao' cont šjasyeza'laže' can' bosla Diosen' da' xozxta'ogaquen' lo na' bene' Egipto ca'. <sup>8</sup>Na' Jesúsen' gwleje' Pedroa' len Juanna' na' gože' legaque':

—Le šja'ac na' le šjasini'a dan' gagwcho lo lnin'.

<sup>9</sup>Na' gose'ene':

—čGa che'ndo' šjasini'ato'?

<sup>10</sup>Nach gože' legaque':

—Le šja'ac na' cate' ba gwyo'ole ciudan' na' yežagle to bene' byo no'e to che'e nis. Na' šejlenlne' na' gan' yežinen' <sup>11</sup>le ye' xan yo'on: “Maestron' že: Gonšco' to yo'o ga gagua' xše' že' lni nga len bene' ca' zjanaque' neda' txen.” <sup>12</sup>Nach gwlo'ede' le'e to quart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

<sup>13</sup>Na' gosa'aque' na' yogo' can' gož Jesúsen' legaque' goc. Nach bososini'e xše' že' lni'na'.

<sup>14</sup>Na' cate' bač gwchi'e cho'a mesen' len postlw che' ca', <sup>15</sup>na' gože' legaque':

—Leca gwzelaža' gagua' yela' guagw che lni nga len le'e na'a za' saca'zi'a na' gata. <sup>16</sup>Chnia' le'e, na'a zelao gagan'. Cate'ch ba blo'e Diosen' yela' gwnabia' che'na', cana'ch gagan' da' yoble.

<sup>17</sup>Na' gwxi'e vas gan' yože' nis uvasen', na' beyož be'e yela' choxclen che Dios, nach gwne':

—Le sin', na' le ye'ej yogo'le late' güeje dan' yože' lo' vas nga. <sup>18</sup>Chnia' le'e na'a zelao che'ej'a vino che uvasen'. Cate' ba blo'e Diosen' yela' gwnabia' che'na', cana'ch ye'ejan' da' yoble.

<sup>19</sup>Nach gwxi'e yetextilen' na' be'e yela' choxlen che Diosen' na' bzojxen' na' bnežjuen' legaque'. Na' gože' legaque':

—Da' nga cuerp chia' chzanlaža' neche le'e. Quinga gonle cont šjayze'ele bi zejen len le'e dan' yesote' neda'.

<sup>20</sup>Na' lecze beɣue' vasen' cate' ba beyož gosagüe' xšen' na' gože' legaque':

—Dan' yože lo' vas nga zejen da' cobe dan' gwna Diosen' gone' gaclene' le'e. Na' solao gone' can' gwne', le yesote' neda' na' gwlaļj xchenan' neche le'e.

<sup>21</sup>Na' da' li ben' gwdie' neda' lo na' bene' ca' chesegue'e neda' nga chagwlene' neda' txen. <sup>22</sup>Na' gac chia' can' nžia bia' gac, neda' naca' bena' gwseļa' Diosen' golja' benačh, perw nyaše'chguaze nac ben' gwdie' neda' lo na' bene' ca'.

<sup>23</sup>Nach gosezolagüe' gosenabe lježgaque' noen' gon da' malen' nac ca'.

### Gosacyože' noe' nacch blao

<sup>24</sup>Na' lecze gosezolagüe' gosacyože' noe' nacch blao. <sup>25</sup>Na' Jesúsen' gože' legaque':

—Nita' bene' gwnabia' che to to nación ca' na' chesone' byen chosozenag bene' chegaque', na' bene' gwnabia' ca' chesaclaš'e yesoe' bene' diža' chegaque' zjanaque' bene' güenchgua. <sup>26</sup>Perw le'e gague can' cheyaļa' gonle. Še no le'e nacchle bene' blao, cheyaļa' gwzexjwlaže'le len bene' lježle na' gonle ca' bene' xcuide' ben' bibi na' neze. Na' še no le'e chnabia'le, cheyaļa' soale gaclen lježle. <sup>27</sup>Le gon xbab noe' nacch

bene' blao, še bena' chi' cho'a mesen' o še xmosen' ben' chon mandaww che'. Nachiacze ben' chi' cho'a mesen' naccze' bene' blaoch. Perw neda', zoa' cont gaclena' le'e la'cze naca' Xanle.

<sup>28</sup>Le'e bina' cuejyichjle neda' la'czļa' bene' zan ba chesegue'ede' neda'. <sup>29</sup>Na' ca nac Xan' ba none' chia' cont nabia' txen len le', lecze neda' ba nona' chele cont nabia'le txen len neda'. <sup>30</sup>Na' gona' cont ye'ej gagwle txen len neda' cate' yela'le gan' nabia', na' cue'le cuita'na' nabia'le šižiw cuen bene' ca' zjanaque' xi'in diaža che da' Israel.

### Jesúsen' gwne' Pedroa' bi chebe' še nombi'e le'

(Mt. 26:31-35; Mr. 14:27-31; Jn. 13:36-38)

<sup>31</sup>Nach Jesúsen' gwne':  
—Simón, ben xbab chio', Satanásen' dan' chnabia' da' xigüe' ca' ba gwñaben gaco' lo ne'en cont gonen cuejyichjo' bich šejnilažo' neda'. Na' dan' gonen len le' naquen ca dan' chon bene' caten' chdie' trigon' lo' rner. <sup>32</sup>Perw na' neda' ba gwñaba' gaclen Diosen' le' cont bi cuejyichjo' dan' chejnilažo' neda'. Na' cate' ba betinjdo' xtołona', gono' čačh laže' bene' lježo' quinga.

<sup>33</sup>Nach Pedroa' gože'ne':  
—Ba bečhoglaža' sa'alena' le', gague ližya na'ze, san gatlencza' le'.

<sup>34</sup>Na' Jesúsen' gože'ne':  
—Pedro, žia' le', bina' cuež jean' na'aže' cate' gac šon ni'a bi chčebo' še nombi'o neda'.

### Gwne' ba zoa yosoči yososaca' bene' legaque'

<sup>35</sup>Na' gože' bene' ca' zjanaque' le' txen:

—¿Byažjele bi da' byažjele cate'  
gwseła' le'e jatixjue'ele xtiža'na'?  
Gwseła' le'e sin cbi bia'le mechw, ne  
bzod, na' neca bia'le xelle.

Na' gose'ene':

—Bitw bi byažjeto'.

<sup>36</sup>Na' gože' legaque':

—Perw na'a še nuple mechw,  
cheyała' gua'len, na' lecze ca' gua'le  
bzod. Na' še bitw bi spada chele de,  
le gote' xadon chelen' cont si'le to  
spada. <sup>37</sup>Chnia' le'e gonle ca', le gac  
chia' can' nyojzen le'e Xtiža' Diosen'  
žan: "Gosone'ne' ca' bene' güen da'  
xinj." Na' cheyała' gac yogolo dan'  
nyojen.

<sup>38</sup>Nach gose'ene':

—Xanto', gwnašc nga noa'to'  
chope spada.

Na' gože' legaque':

—Güesaqueczen.

### Jesúsen' chol güiže' Diosen' latje gan' nzi' Getsemaní

(Mt. 26:36-46; Mr. 14:32-42)

<sup>39</sup>Nach gwze'e gwyeje' Ya'a Olivos  
can' ba yolagüe' chone', na' bene'  
ca' zjanaque' le' txen zjana'ogüe' le'.

<sup>40</sup>Nach cate' besyežine' latjen' na'  
gože' legaque':

—Le yol güiž Dios cont bi gon  
gwxiyen' le'e gan.

<sup>41</sup>Na' gwle'e len legaque' zito' ca'  
gan' zelao žin to yej da' gwzala'cho,  
na' bzoa xibe' na' bol güiže' Dios,  
<sup>42</sup>gwne':

—Xa', benšca cont bi saca'zi'a na' bi  
yesote'nda' še ca' chazlažo', perw bi  
chnaba' gac da' žia' neda', san gac  
can' nao' le'.

<sup>43</sup>Na' to angl bene' za' yaba  
blo'elagüe' le' na' be'e le' fuerz  
valor. <sup>44</sup>Na' šlac chžaglaochgüe'

len yichjlažda'ogüe'na' gwzolao  
chžaglaoch'e' chol güiže' Diosen'  
beyalollite' yes. Na' nis yes che'na'  
beyaquen ca' tlab'a güeje chen dan'  
zjanaquen chelson, besyeyinjen lo  
yo. <sup>45</sup>Na' bezeche', na' beyeje' gan'  
nita' bene' ca' zjanaque' le' txen,  
ble'ede' zjanite' chesetase' dan' leca  
gosacyaše'chgüede'. <sup>46</sup>Na' gože'  
legaque':

—¿Bixchen' chtasle? Le chas, le  
yol güiž Dios cont bi gon gwxiyen'  
le'e gan.

### Gosezene' Jesúsen'

(Mt. 26:47-56; Mr. 14:43-50; Jn. 18:2-11)

<sup>47</sup>Ne' choe'te Jesúsen' diža' cate'  
besežin bene' zan gala'ze gan' zoen'.  
Na' ben' le' Judas, ben' goque' txen  
len bene' šižinw ca' gwlej Jesúsen'  
cont zjanaque' le' txen, žialagüe'  
laogaque'. Na' gwbigue' gan' zoa  
Jesúsen' na' bnop'e' xague', perw  
gague do lažen' bene' ca'. <sup>48</sup>Na'  
Jesúsen' gože' le':

—Judas, ¿chnopo' neda' cont  
gwdio'nda' lo na' bene' quinga? neda'  
naca' bena' gwsela' Diosen' golja'  
benach.

<sup>49</sup>Na' cate' bene' ca' zjanaque'  
Jesúsen' txen besele'ede' can' gac  
che'na' nach gose'ene':

—Xanto', ¿gwyinto' bene' quinga  
spada cheton'?

<sup>50</sup>Na' toe' gwdinen' mos che bxoz  
blaon', gwchogtechgüe' nague' licha.

<sup>51</sup>Perw Jesúsen' gože'ne':

—Bich gonle ca'.

Nach gwdane' nag mosen'  
na' beyone' le'. <sup>52</sup>Jesúsen' gože'  
bxoz gwnabia' ca' na' bene' ca'  
chesenabi'e bene' ca' chesape' yodao',  
na' bene' gole blao ca' chesenabia'



nación Israelen' ben' zja'ac zjasexi'e le', gože'ne':

—¿Bixčhen' nonle neda' ca to bene' gwban za'acle zedexi'le neda' len spada na' len yag? <sup>53</sup>Yogo' žaze gwzoa' len le'e chy'o yodao' blaon' na' bitw gwzenle neda'. Perw na' ba bžin ža gonele neda' con can' chaclaže'le, na' ba bžin ža gac can' chaclaže' Satanásen' dan' chnabia' bene' ca' chesaš lo čholen'.

**Pedroa' bi gwčebe' še nombi'e Jesúsen'**

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup>Nach gosoxe' Jesúsen' na' goseče'ene' liž ben' naque' bχoz blao če nación Israelen'. Nach Pedroa' na'ogüe' Jesúsen' zito' zito'le.

<sup>55</sup>Na' bosoxene' yi' chy'o če bχoz blaona' na' gosebi'e cho'a yi'na'. Na' gwche' Pedroa' len legaque'. <sup>56</sup>Na' to no'ole güen žin ble'ede' chi'e cho'a yi'na' na' gwne'e le' na' gwne':

—Lecze len benga naque' txen len Jesúsen'.

<sup>57</sup>Perw Pedroa' bitw gwčebe' še nombi'e Jesúsen'. Gože'ne':

—No'ole, bitw nombi'ane'.

<sup>58</sup>Na' gocze šlož, yeto bene' ble'ede' Pedroa' gože'ne':

—Lenczo' naco' txen len bene' ca'.

Na' Pedroa' gože'ne':

—Bitw lena' len legaque'.

<sup>59</sup>Gwde to hor yetoe' gwne':

—Da' licze nac benga txen len Jesúsen', le naque' bene' Galilea.

<sup>60</sup>Na' Pedroa' gože'ne':

—Bene', bi nezda' bi dižan' cho'o.

Na' ne' choe'te Pedroa' dižan' ca', gwčež to jea. <sup>61</sup>Na' Xancho Jesúsen' gwyechje' gwne'e Pedroa'

na' jayze'e Pedroa' diža' dan' gož Xancho' le' caten' gwne': “Bina' cuež jean' na'aže' cate' gac šone ni'a bi čhebo' še nombi'o neda'.” <sup>62</sup>Na' Pedroa' beze'e leca gwčežyaše'.

**Gosezi'diže' Jesúsen'**

(Mt. 26:67-68; Mr. 14:65)

<sup>63</sup>Na' bene' ca' goseče'e Jesúsen' gosezi'diže' le', na' gosot goseyine' le'. <sup>64</sup>Na' bosocheje' to lache' lao Jesúsen' na' goseyine' le' na' gose'ene':

—Gwneya'ašč non' chyin le'.

<sup>65</sup>Na' zanch diža' da' gosene' gosezi'diže' Jesúsen'.

**Goseče'e Jesúsen' lao bene' ca' chesenabia' nación Israelen'**

(Mt. 26:59-66; Mr. 14:55-64; Jn. 18:19-24)

<sup>66</sup>Na' cate' gwyeni', bene' gole blao ca' chesenabia' nación Israelen' na' bχoz gwnabia' ca' na' bene' ca' chososed chosolo'e ley dan' bzoj da' Moisés besežague' na' gosone' mandadw gwyej Jesúsen' laogaque' gan' chesenabi'ena', nach gose'ene':

<sup>67</sup>—Gwnašč neto' še le' naco' ben' gwlej Diosen' cont nabi'o nación čhechon'.

Nach gože' legaque':

—Šaca' nia' le'e neda' naca' Criston' ben' gwlej Diosen' cont nabia' nación čhechon', bitw šejle'le čhia'.

<sup>68</sup>Na' šaca' bi nabda' le'e, neca yoži'ile xtižan', neca gwsanlenda.

<sup>69</sup>Neda' naca' ben' gwsela' Diosen' golja' benač. Na' na'a cui'a cuit Diosen' nabi'a txen len le', Dios ben' chnabia' doxen.

<sup>70</sup>Nach yogüe' yose'ene':

—¿Len' naco' dogualje Xi'in Diosen'?

Na' gože' legaue':

—Le can' žale nan' naca'.

<sup>71</sup>Na' gosene':

—iNoch no chyažje no gagw xya che'! Chio' ba benecho na'a chne' che Diosen' dan' že' ca'.

### Bosocuiše' Jesúsen' lao Pilaton'

(Mt. 27:1-2, 11-14; Mr. 15:1-5; Jn. 18:28-38)

**23** Na' yogo'loł bene' ca' gosezože'e na' goseche'ene' lao Pilaton' ben' nac gobernador.

<sup>2</sup>Na' gwzolaos bosocuiše' Jesúsen' gosene':

—Ba gwchoglaoto' che benga cheyala' gate' dan' chde' chgo'oyele' nación Israelen' cont yesejle' che' na' lecze chžone' chixjwto' da' cheyala' chixjwto' lao rey César. Na' lecze že' len' naque' Criston' ben' gwlej Diosen' cont nabi'e nación cheton'.

<sup>3</sup>Nach Pilaton' gwñabde'ne' gože'ne':

—¿Len' naco' rey che bene' Israel'?

Nach Jesúsen' boži'e xtižen', gwne':

—Can' gwnao'na', can' naquen.

<sup>4</sup>Nach Pilaton' gože' bžoz ca' len yogo'loł bene' ca' zjanžag lagüe'na':

—Bibi nla'lagüe' še bi doła' nap benga.

<sup>5</sup>Perw na' goseneche', gosene':

—Chde' chgo'oyele' yogo' bene' že' distritw Judea nga yesejle'e dan' chsed chlo'ede'. Gwzolaogüe' bsed blo'ede' distritw Galilean' perw lencze nga bach chsed chlo'ede' na'a.

### Pilaton' gwsele' Jesúsen' lao Herodes

<sup>6</sup>Cate' bene Pilaton' can gosene', nach gwñabe' še Jesúsen' naque' bene' Galilea. <sup>7</sup>Na' cate' gocbe'ede'

Jesúsen' ze'e Galilean' gan' chnabia' gobernador Herodes, na' gwsele'ne' lao Herodes, le ca hora' zoa Herodes Jerusalénna'. <sup>8</sup>Cate' Herodes ble'ede' le' bebede', le ba goc šša che'nde' le'ede' le'. Ba bende' xtiža' Jesúsen' na' zoe' lez le'ede' gone' to da' zaca' yebande'. <sup>9</sup>Nach da' zan da' gwñabde' Jesúsen', perw ne to xtižen' ca boži'i Jesúsen'. <sup>10</sup>Bžoz gwñabia' ca' na' bene' ca' chososed chosolo'e ley dan' bžoj da' Moisés gosezeche' gałaze na' bosocuiše'ne' len zan diža'. <sup>11</sup>Na' Herodes len zan soldadw che' ca' gosezolaogüe' gosezi'diže'ne' na' gosonle' che'. Nach cate' beyož bosoguacue'ne' to lache' xdan juisyw, gosele'ne' da' yoble lao Pilaton'. <sup>12</sup>Na' žana' Pilaton' len Herodes gwzolaos gosaque' migw, la'czla' cate' za' gac ca' besegue'e lježe'.

### Gosechoglagüen' gat Jesúsen'

(Mt. 27:15-26; Mr. 15:6-15; Jn. 18:39 - 19:16)

<sup>13</sup>Nach Pilaton' botobe' bžoz gwñabia' ca' na' bene' ca' chesenabia' nación Israelen' len yezan bene' yež, gan' chesone' yela' justisen'. <sup>14</sup>Nach gože' legaue':

—Le'e bedesanle benga lagua' nga, na' gwnale chde' chgo'oyele' bene' Israelen' yesone' contr gobiernna'. Neda' bach gwñabyožda'ne' lao le'e ca xyan' dan' chagwle che', ne to da' xinj ca chželda' še bi dan' none'. <sup>15</sup>Na' lecz ca' Herodes bitw bi xtole' bželde', na' besele' le' laoto' nga. Na' nacbia' bibi ben benga da' cheyala' gate'. <sup>16</sup>Na' na'a con gona' mandadw yeseyine' le' na' gwsana'ne'.

<sup>17</sup>Gwne' ca', le yogüiz chsane' to bene' pres lo lni pascw chegaue'.

<sup>18</sup>Na' yogo' bene' ca' že' bososye'e toz ca gosene':

—Chojtega benga gate' na' gwsano' Barrabásen'.

<sup>19</sup>Na' Barrabásen' goseyixjue'ne' ližya da' bxie' gwdile lo' ciudan' na' goque' to bene' güet bene'. <sup>20</sup>Na' da' yoble Pilaton' gwñabde' legaque' še gwsane' Jesúsén', <sup>21</sup>perw bososye'e zižjeh gosene':

—iBde'e le'e yag cruz! iBde'e le'e yag cruz!

<sup>22</sup>Da' gwyon ni'a gož Pilaton' legaque':

—¿Bixe da' xinj nonen? Ne to da' xinj bi chželda' še bi none' da' zaca' gate'. Na' gona' mandadw yeseyine' le' na' gwsana'ne'.

<sup>23</sup>Perw gosone' byen bososye'e yelate' zižjeh gosenabe'

gwde'ene' le'e yag cruz. Nach Pilaton' bzenague' chegaquen'

<sup>24</sup>na' gwçhologläü'e che' gac can' gosenabde' le'. <sup>25</sup>Nach bsane' Barrabás ben' zjanyixjue' ližyan', ben' gosenabe' gwsane', la'czla' Barrabásna' goque' ben' bxie' gwdile na' bene' güet bene'. Na' Pilaton' bodie' Jesúsén' lo' na'gaque' cont yesone' len le' ca chesaclaže'.

#### Bosode'e Jesúsén' le'e yag cruz

(Mt. 27:32-44; Mr. 15:21-32; Jn. 19:17-27)

<sup>26</sup>Na' šlac zjanche'ene' gan' yesote'ne' besyežague' to bene' yež Cirene le' Simón, za' zeze'e yiže'. Na' bosogüe'ene' yag cruz che Jesúsén' na' gwyeye' gwda'ogüie' Jesúsén'.

<sup>27</sup>Na' bene' zan zjana'ogüie' le' na' zjalen zan no'ole. Na' no'ol ca' gwzolao bososye'e gosebeže' che'.

<sup>28</sup>Na' Jesúsén' gwyechje' na' gože' legaque':

—No'ole Jerusalén, bitw cuežle chia'. Yejni'a le cuež chele na' che xi'inle. <sup>29</sup>Da' li gwžin ža cate' yesene': “Mbalaz nita' no'ole güiž no'ole cono gwñan na' nono bguaže'.” <sup>30</sup>Cana' yesenablaže' yesebixe ya'a ca' cont čhenen legaque'. Yesenablaže' che' bdiñj goten legaque'. <sup>31</sup>Še yesot bene' neda' len bibi xtoła' de, inacchxe yesonde' le'e nacle bene' güen da' xinj!

<sup>32</sup>Na' lecze goseche'e chop bene' güen da' xinj cont bosode'e legaque' le'e yag cruz can' gosone' len Jesúsén'. <sup>33</sup>Na' cate' besežine' latje gan' nzi' Latje che Žit Yichj Bene' Guat, bosode'e Jesúsén' le'e yag cruzen'. Na' lecze bosode'e bene' mal ca' chop le'e yag cruzen' len le', toe' gwda' cuit Jesúsén' licha, na' yetoe' gwda' cuiten' robes. <sup>34</sup>Na' Jesúsén' gwne':

—Xa', bezi'xen che bene' quinga chesegue'ede' neda'. Gagüe zjanžde' bin' chesone'.

Na' gosone' rifa cate' besyele'e xałane' cont gota'bia' noe' yechelen.

<sup>35</sup>Na' bene' zan besyežejde' le'.

Na' bene' gwnabia' chegaque' ca' gosonle' che', gosene':

—Yezica'chle bene' bosle'. Še da' li naque' Criston' ben' gwlej Diosen' yedenabi'e, žbixčhen' bi chosla cuine'?

<sup>36</sup>Nach soldadw ca' lecz ca' gosonle' che'. Gosebigue' gała'ze gan' zoa yag cruzen' na' bosonežjue'ne' vino zichj. <sup>37</sup>Nach gosene':

—Še len' naco' rey che bene' Israel, bosla cuino'.

<sup>38</sup>Na' yichj yag cruz che'na' gwzoa to dan' nyojen, žan: “Bengan' rey

che bene' Israel." Na' byojen diža' griego, diža' latín na' diža' hebreo.

<sup>39</sup>Na' to bene' mal ben' da' le'e yag cruz cuit Jesúsen' lecze gwzi'diže'ne', gože'ne':

—Še le' naco' ben' gwlej Diosen' cont yedenabi'o nación chechon', bosla cuino' na' lecze bosla neto'.

<sup>40</sup>Na' ben' yeto gwdi'e bene' lježen' gože'ne':

—¿Bi chžebo' Diosen'? Chio' ba da'cho le'e yag cruz cont gatcho can' da' le', <sup>41</sup>na' dan' gat chio' naquen licha cont si'cho castigw che xtoła'chon'. Perw benga, bitw bi doła' nape'.

<sup>42</sup>Nach gože' Jesúsen':

—Jesús, šjayza'laže'go' neda' cate' žin ža nabi'o.

<sup>43</sup>Na' gož Jesúsen' le':

—Da' li chnia' le', na'aža soaczo' len neda' gan' zoa Diosen'.

#### Can' goc caten' got Jesúsen'

(Mt. 27:45-56; Mr. 15:33-41; Jn.19:28-30)

<sup>44</sup>Na' cate' bžin guagwbiž goc choł doxen lo yežlion' bžinte do cheda šone. <sup>45</sup>Bitw bseni' gwbižen'. Na' ca nac lache' dan' ze lo' yodao' blaona', bcheza' gacholen. <sup>46</sup>Nach Jesúsen' bosye'e zižje gwne':

—Xa', chon cuina' lo nao', bezi' spiritw chia'na'.

Na' beyož gwne' ca' gote'.

<sup>47</sup>Na' cate' ble'e xan soldadon' can' goquen', benxene' Diosen' na' gwne':

—Da' licze benga goque' bene' gwyej to licha.

<sup>48</sup>Na' bene' zan bene' besežag besele'ede' can' goc na' yogo'lole' besyeya'aque' chesebaže' lcho'e gosacde' da' juisyw ba goc. <sup>49</sup>Na' yogo' bene' ca' zjanombia' Jesúsen',

na' len no'ol ca' zjanao' le' caten' beze'e Galilean', gosezeche' zito'le besele'ede' da' ca' goquen'.

#### Bosocuaše' Jesúsen'

(Mt. 27:57-61; Mr. 15:42-47; Jn. 19:38-42)

<sup>50</sup>Na' zoa to bene' ciuda Arimatea gan' mbane Judean' na' le' José. Naque' txen len bene' ca' chesenabia' nación Israel, na' naque' to bene' güen bene' zej to licha. <sup>51</sup>Ba zoe' chbeze' batcan' solao nabia' ben' sela' Diosen'. Bitw bene' txen len bene' ca' gosechoglagüen' yesote' Jesúsen'. <sup>52</sup>Bena' gwyeje' lao Pilaton' jaynabe' cuerp che Jesúsen'. <sup>53</sup>Na' beletje'ne' le'e yag cruzen' na' btobe' le' to lache' xen na' la' bcuaše'te' le' to lo' bloj da' nche'ene' le'e yej. Na' naquen to ba cobe ga nono na' yosocuaše'. <sup>54</sup>Na' yogo' da' ca' goc ža cate' chososini'e che ža che Dios. Na' ba bžin hor cate' cheyała' yosocueze' bite'teze žin o mandadw da' chesone'.

<sup>55</sup>Na' no'ol ca' za'aclene' Jesúsen' cate' gwze'e distritw Galilean' ja'aclene' Josén' cont besele'ede' ba che Jesúsen' gan' gwxo'a cuerp che'na'. <sup>56</sup>Nach gosa'aque' na' gosone' to da' chla' zix' da' yeseyebe' cuerp che Jesúsen'. Na' ža che Diosen' gosonita'cze can' ža ley chegaquen', bibi žin gosone'.

#### Jesúsen' bebane' ladjo bene' guat

(Mt. 28:1-10; Mr. 16:1-8; Jn. 20:1-10)

**24** Bał dmigw ja'ac no'ol ca' da' yoble cho'a bloj gan' bosocuaše' Jesúsen' na' gosoxe' da' ca' ba gosone' da' chla' zix', na' yebał no'ole ja'aclene' legaque'. <sup>2</sup>Na' cate' besežine' na' besele'ede' ba bga'a

yejen' dan' bosode'e cho'a blojen'.  
<sup>3</sup>Na' gosoe, na' bitw besyeželde' cuerp che Xancho Jesúsen'. <sup>4</sup>Šlac zjanite' chesyebande' che da' quinga, besele'ede' chope bene' zjazecha cuitgaquen' zjanyaze' lache' da' chactitchgua. <sup>5</sup>Na' no'ol ca' besežebe' na' bosochegue' yichjgaquen' gosene'e lo yole. Nach bene' ca' gose'e no'ol ca':

—¿Bixchen' cheyiljwle to bene' mban nga ladjo bene' guat?

<sup>6</sup>Notoch no nla' nga. Ba bebane' ladjo bene' guat na' mbancze'. Le šjayzalaže' can' gwne' cate' ne' zoale Galilean'. <sup>7</sup>Gwne' le' naque' ben' gwseła' Diosen' golje' benach. Na' gwne' cheyala' gague' lo na' bene' mal ca' cont yesote' le' yosode'ene' le'e yag cruz, na' yeyon ža yebane' ladjo bene' guat.

<sup>8</sup>Na' no'ol ca' jasyeze'ede' xtiže'na'.

<sup>9</sup>Na' besyeya'aque' cho'a blojen' na' jasedixjue'ede' yogo' da' ca' len postlw ca' šnej na' len yezica'chle bene' ca' nita' txen len legaque'.

<sup>10</sup>Na' no'ol ca' jasedixjue'ede' postlw ca' zjanaque' bene' quinga: María bene' Magdala, na' Juana, na' María xna' Jacobo, na' len yebałe no'ole.

<sup>11</sup>Na' postlw ca' bitw gosejle'e che no'ol ca', gosacde' chesenazen'.

<sup>12</sup>Perw na' Pedroa' la' gwzoža'te' na' la' gwza'seste' bžine' cho'a blojen' na' bcheque' na' ble'ede' lache' ca' zjachin' lo yo. Na' beze'e bebanchgüede' che da' ca' ble'ede'.

**Blo'elao Jesúsen' chop bene' ca' šlac zja'aque' Emaús**

(Mr. 16:12-13)

<sup>13</sup>Na' ľecze ža dmigwna' chop bene' ca' gosaque' Jesúsen' txen

ja'aque' yež dan' nzi' Emaús, do šnej mil metr zito' par Jerusalénna'.

<sup>14</sup>Na' ľegacze' bosošalje' che yogo' da' ca' ba goquen'. <sup>15</sup>Ne' chesone' xbab na' ne' chesoe'te' diža' chen cate' Jesúsen' gwbigue' len legaque' na' gwza'lene' legaque' txen, <sup>16</sup>perw bitw gosacbe'ede' noxen' zejlen legaque'. <sup>17</sup>Nach gože' legaque':

—¿Bi dižan' choe'le šlac ngo'ole nezen'? ¿Bixchen' chacyaše'le?

<sup>18</sup>Na' toe' le' Cleofas boži'e xtižen' gože'ne':

—¿Nacxe chaquen' gwza'o Jerusalén na' biņa' gacbe'edo' da' ca' ba goc lo' ciudan'? iTozo' le' zo' Jerusalén na' biņa' gacbe'edo'!

<sup>19</sup>Na' Jesúsen' gože' legaque':

—¿Bi goquen' žale ca'?

Nach gose'ene':

—Dan' goc che Jesús bene'

Nazaret. Goque' to bene' gwseła' Dios cont be'e xtižen', na' Diosen' len benachen' besyebede' yela' guac chen' dan' blo'e na' diža' dan' be'e.

<sup>20</sup>Perw na' bxoz gwnabia' checho ca' len bene' ca' chesenabia' nación chechon' gosone' le' lo na' bene' ca' gosechoglagüe' che' cheyala' gate', na' bosode'e le' le'e yag cruz. <sup>21</sup>Ba goc šone ža na'a goc da' quinga. Na' neto' gwzoato' lez Diosen' gwsele' le' cont yebeje' nación checho lo da' malen'. <sup>22</sup>Na' no'ol ca' zjanac txen len neto', bałe' goso'e diža' da' chebaneto', ja'aque' cho'a ban' be'e <sup>23</sup>na' bitw besyeželde' cuerp che'na'. Cate' besyela'aque' gosene' besele'eda'ogüede' angl' bene' gose'e legaque' ba bebane' ladjo bene' guat ca'. <sup>24</sup>Na' ľecze to chop bene' byo bene' ca' zjanaque' txen len neto' ja'aque' cho'a ban' na' besele'ede'

cayanen' gosena no'ol ca' naquen, perw bi besele'ede' Jesúsena'.

<sup>25</sup>Na' gož Jesúsena' legaque':

—Nyaše'chguaze le'e bi chejni'ile na' bi chejle'le yogo' dan' bosozoj bene' ca' gwsela' Diosena' gosoe xtižen' cani'. <sup>26</sup>¿Chaquele bi cheyala' gac dan' ba goca'? Cristo ben' gwlej Diosena' cont yedenabi'e, benen byen gwzaca'zi'e yogo' da' quinga ba goc, perw yeyoža' la'laon naque' bene' zaca' juisyw.

<sup>27</sup>Na' be'e diža' len legaque' bsed blo'ede' legaque' yogo' dan' nyoj che'na' le'e Xtiža' Diosena', gwzolaoteque' len dan' bzoj da' Moisés na' len dan' bosozoj yezica'chle bene' gwsela' Diosena' gosoe xtižen' cani'.

<sup>28</sup>Na' besežine' ga'la'ze yežen' gan' zja'aquen', na' Jesúsena' bene' ca' chon bene' šejch yelate' zito'ch.

<sup>29</sup>Perw bene' ca' gosone' byen yega'ane' len legaque', gosene':

—Yega'anczo' len neto', le ba chal na' ba nac bagwže' par šejo'.

Na' gwyo'e cont yega'anlene' legaque'. <sup>30</sup>Na' šlac zjachi'e cho'a mesen' txen, Jesúsena' gwxi'e yetextilen' na' be'e yela' choxclen che Diosena' na' bzojjen' bnežjuen' legaque'. <sup>31</sup>Cana'ch gosacbe'ede' le'na'. Na' šlac ne' nite' ca' con benite'. <sup>32</sup>Nach gose' lježgaque': —Leca bebe lažda'ochon' cate' be'lene' chio' diža' chanez na' bsed blo'ede' chio' can' nyojen che' le'e Xtiža' Diosena'.

<sup>33</sup>Na' la' besyeya'actie' jaya'aque' Jerusalenna' na' besyežine' gan' zjandop zjanžag postlw ca' šnej len bene' ca' yezica'chle. <sup>34</sup>Na' bene' šnej ca' gosoe bene' ca' za' besyežin:

—Da' licze ba beban Xanchon'. Ba blo'elagüe' Simónna'.

<sup>35</sup>Nach bene' ca' chop gosoe' legaque' dan' goc šlac zjangüe'e nezen', na' gosoe' legaque' besyeyombi'e le' cate' bzojxe' yetextilen' cont yesagüen'.

**Jesúsena' blo'elagüe' bene' ca' zjanaque' le' txen**

(Mt. 28:16-20; Mr. 16:14-18; Jn. 20:19-23)

<sup>36</sup>Ne' cheso'e'te' dižan' ca', cate'cze gwzecha Jesúsena' gachol. Nach gože' legaque':

—Le soa binlo len xbab dan' yo'o lo' yichjlažda'olen'.

<sup>37</sup>Perw leca besežebe' na' besyebande', gosacde' še chesele'ede' bxin che da' bene' guata'. <sup>38</sup>Nach Jesúsena' gože' legaque':

—¿Bichen' chacle tole? na' ¿bichen' chonle xbab ca' lo' yichjlažda'olen'?

<sup>39</sup>Le na'šc ni'a na' nga cont gacbe'ele nedan'. Le can neda' cont gacbe'ele. Šaca' naca' bene' guat, bi nac žit bela' chia' ca' dan' chle'ele nga.

<sup>40</sup>Beyož gwne' ca', blo'ede' legaque' ni'a ne'e ca'. <sup>41</sup>Na' legaque' bina' yeyož yesejle'e catec chesyebande' na' catec chesyebede'. Nach Jesúsena' gože' legaque':

—¿De late' da' gagua'?

<sup>42</sup>Nach bosonežjue'ne' late' yid bel gagüe' na' late' chixe beser da' yože šina'ba'. <sup>43</sup>Gwxi'en na' gwdagüen' laogaquen'. <sup>44</sup>Nach gože' legaque':

—Ba gwnia' le'e cate' ne' zoalena' le'e cheyala' gac yogo'lol da' ca' bsi' Diosena' xneze zjanyoj chia' le'e ley dan' bzoj da' Moisés, na' le'e dan' bosozoj bene' ca' gosoe xtiža' Diosena' cani', na' lecz ca' da' nyoj le'e Salmos ca'.

<sup>45</sup>Nach ben Jesúsen' cont gosejni'ide' da' ca' zjanyoj che' le'e Xtiža' Diosen'. <sup>46</sup>Na' gože' legaque': —Benen byen goc da' quinga cont goc can' nyojen žan neda' gata' na' yebana' ladjo beñe' guat yeyon ža, neda' naca' Cristo ben' gwlej Diosen' yedenabia'. <sup>47</sup>Na' le'e cheyała' güe'le xtižan' na' len beñe' že' yogo' nación. Solaotecle güe'len Jerusalén. Güe'le xtižan' nale cheyała' yesyetinje beñachen' xtoła'gaquen' cont Diosen' yezi'xene' chegaque'. <sup>48</sup>Le'e cheyała' güe'le diža' che da' quinga ba ble'ele dan' ba goc chia'. <sup>49</sup>Na' lecze sela' Spiritw che Xa' Diosen' yedesoan len le'e can' gwnen'. Na' le yega'an

lo ciuda nga na'a cuezle gon Xa' Diosen' le'e yela' guac da' za' yaba.

### Beyep Jesúsen' yaba

(Mr. 16:19-20)

<sup>50</sup>Na' Jesúsen' gwche'e legaque' ja'aque' gan' chi' yež dan' nzi' Betania na' gwlis ne'e gwnabde' Diosen' gone' cont nite' mbalaz. <sup>51</sup>Na' ca beyoža' beyepe' yaban'. <sup>52</sup>Na' beñe' ca' gosaque' le' txen besyega'ane' yešlož dao' gosonxene' Jesúsen' nach jaya'aque' Jerusalénna', chesyebchgüede'. <sup>53</sup>Na' gwnita'teze' lo' yodao' blaona' chesonxene' Diosen'. Da' na'ze chzoja' na'a.



# DIŽA' GÜEN DAN' BZOJ SAN JUAN

Jesucristo ben' nzi' Xtiža' Dios  
golje' goque' beṇaḥ

**1** Cate' gwxe yežlion' ba zoacze ben' nzi' Xtiža' Dios. Zoe' len Diosen' na' lecze naque' Dios. <sup>2</sup>Cate' gwxe yežlion' ba zoacze' len Diosen'. <sup>3</sup>Len' bene' yogo' beṇaḥ, yogo' angl, yogo' da' ca' beyac da' mal, yogo' beyixe' na' bite'teze da' dech. Bibi de da' gwxe da' bi ben ben' nzi' Xtiža' Dios. <sup>4</sup>Le' nse'e yela' mban. Na' ben' ba zjanape' yela' mban toḷi tocaṇe da' none', legaquen' ba yo'o be'ni' lo' yichjlažda'ogaquen'. <sup>5</sup>Ben' nzi' Xtiža' Dios bide' nse'e be'ni' che yichjlaždao' beṇaḥen', na' la'czla' bene' zan bi gosejnilaže'ne' na' bi gwyo'o be'ni' chen' lo' yichjlažda'ogaque', bi gosezaquede' yosocue'eje' be'ni' che'na'. <sup>6</sup>Gwzoa to bene' le Juan, na' Diosen' gwsele'ne'. <sup>7</sup>Juanna' ben' bzo'e' bene' nis bedeye'e diža' che ben' nsa' be'nin', cont yogo' beṇaḥ guac yesejnilaže'ne'. <sup>8</sup>Gague Juannan' nac bene' nsa' be'nin', san le' bedeye'e xtiža' ben' nsa' be'ni' che yichjlaždao' beṇaḥen'. <sup>9</sup>Ba bžin ža be'ni' da' nac da' dogualje ba blan' yežlio nga, na' blan' cont gwse'nin' lo' yichjlaždao' note'teze bene'.

<sup>10</sup>Ben' nzi' Xtiža' Dios zoe' yežlion' cate' gwxeten. Na' la'czla' len' bene' yežlion' ben' že' yežlion' bi gosache'ede' non' naque'. <sup>11</sup>Golje' ladjo neto' bene' gualaž che', perw zan neto' bene' gualaž che' bi gweyjele'to' chen'. <sup>12</sup>San balteze chio' gweyjele'cho che', chio' gweyje'nilaže'chone', bene' cont naccho xi'in Dios. <sup>13</sup>Na' gague lagüe goljcho nita' xaxna'cho zjanaque' bene' bela' chen ba naccho xi'in Dios. Na' gague lagüe to bene' byo gwzoalene' to no'ole ba naccho xi'in Dios, na' gague lagüe bene' byon' goclaže' soa xi'ine' ba naccho xi'in Dios, san da' chejnilaže'chone', da'nana' non Diosen' chio' xi'ine'.

<sup>14</sup>Jesucristo ben' nzi' Xtiža' Diosen' golje' goque' beṇaḥ na' gwzoe' len neto'. Na' ble'eto' naque' bene' zaca' juisyw, le togue' naque' dogualje Xi'in Dios. Leca nži'ilaže'de' chio' beṇaḥ na' bedezejni'ide' chio' diža' li che Diosen'. <sup>15</sup>Juanna' ben' bzo'e' bene' nis be'e diža' che', gwne: —Che bengan' bi'a diža' cate' gwnia: “Bene' za' za' zaca'che' ca neda', le ba zoacze le' cate' bina' soa neda!”

<sup>16</sup>Jesucriston' nži'ilaže'chgüede' yogo' chio' chejnilaže'chone' na'

zoacze' chaclenchgüe' chio'. <sup>17</sup>Da' Moisésen' bzejni'ide' da' xozxta'o neto' bene' Israel ley che Diosen' na' chlo'en yogo'cho napcho doła', na' Jesucriston' bedelo'ede' nži'ilaže' Diosen' chio' benač na' bedzejni'ide' chio' diža' li che Diosen'. <sup>18</sup>Nono na' soa bene' ba ble'ede' Diosen'. Toz ben' nac dogualje Xi'in Dios bene' tliša' ba bzejni'ide' chio' benač can' nac yichjlaždao' Diosen', le chacchgüe Diosen' le'.

**Juan ben' bzoe' bene' nis be'e xtiža' Jesúsen'**

(Mt. 3:11-12; Mr. 1:7-8; Lc. 3:15-17)

<sup>19</sup>Bene' chesenabi'e nación Israel cheton' bene' že' Jerusalén gososele' to chope b̄xoz na' yeba'le bene' gosaljē lo diaža che da' Leví cont gosenabde' Juanna' non' naque'.

<sup>20</sup>Na' Juanna' bi bedi'ide', be'e diža' li gože' legaque':

—Gague nedan' Cristo ben' chbezcho sela' Diosen' yedenabi'e nación chechon'.

<sup>21</sup>Nach gose'ene':

—¿Nox naco'? ¿Naco' da' Elías ben' be' xtiža' Diosen' cani'?

Na' gože' legaque':

—Bi naca' le'.

Nach gosenabde' le':

—¿Naco' ben' naquen yide' yedeye'lene' neto' xtiža' Diosen'?

Na' boži'en gwne':

—Bi naca'.

<sup>22</sup>Nach da' yoble gosenabde' le':

—¿Non' naco'? cont ye'to' bene' ca' gosesele' neto'. ¿Bi ža' togo' che cuino'?

<sup>23</sup>Nach Juanna' gože' legaque':

—Neda' naca' ben' chne' ziže' to latje daš, žia': "Le gwža'

yichjlažda'olen' cont gwzenagle che Xanchon' cate' yide'", can' gwna da' Isaías ben' be' xtiža' Diosen' cani'.

<sup>24</sup>Bene' ca' ja'ac lao Juanna', bene' fariseo ca' gosesele' legaque'. <sup>25</sup>Nach gose'ene':

—¿Bixchen' chzo' bene' nis še bi naco' Criston' nēca naco' Elíasen' na' nēca naco' ben' chbezcho yedeye'e xtiža' Diosen'?

<sup>26</sup>Nach Juanna' gože' legaque':

—Neda' chzoa' bene' nis, na' gachol' le'e ba zoa to bene' bina' gombia'le. <sup>27</sup>Len' za' gwlo'elagüe' na' zaca'che' ca neda', na' da' nacchgüe' bene' zaca' bitw zaca' gona xmandadoe' lechja' no xele'.

<sup>28</sup>Yogo' da' quinga goquen gan' nzi' Betábara dan' chi' yešla'a yegw Jordán gan' chzoa' Juanna' bene' nis.

**Jesúsen' yeque'e xtoła' benačhen'**

<sup>29</sup>Na' beteyo Juanna' ble'ede' zej Jesúsen' gan' zoen' na' gože' ben' chosozenag che':

—Le na' ben' za' nga, Diosen' ba gwsele'ne' cont yeque'e xtoła' benačhen'. Bena' zaca'lebe' ca xila' dao' ben' chot chio' bene' Israel cont Diosen' chezi'xene' xtoła'chon'.

<sup>30</sup>Che len' bi'a diža', gwnia': "Ben' za' za' zaca'che' ca neda', na' le' ba zoacze' cate' bina' soa' neda'."

<sup>31</sup>Neda' bi gocbe'eda' non' naque' perw Diosen' bzejni'ide' neda', na' da'nan' zedezoa' bene' nis cont yogo' chio' bene' Israel gacbe'echo non' naque'.

<sup>32</sup>Juanna' lecze' gwne':

—Ble'eda' cate' betj Spiritw che Diosen' yaban' bžinen gan' zoa Jesúsen'. Bžinen ca to ngolbex na' bega'anen len le'. <sup>33</sup>Neda' bi

gocbe'eda' še Jesús nan' naque'  
ben' gwsel̥a' Diosen', nach Dios  
ben' gwsel̥e' neda' chzoa' bene' nis  
gože'nda': "Le'edo' yetj Spiritw ch̥ia'  
na' yega'anen len bene' ba mbeja'.  
Len' naque' bene' gon cont soa  
Spiritw ch̥ian' lo' yichjlaždao' bene'  
na' nabian' legaque.'" <sup>34</sup>Ba ble'eda'  
goc can' gwne' na' cho'a diža' le  
bengan' Xi'in̥ Dios.

**Bene' nechw ca' gwlej Jesús'en'  
cont gosaque' le' txen**

<sup>35</sup>Beteyo Juan ben' bzoa bene' nis  
zeche' da' yoble len yechope bene'  
zjanaque' txen len le'. <sup>36</sup>Na' cate'  
ble'ede' gwde Jesús'en', nach gože'  
bene' ca':

—Le na' ben' gwsel̥a' Diosen' ben'  
zaca'lebe' ca xila' dao' ben' chot chio'  
bene' Israel cont Diosen' chezi'xene'  
xtola'chon'.

<sup>37</sup>Na' cate' bene' ca' chope, ben'  
zjanaque' txen len Juanna', gosende'  
can' gwnen' nach ja'aclene' Jesús'en'.  
<sup>38</sup>Nach beyechj Jesús'en' na' gwne'e  
legaque' zjana'ogüe'ne', na' gože'  
legaque':

—¿Bi chaclaže'le?

Na' gose'ene':

—Maestrw, ¿gan' zo'?

<sup>39</sup>Nach gože' legaque':

—Le šo'o na' le'le.

Nach ja'aclene'ne' na' besele'ede'  
gan' zoen', na' besyega'anlene' le'  
žana', le ba nac bagwže', ca do  
cheda tap.

<sup>40</sup>Na ca nac bene' ca' chope'  
bosozenag xtiža' Juanna' na'  
gosa'ogüe' Jesús'en', toe' Andrés, bene'  
biše' Simón Pedro. <sup>41</sup>Na' Andrésen' za'  
gone' bichle da' za' gone' na' jel̥ güiže'  
Simón bišen' na' gože' le':

—Ba bežaglaoto' ben' chesene'  
Mesías, ben' ba gwlezcho yide'  
yedenabi'e nación Israel chechon'. —  
Na' Mesías zeje diža' Cristo.

<sup>42</sup>Nach Andrésen' gwče'e bene'  
bišen' gan' zoa Jesús'en'. Na' cate'  
Jesús'en' ble'ede' Simónna' gože'ne':  
—Len' Simón xi'in̥ Jonás. Perw  
yososi' bene' le' Cefas. (Na' Cefas  
zeje diža' Pedro.)

**Jesús'en' gwleje' Felipe na' Natanael  
cont bsed blo'ede' legaque'**

<sup>43</sup>Beteyo Jesús'en' gwchoglagüen'  
yeyeje' Galilean' na' j̥ane'e Felipen'  
na' gože'ne':

—Yo'o len neda'.

<sup>44</sup>Felipen' goque' bene' Betsaida  
gan' nac laž Andrésen' len Pedron'.  
<sup>45</sup>Nach Felipen' j̥ane'e Natanaelen'  
na' gože'ne':

—Bač ble'eto' ben' bzoj da'  
Moisésen' xtižen' le'e da' ca' gan'  
bzoje' ley chechon', na' lecze  
xtiže'na' bosozoj bene' ca' gosole'  
xtiža' Diosen' cani'. Len' Jesús bene'  
Nazaret, ben' nac xi'in̥ José.

<sup>46</sup>Nach Natanaelen' gože'ne':

—¿Bat benecho yesene' Nazaret na'  
choj bene' zaca'?

Nach gož Felipen' le':

—Yo'o cont le'edo'.

<sup>47</sup>Na' Jesús'en' ble'ede' bač zej  
Natanaelen' gan' zoe'na' nach gwne':  
—Na' za' to bene' Israel gualaž  
chechon' bene' naque' bene' güen.  
Ne late'ze bi naque' bene' gwxiye'.

<sup>48</sup>Natanaelen' bende' xtiža'  
Jesús'en' na' gože'ne':

—¿Nac chac nombi'o neda?

Na' Jesús'en' gože'ne':

—Ble'eda' le' šlac zechao' xan yag  
yixgüigw cate' za' ne Felipen' le'.

<sup>49</sup>Nach Natanaelen' gwne':

—Maestrw, len' naco' dogualje Xi'in Dios. Len' naco' ben' chbezto' sel'a' Diosen' yedenabi'o nación Israel chechon'.

<sup>50</sup>Na' Jesúsen' gože'ne':

—¿Da' gwnia' ble'eda' le' xan yag yixgüigw nan' chejli'o chia'? Da' zaca'ch ca da' quinga za' le'edo'.

<sup>51</sup>Da' li chnia', le'ele yaban' gan' zoa Diosen' gaquen ca to da' chyaljo na' bene' ca' zjanac angl che' chep chetj yesaque' yežlio gan' zoa' nga, le neda' naca' ben' gwse'la' Dios golja' benach.

**Gota' to yela' güešagna'  
yež da' nzi' Caná**

**2** Beyon ža gota' to yela' güešagna' yež da' nzi' Caná gan' mbane distritw Galilea. Na' xna' Jesúsen' gwyeye' liž ben' gan' gota' yela' güešagna'na'. <sup>2</sup>Na' lecze gosaxe' Jesúsen' len bene' ca' zjanaque' le' txen cont ja'aque' gan' chac yela' güešagnan'. <sup>3</sup>Na' bebiž vino dan' chese'ej bene' ca' že'na', na' xna' Jesúsen' gože' le':

—Bich bi vino chegaque' de.

<sup>4</sup>Na' gož Jesúsen' le':

—¿Bixchen' žo' ca'? le bina' žin hor gwlo'a non' naca'.

<sup>5</sup>Na' xne'ena' gože' bene' ca' cheson mandadon':

—Le gon bite'tez da' ne'.

<sup>6</sup>Na' nita' xop yeso' de yej ga chož nis da' chosočin bene' Israel gualaž cheto' ca' par chesa' cheseyib cuine' can' ža ley cheton'. Na' to to yej ca' chožen do xono' che'e o do ši che'e nis. <sup>7</sup>Nach Jesúsen' gože' bene' güen mandadw ca':

—Le yosša' yeso' yej ca' nis.

Na' gosegue'en nis goseža'ten.

<sup>8</sup>Nach gože' legaque':

—Le gaše' laten' na'a na' le šjanežjon ben' yo'o lo ne'e ljin'.

Na' gosone' can' gwnen'. <sup>9</sup>Na' ben' yo'o lo ne'e ljin' con bnixen' bi nežde' gan' zan', con bene' ca' cheson mandadw na'ze gosenezde' nisen' beyaquen vino, le legaquen' gosaše' nisen'. Na' bena' bnixen' na' goxe' bene' byo ben' bšagnan', <sup>10</sup>na' gože'ne':

—Yogo'ze bene' chon lni chdie' vino güen da' chzaca' la'ay cate' chzolao ljin', na' cate' ba zjane'eje' da' zil nach cho'e legaque' da' corrient. San le' bzago' vino šagüen' chdion' na'a ba cheyož ljin'.

<sup>11</sup>Da' nga ben Jesúsen' yež Caná distritw Galilea goquen yela' guac nechw da' bene' cont blo'e naque' bene' zaca'chgua, nach bene' ca' gwleje' cont gosaque' le' txen gosejnilaže'ne'.

<sup>12</sup>Gwde na' Jesúsen' gwyeye' Capernaum len xne'e na' len bene' biše' ca', na' len bene' ca' zjanaque' le' txen, na' besyega'ane' na' chop šone ža.

**Jesúsen' bebeje' bene' cheson ya'a  
chyo'o yodao' blao**

(Mt. 21:12-13; Mr. 11:15-18; Lc. 19:45-46)

<sup>13</sup>Na' ba zoa gala' lni che neto' bene' Israel da' nzi' pascw, nach Jesúsen' gwyeye' Jerusalén len bene' ca' zjanaque' le' txen. <sup>14</sup>Cate' bžine' chyo'o yodao' blaon' bene' zan že' chesote' go'n na' xila' na' ngolbex, na' zjachi' bene' chosoše'e mechw. <sup>15</sup>Jesúsen' ble'ede' can' chaca' na' bene' to tašjw de do na' bčhinen' cont bebeje' yog'o' bene' ca'

že' chy'o yodaon', len xila' ca', len go'n ca', na' beslase' xmechw bene' chosoša' mechon' na' gwlo'on'i'ane'e xmesgaquen'. <sup>16</sup>Na' gože' bene' ca' chesote' ngolbexen':

—Le yebej yogo' be qui nga. Bi gonle ya'a liž Xa' nga.

<sup>17</sup>Nach bene' ca' zjanaque' le' txen jaseza'laže' can' nyoj Xtiža' Diosen' gan' žan: “Da' chi'chgua yichja' che ližon' chonten ga saca'zi'chgua.”

<sup>18</sup>Na' ben' chesenabia' nación Israel cheton' gose'ene':

—¿Bi yela' guac gono' da' le'eto' cont šejle'to' zaco' bebejo' bene' ca'?

<sup>19</sup>Jesúsen' boži'e xtiža'gaquen' gwne':

—Le yochinj yodao' nga na' šone žaze yeyonan'.

<sup>20</sup>Nach bene' gwnabia' ca' gose'ene':

—Xopeyon iz byažjen gosone' yodao' nga, ¿chacdo' guac yeyonon' šone žaze?

<sup>21</sup>Perw Jesúsen' bsaca'lebde' cuerp chen' yodao' cate' gwne' ca', na' legaque' gosone' xbab che yodao' na'zen' gwne' ca'. <sup>22</sup>Na' cate' bžin ža beyas bebane' ladjo bene' guat ca', bene' ca' zjanaque' le' txen jaseza'laže' can' gwnen' na' gosejle'e Xtiža' Diosen' dan' nyoj che' na' lecze gosejle'e xtiža' Jesúsen'.

**Jesúsen' nezde' bin' yo'o lo' yichjlaždao' benačen'**

<sup>23</sup>Šlac gwzoa Jesúsen' Jerusalénna' lo lni pascon' bene' zan besele'ede' yela' guac ca' dan' benen' na' gosejle'e naque' bene' gwseła' Dios. <sup>24</sup>Perw Jesúsen' bi ben cuine' lo na'gaque', le nombi'e yichjlaždao' benačen'. <sup>25</sup>Bi byažjde' no ye'

le' xbab da' yo'o lo' yichjlaždao' bene' ca'. Le nezeczede' bin' yo'o lo' yichjlaždao' to to chio' benačh.

**Jesúsen' len Nicodemo**

**3** Na' gwzoa to bene' fariseo bene' le' Nicodemo. Goque' to bene' gwnabia' che nación Israel cheton'. <sup>2</sup>Gwyeje' lao Jesúsen' šeže'le na' gože'ne':

—Maestrw, nezeto' Diosen' gwsele' le' cont chzejni'ido' neto', le nono gac gon yela' guac ca' dan' chonon' še bi zoa Diosen' len le'.

<sup>3</sup>Na' gož Jesúsen' le':

—Da' li chnia' le', še non' bi galje yeto bi gac šjayzoe' gan' zoa Diosen' chnabi'e.

<sup>4</sup>Nach gož Nicodemon' le':

—¿Nac gon to bene' galje' še' ba naque' bene' gole? ¿Guaquech yeyo'e lo' le'e xne'en' cont galje' yeto?

<sup>5</sup>Na' Jesúsen' gozne':

—Chnia' le'e to da' zejen, še non' bi galje' len nis na' len Spiritw che Diosen', bi gac šjayzoe' gan' zoa Diosen' chnabi'e. <sup>6</sup>Bene' zjanaque' bela' chen chesenita' xi'ingaque' lecze bi' bela' chen. Na' Spiritw che Diosen' chnežjon yela' mban toli tocane che bene' chesejnlaže' Diosen'. Da'nana' žacho chesalje' yeto. <sup>7</sup>Bi yebando' dan' gwnia' chonen byen yogo' bene' galje' yeto. <sup>8</sup>Cate' chechj be' chechjen gate'teze, na' chendo' chołyoyen perw bi nezdo' ga zan' na' neca nezdo' ga šejen. Ca'czen' naquen len yogo' bene' chon Spiritw che Diosen' cont chesalje' da' yoble. Bi chle'echo da' chon Spiriton' perw nacbia' ba bocoben yichjlažda'ogaque'.

<sup>9</sup>Nach Nicodemon' gože'ne':

—¿Nacxe gac can' žo' nga?

<sup>10</sup>Na' gož Jesús'en le':

—Le' chsed chlo'edo' beñe' Israel gualaž chechon' xtiža' Diosen', ¿bi chejni'ido' da' quinga? <sup>11</sup>Da' li neto' chyixjue'eto' da' nezeto' na' choe'to' diža' che da' ba ble'eto' na' bi chejle'le. <sup>12</sup>Ba bia' diža' che dan' chac yežlio nga na' bi chejle'ele. ¿Nac gac šejle'le še nia' le'e da' chac yaban'?

<sup>13</sup>Toze neda' naca' ben' gwseļa' Diosen' golja' beñach za'a yaba na' noch no zoa no ba beyep yaba cont nezde' che Diosen'. <sup>14</sup>Na' can' goc latje daš cani' cate' gwļis da' Moisés'en beļ de bronce bde'eba' to le'e yag, can' cheyaļa' gac yeselise' neda' to le'e yag, neda' gwseļa' Diosen' golja' beñach. <sup>15</sup>Na' gac chia' ca' cont note'teze beñe' yesejnilaže' neda' bi cuiaye'e san gata' yela' mban che' toļi tocaņe.

### Chaque Diosen' beñachen'

<sup>16</sup>Leća chaque Diosen' chio' beñach, na' gwseļa' Xi'ine' beñe' tliša' cont note'tez beñe' chejnilaže'ne' bi cuiaye'e, san gata' yela' mban che' toļi tocaņe. <sup>17</sup>Na' Diosen' gwseļe' Xi'in'en' yežlio nga gague cont gwnežjue' castigw che xtoļa' beñachen', san cont gwnežjue' yela' mban chegaque' toļi tocaņe.

<sup>18</sup>Note'tez beñe' chesejnilaže' Xi'in' Diosen' beñe' tlišan', bi yesezi'e castigw che xtoļa'gaquen', perw beñe' bi chesejnilaže'ne' ba nchoglaon chegaque' yesezaca'zi'e toļi tocaņe da' bi chesejnilaže' Xi'in' Dios beñe' tlišan'. <sup>19</sup>Na' can' naquen, beñe' bi chesejnilaže' Xi'in'

Diosen' ba nchoglaon chegaque' yesezaca'zi'e toļi tocaņe. Nchoglaon yesezacazi'e, le ba bid Xi'in' Diosen' nse'e be'ni' che yichjlaždao' beñachen' perw na' chesyebchde' dan' nac choļ clel ca be'ni' chen', dan' chesone' da' malen'. <sup>20</sup>Yogo' beñe' cheson da' mal chesegue'ede' be'ni' chen' na' bi chesazlaže' yosozenague' che' cont bi gwlo'elaon še chesone' da' mal. <sup>21</sup>San note'tez beñe' cheson can' ža diža' li che Diosen', chesyebede' chosozenague' che Criston', le chlo'en zoacze Diosen' chaclene' legaque' cont chesone' can' ža diža' li chen'.

### Juan ben' bzoa beñe' nis be'che' diža' che Jesús'en'

<sup>22</sup>Gwde na' Jesús'en' len beñe' ca' zjanaque' le' txen ja'aque' yež dao' ca' zjachi' gan' mbane distritw Judean'. Na' šlac gosenite' na' bosozoe' beñe' nis. <sup>23</sup>Na' Juanna' lecze bzoe' beñe' nis yež gan' nzi' Enón da' chi' gaļa'ze Salim, le na' dechgua nis. Na' ja'ac beñe' gan' gwzoen' cont bzoe' legaque' nis. <sup>24</sup>Caten' bina' yeseyixjue' Juanna' ližyan' goc ca'.

<sup>25</sup>Nach gwche' to žaš len beñe' ca' zjanaque' txen len Juanna' na' yeto chope beñe' Israel gualaž cheto' che dan' chesezoa beñe' nis. <sup>26</sup>Nach ja'aque' lao Juanna' na' gose'ene': —Maestrw, ben' gwzoa len le' yešļa'a yegw Jordánna', ben' cho'o xtižen', bach chzoe' beñe' nis na' yogo'ze beñe' chja'aque' gan' zoe'na'.

<sup>27</sup>Nach Juanna' gože' legaque': —Nono gaxcene' še bi gon Diosen' cont yesonxen beñe' le'. <sup>28</sup>Nezczele can' ba gwnian', bi naca' Cristo ben'

chbezcho seļa' Diosen' yedenabi'e chio', san naca' ben' gwseļa' Diosen' cont bia' xtižen' žialaole. <sup>29</sup>Cate' chac to yela' güešagna', toz bene' byo ben' chšagnan' chzi'e no'olen'. Perw še zoa bene' migw che' len le' ža'na, chebede' cate' ben' chšagnan' že' zoe' mbalaz. Can' chac len neda', chbechgüeda' bene' zan chosozenague' che Criston'. <sup>30</sup>Len' cheyaļa' šejch yesonxen bene' le' na' neda' cheyaļa' šejch yesanlaže' neda'.

#### Bene' za' gan' zoa Diosen'

<sup>31</sup>Ca nac Cristo ben' za' gan' zoa Diosen', le' naque' bene' zacach ca yogo'lol bene'. Yezica'chle benach zjanaque' bene' che yežlio ngaze na' che yežlio ngaze cheso'e diža'. Perw na' Cristo ben' za' gan' zoa Diosen' zaca'che' ca yogo'lol bene'. <sup>32</sup>Le' cho'e diža' che da' ca' ba ble'ede' na' diža' da' ba bende' gan' zoa Diosen', na' nono chzenag xtižen'. <sup>33</sup>Na' note'tez bene' chosozenag xtiža' ben' za' gan' zoa Diosen', nacbia' bena' nezde' Diosen' cho'e diža' li. <sup>34</sup>Na' bena' gwseļa' Diosen', bena' za' gan' zoe'na', len' cho'e xtiža' Diosen', le' Spiritw che Diosen' zoan len le', na' cate' Diosen' chone' Spiritw chen' bi chyisen' late' güeje. <sup>35</sup>Diosen' chacde' Xi'ine' Criston' na' ba bene' lo' ne'e yogo'lol da' de yežlion'. <sup>36</sup>Na' bene' ca' chesejnlaže' Xi'in Diosen' de yela' mban chegaque' toli' tocaņe, san bene' cheson güedenag len Xi'in Diosen', bi gata' yela' mban chegaque', le' Diosen' gone' cont yesezaca'zi'e toli' tocaņe.

#### Jesúsen' be'e diža' len to no'ole Samaria

**4** <sup>1-3</sup>Na' goquen' bene' zanch chosozenague' che Jesúsen'

ca bene' chosozenag che Juanna', na' bene' zanch chesezoa nis len Jesúsen' ca bene' chesezoa nis len Juanna', la'czļa' gague cuin Jesúsen' bzoe' bene' nis, bene' ca' zjanaque' le' txen gosonen'. Nach cate' Jesúsen' gwnezde' bene' fariseo ca' gosacbe'ede' bene' zanch zjana'ogüe' le', nach beze'e distritw Judean' na' beyeje' distritw Galilean' len bene' ca' zjanaque' le' txen.

<sup>4</sup>Na' benen byen zjaya'aque' nez da' chde Samaritan'. <sup>5</sup>Ca' goquen' besežine' to yež da' nzi' Sicar lo' distritw Samaritan'. Yežen' chega'anen gaļa'ze gan' de yežlio dan' bnežjw da' Jacob da' xi'ine' José. <sup>6-8</sup>Na' žia to bej da' nacchgua sitjw da' nzi' Bej che da' Jacob. Ca do guagwbiz Jesúsen' ba chjaxaquede' ngüe'e nezen' nach gwchi'e cho'a bejen'. Na' bene' ca' zjanaque' le' txen ba zja'aque' lagüe yežen' zjasexi'e da' yesagüe' len le', cate' bžin to no'ole Samaria cho'a bejen' cont güe'e nis. Na' Jesúsen' gože'ne':

—Ben late' nis ye'ja'.

<sup>9</sup>Na' no'ole Samaritan' boži'en gože'ne':

—¿Nacxečen' le' naco' bene' Israel chnabdo' neda' nis ye'ejo'? le' no'ole Samaria neda'.

(Na' ca nac bene' Israel gualaž cheto' ca', bi cheseņe lježe' len bene' Samaria ca'.) <sup>10</sup>Nach Jesúsen' gože'ne':

—Neda' ba goša' le': “Ben late' nis ye'ja'”, na' šaca' nezdo' da' chaclaže' Diosen' gone' le' na' šaca' chacbe'edo' non' naca' neda', ba gwñabdon' neda' na' ba beņa' le' nis da' chon yela' mban toli' tocaņe šaca'.



<sup>11</sup>Na' no'olen' gože'ne':

—Bene', bi noxo' bi gaše'don' na' bej nga naquen sitjw. ¿Gaxe si'o nis da' chon yela' mbanna' žo' ca'? <sup>12</sup>¿Chacdo' zaca'cho' ca da' xozxta'ocho Jacob ben' bocua'an len neto' bej nga gan' güe'eje' len xi'ine' ca' na' len beyixe' che' ca'?

<sup>13</sup>Gož Jesús'en' le':

—Note'tez bene' ye'ej nis che bej nga bia'cze bilde' da' yoble.

<sup>14</sup>Na' note'tez bene' ye'ej nisen' gwnežjua'ne' neda', gwbatech bilđen da' yoble, le dan' gwnežjua'nen' gaquen lo' lažda'ogüe' ca to latje ga chaldi nis cont gata' yela' mban che' toli tocane.

<sup>15</sup>Na' no'olen' gože'ne':

—Bene', ben neda' nisen' žo' ca' cont bich bilđan' na' bich yida' dexian' nga.

<sup>16</sup>Jesús'en' gože'ne':

—Beyej jel' güiž bene' chio' na' le da nga.

<sup>17</sup>Nach gože' Jesús'en':

—Notno bene' chia' zoa.

Na' Jesús'en' gože' no'olen':

—Ledo' can' gwnaon' nono bene' chio' zoa, <sup>18</sup>le gayo' bene' chio' ba gwnita' na' bene' zoaleno' na'a gague naque' bene' chio'. Da' li can' ba gwnaon'.

<sup>19</sup>Na' gož no'olen' le':

—Bene', chache'eda' naco' to bene' chac chyixjue'ede' bi da' ža Diosen'.

<sup>20</sup>Da' xozxta'o neto' bene' Samaria gosonxene' Diosen' lo ya'an zoa nga, na' le'e nacle bene' Israel žale Jerusalenna' cheyala' gonxenchone'.

<sup>21</sup>Jesús'en' boži'en' gože'ne':

—No'ole, gwyejle' chia', gwžin ža cate' bi gonen byen gonxenle Diosen' lo ya'a nga ne Jerusalenna'.

<sup>22</sup>Le'e nacle bene' Samaria bi nombia'ya'ne'le Dios ben' chonxenle. Neto' bene' Israel nombia'to' Dios ben' chonxento', na' ladjo' neto' bene' Israel choj ben' yebej benachen' lo da' malen'. <sup>23</sup>Chžin ža na' na'a ba gole', cate' bene' yesonxene' Xacho Diosen' can' cheyala'cze yesonxene' le', gate'tez nite', lo' yichjlažda'ogaquen' yesonxene' bene' naque' dogualje Dios, le Xacho Diosen' cheyiljue' bene' yesonxene' le' ca'. <sup>24</sup>Diosen' bi naque' bene' bela' chen, naque' spiritiw. Da'nan' bene' yesonxen le', lo' yichjlažda'ogaque' cheyala' yesonxene' bene' nac dogualje Dios.

<sup>25</sup>Nach no'olen' gože'ne':

—Nezda' yid ben' ba gwlej Diosen' cont yedenabi'e chio', ben' nzi' Mesías o Cristo, na' cate' le' yide' yedezejni'ide' chio' yogo' da' quinga.

<sup>26</sup>Nach Jesús'en' gože' no'olen':

—Neda' choe'lena' le' diža' naca' ben' žo' ca'.

<sup>27</sup>Ne' choe'lente Jesús'en' no'olen' dižan' cate' bene' ca' zjanaque' le' txen besyežine' cho'a bejen'. Na' besyebande' choe'lene' to no'ole diža', perw ne toe' bi gosenabde'ne' bi dižan' choe'lene' no'olen' o bixchen' chšaljlene' le'. <sup>28</sup>Nach no'olen' bocua'an' che'e nis chen' na' beyeje' lo yežen' jayeže' bene' gualaž che' ca':

<sup>29</sup>—Le šo'o le na' to bene' ba gože' neda' yogo'te da' ba bena'. ¿Še bengan' Cristo ben' chbezcho yedenabi'e?

<sup>30</sup>Na' besežaše' yežen' ja'aque' gan' chi' Jesús'en'. <sup>31</sup>Na' šlac zjayda no'olen', bene' ca' zjanaque' Jesús'en' txen gosata'yoede' le', chese'ene':

—Maestrw, gwdagw.

<sup>32</sup>Na' Jesúsen' gože' legaque':

—Bi nezele de to yela' guagw chia'.

<sup>33</sup>Na' gose' lježe':

—¿Gague ba bedesesan bene' da' gwdagüe'?

<sup>34</sup>Na' gož Jesúsen' legaque':

—Len neda' naquen ca to yela' guagw chona' can' chazlaže' Dios ben' gwseła' neda' cont gac yogo' da' chnalaže'. <sup>35</sup>Le'e žale: “Ne' dech yetap bio' cont yedobe cosešen.” Na' neda' chnia', le na' na' le'ele to coseš da' chyažje yedob na'a. <sup>36</sup>De da' goncho na'a cont bene' yosozenague' che Diosen' na' gata' yela' mban chegaque' toli' tocanē. Na' bene' cheseyixjue'ede' xtiža' Diosen' na' lente bene' chesone' cont yosozenag bene' xtižen' txen yesenite' mbalaz.

<sup>37</sup>Diža' nga naquen da' li, žan: “Bene' yoble chaz na' bene' yoble chelap.” <sup>38</sup>Bach chseła' le'e šjaylaple gan' bi gozle, le le'e gonle cont yosozenag bene' xtiža' Diosen' dan' ba goseyixjue'e bene' yoble.

<sup>39</sup>Na' ca nac bene' yež Sicar ga mbane Samaria, zane' gosejnilaže' Jesúsen' da' gosende' gwna no'olen': “Ba gože' neda' yogo' da' ba bena'.”

<sup>40</sup>Nachen' besežin bene' Sicaren' gan' chi' Jesúsen' gosata'yoede' le' yega'anlene' legaque', na' bega'ane' chope ža. <sup>41</sup>Na' bene' zanch gosejnilaže' Jesúsen' cate' gosende' diža' da' be' cuine'. <sup>42</sup>Nach gose'e no'olen':

—Bach chejle'to' na'a, gague dan' bzenagto' xtižo' na'ze, san da' ba beneto' choe' cuine' dižan', na' nezeto' bengan' Cristo ben' gwlej Diosen' cont yebeje' benachen' lo da' malen'.

Jesúsen' beyone' xi'in  
to bene' gwnabia'

<sup>43</sup>Na' cate' goc chop ža, Jesúsen' len bene' ca' zjanaque' le' txen gosa'aque' jaya'aque' Galilea. <sup>44</sup>Le cuin Jesúsen' ba gwne' note'teze bene' cho'e xtiža' Diosen', bi chesonla'ancze bene' gualaž chen' le'. <sup>45</sup>Na' cate' besežine' Galilean' bene' gualaž chegaquen' bosolebe' Jesúsen' dan' ba besele'ede' yogo' da' güen da' bene' Jerusalenna' lo ljin', le lencze legaque' ja'aque' lnina'.

<sup>46</sup>Na' gozej Jesúsen' yetni'a yež Caná dan' chi' distritw Galilea gan' bene' cont nisen' beyaquen vino. Na' yež Capernaum gwzoa to bene' gwnabia' bene' chon žin che rey, na' chacšenchgüe xi'ine'. <sup>47</sup>Xa bi'na' cate' bende' ba bežin Jesúsen' Galilean' zeze'e Judean', nach gwyeje' lao Jesúsen' gwneyoede' le' šeje' šjayene' xi'inen', le ba zoa gatbe'. <sup>48</sup>Na' Jesúsen' gože'ne': —Še bi chle'ele yela' guac na' bichle da' zaca' yebanele, bi chejle'le chia'.

<sup>49</sup>Nach ben' chon žin che reyen' gota'yoede' le' gwne':

—Bene', yo'ošca šlac bina' gat bi' chian'.

<sup>50</sup>Na' Jesúsen' gože'ne':

—Beyej ližo', bi gat bi' chion'.

Nach gwyejle' bena' dan' gož Jesúsen' le' na' beze'e. <sup>51</sup>Ba zoa yežine' cate' jasešag xmose' ca' le' na' gose'ene':

—Ba beyac bi' chion'.

<sup>52</sup>Na' gwñabde' legaque' bi hor gwzolao beša'alaže'be', na' gose'e le': —Neje cheda to gwde guagwbiž bechojbe' da' lan'.

<sup>53</sup>Na' xaben' gocbe'ede' ca hor na'czen' gož Jesúsen' le' bi gat bi' chen'. Nach gwyejnilaže' Jesúsen', le' len yogo' bene' že' ližen'.

<sup>54</sup>Da' nga goc yela' guac gwchop da' ben Jesúsen' šlac beze'e Judean na' bežine' Galilea.

**Jesúsen' beyone' to bene'  
nat late' cuerp che'**

**5** Na' gwde to tiemp bžin ža goc yeto lni che neto' bene' Israel Jerusalénna', na' Jesúsen' gwyetje'. <sup>2</sup>Jerusalénna' galaže cho'a puert che ze'e da' nyechj ciudan' dan' nzi' Puert che Xila' žia to ga chož nis da' nzi' Betesda, na' ze gayo' chalšil cue'ej cuite gan' chož nisen'. <sup>3</sup>Na' bene' zan bene' güe' zjadie' chalšil ca', no bene' lchol, no bene' nxinj ni'e, no bene' natsi' late' güeje cuerp chegaquen'. Zjadie' chesebeze' batcan' ta nisen'. <sup>4</sup>Le tgüeje betj to angl na' bte' nisen', na' bene' nechw bene' cho'e lo' nisen' cheyož chta anglen' len, cheyacde' bite'tez yižgüe' che'ede'. <sup>5</sup>Na' cate' bžin Jesúsen' na' de to bene' ba goc šino'šonechoa iz chacšende'. <sup>6</sup>Na' Jesúsen' ble'ede' ben' na' gocbe'ede' ba chac sša de' ca', na' gože'ne':

—¿Chaclažo' yeyaco'?

<sup>7</sup>Na' bene' güen' gože' Jesúsen':  
—Bene', nono zoa no co' neda' lo' nisen' cate' chdan. Na' šlac zya'a cont šo'a, bene' yoble chyobde' chetje' lo' nisen'.

<sup>8</sup>Nach gož Jesúsen' le':

—Gwyas na' botobe xta'on na' gwda.

<sup>9</sup>Na' la' beyacte bena' na' botob xte'en na' gwzolao chde'. Perw na' goquen to ža che Dios cate' bi de

lsens gon neto' bene' Israel žin.

<sup>10</sup>Nach bene' gwnabia' che neto' bene' Israel gose'e bena' beyaquen':  
—Ža che Dios na'a. Bi de lsens yeyoa' xta'ona'.

<sup>11</sup>Na' gož ben' legaque':

—Bena' beyon neda' gože'nda':  
“Botobe xtaon' na' gwda.”

<sup>12</sup>Nach gose'ene':

—¿Non' gož le': “Botobe xtaon' na' gwda”?

<sup>13</sup>Na' ben' beyaquen' bi gwneзде' non' beyon le', le Jesúsen' benite' ladjo bene' zan ca'. <sup>14</sup>Gwdechle Jesúsen' bedile' bena' beyaquen' lo' yodao' blaon' na' gože' le':

—Bač beyaco' na'a, na' cheyala' cuejyichjo' da' malen' bich gonon', cont bi gac chio' to da' malech.

<sup>15</sup>Nach beza' bena' jatixjue'ede' bene' gwnabia' che nación Israel cheton' gože' legaque' Jesúsna' ben' beyon le'. <sup>16</sup>Da'nan' bene' gwnabia' ca' gwzolao gosebe'na'ogüe' Jesúsen' na' cheseyiljue' nacle yesone' yesote'ne' da' chone' yela' guac ca' ža che Dios cate' bi de lsens gon neto' bene' Israel žin. <sup>17</sup>Na' Jesúsen' gože' legaque':

—Xan' zoacze' chelalde' bate'teze na' lecze ca' neda'.

<sup>18</sup>Da'nan' goseyiljwlaže'che' nacle yesone' yesote' Jesúsen', perw gague neche bi chone' can' ža ley gan' chgualan' che ža che Dios na'zen', san lecze da' gwne' Diosen' naque' Xe', le zejen toz ca' zaque' len Diosen'.

**Yela' chnabia' da' nape Xi'in Diosen'**

<sup>19</sup>Na' gož Jesúsen' legaque':

—Chnia' le'e to da' zejen, bibi chac gona' to gualaza'. Con da' chle'eda'

chon Xan', lenna' chona', na' bite'teze da' chon Xan', lenna' chona', le neda' naca' Xi'ine'. <sup>20</sup> Chaque Xan' neda' na' chlo'ede' neda' yogo' dan' chone'. Na' gwlo'ede' da' zaca'ch ca da' quinga da' gona' cont yebanele.

<sup>21</sup> Ca Xa' Diosen' chosbane' bene' ladjo bene' guat ca', cal'ze chona' neda' naca' Xi'ine', chnežjua' yela' mban che note'tez bene' chbeja' cont gata' yela' mban čhegaque'.

<sup>22</sup> Na' Xan' bi chchoglagüe' che ne to bene' še nape' doľa', san ba gwlo'e lo na' choglagua' che yogo' benach še non' nap doľa'. <sup>23</sup> Xan' chaclaže' yogo' bene' yesonxene' neda' lecze can' chesonxene' le'. Na' bene' bi chonxen neda', ne Xa' Diosen' bi chonxene', le le'na' gwsele' neda'.

<sup>24</sup> Chnia' le'e to da' zejen, bene' chosozenag xtižan' na' chesejnilaže' Dios ben' gwseľa' neda', de yela' mban čhegaque' toli tocaņe. Na' bi yesezaca'zi'e toli tocaņe da' bi chesejnilaže'ne'. Bich zjanaque' ca bene' guat len yichjlažda'ogaquen' da' bi chosozenague' che Diosen', san ba bocobe' yichjlažda'ogaquen' neče ba chesejnilaže'ne'. <sup>25</sup> Chnia' le'e to da' zejen, gwžin ža cate' bene' zjanac ca bene' guat len yichjlažda'ogaque' yesende' xtiža' neda' naca' Xi'in Dios, na' bene' yosozenag chia' gata' yela' mban čhegaque' toli tocaņe, na' bač chzolao chac ca' na'a. <sup>26</sup> Xa' Diosen' zoacze' toli tocaņe na' chone' cont zjamban benachen', na' lecze ba bene' cont neda' naca' Xi'ine' zoa' toli tocaņe na' chona' cont zjamban bene'. <sup>27</sup> Na' lecze ba bene' neda' yela' chnabia' cont nia' non' nap doľa', le ba gwsele' neda' golja'

benach. <sup>28</sup> Bi yebanele dan' chnia' nga, le gwžin ža cate' yogo'loľ bene' guat že' lo' ba yesende' cate' yoľ güiža'ne'. <sup>29</sup> Na' bene' ca' goson da' güen šlac gosebane' yesyechoje' na' yesebane' toli tocaņe. Na' bene' ca' goson da' mal šlac gosebane' yesyechoje' na' yesezaca'zi'e toli tocaņe.

Jesúsen' bzejni'ide' nape'  
yela' chnabia'

<sup>30</sup> Bibi gac gona' to gualaza'. Chzenaga' bin' ža Xan' cont nia' che benachen' noe' nap doľa'. Na' dan' nia' gac che to to bene' naquen da' cheyla' gac, le bi chi'yichja' gac dan' chnalaža'; san chi'yichja' gac can' chnalaže' Xan' ben' gwseľa' neda'. <sup>31</sup> Šaca' toz neda' chgua'a da' balı non' naca', bi naquen to da' šejle'le. <sup>32</sup> Perw zoa Xan' cho'e diža' li non' naca', na' nezdä' diža' da' cho'e chia' naquen da' šejle'le. <sup>33</sup> Bač gwseľa'le bene' lao Juanna' cont jasenabde' le' nac nac chia', na' Juanna' be'e diža' li non' naca'. <sup>34</sup> Perw neda' bi chyažjda' diža' da' güe' ne to benach chia'. San chnia' da' quinga cont le'e šejle'le chia' na' gata' yela' mban čhele toli tocaņe. <sup>35</sup> Juanna' goque' ca to yi' da' chseni'chgua dan' bzejni'ide' le'e che Diosen', na' šlož daon' bebele dan' bsd blo'eden'. <sup>36</sup> Na' de to da' choe' xtiža' da' zaca'ch ca diža' da' choe' Juanna' chia': chona' yogoloľ da' ba gwlo'o Xan' lo na' gona', na' da' ca' chonan' choen' diža' le Xan' gwsele' neda'. <sup>37</sup> Nach Xan' ben' gwseľa' neda' lecze cho'e xtižan', la'czla' biņa' yenele can' chnen' na' biņa' le'ele can' naquen'. <sup>38</sup> Xtižen'

bina' šon' lo' yichjlažda'olen', le bi chejnilaže'le neda' naca' ben' gwsele'n'. <sup>39</sup>Chsedyane'le gan' nyoj Xtiža' Diosen', le chaquele gapple yela' mban toli tocañe neche chsedlen. Na' da' ca' chsedlen' zjanyojen chesoen' xtiža'. <sup>40</sup>Perw bi chaclaže'le šejnilaže'le neda' cont gata' yela' mban chele toli tocañe. <sup>41</sup>'Na' neda' bi chyažjda' yesena benachen' naca' bene' zaca'. <sup>42</sup>Nombi'a le'e na' nezda' bi chaquele Diosen'. <sup>43</sup>Xan' ba gwsele' neda' chona' con da' že', perw bi chejle'le chia'. Na' cate' za'ac bene' cheson con bi da' ža xbab chegacze', nachle chejle'le chegaque'. <sup>44</sup>¿Nacxe gac šejle'le chia'? le chzelaže'le yesena bene' chonle güen, na' bi chzelaže'le gonle cont toz Diosen' ne' chonle güen. <sup>45</sup>Bi gonle xbab neda' gwcuiša' le'e lao Xan'. Da' Moisésen' hcuiše' le'e la güen, le chsedchgual dan' bzojen' chaquele cont soale binlo len Diosen', perw bi chejle'le xtižen'. <sup>46</sup>Šaca' chejle'le xtiža' da' Moisésen', chia' neda'czen' chejle'le še ca', le xtiža' nedan' bzoje'. <sup>47</sup>Na' da' bi chejle'le dan' bzoj da' Moisésen', ¿nacxe gonle šejle'le bi dan' žia' le'e?

**Jesúsen' bguagüe' gayo' mil bene'**

(Mt. 14:13-21; Mr. 6:30-44; Lc. 9:10-17)

**6** Gozde goc ca' Jesúsen' gwyeje' yešla'a nisdao' che Galilea len bene' ca' zjanaque' le' txen. Na' nisdao' na' lecze nzin' Nisdao' Tiberias. <sup>2</sup>Na' bene' zan zjanao' Jesúsen' da' ba besele'ede' yela' guac dan' chonen' cheyone' bene' güe' ca'. <sup>3</sup>Na' gwloe Jesúsen' to lo ya'a len bene' ca' zjanaque' le' txen

na' gosebi'e. <sup>4</sup>Na' da' yoble ba zoa gala' lni che neto' bene' Israel da' nzi' pascw. <sup>5</sup>Na' cate' gwña' Jesúsen' ble'ede' bene' zan ba zjanao' le' na' gože' Felipen':

—¿Gaxe si'cho da' yesagw yogo' bene' quinga?

<sup>6</sup>Gwne' ca' yešque bi na Felipen', le Jesúsen' nezecede' naquen' gone'.

<sup>7</sup>Na' Felipen' gože'ne':

—Chop gayoa denario yetextilen' bi gaquen yesyechele to toe' ne late' güejen.

<sup>8</sup>Na' yeto ben' naque' Jesúsen' txen le Andrés na' naque' bene' biše' Simón Pedro. Na' Andrésen' gože' Jesúsen':

<sup>9</sup>—Nga zoa to bi' byo dao' na' de gayo' yetextil de cebada chebe' na' yechope bel ya'a. Perw ¿bi de gon da' quinga? le bene' zanna' že' nga.

<sup>10</sup>Nach Jesúsen' gože' bene' ca' zjanaque' le' txen:

—Le ye' yogo'lole' yesebi'e.

Dechgua yixye latjen', na' gosebe' bene' ca' lo yixyena', ca do gayo' mil bene' byo, bi cuent no'ole len bidao'.

<sup>11</sup>Nach gwxi' Jesúsen' yetextil ca', na' beyož be'e yela' choxcen che Diosen' bnežjuen' bene' ca' zjanaque' le' txen cont goseyisen' len bene' ca' zjachi' na'. Na' lecz ca' bene' len bel ya'a ca'. Na' goso'e to toe' con ca'te'te' gosaclaže' gosagüe'. <sup>12</sup>Na' beyož gosagüe' ca'te'te' goseljde', Jesúsen' gože' bene' ca' zjanaque' le' txen:

—Le yotobe da' ca' bega'an late' güeje cont bibi cuiayi'.

<sup>13</sup>Nach bosyotobe' da' bixjw ca' dan' besyega'an lao gayo' yetextil ca' de cebad, na' goquen šiziw žome.

<sup>14</sup>Cate' bene' ca' besele'ede' yela' guac dan' benen' nach gosene':

—Da' li bengan' choe' xtiža' Dios na' naque' ben' ba gwlezcho seļa' Diosen' yežlio nga.

<sup>15</sup>Na' cate' Jesúsen' gocbe'ede' ba zoa yeseche'əxoxje' le' cont yesone' le' rey čhegaque', nach gozze'e gozeje' ya'adaon' toze'.

**Jesúsen' gwze'e lo nisdaon'**

(Mt. 14:22-27; Mr. 6:45-52)

<sup>16</sup>Cate' ba gwxin, beņe' ca' zjanaque' Jesúsen' txen jaya'aque' cho'a nisdaon'. <sup>17</sup>Na' besyeyo'e to lo' barcw zjaya'aque' ciuda Capernaum. Ba goļ na' Jesúsen' biņa' yežine'.

<sup>18</sup>Na' chas chata' chac nisdaon' le chechjchgua be'. <sup>19</sup>Ba goc sša zjaya'aque' len barcon' lo nisdaon' cate' besele'ede' ba zjayda Jesúsen' cheze'e lo nisen' gaļa'ze gan' zej barcon'. Na' besežebe'. <sup>20</sup>Na' gože' legaque':

—Nedan', bi žeble.

<sup>21</sup>Nach chesyebede' besyegüe'ene' lo' barcon'. Na' la' besyežintie' ga nac yo biž cho'a nisdaon' gan' zjaya'aquen'.

**Beņe' zan chesyeyiljue' Jesúsen'**

<sup>22</sup>Na' beteyo beņe' zan beņe' ca' besyega'an yešļa'a cho'a nisdaon' gosacbe'ede' nono Jesúsen' nļa' na' gosacbe'ede' bibi barcw yoble gota'ch san toga dan' besyeyo'o beņe' ca' zjanaque' Jesúsen' txen, na' zjanežde' Jesúsen' bi beyo'e len legaque' lo' barcon'. <sup>23</sup>Nach besežin barcw da' za'ac ciuda Tiberias gaļa'ze gan' gosagüe' yetextilen' caten' beyož be' Xancho Jesúsen' yela' choxcġen čhe Diosen'. <sup>24</sup>Na' cate' gota'bia' nono Jesúsen' bežel gan' nite'na' nach besyeyo'e lo'

barcw ca' ja'aque' Capernaum cont besyeyiljue' Jesúsen' do na'.

**Yela' guagw da' chnežjon beņe' yela' mban toļi tocane**

<sup>25</sup>Na' cate' beņe' zan ca' besyeželde' Jesúsen' yešļa'ale nisdaon' nach gose'e le':

—Maestrw, źbatca' bla'o nga?

<sup>26</sup>Na' Jesúsen' gože' legaque':

—Chnia' le'e to da' zejen, cheyiljwle neda' neče dan' gwdagwle ca beljele na'zen', gague neče chejle'le čhia' lagüe ba ble'e le yela' guac ca' ba benan'. <sup>27</sup>Bi cheyaļa' cuecyichjle gata' da' ye'ej gagwle da' chbiayi', san cuecyichjle gata' da' gon yela' mban čhele toļi tocane. Diosen' gwsele' neda' golja' beņach na' neda' gona' to da' ye'ej gagwle cont gata' yela' mban čhele toļi tocane. Na' Xa' Diosen' ba blo'e naca' ben' ba gwsele'.

<sup>28</sup>Na' gose'ene':

—źBi cheyaļa' gonto', cont yebe Diosen' neto'?

<sup>29</sup>Na' gož Jesúsen' legaque':

—Da' nga gonle cont yebe Diosen' le'e, šejnilaže'le neda' naca' ben' gwseļen'.

<sup>30</sup>Na' gose'e Jesúsen':

—źBi yela' guac gono' še ca' cont le'eto' na' šejnilaže'to' le'? źBi gono'?

<sup>31</sup>Da' xoxzta'ocho ca' gosagüe' yela' guagw da' nzi' maná šlac gosenite' latje dašen', na' nyoj Xtiža' Diosen' čhegaquen', žan: “Yela' guagw da' za' yaban' be'e legaque' gosagüe'.”

<sup>32-33</sup>Nach Jesúsen' gože' legaque':

—Chnia' le'e to da' zejen, gague da' Moisėsen' bnežjue' da' xoxzta'ocho ca' yela' guagon', san Xa' Diosen' bnežjuen' legaque'. Na' bi nacho

lenna' zan' yaba gan' zoe'na, san de to yela' guagw da' ba gwsela' Diosen' na'a da' za' yaban' na' betjen yežlion', na' chnežjon yela' mban che note'teze bene' chesagw len.

<sup>34</sup>Nach bene' ca' gose'e le':

—Bene', benšca neto' yela' guagon' žo' ca' gagwton' yogo' ža.

<sup>35</sup>Nach Jesúsen' gože' legaque':

—Neda' naca' yela' guagw da' chnežjon bene' yela' mban toli tocane. Note'teze bene' yosozenag chia' na' yesejnilaže' neda', guata' da' chyažje yichjlažda'ogaque' toli tocane. <sup>36</sup>Na' ba gwnicza' le'e, la'czla' ba ble'ele neda' bi chejnilaže'le neda'. <sup>37</sup>Yogo' bene' chbej Xan' cont yesaque' neda' txen, chžin ža chesejnilaže' neda'. Na' note'teze bene' chaclaže' šejnilaže' neda', bi gwsia'ne' ca'ale, san gaclena'ne' cont šejnilaže'nda'. <sup>38</sup>Neda' za'a yaba na' betja' yežlion' gague cont gona' da' žan chia' san cont gona' can' chaclaže' Xan' ben' gwsela' neda'.

<sup>39</sup>Len' chaclaže' bi gua'a latje cuiayi' ne toze bene' ba gwleje' cont yesaque' neda' txen. Nach cate' žin ža te che yežlion' cana' yosbangaca'ne' ladjo bene' guat še ba gosate'. <sup>40</sup>Xan' chaclaže' yogo'lol' bene' yesejni'ide' non' naca' na' yesejnilaže' neda' cont gwnežjue' legaque' yela' mban toli tocane, na' neda' yosbana' legaque' ladjo bene' guaten' še ba gosate' cate' žin ža te che yežlion'.

<sup>41</sup>Na' zan' bene' Israel gualaž cheto' legacze' besežeše' che dan' gwna Jesúsen': "Neda' naca' yela' guagw da' za' yaba." <sup>42</sup>Gosene':

—¿Gague bengan' Jesús xi'in José? Nombia'cho xaxna' benga. ¿Bi dižan' cho'e že' ze'e yaba betje' yežlio?

<sup>43</sup>Nach Jesúsen' gože' legaque':

—Bich žešele chia'. <sup>44</sup>Nono gac yesejnilaže' neda' še Xan' ben' gwsela' neda' bi gaclene' legaque' yesejnilaže', na' cate' žin ža te che yežlion' yosbana' legaque' še ba gosate'. <sup>45</sup>Le'e gan' bosozoj bene' ca' goseyixjue'ede' xtiža' Diosen' cani' žan: "Yogüe' Diosen' gwsed gwlo'ede' legaque'." Na' yogo' no yeseneze can' ža Xan' na' yosozenague' cont yesone' can' že'na, lecz yesejnilaže' neda'.

<sup>46</sup>Bi nacho zoa bene' ba ble'ede' Xan'. Toza' neda' ba ble'eda'ne', le za'a gan' zoen'. <sup>47</sup>Chnia' le'e to da' zejen, bene' chesejnilaže' neda', de yela' mban chegaque' toli tocane.

<sup>48</sup>Neda' naca' yela' guagw da' chnežjon yela' mban toli tocane che benachen'. <sup>49</sup>Da' xozxta'ocho ca' gosagüe' yela' guagw da' nzi' maná šlac gosenite' latje dašen', na' bia'cze gosat yogüe'. <sup>50</sup>Neda' cho'a diža' che to yela' guagw da' za' yaban' na' bene' chagw len bi gate'. <sup>51</sup>Neda' naca' yela' guagw dan' za' yaban' dan' nsa' yela' mban toli tocane. Bene' šejnilaže' neda', bane' toli tocane. Na' yela' guagw da' chnežjua' cont gata' yela' mban che benachen' naquen cuerp chia'.

<sup>52</sup>Nach bene' Israel gualaž cheto' ca' legacze' besežeše', gosene' che': —¿Nacxe gone' gone' cuerp chen' gagwchon?

<sup>53</sup>Jesúsen' gože' legaque':

—Chnia' le'e to da' zejen, Diosen' gwsela' neda' golja' benach, na' še bi chagwle cuerp chian' na' še bi che'eje xchenan', bi de yela' mban chele toli tocane. <sup>54</sup>Bene' chesagw cuerp chian' na' chese'eje xchenan'



de yela' mban chegaque' toli tocane, na' še ba gosate', cate' te che yežlion' yosbana' legaque' ladjo bene' guat ca'. <sup>55</sup>Le cuerp chian' naquen dogualje yela' guagw, na' xchenan' naquen dogualje da' ye'ejle. <sup>56</sup>Bene' ca' chesagw cuerp chia' na' chese'eje' xchenan' de yela' mban chegaque' toli tocane, na' zjanaque' txen len neda' na' neda' naca' txen len legaque'. <sup>57</sup>Xa' Diosen' gwsele' neda' na' de yela' mban chia' da' naca' toze len le'. Na' ca'cze gac len bene' yesagw cuerp chian', yesenite' toli tocane dan' zjanaque' txen len neda'. <sup>58</sup>Cuorp chian' naquen yela' guagw da' za' yaba. Na' len bi naquen ca da' gosagw da' xoxxta' ocho ca' latje dašen', le bene' gosagw len bia'cze gosate'. Na' bene' chesagw yela' guagw dan' žia' ca', yesenite' toli tocane.

<sup>59</sup>Jesúsen' bsed blo'ede' da' ca' lo' yodao' che bene' Israel gualaž cheto' ca' da' zoa Capernaum.

**Xtiža' Jesúsen' chnežjon  
yela' mban toli tocane che  
bene' chosozenag chen**

<sup>60</sup>Na' zan bene' ca' zjano' Jesúsen', cate' gosende' da'na' chzejni'ide' legaque', gosene':  
—Zdebechgua naquen goncho dan' chzejni'iden'. ěNoxen' gac gon can' žen'?

<sup>61</sup>Gocbe'e Jesúsen' chesenie' che' dan' bzejni'ide' legaque' da' ca', na' gozne':  
—ěBi chazlaže'le can' ba gwnian'?

<sup>62</sup>ěNacxe nale cate' le'ele neda' yeyepa' gan' gwzoo' cana'? neda' naca' ben' gwseła' Diosen' golja' beňach. <sup>63</sup>Spiritw chian' chnežjon

benachen' yela' mban, na' cuerp chian' bi gac gonen ca'. Diža' dan' bach bia' len le'e zjazacan' len yichjlažda'olen' cont banle toli tocane še šejle'le chen. <sup>64</sup>Perw ne' nita' balle bi chejle'le.

Jesúsen' gwne' ca' le gocbe'ede' cate' gosezolao bene' ca' gosedalene' le' noe' bi chesejle'e che' na' noe' gwdie'ne' lo' na' bene' ca' chesegue'ede' le'. <sup>65</sup>Na' gozna' Jesúsen':

—Chac can' ba gwnian', nono gac šejnilaže' neda' še bi gac len Xa' Diosen' le' cont šejnilaže'nda'.

<sup>66</sup>Beyož bzejni'i Jesúsen' legaque' da' ca', zan bene' ca' ba chosozenag xtižen' gosebejyichje' bich bosozenaguen'. <sup>67</sup>Nach Jesúsen' gože' šižinw bene' ca' gwleje' cont gosaque' le' txen:

—ěLen le'e chaclaže'le yeyejle?

<sup>68</sup>Na' gož Simón Pedron' le':

—Xanto', noch no zaca' gwzenagto' xtižen'. Tozo' le' cho'o diža' da' chnežjon yela' mban che bene' chzenague' chen. <sup>69</sup>Neto' chejnilaže'to' le' na' nezeto' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocane.

<sup>70</sup>Na' Jesúsen' gože' legaque':  
—Ba gwleja' le'e šižinwle cont zoale len neda' na' nezda' tole chzenagle che gwxiyen'.

<sup>71</sup>Gwne' ca' che Judas Iscariote ben' naque' xi'in to bene' le' Simón, le gwnezde' Judasen' ba naquen gwdie' le' lo' na' bene' ca' chesegue'e le', na' Judasen' naque' to bene' šižinw ca'.

**Bene' biše' Jesúsen' bi gosejnilaže' le'**

**7** Gwde na' Jesúsen' gw dacze' bsed blo'ede' ben' že' distritw

Galilean'. Bich goclaže' šejche'  
 Judean', le bene' gwnabia' che  
 nación Israel cheton' že' na'  
 cheseyiljue' nacle yesone' yesote'ne'.  
<sup>2</sup>Na' ba zoa gała' lni che neto' bene'  
 Israel da' nzi' lni che Ranšw Yix.  
<sup>3</sup>Na' bene' biše' Jesúsen' gose'ene':  
 —Bitw yega'ano' nga. San gwyej  
 Judean' cont bene' ca' chosozenag  
 chio' yesele'ede' yela' guac dan'  
 chonon'. <sup>4</sup>Note'teze bene' še  
 chaclaže' yesacbe'e bene' naque'  
 to bene' zaca', bi gone' yela' guac  
 bagaše'ze. Še da' li chono' yela' guac,  
 ben cont yesele'e yogo'lol bene' can'  
 chonon'.

<sup>5</sup>Bene' biše' Jesúsen' gose'ene'  
 ca', le ne legaque' bi gosejnilaže'ne'.  
<sup>6</sup>Nach gož Jesúsen' legaque':  
 —Bina' žin ža ša'a, san le'e  
 guac šja'acle bate'teze. <sup>7</sup>Bene'  
 ca' bi zjanombi'e Diosen' bi gac  
 yesegue'ede' le'e, san chesegue'ede'  
 neda', le chzejni'ida'ne' chesone' da'  
 xinj. <sup>8</sup>Le šja'ac lnin'. Neda' bi sa'a  
 na'a, le bina' žin ža chia'.  
<sup>9</sup>Beyož gože' legaque' ca' bega'ane'  
 Galilean' yeto chop ža.

### Jesúsen' gwyeye' Jerusalén gan' yo'o lnin'

<sup>10</sup>Nach gwde gosa'ac bene' biše'  
 ca' zja'aque' lnin' gwza' Jesúsen' len  
 bene' ca' zjanaque' le' txen zja'aque'  
 lnin', perw bi ja'aque' can' nla'ze  
 san bagaše'ze. <sup>11</sup>Na' bene' gwnabia'  
 che nación Israel cheton' že'  
 Jerusalénna' besyeyiljue' le' lo lnin',  
 chesene':

—¿Ganxe bena'?

<sup>12</sup>Na' bene' ca' zjandop zjanžag lo  
 lnin' šižize gosoe' diža' che Jesúsen',  
 na' gague toze ca gosene'. Bałe'

gosene': "Naque' bene' güen", na'  
 bałe' gosene': "Bi naque', chonlede'  
 bene'."

<sup>13</sup>Na' gosoe' diža' šižize che  
 Jesúsen', le yogo'ze bene' chesežebe'  
 bi yesone' bene' gwnabia' ca' legaque'  
 še yesacbe'ede' cheso'e diža' güen  
 che Jesúsen'.

<sup>14</sup>Na' do gašje zej lnin' cate' gwyej  
 Jesúsen' gan' zoa yodao' blao che  
 neto' bene' Israel na' gwzolao chsed  
 chlo'ede'. <sup>15</sup>Na' besyebane bene'  
 gwnabia' ca', gosene':

—¿Nacxečen' da' zan neze benga?  
 le gague bi nseden'.

<sup>16</sup>Na' Jesúsen' gože' legaque':  
 —Dan' chsed chlo'edan' bi naquen  
 xbab checza', san naquen xbab che  
 bene' gwseła' neda'. <sup>17</sup>Note'tez bene'  
 chesaclaže' yesone' can' chazlaže'  
 Dios ben' gwseła' nedan', guacbe'ede'  
 še dan' chsed chlo'edan' zan' che  
 Dios o še naquen da' chaljlaže'za'.  
<sup>18</sup>Cate' to bene' chsed chlo'ede' xbab  
 checze', cheyiljue' nacle gone' cont  
 gacxene'. San cate' to bene' chaclaže'  
 gacxen bene' gwseła' le', nezecho  
 xtižen' naquen da' li na' bi chziye'e.

<sup>19</sup>'Da' Moisésen' bene' le'e ley dan'  
 nsedlen' perw ne tole bi chonle can'  
 žanna'. ¿Bixčen' cheyiljwle nacle  
 gonle gotlenda'?

<sup>20</sup>Bene' ca' že'na' gose'ene':  
 —Yo'o da' xigüen', nan' chol  
 chñenošo'. ¿No chaclaže' got le'?

<sup>21</sup>Jesúsen' gože' legaque':  
 —Toz yela' guac da' bena' ža che  
 Dios cate' bi de lsens gon chio' bene'  
 Israel žin, na' yogo'le chebanele.

<sup>22</sup>Da' Moisésen' bene' mandadw  
 soacho señw dan' že' circuncisión  
 (la'czla' bi gwzolao seño' len le' san  
 len da' xozxta'ocho ca' bene' gwnita'

cani'te), na' da'nana' chzoale bi' byo dao' ca' señwna' ža che Dios. <sup>23</sup>Can' naquen, la'czla' še naquen ža che Dios, chzoale no bi' byo dao' señw cate' chaquebe' xono' ža cont chonle can' ža ley dan' bzoj Moisésen', na' žbixchen' chža'ale neda' dan' ba beyona' to bene' güe' ža che Diosen'? <sup>24</sup>Bi cheyala' yosbaga'le bene' che da' chle'ele chone', le bi nezele še chazlaže' Diosen' can' chone', san le nabyane' cont nezele bi ža Diosen', nachen' gacbe'ele non cheyala' yosbaga'le.

**Jesúsen' gwne' ze'e gan' zoa Diosen'**

<sup>25</sup>Nach to chope bene' Jerusalén ca' gosene':

—¿Gague benga ben' chesyeyiljue' cont yesote'ne'? <sup>26</sup>Le na' can' cho'e dižan' lao yogo' bene' na' bibi chese'e le'. ¿Gague ba cheson bene' gwnabia' checho xbab le naque' Cristo ben' chbezcho yedenabia'? <sup>27</sup>Perw nezecho ga bene' benga, na' cate' yid Criston' nono yeseneze ga bene' le'.

<sup>28</sup>Jesúsen' chsed chlo'ede' chalšil che yodao' blao cate' gosene' ca'. Nach gwne' zižje gože' legaque':

—Chaquele nombia'le neda' na' chaquele nezele ga bene' neda'. Perw gague con za'a to gualaza'. Da' li zoa bene' gwsele' neda', na' le'e bi nombia'le'. <sup>29</sup>Neda' nombi'ane', le za'a gan' zoen' na' le' gwsele' neda'.

<sup>30</sup>Na' da' gwne' ca' bal' bene' gosaclačže'chgüe' yesezene' le', perw nono gwzen le' da' biña' žin ža gague' lo na'gaquen'. <sup>31</sup>Na' bene' zan gosejle'e Jesúsen' naque' bene' gwseła' Dios, na' gosene':

—Cate' yid Criston' žgonche' yela' guac da' zaca'ch ca da' chon benga?

**Bene' chesape' yodao' blaon' ja'aque' cont šjaxexene' Jesúsen'**

<sup>32</sup>Bene' fariseo ca' gosende' diža' cheso'e bene' ca' che Jesúsen'. Da'nana' bosoxi'e len bene' ca' zjanac bxoz gwnabia' che nación Israel cheton' na' gosesele' bene' chesape' yodao' blaon' cont šjaxexene' Jesúsen'. <sup>33</sup>Nach Jesúsen' bsed blo'echde' bene' ca' že'na', gwne': —Soacha' yeto tiemp dao' len le'e nach yeya'a gan' zoa ben' gwseła' neda'. <sup>34</sup>Na' yeyiljwle neda' na' bi yeželele neda', le gan' soan' bi gac yidle.

<sup>35</sup>Nach bene' gwnabia' che nación Israel cheton' gose' lježe':

—¿Gan' chacde' yeyeje' ga bi yeželechone'? ¿Yeyeje' gan' zjanaslas bene' gualaž checho ladjo bene' griego ca' na' gwsed gwlo'ede' legaque'? <sup>36</sup>¿Bi zejen dan' gwnen': “Yeyiljwle neda' na' bi yeželele neda' na' gan' soan' bi gac yidle”?

**Jesúsen' be'e diža' che Spiritw che Diosen'**

<sup>37</sup>Ža cate' zelao chesone' lnin' naquen ža xench, na' Jesúsen' zeche' chsed chlo'ede' na' gwne' zižje, gwne':

—Note'tezle še lo' yichjlažda'olen' nacle ca bene' chbillaže', cheyala' šejnilaže'le neda' na' gona' le'e yela' mban toli' tocane, na' lenna' gaquen lo' yichjlažda'olen' ca to nis da' gwbat cheyo'ojen cont bich gacle ca to bene' chbillaže'. <sup>38</sup>Le'e chejnlaže'le neda', gac chele can' ža Xtiza' Diosen' da' nyojen, to da' güen juisyw gac lo' yichjlažda'olen' cont gacle ca to yežlio ga chaldi nis, gan' de zan yegw da' cheseyilen len.

<sup>39</sup>Na' dan' gwna Jesúsen' ca' be'e diža' che Spiritw che Diosen' da' yedesoan lo' yichjlaždao' note'tezcho chejnilaže'chone'. Na' caten' gwne' ca' Spiriton' biṇa' yedesoan lo' yichjlaždao' bene', le biṇa' gac yogo' da' cheyała' gac cont gacbia' Jesúsen' naque' bene' zaca' juisyw.

### Gosaque' chople neche Jesúsen'

<sup>40</sup>Bene' ca' chosozenag xtiža' Jesúsen' bale' gosene':

—Da' li benga naque' ben' choe' xtiža' Diosen' ben' naquen yide'.

<sup>41</sup>Na' yebale' gosene':

—Benga Criston' ben' naquen yedenabia'.

Perw yebale' gosene':

—¿Bixe naxho bene' Galilea ba gwlej Diosen' cont yedenabi'e chio'?

<sup>42</sup>Xtiža' Diosen' da' nyojen žan Criston' ben' yedenabi'e choje' lo diaža' che da' rey David na' gaque' bene' Belén gan' nac laž da' David.

<sup>43</sup>Can' goc bene' ca' gosaque' chople neche Jesúsen'. <sup>44</sup>Na' bale' gosaclačže' yesezene'ne', perw nono gwzen le'.

### Bene' gwnabia' che nación

#### Israelen' bi gosejle'e che Jesúsen'

<sup>45</sup>Na' bene' chesape' yodao' blaon' jaya'aque' gan' nita' bxož gwnabia' ca' len bene' fariseo ca', le bene' can' gosesele' legaque' cont yesezene' Jesúsen'. Na' bene' ca' gose'e legaque':

—¿Bixchen' bi nche'elne'?

<sup>46</sup>Na' bene' chesape' yodao' blaon' gose'ene':

—Biṇa' yeneto' bene' cho'e diža' güen ca' dan' choe' bena'.

<sup>47</sup>Nach bene' fariseon' gose'e legaque':

—¿Lente le'e ba gwxiye'e? <sup>48</sup>Ne toz neto' nacto' bene' fariseo biṇa' šejle'to' xtižen' na' neca bene' gwnabia' chechon', ne toze' biṇa' šejle'e xtižen'. <sup>49</sup>Perw bene' quinga že' nga bi zjanombi'e ley dan' bzož da' Moisésen' na' ba zjambiyae'e, da'nan' chesejle'e xtižen'.

<sup>50</sup>Na' Nicodemo ben' gwyey lao Ješusen' šeže'le naque' txen len bene' gwnabia' ca'. Na' Nicodemon' gože' legaque':

<sup>51</sup>—Ley chechon' bi choen' latje choglaochi che to bene' ba ben da' mal še biṇa' güe'e diža' naquen' goc na' še biṇa' nezecho bi dan' bene'.

<sup>52</sup>Nach yezica'chle bene' gwnabia' ca' gose'e le':

—¿Leno' le' ba beyaco' bene' Galilea? Bsed Xtiža' Diosen' da' nyojen na' nezdo' ne to bene' choe' xtiža' Diosen' ca' na' choje' Galilean'.

<sup>53</sup>Nach besyeya'ac to toe' jaya'ac ližgaque'.

### No'olen' besyedole'de' len xtoe'

**8** Na' Jesúsen' gwyeye' ya'a da' nzi' Ya'a Olivos. <sup>2</sup>Na' beteyo cate' gwyeni' gwyeye' yodao' blaon' da' yoble na' yogo' bene' ca' že' na' gosebigue' lagüen' na' gwchi'e na' gwzologüe' chsed chlo'ede' legaque'. <sup>3</sup>Nach bene' chososed chosolo'e ley dan' bzož da' Moisésen' na' bene' fariseo ca' jasesane' to no'ole bene' besyedole'de' len xtoe'. Na' bosozechi' le' gachol bene' ca' chosozenag che Jesúsen'. <sup>4</sup>Na' gose'e Jesúsen':

—Maestrw, no'ole nga ba bedole'to' delene' xtoe'. <sup>5</sup>Na' ley chechon' da'

bzoj Moisésen' žan cheyała' gotcho no'ol ca' cheson ca' gwčhelchone' yej. Na' źbi žo' le'? źbix cheyała' gonechone'?

<sup>6</sup>Gose'e Jesúsen' ca' da' gosaclaže' yesebeje' le' diža' da' yosočhine' yesagü'e' xya che'. Na' Jesúsen' con bcheque' bzoje' lo' yon' len xbene'. <sup>7</sup>Na' bene' ca' gosone' byen gosenabchde' le' bi že'. Nach Jesúsen' bebešagü'e' na' gože' legaque':

—Guaque con note'tezle bi de xtola'le solaole gwčhellene' yejen'.

<sup>8</sup>Nach bcheque' da' yoble bzojche' lo' yon'. <sup>9</sup>Na' bene' ca' zjanche' no'olen' cate' gosende' can' gož Jesúsen' legaque', zjanezde' lecze ba zjanoncze' da' xinj, nach tgüeje tgüeje' besyechoje' gwzolaotequen' len bene' golech na' bžinten len bene' xcuide'ch, nach bega'an yetoze no'olen' len Jesúsen' gan' že' bene' ca' chsed chlo'ede'. <sup>10</sup>Nach Jesúsen' bebešagü'e' da' yoble na' ble'ede' noch no'bene' ca' zjanla' na' gože' no'olen':

—No'ole, źganxe bene' ca' chosocuiš le'? źNe toe' bi beň le' castigw?

<sup>11</sup>Na' no'olen' gože'ne':

—Ne toe', bene'.

Na' Jesúsen' gože'ne':

—Ne neda' bi gona' le' castigw.

Beyej na' bich gono' da' malen'.

**Jesúsen' nse'e be'ni' che  
yichjlaždao' beňach**

<sup>12</sup>Jesúsen' gozo'e diža' da' yoble chzejni'ide' bene' ca' že' na', gwne':

—Neda' nsa'a be'ni' che yichjlaždao' beňachen'. Bene' zjanaque' neda' txen bich zjanaque' ca' bene'

yichjlaždao' lchol' bene' cheson da' xinj, san lo' yichjlažda'ogaque' naquen ca to da' yo'o be'ni'. Da'nan' ba de yela' mban chegaque' toli tocan'e.

<sup>13</sup>Nach bene' fariseo ca' gose'e Jesúsen':

—Cho'o diža' che cuino' naco' bene' zaca', na' da'nan' bi naquen to da' yesejle' bene'.

<sup>14</sup>Na' gož Jesúsen' legaque':

—La'czla' cho'a diža' che cuina', xtižan' naquen da' li. Neda' nezd'a' gan' gwza'a na' gan' yeya'a, perw le'e bi nezele gan' za'a na' gan' yeya'a. <sup>15</sup>Le'e chosbaga'le neda' con can' chon beňachen' xbab, san neda' nono chosbaga' bi da' yosbaga'.

<sup>16</sup>Perw na' šaca' bi da' yosbaga' bene', gonan' ca cheyała', le bibi de da' chona' to gualaza', san chona' dan' ža Xan' ben' gwseła' neda'.

<sup>17</sup>Ley chechon' dan' chsedlen' žan cheyała' šejle'cho cate' chedił diža' da' chesoe' chope testigw. <sup>18</sup>Na' nac chopto' choe'to' xtiža': neda' cho'a diža' che cuina' na' Xan' ben' gwseła' neda' lecze cho'e diža' chia'.

<sup>19</sup>Na' gose'ene':

—źGaxe zoa xao'n'?

Na' gwna Jesúsen':

—Ne neda' ne Xan' bi nombia'le.

Šaca' nombia'le neda' lecze nombia'le Xan'.

<sup>20</sup>Diža' ca' bsed blo'e Jesúsen' cate' ze' gała'ze gan' chesegü'e'e mechw lo' yodao' blao che neto' bene' Israel. Na' nono gwzen le', le biňa' žin ža gaque' lo' na' bene' chesegue'ede' le'.

**Jesúsen' gože' legaque' bi gac  
šjaya'aque' gan' yeyejen'**

<sup>21</sup>Nach Jesúsen' gože' legaque':

—Neda' yeya'a, na' yeyiljwle neda' perw bi gac yeyejle gan' yeya'an, le bina' yetinjle xtoła'len' cate' žin ža gatle.

<sup>22</sup>Na' da' gwne' ca' bene' gwnabia' che nación Israel cheton' gosene':

—¿Yeyot cuinen' že' gan' yeyejen' bi gaš šejcho?

<sup>23</sup>Nach Jesúsen' gože' legaque':

—Le'e nacle bene' che yežlio nga na' chzenagle che dan' chnabia' yežlion', san neda' za'a yaba na' bi chzenaga' che dan' chnabia' yežlion'.

<sup>24</sup>Da'nana' gwnia' bina' yetinjle xtoła'len' cate' žin ža gatle. Le še bi šejle'le neda' naca' doxen can' gwnian', gatle bina' yetinjle xtoła'len'.

<sup>25</sup>Nach gose'e Jesúsen':

—¿Nox naco' le'?

Na' gož Jesúsen' legaque':

—Zan ni'a ba gwnia' le'e non' naca'.

<sup>26</sup>Ne' dech da' zan da' nia' cont gwzejni'ida' le'e nacle doła'. Perw bene' gwseła' neda' nezde' yogo'loł na' cho'e diža' li, na' neda' choe'lena' benačen' diža' da' ba benda' gwne'.

<sup>27</sup>Bene' gwnabia' ca' bi gosejni'ide' choe'lene' legaque' diža' che X'e' Diosen'. <sup>28</sup>Nach Jesúsen' gože' legaque':

—Cate' ba gwde gwłisle neda' to le'e yag, neda' naca' bene' gwseła' Diosen' golja' benač, cana'ch gacbe'ele le naca' ben' ba gwnia' le'e, na' gacbe'ele bibi chona' to gualaza', san con da' bzejni' X'an' neda', lenna' žia'. <sup>29</sup>X'an' ben' gwsele' neda' zoacze' len neda'. Na' bi chbejyichje'nda', le bate'teze chona' da' chazlaže'.

<sup>30</sup>Na' šlac Jesúsen' choe'lene' bene' ca' dižan' nach bene' zan gosezolao chesejnilaže' le'.

### Bene' ca' chnabia' da' malen' yichjlažda'ogaquen'

<sup>31</sup>Nach Jesúsen' gože' bene' gualaž cheto' ca' bač gosezolagüe' chesejnilaže'ne':

—Še soacze gonle can' ba gwnian', gwlo'en da' li nacle txen len neda'. <sup>32</sup>Na' še soacze gonle can' ba gwnian', nachen' šejni'ile diža' li chian' na' gaclenen le'e cont yechojle lo na' da' chnabia' le'e.

<sup>33</sup>Bał bene' ca' gose'e Jesúsen':  
—Neto' nacto' diaža che da' Abrahanna' na' nono na' soa bene' nabia' neto'. ¿Bixčen' žo' yechojto' lo na' da' chnabia' neto'?

<sup>34</sup>Na' gož Jesúsen' legaque':  
—Chnia' le'e to da' zejen, yogo' bene' cheson da' xinj zjanaque' lo na' da' mal da' chnabian' legaque'. <sup>35</sup>Bene' zoa liž xan xšine' bi naque' xi'in ben' gan' chone' žinna', san šlož güejeze zoe' txen len legaque' len bi da' chesone'. San bene' golje' txen len le', bate'teze zoe' len legaque'. <sup>36</sup>Neda' naca' dogualje Xi'in Dios na' guac gona' cont da' malen' bich nabi'an yichjlažda'olen' na' yechojle lo ne'en na' bich gaquen ca xanle. <sup>37</sup>Nezda' nacle diaža che da' Abrahanna', perw bia'cze cheyiljwlaže'le nac gonle cont gotle neda'. Na' chonle ca' da' bi chzenagle xtižan'. <sup>38</sup>Neda' cho'a diža' che da' ca' ba ble'eda' cate' zoa' cuit X'an', na' le'e lecze chonle da' ba benele gwna xalen'.

<sup>39</sup>Nach bene' ca' gose'e Jesúsen':  
—¿Bixčen' žo' ca'? Neto' nacto' diaža che da' Abraham.

Na' gož Jesúsen' legaque':  
—Šaca' nacle dogualje diaža che da' Abraham, gonle can' ben

da' Abrahanna' šaca'. <sup>40</sup>La'czla' ba bzejni'ida' le'e diža' li da' benda' gwna Diosen', bia'cze cheyiljwlaže'le nac gonle gotle neda'. Da' Abrahanna' bi bene' can' chonlen'.

<sup>41</sup>Toz can' chonle len xalen'.

Nach bene' ca' gose'e le':

—Toz Diosen' naque' Xato' na' bi chzenagto' che nochle bene'.

<sup>42</sup>Jesúsen' gože' legaque':

—Šaca' Diosen' naque' xale gaquele neda', le neda' gwza'a gan' zoa Diosen'. Bi za'a nga to gualaza', Diosen' gwsele' neda'. <sup>43</sup>¿Bixchen' bi chejni'ile dan' chnia' le'e? Nežda' bi chejni'ile dan' bi chaclaže'le gwzenagle chia'. <sup>44</sup>Satanás dan' chnabia' da' xigüe' ca' naquen xale, nachen' chebele chonle can' chnalažen'na'. Len ba naquen güet bene' cate' gwxete yežlion'. Na' bi chzenaguen che diža' li, le diža' li bi yo'on lo' yichjlažda'ogüen. Cate' chnen diža' güenlaže' chnen con can' nac cuinen, le naquen güenlaže' na' yogo' diža' güenlažen' zan' len len. <sup>45</sup>Na' neda', da' cho'a diža' li, bi chejle'le chia'. <sup>46</sup>Bibi da' mal nona' na' da'nan' ne tole bi gac gwlo'ele še bi da' mal ba bena'. Neda' zoateza' cho'a diža' li, ¿bixchen' bi chejle'le chia'? <sup>47</sup>Bene' ca' chon Diosen' legaque' cuent ca xi'ine' chosozenague' xtižen'. Na' le'e bi chzenagle chen' da' bi nacle xi'ine'.

**Ba zoacze Criston' cate'  
golje da' Abraham**

<sup>48</sup>Nach bene' gwnabia' che nación Israel cheton' gose'e Jesúsen':

—Can' ba gwnacztó' nacbia'cze naco' txen len bene' Samaria ca' na' yo'o to da' xigüe' lo'

yichjlažda'oguoñ' chonen ga chol chñenošo'.

<sup>49</sup>Jesúsen' gože' legaque':

—Bi yo'o da' xigüen' lo' yichjlažda'ogua', san chonxena' Xan' na' le'e chñele chia'. <sup>50</sup>Bi chyiljua' no gonxen neda', perw zoa Xan' chaclaže' benachen' yesonxene' neda' na' Xan' choglagüen' chele naple doļa' da' chñele chia'. <sup>51</sup>Chnia' le'e to da' zejen, note'teze bene' yosozenague' xtižan', guata'cze yela' mban che' toli' tocañe.

<sup>52</sup>Nach da' yoble bene' gwnabia' ca' gose'e le':

—Nach beyož gwñezetó' yo'o to da' xigüe' lo' yichjlažda'oguoñ' chonen ga chol chñenošo'. Ba got da' xozxta'ocho Abrahanna', na' len bene' ca' gosó'e xtiža' Diosen' cani' lecze ba gosate', na' chñenošo' žo' bene' chosozenag xtižon' gata' yela' mban che' toli' tocañe. <sup>53</sup>¿Chacdo' zaca'cho' ca da' xozxta'ocho Abrahanna' len bene' ca' gosó'e xtiža' Dios bene' ba gosat? ¿Noxen' chacdo' naco'?

<sup>54</sup>Gož Jesúsen' legaque':

—Šaca' chonxen cuina' bibi zejen, perw Xan' ben' žale naque' Dios ben' chejnilaže'le chonxene' neda'. <sup>55</sup>Le'e bi nombia'ine', san neda' nombi'ane'. Šaca' nia' bi nombi'ane' gaca' bene' güenlaže' can' naclena'. Perw neda' nombi'ane' na' chzenaga' xtižen'.

<sup>56</sup>Da' Abrahanna' ben' žale nac xozxta'ole bebecgüede' gwñezde' le'ede' ba za'a len benachen' na' zoe' mbalaz ba ble'eden'.

<sup>57</sup>Na' gose' bene' blao che nación Israel cheton' le':

—Bina' gacdo' šiyon iz. Chñenošo' žo' ba ble'edo' Abrahanna'.



<sup>58</sup> Jesúsen' gože' legaque':

—Chnia' le'e to da' zejen, ba  
zoacza' neda' cate' bina' galje  
Abrahanna'.

<sup>59</sup> Nach gosenize' yej da' yosochele'  
le', perw Jesúsen' bcuaše' na' beze'e  
yodaon'. Neca gosacbe'ede' cate'  
bedie' ladjogaque'.

**Jesúsen' bene' cont ble'e  
to bene' golje' nchole'**

**9** Txen zej Jesúsen' len bene'  
ca' zjanaque' le' txen cate'  
besele'ede' to bene' byo golje'  
nchole'. <sup>2</sup>Na' gose'e Jesúsen':

—Maestrw, ¿non' nap doła' golje  
benga nchole', še le' o še xaxne'en?

<sup>3</sup>Na' Jesúsen' gože' legaque':

—Benga golje' nchole' gague da'  
nape' doła' na' gague da' zjanap  
xaxne'en doła', san golje' ca' cont  
le'ele can' chon Diosen'. <sup>4</sup>Cheyała'  
goncho xšin Dios ben' gwsela' neda'  
šlac ne' de latje. Gwžin ža bich  
gala' gonchon. <sup>5</sup>Šlac ne' zoa' yežlion'  
chgua'a be'ni' lo' yichjlaždao'  
benachen'.

<sup>6</sup>Beyož gwne' ca' gwcho'on xene'  
lo yon' na' bene' late' gona' len xene'  
na' gwdebe' gonan' yejlao bene'  
lcholen'. <sup>7</sup>Nach gože' ben':

—Gwey jaydib yejlaguon' cho'a  
yel da' nzi' Yel Siloé.

(Na' Siloé zeje diža' Nsela'.) Na'  
gweyje' na' beyib yejlagüen' na'  
cate' beze'e zjayde' ba chle'ede'. <sup>8</sup>Na'  
bene' gualiž che' na' nochle bene' ba  
besele'e le' yogó' ža cate' ne' ncholen'  
gosene':

—¿Gague bengan' ba ble'echo chbe'  
chnabe' carida?

<sup>9</sup>Na' bale' gosene':

—Le bengan'.

Na' yebale' gosene':

—Bi nac le' san yeto bene' yoblen',  
perw toz ca naque' len benga.

Perw ben' beyaquen' gože'  
legaque':

—Nedan'.

<sup>10</sup>Na' gose'ene':

—¿Nac goquen' gwzolao chle'edo'?

<sup>11</sup>Na' gože' legaque':

—To bene' le Jesús bene' late'  
gona' na' gwdeben' yejlaguan' na'  
gože'nda': “Gwey cho'a yel da' nzi'  
Yel Siloé na' jaydiben'.” Na' gwy'a  
na' beyiban' na' gwzolao chle'eda'.

<sup>12</sup>Nach gose' bene' ca' le':

—¿Gaxxe bena'?

Na' gože' legaque':

—Bi nezda'.

**Bene' fariseo ca' gosenabyože'  
nac goquen' ba chle'ede'**

<sup>13</sup>Nach goseche'e ben' goc lcholen'  
gan' že' bene' fariseo ca'. <sup>14</sup>Nac to  
ža che Dios caten' Jesúsen' bene'  
gonan' dan' gwdebe' yejlao bena'  
cont ble'ede' na' bi de lsens gon neto'  
bene' Israel žin ža che Diosen'. <sup>15</sup>Na'  
bene' fariseo ca' lecze gosenabde' le'  
nac goquen' ba chle'ede'. Na' gože'  
legaque':

—Gwdebe' gona' yejlaguan' na'  
jaydiban' na' na'a ba chle'eda'.

<sup>16</sup>Nach bal' bene' fariseo ca'  
gosene':

—Nezecho bi zoa Diosen' len bena'  
beyone' bene' lcholen', le chone' da'  
bi cheyała' gone' ža che Diosen'.

Na' yebale' gosene':

—¿Nac gon to bene' güen da' xinj  
gone' yela' guac ca dan' ben benga?

Na' legacze' besechoje' chop cuen.

<sup>17</sup>Na' da' yoble gose'e ben' golje'  
nchole':

—¿Bi žo' le' che ben' bene' cont chle'edo'?

Na' bena' gwne':

—Naque' to bene' choe' xtiza' Dios.

<sup>18</sup>Na' bene' gwnabia' che naci6n Israel cheton' bi gosejle'e golje ben' nchole' na' na'a bach chle'ede'. Nach gosaxe' xaxne'ena'. <sup>19</sup>Na' gosenabde' legaque', gose'ene':

—¿Xi'inle benga ben' žale golje' nchole'? ¿Nacxe goquen' chle'ede' na'a?

<sup>20</sup>Xaxne'ena' gose'e legaque':

—Nezeto' bengan' xi'into', na' nezeto' golje' nchole'. <sup>21</sup>Perw bi nezeto' nac goquen' ba chle'ede' na'a, na' neca nezeto' non' ben cont ba chle'ede'. Ba zejczede' iz, le nabe cuine' cont g6e'e diža' naquen' goc.

<sup>22</sup>Xaxne'en gosene' ca' da' chesežebe' bene' gwnabia' ca', le bene' gwnabia' ca' ba gosechoglag6ien' bi yosolebe' lo' yodaon' note'teze bene' g6e'e diža' chejle'e Jes6sen' naque' Cristo ben' chesebeze' yedenabi'e.

<sup>23</sup>Da'nan' xaxne'en gosene': "Ba zejczede', le nabe cuine'."

<sup>24</sup>Nach da' yoble gosaxe' ben' golje' nchole' na' gose'ene':

—Be' diža' li lao Diosen', le bi naquen can' gwnao' bache. Nezeto' ben' gwnao' beyon le' naque' bene' g6en da' xinj.

<sup>25</sup>Na' ben' beyac yejlag6ien' gwne':

—Bi nezda' še naque' bene' g6en da' xinj o še bi naque'. Da' nezda', goca' bene' lchoł na' na'a ba chle'eda'.

<sup>26</sup>Na' da' yoble gose'e le':

—¿Bi bende' le? ¿Nac benen' chle'edo'?

<sup>27</sup>Na' gože' legaque':

—Ba gwnicza' le'e na' bi chzenagle. ¿Bixchen' chaclaže'le yenian'

da' yoble? ¿Len le'e chaclaže'le gwzenagle che'?

<sup>28</sup>Nach gosezi'diže' le', gosene':

—Le' naco' txen len le', san neto' nacto' txen len da' Moisés. <sup>29</sup>Nezeto' Diosen' be'lene' Moisésen' diža', perw benga bi nezeto' ga ze'e.

<sup>30</sup>Na' ben' golje' nchole' gože' legaque':

—iDa' zaca' yebanecho, bi nezele ga za' benga, na' bene' cont chle'eda'! <sup>31</sup>Nezecho Diosen' bi chzenague' che bene' cheson da' xinj, san chzenague' che note'tez bene' chejnilaže' le', bene' cheson can' chnalažen'. <sup>32</sup>Na' gwzolaoten cate' gwxe yežlion' bina' yenecho zoa bene' chac chone' cont chle'e bene' golje' nchole'. <sup>33</sup>Šaca' bengan' bi ze'e gan' zoa Diosen' bibi gac gone'.

<sup>34</sup>Bene' fariseo ca' beselocchg6ie' na' gose'e le':

—Len' goljtio' naco' bene' mal juisyw, ¿chacdo' zaco' gwseddo' neto'?

Na' besyebeje' le' lo' yodaon'.

**Bene' ca' zjanchoł yichjlažda'ogaque'**

<sup>35</sup>Jes6sen' bende' diža' che ben' beyac yejlag6ien' can' goc che' ba besyebeje'ne' lo' yodaon' nach jašague'ne' na' gože'ne':

—¿Chejnilažo' Xi'in Diosen' ben' gwsełen'?

<sup>36</sup>Na' gož ben' le':

—Bene', gwna neda' non', cont šejnilaža'ne'.

<sup>37</sup>Jes6sen' gože'ne':

—Nedan' ben' ba ble'eczedo' na' nedan' choe'lena' le' diža'.

<sup>38</sup>Nach bena' bzoa xibe' benxene' Jes6sen', gwne':

—Xana', chejnilaža' le'.

<sup>39</sup>Nach Jesúsen' gwne':

—Za'a yežlio nga cont gata'bia' non' nap doĵa' na' non' bi nap doĵa'. Zedeyena' cont bene' ca' bi chesejni'i bich yesaque' ca bene' lĥol, na' zedeyena' cont bene' ca' chesacde' chesejni'ide' yesaque' ca bene' lĥol len yichjlažda'ogaquen'.

<sup>40</sup>Nach baĵ bene' fariseo ca' nita' gaĵa'ze caten' gwne' ca' na' gosende' xtižen', gose'e Jesúsen':

—¿Chacdo' len neto' nacto' ca bene' lĥol?

<sup>41</sup>Nach Jesúsen' gože' legaque':

—Šaca' nacle ca bene' lĥol, bibi xtoĵa'le de, san žale chejni'ile, na' da'nan' naple doĵa'.

Jempl che bene' güeye' xila' ca'

**10** Chnia' le'e to da' zejen, bene' bi cho'o lo' le'ej che xilan' gan' nac cho'a puerten' san chepe' ga yoble cont cho'e, benan' naque' bene' gwban. <sup>2</sup>Ben' chsaljue' na' cho'e cho'a puerten', len' güeyoe' xilan'. <sup>3</sup>Na' ben' chap cho'a puert le'ej che xilan' chsaljue' puertan' cont cho'o ben' chyoeban'. Na' xila' ca' chosozenagba' xtiža' ben' chyoeban', le zjanombia'ba' ši'en cate' chaxe'ba' cho'e lagacba' cont chbeje'ba'. <sup>4</sup>Na' cate' ba gwleje' yogo'ba' lo' le'ejen', chbialagüe' laogacban', na' xila' che' ca' chesa'oba' le' da' zjanombia'ba' ši'en. <sup>5</sup>Bi chesa'oba' bene' yoble, san chosyoxonjba' dan' bi zjanombia'ba' ši'en.

<sup>6</sup>Jesúsen' be'e diža' che bene' güeye' xila' ca' par bzejni'ide' bene' ca' že'na', perw bi gosejni'ide' bi zejen dan' gože' legaquen'.

Jesúsen' zaca'lebde' ca to bene'  
chyoe' xila' chen' binlo

<sup>7</sup>Nach Jesúsen' bsed blo'eĥde' legaque' yeto, gwne':

—Chnia' le'e to da' zejen, nedan' naca' ca cho'a puert gan' cheso'o xila' ca' lo' le'ej chegacban'. <sup>8</sup>Yogo' nochle bene' ba goside' cate' za' yida' neda', bene' bosozejni'ide' diža' güenĵaže', guac nacho zjanaque' bene' gwban. Perw bene' chesejnilaže' neda' bi chosozenague' xtiža' bene' ca'. <sup>9</sup>Neda' naca' ca cho'a puert che le'ej che xila' ca'. Na' note'tez bene' yesejnilaže' neda', gata' yeĵa' mban chegaque' toĵi tocanē na' soacza' gaclena' legaque' bite'tez da' cheseyažjde'.

<sup>10</sup>Bene' ca' žia' bene' gwban chesaclaže' yesone' cont bene' ca' žia' zjanaque' xila' chia' yesebejyichje' xtižan' na' yosozenague' che legaque'. Na' še yosozenague' che legaque', yesebiaye'e. Na' neda' za'a chnežjua' yeĵa' mban toĵi tocanē che bene' chesejnilaže' neda' cont nite' güenchgua. <sup>11</sup>Neda' binlo chgüia chna'a bene' chesejnilaže'nda' ca chon to bene' güeye' xila' bene' chyoe' xila' chen' binlo. Na' da' nži'ida' legaque', da'nan' chzane cuina' gata' neĥe legaque'. <sup>12</sup>Nita' bene' chesezi' laxjue' cont chosoyoe' xila' che bene'. Na' bene' chesezi' laxjue' chesebejyichje' xila' ca' cate' chesele'ede' za' beco'yo, le xila' ca' bi zjanacba' be chegaque'. Chesoe' latje chniz beco'yon' xila' ca' na' chesoslasba' legacba'. <sup>13</sup>Na' bene' bi zjanaque' xan xila' ca' chosoxonje' da' bi zjanži'ide' xilan', le bi zjanac xilan' be chegaque', san chosoyoeba' dan' chesezi' laxjuen'.

14'Neda' binlo chgüia chna'a bene' ca' chesejnilaže'nda', chona' ca chon to bene' chyoe' xila' chen' binlo.

Na' nombi'a bene' ca' chesejnilaže' neda' na' legaque' zjanombi'e neda'.

15'Nombi'a legaque' ca Xan' nombi'e neda' na' neda' nombi'a Xan'. Na' da' nži'ida' legaque' chzane cuina' gata' neche legaque'. 16'Nita' bene' yoble bene' bi zjanaque' bene' Israel bene' yesejnilaže' neda'. Na' cheyała' šjatoba' legaque' cont yosozenague' chia', nach yesaque' toze len yezica'chle bene' ba chesejnilaže' neda' na' toz neda' gwgüia na'a yogo'lole'.

17'Chzane' cuina' yesot bene' neda', na' techle yebana' da' yoble. Na' Xan' chacchde' neda' le chazlaže' da' chona' ca'. 18'Nono checa'a yela' mban chian' san chzanlaže' cuina' gata'. Guac zane cuina' yesote'nda' na' lec'z guac yeyas yebana' ladjo bene' guaten', can' non Xan' mandawd gona'.

19'Na' da' yoble bene' nación Israel cheton' besechoje' chople neche xtiža' Jesúsén'.

20'Zane' gosene': —Yo'o da' xigüen' yichjlažda'ogüe', nan' chol' chñenoše'. ¿Bixchen' chzenagle xtižen'?

21'Na' yebałe' gosene':

—Bene' yo'o da' xigüen' yichjlažda'ogüen' bi gac gwšalje' ca'. ¿Guac gon da' xigüe' cont le'e bene' lchol'?

**Bene' gwnabia' che nación  
Israel besegue'ede' Jesúsén'**

22'Na' cate' bžin ža gwyo'o lni dan' chesone' chjasyeze'ede' žan' beyož besyeyone' yodao' blao che Diosen', ba bžin tiemp zag Jerusalénna'.

23'Na' Jesúsén' chde' chašil che yodao' blaon' gan' nzi' Chašil che Salomón. 24'Na' bene' gwnabia' che nación Israel cheton' gosechje' Jesúsén' na' gose'ene':

—¿Bixchen' chono' cont chacžejlaže'to' še naco' Cristo ben' chbezto' sela' Diosen' cont yedenabi'e nación chechon'? Še len' Criston', gwnatega neto' zaca'lao.

25'Na' gož Jesúsén' legaque':

—Ba gwnia' le'e na' bi chejle'le. Da' ca' ba bena' len yela' guac che Xan' chlo'en naca' bene' gwsele'.

26'Perw bi chejle'le chia' da' bi nacle txen len bene' chesejnilaže' neda', can' ba gwnicza' le'e.

27'Nombi'a bene' chesejnilaže' neda', na' žia' legaque' xila' chia'. Legaque' chosozenague' chia' na' chesone' con can' chzejni'ida'ne'. 28'Na' chnežjua' legaque' yela' mban toli tocane na' gwbat yesebiaye'e na' nono gac yesyeca'a legaque' lo na'. 29'Xan' ba gwleje' bene' ca' chesejnilaže' neda' cont chgüia chna'a legaque'. Na' nono gac yesyeca'a legaque' lo na' Xan', le nape' la'zelagüe yela' chnabia' xen. 30'Neda' na' Xan' toz bene' nacto'.

31'Beyož gwne' ca' bene' gwnabia' ca' gosenize' yej cont yosochelēnen'.

32'Na' gož Jesúsén' legaque':

—Da' zan da' güen ba ble'ele bena' len yela' guac che Xan'. ¿Che nonna' chaclaže'le gwchelle neda' yej?

33'Na' bene' gwnabia' ca' gose'e le':

—Gague che yela' guac ca' benon' gwchelto' le' yej san da' chñeya'o che Diosen'. Con benachze le' na' chon cuino' ca Dios.

34'Na' gož Jesúsén' legaque':

—Nezeczzele can' nyoj Xtiža' Diosen' dan' nsedle gan' žan: “Neda' ba

gwnia, le'e nacle ca neda' Dios."

<sup>35</sup>Na' Xtiža' Diosen' da' nyojen gague da' te chen', na' lenna' žan Diosen' gwne' che bene' ca' bosozenag xtižen' cani' gosaque' ca le'. <sup>36</sup>Diosen' gwleje' neda' cont gaclena' benachen' že' yežlio nga na' inacxečen' ža le'e chneya'a che Diosen' da' žia' naca' Xi'ine'? <sup>37</sup>Še dan' chonan' bi chlo'en yela' guac che Xa' Diosen', bi cheyała' šejle'le chia' šeca'. <sup>38</sup>Perw še chacbe'ele chona' da' zaca' len yela' guac che Diosen', cheyała' šejle'le len' gwsele' neda', la'czla' bi chaclaže'le šejle'le xtižan'. Na' še šejle'le che da' ca' chonan', nachen' nezele zoa Xan' len neda' na' neda' zoa' len le', le toz benen' nacto'.

<sup>39</sup>Nach da' yoble gosaclačže' yesezene' Jesúsen' perw bitw bdole'.

<sup>40</sup>Jesúsen' beyeje' jayzoe' yešla'a yegw Jordanna' latje gan' gwzoo da' Juanna' šlac ne' chzoe' bene' nis.

<sup>41</sup>Na' bene' zan ja'ac gan' gwzooen' cont bosozenague' xtižen' na' gosene':

—Da' Juanna' ne to yela' guac bi bene', perw yogo'lol dan' gwne' che benga naquen da' li.

<sup>42</sup>Na' bene' zan gosejnilaže' Jesúsen' latje na'.

### Can' goc cate' got Lázaro

**11** <sup>1-2</sup>Na' gwzoo to bene' gocšene bene' yež Betania le' Lázaro. Betania naquen laž María na' bene' bile' Marta, na' legaque' zjanaque' bene' zan Lázaron'. María nan' bzoe' to set zix ni'a Xancho Jesúsen' na' bosbiže' ni'en len yiša' yichje'. <sup>3</sup>Na' bene' zan Lázaron' gosesele' diža' gan' zoa Jesúsen', chese'e le':

—Xanto', bene' xmigo' Lázaron' ba chacšende'.

<sup>4</sup>Cate' gwneze Jesúsen' chacšene Lažaron', na' gwne':

—Ca nac yižgüe' chen', bi che'eden' cont yela' goten' gonen le' gan, san che'eden' cont gacbe'ele catec bene' zaca' nac Diosen' na' gacbe'ele naca' bene' zaca'chgua, neda' naca' dogualje Xi'in Dios.

<sup>5</sup>La'czla' Jesúsen' chacde' Martan' len bene' bilen' na' len Lázaron',

<sup>6</sup>cate' gwneзде' chacšene Lázaron', bega'anche' yechope ža gan' zoen'.

<sup>7</sup>Nach gože' bene' ca' zjanaque' le' txen:

—Le šo'o šejcho distritw Judean' da' yoble.

<sup>8</sup>Na' gose'ene':

—Maestrw, bi ža na'zen' bene' gwnabia' che nación chechon' gosaclačže' yesote' le' yosochele' le' yej. ¿Da' yoble šejjo' na'?

<sup>9</sup>Jesúsen' gože' legaque':

—Lagüe žan' nsa' šižinw hor, na' bene' chda lagüe ža bi chchegüe', le nseni' gwbižen' lo yežlion'. <sup>10</sup>Na' bene' chda ba goł chchegüe', le nac choł.

<sup>11</sup>Gwde gwne' ca' nach gože' legaque':

—Bene' xmigwcho Lázaron' ba chtase' na' ša'a šjaysbana'ne'.

<sup>12</sup>Na' gose'ene':

—Xanto', še ba chtase' güeyacczede'.

<sup>13</sup>Jesúsen' gwne' ca' dan' gwneзде' ba got Lázaron', na' bene' ca' zjanaque' Jesúsen' txen gosacde' še chtaszen'.

<sup>14</sup>Nach Jesúsen' bochixgaten' bi zejenna' gwne' ca':

—Ba got Lázaron'. <sup>15</sup>Na' chebeda' bi gwzoo' na' šlac chacšende', cont

gona' šejle'le chia'. Le šo'o šejcho gan' de'na'.

<sup>16</sup>Nach ben' le' Tomás ben' bososi'e Tomás Cuaš gože' yezica'chle bene' ca' zjanaque' Jesúsen' txen:

—Le šo'o cont gatcho txen len Jesúsen' še yesote'ne'.

**Jesúsen' že' chac chosbane' bene' guat**

<sup>17</sup>Na' ja'aque' Betanian' len Jesúsen', na' cate' besežine'na' bene' Betania ca' bosozende' le' ba goc tap ža bosocuaše' Lázaron'. <sup>18</sup>Betanian' chin' gała'ze Jerusalénna' ca do gašjw hor. <sup>19</sup>Na' bene' zan bene' gualaž čhegaque' že' Jerusalénna' besežine' gan' zoa Martan' len Marían' cont yeso'e legaque' yela' chxenlaže' da' got bene' zangaquen'.

<sup>20</sup>Nach Martan', cate' gwnežde' Jesúsen' ba bžine' cho'a yežen', na' gwze'e jašague'ne'. Na' Marían' bega'ane' yo'ona'. <sup>21</sup>Nach Martan' gože' Jesúsen':

—Xana', šaca' zo' nga caten' gocšene bene' zanan' bilja gote' šaca'. <sup>22</sup>Na' nezda' la'czla' ba gote', bite'tez da' nabdo' Diosen' gone', gonczen'.

<sup>23</sup>Nach gož Jesúsen' le':

—Güeban bene' zanon'.

<sup>24</sup>Nach Martan' gože'ne':

—Nezda' yebane' cate' yesyeban bene' guat ca' žan' te che yežlion'.

<sup>25</sup>Na' gož Jesúsen' le':

—Neda' chac chosbana' bene' guat ca' le' nsa'a yela' mban toli' tocane. Da'nan' bene' ca' yesejnilaže' neda', la'czla' yesate', guata' yela' mban čhegaque' toli' tocane. <sup>26</sup>Na' note'tez bene' nite' chesejnilaže' neda', gwbat yesebiaye'e. ¿Chejli'o da' nga chnia' le'?

<sup>27</sup>Na' gož Martan' le':

—Xana', chejli'a naco' dogualje Xi'in Dios. Chejli'a naco' Criston' ben' ba gwlezto' sela' Diosen' yežlion' yedenabi'e.

**Jesúsen' gwcheže' gan'  
bosocuaše' Lázaron'**

<sup>28</sup>Beyož gwna Martan' ca' beyeje' jayeže' María bilen' šizize:

—Ba bla' Maestron' cho'a yežen' na' chnie' le'.

<sup>29</sup>Na' Marían' cate' bende' dan' gož Martan' le' la' gwza'te' na' gwyeje' gan' zoa Jesúsen'. <sup>30</sup>Biña' žin Jesúsen' lagüe yežen' ca horen', ne' nga'ane' cho'a yežen' gan' jašag Martan' le'. <sup>31</sup>Na' bene' Jerusalén ca' nita' liž María, bene' cheso'e le' yela' chxenlaže' da' got bene' zanen', cate' besele'ede' gwza' Marían' nach gosa'aclene' le', gosacde' zeje' cho'a blojen' gan' ngaše' zjačeže'.

<sup>32</sup>Na' Marían' cate' bžine' gan' zoa Jesúsen' na' ble'ede' le', la' bzoate xibe' lagüen', gože'ne':

—Xana', šaca' zo' nga caten' gocšene da' bene' zanan', bilja gote' šaca'.

<sup>33</sup>Na' cate' ble'e Jesúsen' chbež Marían' na' lecze chesebež bene' Jerusalén ca' za'aclene' le', da' juisyw da' goque Jesúsen' na' bžaglagüe' lo' yichjlažda'ogüen'.

<sup>34</sup>Na' gože' legaque':

—¿Ga bcuaše'lene'?

Na' gose'e le':

—Xanto', yo'o na' le'edo'.

<sup>35</sup>Na' gwchež Jesúsen'. <sup>36</sup>Na' bene' Jerusalén ca' gosene':

—Le na' catequen' chacde' le'.

<sup>37</sup>Na' bale' gosene':

—Bengan' bene' ga ble'e bene' lcholen', na' šaca' gwzoe' nga caten'

gocšene Lázaron', benlj'e cont bi gote'.

**Jesúsen' bosbane' Lázaron'  
ladjo bene' guaten'**

<sup>38</sup>Na' da' yoble da' juisyw da' goque Jesúsen' lo' lažda'ogüen'. Na' gweyje' gan' bosocuaše' ben'. Naquen to bloj na' da' to yej cho'enña'. <sup>39</sup>Na' Jesúsen' gože' bene' ca':

—Le ca'a yejen'.

Na' Martan' bene' zan da' Lázaron' gože'ne':

—Xana', ba chla' ben' zigw, le bach goc tap ža gote'.

<sup>40</sup>Na' gož Jesúsen' le':

—Ba gwnia' le' še šejnilažo' neda' na' le'edo' nac Diosen' bene' zaca' juisyw.

<sup>41</sup>Nach bene' ca' goseque'e yejen'. Na' Jesúsen' gwne'e yabale na' gwne':

—Xa', choxcleno' ba bzenago' chia'.

<sup>42</sup>Nezda' yogo' ni'a chzenago' chia', perw žia' ca' cont bene' ca' že' nga yesejle'e len' gwselo' neda'.

<sup>43</sup>Beyož boļ giüize' Diosen', gwne' zižje, gwne':

—Lázaro, bechoj.

<sup>44</sup>Nach la' bechojte Lázaron' ndobyoy ni'a ne'en to cint de lache' na' to bay ndobe cho'alagüen'. Na' Jesúsen' gože' legaque':

—Le yozaše' lachen' na' le gwsane' yeyeje'.

**Bosoxi'e yesezene' Jesúsen'**

(Mt. 26:1-5; Mr. 14:1-2; Lc. 22:1-2)

<sup>45</sup>Na' zan bene' Jerusalén ca' bene' ja'aclene' Marían' besele'ede' yela' guac da' ben Jesúsen' na' gosejnilaže'ne'. <sup>46</sup>Perw baļ bene'

Jerusalén ca' ja'aque' lao bene' fariseo ca' na' jaseže' legaque' Jesúsen' bosbane' Lázaron'.

<sup>47</sup>Nach bχoz gwnabia' ca' che neto' bene' Israel len bene' fariseo ca' bosyotobe' yogo'loļ bene' ca' chesenabia' nación chechon'. Na' bosoxi'e gosen'e':

—¿Nac goncho? le yela' guac zan chon benga. <sup>48</sup>Na' še nacho jayenna', yogo'ze bene' yesejnilaže'ne', na' yesid bene' nación Roma na' yeseque'e yodao' blao chechon' na' yosožiaye'e nación chechon'.

<sup>49</sup>Na' to bene' gwnabia' zoa ca' horen' le' Caifás. Le' naque' bχoz blao lo izen'. Na' gože' legaque':

—Le'e gague bi nezele. <sup>50</sup>Na' bi chache'ele napen chio' cuent toz ben' gat, clal ca cuiayi' yogo'cho lente nación checho nga.

<sup>51</sup>Gague con ca gwnalaže'ze Caifásen' gwne' ca', san da' naque' bχoz blao iznan', Diosen' bene' ga gwne' ca' cont gwdixjue'ede' gat Jesúsen' neche nación chechon'. <sup>52</sup>Na' ca nac dan' gaten', gague gate' neche nación cheto' na'zen' san gate' cont yogo' bene' ba gwlej Diosen' yesaque' xi'ine' gate'teze nación, yesaque' txen yesejnilaže'ne'. <sup>53</sup>Ca' goquen', žana' bene' gwnabia' ca' gosezolagüe' bosoxi'e nacle yesone' yesote' Jesúsen'.

<sup>54</sup>Na' da'n'an' Jesúsen' bich gwdacze' con can' nla'ze gan' že' bene' gwnabia' che nación chechon'. Nach gwze'e distritw Judean' na' gwche'e bene' ca' zjanaque' le' txen to yež da' nzi' Efraín da' chi' gala'ze latje dašen', na' besyega'ane' na'.

<sup>55</sup>Na' ba zoa gala' lni' pascw che neto' bene' Israel. Na' bene'



zan bene' za'ac to to yež zja'aque'  
Jerusalénna' cate' za' gala'le l̄nin'  
cont yeson cuine' xilaže' can' ža ley  
četon'. <sup>56</sup>Na' besyeyiljue' Jesúsen'  
do gan' zoa yodao' blaon' na' cate' bi  
besyeželde'ne' na' gose' l̄ježe':

—¿Bi chaquele? ¿Güide' l̄ni nga, še  
bi yide'?

<sup>57</sup>Gosene' ca' le b̄xoz gwnabia'  
četo' ca' na' bene' fariseo ca' ba  
gosečoguen' še note'tez bene'  
nezde' gan' zoa Jesúsen' cheyala'  
gwzende' legaue' cont yesezene' le'.

**Marían' chgüe'e set zix̄ n̄i'a Jesúsen'**

(Mt. 26:6-13; Mr. 14:3-9)

**12** Na' yexop ža za' gala' l̄ni  
pascon', Jesúsen' gwche'e  
bene' ca' zjanaque' le' txen yež  
Betanian' gan' zoa Lázaron' ben'  
bosbane' ladjo bene' guaten'. <sup>2</sup>Na' bal̄  
bene' Betanian' bososin̄i'e to xše' da'  
gwdagw Jesúsen' cont gosonxene'ne'.  
Na' Martan' bdie' ye'la' guagw  
na' Lázaron' gwche'lene' bene' ca'  
cho'a mesen' txen len Jesúsen'. <sup>3</sup>Na'  
Marían', de ca do tya set zix̄ che' da'  
zaca'chgua la'ay na' naquen dogualje  
da' bchoj lo yag yej da' nzi' nardo.  
Na' jabigue' gala'ze xni'a Jesúsen' na'  
gwlo'e set zix̄en' n̄i'ena' na' beyoža'  
bosbižen' len yiša' yichje'. Na' doxen  
yo'ona' gwla'chguan ze set zix̄en'.  
<sup>4</sup>Na' Judas Iscariote xi'in̄ to bene' le'  
Simón, le' naque' to bene' šižinw ca'  
zjanaque' Jesúsen' txen, na' len' ba  
naquen gwdie' Jesúsen' lo na' bene'  
ca' chesegue'ede' le'. Na' Judasen'  
gwne:

<sup>5</sup>—¿Bixchen' bi bete' seten' na'  
gone' mechon' cont gaclenen bene'  
yaše'? le zacan' ca no laxjw mos da'  
gone' gan tgiüz.

<sup>6</sup>Judasen' gwne' ca' gague da'  
beyaše'de' bene' yašen' san da'  
goque' bene' gwban. Len' be'xue'  
mechw da' bosochin yogüe' na'  
gwlejlane' mechon'. <sup>7</sup>Nach Jesúsen'  
gože'ne':

—Bibi ye'ln̄e', le ba bene' da' non  
gone' len neda' che ža cate' gaša'.

<sup>8</sup>Bene' yaše' ca' nita'cze' len le'e  
bate'teze, san neda' bich soacza'  
yēsša len le'e.

**B̄xoz gwnabia' ca' bosoxi'e  
yesote' Lázaron'**

<sup>9</sup>Na' bene' zan bene' Israel gualaž  
četon' gosenezde' zoa Jesúsen'  
lagüe' yež Betanian' na' ja'aque',  
gague cont yesele'ede' Jesús na'zen'  
san da' gosaclaže' yesele'ede' lencze  
Lázaron' ben' bosbane' ladjo bene'  
guaten'. <sup>10</sup>Na' b̄xoz gwnabia' che  
nación Israel četon' bosoxi'e le'cze  
yesote' Lázaron', <sup>11</sup>le bene' zan bene'  
Israel ba chesyecuase' len legaue'  
na' ba chesejnilaže' Jesúsen' dan'  
gosenezde' bosbane' Lázaron'.

**Jesúsen' beyo'e ciuda Jerusalénna' da'  
yoble**

(Mt. 21:1-11; Mr. 11:1-11; Lc. 19:28-40)

<sup>12</sup>Na' beteyo Jesúsen' len bene'  
ca' zjanaque' le' txen gosa'aque'  
Betanian' na' ja'aque' Jerusalén. Na'  
bene' zan chesežag Jerusalénna'  
da' ba zoa gala' l̄nin', na' zane' cate'  
gosenezde' žin Jesúsen' Jerusalénna',  
<sup>13</sup>besežaše' jaseleze' le' zjanoxe'  
no zin. Na' chesegüe'e l̄ban' che',  
chesene':

—iLeca bene' zaca' bengal Mbalaz  
ben' za' nga nsel̄a' Xancho Diosen'  
le' cont nabi'e. iMbalaz bene' naque'  
Rey che nación Israel čechon'!

<sup>14</sup>Na' bžel to burr dao' be gwžia Jesúsen', na' goc can' nyoj Xtiža' Diosen' žan:

<sup>15</sup>Le'e chonxenle Diosen' ciuda Jerusalénna', bi žeble;  
le na', ba za' Rey chelen' žie' to burr dao'.

<sup>16</sup>Na' bene' ca' zjanaque' Jesúsen' txen gague cate gosejni'ide' chac con can' bosozoj ben' gosoe' xtiža' Diosen' cani'. Beyož got Jesúsen' na' goc yogo' da' ca' gosaquen' cont bla'lagüe le Jesúsen' naque' bene' zaca' juisyw, cana'ch jasyeza'laže' diža' ca' da' zjanyoj che Jesúsen' na' gosejni'iden'.

<sup>17</sup>Bene' ca' besele'e cate' Jesúsen' bol güiže' Lázaron' na' bosbane' le' cont bechoje' lo' ban' gosoe'lene' bene' ca' že' lo' ciudan' diža' can' goquen'.

<sup>18</sup>Na' da'nan' bene' zan jaseleze' Jesúsen' da' ba gosende' diža' che yela' guac dan' bene' bosbane' Lázaron'.

<sup>19</sup>Nach bene' fariseo ca' gose' lježe':  
—Ba chle'ele bibi chac bi goncho.  
Yogo'ze bene' ba chosozenague' che'.

**To chope bene' griego gosēnabe' yesoe'lene' Jesúsen' diža'**

<sup>20</sup>Na' zjalen to chope bene' griego bene' ca' ja'aque' gosonxene' Diosen' lo lnin'. <sup>21</sup>Na' bene' ca' besežine' gan' zoa Felipen' ben' nac bene' Betsaida ga mbane distritw Galilean', na' gose'ene':

—Si'xenšco', chaclaže'to' güe'lento' Jesúsen' diža'.

<sup>22</sup>Na' Felipen' gwyeje' jane'e Andrésen' nach choptie' jasež' Jesúsen' ca'. <sup>23</sup>Nach Jesúsen' gože' legaque':

—Na'a ba bžin hor gac yogo'lol da' cheyla' gac cont la'lagüe naca' bene'

zaca' juisyw. <sup>24</sup>Žia' to da' zejen, še to trigon' bi yexinjen cate' lažon' lo yon', con chega'ancze tozen; perw še yexinjen na' yelan', da' zan trigon' gonēn. <sup>25</sup>Note'tez bene' con chi' yichje' gac güen chegaque' yežlio nga, bene' ca' yesebiaye'e. Na' note'teze bene' chesene' bibi nonen še bi gac chegaque' yežlio nga, šjasyezoe' len Diosen' toli tocanē.

<sup>26</sup>Na' note'tez bene' chesaclačē' yesone' xšinan', cheyla' yesejni'laže' neda' na' yosozenague' chia'. Na' gan' soa' neda' lecze na' yesezoa bene' ca' yeson xšinan'. Note'tez bene' yeson xšinan', Xan' gone' cont yesacxene'.

**Jesúsen' gwđixjue'ede' yesot bene' le'**

<sup>27</sup>'Ba chžaglagua' lo' yichjlažda'oguan'. ¿Chaquele nabda' Xan' yosle' neda' lo da' ca' ba zoa gac chia' na'a? Bitw gona' ca', le za'a cont gac chia' yogo' da' ca'.

<sup>28</sup>Nach bol güiže' Diosen', gwne':  
—Xa', ben len neda' cont yesacbe'e bene' naco' bene' zaca' juisyw.

Beyož gwne' ca' na' gwne' Dios ben' zoa yaban', gwne':

—Ba bena' len le' cont chesacbe'e bene' naca' bene' zaca' juisyw na' za' goncha' ca' yeto.

<sup>29</sup>Na' zan bene' ca' že' na' gosende' dan' gwna Diosen' na' gosene' gwzion' gwne'. Na' yebala' gosene':  
—To angl gwne' le'.

<sup>30</sup>Na' Jesúsen' gwne':

—Diosen' gwne' neda' zižje gague cont nezda' neda' chzenague' chia' san cont neze le'e. <sup>31</sup>Ba bžin ža Diosen' chogbi'en' che bene' ca' bi chesejle'e chia'. Na' ba bžin ža Satanás dan' chnabia' da' xigüe' ca' na' dan' chnabia'te bene' ca' bi

chosozenag che Diosen' solao nit yela' chnabia' chen. <sup>32</sup>Na' cate' yeselise' neda' to le'e yag, cana'ch gona' cont zan bene' že' doxen lo yežlion' yesejnilaže' neda'.

<sup>33</sup>Gwne' ca' cont gosenezde' yesot bene' le' yosode'ene' to le'e yag cruz. <sup>34</sup>Na' bene' ca' že'na' clele gosejni'ide' dan' gwnen' na' gose'e le':

—Ba beneto' can' že Xtiža' Diosen' da' nyojen, na' nezeto' žan Cristo ben' sela' Diosen' yedenabi'e nación chechon' soe' toli' tocane. Na' le' žbixchen' žo' naco' bene' gwseła' Dios goljo' benač na' žo' yesote' le' to le'e yag cruz še ca'? žNox naco' šaca'?

<sup>35</sup>Nach Jesúsen' gože' legaque':

—Yešlož da'ozen' soa' len le'e, neda' nsa' be'ni' che yichjlažda'olen'. Le gwzenag chia' šlac ne' de latje šo' be'ni' chian' lo' yichjlažda'olen', cont bi cuiayi'lenle da' mal dan' chnabia' le'e. Ben' chda gan' nac choł bi chache'ede' gan' zeje'. Can' naquen len le'e. <sup>36</sup>Le šejnilaže' neda' šlac ne' zoa' len le'e, cont šo' be'ni' chian' lo' yichjlažda'olen'.

Gwde gwna Jesúsen' ca' beze'e na' bcuaše'de' legaque'.

### Zan bene' Israel bi gosejnilaže' Jesúsen'

<sup>37</sup>Na' la'czla' bene' Israel gualaž cheto' ca' besele'ede' ben Jesúsen' da' zan yela' guac, zane' bi gosejnilaže'ne'. <sup>38</sup>Goc can' bzoj da' Isaíasen' ben' be' xtiža' Diosen' cani', gwne':

Xanto', nono chejle' diža' dan' chyixjue'eton',  
na' nono chesache'e blo'o yela' guac chion'.

<sup>39</sup>Bi goc yesejle'e, le goc čhegaque' can' že yeto dan' bzoj da' Isaíasen', žan:

<sup>40</sup>Diosen' bene' cont bi gosejni'ide' na' cont zjanaque' bene' güedena.

Ba bene' cont chesele'ede' na' bi zjanezde' bi zejen, na' bi chesache'ede' lo' yichjlažda'ogaque' bi zejen dan' chlo'ede' legaque'.

Šaca' chesejni'ide' na' chesache'ede' bi zejen dan' chlo'eda' legaque', ba besyetingde' na' ba beca'a xtołagaquen' šaca'.

<sup>41</sup>Da' Isaíasen' gwne' ca' da' ble'ebande' nac Jesúsen' bene' zaca' juisyw nach be'e diža' che'.

<sup>42</sup>Na' la'czla' zanch bene' Israel gualaž cheto' ca' bi gosejnilaže' Jesúsen', bia'cze bene' zan na' len no bene' gwnabia' cheto' gosejnilaže'ne', perw bi gosoe' diža' chesejnilaže'ne' le besežebe' bich yosoleb bene' fariseo ca' legaque' lo' yodaon'.

<sup>43</sup>Gosaclaže'che' yesenite' binlo len benačen' clel ca' yesenite' binlo len Diosen'.

### Xtiža' Jesúsen' naquen da' žialao

<sup>44</sup>Nach Jesúsen' gwne' zižje gože' bene' ca' že'na':

—Bene' chesejnilaže' neda' gague neda'zen' chesejnilaže' san lente Xan' ben' gwseła' neda'. <sup>45</sup>Na' bene' chne'e neda' chle'ede' bene' gwseła' neda'. <sup>46</sup>Neda' za'a yežlio nga chgua'a be'ni' lo' yichjlaždao' bene' ca' chesejnilaže' neda', cont bi yesenite' yesonche' da' malen'. <sup>47</sup>Na' note'tez bene' nezde' can' ba gwnian' na' bi chzenague' chia', gague neda'

gwnežjua' castigw che xtolen', le bi za'a yežlion' cont gwnežjua' castigw che xtola' benachen', san za'a cont gwnežjua' yela' mban toli tocane che bene' yesejnilaže' neda'. <sup>48</sup>Perw de da' choglaon che bene' ca' bi chesejnilaže' neda' na' bi chosozenague' che dan' ba gwnian', xtižan' dan' ba bian', lenna' choglaon che bene' ca' zjanape' dola' cate' žin ža te che yežlion'. <sup>49</sup>Gague bia' diža' to gualaza', san Xa' ben' gwseļa' nedan' none' mandadw bin' cheyaļa' nia' na' bin' cheyaļa' gwsed gwlo'eda'. <sup>50</sup>Na' nežda' dan' none' mandadw nia' nsan' yela' mban toli tocane che bene' yosozenag chen. Na' da' li, con can' ža Xan', can' choe'lena' le'e diža'.

**Gwdib Jesúsen' ni'a bene'  
ca' zjanaque' le' txen**

**13** Na' Jesúsen' ba nežde' ba bžin ža yeze'e yežlion' na' yeyeje' gan' zoa Xe' Diosen', na' gocde' yogo' bene' ba chejnilaže' le' lo yežlio nga. Da'nana' za' gaļa' lni pascon' bzejni'ide' bene' ca' zjanaque' le' txen, le chacyane'czede' legaque'.

<sup>2</sup>Bač gwlo'o Satanásen' xbab lo' yichjlaždao' Judas Iscariote, ben' nac xi'in to bene' le Simón, cont gwdie' Jesúsen' lo na' bene' ca' chesegue'ede' le'. Na' ba zjanite' chesagüe' xše'. <sup>3</sup>Na' Jesúsen' nežde' Xen' ba bene' cont nape' la'zelagüe yela' chnabia', na' nežde' gan' zoa Diosen' gwze'e na' gan' zoe' nan' yeyeje'. <sup>4</sup>Da'nana' gwzože'e cate' ba chesyedagüe' xše' na' gwlečhje' xe' da' nyaze' cha'le na' gwxi'e to lache' da' bchej lsinen'. <sup>5</sup>Nach gwxi'e nis na' gwde'en to lo' ša' na' gwzologüe'

gwdibe' ni'a bene' ca' zjanaque' le' txen ca to mos, na' bosbiže' ni'agaquen' len lachen' nchej lsinen'.

<sup>6</sup>Na' cate' ba zoa chibe' ni'a Simón Pedro, Pedron' gože'ne':

—Xana', žle' chibo' ni'an'?

<sup>7</sup>Na' Jesúsen' gože'ne':

—Dan' chona' nga bi chejni'idon' na'a, perw gwžin ža cate' šejni'idon'.

<sup>8</sup>Na' gož Pedron' le':

—Gwbat gua'a latje chibo' ni'an'.

Jesúsen' gože'ne':

—Še bi chiban', bich gaco' txen len neda'.

<sup>9</sup>Na' Pedron' gože'ne':

—Xana', gague ni'a na'zen' chibo' še ca', san doxena'.

<sup>10</sup>Nach gož Jesúsen' le':

—Bene' noša' nazje', ni'e na'zen' chyažjen chibe', le doxen cuerp chen' naquen xilaže'. Can' nac le'e, nac lažda'olen' xilaže', la'czļa' gague yogo'le.

<sup>11</sup>Jesúsen' gwnežde' non' gwde' le' lo na' bene' chesegue'ede' le'. Da'nana' gwne': “Gague yogo'le nac lažda'olen' xilaže.”

<sup>12</sup>Na' cate' beyož gwdibe' ni'a yogüe', nach beyaze' xe' dan' chaze' cha'le na' bebi'e da' yoble cho'a mesen'. Na' gože' legaque':

—Čhejni'ile bi zejen dan' ba bena' nga len le'e? <sup>13</sup>Le'e nsi'le neda' Maestrw na' Xanle, na' güenczen' žale, le can' naca'. <sup>14</sup>Na' neda' la'czļa' naca' Xanle na' Maestrw chele, ba gwdiba' ni'alen' ca to mos, na' can' cheyaļa' gaclen lježle ca to mos. <sup>15</sup>Ba gwdiba' ni'alen' cont blo'eda' le'e cheyaļa' gonle can' ba benan'. <sup>16</sup>Chnia' le'e to da' zejen, note'teze mos bi naque' bene' blaoch ca xane', na' to bene' zej mandadw bi

zaca'che' ca bene' gwseļa' le'. <sup>17</sup>Še chejni'ile da' quinga na' gonle can' gwnian', nach soale mbalaz.

<sup>18</sup>'Bi žia' ca' che yogo'le. Nombi'a yichjlaždao' to to le'e ba gwleja' cont soale txen len neda'. Na' nezda' gac can' ža Xtiža' Diosen' da' nyojen žan: "Bene' gwdagw len neda' txen ba blej bšošje' neda'." <sup>19</sup>Chnia' le'e da' quinga cate' za' gac ca' cont cate' ba goc ca' soachachle šejle'le le naca' ben' gwseļa' Diosen' can' ba gwnia' le'e. <sup>20</sup>Chnia' le'e to da' zejen, bene' ca' chosolebe' note'tez bene' chseļa', neda'czen' chosolebe' še ca', na' bene' chosolebe' neda' lecze chosolebe' Dios bene' gwseļa' neda'.

**Jesúsen' gwne' toe' gwddie' le' lo na' bene' ca' chesegue'ede' le'**

(Mt. 26:20-25; Mr. 14:17-21; Lc. 22:21-23)

<sup>21</sup>Beyož gwna Jesúsen' ca' ba gwzolao chacyaše'chgüede' lo' yichjlažda'ogüen', na' bochixgaten' gwne':

—Da' li chnia' le'e, to le'e gwdelenda' lo na' bene' chesegue'e neda'.

<sup>22</sup>Na' bene' ca' zjanaque' le' txen con chesena' cho'alaog lježe' chesone' xbab che noen' gwne' ca'. <sup>23</sup>Na' toe' chi'e cuiten' dan' chaquegüe' Jesúsen' le'. <sup>24</sup>Nach Pedron' bene' señw len bena' cont gwñabde' Jesúsen' no chen' gwne' ca'. <sup>25</sup>Nach gwbigue' bago gože' Jesúsen':

—¿Non' gon ca'?

<sup>26</sup>Na' gož Jesúsen' le':

—Bena' gwnežjua' late' yetextilen' cate' ba blo'ojan' lo' nis yela' guagon', le'na' gon ca'.

Nach blo'oje' late' yetextilen' lo' nis yela' guagon' na' bnežjuen' Judas

Iscariote bene' nac xi'in to bene' le' Simón. <sup>27</sup>Na' beyož bnežjue' Judasen' yetextilen' la' gwyo'o gwyazte Satanás dan' chnabia' da' xigüe' ca' lo' yichjlaždao' Judasen'. Nach Jesúsen' gože' Judasen':

—Da' ba zoa gono' benen bedao'nez.

<sup>28</sup>Na' ne to ben' zjachi' cho'a mesen' bi gosejni'ide' bixchen' gože' le' ca'.

<sup>29</sup>Bale' gosacde' da' noxe' Judasen' bols mechon' Jesúsen' gože' le' šjaxi'e da' cheseyažjde' lo lñin' o šjanežjue' mechw da' chyažje no bene' yaše'.

<sup>30</sup>Nach cate' beyož gwdagw Judasen' pedas yetextil dan' bnežjw Jesúsen' le', la' bchojte'. Na' ba nac ba gol' gual.

**To da' cobe da' non Jesúsen' mandadw goncho**

<sup>31</sup>Gwde bchoj Judasen', Jesúsen' gwne':

—Diosen' gwseļa' neda' golja' benach na' na'a ba nla'laon naca' bene' zaca' juisyw, na' neda' lecze ba chlo'a Diosen' naque' bene' zaca' juisyw.

<sup>32</sup>Na' dan' chlo'a naque' bene' zaca', lecze le' gwlo'e naca' bene' zaca', na' la' gontien' na'a. <sup>33</sup>Xi'inda'ogua', yešložga soa' len le'e. Na' yeyiljwle neda', na' chnia' le'e dan' goša' bene' gwnabia' che nación Israel chechon', bi gac sa'lenle neda' gan' yeya'an. <sup>34</sup>Na' to da' cobe chžia' bia' gonle, gaque lježle tole yetole. Can' chacda' le'e, lecz can' cheyala' gaque lježle tole yetole. <sup>35</sup>Na' yeseneze yogo'lol bene' nacle neda' txen še soaczle gaque lježle tole yetole.

**Jesúsen' gwne' Pedron' bi chebe' nombi'ene'**

(Mt. 26:31-35; Mr. 14:27-31; Lc. 22:31-34)

<sup>36</sup>Na' Simón Pedron' gože' Jesúsen':

—Xana', ígan' yeyejo'?

Na' gož Jesús'en' le'.

—Gan' yeya'an bi gac sa'leno' neda' n̄a'a, perw techle yido' ga'oguo' neda'.

<sup>37</sup>Na' Pedron' gože' le'.

—Xana', íbixchen' bi gac sa'lena' le' n̄a'a? Gwzanlaže' cuina' gata' še chonon byen cont gaclena' le'.

<sup>38</sup>Na' gož Jesús'en' le'.

—ÍChacdo' gwzanlaže' cuino' gato' cont gacleno' neda'? Da' li chnia' le', cate' cuež jean' ba goc šon̄ n̄i'a bi chchebo' nombi'o neda'.

**Ben̄e' chesejnilaže' Jesús'en'**

**lecze zjanombi'e Xe' Diosen'**

**14** 'Bich gacžejlaže'le. Le šejnilaže' Diosen' na' lecze le šejnilaže' neda'. <sup>2</sup>Da' zan yo'o da' že' gan' zoa Xa' Diosen'. Ba gwnia' le'e šaca' bibi latje de chele, san yeya'a šjajenšagua' yo'o che to tole. <sup>3</sup>Na' cate' yeyož šjajenšagua' yo'o chele ca', cana'ch yida' da' yoble yechi'a le'e cont yedyezoale gan' šjayzoa' neda'. <sup>4</sup>Nezele gan' yeya'an' na' ba nezele nac gonle cont yežinle na'.

<sup>5</sup>Na' gož Tomás'en' le'.

—Xanto', bi nezeto' gan' yeyejo'. ÍNacxe gac nezeto' nac gonto' yežinto' na'?

<sup>6</sup>Jesús'en' gože'ne'.

—Neda' naca' nezen' na' nsa'a yogo' diža' li, na' toz neda' chac chnežjua' ben̄e' yel̄a' mban toli tocane. Ne toze ben̄e' bi yežine' gan' zoa Xan' še bi šejnilaže' neda'.

<sup>7</sup>Še nombia'yane'le neda', lente Xan' ba nombia'le še ca'. Na' bach nombia'ln̄e' n̄a'a na' ba ble'elne'.

<sup>8</sup>Na' gož Felipen' le'.

—Ben cont le'eto' Xaon', lezen' ch̄nabeto' le'.

<sup>9</sup>Jesús'en' gože'ne'.

—Felipe, šsa xen ba gwzoa' nga len le'e na' íbina' gombi'o neda'? Notetez ben̄e' ba ble'e neda' lecze Xan' ba ble'ede'. ÍBixchen' ch̄nabo' gona' cont le'ele Xan'? <sup>10</sup>ÍBi chejli'o zoa' len Xan' na' le' zoe' len neda'? Diža' da' choa' len le'e bi choan' to gualaza'. Xa' nan' zoe' len neda' na' len' chone' cont choa' dižan' chaclaže' gua' na' chona' bi da' chaclaže' gona'. <sup>11</sup>Le šejle' chia' zoa' len Xan' na' le' zoe' len neda'. Na' še bi chejle'le xtižan', le šejle' chia' dan' ba ble'ele chona' yel̄a' guac. <sup>12</sup>Na' chnia' to da' zejen, ben̄e' ca' chesejnilaže' neda', da' ca' chonan' lecze legaquen yesone'. Na' da' zaca'ch ca da' ca' yesone', le yeya'a gan' zoa Xan'. <sup>13</sup>Na' bite'teze da' nabele Xan' lagüe da' chejnilaže'le neda' naca' Xi'ine', gonan', cont gwlo'a nac Xan' ben̄e' zaca' juisyw. <sup>14</sup>Bite'tez da' nabele gona' lagüe da' chejnilaže'le neda', neda' gonan'.

**Jesús'en' gwne' sele'**

**Spiritw che Diosen'**

<sup>15</sup>Še chaquele neda', gonle can' nona' mandaw. <sup>16</sup>Na' nabda' Xan' cont sele' Spiritw chen' soan len le'e toli tocane na' gaclenen le'e. Na' Spiritw che Diosen' gwzejni'in le'e da' nac da' li. <sup>17</sup>Na' ben̄e' bi chesejnilaže' Diosen', Spiritw chen' bi gac soan len legaque', le bi chesele'eden' na' naca chesejle'e še zoan. San le'e nombia'len, le zoan len le'e na' gwžin ža yedesoan lo' yichjlažda'olen' nabian' le'e. <sup>18</sup>Bi yocua'ana' le'e ca bi' güezebe.

Güidcza' yeto gan' zoale nga.

<sup>19</sup>Yešlož bene' ca' bi chesejnilaže' Diosen' bich yesele'ede' neda', perw le'e gwle'eczele neda'. Na' da' zoa' toli tocane, da'nan' soale toli tocane.

<sup>20</sup>Na' cate' žin ža yedesoa Spiritw che Diosen' lo' yichjlažda'olen', cana'ch gacbe'ele neda' zoa' len Xan' na' le'e zoale len neda' na' neda' zoa' len le'e. <sup>21</sup>Bene' zjanezde' dan' nona' mandadw yesone' na' chesonen', bene' ca' chesacde' neda'. Na' bene' ca' chesacde' neda' lecze chaque Xan' legaque', na' neda' lecze soa' gacda' legaque' na' gona' cont yesombia'che' neda'.

<sup>22</sup>Na' Judas (perw gague Judas Iscariote) gože'ne':

—Xanto', žbixchen' gono' cont neto' nezeto' zoaczo' len neto' na' bi gono' ca' len bene' bi chesejnilaže' Diosen'?

<sup>23</sup>Na' Jesúsen' gože'ne':

—Bene' chesacde' neda'

chosozenague' xtižan', na' Xan' lecze gacde' legaque' na' neda' len xan' yedesoa' len legaque'. <sup>24</sup>Bene' bi chesacde' neda' bi chosozenague' xtižan'. Na' diža' dan' chnian' bi cho'an to gualaza' san cho'a diža' da' ža Xan' ben' gwsela' neda'.

<sup>25</sup>Da' quinga ba gwnia' le'e šlac ne' zoa' len le'e. <sup>26</sup>Na' Xan' sele' Spiritw chen' soan lo' yichjlaždao' le'e chejnilaže'le neda' cont gaclenen le'e. Na' Spiriton' gwzejni'in le'e yogo' da' cheyała' nezele na' gonen cont šjayzalaže'le yogo' dan' ba gwnia' le'e.

<sup>27</sup>Na' hcua'ana' le'e na' chona' cont soa cuezle binlo len xbab chelen'. Chaclača' soa cuezle binlo len xbab chelen' can' zoa' neda'.

Nono benačh gac gone' cont soa cuezle binlo len xbab chelen' can' chac chona' neda'. Bi gacžejlaže'le, neca žeble. <sup>28</sup>Ba benele gwnia' yeya'a gan' zoa Xan' na' yida' da' yoble gan' zoale nga. Na' ša chaquelenda' ca cheyała', nach chebele dan' yeya'a gan' zoa Xan', le Xan' zaca'che' ca neda'. <sup>29</sup>Na' ba gwnia' le'e na'a bibi na' gac, cont soačhačhle šejnilaže'le neda' caten' gac ca'.

<sup>30</sup>Bich gua'a diža' zan len le'e, le ba za' Satanás dan' chnabia' da' xigüe' ca' na' dan' chnabia'te bene' ca' bi chesejnilaže' neda', na' tiļlenen neda', perw bi gonen neda' gan. <sup>31</sup>Chona' con can' non Xan' mandadw cont neze benačhen' chacda' Xan'. Le šo'o na'a, ba gole šejcho.

Jesúsen' zaca'lebe' ca to  
yag da' chbia uvas

**15** 'Neda' zaca'leba' ca to yag da' chbia uvas. Na' Xan' zaca'lebe' ca bene' chonši'i yaguen'. <sup>2</sup>Na' le'e chejnilaže'le neda' zaca'leble ca xoze' yaguen'. Na' to to xoze' yaguen' da' bibi chbian, chchoguen'. Na' to to xozen' da' chbia uvasen' chpe'en cont chbiachen da' zanch. <sup>3</sup>Na' le'e ba nacle ca to xozen' da' ba mpe'e, le bačh chzenagle xtižan' dan' ba be'lena' le'e. <sup>4</sup>Le soačhačh len neda' cont soačhačha' len le'e. Can' nac xoze' yaguen' bibi chac cuian to gualazen še bi nca'an le'e yaguen', can' naquen len le'e, bi gacle can' chazlaže' Diosen' še bi soačhačhle len neda'.

<sup>5</sup>'Neda' zaca'leba' ca to yag da' chbia uvas na' le'e zaca'leble ca



zozen'. Note'tezle še soachachle len neda' lecze soachacha' len le'e na' gacle can' chazlaže' Diosen', ca'aczen' nac che yag uvazen' dan' chbiachgua, le bibi gac gonle to gualazle. <sup>6</sup>Beñe' bi zoachache' len neda', gac che' can' chac len zoze' yag da' bibi chbia, le chesechoguen' na' chesebižen na' chžin ža chosotoben' chesadoen' yi' cont chesejen.

<sup>7</sup>Na' le'e še zoachachle len neda' na' zoachachle chzenagle xtižan', bite'tez da' chaclaže'le nabele Diosen', gonczen'. <sup>8</sup>Chacxen Xan' cate' zoale chonchguale dan' chazlažen', na' še chonle ca', yesacbe'e beñe' da' li chejnilaže'le neda' na' chzenagle chia'. <sup>9</sup>Ca Xan' chacde' neda', lecze ca' neda' ba chacda' le'e. Le soa le gon can' žia' cont gacbe'ele chacda' le'e. <sup>10</sup>Še gonle can' nona' mandadw, nachen' gacbe'ele chacda' le'e, le neda' chona' dan' non Xan' mandadw na' chacbe'eda' chacde' neda'.

<sup>11</sup>Ba gwnia' le'e ca' cont soale mbalaz ca mbalazen' zoa' neda'. Chaclaža' soale mbalaz juisyw. <sup>12</sup>Na' da' nga nona' mandadw gonle, gaque lježle tole yetole can' chacda' neda' le'e. <sup>13</sup>Nono zoa beñe' chaquech lježe' ca beñe' chzanlaže' cuine' gate' neche beñe' migw che'. Na' can' chona' neda'. <sup>14</sup>Na' le'e nacle migw chia' še chonle con can' nona' mandadw. <sup>15</sup>Na' bich žia' nacle beñe' güen žin chia', le to beñe' güen žin bi nezde' yogo' da' chon xanen', san žia' nacle migw chia'. Le yogo'lol da' ba benda' gwna Xan' ba bzejni'dan' le'e. <sup>16</sup>Gague le'e gwlejle neda' naca' Xanle. Neda' gwleja' le'e cont

chejnilaže'le neda'. Na' chseļa' le'e cont šjenle can' chazlaže' Xan', na' gague da' te che da' ca' gonlen'. Na' yogo'lol da' nabele Xan' gone' lagüe da' chejnilaže'le neda', gonczen'. <sup>17</sup>Da' nga da' chona' mandadw gonle, gaque lježle tole yetole.

**Beñe' bi chesejnilaže'**  
**Diosen' chesege'ede' beñe'**  
**chosozenag che Jesús'en'**

<sup>18</sup>Še beñe' bi chesejnilaže' Diosen' chesege'ede' le'e, le gon xbab ba chesege'eczede' neda' cate' za' yesegue'ede' le'e. <sup>19</sup>Ša nacle txen len beñe' ca' bi chesejnilaže' Diosen', nachen' yesacde' le'e can' chesaque' beñe' lježen' šaca'. Perw ba gwleja' le'e cont chzenagle chia'. Da'nan' chesege'ede' le'e da' bi nacle legaque' txen. <sup>20</sup>Le šjasa'laže' dan' gwnia' le'e: "Note'teze mos bi naque' blaoch ca xanen'." Bosoči bososaca' beñe' neda', na' lecze ca' yesonde' le'e. Na' balze beñe' bosozenague' xtižan', lecze balze' yosozenague' xtiža'len'. <sup>21</sup>Na' da' bi zjanombi'e Diosen' ben' gwseļa' neda', da'nan' yesonde' le'e yogo' da' ca', le chesege'ede' le'e da' chzenagle chia'.

<sup>22</sup>Ša neda' bi bedezejni'ida' legaque', bi zjanape' doļa' da' chesege'ede' neda' šaca'. Perw na'a bibi de da' yosode'ede' yesene' bi zjanape' doļa'. <sup>23</sup>Beñe' chgue'ede' neda' lente Xan' chgue'ede'. <sup>24</sup>Ba bena' yeļa' guac da' nono nochle na' gon, na' šaca' bi besele'eden' bi zjanape' doļa' da' chesege'ede' neda'. Perw ba besele'ede' da' ca' na' bia'cze chesege'ede' neda' len Xan'. <sup>25</sup>Na' chac can' nyoj Xtiža' Diosen' dan' chososede' gan' žan:

“Besegue'ede' neda' la'czla' bibi da' mal bena'.”

<sup>26</sup>Ba gwnia' le'e sela' Spiritw che Xa' Diosen' gaclenen le'e. Spiriton' san' gan' zoa Xan' na' gwzejni'in le'e diža' li chia' neda'. <sup>27</sup>Na' lecza' ca' le'e cheyala' güe'le xtižan', le ba gwzoale len neda' šlac ba gwđixjue'eda' xtiža' Xa' Diosen'.

**16** Ba gwnia' le'e yogo' da' ca' cont bi gacžejlaže'le. <sup>2</sup>Le yesyebeje' le'e lo' yodao' chegaque' ca', na' gwžin ža cate' notetez bene' yesote' le'e yesacde' chebe Diosen' dan' chesonen'. <sup>3</sup>Yesonde' le'e yogo' da' ca' le bi zjanombi'e Xan' neca neda'. <sup>4</sup>Žia le'e da' quinga cont cate' žin ža gac can' gwnian' nach šjaze'ele.

#### Da' chon Spiritw che Diosen'

'Bi gwnia' le'e yogo' da' ca' gac chele cate' za' gwzolao bzejni'ida' le'e xtiža' Diosen', le ne' zoacza' chaclena' le'e. <sup>5</sup>San na'a yeya'a gan' zoa Xan' ben' gwsela' neda', na' ne tole bi chnabele neda' gan' yeya'a. <sup>6</sup>Na' ba chacyaše'le dan' ba gwnia' yeya'a. <sup>7</sup>Perw da' li napen le'e cuent yeya'a, le še bi yeya'a, Spiritw che Xa' Diosen' dan' gaclenen le'e bi yedesoan lo' yichjlažda'olen'. Na' yeya'a nach selan' len le'e. <sup>8</sup>Na' cate' yid Spiriton' gwzejni'in benačhen' zjanape' dola', na' gwzejni'in non' nac bene' güen len Diosen', na' gwzejni'in gata' castigw toli tocane che bene' bi chosozenague' chia'. <sup>9</sup>Spiriton' gwzejni'in legaque' zjanape' dola' da' bi chesejnilaže' neda'. <sup>10</sup>Na' gwzejni'in legaque' non' nac bene' güen len Diosen', le yeya'a gan' zoa Xa' Diosen' na' le'e bich

le'ele neda'. <sup>11</sup>Na' gwzejni'in legaque' gata' castigw che xtola'gaquen' toli tocane, le Satanás dan' chnabia' da' xigüe' ca' na' dan' chnabia'te bene' ca' bi chesejnilaže' Diosen' ba nchoglaon chen gwnežjw Diosen' castigw chen toli tocane.

<sup>12</sup>'Ne' dech da' zan da' nia' le'e, perw naquen zdebe šejni'ilen na'a. <sup>13</sup>San cate' yedesoa Spiritw che Diosen' lo' lažda'olen' cont gwzejni'in le'e da' nac da' li, len gwsed gwlo'en le'e yogo' da' cheyala' nezele chia', le Spiriton' chnen diža' li. Bi güe'en diža' to gualazen, san güe'en bite'tez diža' da' chzene Xan' len, na' chixjue'en le'e bica' da' za' za'ac. <sup>14</sup>Spiriton' gonen cont gwlo'elaon naca' bene' zaca' juisyw, le gwzejni'in le'e xtiža'. <sup>15</sup>Xan' ba bene' cont nezda' yogo' da' neze le', na' da'nan' gwnia' Spiriton' chixjue'en le'e xtižan'.

#### Jesúsen' gwne' šložze yesacyaše'de' na' techle yesyebede'

<sup>16</sup>Šlož bi le'ele neda', na' te yešlož na' yezle'ele neda' da' yoble, le yeya'a gan' zoa Xan'.

<sup>17</sup>Na' baže bene' ca' zjanaque' Jesúsen' txen gose' lježe': —¿Bi zejen dan' che'e chio' te yešlož na' bich le'echone' na' techle lecze yešlož na' yezle'echone' da' yoble? Na' ¿bi zejen dan' že' yeyeje' gan' zoa Xen'? <sup>18</sup>¿Bi zejen dan' že' yešlož? Bi chejni'icho bin' že'.

<sup>19</sup>Jesúsen' gocbe'ede' chesaclaže' yesenabde'ne' bi zejen, na' gože' legaque':

—¿Ba chnabe lježle bi zejen dan' gwnia': “Yešlož na' bich le'ele neda' na' techle lecze yešlož na' yezle'ele

neda' da' yoble"? <sup>20</sup>Da' li chnia' le'e ba zoa cuežle na' yegüine'le šlac bene' ca' bi chesejnilaže' Diosen' yesyebede'. Yeyaše'laže'le, perw šložzen' na' techle yebele. <sup>21</sup>Cate' chzan no'olen' chžaglagüe' šlac chaque' bes che yela' sanña'. Na' cate' ba golje bda'ona' bich chone' xbab che dan' bžaglagüen', le chbede' ba golje yeto benach yežlio nga. <sup>22</sup>Leceze ca' le'e ba chacyaše'le na'a, perw cate' yežagcho da' yoble soachle mbalaz na' nono gac yeca'a yela' chebe chelen' lo' yichjlažda'olen'.

<sup>23</sup>Na' cate' ba bžin ža šjayzoa' da' yoble gan' zoa Xan', cana'ch bich yažjele bi nable gwzejni'ida' le'e. Da' li chnia' le'e, da' chejnilaže'le neda' bite'tez da' nabele Xan', gonczen' le'e. <sup>24</sup>Ža na'aža bibi na' nabele Xan' ye'lné' chnablen da' chejnilaže'le neda'. Na' na'a le nabe Xan' bi da' nabelene' ye'lné' ca', na' gone' can' nabelenen' cont soale mbalaz juisyw.

**Criston' ba bene' cont yenit  
yela' chnabia' che gwxiyen'**

<sup>25</sup>Da' zan ba gwnia' le'e len jempl. Gwžin ža cate' bich gwzejni'ida' le'e len jempl, san gua'a diža' da' šejni'ile cate' gwzejni'ida' le'e che Xan'. <sup>26</sup>Na' cate' ba bžin žana', cana'ch nabele Xan' bi da' nabelene' ye'lné' chnablen da' chejnilaže'le neda'. Na' bi yažjen nabda' Xan' gaclene' le'e. <sup>27</sup>Le cuincze Xan' chacde' le'e dan' chaquele neda' na' chejle'le gwsele' neda'. <sup>28</sup>Gan' zoa Xa' Diosen' gwza'a na' ba bida' yežlio nga. Na' na'a yeza' yežlio nga na' yeya'a gan' zoa Xan'.

<sup>29</sup>Nach gose'ene':

—Bač cho'o diža' da' chejni'ito' na' bi cho'o jemplw. <sup>30</sup>Ba chacbe'eto' nombi'o yogo' xbab che benachen'. Ba nezledo' bi chesaclaže' bene' yesenezde' cate' biña' yesenaben'. Da'nan' bač chejle'to' zao' gan' zoa Diosen'.

<sup>31</sup>Na' gož Jesúsen' legaque':

—¿Ba chejle'le na'a? <sup>32</sup>Ba bžin ža na' na'a ba gole' gaslasle. To tole ca'a xnez che chele na' gwcuana'le toza'. Perw bi zoa' toza', le zoa Xan' len neda'. <sup>33</sup>Ba gwnia' le'e ca' cont soa cuežle binlo len xbab chele, le chejnilaže'lenda'. Yežlio nga saca'zi'le, perw bi gacžejlaže'le, neda' ba bena' cont yenit yela' chnabia' che gwxiyen' dan' zoa na'a chnabian' yežlio nga.

**Jesúsen' gwñabde' Diosen' gaclene'  
bene' ca' zjanaque' le' txen**

**17** Beyož gwna Jesúsen' da' ca' nach gwne'e yabale na' gwne':

—Xa', ba bžin hor gac chia' dan' ba bžio' bia' gac. Ben cont nacbia' nedan' Xi'ino' naca' bene' zaca' juisyw cont neda' gona' ga gacbia' le' naco' bene' zaca' juisyw. <sup>2</sup>Ba beno' neda' yela' chnabia' lao yogo' benach cont chnežjua' yela' mban toli tocane che yogo' bene' ca' ba gwlejo' chesejnilaže' neda'. <sup>3</sup>Na' bene' ca' zjanape' yela' mban toli tocane zjanombi'e le', le tozon' zaco' gonxento', na' leceze zjanombi'e neda' Jesucristw bene' gwse'lo'.

<sup>4</sup>Lo yežlion' ba bena' cont nacbia' naco' bene' zaca' juisyw, le ba beyož bena' yogo'lo' da' gwlo'o lo na' gona'. <sup>5</sup>Na' na'a Xa', ben cont la'laon

naca' beñe' zaca' juisyw cate' yela'a gan' zon', doxen can' blo'elaon cate' gwzoa' len le' cate' za' xete yežlion'.

<sup>6</sup>Ba gwlejo' bał beñaçh chesejnilaže' neda', na' baçh blo'eda' legaque' can' naco' na' can' chonon'. Zjanaque' xi'ino' na' beno' cont chesejnilaže' neda' na' chesone' can' žon'. <sup>7</sup>Na' ba zjanezde' yogoloł da' chona' na' yogo' diža' da' choa' zjanaquen çhio' le'. <sup>8</sup>Le ba be'lena' legaque' diža' dan' ba bzejni'ido' neda' na' ba bosozenague' çhen, na' ba chesacbe'ede' da' li gwza'a gan' zon', na' chesejle'e le len' gwseło' neda'.

<sup>9</sup>Chnaba' gacleno' legaque'. Bi çhnaba' gacleno' yogo' benaçh, san gacleno' beñe' ca' gwlejo' chesejnilaže'nda' le ba zjanaque' lo nao'. <sup>10</sup>Na' yogo' beñe' chesejnilaže' neda' lecze chesejnilaže' le'. Na' ca'cze naquen, note'tez beñe' zjanaque' xi'ino' lecz zjanaque' xi'ina', na' beñe' ca' chesejnilaže'nda' chosolo'e naca' beñe' zaca' juisyw.

<sup>11</sup>Na' na'a bich soa' yežlio nga, perw beñe' quinga chesejnilaže' neda' nita'cze' yežlio nga, na' neda' ba zeza' gan' zo'na'. Xa', naco' la'zelagüe beñe' laždao' xilaže', na' çhnaba' gwçhino' yela' çhnabia' çhio' cont gwcuas gwcuizo' da' malen' len legaque' cont nita'cze' yesaque' toze len lježgaque', ca' çhio' naccho toze. <sup>12</sup>Šlac ba gwzoa' len legaque', neda' ba bçhina' yela' çhnabia' çhion' cont bcuas bcuiza' da' malen' len legaque'. Da'nan' ne toe' bi gwžiai'y, con toz ben' ba naquen cuiaye'e cont gac doxen can' ža Xtižo' dan' nyojen.

<sup>13</sup>Na' na'a ba zeza' gan' zon', na' šlac ne' zoa' yežlio nga cho'a diža'

quinga cont beñe' qui nita'çhgüe' mbalaz ca mbalazen' zoa' neda'. <sup>14</sup>Neda' ba be'lena' legaque' xtižon', na' beñe' ca' bi chesejnilaže' le' chesegue'ede' legaque' dan' bi chesone' txen len legaque', ca' neda' bi naca' txen len beñe' ca' bi chesejnilaže' le'. <sup>15</sup>Na' ca' nac beñe' ca' chesejnilaže' neda', bi çhnaba' yeca'o' legaque' lo' yežlio nga, san çhnaba' gacleno'ne' cont Satanás dan' çhnabia' da' xigüe' ca' bi siye'en' legaque'. <sup>16</sup>Legaque' bi zjanaque' txen len beñe' bi chesejnilaže' le', ca' neda' bi naca' txen len beñe' bi chesejnilaže' le'. <sup>17</sup>Ben cont beñe' ca' chesejnilaže' neda' yesaclaže' yesone' con da' žo', le ba zjanombi'e diža' li çhio'. Yogo' da' ba bzejni'ido' legaque' naquen da' li. <sup>18</sup>Len' gwseło' neda' yežlion' cont ba bia' xtižon', na' lecze ca' çhseła' legaque' yeso'e xtižan'. <sup>19</sup>Chzanlaže' cuina' chona' con da' žo' le' cont yesaclaže' yesone' con can' žo' da' zjanombi'e diža' li çhion'.

<sup>20</sup>Na' bi çhnaba' gacleno' legacze', san lecze gacleno' beñe' ca' yesejnilaže' neda' cate' yesende' diža' dan' yesoe' beñe' quinga. <sup>21</sup>Xa', ben cont yogo'lole' yesaque' toze len lježgaque' na' yesaque' txen len çhio', ca' le' naco' toze len neda' na' neda' naca' toze len le'. Ben cont yeyož yesaque' toze len çhio' na' len lježgaque' cont beñe' ca' bi chesejnilaže' le' yesacbe'ede' len' gwseło' neda'. <sup>22</sup>Na' yela' bala'an' dan' nono' neda' ba bnežjuañ' legaque' cont zjanaque' toze len beñe' lježe' ca' çhio' naccho toze. <sup>23</sup>Legaque' zjanaque' txen len neda' na' neda' naca' txen len le' cont

yogo'cho gaccho toze. Gaccho toze cont bene' ca' bi chesejnilaže' le' yesacbe'ede' len' gwse'lo' neda' na' yesacbe'ede' chacdo' bene' ca' can' chacdo' neda'.

<sup>24</sup>Xa', chacdo' neda' cate' bina' xe yežlio nga na' nono' neda' bene' zaca' juisyw. Na' chaclaža' bene' quinga gwlejo' chesejnilaže' neda' yedyesenite' len' neda' gan' yedyesoan' cont yesele'ede' naca' bene' zaca' juisyw. <sup>25</sup>Xa', naco' la'zelagüe bene' chon da' zej to licha. Na' ca nac bene' ca' bi chesejnilaže'nda', lecze bi zjanombi'e le', perw neda' nombi'a le', na' bene' ca' ba gwlejo' cont chesejnilaže' neda' zjanezde' len' gwse'lo' neda'. <sup>26</sup>Na' ba bzejni'ida' legaque' can' nacon' na' can' chonon', na' za' gwzejni'ichda' legaque', cont yesacbe'ede' chacdo' legaque' can' chacdo' neda', na' cont neda' soacza' len' legaque'.

**Judasen' bdie' Jesúsen' lo na' soldadw ca'**

(Mt. 26:47-56; Mr. 14:43-50; Lc. 22:47-53)

**18** Beyož gwna Jesúsen' da' ca', gwza'lene' bene' ca' zjanaque' le' txen ja'aque' šla'a Yegw Cedrón gan' gota' to le'ej ga goseze zan yag olivos. Na' goso'e lo' le'ejen'. <sup>2</sup>Na' Judasen' ben' ba naquen gone' Jesúsen' lo na' bene' ca' chesegue'ede' le' lecze nombi'e latjen', le zan ni'a Jesúsen' len' bene' ca' zjanaque' le' txen ba besedobe' na'. <sup>3</sup>Ca' goquen' bžin Judasen' na' nche'e xonj soldadw na' yexonj bene' chesape' yodao' blaon' bene' gosesela' bžoz gwnabia' ca' na' bene' fariseo ca' cont yesezene' Jesúsen'.

Zjanxobe' no lintern na' zjanoxe' no yi' yech na' zjana'le' spada. <sup>4</sup>Jesúsen' ba nezde' yogo'lo' da' za' gac che', na' bchoje' jašague' legaque' na' gwne': —¿Non' cheyiljwle?

<sup>5</sup>Na' gose'ene':

—Cheyiljwto' Jesús bene' Nazaret. Na' gož Jesúsen' legaque': —Nedan'.

Na' Judasen' ben' ba naquen gone' Jesúsen' lo na'gaquen' zelene' legaque'. <sup>6</sup>Cate' Jesúsen' gože' legaque': “Nedan”, la' besyebiga'te' cosxanle na' jasechaze' lo yon'. <sup>7</sup>Na' da' yoble Jesúsen' gože' legaque': —¿Non' cheyiljwle?

Na' legaque' gose'ene':

—Cheyiljwto' Jesús bene' Nazaret.

<sup>8</sup>Na' Jesúsen' gwne':

—Ba gwnia' nedan'. Na' še nedan' cheyiljwle, le güe' latje šjaya'ac bene' quinga.

<sup>9</sup>Gwne' ca' cont goc can' ba gwdixjue'ede' caten' gwne': “Ne to bene' ca' ba gwlej Diosen' chesejnilaže' neda' bi yesebiaye'e.” <sup>10</sup>Na' Simón Pedron' no'e to spada na' goljen' gwদিনen' mos che bžoz blaon' gwchogtechgüe' nague' licha. Na' mosen' le' Malco. <sup>11</sup>Na' Jesúsen' gože' Pedron':

—Bego'o spada chion' lo' ližen'. ¿Chacdo' bi cheya'la' gac da' ba nžia bia' Xa' Diosen' gac chia'?

**Goseche'e Jesúsen' lao ben' le' Anás**

(Mt. 26:57-58; Mr. 14:53-54; Lc. 22:54)

<sup>12</sup>Nach soldadw ca' len' xangaque' na' len' bene' chesape' yodao' blao che nación Israel cheton' gosezene' Jesúsen' na' bosocheje'ne'. <sup>13</sup>Na' goseche'ene' da' nechw lao Anás ben' naque' xta'obi'in che Caifás.

Na' Caifásen' goque' b̄xoz blaŋ che naciŋ Israel c̄cheton' lo izen'. <sup>14</sup>Na' Caifásna' ben' gože' beŋe' gwnabia' c̄cheton' napen legaque' cuent toz ben' gat clēl ca cuiayi' yogüē'.

**Pedron' bi gw̄chebe' naque' Jesúsēn' txen**

(Mt. 26:69-70; Mr. 14:66-68; Lc. 22:55-57)

<sup>15</sup>Simón Pedron' len yeto beŋe' naque' Jesúsēn' txen gosa'ogüē'ne'. Na' nombia' ben' nac b̄xoz blaŋ ben' yeto. Da'nān' goc gwyo'e len Jesúsēn' chy'o che b̄xoz blaŋ.

<sup>16</sup>Na' Pedron' bega'āne' do cho'a puerten'. Nach ben' yeto, da' nombia' b̄xoz blaŋ le', gwyeje' na' be'lene' diža' bi' no'olen' chap cho'a puerten' cont gwlo'obe' Pedron'. <sup>17</sup>Nach bi' no'olen' chape cho'a puerten' gožbe' Pedron':

—¿Gague leno' le' chzenago' dan' chsed chlo'e bengā?

Na' Pedron' gwne':

—Bi lena' neda'.

<sup>18</sup>Beŋe' güēn žin ca' na' beŋe' ca' chesape' yodao' blaŋ ba gosebeque' to yi' ya'alj, le' chac zag, na' zjazeche' cho'a yin' cont chesyēže'ede'. Na' Pedron' ze' len legaque' cho'a yin' cheže'ede'.

**Gosenabde' Jesúsēn' che dan' chsed chlo'eden'**

(Mt. 26:59-66; Mr. 14:55-64; Lc. 22:66:71)

<sup>19</sup>Na' ben' nac b̄xoz blaŋ gw̄nabde' Jesúsēn' che beŋe' ca' chosozenag che dan' chsed chlo'eden' na' che da' ca' chzejni'idēn'. <sup>20</sup>Na' Jesúsēn' gože'ne':

—Ba bi'a diža' doxen latje lagüē'.

Zan ni'a bsd blo'eda' lo' yodao' checho ca' na' chy'o yodao' blaŋ

gan' chesežag yogo' beŋe' gualaž chechon'. Bibi diža' gwnia' bagaše'ze. <sup>21</sup>¿Bixchen' ch̄nabdo' neda'?

Gw̄nabe beŋe' ca' gosende' dan' bsd blo'edan'. Legaque' zjanezde' bi dižān' bia'.

<sup>22</sup>Beyož gwna Jesúsēn' ca', to ben' chape yodao' blaŋ zie' na', na' gw̄dape' x̄aguen', gože'ne':

—¿Ca' choži'o xtiža' ben' nac b̄xoz blaŋ'?

<sup>23</sup>Jesúsēn' gwne':

—Še bi da' mal ba gwnia', be' diža' che bi da' malen' ba gwnia', na' še gwnia' güēn, ¿bixchen' chgapo' neda'?

<sup>24</sup>Nach Anásēn' bdiē' Jesúsēn' ncheje' lao Caifásēn' ben' nac b̄xoz blaŋ.

**Da' yoble Pedron' bi gw̄chebe' še naque' txen len Jesúsēn'**

(Mt. 26:71-75; Mr. 14:69-72; Lc. 22:58-62)

<sup>25</sup>Na' Pedron' zie' cho'a yin' cont cheže'ede' na' beŋe' ca' nita'na' gose'ene':

—¿Gague lenczo' len' chzenago' dan' chsed chlo'e bengā?

Na' bi gw̄chebe', gwne':

—Bi lena' neda'.

<sup>26</sup>To xmos b̄xoz blaŋ naque' biše' ljež ben' gw̄chog Pedron' nagen', na' le' gože' Pedron':

—¿Gague ble'eda' le' len Jesúsēn' lo' le'ej gan' ze' yag olivos?

<sup>27</sup>Na' Pedron' da' yoble bi gw̄chebe', na' la' gwchežte to jea.

**Goseche'e Jesúsēn' lao Pilaton'**

Mr. 27:1-2, 11-14; Mr. 15:1-5; Lc. 23:1-5)

<sup>28</sup>Na' do cheni'las beŋe' gwnabia' ca' gosebeje' Jesúsēn' gan' zoa Caifásēn' na' goseche'ene' gan' zoa

gobrnador Pilato ben' chon yeĵa' justis. Na' ĵegaque' bi goso'e len Jesúsen' yo'o gan' zoa Pilaton', ĵe can' nac costumbr cĥeton' bi chac yesagüe' xše' ĵni pascon' še yeso'e gan' že' bene' bi zjanac bene' Israel. <sup>29</sup>Da'nan' Pilaton' bchoje' na' gože' ĵegaque':

—¿Bi ben benga? ¿Bi xya chagwle cĥe'?

<sup>30</sup>Na' bene' gwnabia' ca' gosene': —Šaca' benga bi naque' bene' güen da' xinj bi bdeto'ne' ĵo naon'.

<sup>31</sup>Na' gož Pilaton' ĵegaque': —Ĵe yeĥe'e, na' ĵe gon yeĵa' justis cĥe' can' ža ley cĥelen'.

Nach bene' gwnabia' cĥe naciön Israel cĥeton' gose'ene':

—Bi de ĵsens gotto' bene'.

<sup>32</sup>Da' gosone' ca' goc can' gwna Jesúsen' caten' bzejni'ide' nac yesone' yesote'ne'. <sup>33</sup>Nach Pilaton' beyo'e yo'ona' na' goxe' Jesúsen' na' gože'ne':

—¿Naco' le' Rey cĥe bene' Israel ca'?

<sup>34</sup>Jesúsen' gože'ne':

—¿Con da' goljlažon' cĥnabo', še bene' yoble gose'e le' ca'?

<sup>35</sup>Pilaton' gože'ne':

—¿Chacdo' naca' neda' bene' Israel? Bene' Israel gualaž cĥio' na' bĥoz gwnabia' cĥele ca' bosodie' le' ĵo na' nga. ¿Bi da' xinj benon'?

<sup>36</sup>Jesúsen' gože'ne':

—Yeĵa' cĥnabia' cĥia' nža'le naquen len yeĵa' cĥnabia' cĥe bene' chesenabi'e yežlio nga. Šaca' yeĵa' cĥnabia' cĥia' naquen cĥe yežlio nga na' šaca' nabi'a naciön ca' že' yežlio nga, bene' ca' chosozenag cĥian' gosediĵe' cont bi goca' ĵo na' bene' gwnabia' cĥe naciön Israel

cĥeton' šaca'. Perw yeĵa' cĥnabia' cĥian' bi naquen cĥe yežlio nga.

<sup>37</sup>Nach Pilaton' gože'ne':

—¿Na' len' naco' rey še ca'?

Na' gwna Jesúsen':

—Da' ĵi can' žon', naca' rey na' ba bida' yežlio nga cont gwzejni'ida' benachen' diža' ĵi na' yogo' bene' chesone' txen len diža' ĵi chosozenague' cĥia'.

<sup>38</sup>Nach gož Pilaton' le':

—¿Bi dan' diža' ĵi?

**Gosecĥoglagüen' yesote' Jesúsen'**

(Mt. 27:15-31; Mr. 15:6-20; Lc. 23:13-25)

Beyož gwna Pilaton' ca' na' bezchoje' yeto ši'i gan' že' bene' gwnabia' cĥe naciön Israel cĥeton' na' gože' ĵegaque':

—Bibi nĵa'lagüe še bi da' xinj non benga. <sup>39</sup>Perw na' de costumbr cĥele gwsana' to bene' de ĵižya ĵo ĵni pascon'. ¿Chaclaže'le gwsana' benga naque' Rey cĥe le'e bene' Israel?

<sup>40</sup>Nach bososye'e gosene':

—Bi gwsano' bena'. Barrabás na' gwsano'.

Na' Barrabásen' naque' to bene' gwban.

**19** Nach Pilaton' bene' mandadw goseyine' Jesúsen'. <sup>2</sup>Na' soldadw ca' gosone' to corona de xis yeše' na' bosozoen' yicĥj Jesúsen' na' bosoguacue'ne' to lache' moradw ca da' chosoĥin no rey. <sup>3</sup>Nach gosonĵe' cĥe', gosene': —iViva Rey cĥe bene' Israel!

Na' gosegapa'cĥgüe' xague'.

<sup>4</sup>Nach Pilaton' bchoje' da' yoble na' gože' bene' gualaž cĥeto' ca' že' na':

—Cueja'ne' da' yoble cont nezele bibi da' xinj cĥželda' še bi da' none'.



<sup>5</sup>Na' bechoj Jesúsen' chy'ona', na' zoa corona de xis yešen' yichje' na' ne' nyaze' lache' moradon'. Na' Pilaton' gože' legaque':

—Le na', nga ze ben'.

<sup>6</sup>Na' bxoz gwnabia' ca' na' bene' chesape' yodao' blaon' cate' besele'ede' Jesúsen' na' bososye'e zan ni'a gosene':

—iBde'e le'e yag cruz! iBde'e le'e yag cruz!

Nach Pilaton' gože' legaque':

—Le'e le che'e na' le gwde'e le'e yag cruzen', le neda' bibi da' xinj cheželda' še bin' none'.

<sup>7</sup>Na' bene' gwnabia' ca' che nación Israel cheton' gose'e le':

—De to ley cheto' da' žan cheyala' gate' da' že' naque' Xi'in Dios, le con to benachzen' naque'.

<sup>8</sup>Ba chžeb Pilaton' can' ba chaquen', na' cate' bende' xtiža'gaquen' bžebche'. <sup>9</sup>Na' beyo'e yo'o gan' zoe' da' yoble, nche'e Jesúsen', na' gože' Jesúsen':

—¿Ga bene' le'?

Na' Jesúsen' bi boži'e xtižen'.

<sup>10</sup>Nach Pilaton' gože'ne':

—¿Bi choži'o xtižan'? ¿Bi nezdo' napa' yela' chnabia' cont gwsana' le' na' napa' yela' chnabia' cont chogbi'an yosode'e le' le'e yag cruz?

<sup>11</sup>Jesúsen' gože'ne':

—Bibi yela' gwnabia' napo' šaca' Diosen' bi nonen' le'. Da'nan' bene' bdie' neda' lo naon' napche' dola' ca' le'.

<sup>12</sup>Nach Pilaton' beyiljwlaže' nacle gone' gwsane' Jesúsen'. Perw bene' gwnabia' che nación cheton' bososye'e gosene':

—Še gwsano' benga, contr rey che nación Roman' chono' še ca', le

note'tez bene' že' naque' rey chone' contr rey César.

<sup>13</sup>Nach Pilaton', beyož bende' xtiža'gaquen', gwleje' Jesúsen' chy'ona' na' lecze bchoj le' na' gwchi'e gan' chone' yela' justisen', to latje da' nzi' Gan' Nagw Yej, na' diža' hebreo nzin' Gabata. <sup>14</sup>Do guagwbiž ža cate' za' solao lni pascon' Pilaton' gože' bene' gwnabia' cheto' ca':

—Le na', nga zoa rey chelen'.

<sup>15</sup>Nach da' yoble gosezolağiue' bososye'e gosene':

—iCheyala' gate'! iBde'e le'e yag cruz!

Nach Pilaton' gože' legaque':

—¿Rey chele nga gona' mandadw yosode'e le'e yag cruz?

Nach bxoz gwnabia' ca' gose'ene': —Gague rey cheto' benga. Toze César naque' rey cheto'.

<sup>16</sup>Nach Pilaton' bdie' Jesúsen' lo na'gaque' cont te'e le'e yag cruzen'. Nach gosa'aque' Jerusalenna' goseche'e Jesúsen' cho'a ciudan'.

### **Bosode'e Jesúsen' le'e yag cruz**

(Mt. 27:32-44; Mr. 15:21-32; Lc. 23:26-43)

<sup>17</sup>Na' Jesúsen' zeje' no'e yag cruz chen' na' besežine' to latje nzi' Latje che Žit Yichj Bene' Guat, na' diža' hebreo nzin' Gólgota. <sup>18</sup>Na' soldadw che gubernadoren' bosode'ene' le'e yag cruzen', na' lecze bosode'e yechope bene' le'e yechope yag cruz cuiten' na' Jesúsen' gwo'e gachol bene' ca' chope'. <sup>19</sup>Na' gubernador Pilaton' bene' mandadw byoj diža' da' gwda' yichj yag cruz che Jesúsen'. Na' bosozojen' žan: “Jesús bene' Nazaret, Rey che bene' Israel”. <sup>20</sup>Bosozojen' diža' hebreo, diža' griego na' diža' latín. Na' zan bene' Israel gualaž cheto'

bosolaben', le gan' gwda' Jesúsen' le'e yag cruzen' naquen ga'la'ze ciuda Jerusalénna'. <sup>21</sup>Nach b'xoz gwnabia' ca' na' yezica'chle bene' gwnabia' che nación Israel cheton' gose'e Pilaton':

—Bi gwzajo' “Rey che bene' Israel”, san bzoj: “Le' gwne' naque' rey che bene' Israel.”

<sup>22</sup>Na' Pilaton' gwne':

—Da' bena' mandaw bosozoje', ba nyojenna'.

<sup>23</sup>Nach soldadw ca', beyož bosode'e Jesúsen' le'e yag cruzen', goseque'e xalana' Jesúsen' na' besyele'en gosebejen' tap cuenle na' tgüejen gosezi' to toe'. Na' lecze goseque'e yeto xe' da' naquen to güelize, na' bibi dia chen de. <sup>24</sup>Na' gose' lježe':

—Bi gwzoxjchon san gonchon rifa cont nezecho no yechelen.

Na' dan' gosone' ca' goc can' nyoj Xtiža' Diosen', žan: “Besyele'e xalanan' legacze', na' gosone' rifa lache' dan' chazan'.”

<sup>25</sup>Na' do ga'la'ze yag cruz che Jesúsen' zecha Marían' ben' nac xna' Jesúsen' na' bene' bile xne'ena', na' María bene' naque' no'ol che Cleofas na' María bene' naque' bene' Magdala. <sup>26</sup>Na' cate' Jesúsen' ble'ede' zecha xne'en ga'la'ze len to bene' naque' le' txen, bene' chaquechgüe Jesúsen' le', nach gože'ne':

—Bena' gaque' ca' xi'ino'.

<sup>27</sup>Nach gože' bena':

—Bži'ilaze' xna' nga ca' xnao'.

Na' žana' gwque'ene' bene'ne' ca' bene' lo' yo'o.

#### Can' goc caten' got Jesúsen'

(Mt. 27:45-66; Mr. 15:33-41; Lc. 23:44-49)

<sup>28</sup>Gwde na' Jesúsen' ba nezde' bač goc yogo' da' cheya'la' gac.

Nach cont goc can' ža yelate' Xtiža' Diosen' da' nyojen gwne':

—Chbi'lda' nis.

<sup>29</sup>Na' de late' vino zichj da' yože' to lo' xguag dao'. Na' to bene' bzaže'de' vino zichjen' to esponja bzoen' to lo' xis da' že' hisopo na' gw'lisen' blapen' cho'a Jesúsen'. <sup>30</sup>Na' beyož gw'xop Jesúsen' vinon' na' gwne':

—Bač goc yogo'lo' da' cheya'la' gac.

Nach bcheque' yichjen' gote'.

#### To soldadw godoe' lanza cuit le'e Jesúsen'

<sup>31</sup>Na' yeteyo gaquen ža che Dios na' ža lni xen, da'n'an' bene' gwnabia' che nación cheton' jasenabde' Pilaton' gone' mandadw yeseyišjw soldadw che' ca' ni'a bene' ca' zjada' le'e yag cruzen' cont yob yesate' na' yesyeque'e legaque' le'e yag cruz ca', le bi gosac'laže' yeseda'ch bene' ca' le'e yag cruzen' ža che Dios. <sup>32</sup>Nach soldadw ca' ja'aque' jasedišjue' chope la'a ni'a ben' gwda' šla'a cuit Jesúsen'. Na' lecze ca' gosone' len ben' gwda' le'e yag cruzen' cuiten' yešla'a. <sup>33</sup>Na' cate' besežine' gan' da' Jesúsen', besele'ede' ba gote' na' bich goseyišjue' ni'e ca'.

<sup>34</sup>Perw to soldadon' godoe' lanza cuit le'e Jesúsen', na' la' bchojten chen len nis. <sup>35</sup>Neda' ble'eda' can' goquen' na' nezda' cho'a diža' li. Na' cho'a diža' li can' goquen' cont lencze le'e šejle'le. <sup>36</sup>Na' goc da' ca' len Jesúsen' cont goc can' ža Xtiža' Diosen' da' nyoj che', žan: “Ne to žit yo'e bi yeseyišjue'.” <sup>37</sup>Na' yeto da' žan: “Yesene'e ben' ba bosožie' güe'!”

#### Bosocuaše' Jesúsen'

(Mt. 27:57-61; Mr. 15:42-47; Lc. 23:50-56)

<sup>38</sup>Beyož goc yogo' da' ca', José bene' nac bene' ciuda Arimatea

janabde' Pilaton' gwnežjue' lsens yeque'e cuerp che Jesúsen'. Na' Pilaton' be'e lsens. Nach Josén' gweyje' na' beque'e cuerp che Jesúsen'. Josén' ba chejnilaže' Jesúsen' perw chejnilaže'ne' bagaše'ze da' chžebe' bene' gwnabia' cheto' ca'. <sup>39</sup>Na' len Josén' lecze gweyje' Nicodemo ben' ba gweyje' gan' zoa Jesúsen' šeže'le. Na' Nicodemon' no'e to da' chl'a' zix' da' none' len yal dan' že' mirra, na' len to bište dan' že' aloes, ca do šona roben'. <sup>40</sup>Nach bosyochele' cuerp che Jesúsen' to lache' xen na' len dan' chl'a' zixen', ca' chon neto' bene' Israel cate' chcuāše'to' bene' guat. <sup>41</sup>Na' gała'ze latje gan' bosode'e Jesúsen' le'e yag cruzen' gota' to le'ej ga goseze yag. Na' na' za' goseche'ene' to bloj cont yosočinen' ca to ba, na' nono bene' guat na' šo' lo'enna'. <sup>42</sup>Ža caten' got Jesúsen' naquen ža caten' chososiñi'e che ža che Diosen'. Na' da' chesachyende' yosocuaše'ne', da'nan' jaseło'e Jesúsen' lo' bloj coba', le naquen gała'ze.

**Jesúsen' bebane' ladjo bene' guaten'**

(Mt. 28:1-10; Mr. 16:1-8; Lc. 24:1-12)

**20** Na' bal dmigw María bene' Magdalan' gweyje' cho'a blojen' gan' bosocuaše' Jesúsen' na' ble'ede' ba bga'a yejen' dan' bosode'e cho'a blojen'. <sup>2</sup>Nach beza'sese' beyeje' gan' zoa Simón Pedron' len yeto bene' naque' Jesúsen' txen, na' gože' legaque':

—Ba besyebeje' Xanchon' lo' blojen' na' bi nezeto' ga besyeyo'ene'.

<sup>3</sup>Nach Pedron' na' ben' yeto gosa'aque' ja'aque' cho'a blojen'.

<sup>4</sup>Choptie' goseza'sese' perw ben'

yetu gwza'sesche' ca Simón Pedron' na' byobech bžine' cho'enna' ca le'. <sup>5</sup>Na' bcheque' gwne'e lo'enna' na' ble'ede' lache' ca' zjachin' lo' yo perw bi gwyo'e. <sup>6</sup>La' bla'te Simón Pedron' na' le' gwyo'e lo' blojen' na' lecze ble'ede' lache' ca' gan' zjachin'na'. <sup>7</sup>Na' bay dan' bosoguzje' yichjen' bi chin' gan' chi' lache' ca', san ndoben chin' šla'ale. <sup>8</sup>Nach lencze ben' yeto gwyo'e, le bina' šo'e la'czla' byobech bžine' cho'enna', na' ble'ede' can' naquen na' gweyje'le'e. <sup>9</sup>Le bina' yesejni'ide' Xtiža' Diosen' da' nyojen žan cheyała' yebane' ladjo bene' guaten'. <sup>10</sup>Na' besyeya'aque' jaya'aque' yo'o gan' nite'na'.

**María bene' Magdalan' ble'ede' mbancze Jesúsen'**

(Mr. 16:9-11)

<sup>11</sup>Na' Marían' bega'ane' na' gwzeche' gała'ze cho'a blojen' chbeže'. Na' ne' chbežte' ca' bcheque' gwne'e lo' blojen'. <sup>12</sup>Na' ble'ede' chope angl bene' zjanyaz lache' šiš zjachi'e lo' blojen', toe' chi' zej yichjle na' yetoe' chi' zej xni'ale gan' gota' cuerp che Jesúsen'. <sup>13</sup>Nach gose'e no'olen':

—¿Bixčen' chbežo' no'ole?

Na' boži'en gože' legaque':

—Ba besyeyo'e Xanan' na' bi nezda' gale jasesane'ne'.

<sup>14</sup>Beyož gwna' Marían' ca' gweychje' ble'ede' zecha Jesúsen' cožen', perw bi gocbe'ede' še naque' le'. <sup>15</sup>Na' gož Jesúsen' le':

—¿Bixčen' chbežo', no'ole? ¿Non' cheyiljo'?

Marían' bene' xbab še ben' chape' yaguen' nach bol güiže' le', gože'ne':

—Bene', še len' beyo'one' ga yoble, gwna neda' gale jaysano'ne' cont yeyo'ne'.

<sup>16</sup>Jesúsen' gože'ne':

—iMaría!

Na' Marían' gwyechje' da' yoble na' gože'ne':

—iRaboni! —naquen to diža' hebreo na' zejen Maestrw.

<sup>17</sup>Jesúsen' gože'ne':

—Bi goxo' neda', le bina' yeyepa' gan' zoa Xan'. Beyej len yezica'chle bene' ca' ba bosozenag xtižan' bene' ca' zjanaque' ca biše' zana', na' gožgaque' yeyepa' gan' zoa Xan' ben' lecz naque Xale. Naque' Dios ben' chonxena' na' lecze naque' Dios ben' chonxenle.

<sup>18</sup>Nach beza' María bene' Magdalan' na' jaydixjue'ede' yezica'chle bene' ca' chosozenag xtiža' Jesúsen' le ba ble'ede' Xanchon'.

**Bene' ca' zjanaque' Jesúsen' txen  
besele'ede' mbancze'**

(Mt. 28:16-20; Mr. 16:14-18; Lc. 24:36-49)

<sup>19</sup>Na' cate' ba goc chol' že' dmigon', bene' ca' zjanaque' Jesúsen' txen zjandop zjanžague' lo' yo'o na' zjanseyjwte' puert ca' da' besežebe' bene' gwnabia' che nación Israel cheton'. Nach Jesúsen' ble'e na' gwze' gachol' legaque'. Na' gože' legaque':

—Le soa binlo len xbab da' yo'o lo' yichjlažda'ole.

<sup>20</sup>Beyož gwne' ca' na' blo'ede' legaque' taque' ca' na' cuit le'ena'. Na' besyebede' cate' besele'ede' le naque' Xanchon'. <sup>21</sup>Na' gozne' da' yoble:

—Le soa binlo len xbab da' yo'o lo' yichjlažda'olen'. Can' gwsel'a' Xan'

neda' yežlio nga bia' xtižen', lecze ca' neda' chsela' le'e güe'le xtižan'.

<sup>22</sup>Beyož gwne' ca' blobe' legaque' na' gože' legaque':

—Le si' Spiritw che Diosen'. <sup>23</sup>Bene' ca' yesyetingje xtoła'gaquen', naple yela' chnabia' ye'ln'e' ba gwnitlaon, na' naple yela' chnabia' cont ye'le bene' bi yesyetingje xtoła'gaquen' bitw nitlaon.

**Tomás ble'ede' mban Jesúsen'**

<sup>24</sup>Na' Tomás ben' bososi'e Tomás Cuaš lene' len bene' šižinw ca' ba gosedalene' Jesúsen', na' bi gwzoe' cate' Jesúsen' bedyelo'elagüe' legaque' že' dmigon'. <sup>25</sup>Na' bene' ca' yezica'chle gose'ene':

—Ba ble'eto' Xanchon'.

Na' Tomásen' gože' legaque':

—Bi šejli'a mbancze' še bi le'eda' yiž che claven' le'e taque' ca' na' gwzebe xbenan' gan' gwdebe clav ca' na' gwzebe na'an cuit le'en.

<sup>26</sup>Gozde' to xman zjanite' lo' yo'on da' yoble na' zoa Tomásen' len legaque'. Na' da' yoble nyeyjw puert ca', cate' bezla' Jesúsen' na' gozzeche' gachol' legaque'. Na' gwne':

—Le soa binlo len xbab da' yo'o lo' yichjlažda'olen'.

<sup>27</sup>Nach gože' Tomásen':

—Gwna' lo' taca' quinga na' bzeben xbenon'. Na' bzebe naon' cuit li'a nga cont šejli'o. Na' bich gaco' bene' bi chejle', san šejli'o.

<sup>28</sup>Nach Tomásen' gože'ne':

—iXana' na' Dios chia'!

<sup>29</sup>Na' Jesúsen' gože' Tomásen':

—Tomás, ba chejli'o da' ba ble'edo' neda'. Mbalaz bene' ca' ba chesejle'e la'czla' bina' yesele'ede' neda'.

Da' quinga zjanyojen cont šejle'cho  
Jesúsen' naque' bene' gwseła' Dios

<sup>30</sup>Da' zan yela' guac ben Jesúsen'  
da' besele'e bene' ca' zjanaque' le'  
txen da' bi nyojen nga. <sup>31</sup>Perw  
zjanyoj da' quinga cont šejle'le  
Jesúsen' naque' Cristo ben' gwlej  
Diosen' cont nabi'e na' naque' Xi'in  
Dios, na' cont gata' yela' mban toli  
tocane chele da' chejnilaže'lene'.

Jesúsen' blo'elagüe' gaže  
bene' ca' zjanaque' le' txen

**21** Gwdechle yeto ža yoble  
Jesúsen' bozlo'elagüe' bene'  
ca' zjanaque' le' txen cho'a nisdao'  
da' nzi' Nisdao' Tiberias. Quinga  
goc: <sup>2</sup>Txen nite' Simón Pedron'  
len Tomásen' ben' bososi'e Tomás  
Cuaš, na' Natanael bene' yež Caná  
gan' mbane Galilean', na' chope  
xi'in Zebedeo na' yechope bene' ca'  
zjanaque' Jesúsen' txen. <sup>3</sup>Na' Simón  
Pedron' gože' legaque':

—Ša'a gwxen bel da' yoble.

Na' gose'e le':

—Lecze sa' neto'.

Nach gosa'aque' ja'aque' cho'a nisdao'  
na' gosoe to lo' barcw. Na' nocze no  
bel beseželde' že'na'. <sup>4</sup>Na' do ba zoa  
šeni' besele'ede' zecha Jesúsen' cho'a  
nisdao', perw bi gosacbe'ede' še Jesús  
nan'. <sup>5</sup>Nach Jesúsen' gože' legaque':

—Bene' migw chia' žnono bel  
chdole'le?

Na' gose'ene':

—Nono chdole'to'.

<sup>6</sup>Nach gože' legaque':

—Le gwzala' yixjw bel chelen' cuit  
barcon' lichale na' senlba'.

Nach bosozala' yixjw bel  
chegaquen', na' tantw be zan

besedola', bi gosezoede' yosyocuen'  
lo' barcon'. <sup>7</sup>Nach ben' chaquechgüe  
Jesúsen' le', gože' Pedron':

—Xancho nan'.

Na' cate' gože' Simón Pedron'  
Xancho nan', la' beyacwte Pedroa'  
xalanen', le gague bi nyaze' chalen'  
chone' žinna', na' la' bxite'te' lo'  
nisen' cont byob bežine' gan' zoa  
Jesúsen'. <sup>8</sup>Na' yezica'chle bene' ca'  
zja'aclene' barcw daon' zjanxobe'  
yixjw gan' že' bel ya'a ca'. Bi naquen  
zito' cho'a nisdao', ca do yeto  
gayoa metrže. <sup>9</sup>Na' cate' besyežine'  
cho'a nisdao' besele'ede' chi' yi'  
ya'alj na' xoa bel ya'a laguenna' na'  
len yetextil. <sup>10</sup>Na' Jesúsen' gože'  
legaque':

—Le yeyoxe' ngale to chope bel  
ya'a ca' za' gwxenle.

<sup>11</sup>Na' Simón Pedron' gweje'  
jaxi'e yixjw belen' gan' chi' barcon'  
na' bexoben' ga nac yo biž. Žen'  
to gayoa ši'inneyon bel xen, perw  
bi bcheza' yixjon' la'czla' be zan  
gwže' lo'enna'. <sup>12</sup>Na' Jesúsen' gože'  
legaque':

—Le da gagwle xsil.

Na' ne toe' bi besyeyaxjde' ye'ene':  
“¿No le'?”, le ba gosacbe'ede' naque'  
Xancho'n'. <sup>13</sup>Jesúsen' gwbigue' na'  
gwxi'e yetextilen' na' bnežjue' che to  
toe' na' lecz ca' bene' len bel ya'an.

<sup>14</sup>Da'na' goc da' gwyon ni'a blo'elao  
Jesúsen' bene' ca' zjanaque' le' txen  
gwde bebane' ladjo bene' guaten'.

Jesúsen' be'lene' Simón Pedron' diža'

<sup>15</sup>Na' cate' besyedagüe', Jesúsen'  
gože' Simón Pedron':

—Simón xi'in Jonás, ¿chaquechdo'  
neda' clel can' chesaque bene'  
quina neda'?

Pedron' boži'en gože'ne':

—Xana', nezd'o' chacda' le'.

Jesúsen' gože'ne':

—Bsed blo'e beñe' ca' za' gwzolao chesejnilaže' neda', beñe' ca' zjanac ca me' xila' chia'.

<sup>16</sup>Na' da' gwchop ni'a gože' le':

—Simón xi'in Jonás, íchacdo' neda'?

Na' da' yoble gwna Pedron':

—Xana', le' nezd'o' chacda' le'.

Jesúsen' gože'ne':

—Bgüia gwna' beñe' ca' chesejnilaže' neda', beñe' ca' zjanac ca xila' chia'.

<sup>17</sup>Da' gwyon ni'a gož Jesúsen' le':

—Simón xi'in Jonás, íchacdo' neda'?

Na' Pedron' gocyáše'de' dan' gož Jesúsen' le' ca' da' gwyon ni'a, na' gože' le':

—Xana', le' neze nle'edo' yogo'lol. Nezd'o' chacda' le'.

Jesúsen' gože' le':

—Bsed blo'e beñe' ca' chesejnilaže' neda', beñe' ca' zjanac ca xila' chia'.

<sup>18</sup>Da' li chnia' le', cate' goco' beñe' güego', cuino' gwyaz xalanon' na' gwyejo' con ga žan chio'. Perw cate' gaco' beñe' gole, gwli naon' na' beñe' yoble chize' xalano' na' yeche'e le' ga bi chaclažo'.

<sup>19</sup>Gože'ne' ca' cont gwnezde' can' gacxen Diozen' len da' gac che' cate' žin ža gate'. Na' gwde gwna Jesúsen' can' gac che Pedron' nach gože'ne':

—Con gwyejnilaže' neda' na' bzenag chia'.

### Can' gwna Jesúsen' che ben' chacchgüede'

<sup>20-22</sup>Na' yeto beñe' naque' Jesúsen' txen na'ogüe' legaque'. Na' beyechj Pedron' na' ble'ede' le' na' gože' Jesúsen':

—Xana', ínac gac che benga?

Jesúsen' gože'ne':

—Še chaclaža' ne' zoacze' cate' yida' yeto íbin' chacžejlažo'? Con gwzoateze gwyejnilaže' neda' na' bzenag chia'.

Ben' gwne' ca' naque' ben' chaquechgüe Jesúsen' na' ben' gwche' cuit Jesúsen' txen cate' gosagüe' xše' žen' cate' za' gac Jesúsen' lo' na' beñe' ca' chesegue'ede' le'. Na' cana' bena' gwñabde'ne': “Xana', ínoxen' gwdie' le' lo' na' beñe' ca'?”

<sup>23</sup>Na' dan' gož Jesúsen' Pedron': “Še chaclaža' ne' zoacze' cate' yida' yeto íbin' chacžejlažo'?”, da'nan' gwditj diža' len beñe' ca' chsejnilaže' Criston' gosene' bi gat bena'. Perw Jesúsen' gague gože'ne' bi gate', san gože'ne': “Še chaclaža' ne' zoacz benga cate' yida' yeto, íbin' chacžejlažo'?”

<sup>24</sup>Nedan' nezda' can' goc yogo' da' quinga na' da'nan' ba bia' diža' chegaquen na' ba bzojan'. Na' lecze le'e nezczele choa' diža' li.

<sup>25</sup>Na' da' zanch da' ben Jesúsen' da' bi zjanyojen, le ša zjanyoj yogon' tgüeje tgüejen, libr zan juisyw yesaquen še ca'.

Da' na'ze chzoja' na'a.

# DA' GOSON POSTLW CA'

---

Jesúsen' gwne' seje'  
Spiritw che Diosen'

**1** Teófilo, ca nac dan' bzoja' da' nechw, bzoja' yogo'loł da' ben Jesúsen', na' lecze bzoja' yogo' dan' bsed blo'ede' cate' gwzolaote' bsed blo'ede' <sup>2</sup>žinten cate' beyepe' yaba. Šlac bsed blo'ede' gwleje' postlw che' ca', na' Spiritw che Diosen' bzejni'in Criston', na' Criston' gože' legaque' nac yesone'. <sup>3</sup>Nach gwde gosot bene' mal ca' Jesúsen' na' gwde bebane' ladjo bene' guaten' nach jalo'elagüe' postlw che' ca'. Na' da' zan da' bene' cont gosenezde' mbanczen'. Na' gwdalene' legaque' choa ža na' bzejni'ide' legaque' can' chnabia' Diosen'.

<sup>4</sup>Na' šlac ne' zoa Jesúsen' len postlw che' ca' gože' legaque' cbi yesyežaše' ciuda Jerusalénna'. Gwne':

—Le yega'an le cueze gac can' gwna Xa' Diosen' gac, ca dan' bzejni'ida' le'e.

<sup>5</sup>Da' zaque' ben Juan da' bzoe' bene' nis, perw yeto chope ža da' zaca'ch gac chele dan' yedesoa Spiritw che Diosen' lo' yichjlažda'olen' nabi'an le'e.

Jesúsen' beyepe' yaban'

<sup>6</sup>Na' ža na'teze šlac ne' zjandop zjanžague' len Jesúsen' gose'ene':

—Xanto' žba bžin ža gono' cont yechoj nación Israel chechon' lo na' bene' zito' ca'?

<sup>7</sup>Jesúsen' gože' legaque':

—Bitw naquen nezele bi ža bi hor gon Xacho Diosen' da' ca' toze' ba bžie' bia' gone'. <sup>8</sup>Perw na' cate' yedesoa Spiritw che'na' len le'e, gaclenen le'e len yela' guac chenna' cont güe'le xtižan' ciuda Jerusalén ni, na' doxen ga mbane distritw Judean', na' distritw Samaritan', na' doxen yežlion'.

<sup>9</sup>Beyož gwna Jesúsen' ca', chesena'te bene' ca' chesejnilaže' le', beyepe' yaba to lo' bejw na' bich besele'ede' le'. <sup>10</sup>Na' ne' chesena'te bene' ca' le'e yaban' gan' besele'ede' beyepe', cate'cze gosacbe'ede' ba zjazeera chope angl len legaque' bene' zjanyaz lache' šiš. <sup>11</sup>Na' bene' ca' chope gose'e legaque':

—Bene' Galilea, žbixchen' chna'le le'e yaban'? Can' ble'ele beyep Jesúsen' yaban' caten' bechoje' ladjwlen', can' le'eczele yide' da' yoble.

Gosebeje' Matías cont goque'  
postlw laz Judasen'

<sup>12</sup>Na' nite' ya'a dan' nzi' Ya'a Olivos na' jaya'aque' Jerusalénna'.



Jerusalénna' naquen gała'ze con ca'te' de ľsens yesa'aque' ža che Dios can' ža ley che bene' Israel ca'.  
 13Na' cate' besyežine' Jerusalénna' postlw ca' šnej na' bene' ca' zjanžague' gosegüe' gan' nite'na' lo' quart zoa yichjen'. Postlw ca' šnej bene' quinga: Pedro, Jacobo, Juan, Andrés, Felipe, Tomás, Bartolomé, Mateo, Jacobo xi'in Alfeo, na' Simón ben' chon txen partid dan' nzi' cananista, na' Judas ben' nac bene' biše' Jacobon'. 14Na' gosenita'teze postlw ca' šnej chosoľ güiže' Diosen' txen len bene' ca' zjanaque' biše' Jesúsén' na' len María xna' Jesúsén' na' len yezica'chle no'ol ca' zjanžag.

15Na' ca hora' Pedroa' zeche' ladjo to gayoa gaľje bene' chesejnilaže' Jesucriston' cont be'lene' legaque' dižan', na' gože' legaque':

16—Bene' migw, Spiritw che Diosen' benen cont rey David bzoje' na' be'e diža' che Judasen' ben' gwche' bene' ca' gosezen Jesúsén' gan' jasešague' le'. Na' benen byen goc can' nyoj Xtiža' Diosen'.

17Judasen' goque' txen len neto' na' bene' txen len neto' yogo'loľ dan' gwyo'o lo' na'to' bento'. 18Na' gosezi'e late' yežlio len mechw dan' gwxi' Judasen' bene' da' malen' bdie' Jesúsén' lo' na' bene' ca'. Perw na' blažoe' cosyichj gan' goľadite' na' gošj li'ena', doxen xjaloen' bchoj.

19Yogo' bene' že' Jerusalénna' gosenezde' can' goc chen' na' da'nan' bososi'e yežlion' Acéldama na' xtiža'gaque'na' zejen Yežlio Chen.

20Goc can' nyoj to salmo žan:

Liže'na' gaquen to yo'o daš, nono soa na'.

Na' lecze nyojen žan:

Na' te bene' yoble yoľane' žin dan' bene'.

21'Na' nga nita' bene' ba gosone' txen len chio' šlac gwďalen Xancho Jesúsén' chio'. 22Ba gosone' txen gwzolaoten cate' da' Juan bzoe' le' nis bžinten caten' beyepe' yaban', na' cheyaľa' cuejcho toe' gone' txen len neto' postlw güe'to' diža' can' beban Xancho Jesúsén' ladjo bene' guat ca'.

23Na' gosebeje' chope bene', toe' José ben' le Barsabás, na' lecž le' Justo, na' ben' yeto Matías.

24-25Nach bosol güiže' Diosen' gose'ene':

—Xanto', le' nombi'o yichjlaždao' yogo'loľ bene'. Lao bene' ca' chope blo'ešca neto' noe' ba gwlejo' cont gague' postlw na' gone' xšinon' txen len neto'. Le ca' nac Judasen', gwlejyichje' dan' ngo'o lo' ne'e gone' na' ba zjayde' gan' naquen yeyeje' yela' güen da' mal che'na'.

26Nach gosone' rifa cont gosenezde' non' ba gwlej Diosen' na' Matíasen' bchoje' na' gosone' le' cuent len postlw ca' yešnej.

Can' goc cate' bla' Spiritw che Diosen'

**2** Na' bžin ža ľni dan' že' Pentecostés, na' postlw ca' na' yogo'loľ bene' ca' ba gosejnilaže' Jesúsén' zjandop zjanžague' toze latje. 2Na' zejzenez goc to sšag le'e yaban' ca' sšag che to be' bdono' gual na' nenxeje lo' yo'o gan' zjachi'ena'. 3Na' besele'ede' gała'ze yichj to toe' gosezoa tgüeje yi' beľ da' chala'nin. 4Ca' goc jašo'o Spiritw che Diosen' lo' yichjlaždao' to toe', na' Spiriton' benen cont gosezolagüe' goso'e gwde gwdele diža' da' gosejni'i bene' zito' ca'.

<sup>5</sup>Na' ca tiempen' bene' zan bene' Israel že' Jerusalénna' bene' chesonxene' Diosen', za'aque' doxen yežlion'. <sup>6</sup>Na' cate' gosende' chac sšaguen' gan' že' postlw ca', zan bene' Israel ca' besežague', na' leca besyebande', le to to postlw ca' bosozejni'ide' legaque' len diža' da' chesejni'i to toe'. <sup>7</sup>Bi gosejni'ide' bin' chac na' besyebande' gosene':

—¿Gague bene' distritw Galilea bene' quinga? <sup>8</sup>¿Nacxečen' to tocho chenecho cheso'e diža' can' chesoe' bene' gualaž checho diža'? <sup>9</sup>Balcho naccho bene' nación Partia, na' balcho bene' nación Media, na' balcho bene' nación Elam, na' balcho bene' distritw Mesopotamia. Na' yebałcho bene' distritw Judea, na' yebałcho bene' distritw Capadocia, yebałcho bene' distritw Ponto, na' yebałcho bene' distritw Asia, <sup>10</sup>yebałcho bene' distritw Frigia na' bene' distritw Panfilia, na' yebałcho za'cho nación Egipto, na' yebałcho za'cho yež ca' zjachi' Africa do te ciuda Cirene. Na' chio' naccho cuent len bene' nación Roma, balcho goljcho naccho bene' Israel na' yebałcho ben cuincho txen len bene' Israel. <sup>11</sup>Na' balcho naccho bene' yež ca' zjachi' Creta na' bene' distritw Arabia. Na' gate'tez bene' naccho, yogo'cho chenecho chesoe' bene' distritw Galilea quinga xtiža'chon' da' chaccho, cheso'e diža' che da' zan da' ba ben Diosen' da' zaca' yebanecho.

<sup>12</sup>Na' yogo' bene' ca' besedobe' chosozenague' besyebande' na' gosacžejlaže' bin' chac, na' zane' gosene':

—¿Bi zejen dan' chaquen'?

<sup>13</sup>Na' yebale' gosene'ye'e gosene':  
—iBene' quinga chesezožde'!

**Diža' dan' be' Pedroa' len  
bene' Israel ca' besežag**

<sup>14</sup>Na' Pedroa' gwzeche' lao ben' zjandop zjanžague' txen len postlw ca' yešnej na' be'e diža' zižje gwne':  
—Le'e bene' Judea na' note'tezechle zoale ciuda Jerusalén ni, che'nda' gwzenagle chia' na' gonle xbab che da' za' ni'a le'e. <sup>15</sup>Bene' lježa' quinga bitw chesezožde' can' chaquele, le ne' nac tempran. <sup>16</sup>Ba chac can' bzoj da' Joel ben' be' xtiža' Diosen' cani' bzoje' dan' gwna Diosen', žan:

<sup>17</sup>Cate' ba zoa žin ža cont yeyož yežlion',  
neda' Dios gona' cont Spiritw chian' yedesoa len bene' že' doxen yežlion'.

Na' gona' cont xi'inle ca' yeso'e xtiža'na',  
na' bene' byo xcuide' ca' yesele'edagüede' bi da' gona', na' güe'lena' bene' byo gol ca' diža' lo bišgal chegaquen'.

<sup>18</sup>Na' yogo' bene' ca' chesejnilaže' neda', bene' byo na' no'ole, yedesoa Spiritw chian' len legaque' cont yeso'e xtižan'.

<sup>19</sup>Gona' cont yesele'e benačen' da' zaca' yesyebande' le'e yaban' na' lagüe yežlion',  
na' gona' yela' guac chia'na' len chen, len yi' na' len žen da' nac ca' bejw.

<sup>20</sup>Bich gwseñi' gwbižen', na' bio'na' yeyaquen xna ca' chen cate' za' žin ža yida' da' yoble gwnežjua' castigw che yogo' bene' cbi chesejnilaže'nda', neda' naca' Xanle.

Žana' gaquen to ža žialao xen.

<sup>21</sup> Nach note'tez bene' yesenabe'  
gaclena' legaque',  
neda' naca' Xanle yebeja'  
legaque' lo da' malen'.

Can' gwna Diosen'.

<sup>22</sup> Na' le'e bene' Israel gualaž  
chia', le gwzenag chia'. Jesúsen'  
ben' nac bene' yež Nazaret, Diosen'  
blo'ede' naque' bene' zaque'. Diosen'  
bene' cont Jesúsén' bene' yela' guac  
na' bichle da' zaca' yebanecho  
can' nezecelen'. <sup>23</sup> Lo yela' neze  
che Diosen' bin' za' gac, bi'e latje  
gwzenle Jesúsén' na' bdelene' lo na'  
bene' mal ca' gosote'ne' bosode'ene'  
le'e yag cruzen'. <sup>24</sup> Perw na' Diosen'  
bechis bosbane'ne' ladjo bene' guat  
ca', le bi gwzoe yela' goten' nabian'  
le'. <sup>25</sup> Quinga bzoj da' rey David  
xtiža' Jesúsén' cani'te, žan:

Nezda' Xana' Diosen' zoe' len  
neda' do ža do yel,  
na' zoe' chaclene' neda' cont bi  
chžeba'.

<sup>26</sup> Da'na'na' zoa' mbalaz na' choa'  
diža' leca chebeda'.  
Na' lecze chebeda' nezda' yečhis  
yosbane' neda' ladjo bene'  
guat ca' cate' ba gota'.

<sup>27</sup> Dios chia', nezda' bi yocua'ano'  
neda' gan' že' bene' guat ca',  
neca go'o latje gožo' cuerp  
chia'na', neda' naca' xi'ino' na'  
nac lažda'oguan' xilaže'.

<sup>28</sup> Ba blo'edo' neda' can' soa' cueza'  
mbalaz.  
na' mbalaz soa' dan' soaleno'  
neda'.

Beyož gwna Pedroa' ca' nach gože'  
legaque':

<sup>29</sup> —Bene' Israel, nezecho da'  
xozxta'ocho rey David gote' na'

bosocuaše' le'. Na' nombia'cho  
ba gan' bosocuaše' le'. <sup>30</sup> Na' da'  
rey Davin' be'e diža' can' bzejni'i  
Diosen' le' na' gwnezde' gwlo'o  
Diosen' da' bałi gague da' te bi gac  
can' gwne'. Gwnezde' gon Diosen'  
cont Criston' galje' lo diaža che'  
na' nabi'e nación Israelen' can'  
gwnabia' le'na'. <sup>31</sup> Diosen' bene'  
cont da' rey Davin' gwnezde' can'  
gaquen' na' da'nan' be'e diža' che  
Criston' ben' ba gwseła' Diosen' cont  
nabi'e. Gwne' Criston' yebane' na'  
bi yega'ane' gan' že' bene' guat ca'  
na' neca gožo' cuerp che'na'. <sup>32</sup> Na'  
Diosen' bechis bosbane' Jesúsén'  
ladjo bene' guat ca', na' yogo' neto'  
choe'to' diža' nezeto' beyas bebane'.  
<sup>33</sup> Na' Diosen' len yela' guac che'na'  
bene' cont beyep Jesúsén' gan'  
zoe'na' na' chnabi'e txen len le'. Na'  
Diosen' bnežjue'ne' Spiritw che'na'  
can' gwne'. Na' Jesúsén' ba bene'  
yela' guac nga da' ba benele na' da'  
ba ble'ele. <sup>34</sup> Gague da' rey Davin'  
beyep yaban', san da' David bzoje'  
che Jesúsén' gwne':

Xancho Diosen' gože' Xanan':  
“Gwche'edo' cuita' nga nabia'cho  
txen,

<sup>35</sup> na' gona' cont yogo' no  
cheseague'e le' yosozexjw  
yichje' yosozenague' chio'.”

<sup>36</sup> Da'nan' yogo' chio' bene' Israel  
cheyala' nezecho Jesúsén' ben'  
betwle bda'ln'e' le'e yag cruz, Diosen'  
gwleje'ne' cont naque' Xanchon'  
na' naque' Cristo, zeje diža' naque'  
ben' gwseła' Diosen' nabi'e nación  
chechon'.

<sup>37</sup> Na' cate' bene' ca' zjanžaguen'  
gosende' xtiža' Pedroa', da' juisyw  
da' gosacde' lo' lažda'ogaquen', nach

gose'e Pedroa' na' len yezica'chle postlw ca':

—Bene' gualaž, čbin' cheyała' gonto'?

<sup>38</sup>Nach Pedroa' gože' legaque':

—To tole cheyała' yetinjele xtoła'le ca' na' soale nis dan' ba chejnilaže'le Jesucriston', na' Diosen' yezi'xene' čhele na' gone' le'e Spiritw čhe'na' soan lo' yichjlažda'olen'. <sup>39</sup>Xancho Diosen' gone' note'tezle Spiritw čhe'na' can' ba gwne', le'e na' xi'inle ca' na' note'tez bene' zito', le chnežjuen' yogo' bene' chbeje' cont yesaque' lo' ne'e.

<sup>40</sup>Nach Pedroa' be'lene' legaque' diža' zan, na' gwneyoede' legaque' gwne':

—Le yechoj ladjo bene' mal quinga bene' cbi zjanombia' Dios.

<sup>41</sup>Ca' goquen' bene' ca' gosejle'e diža' dan' be' Pedroa' gosezoe' nis. Na' lo žana' šon mil bene' gosejnilaže' Jesús'en' na' gosaque' txen len yezica'chle bene' chesejnilaže' le'. <sup>42</sup>Yogüe' gosenita'teze' bosozenague' dan' bososed bosolo'e postlw ca' legaque'. Na' gosaque' toze len yezica'chle bene' gosejnilaže' Jesús'en' na' gose'ej gosagüe' txen na' gosenite' bosol güiže' Diosen' txen.

**Can' goson bene' ca' gosejnilaže'  
Criston' da' nechw**

<sup>43</sup>Na' yogo'ze bene' besyebande' can' goson postlw ca' da' zan da' güen da' zaca' yebanecho len yela' guac čhe Diosen'. <sup>44</sup>Na' bene' ba chesejnilaže' Jesús'en' gosaque' toze na' gosone' toze yogo'lol da' zjade čhegaque'. <sup>45</sup>Na' gosote' yežlio na' bichle da' zjadede' na' mechw

dan' besele'ede' čhen goseyisen' lao yogo'lol'e con da' beseyaže' to toe'. <sup>46</sup>Na' tža tža besedop besežague' yodao' blaona' na' lecze do laže' gose'ej gosagüe' txen liž to togaque' na' gosenite' mbalaz. <sup>47</sup>Gosenita'teze' gosonxene' Diosen'. Na' gosazlaže' bene' yezica'chle can' gosone'na'. Na' tža tža Xancho Diosen' bene' cont gosanch bene' ca' gosejnilaže' Jesucriston'.

**Beyac to bene' nxiņj nī'e**

**3** Na' to ža Pedroa' na' Juan ja'aque' yodao' blaona' do cheda šone, hor cate' bene' Israel ca' chosol güiže' Diosen' yogo' ža. <sup>2</sup>Na' gwzoa to bene' nxiņj nī'e ca' goljte' na' yogo' ža gosebec bene' le' cho'a puert čhe yodao'na', puert dan' nzi Puert Xdan, cont gwnabe' mechw lao bene' ca' chja'ac yodao'na'. <sup>3</sup>Nach cate' bžin Pedroa' len Juan yodao'na' na' ben' nxiņj nī'ena' bol güiže' legaque' yosonežjue'ne' mechw. <sup>4</sup>Nach Pedroa' len Juanna' gosebeze' na' gosena'chgüe' le' na' Pedroa' gože'ne':

—Gwņa' neto'.

<sup>5</sup>Na' bena' bene' xbab yosonežjue'ne' mechw. <sup>6</sup>Perw Pedroa' gože'ne':

—Bibi mechw čhia' de da' gona' le', perw zoa to da' gona' gaclena' le': len yela' guac čhe Jesucriston' bene' naque' bene' yež Nazaret, chona' mandadw gwzoža' na' gwda.

<sup>7</sup>Na' Pedroa' bexoe' ne'e licha na' bsože'ene', na' gocte gwzeche' na' nī'ena' la' besyeyacten da' gual na' lecz ca' bečh nī'e ca'. <sup>8</sup>Na' cate' gocbe'ede' ba besyeyac nī'en', bxite' yela' chbe čhe'. Na' gwyo'e

chašil che yodao'na' len legaque' chxite' na' cho'e yela' choxcen che Diosen'. <sup>9</sup>Na' bene' ca' že' chašilen' besele'ede' can' chde' chxite' cho'e yela' choxcen che Diosen'. <sup>10</sup>Na' besyeyombi'e le' naque' ben' chbe' chnab mechw yogo' ža cho'a puert che yodao'na', puert dan' nzi' Puert Xdan, na' leca besyebande' da' ba beyac ni'ena'.

**Pedroa' be'e xtiža' Diosen'  
chašil yodaon'**

<sup>11</sup>Na' gosenite' chašil da' nzi' Chašil che da' Salomón dan' ze gan' zoa' yodao'na'. Na' ben' beyac ni'ena' bi bsane' Pedroa' len Juanna'. Nach yogo' bene' že' yodaon' besežagsese' chašila' cont jasene'e ben' beyaquen', le besyebanchgüede'. <sup>12</sup>Na' cate' Pedroa' ble'ede' ba zjanžag bene' zan gan' nite'na' nach be'lene' legaque' diža', gože' legaque':

—Le'e bene' gualaž chia' bene' Israel, žbixchen' chebanele?  
¿Chaquele len yela' guac cheton' bento' cont beyac benga?  
¿Še chaquele beyaque' dan' chonchguato' can' chazlaže' Diosen'?  
Bi naquen ca'. <sup>13</sup>Dios ben' gosonxen da' xozxta'ocho Abraham, Isaac na' Jacob, blo'e nac Xi'ine' Jesúsén' bene' zaca' juisyw. Perw le'e bdele Jesúsén' lo' na' justis ca' cont gosote'ne' na' bžonle cate' Pilaton' goclaze' gwsane'ne'. <sup>14</sup>Can' benle len Jesúsén' la'czla' naque' bene' laždao' xilaže' juisyw na' naque' la'zelagüe bene' chon da' güen. Nach gwnable bosan Pilaton' to bene' güetw bene' na' bi gwnable yosane' Jesúsén'. <sup>15</sup>Na' ca' nac Jesúsén' ben' bxe yela' mban toli' tocane, le'na' betwle,

perw na' Diosen' bečhis bosbane' le' ladjo bene' guat ca'. Neto' ble'eto'ne' na' choe'to' diža' ba bebane' ladjo bene' guat ca'. <sup>16</sup>Na' chle'ele benga cbi goc se'e na' nombialne', na' na'a ba beyac ni'ena' len yela' guac che Jesúsén' ben' chejnilaže'to'. Le da' chejnilaže'to' Jesúsén', da'nan' besyeyacšagüe' ni'a benga na' ba chle'ele can' beyaquen'.

<sup>17</sup>Bene' migw, nezda' le'e na' bene' gole blao chele ca' betwle Jesúsén' lagüe bi gwyejni'ile Diosen' gwsele'ne'. <sup>18</sup>Na' da' benle ca', goc can' gwna Diosen' gac, da' bene' mandaww bosozoj da' bene' ca' gosoe' xtižen' cani', bosozoje' che Criston' ben' gwlej Diosen' cont nabi'e. Bosozoje' che' gosene' yosochi yososaca' bene' le'. <sup>19</sup>Da'nan' le yeyonšca' xbab chele na' le yetinje' xtola'len' cont Xancho Diosen' gwnitlagüen' na' gone' ga soale mbalaz. <sup>20</sup>Nach Xancho Diosen' sele' Jesúsén' yežlio nga yetni'a, ben' gwleje' cani'te cont naque' Cristo checho. <sup>21</sup>Perw chonen byen yega'an Jesucriston' yaban' na'a, na' cate' žin ža gon Diosen' cont yežlio nga yeyaquen da' cobe, cana' yide' yeto. Ca' gosena bene' gwleje' cani' cont gosoe' xtižen'. <sup>22</sup>Da' Moisésén' be'lene' da' xozxta'ocho diža', gože' legaque': “Xancho Diosen' sele' yeto bene' gualaž chechon' cont güelene' le'e xtiže'na' can' gwsele' neda'. Che bena' gwzenagle bite'tez ne'. <sup>23</sup>Na' Diosen' gone' yesebiayi' yogo' bene' ca' cbi yosozenague' che bena' selen', na' bich yesenite' txen len bene' ca' chesonxene' le'.” Can' gož Moisésén' da' xozxta'ocho ca'.

<sup>24</sup>Lecz ca' yogo'lol' bene' gosoe' xtiža' Diosen' cani', gwzolaozen

len da' Samuel na' yogo' beñe' ca' gosedech, goso'e diža' che da' ca' ba chac tiemp na'a. <sup>25</sup>Le'e nacle xi'in diaža che da' beñe' ca', na' dan' gož Diosen' legaque' gone', na' dan' gože' yezica'chle xoxzta'ole ca', lecz naquen che le'e. Gože' da' Abrahanna': "To beñe' galje lo diaža chio' gone' cont beñe' že' doxen yežlion' nite' mbalaz." <sup>26</sup>Da'nan' cate' Diosen' bosbane' Xi'ine' Criston' ladjo beñe' guat ca', zgua'tec gwsele'ne' lao chio' beñe' Israel da' goclaze' gaclene' chio' cont to tocho yetinjecho xtoła'chon'.

**Pedroa' na' Juanna' nite'  
lao beñe' gwnabia' ca'**

**4** Ne' chesoe'lente Pedroa' na' Juanna' beñe' ca' diža' cate' besežin ba| b̄xoz che beñe' Israel ca', na' beñe' gwnabia' che ben' chesape' yodao' blao chegaque'na' na' beñe' saduceo ca' beñe' cbi chesejle'e še yesyeban beñe' guat ca'. <sup>2</sup>Beñe' ca' cheseže'e che dan' chososed chosolo'e Pedroa' len Juanna', le chesene' nezecho gwžin ža cate' yesyeban beñe' guat ca' da' beban Jesúsen'. <sup>3</sup>Na' beñe' blao ca' gosezene' Pedroa' len Juanna' na' goseyixje' legaque' ližya do yel, le ba chxin' na' bi goła' yesone' yela' justis chegaquen' ca' cheyała' že'na', san bosocuezen' beteyoch. <sup>4</sup>Na' ca' nac beñe' ca' gosende' chesoe' Pedroa' na' Juanna' xtiža' Diosen', zane' gosejnilaže' Criston', na' txen len beñe' ca' ba gosejnilaže'ne' cana', gosac do gayo' mil beñe' byo cbi cuent no'ole.

<sup>5</sup>Na' beteyo beñe' gwnabia' che beñe' Israel ca', beñe' gole blao

ca' na' beñe' bososed bosolo'e ley dan' bzoj da' Moisés, besedop besežague' ciuda Jerusalénna' <sup>6</sup>len Anás ben' naquech b̄xoz blao, na' len Caifás, na' Juan, na' Alejandro na' nochle beñe' zjanaque' biše' ljež ben' naquech b̄xoz blaon'. <sup>7</sup>Na' gosone' mandaw jasexi'e Pedroa' na' Juanna' na' cate' ba zjazie' laogaquen' gosenabde' legaque':

—¿No ben' lens chele cont beyonle beñe' nxinjen'? o ¿no yela' guac che bchinle beyonlene'?

<sup>8</sup>Na' Spiritw che Diosen' dan' yo'o lo' yichjlaždao' Pedroa' benen cont gože' beñe' ca':

—Le'e beñe' gwnabia' na' beñe' gole beñe' blao che nación Israel chechon', <sup>9</sup>chñable nac bento' da' güen beyonto' bena' nxinj ni'ena'. <sup>10</sup>Le'e na' yogo' beñe' gualaž cheyała' nezele Jesucriston' ben' naque' beñe' Nazaret bene' yela' guac che' cont beyacšagüe' benga. Le'e betwle Jesucriston' bda'ln'e' to le'e yag cruz, perw Diosen' bechis bosbane'ne' ladjo beñe' guat ca'. <sup>11</sup>Bi gwyejle'le che Jesucriston', da'nan' zaca'leble ca' beñe' cheson yo'o beñe' bi chesazlaže' yej güen da' ba naquen yej squin che yo'ona'. <sup>12</sup>Toze Jesucriston' guac gone' chio' yela' mban toli tocane, na' noch no zoa doxen lo yežlion' beñe' gac gone' yela' mban toli tocane che chio' benačh.

<sup>13</sup>Besyebane beñe' gwnabian' can' boži'i Pedroa' na' Juanna' xtiža'gaquen' sin cbi besežebe', le nacbia' zjanaque' beñe' yix'e' na' bi zjansedteque'. Nach gosacbe'ede' legaquen' ba gosodalene' Jesúsen'. <sup>14</sup>Na' dan' zecha ben' beyaque ni'ena'

txen len Pedroa' na' Juanna', bi besyežele bene' gwnabian' bi yesene' chegaque'. <sup>15</sup>Nach bene' gwnabian' besyebeje' postlw ca' chy'ole šlac bosoxi'e legacze' nacle yesone'. <sup>16</sup>Na' bene' gwnabian' gose' lježgaque': —¿Bi goncho len bene' quinga? Yogo' bene' že' ciuda Jerusalén ni zjanezde' gosone' to yela' guac xen na' bi gac ye'cho bene' bi gosone' yela' guaquen'. <sup>17</sup>Letechoze goncho cont cbi gaslas diža' dan' cheso'ena'. Da'nan' cheyała' ye'cho legaque' gata' castigw chegaque' še yesoe'che' xtiža' Jesúsen'.

<sup>18</sup>Nach gosaxe' Pedroa' na' Juanna' da' yoble na' gose'e legaque' bich yeso'e diža' che Jesúsen' na' noch no yososed yosolo'ede'. <sup>19</sup>Nach Pedroa' na' Juanna' bosyoži'e xtižen' gose'e legaque':

—Le gon xbab che da' nga, ¿chaquele chaclaže' Diosen' gwzenagto' chele o še chaclaže' gwzenagto' che le'? <sup>20</sup>Bi gac cuezto' bich güe'to' diža' che da' ba ble'eto' na' ba beneto'.

<sup>21-22</sup>Na' da' zan da' gose' bene' gwnabia' ca' legaque' cont yosoše'ne'. Perw na' bi beseželde' nacle yesone' legaque' castigw, le bene' zan chesonxene' Diosen' dan' beyac bena' len yela' guac che Diosen'. Ba gwdie' čhoa iz na' ca goljte' bi goc se'e. Nach bososane' Pedroa' na' Juanna'.

**Gosenabde' Diosen' gaclene' yeso'e  
xtiže'na' sin cbi yesezebe'**

<sup>23</sup>Na' Pedroa' len Juanna' cate' bososan bene' gwnabian' legaque' jaya'aque' gan' nita' yezica'chle bene' chesejnilaže' Criston' na' gosoe'lene'

legaque' diža' yogo'lol' can' gose' bꝛoz gwnabia' ca' na' bene' gole blao ca' legaque'. <sup>24</sup>Na' cate' gosende' dan' gose' Pedroa' len Juanna' legaque', toze can' gosone' xbab na' bosol güiže' Diosen', gosene':

—Xanto' Dios, len' beno' yaban' na' yežlion' na' nisaon'. Len' beno' beṇaḥ na' be ca' chesaš na' bica'chle da' zjade, na' len' chnabi' doxen. <sup>25</sup>Na' le' beno' cont da' rey David bzoje' diža' quinga dan' gož Spiritw chion' le', žan:

Bene' ca' cbi zjanaque' bene'  
Israel chesase' contr le', Xanto'  
Dios,  
perw bicze gac can' chesone'  
xbaben'.

<sup>26</sup>Bene' gwnabia' che nación ca' na' che yež ca' txen zjanaque' chesone' contr le' Xanto' Dios, na' contr Xi'ino' Criston' ben' gwse'lo' cont nabi'e.

<sup>27</sup>'Na' Xanto' Dios, naquen da' li rey Herodes na' Poncio Pilato na' bene' cbi zjanaque' bene' Israel gosaque' txen len bene' Israel ca' lo' ciuda nga. Na' yogüe' gosone' txen cont gosote' Xi'ino' Jesúsen' ben' nac bene' laždao' xilaže' juisyw, ben' gwlejo' cont nabi'e. <sup>28</sup>Gosone' can' gwchogbi'o gac dan' bžio' bia' cani'te. <sup>29</sup>Na' na'a Xanto', gwna can' cheson bene' gwnabia' ca', le chesaclaže' yosoše'be' neto' bene' güen žin chio'. Na' goclen neto' cont bi že'bt'o' güe'to' xtižo'na'. <sup>30</sup>Na' cate' güe'to' xtižo'na' blo'ešca yela' guac che Xi'ino' Jesúsen' bene' laždao' xilaže' juisyon' cont gac yela' guac, na' yesyeyac no bene' chesacšene na' gac bichle da' yesyebane bene'.



<sup>31</sup>Na' cate' beyož bosol ġiüiže' Diosen', Diosen' bene' gwxo' gan' zjandop zjanžague'na' na' Spiritw che'na' gwzoachguan len legaque', nach gos'o'e xtiža' Diosen' sin cbi besežebe'.

### Gosone' dan' zjade čhegaque' toze

<sup>32</sup>Na' yogo' bene' ca' gosejnilaže' Criston' toz ca gosac yichjlažda'ogaque'. Na' yogo' bi da' zjade čhegaque' gosonen' toze, na' nono gwna: “Čhia' da' nga”, o “Čhia' da' na'”, le naquen che yogo'lol' gaque'. <sup>33</sup>Na' postlw ca' len yela' guac xen che Diosen' bosozejni'ide' bene' Jesúsen' bebane' ladjo bene' guat ca'. Na' Diosen' goclenchgüe' legaque' len bi dan' gosone'. <sup>34</sup>Na' bibi goc falt bi da' beseyažje bene' gosejnilaže' Criston', le bene' zjanape' no yežlio o no yo'o gosoten'. Na' mechw dan' besele'ede' che to ton <sup>35</sup>bosonežjuen' postlw ca', na' postlw ca' goseyisen' len bene' beseyažjden'. <sup>36</sup>Can' ben to bene' Chipre bene' le José. Naque' xi'in diaža che da' Levin' na' postlw ca' bososi'ene' Bernabé, zeje diža' ben' cheyonxenlaže' bene'. <sup>37</sup>Joséna' bete' to yežlio che' na' mechw dan' ble'ede' čhen bnežjuen' postlw ca'.

### Da' mal dan' goson Ananías na' Safira

**5** Na' zoa to bene' le Ananías na' no'ol che'na' Safira, na' gosote' to yežlio čhegaquen'. <sup>2</sup>Perw na' legacze' bosoxi'e yosonežjue' late'ze mechw dan' besele'ede' čhen na' yese'e postlw ca' doxenenna'. Nach gwwey Ananíasen' na' bnežjue' postlw ca' mechon'. <sup>3</sup>Nach Pedroa' gože'ne':

—Ananías, ¿bixčhen' bzenago' che Satanás dan' chnabia' da' xigüe' ca' na' chacdo' xoayago' Spiritw che Diosen'? Čhi'o neto' choņo' doxen mechon' dan' ble'edo' che yežlion', len ba gwlo'ošagüe'le laten' par cuinle. <sup>4</sup>Čhio' yežlion' cate' bina' goton', na' čhio' mechon' dan' ble'edo' cate' beton' na' zaco' cont beno' da' chaclažo' len len. ¿Bixčhen' benle da' malen' nac ca'? Gague contr neton' ba benle benlaže'le, san contr Diosen'.

<sup>5</sup>Nach Ananíasen' cate' bende' xtiža' Pedroa' to gwbižze' na' gote'. Na' yogo' bene' ca' gosende' diža' can' goquen' besežebchgüe'. <sup>6</sup>Na' besežin to čhope bene' xcuide' gan' gwbiž da' Ananíasen' na' bosyochele' cuerp čhen' to lache' na' besyeyo'ene' ga bosocuaše'ne'.

<sup>7</sup>Na' gwde do šon hor gote' cate' bžin no'ol che'na' na' gwyo'e lo' yo'on sin cbi nežde' bin' ba goc che bene' čhen'. <sup>8</sup>Na' Pedroa' gože'ne': —¿To ca'te' ble'ele che yežlion'?

Na' Safiran' gože'ne':

—To ca'te'ten'.

<sup>9</sup>Nach Pedroa' gože' no'olen':

—¿Bixčhen' goco' toze len bene' čhion' chaquele gonle Diosen' prueba še lede' can' že' bi cheyala' xoayagcho? Cho'a puert nga zjazecha bene' ba bosocuaše' bene' čhio'na' na' na'a yeso'e le'.

<sup>10</sup>Na' la' gwbižte Safiran' lao Pedroa' na' gote'. Na' cate' gos'o bene' xcuide' ca' lo' yo'ona' besele'ede' ba gote' nach gos'o'ene' jasecuaše'ne' cuit da' bene' che'na'. <sup>11</sup>Na' yogo' bene' chesejnilaže' Criston' besežebe' can' goquen' na' lecze besežeb yezica'chle bene' gosende' diža' can' goquen'.

**Gosone' da' zan yela' guac**

<sup>12</sup>Na' postlw ca' gosone' da' zan yela' guac na' bichle da' besele'e bene' da' zaca' yesyebande'. Na' bene' ca' chesejnilaže' Xancho Jesucriston' chesedop chesežague' txen chašil che yodao' blaona' gan' nzi' Chašil che da' Salomón. <sup>13</sup>Na' yezica'chle bene' ca' že' Jerusalénna' gosapchgüe' legaque' bala'an, la'czla' besežebe' yesaque' txen len legaque'. <sup>14</sup>Perw na' zane' gosejnilaže' Xanchon' na' gosaque' txen, zan bene' byo na' no'ole. <sup>15</sup>Na' cate' no bene' gosacšende' goseyixjue' legaque' tnez do lo cam do lo yagla, gosebeze' te Pedroa' cont yesechele' bxin che' na' yesyeyacde' še bi yižgüen' chese'ede'. <sup>16</sup>Na' bene' ca' že' yež da' zjachi' gałaze' ciuda Jerusalénna' ja'aque' zjanche'e bene' chesacšene' na' bene' zjayo'o zjanyaz da' xigüe'. Na' yogo'lole' besyeyacde'.

**Bene' saduceo ca' goseyixjue'  
Pedroa' len Juanna' ližya**

<sup>17</sup>Nach ben' nacch bχoz blao na' yezica'chle bene' saduceo bene' cbi chesejle' yesyeban bene' guat, besegue'ede' postlw ca'. <sup>18</sup>Na' gosezene'ne' na' goseyixjue' legaque' ližya. <sup>19</sup>Na' to angl bene' za' gan' zoa Xancho Diosen' bžine' ližyan' šeže'le na' gwsaljue' puert ca' na' bebeje' legaque'. Na' gože' legaque':

<sup>20</sup>—Le šja'ac yodao' blaona' na' le güe' diža' len ben' chesežagna' naquen' yesone' cont gata' yela' mban chegaque' toli tocane.

<sup>21</sup>Nach dan' gosende' can' gož anglen' legaque', ja'aque' yodao' blaona' cate' gwyeni' na' bososed bosolo'ede' ben' zjanžag na'.

Na' ben' nac bχoz blao len bene' gole blao ca' chesenabia' nación Israelen' besedobe' cont bosoxi'e, nach gosone' mandadw šjasexi'e postlw ca' gan' zjade' ližyan'. <sup>22</sup>Na' cate' ben' chesap yodaon' besežine' ližyan' gague' no postlw ca' zjanla' na' jaya'aque' lao bene' gwnabia' ca' jasyedixjue'ede'. <sup>23</sup>Gose'e bene' ca': —Nyeyjwchach ližyan' na' lecze na' nita' soldadw ca' cho'a puerta' chesapen' perw cate' gwsaljwto' puerten' gague' no postlw ca' že' lo' ližyan'.

<sup>24</sup>Na' ben' nacch bχoz blao na' bene' gwnabia' che ben' chesap yodaon' na' bχoz gole blao ca' cate' gosende' rsonna' besyebande', gosene':

—¿Nac gac da' nga na'a?

<sup>25</sup>Na' šlac chesacžejlaže', bžin to bene' gože' legaque':

—Bene' ca' gw dixjwle ližyan' zjaze' chašil che yodao' blaona' chososed chosolo'ede' bene'.

<sup>26</sup>Nach bene' gwnabia' che ben' chesap yodaon' len bene' gop ca' jasa'aque' jasexi'e postlw ca' diža' šagüe'. Bi gosone' znia len legaque' da' besežebe' bene' chosozenag xtiža' postlw ca' še yosožie' legaque' yej. <sup>27</sup>Na' cate' besežin postlw ca' lao bene' gwnabia' ben' nita' chosoxi'a, nach ben' nacch bχoz blao gože' legaque':

<sup>28</sup>—Ba bento' mandadw bi güe'le diža' che Jesúsen' na' bich gwsed gwlo'ele bene' xtižen', na' ba gwdisle xtiže'na' doxen ciuda Jerusalénna'. Na' ba chosbague'le neto' žale betwto'ne'.

<sup>29</sup>Nach Pedroa' na' postlw ca' gose'e legaque':

—Nacchen da' žialao xen gwzenagto' che Diosen' clel ca che beṇaḥ. <sup>30</sup>Le'e betwle Jesúsēn' bda'lnē' to le'e yag cruz, perw Dios ben' chonxenko na' ben' gosonxen da' xoxxta'ocho ca' beḥis bosbane'ne' ladjo beṇe' guat ca'. <sup>31</sup>Na' na'a Diosen' ba bnežjue'ne' yeḷa' bala'an xen na' yeḷa' gwnabia' xen cont chnabi'e na' chnežjue' yeḷa' mban toḷi tocaṇe che beṇe' chesejnilaže'ne'. Na' le'na' chazlaže' gaclene' yogo' chio' beṇe' Israel yetinjecho xtoḷa'chon' nach yezi'xene' chechon'. <sup>32</sup>Neto' nezeto' can' ben Diosen' len Jesúsēn' na' choe'to' diža' chen, na' lecze Spiritw che Diosen' choen' diža' che Jesúsēn' lo' yichjlažda'oton', le Diosen' ba gwsele' Spiritw chen' zoan lo' yichjlaždao' beṇe' chosozenag che'.

<sup>33</sup>Na' beseža'achgua beṇe' gwnabia' ca' cate' gosende' can' gož Pedroa' legaque' na' gosaclačže' yesote' postlw ca'. <sup>34</sup>Perw gwzoa to beṇe' fariseo len legaque' beṇe' le Gamaliel. Chsed chlo'ede' beṇe' ley dan' bzoj da' Moisésēn' na' gosapchgua beṇe' le' bala'an. Na' Gamalielen' gwzeche' na' bene' mandadw yesechoj postlw ca' chy'ole šlac güe'lene' beṇe' ca' že'na' diža'. <sup>35</sup>Na' gože' beṇe' ca' že'na':

—Bene' gualaž, cheyaḷa' goncho xbab nac goncho len beṇe' quinga cont goncho da' nac güen. <sup>36</sup>Le yosa'laže' can' goc cate' bchoj ben' le Teudas gwne' naque' beṇe' zaque'. Na' do tap gayoa beṇe' bosozenag che' na' gosaque' le' txen. Perw na' bžin ža gosot beṇe' le' na' besyeyaslas ben' gosaque' le' txen, gague bi gocch yesone'. <sup>37</sup>Na'

gwdechle ca tiempēn' bosocheḷe' baḷ beṇe' že' to to yež, bchoj to beṇe' distritw Galilea ben' le Judas na' beṇe' zan gosaque'ne' txen. Na' lecze bžin ža gosote'ne' na' beṇe' ca' gosaque' le' txen lecze besyeyasḷase'. <sup>38</sup>Na' da'nan' žia' le'e can' chacda' cheyaḷa' goncho, jaseye beṇe' quinga, bibi gonecho legaque'. Le še chososed chosolo'ede' xbab chegacze', yeniten. <sup>39</sup>Na' še dan' chososed chosolo'ede' naquen che Dios, bibi gac goncho cont cbi gaslasen. Cheyaḷa' gwsaca'cho cont bi tillencho Diosen'.

<sup>40</sup>Na' gosazlaže' beṇe' gwnabia' ca' can' gož Gamalielen' legaque'. Nach gosaxe' postlw ca' na' goseyine' legaque' na' gosone' mandadw bich yososed yosolo'ede' che Jesúsēn' bate'tezechle. Nach bososane' legaque'. <sup>41</sup>Na' ca' nac postlw ca', cate' besyechoje' gan' gota' yeḷa' güexian', chesyebede', le Diosen' be'e latje bosochi bososaca' beṇe' legaque' neche dan' chososed chosolo'ede' che Jesúsēn'. <sup>42</sup>Na' yogo' ža bososed bosolo'ech postlw ca' che Jesucriston' do liž beṇe' na' cate' chja'aque' yodao' blaona'.

**Beṇe' ca' chesejnilaže' Criston' gosebeje' gaže beṇe' goson žin bixjw**

**6** Na' ca tiempēn' zej chanch beṇe' ca' chesejnilaže' Jesucriston' na' beṇe' ca' cheso'e diža' griego gwzolao chesežeše', chesene' no'ol güezeb ca' nchixe legaque' bi chesezi'e lebe len no'ole güezeb ca' cheso'e diža' hebreo cate' chesyise' dan' chese'ej chesagw to togaque'. <sup>2</sup>Nach postlw ca' šižinw bosyotobe' yezi'ca'chle beṇe' ca'

chesejnilaže' Jesucriston' na' gose'e  
legaue':

—Bi naquen güen neto' gwsanto'  
bich gwsed gwlo'eto' bene' xtiža'  
Diosen' cont chisto' dan' yese'ej  
yesagw bene'. <sup>3</sup>Da'nan' bene' migw,  
le cuej gaže bene' lježle, bene'  
zoachgua Spiritw che Diosen' len  
legaue', bene' zjanac bene' sina' na'  
bene' cheson da' güen, na' le gon  
lo na'gaque' yeseyise' dan' yese'ej  
yesagw bene' ca'. <sup>4</sup>Na' neto' soateze  
soato' yol' güižto' Diosen' na' gwsed  
gwlo'eto' bene' xtižen'.

<sup>5</sup>Na' gosazlaže' yogo' bene' ca'  
na' gosone' can' gose' postlw ca'  
legaue', na' gosebeje' to bene' le  
Esteban bene' chejnilaže'chgua  
Diosen' na' zoachgua Spiritw che  
Diosen' len le'. Na' lecze gosebeje'  
Felipe, na' Prócoro, na' Nicanor, na'  
Timón, na' Parmenas, na' Nicolás  
bene' ciuda Antioquía ben' bene'  
txen len bene' Israel. <sup>6</sup>Na' bosozoe'  
legaue' lao postlw ca' na' postlw ca'  
bosol' güiže' Diosen' chegaue' na'  
gosexoa na'gaquen' yichj bene' ca'  
cont gosezi' lo ne'e žin dan' yesonen'.

<sup>7</sup>Na' bene' zanch gosende' xtiža'  
Xancho Jesucriston', na' zan bene'  
Jerusalénna' gosejnilaže'ne' na'  
lecze zan bxoz ca' bosozenague' na'  
gosejle'e xtiže'na'.

### Gosezene' Esteban

<sup>8</sup>Na' Estebanna' gwzoachgua  
yela' guac che Diosen' len le' na'  
Diosen' goclenchgüe' le'. Da'nan'  
bene' yela' guac na' bichle da' zaca'  
yesyebane bene' lao bene' ca' že'  
na'. <sup>9</sup>Na' zoa to yodao' dan' chesene'  
Yodao' che Bene' ca' Bich Zjanaque'  
Esclavos. Bene' ca' chesedop

chesežag yodao'na' za'aque' ciuda  
Cirene na' ciuda Alejandría na'  
distritw Cilicia na' distritw Asia.  
Na' bal' bene' ca' gwzolao gosacyože'  
len Estebanna', <sup>10</sup>perw na' bi  
besyeželde' nac yosyoži'e xtižen',  
le Spiritw che Diosen' bnežjon  
le' yela' sina' na' bzejni'in le' bin'  
gwne'. <sup>11</sup>Nach gosego'oyele' to chop  
bene' cont goso'e diža' güenlaže'  
che', gosene' Estebanna' gwneye'e  
che da' Moisésen' ben' bzoj ley che  
bene' Israel ca'. Na' lecze gosene'  
Estebanna' gwne' diža' ya' che  
Diosen'. <sup>12</sup>Na' bene' ca' gosacyože'  
che Estebanna' bosota bosone'  
bene' lo ciuda na' bene' gole blao  
che bene' Israel ca' na' bene' ca'  
chososed chosolo'ede' ley dan' bzoj  
da' Moisésen' cont gosaque' toze.  
Na' ja'acsese' gan' zoa Estebanna'  
na' gosezene'ne' na' goseche'ene'  
gan' že' bene' ca' chesenabia' nación  
Israelen'. <sup>13</sup>Na' goseyiljue' bene'  
goso'e diža' güenlaže' bene' gosene'  
che':

—Benga bicze šize zoe' chne' diža'  
bya' che yodao' blao che Diosen' nga  
na' ley dan' bzoj da' Moisés. <sup>14</sup>Ba  
beneto' že' Jesús ben' naque' bene'  
yež Nazaret yochinje' yodao' blaona'  
na' yoše'e costumbr checho dan' ben  
da' Moisés mandadw na'ocho.

<sup>15</sup>Na' yogo' bene' ca' zjachi' gan'  
chesone' yela' justisen' gosene'e  
cho'alao Estebanna' na' besele'ede'  
chactiten ca' cho'alao angl.

### Choe' Estebanna' diža'

**7** Nach ben' nacch bxoz blaona'  
gože' Estebanna':

—¿Naquen can' chesena bene'  
quina?

<sup>2</sup>Na' Estebanna' gože' legaque':  
 —Le'e bene' gole na' note'teze  
 bene' gualaż, le gwzenag chia' len  
 to chop da' nia' le'e. Diosen' ben' nac  
 la'zelagiue bene' zaca' blo'elagiue' da'  
 xozxta'ochó Abraham cate' gwzoe'  
 distritw Mesopotamia cate' za'  
 šjasoe' ciuda Harán. <sup>3</sup>Na' Diosen'  
 gože'ne': “Bchoj lažo' na' gwlejiychj  
 bene' biše' lježo' na' gwyej jasoa  
 latje gan' gwlo'eda' le'.” <sup>4</sup>Beyož  
 gož Diosen' Abrahanna' ca', nach  
 Abrahanna' bchoje' gan' že' bene'  
 Caldea ca' na' jasoe' Harán. Na'  
 bžin ža got da' xe'na' na' gwdechle  
 Diosen' gwche'e da' Abrahanna' gan'  
 zoacho nga. <sup>5</sup>Diosen' bi bnežjue'  
 da' Abrahanna' yežlio gaquen che',  
 ne late' da'ozen', san gwne' gaquen  
 che xi'in diaža che' cate' ba gote',  
 la'czla' nono xi'ine' na' soa cate'  
 gož Diosen' le' ca'. <sup>6</sup>Nach Diosen'  
 gwne' šjasenite' laž bene' zito' tap  
 gayoa iz ga yesaque' esclavos na'  
 yesežaglaochgüe'. <sup>7</sup>Nach Diosen'  
 lecze gože'ne': “Neda' gwnežjua'  
 castigw che nación gan' yesone'  
 xi'in diaža chio' ca' esclavos na'  
 gona' cont yesyechoje' naciónna'  
 na' yeside' yesonxene' neda' nga.”  
<sup>8</sup>Nach Diosen' gože' Abrahanna'  
 gone' güen len xi'in diaža che'na'.  
 Na' bene' mandadw soa Abrahanna'  
 to señw dan' že' circuncisión, le' na'  
 len bene' byo ca' zjanaque' diaža  
 che', cont gacia' le chesejle'e che  
 dan' gwna Diosen'. Da'na'na' cate'  
 golje xi'ine' Isaaquen' bzoe'be' señw  
 to xmanzebe', na' lecze can' ben da'  
 Isaaquen' cate' gol je xi'ine' Jacob.  
 Na' ca'cze ben da' Jacoben' len da'  
 xi'ine' ca' šižinw, bene' ca' gosac  
 šižinw diaža che bene' Israel.

<sup>9</sup>Na' xi'in da' Jacoben' ben' le  
 José, bene' biše' ca' gosacxi'ede'  
 le' na' gosote'ne' gosezi' bene'  
 nación Egipto le'. Perw Diosen'  
 gwzoe' len Josén. <sup>10</sup>Na' goclene'ne'  
 len yogo'lol da' bžaglagüe'. Na'  
 Diosen' bene' cont da' faraón ben'  
 chnabia' Egipton' bebede' Josén' na'  
 gocbe'ede' naque' bene' sina'. Na'  
 da'nana' faraónna' gwleje' le' cont  
 goque' gobernador che nación  
 Egipton' na' bene' lo ne'e ližen' na'  
 yežlio che'na'.

<sup>11</sup>Na' goc gwbin doxen Egipton'  
 na' lecze can' goc gan' nzi' distritw  
 Canaán na' da' xozxta'ochó ca'  
 bi beseželde' da' yesagiue' na'  
 besežaglaochgüe'. <sup>12</sup>Perw na'  
 bžin ža da' Jacoben' bende' diža'  
 de trigw Egipton' na' gwsele' da'  
 xozxta'ochó ca' jasexi'en da' nechw.  
<sup>13</sup>Na' bechop ni'a ja'aque' cate' ben  
 Josén' ga besyeyombia' bene' biše'  
 ca' le', nach gwneze faraónna' can'  
 nac diaža che Josén'. <sup>14</sup>Na' Josén'  
 bene' mandadw šjasexi'e xagaque'  
 Jacoben' na' yogo'lol biše' lježe' ca',  
 zjanaque' ca do gayonšino' bene'.  
<sup>15</sup>Can' goc gwyej Jacoben' jasoe'  
 Egipton' na' Egiptona' gote', na'  
 lecz na' gosat xi'ine' ca' bene' ca'  
 gosac xozxta'ochó. <sup>16</sup>Na' gwdechle  
 besyeyo'e žit benat chegaquen'  
 na' jasecuše'ne' to lo' bloj ba da'  
 gosone' yež gan' nzi' Siquem. Da'  
 Abrahanna' gwxi'e ban' cani'te che  
 xi'in da' Hamor gwdixjuen' mechw.

<sup>17</sup>Na' cate' ba zoa žin tiemp  
 gwnežjo Diosen' legaque' yežlio can'  
 gože' Abrahanna', ba zej chan bene'  
 Israel ca' že' laž bene' Egipto ca'.

<sup>18</sup>Na' ca' chac beža' rey che Egipton'  
 na' rey coben' bi gwnezde' can'

goclen Josén' nación chen'. <sup>19</sup>Na' rey nga gw diljwlaže' bi da' mal bene' len da' xozxta'ocho bene' Israel ca' na' bene' mandadw šjasecho' on xi'ingaque'na' cont yesatbe'. <sup>20</sup>Na' ca tiempen' golje da' Moisésen' na' bebe Diosen' lebe', na' xaxna'be' bososcha'ogüe'be' šone bio'. <sup>21</sup>Perw na' bžin ža jasecho' onšaze'be' na' xi'in faraónna' to no'ole beželde'be' na' beyo'ebe' liže' boscha'ogüe'be' ca xi'ine'. <sup>22</sup>Ca' goquen' bsed da' Moisésen' tcho'a yela' sina' che bene' Egipto ca' na' bene' da' zaca' na' be' diža' da' zaca'.

<sup>23</sup>Na' čhoa ize da' Moisésen' cate' gwnan šjane'e bene' Israel gualaž che' ca'. <sup>24</sup>Na' jale'ede' to bene' Egipto chči chsaque' to bene' Israelen'. Nach da' Moisésen' betue' bene' Egipton', boži'e da' malen' bende' bene' gualaž che'na'. <sup>25</sup>Bene' xbab gocde' yesacbe'e bene' gualaž che' chaclen Diosen' le' cont yosle' legaque' lo na' bene' Egipto ca', perw bi gosacbe'ede'. <sup>26</sup>Na' beteyo gosedił chopze bene' Israel. Na' bžin da' Moisésen' gocde' gone' cont yesenite' binlo, na' gože' legaque': "žBixčen' chdillen lježle le'e nacle bene' gualaže?" <sup>27</sup>Nach ben' nap doła'na' bžigue' da' Moisésen' ca'ale gože'ne': "žNo gwna le' gaco' bene' gwnabia' cont gono' yela' justis čheto'na'? <sup>28</sup>žLez chaclažo' goto' neda' can' beto' bene' Egipton' neje?" <sup>29</sup>Na' cate' bene da' Moisésen' can' gož bena' le' nach bxonje' jasoe' nación gan' nzi' Madián la'czla' naque' bene' zito' len bene' ca'. Na' bšagne'e na' gwnita' chope xi'ine'.

<sup>30</sup>Na' goc čhoa iz zoe' na', cate' to angl bene' gwseła' Dios blo'elagüe'

le' latje dašen' gała'ze Ya'a Sinaí, yo'o anglen' to lo' yi' bel' chdoljen to lo' yag xis yeše'. <sup>31</sup>Na' cate' ble'e da' Moisésen' can' chaquen' bebande' nach gwbigue' yelate' cont ble'ešagüe'de' na' bende' chol' güiž Xancho Diosen' le', che'ene': <sup>32</sup>"Neda' naca' Dios ben' chonxen Abraham, ben' chonxen Isaac, na' ben' chonxen Jacob." Nach da' Moisésen' gw xize' catec bžebe', gague cheyaxjde' ne'e. <sup>33</sup>Na' gož Xančhon' le': "Gwlečhj xelo'na' cont gapo' neda' bala'an, le' latje gan' zechao'na' naquen' čhia'. <sup>34</sup>Neda' ba ble'eda' yela' yaše' yela' zi' da' chde' nación čhia' Israelen' bene' že' Egipton' na' ba benda' ca' chesonyaše'. Da'na'na' gaclena' legaque'. Beda' na' cont sela' le' Egipton'."

<sup>35</sup>Diosen' gože'ne' ca' la'czla' bene' Israel ca' cbi gosezi'e che', gose'e Moisésen': "žNo gwna le' gaco' bene' gwnabia' cont gono' yela' justis čheto'?" Diosen' gwsele' da' Moisésen' cont gwnabi'e da' xozxta'ocho ca' na' cont bebeje' legaque' lo na' bene' Egipto ca', na' angl che' Diosen' ben' ble'e da' Moisésen' lo' yi' bel' gwzoe' goclene'ne'. <sup>36</sup>Na' da' Moisésen' bebeje' legaque' Egipton' gan' bene' zan yela' guac na' bichle da' zaca' yebane bene', na' lecz ca' bene' cate' besežine' Nisdao' Xnan' na' šlac gosenite' latje dašen' čhoa iz. <sup>37</sup>Na' da' Moisésnan' gože' da' xozxta'ocho ca': "Xancho Diosen' sele' yeto bene' gualaž čhechon' cont güe'lene' le'e xtiže'na' can' gwsele' neda'. Čhe benan' gwzenagle." <sup>38</sup>Da' Moisésen' gwzoe' len da' xozxta'ocho ca' latje dašen', na' lo' Ya'a Sinaín' to angl

beñe' gwseła' Diosen' gože' le' diža' da' zjansa' yela' mban, na' bzoje' dižan' par chio'.

<sup>39</sup>Perw na' da' xozxta'ocho ca' zan las bi bosozenague' che da' Moisésen', bosozoe'ne' to šla'ale. Gosaclaže' šjaya'aque' Egipton'.

<sup>40</sup>Na' šlac zej da' Moisésen' lo Ya'a Sinaí, gose'e beñe' biše' Aarónna': "Ben da' le'echo da' šejnilaže'cho na' da' cuialao laochi tnez. Le ca nac Moisésen' ben' bebej chio' Egipton', nono neze bin' ba goc che'." <sup>41</sup>Nach gosone' to me' go'n dao' de oro na' gosote' no beyixe' gosonxene' me' daon', na' gosone' lni che bena' gosone' len ni'a na'gaque'. <sup>42</sup>Da'n an' Diosen' gwlejyichje' naciön Israelen' na' be'e latje gosejnilaže' gwbiž, bio', na' beljw. Na' da' nga nyojen len dan' bosozoj da' beñe' ca' gosole xtiža' Diosen' cani', žan:

Le'e beñe' Israel, gague nedan' benxenle caten' betwle beyixe' latje dašen' lao choa iz.

<sup>43</sup>Benle no da' benxenle, na' bia'le yodao' da' chacte chedobe gan' benxenle dan' nzi' Moloc, na' bia'le beljon' benxenle dan' nzi' Renfán.

Na' dan' ba gwlejyichjle neda', da'n an' cueja' le'e gan' zoalen' na' seła' le'e naciön zito' do gan' nzi' Babilonia.

<sup>44</sup>Na' šlac chesaše' latje dašen', da' xozxta'ocho ca' gosone' to yodao' da' chacte chedobe gan' že' yej ta'a gan' nyoj ley chegaque'na'. Na' gosonen' con can' gož Diosen' da' Moisésen' na' con can' blo'ede' le'. <sup>45</sup>Nach cate' da' Josué gwche'e legaque' gan' ben Diosen' cont gosequ'e yežlio che beñe' zito' ca', lecze gosole yodao' da'

chacte chedobe. Na' ne' bosochine' yodaon' bžinten tiemp che da' rey David. <sup>46</sup>Na' Diosen' bebede' da' rey Davin', na' da' Davin' goclaže' gone' to yodao' che Diosen', Dios ben' lecze benxen da' Jacoben' cani'te.

<sup>47</sup>Perw na' da' xi'ine' Salomón benen'. <sup>48</sup>Na' Diosen' ben' chnabia' doxen, bi nacho zoe' lo' yo'o da' chon benačen', san chac can' gwna Diosen' dan' bzoj to beñe' be' xtiže'na' cani', žan:

<sup>49</sup>Neda' zoa' yaba chnabia', na' guac gona' con bi chazlaža' lo yežlion'.

Na' čhaquele gonle to liža'na'? Neda' bi chyažjda' yo'o ga yezi'laža'.

<sup>50</sup>Neda' bena' yogo'te da' zjade.

<sup>51</sup>Dan' bi chzenagle, dan' bi chejle'le lo' lažda'olen' nacchgual beñe' güedenag can' gosac da' xozxta'ocho ca'. Bicze chzenagle che Spiritw che Diosen'. <sup>52</sup>Da' xozxta'ocho ca' lecze bosochi bososaque' beñe' ca' gosole xtiža' Diosen' cani', na' gosote' legaque' caten' gosole diža' can' seła' Diosen' Xi'ine' ben' nac beñe' güen juisyw. Na' cate' bide', le'e bdelne' lo na' beñe' ca' gosote'ne' na' le'e naple doła' dan' gosote'nen'. <sup>53</sup>La'czla' nombia'le ley dan' bosonežjw angl ca' da' Moisésen', bi chzenagle čen.

#### Gosote' Estebanna'

<sup>54</sup>Na' cate' Esteban' gože' legaque' ca', beselocchgüie' gosagwxetje laye'.

<sup>55</sup>Perw na' Esteban' gwzoachgua Spiritw che Diosen' len le', bcos lagüen' gwne'e yabale na' ble'ede' chac to be'ni' gual gan' zoa Diosen' na' ble'ede' zecha Jesús en' cuit



Diosen' chnabi'e txen len le'. <sup>56</sup>Nach Estebanna' gwne':

—Le našc nla'xeje yaban' na' nla' Jesús'en' ben' golje' beñach zeche' cuit Diosen' chnabi'e txen len le'.

<sup>57</sup>Nach beñe' ca' zjanžaguen' leca beseloque' na' bososya'adie' na' bososeyiw naggaque'na' na' to ši'ize ja'acsese' gan' ze Estebanna'. <sup>58</sup>Nach gosebeje' Estebanna' cho'a yež na' bosozie'ne' yej. Na' beñe' ca' bosozie' le' yejen' bosonežjue' xagaque' da' zjandobe' to beñe' xcuide' beñe' le Saulo cont gapen'. <sup>59</sup>Na' šlac chosožie' Estebanna' yej, Esteban' bol' güiže' Diosen', gwne':

—Xana' Jesús, bezi' neda' yaban'.

<sup>60</sup>Nach bzoa xibe' lo yon' na' gwne' zižje, gwne':

—Xana' bi gono' cuent xtoła' beñe' quinga dan' chesote' neda'.

Na' beyož gwne' ca', gote'.

### Saulo bchi bsaque' beñe' chesonxen Jesucriston'

**8** <sup>1-2</sup>Na' ca nac Saulon', gwyazlaže' dan' gosote' da' Estebanna'.

Na' beñe' ca' chesejnilaže' Jesucriston' ciuda Jerusalénna' jasecuaše' da' Estebanna', na' gosebežchgüe' che'. Na' gwde gosote' da' Estebanna' gosezolağüe' bosochi bososaque' beñe' ca' chesedop chesežag chesonxene' Jesucriston' Jerusalénna', na' yogo' beñe' ca' chesonxen Jesucriston' besyeyasłase', ja'aque' yež ca' zjachi' do distritw Judean', do distritw Samaria, perw gague len postlw ca'. <sup>3</sup>Na' Saulon' gwzolağüe' cheje' liž to to beñe' ca' chesonxen Jesucriston'

chjaxobe' no beñe' byo na' no no'ole cont chche'e legaque' ližya.

### Beñe' ciuda Samaria gosende' diža' güen che Jesucriston'

<sup>4</sup>Na' beñe' ca' chesonxen Jesucriston' ben' besyeyasłase' ja'aque' doxen, jasedixjue'ede' xtiža' Jesucriston'. <sup>5</sup>Na' ben' le Felipe bžine' ciuda Samarian' na' be'e diža' che Jesucriston'. <sup>6</sup>Na' cate' gosende' xtižen' na' besele'ede' yela' guac dan' bene' len legaque', beñe' zan besedobe' bosozenague' che'. <sup>7</sup>Bebeje' da' xigüe' ca' zjayo'o zjanyaz yichjlaždao' beñe' zan, na' cate' besyechojen chososya'adian. Na' zan beñe' natzi' late' güeje cuerp chegaque'na' beyone' legaque', lecze beyone' no beñe' nxinj ni'e. <sup>8</sup>Na' besyebchgüe beñe' ca' že' ciudan'.

<sup>9</sup>Na' lo ciudan' zoa to beñe' guaža' beñe' le Simón. Da' zan da' bene' da' besyebane beñe' Samarian' gwziye'e legaque' gože'ne' naque' beñe' zaque'. <sup>10</sup>Na' šlac bene' da' ca', yogo' beñe' lo ciudan' bosozenague' che' tcho'a, no beñe' gole ca' lente no bi' xcuide' ca', gosene' che':

—Le bengan' nse'e yela' guac xen che Diosen'.

<sup>11</sup>Zan iz bosozenague' che', le gwziye'e legaque' len yela' guaža' che'na'. <sup>12</sup>Perw cate' Felipen' gwduxjue'ede' diža' güen che Jesucriston' len legaque' na' bzejni'ide' legaque' che yela' chnabia' che Diosen', zane' gosejle'e che' na' gosezoe' nis, beñe' byo na' no'ole. <sup>13</sup>Na' lencze Simón gwyejle'e che' na' gwzoe' nis na' gwzolaogüe' gwдалene' Felipen', na' bebande' ca

nac yela' guac ca' dan' chon Felipen' na' yezica'chle da' zaca' yebanecho.

<sup>14</sup>Na' postlw ca' nite' ciuda

Jerusalénna' gosende' bene' ca' že' ciuda Samaria ba chosozenague' xtiža' Diosen', nach gosesele' Pedroa' len Juanna' Samarian'. <sup>15-16</sup>Na' cate' besežine'na' bosol giüiže' Diosen' gosenabde'ne' soa Spiritw chen' lo' yichjlaždao' bene' Samaria ca', le ca hora' biņa' soan lo' lažda'ogaque' la'czla' ba gosezoe' nisen' dan' chesejniłaže' Xancho Jesúsén'.

<sup>17</sup>Nach gosexoa na' postlw ca' yichjgaque' cont gwzoa Spiriton' lo' yichjlažda'ogaquen'.

<sup>18</sup>Na' ble'e Simón can' cheson postlw ca' chesexoa ne'e yichj bene' cont chzoa Spiriton' len legaque', na' bšabde' legaque' mechw. <sup>19</sup>Gože' legaque':

—Le gon cont neda' gac xoa na'a yichj note'teže bene' na' soa Spiriton' len legaque' can' chon le'e.

<sup>20</sup>Nach Pedroa' gože'ne':

—Cuiayo'o len xmechon' dan' chono' xbab guac si'o len mechw da' chon Diosen'. <sup>21</sup>Bi zaco' gono' da' nga chonto', le yichjlažda'oguo' naquen mal lao Diosen'. <sup>22</sup>Da' cheyała' gono', betinje da' malen' chono' na' gwnab goclen lao Diosen' cont yezi'xene' chio' ca nac xbabén' yo'o lo' yichjlažda'oguo'.

<sup>23</sup>Nacbia' da' mal dan' yo'o lo' yichjlažda'oguo' chnabi'an le' na' ngo'on le' nez malen'.

<sup>24</sup>Nach Simónna' boži'e xtižen' gože' le':

—Le nab goclen lao Xancho' cont ne to da' mal dan' bach gwnao' nga bi gac chia'.

<sup>25</sup>Na' Pedroa' len Juanna' cate' beyož goseyixjue'ede' xtiža' Diosen' lo' ciuda Samarian' na' beyož gosoe' diža' can' ba goclen Xancho Jesucriston' legaque', nach jaya'aque' Jerusalénna'. Na' šlac zjaya'aque'na' goseyixjue'ede' xtiža' Xancho Jesucriston' len bene' ca' že' yezica'chle yež ca' gan' mbane distritw Samaria.

### Felipe na' bene' Etiopía

<sup>26</sup>Nach Xancho Diosen' gwsele' to angl bene' gože' Felipe:

—Gwyej gan' xoa nez dan' chetj Jerusalénna' na' chden latje dašen' chžinen yež dan' nzi' Gaza.

<sup>27</sup>Nach Felipe gwlo'e nezen', na' šlac zeje' ble'ede' to bene' nación Etiopía zeyo'e to lo' carret zeze'e gwyeye' Jerusalénna' jenxene' Diosen'. Le' naque' to bene' blao na' ba none' le' capar cont gone' xšin no'ole gwnabia' che bene' Etiopía ca', šo'o lo' ne'e mechw che'. Na' no'ole gwnabian' le' Candace. <sup>28</sup>Na' ben' yo'o lo' carreten' chlabe' libr dan' bzoj da' Isaíasen' ben' be' xtiža' Diosen' cani'. <sup>29</sup>Nach Spiritw che Diosen' gožen Felipen':

—Jayxen carreten' na' gwyejlene' txen.

<sup>30</sup>Nach gwza'ses Felipen' cont jayxene' carreten' na' cate' bžine' gała'ze bende' chlab ben' libr dan' bzoj da' Isaíasen'. Nach gože'ne': —¿Chejni'ido' dan' chlabo'na'?

<sup>31</sup>Na' bene' Etiopían' boži'e xtižen' gože' Felipen':

—¿Nacxe gac šejni'ida' da' ngan', le gague no nla' no gwzejni'ide' nedan'?

Nach gota'yoede' Felipen' cont  
gwoye' lo' carreten' gwche'lene'ne'.

<sup>32</sup>Na' gan' chlabe'na' nyojen žan:  
Ca to xila' be nxob bene' cont  
gote'ba',  
na' ca to xila' dao' be bi chosya'a  
cate' chšibe'ba',  
can' bene', bibi gwne' caten'  
gosezi' gosebague'ne'.

<sup>33</sup>Na' gosone' le' ca to bene' bibi  
zaca'.  
Na' bi gosone' yela' justis che' ca  
cheyala' gaquen.  
Na' nono diaža che' nita', le  
goseque'e yela' mban che' lo  
yežlio nga.

<sup>34</sup>Nach bene' Etiopían' gože'  
Felipen':  
—Benšca goclen gwna neda' no  
chen' ža ben' bzoj Xtiža' Diosen' ca',  
¿che cuinen' že' ca' o še che bene'  
yoble?

<sup>35</sup>Nach Felipen' gwzologüe'  
bzejni'ide' bi zejen dan' chlab bene'  
Etiopían', gože' le' diža' güen che  
Jesúsen'. <sup>36</sup>Na' ca' chac, besežine' ga  
žia nis, nach bena' gože' Felipen':

—Nga žia nis, ¿cbi gac soa' nisen'  
na'a?

<sup>37</sup>Nach Felipen' gože'ne':  
—Še chejnilažo' Jesucriston' do  
yichj do lažo', guac so' nisen'.

Nach gwne':

—Chejli'a Jesucriston' naque' xi'in  
Diosen'.

<sup>38</sup>Nach bene' mandadw bcueze'  
carreten' na' betj Felipen' len bene'  
Etiopían' jasežo'e lo' nisen' cont  
Felipen' bzoe'ne' nis. <sup>39</sup>Na' cate'  
besyechoje' lo' nisen', Spiritw che  
Diosen' la' beche'eten Felipen' ga  
yoble, na' bich ble'e bene' Etiopían'  
le'. Na' mbalaz beza' ben' beyoe'

lo' carreten'. <sup>40</sup>Nach Felipen' bžine'  
yež dan' nzi' Azoto na' gwzologüe'  
gwdixjue'ede' diža' güen che  
Jesucriston' to to yež da' zjachi'  
gała'ze ga gwdie' bžinte' Cesarean'.

**Diosen' bocobe' yichjlaždao' Saulon'**

(Hch. 22:6-16; 26:12-18)

**9** Na' Saulon' con chdacze' cho'e  
diža' can' chaclaže' gote' bene'  
chesejnilaže' Xancho Jesucriston'  
na' chdacze' cheyljwlaže' nacle  
gone' gote' legaque'. Na' da'nan'  
Saulon' gwyeje' lao bxoz blao che  
bene' Israelen', <sup>2</sup>na' gwnabd'ne'  
gwzoje' to yiš da' goxe' yosolab  
bene' že' to to yodao' nita' ciuda  
Damasco cont yesenezde' nape'  
yela' gwnabia' sene' bene' ca' ba  
chesejnilaže' Jesucriston' na'  
gwcheje' legaque' cont che'e legaque'  
ciuda Jerusalénna' la'czla' bene' byo  
o la' no'ole. <sup>3</sup>Cate' beyož bnežjue'ne'  
yišen' gwlo'e nez, na' ba zoa žine'  
ciuda Damascon' cate' zejzenez to  
be'ni' da' za' yaban' gwyečjen le'.  
<sup>4</sup>Na' gwbiže' lo' yon'. Na' bende' che'  
to bene' le':

—Saulo, ¿bixchen' chchi chsaco'  
neda'?

<sup>5</sup>Na' Saulon' boži'e xtizen' gože' le':

—¿No le' bene'?

Nach bena' gože'ne':

—Nedan' Jesús ben' chchi chsaco'.  
Na' dan' chgue'edo' neda', chone zi'  
cuino' can' chac che to go'n be chlibe'  
lo ya dan' zoa lo carrošo' cheba'.

<sup>6</sup>Na' do chaž chžebze' gože' le':

—Xana' Jesús, ¿bin' chaclažo' gona'?

Nach Xanchon' gože'ne':

—Beyas na' gwyej ciuda Damascon'  
na' zoa to bene' ye'e le' da' cheyala'  
gono'.

<sup>7</sup>Na' bene' ca' zja'aclen Saulon' benit bečhoḷ gosac lo' yichjlažda'ogaque'na' catec besežebe' dan' goquen', le gosende' ši'i bene' perw nono besele'ede'. <sup>8</sup>Nach beyas Saulon', perw cate' beḡa' lagüen' con bich ble'ede'. Nach bene' ca' nžague'na' gosoxe' ne'e goseče'ene' Damascon'. <sup>9</sup>Na' šone ža gwzoe' sin cbi ble'ede' na' bi gü'e'ej gwdagüe'.

<sup>10</sup>Na' zoa to bene' chejnilaže' Xancho Jesucriston' Damascon' bene' le Ananías, na' Ananíasen' ble'edagüede' Xancon'. Na' Xancon' gože'ne':

—Ananías.

Na' boži'e xtižen' gwne':

—Nga zoa', Xana'.

<sup>11</sup>Nach Xancon' gože'ne':

—Gwzoža' na' gwyej liž Judas dan' zoa cay dan' chesene' Nez Licha, na' nabo' to bene' le Saulo, to bene' ciuda Tarso. Ba choḷ güiže' neda'.

<sup>12</sup>Na' ba bena' cont ble'edagüede' le' gwyo'o gan' zoe'na' na' gwḡoa nao' yejlagüe'na' cont yele'ede'.

<sup>13</sup>Nach Anaíasen' boži'e xtižen' gože' le':

—Xana', ba benda' bene' zan cheso'e xtiža' bena', ca nac da' mal juisyw ba bene' Jerusalén len bene' ca' ba gwlejo' cont zjanaque' lo nao'. <sup>14</sup>Na' chesene' ze'e nga noxe' yiš che bḡox gwnabia' ca' cont sene' yogo'lol' neto' chejnilaže'to' le'.

<sup>15</sup>Nach Xancho Jesucriston' gože' Ananíasen':

—Gwyej, le ba gwleja' Saulon' cont šjazejni'ide' xtiža' len bene' cbi zjanac bene' Israel na' len rey čhegaque' ca', na' lente le'e nacle bene' Israel. <sup>16</sup>Na' gwlo'eda'ne' ca nac da' yaše' da' zi' da' gac čhe' dan' gwzenague' chia'.

<sup>17</sup>Nach Ananíasen' gwyje' gan' zoa Saulon' na' gwyo'e lo' yo'ona' na' gwḡoa ne'e yejlao Saulon', gože'ne':

—Bene' migw Saulo, Xancho Jesúsen' ben' blo'elagüe' le' tnez gan' za'ona' ba gwsele' neda' zedeḡa'a le' cont yele'edo' na' soa Spiritw čhe Diosen' len le'.

<sup>18</sup>Nach la' besyeyinjte da' ca' že' lo yejlagüen', zjanaquen ca yid bdi'ej, na' la' bele'etede'. Nach gwzože'e cont gwyje' gan' gwzoe' nisen'. <sup>19</sup>Ca beyoža' gwdagüe' na' beyaclaže'. Na' bega'ane' Damascon' yeto čhop ža len bene' ca' chesejnilaže' Xancon'.

**Saulon' be'e xtiža' Diosen' Damascon'**

<sup>20</sup>Na' la' gwzolaote gwyje' to to yodao' be'e diža' čhe Jesúsen', gwne' len' naque' Xi'in Diosen'. <sup>21</sup>Na' yogo' bene' ca' chesende' xtiže' dan' cho'ena' besyebande' na' chese' lježe':

—čGague bengan' chda chonit choḷane' bene' ca' chesejnilaže' Jesúsen' ciuda Jerusalénna'? na' čgague da' na'czen' bide' nga na'a cont gwčheje' bene' ca' na' šjasane' legaque' lao bḡox gwnabia' ca'?

<sup>22</sup>Na' Saulon' tža tža Diosen' goclene'ne' cont be'e diža' čhe Jesúsen' tcho'a, gwne' Jesúsen' naque' ben' gwseḷa' Diosen' cont nabi'e. Na' bene' Israel ca' že' Damascon' bi beseželde' bin' yesene', le gosacbe'ede' dan' che'e legaque' naquen da' li.

**Saulon' bi goque' lo na' bene' ca' chesegue'ede' le'**

<sup>23</sup>Na' cate' ba goc sša choe'len Saulon' bene' Damasco ca' xtiža' Jesucriston' nach bosoxi'a bene' Israel ca' yesote'ne'. <sup>24</sup>Na' gosenite'

chesape' to to cho'a puert che ze'ena'  
dan' nychj ciudan' cont yesezene'  
Saulon' yesote'ne' bate'teze choje',  
perw na' Saulon' gocbe'ede' ba  
zjachi'na'ogüe'ne'. <sup>25</sup>Na' bene'  
ca' chesejnilaže' Jesucriston'  
besyeletje'ne' le'e ze'e dan' nychj  
ciudan' šeže'le besyegüe'ene' to lo'  
žome cont goc bechoje' lo ciudan'.

### Gwyej Saulon' Jerusalénna'

<sup>26</sup>Nach beze'e beyeje' Jerusalén.  
Na' cate' bežin Saulon' ciuda  
Jerusalénna' goclaže' gone' txen bene'  
ca' chesejnilaže' Jesucriston', perw  
yogo'lole' besežebe' le', bi gosejle'e  
še da' li ba chejnilaže' Jesucriston'.  
<sup>27</sup>Nach Bernabé gwčhe'e Saulon'  
ja'aque' gan' že' postlw ca' na'  
be'lene' legaque' diža' can' goc  
ble'e Saulon' Xancho Jesúsén' šlac  
ngüe'e nez zeje' Damascon' na' can'  
goc Xanchon' be'lene' Saulon' diža'.  
Na' lecze gož Bernabén' legaque'  
Saulon' ba be'e xtiža' Jesúsén'  
Damascon' sin cbi bžebe'. <sup>28</sup>Nach  
postlw ca' gosejle'e can' goc che  
Saulon', na' gwzoloao gwdalen  
Saulon' bene' ca' chesejnilaže'  
Jesucriston' Jerusalénna'. <sup>29</sup>Na'  
sin cbi bi chaž chžebe' gwzolaגיע'  
chzejni'ide' bene' Israel ca' diža' che  
Xancho Jesúsén', con bene' chesac  
diža' griego. Bene' byen bzejni'ide'  
legaque' xtiža' Diosen', perw na'  
legaque' gosaclaže' yesote'ne'.  
<sup>30</sup>Na' cate' bene' ca' chesejnilaže'  
Jesucriston' Jerusalénna' gosacbe'ede'  
ba zjachi'na'ogüe' yesote'ne', nach  
goseche'ene' ja'aque' ciuda Cesarea  
na' besyesele'ne' ciuda Tarso.  
<sup>31</sup>Na' bene' ca' chesedop  
chesežague' chesonxene'

Jesucriston' doxen distritw Judean',  
distritw Galilean' na' distritw  
Samaritan' gosonite' binlo, noch  
no bosochi bososaca' legaque', na'  
gosonita'chache' gosejnilaže' Xancho  
Jesúsén' na' bosozenague' che' do  
yichj do laže'gaque'. Na' Spiritw  
che Diosen' benen cont gosacchach  
laže'gaque' na' benen cont gwyane'.

### Beyac ben' le Eneas

<sup>32</sup>Ca nac Pedroa' cheje' to to yež  
gan' že' bene' ca' ba gwlej Diosen'  
cont zjanaque' lo ne'e chjane'e  
legaque'. Na' to že' gwyeje' jane'e  
bene' ca' že' yež dan' nzi' Lida. <sup>33</sup>Na'  
yež Lidan' jati'e to bene' le' Eneas.  
Ba chac xono' iz de' che'ede', natzi'  
late' cuerp che'na'. <sup>34</sup>Nach gož  
Pedroa' le':  
—Eneas, Jesucriston' cheyone' le'.  
Gwyas na' btob xcamo'na'.  
Nach la' gwyaste bena'. <sup>35</sup>Na'  
yogo'lol' bene' že' Lidan' na' bene'  
že' yež dan' nzi' Sarón besele'ede'  
bena' ba beyacde' na' gosebejyichje'  
costumbr chegaque' cont  
gosejnilaže' Xancho Jesucriston'.

### Dorcac bebane' ladjo bene' guat ca'

<sup>36</sup>Na' ca tiemp na', to ciuda dan'  
nzi' Jope zoa to no'ole le' Tabita,  
na' diža' griego le' Dorcas. Na'  
chejnilaže' Jesucriston' na' zoe'  
chone' da' güen na' chaclene' no  
bene' yaše' bene' chyažj chchine'.  
<sup>37</sup>Perw na' gocšene Dorcasen' na'  
gottechgüe', na' bosoguazje'ne' na'  
gosexoe'ne' to lo' cuart da' zoa yichj  
yo'o cha'te. <sup>38</sup>Na' gala'ze chega'an  
yež Lidan' len Jopen', na' bene'  
ca' chesonxen Jesucriston' Jopen'  
gosenezde' Pedroa' zoe' Lidan'. Nach

gosesele' chope bene' jasata'yoede'  
Pedroa' gose'ene':

—Benšca goclen yo'o len neto'  
netec na'a.

<sup>39</sup>Na' Pedroa' la' gwza'te' gwyje'  
len bene' ca'. Na' cate' besežine'  
Jopen', goseche'ene' lo' yo'o gan' xoa  
bene' guaten', na' la' gosebiga'te  
yogo' no'ol güezebe lagüe'na'  
chesebeže' chosolo'ede' le' lache'  
dan' ben da' Dorcasen' šlac gwbane',  
no vestidw na' no camis. <sup>40</sup>Nach  
Pedroa' bešaše' yogo'lo' bene' ca'  
chy'ole na' bzoa xibe' bo' güiže'  
Diosen'. Na' beyechje' chne'e cuerp  
che no'olen', na' gože'ne':

—Tabita, gwyas.

Nach la' bexa'te yejlao da'  
Dorcasen' gwne'e Pedroa' na' la'  
bebe'te'. <sup>41</sup>Nach Pedroa' beuxe'  
ne'ena' bsože'e le', nach goxe' no'ole  
güezeb ca' na' yezica'chle bene' ca'  
zjanaque' lo na' Diosen' na' blo'ede'  
legaque' ba beban Dorcasen'. <sup>42</sup>Na'  
yogo'lo' bene' Jopen' gosende' can'  
goquen', na' bene' zanch gosejnilaže'  
Xancho Jesucriston'. <sup>43</sup>Na' Pedroa'  
bega'ane' Jopen' zan ža, gwzoe' liž  
to bene' le Simón, bene' chonšagüe'  
yid.

#### Pedroa' na' Cornelio

**10** Na' ciuda Cesareana' zoa  
to bene' le Cornelio, naque'  
xan to gayoa soldadw, na' bosozoa  
la soldadw che' ca' Bene' Italia.

<sup>2</sup>La'czla' Cornelion' cbi naque' bene'  
Israel, benxene' Diosen', na' lecze ca'  
goson bene' lo' yo'o che', chesezoe'  
chesape' Diosen' bala'an. Na'  
Cornelion' chaclenteze' bene' Israel  
bene' chyažj chchine', na' zoateze'  
chol güiže' Diosen'. <sup>3</sup>Na' goc che', to

ža do cheda šone ble'edagüede' to  
angl bene' gwse'la' Diosen' gwyo'e  
gan' zoe'na', na' anglen' gože'ne':

—Cornelio.

<sup>4</sup>Nach Cornelion' chna'chgüe' lao  
anglen' na' do chžebe' gože'ne':

—¿Bixen' Xana'?

Nach gož anglen' le':

—Diosen' nezde' can' zo' chol  
güižo'ne' na' chnežjo' dan'  
cheseyažje bene' yaše', na' Diosen'  
chaclaže' gaclene' le'. <sup>5</sup>Da' nga  
gono' na'a, gwse'la' bene' šjasexi'e  
to bene' zoa ciuda Jopen' bene' le  
Simón na' lecze le' Pedro. <sup>6</sup>Zoe' liž  
to bene' chonšagüe' yid. Bena' lecze  
le' Simón, na' liž ben' zoan cho'a  
nisdao'. Na' Simón Pedroa' ye'e le'  
bin' cheyala' gono'.

<sup>7</sup>Cate' beza' anglen' Cornelion'  
goxe' chope mos che' na' to soldadw  
bene' chaclen le', na' soldadoa' lecze  
chonxene' Diosen'. <sup>8</sup>Na' Cornelion'  
bzejni'ide' legaque' yogo'lolte can'  
goquen' nach gwse'le' legaque'  
Jopen'. Na' gosegüe'e nez zja'aque'.

<sup>9</sup>Na' beteyo ga'la'ze ba zja'aque'  
za' yesežine' ciuda Jopen' cate'  
Pedroa' gwloe' yichjo'o che' yo'o  
gan' zoe'na' ca do guagwbiž cont  
jel güiže' Diosen'. <sup>10-11</sup>Na' šlac  
choelene' Diosen' diža' gwdonchgüe',  
con goclaže' gagüe' cate. Na' šlac  
chac dan' gagüe'na', ble'edagüede'  
le'e yaban' chetj to lache' xen na'  
nchey tap squinen na' chetjen gan'  
zoe'na'. <sup>12</sup>Na' lo'enna' zjaže' yogo'  
cuen beyixe' že' yežlion', be žia tap  
ni'a na', na' be chososa' le'eban' lo' yo,  
na' len be žia xil be chaš le'e yaba.

<sup>13</sup>Nach bende' gož Diosen' le':

—Gwyas Pedro na' betw be ca'  
gwdagw.

<sup>14</sup>Nach Pedroa' gože'ne':

—Bi gagua' legacba' Xana'. Ne tñi'a bina' gagua' be zban zjanac ca', le cbi de lsens len ley cheto'na' gagwto' ben' zjanac ca'.

<sup>15</sup>Nach Diosen' gože' le' da' gwchope:

—Ben' bačh gwnia' gago' bi nao' be zban zjanacba'.

<sup>16</sup>Da' gwyon ni'a gož Diosen' le' ca' nach la' begüete lachen' le'e yaban'.

<sup>17</sup>Šlac chacžejlaže' Pedroa' bi zejen dan' ble'edagüeden', besežin bene' ca' gwseła' Cornelion' cho'a puert liž Simón ben' chonšagüe' yiden', le ba gosenabe' gan' zoa liže'na'.

<sup>18</sup>Nach zižje gosenabe' še le na' zoa to bene' lecze le Simón Pedro. <sup>19</sup>Na' Pedroa' ne' chone' xbab che dan' ble'edagüede', cate' gož Spiritw che Diosen' le':

—Simón, šone bene' chesyeyiljue' le'. <sup>20</sup>Gwzoža' na' beyetj cont šejleno' legaque', na' bi gacžejlažo' la'czla' bi zjanaque' bene' Israel, le neda' gwseła' legaque'.

<sup>21</sup>Nach Pedroa' beyetje' jašague' bene' ca' gwseła' Cornelion', nach gože' legaque':

—Nga zoa', nedan' Simón Pedro. ěBichen' cheyljwle neda'?

<sup>22</sup>Nach gose' bene' ca' le':

—To xan soldadw bene' le Cornelio gwsele' neto'. Le' zejcz'e chone' da' güen na' chonxene' Diosen' na' yogo'lol bene' Israel ca' cheso'e xtiž'e ca' bene' šagüe' naque'. To angl che Diosen' gože' le' yedenabe' šejo' liže'na' cont gwzenague' chio' še bin' yo'one'.

<sup>23</sup>Nach gwlo'o Pedroa' legaque' yo'o na' besyega'anlene' le' tže'. Nach beteyo Pedroa' gwyase' gwyejlene'

legaque' na' gwche'e to chope bene' Jopen' bene' chesejnilaže' Jesucriston'.

<sup>24</sup>Na' beteyo cate' besežine' ciuda Cesarean', Cornelion' bačh ntobe' biše' lježe' len xmigüe' ba zjažie' liže'na' chesebeze' le'. <sup>25</sup>Na' cate' bžin Pedroa' liž Cornelion' la' bchojte Cornelion' bšague'ne' na' bzoa xibe' lagüe'na' benxene'ne'.

<sup>26</sup>Na' Pedroa' bsože'e le', gože'ne': —Bezoža'. Lecze benačh neda'.

<sup>27</sup>Na' ne' choelente' le' dižan' ca' cate' gwyo'o Pedroa' lo' yo'on na' ble'ede' bene' zan ba že' lo' yo'ona'.

<sup>28</sup>Nach gože' legaque':

—Nezeczele ley che neto' bene' Israel žan bi cheyala' šo'to' liž bene' bi zjanaque' bene' Israel, na' žan bi cheyala' gonto' txen len le'e bi nacle bene' Israel. Perw bačh bzejni'i Diosen' neda' ne to bene' cbi cheyala' gona' xbab che' naque' bene' zban par šo'a liže'na'. <sup>29</sup>Da'nan' cate' bene' quinga bedesexi'e neda', bi gocžejlaža' še nacle gona', san ba bida' do yichj do laža', na' na'a chaclaža' nezda' ěbixchen' gwñio' neda'?

<sup>30</sup>Nach Cornelion' gože'ne':

—Na'a chac tap ža do cheda šone' zoa' sin cbibi nagua', na' chol güiža' Diosen' liža' nga, cate'cze ble'eda' to bene' byo lagu'na' nyaze' to lache' da' chgo'oten be'ni'. <sup>31</sup>Nach gože' neda': “Cornelio, ca nac da' gwñabdo' Diosen', bačh bzenague' chen, na' nezde' chnežjo' da' chyažj da' chchine' bene' yaše'. <sup>32</sup>Na' na'a gwseła' to chope bene' šjasexi'e to bene' zoa ciuda Jopen' bene' le Simón Pedro. Zoe' liž to bene' lecze le Simón, to bene' chonšagüe' yid.



Liž ben' chonšagüe' yiden' zoan  
 gala'ze cho'a nisdao'. Na' cate' la'  
 Pedroa' ližo' nga nach güe'lene' le'  
 diža'." <sup>33</sup>Nach la' gwseła'tia' bene' ca'  
 bedesexi'e le', na' choxclenteco' bačh  
 bido'. Na' nezcze Diosen' yogo'to'  
 nita'to' nga gwzenagto' yogo'lołte  
 dan' ba ben Diosen' mandadw nao'.

**Pedroa' be'e diža' liž Cornelion'**

<sup>34</sup>Nach Pedroa' gwzologüe' be'e  
 dižan' gwne':

—Da' li bačh nezda' nono nla'  
 bene' nacho nzoa Diosen' le' to  
 šla'aze. <sup>35</sup>Gate'teze bene' nación  
 con bene' chesonxen Diosen' do  
 yichj do laže' na' chesone' da' güen,  
 Diosen' chbede' legaque'. <sup>36</sup>Diosen'  
 gwdixjue'ede' neto' bene' Israel guac  
 soato' binlo len le' še šejnilaže'to'  
 Xi'ine' Jesucriston' bene' naque' Xan  
 yogo'loł bene'. <sup>37</sup>Nezele dan' ba goc  
 doxen distritw Judean' dan' gwzoloao  
 distritw Galilean' gwde gwdixjue'e  
 da' Juanna' xtiža' Diosen' na' bzoe'  
 bene' nis. <sup>38</sup>Nezele Diosen' gwleje'  
 Jesúsén' ben' naque' bene' yež  
 Nazaret cont chaclene' chio' benačh,  
 na' be'ene' Spiritw che'na' na' yela'  
 chnabia'. Na' gwda Jesúsén' bene'  
 da' güen na' beyone' yogo'loł bene'  
 ca' chsaca'zi' Satanás dan' chnabia'  
 da' xigüe' ca', le Diosen' zoe' len le'.  
<sup>39</sup>Neto' nezeto' na' choe'to' diža' che  
 yogo' da' güen da' ben Jesúsén' na'  
 dan' bsd blo'ede' distritw Judean'  
 na' ciuda Jerusalénna'. Na' choe'to'  
 diža' can' gosote'ne' bosode'ene' to  
 le'e yag cruz. <sup>40</sup>Perw na' Diosen'  
 bečhis bosbane'ne' ladjo bene' guat  
 ca' beyon ža na' ben Diosen' cont  
 Jesúsén' blo'elagüe' neto'. <sup>41</sup>Gague  
 yogo'loł bene' besele'ede' Jesúsén'

caten' bebane' ladjo bene' guat  
 ca', perw Diosen' gwleje' neto'  
 cont choe'to' xtiže'na' na' bene'  
 cont ble'eto'ne'. Na' neto' güe'ej  
 gwdagwłento'ne' txen gwde bebane'  
 ladjo bene' guat ca'. <sup>42</sup>Jesúsén' bene'  
 mandadw chixjue'eto' benačhen'  
 Diosen' bzoe' le' gone' yela' justisen'  
 len yogo' bene' zjamban na' len yogo'  
 bene' ba gosat. <sup>43</sup>Na' da' ca' bosozoj  
 yogo' bene' goso'e xtiža' Diosen'  
 cani'te zjanyojen chesenan note'tez  
 bene' yesejnilaže' Jesucriston',  
 Diosen' yezi'xene' xtołagaque'na'.

**Spiritw che Diosen' gwyo'on  
 lo' yichjlaždao' bał bene' bi  
 zjanaque' bene' Israel**

<sup>44</sup>Ne' cho'ete Pedroa' diža'na'  
 cate' Spiritw che Diosen' gwyo'on  
 lo' yichjlaždao' yogo' bene' ca'  
 chosozenag diža' dan' cho'ena'.  
<sup>45</sup>Na' bene' Israel ben' chesejnilaže'  
 Jesucriston', bene' ca' zja'ac len  
 Pedroa' liž Cornelion', besyebande'  
 dan' gwyo'o Spiritw che Diosen' lo'  
 yichjlaždao' bene' ca' cbi zjanaque'  
 bene' Israel. <sup>46</sup>Gosacbe'ede' gwyo'o  
 Spiritw che Diosen' lo' yichjlaždao'  
 bene' ca' že' liž Cornelion', le  
 gosende' gosonxen bene' ca' Diosen'  
 goso'e diža' da' bi gosejni'ide'  
 na' lecze gosonxene' Diosen' len  
 xtiža'gaque'na'. <sup>47</sup>Nach Pedroa' gože'  
 bene' Israel ca' nžaguen':

—Bibi de da' gwžon yesezoa bene'  
 quinga nisen', le nacbia' ba zoa  
 Spiritw che Diosen' len legaque' can'  
 zoan len chio'.

<sup>48</sup>Nach Pedroa' bene' mandadw  
 gosezoe' nis da' chesejnilaže'  
 Jesucriston'. Na' gosata'yoede' le'  
 cont bega'ane' yeto čop ža.

Pedroa' gože' bene' Jerusalén  
ca' can' goquen'

**11** Na' postlw ca' na' yezica'chle bene' ca' že' distritw Judean' ben' chesejnilaže' Jesucriston' gosende' xtiža' bene' ca' bi zjanaque' bene' Israel lecze ba chosozenague' xtiža' Diosen'. <sup>2</sup>Nach Pedroa' beze'e gwyejche' ciuda Jerusalénna' gan' nita' bene' Israel ben' chesejnilaže' Jesucriston' na' legaque' gosenelagüe' che', <sup>3</sup>gose'ene':  
—¿Bixchen' ba gwejejo' gan' že' bene' cbi zjanaque' bene' Israel na' jatagwleno' legaque'? Malen' ba beno'.

<sup>4</sup>Nach Pedroa' gwzologüe' be'lene' legaque' diža' tcho'a yogo' dan' goc che', gože' legaque':

<sup>5</sup>—Šlac zoa' ciuda Jopen' chol güiža' Diosen', ble'edagüeda' ca to lache' xen nchej dapte squin ca' chetjen le'e yaban' zan' gan' zoa'na'. <sup>6</sup>Na' gwna'yana' na' ble'eda' lo'enna' že' beyixe' ca' chaš yežlion' be žia tap ni'a na', na' ble'eda' be chososa' le'eban' lo yo, na' be žia xil be chaš le'e yaba, na' bal be ca' zjanacba' be znia. <sup>7</sup>Na' benda' gož Diosen' neda': "Gwyas Pedro, na' betw be ca' gwdagw." <sup>8</sup>Nach boži'an gwnia': "Xana', bi gagua' legacba'. Ne tni'aze bina' gagua' be zban zjanac ca', le bi de lsens len ley cheto'na' gagwto' ben' zjanac ca'." <sup>9</sup>Na' da' gwchop ni'a Diosen' gwne': "Be bačh gwnia' gago' bi nao' zjanacba' be zban." <sup>10</sup>Šon ni'a gože' neda' ca' nach begüe lachen' le'e yaban'. <sup>11</sup>Za' beyož ble'edagüeda' da'na'

cate' besela'ac šone bene' byo gan' zoa'na' bene' za'ac ciuda Cesarean' chesyeyiljue'nda'. <sup>12</sup>Na' Spiritw che Diosen' bzejni'in neda' cheyała' ša'alena' legaque' sin cbi gacžejlaža', na' gwchi'a bene' lježcho quinga xop, gwejejo' Cesarean' bžinto' liž ben' le Cornelio na' gwyo'oto' ližen'. <sup>13</sup>Nach Cornelion' be'lene' neto' diža' can' blo'elao to angl le' liže'na' na' anglen' gože'ne': "Gwseła' bene' šja'ac ciuda Jopen' šjasexi'e to bene' le Simón Pedro. <sup>14</sup>Bena' ye'e le' len bene' lo' yo'lo' chio' nac gonle cont gata' yela' mban chele toli tocanē." <sup>15</sup>Nach cate' gwzologua' bia' dižan' len bene' ca' že' liž Cornelion', Spiritw che Diosen' gwyo'on lo' yichjlažda'ogaque'na' can' gwyo'on lo' lažda'ochon' cana'. <sup>16</sup>Nach jaysa'laža' xtiža' Xancho Jesucriston' can' gwne': "Da' zaque' ben Juan da' bzoe' bene' nis, perw da' zaca'che' gac chele cate' yedesoa Spiritw che Diosen' lo' yichjlažda'olen' nabi'an le'e." <sup>17</sup>Na' ba ben Diosen' cont zoa' Spiritw che'na' lo' yichjlažda'ogaquen' dan' gosejnilaže' Xancho Jesucriston' can' ba bene' len chio' chejnilaže'chone', na' čnox naca' neda' gwžona' gon Diosen' dan' chačaže' gone'?

<sup>18</sup>Na' ca' beyož bosozenague' xtiža' Pedroa' bich bi gosene' che Pedroa' dan' gwejeje' liž Cornelion', san goso'e yela' choxclen che Diosen', gosene':

—Na'a ba nezecho lecze len bene' ca' bi zjanaque' bene' Israel chazaže' Diosen' yesyetinjde' xtola'gaque'na'

cont gwnežjue' yela' mban čhegaque' toli tocan.

**Beñe' ca' chesonxen Jesucriston' ciuda Antioquía gan' mbane Siria**

<sup>19</sup>Na' gwde gosot beñe' Israel ca' Estebanna', gosezolagüe' bosochi bososaca'chgüe' yezica'chle beñe' ca' chesejnilaže' Jesucriston', nach beñe' ca' chesejnilaže'ne' gosaslase'. Bañe' ja'aque' do distritw Fenicia, na' yež ca' zjachi' to lo yežlio da' žia lo' nisdaon' gan' nzi' Chipre na' do ciuda Antioquía ga mbane distritw Siria. Na' gan' zja'aquen' bososed bosolo'ede' con beñe' zjanac beñe' Israel xtiža' Jesúsén', bi bososed bosolo'eden' beñe' cbi zjanaque' beñe' Israel. <sup>20</sup>Perw na' to čhope beñe' Chipre na' beñe' ciuda Cirene lecze bosoxonje' ja'aque' ciuda Antioquían', na' gosezolagüe' goseyixjue'ede' diža' güen che Xancho Jesucriston' len beñe' ca' cbi zjanaque' beñe' Israel. <sup>21</sup>Na' Xancho' goclene' legaque' len yela' guac che'na' na' beñe' zan gosebejyichje' da' ca' chesejnilaže' na' gosejnilaže' Xancho'.

<sup>22</sup>Na' cate' beñe' ca' chesejnilaže' Jesucriston' ciuda Jerusalénna' gosende' can' ba chac ciuda Antioquían', nach bosose'e Bernabén' cont gweje' Antioquían'. <sup>23</sup>Na' cate' bžin Bernabén' Antioquían', ble'ede' da' li ba goclenchgua Diosen' beñe' ca', na' bebechgüede'. Nach gwneyoede' legaque' nita'čhache' yosozenague' che Xancho' do yichj do laže'. <sup>24</sup>Bernabén' naque' to beñe' güen, na' chejnilaže'chgüe' Jesucriston' na' Spiritw che Diosen'

zoachguan len le'. Na' zanch beñe' Antioquían' gosejnilaže' Jesucriston'.

<sup>25</sup>Gwde na' Bernabén' gwze'e zeje' ciuda Tarson' jaydiljue' Saulon', nach cate' beželde' le', gwche'ene' Antioquían'. <sup>26</sup>Na' gosenite' Antioquían' tgiüz gosone' txen len beñe' Antioquía ca' chesedop chesežag chesonxene' Jesucriston' na' bososed bosolo'ede' beñe' zan. Na' Antioquía na'tequen' gwzolao bososi'e beñe' ca' chesejnilaže' Jesucriston' beñe' cristian da' chosozenague' che Criston'.

<sup>27</sup>Šlac nita' Bernabén' na' Saulon' lo ciuda Antioquían', besežin bañe' Jerusalén ben' chosozende' beñe' bi dan' ba gož Diosen' legaque'. <sup>28</sup>Na' cate' beñe' ca' besežinna', toe' beñe' le Agabo gwzeche' lao beñe' ca' zjandop zjanžag chesonxen Jesucriston' be'e diža' can' ba bzejni'i Spiritw che Diosen' le', gwne' doxen yežlion' gata' to gwbin juisyw. Na' cate' bžin ža gwnabia' ben' le Claudio doxen gan' mbane nación Roman', cana' goc gwbinna' can' gwna Agabon'. <sup>29</sup>Nach beñe' ca' chesedop chesežag chesonxene' Jesucriston' Antioquían' bosoxi'e yosotobe' mechw cont yeseselen' yesaclene' beñe' lježgaquen' chesonxen Jesucriston' gan' mbane distritw Judean'. Na' bosoxi'e to toe' yosonežjue' gaca'te' da' gac yosonežjue'. <sup>30</sup>Na' gosone' can' bosoxi'ena' nach gosesele' Saulon' len Bernabén' distritw Judean' jasenežjue' mechon' beñe' ca' chosogüia chesene'e beñe' chesejnilaže' Jesucriston' ciuda Jerusalénna'.

Gosote' Jacobon' na'  
goseyixjue' Pedroa' ližyan'

**12** Na' ca tiempa' rey Herodes bchi bsaque' bał bene' ca' chesonxene' Jesucriston'. <sup>2</sup>Nach bene' mandadw gosote' Jacobo bene' biše' Juanna' len spada. <sup>3</sup>Na' gocbe'e rey Herodesen' chesyebe bene' Israel ca' dan' bene' mandadw gosote' Jacobon', nach bene' mandadw gosezene' Pedroa' cate' gola' lni cate' chesagüe' yetextil dan' bibi levadura nchixen. <sup>4</sup>Nach Herodesen' gwdixjue'ene' ližyan na' gwsele' šino'to soldadw bene' gosape' ližyan', tap güeje' do ža do yel. Herodesen' bene' xbab cueje'ne' ližyan' te lnin' cont gone' yela' justis che' lao bene' že' lo ciudan'. <sup>5</sup>Soldadw ca' gosapchgüe' Pedroa' šlac de' ližyan', perw na' ca nac bene' ca' chesejnilaže' Jesucriston', gosenabchgüede' Diosen' gaclene' Pedroa'.

Diosen' bebeje' Pedroa' ližyan'

<sup>6</sup>Na' to že' ca gwxeze ngüia Herodesen' cueje' Pedroa' ližyan' cont gone' yela' justis che', Pedroa' de' chtase' ladjo chope soldadw na' ncheje' chope gden, na' lecze nita'te soldadw bene' chesape' cho'a puert ližyan'. <sup>7</sup>Cate'cze zejzenez to angl bene' gwseła' Xancho Diosen' bžine' lo' ližyan' gan' de Pedroa' na' gwyeni'chgua lo' ližyan'. Anglen' bte' cuit le'e Pedroa' bosbane'ne', gože'ne':

—Netec na'a gwyas.

Na' la' besyeyežte gdenna' zjanchej na' Pedroa'. <sup>8</sup>Nach gož anglen' le':

—Bego'o xpanto' na' bolejšelon'.  
Nach ben Pedroa' ca'. Nach gož anglen' le':

—Bechele xadon chio' na' beyo'o len neda'.

<sup>9</sup>Nach bechoj Pedroa' zena'ogüe'ne' perw bi gocbe'ede' še da' li anglen' chon ca' len le', con gocde' še chle'edagüede'.  
<sup>10</sup>Beyož besyedie' chop cuen gan' nita' soldadw ca' chesape' ližyan', besyežine' gan' zoa puert zaguanna' dan' nac de ya gan' chesechoje' cont chja'aque' la cay, con to gualazze puerten' byaljon cont besyechoje', na' cate' ba gosa'aque' late' nach anglen' bocua'ane' Pedroa' toze'.

<sup>11</sup>Cana'ch gocbe'e Pedroa' da' li ba bechoje' ližyan', nach gwne':

—Ba cheyacbe'eda' da' licze Xana' Diosen' ba gwsele' angl che'na' na' bosle' neda' lo' na' Herodesen' na' bosle' neda' lo' yogo' da' ca' chesaque bene' Israel gualaż chia' ca' yesonde' neda'.

<sup>12</sup>Na' ne' chonte Pedroa' xbabem' ca', gwze'e gwyeje' liž María xna' Juan ben' lecze le Marcos. Na' liž Marían' zjandop zjanžag bene' zan chosoł güiže' Diosen'. <sup>13</sup>Nach bsiže' cho'a puert zaguanna' na' la' bchojte to bi' no'ole le Rode jana'be' non'.  
<sup>14</sup>Na' cate' bžimbe' cho'a puerten' beyombia'be' ši'i Pedroa', na' tantw bebebe' bi gwsaljwbe' puerten' san beyeysesbe' gan' že' bene' ca' jayežbe' legaque' ba bla' Pedroa'. <sup>15</sup>Nach gose'ebe':

—¿Gague chactonto'na'?

Perw lebe' nezczebe' le'na'. Nach legaque' gose'ebe' naquen bxin che'.

<sup>16</sup>Perw Pedroa' ne' chsižcze' cho'a puerten'. Nach ja'aque'

gosesaljue'. Cate'cze besele'ede' le'na' besyebande'. <sup>17</sup>Nach Pedroa' bene' señw len ne'e cont gosenite' šize bosozenague' be'e diža' can' goc bebej Xancho Diosen' le' ližyan'. Nach lecze gože' legaque' cheyała' yosozende' Jacobon' na' yezica'chle bene' lježgaque' can' ba goquen'. Nach beze'e zjayde' ga yoble.

<sup>18</sup>Nach cate' gwyeni', yela' güeban juisyw gwnita' soldadw ca' na' goso'e diža', gosene':

—¿Bixen' goc len Pedroa'?

<sup>19</sup>Nach rey Herodesen' bene' mandadw jasyediljue' Pedroa' na' gwñabde' soldadw gop ca' nac goquen' bele'. Perw soldadw ca' bibi rson bosonežjue'. Nach bene' mandadw gosote' soldadw ca'. Nach gwza' Herodesen' distritw Judean' jazoe' ciuda Cesarea.

#### Got rey Herodesen'

<sup>20</sup>Ca horan' Herodesen' chž'a'achgüe' bene' ciuda Tiro na' bene' ciuda Sidón ca'. Perw na' bene' ca' beseyažjde' yesezi'e da' yese'ej yesagüe' gan' chnabia' rey Herodesen'. Da'na'na' bosocode' ljež bene' Tiro na' bene' Sidón ca' cont jasenežjue' mechw che ben' nac lo ne'e gan' mbane Herodes, ben' le' Blasto. Gosone' ca' cont Blaston' gwne' chegaque' lao reyen', le gosaclaže' gwzenag reyen' chegaque' cate' šja'aque' lagüe'na' šjaseñabe' yesenite' binlo len le'.

<sup>21</sup>Nach rey Herodesen' bžie' bia' to ža gwtobe' legaque' cont güe'e diža' laogaque'na'. Na' cate' bžin žan', reyen' gwyaz xalane' dan' nac xdan dan' chaze' cate' chone' yela' justis, nach gwchi'e xišne'e gan' chnabi'e

na' be'e diža' lao bene' ca' že' žana'. <sup>22</sup>Nach bene' ca' bososye'e, gosene': —Diosen' choe' diža', gague benačhen'.

<sup>23</sup>Na' lo hora' gwseła' Xancho Diosen' to angl ben' ben cont gocšene reyen' gwže'e bzoga' lo' le'e na' gote'. Goc che' ca' dan' be'e latje gosonxen bene' le' gualaz da' yesonxene' Diosen'.

<sup>24</sup>Perw ca' nac xtiža' Xancho Jesucriston' gos gwlałjchguan.

<sup>25</sup>Na' Bernabén' len Saulon' beyož gosone' yogo' da' cheyała' yesone' ciuda Jerusalénna', nach besyeya'aque' jaya'aque' ciuda Antioquían'. Na' goseche'e to bene' le Juan na' lecze lie' Marcos.

#### Bernabén' na' Saulon' ja'aque' jasedixjue'ede' xtiža' Jesucriston' yež zito'

**13** Na' len bene' ca' chesedop chesežag chesonxene' Jesucriston' ciuda Antioquían' zjančixe bene' cheseyixjue'ede' bene' yoble bi da' che' Diosen' legaque', na' zjalen bene' chososed chosolo'ede' xtiža' Diosen'. Na' legaque' zjalie' Bernabé, na' Simón ben' zjansi'e bene' gasj, na' Lucio bene' ciuda Cirene, na' Saulo, na' Manaén. Na' Manaénna' bgole' txen len rey Herodes ben' gwnabia' distritw Galilea. <sup>2</sup>Na' to ža bene' ca' chesejnilaže' Jesucriston' gosone' gwbas zjandop zjanžague' chesonxene'ne' cate'cze gož Spiritw che Diosen' legaque':

—Le cuej Bernabén' len Saulon' cont yesone' xšina' con gate'teze seła' legaque'. <sup>3</sup>Nach bene' ca' bosol güižche' Diosen' sin cbi zjane'ej

zjanagüe', nach gosexoa na'gaque' yichj Saulon' len yichj Bernabén', gosone' ca' cont gosegüe'e xšin Diosen' lo na'gaque'. Gwdena' bosose'e legaque'.

**Postlw ca' goso'e xtiža'  
Jesucriston' Chipre**

<sup>4</sup>Nach Spiritw che Diosen' gwselan' Bernabén' len Saulon' yež gan' nzi' Seleucia. Na' Seleuciana' goso'e lo' barcon' cont besežine' Chipre. Na' Chipren' naquen to yežlio dao' dan' chi' lo' nisdakon'. <sup>5</sup>Besežine' yež dan' nzi' Salamina gan' mbane Chipren' na' gosezolagüe' goseyixjue'ede' xtiža' Diosen' lo' yodao' che bene' Israel ca'. Na' zjanche'e Juan ben' lecze le Marcos cont chaclene' legaque'. <sup>6</sup>Na' ca' gosaše' gosodie' doxen Chipren' besežine' yež gan' nzi' Pafos. Na' Pafosna' besežague' to bene' guaža' le Barjesús. Naque' bene' Israel na' chxoayague' že' chzende' bi dan' che' Diosen' le'. <sup>7</sup>Barjesúsen' naque' xmigw gobernador ben' le Sergio Paulo. Sergio Paulon' naque' to bene' chejni'ichgüe'. Na' le' goxe' Bernabén' na' Saulon', le goclaze' yosozende' le' xtiža' Diosen'. <sup>8</sup>Na' Barjesúsen' lecze bososi'ene' Elimas, diža' griego zejen bene' guaža'. Le' goclaze' bi šejle' Sergio Paulo xtiža' Diosen' dan' choe' Bernabén' na' Saulon'. <sup>9</sup>Na' Spiritw che Diosen' zoachguan len Saulon' ben' lecze le Pablo, nach bcos lagüen' gwna'chgüe' Elimasen'. <sup>10</sup>Nach gože'ne':

—Naco' xi'in Satanás dan' chnabia' da' xigüe' ca', yela' güexoayag chio' na' yela' bene' mal chio'. Bi chazlaž' bite'teže da' güen. ĆBičen' cbi

chbezo' chžono' yosozenag bene' diža' li che Xanto' Diosen'? <sup>11</sup>Da'nan' Xanto' Diosen' goņe' castigw chio' na' choło' to tiemp, bi gac le'edo' gwbiža'.

Nach la' gwcholtie', gwde ca' to bejw lo yejlagüe'na', nach gwzolagüe' chgan chtobe' cheyljue' no goxe' ne'e cont cue' nez. <sup>12</sup>Gobernadoren' ble'ede' can' goquen' na' gwyejle'e xtiža' Xancho Jesucriston', na' bebanchgüede' can' ža dižan'.

**Pablon' na' Bernabén'  
ja'aque' Antioquian' gan'  
mbane distritw Pisidia**

<sup>13</sup>Nach Pablon' len bene' ca' nžague'na' gosa'aque' yež Pafosen', goso'e lo' barcon' cont besežine' yež gan' nzi' Perge gan' mbane distritw Panfilia. Na' Juan ben' lecze chese'e Marcos gwlejyichje' legaque' beyeje' Jerusalénna'. <sup>14</sup>Na' Pablon' len Bernabén' gosa'aque' yež Perge na' besežine' ciuda Antioquian' gan' mbane distritw Pisidia. Na' cate' bžin ža che Dios nach ja'aque' yodao' che bene' Israel ca' dan' zoa na' na' jasechi'e. <sup>15</sup>Na' ca' beyož blab to bene' libr gan' nyoj ley che Diosen' len dan' bosozoj bene' ca' goso'e xtiža' Diosen' cani', bene' ca' chesenabia' lo yodao'na' gosesele' to bene' gan' chi' Pablon' len Bernabén' na' gože' legaque':

—Bene' migw, še de bi diža' da' chaclaze'le güe'le neyoele bene' quinga, guac nalen na'a.

<sup>16</sup>Nach Pablon' gwzechede' bene' señw len ne'ena' cont yosozenag bene' ca' zjachi'na', na' gože' legaque':

—Le gwzenag le'e bene' Israel na' nochle chonxenle Diosen'. <sup>17</sup>Dios ben' chonxen chio' bene' Israel gwleje' da' xozxta'ocho ca' na' goclene' legaque' cont yesaque' to yež xen šlac gosenite' nación Egipto gan' gosaque' bene' zito'. Nach Diosen' bebeje' legaque' Egipton' len yela' guac chen'. <sup>18</sup>Na' Diosen' gwdape' yela' chxenlaže' choa iz len da' xozxta'ocho ca' šlac gosaše' latje dašen'. <sup>19</sup>Diosen' bonite' gaž yež da' zjachi' gan' nzi' Canaan' cont bnežjue' da' xozxta'ocho ca' yežlio chegaquen'. <sup>20</sup>Nach gwde na' Diosen' gwleje' tgüeje tgüeje juez cont gosenabi'e nación Israelen' lao tap gayoa yogašje iz bžinte tiemp che da' Samuel ben' be'e xtiža' Diosen' cani'. <sup>21</sup>Nach tiemp che da' Samuelen' da' xozxta'ocho ca' gosenabde' Diosen' gone' to rey bene' nabi'e legaque'. Na' Diosen' bnežjue' legaque' rey Saúl na' gwnabi'e legaque' choa iz. Saúl nan' goque' xi'in ben' le' Cis, na' goque' diaža che da' ben' le Benjamín ben' gwzoa cani'te. <sup>22</sup>Nach bžin ža Diosen' beque'e yela' gwnabia' che Saúlen' na' bzoe' ben' le David cont gwnabi'e. Na' gwne' che rey Davin': "Chbeda' David xi'in Isaí nga, le chaclaže' chone' can' chazlažan' na' chzenague' bite'tez da' chapa'ne'." <sup>23</sup>Nach na'a Diosen' ba gwsele' yeto bene' golje' lo diaža che da' rey Davin', ben' le Jesús. Ba gwsele' le' cont gone' chio' bene' Israel yela' mban toli tocane can' gwne' cani'. <sup>24</sup>Na' cate' bina' solao Jesús en' gwsed gwlo'ede' bene', da' Juanna' gwdixjue'ede' len yogo' bene' Israel gualaž chechon' cheyala'

yesyetingjde' xtoła'gaque' na' yesezoe' nis. <sup>25</sup>Na' cate' beyož ben Juanna' dan' yo'o lo ne'e gone', nach gože' bene' ca' chosozenag che': "¿Chonle xbab naca' neda' ben' chbezle sela' Diosen'? Bi naca' bena'. Za' yid bena', na' da' nacchgüe' bene' zaca', bi zaca' gona' mandadw che' lechja' no xele'."

<sup>26</sup>Bene' migw, chio' naccho xi'in diaža che da' xozxta'ocho Abraham, na' nochle le'e chonxenle Diosen' txen len neto' bene' Israel, xtiža' Diosen' dan' žan gone' chio' yela' mban toli tocane naquen par chio'. <sup>27</sup>Bene' ciuda Jerusalén ca' len bene' gwnabia' chegaque' ca' bi gosejli'e gwseła' Diosen' Jesús en', na' bi gosejni'ide' da' ca' zjanyoj che' le'e libr dan' bosozoj bene' ca' goso'e xtiža' Diosen' cani' la'czla' chosolaben' lo' yodaon' yogo' ža che Dios. Na' dan' bi gosejni'ide', da'nan' gosechoglagüen' yesote' Jesús en', nach goc can' nyoj che'. <sup>28</sup>Na' la'czla' gosenezde' bibi da' mal non Jesús en' cont yesote' le', gosenabde' Pilaton' gone' mandadw yesot soldadw che' ca' le'. <sup>29</sup>Na' goc che Jesús en' yogo' dan' nyoj che' le'e Xtiža' Dios dan' bosozoj bene' ca' gosenita' cani'. Na' beyož gotena' nach besežin bene' besyeletje' cuerp che'na' le'e yag cruzen' na' bosocuaše'ne'. <sup>30</sup>Na' gwdena' Diosen' bechis bosbane' le' ladjo bene' guata'. <sup>31</sup>Na' bene' ca' zjanaque' Jesús en' txen cate' gwze'e distritw Galilea cont gwyeje' ciuda Jerusalén, legaque' besele'ede' Jesús en' yezan ža gwde bebane' ladjo bene' guata', na' legaque' cheso'e diža' chen' len yezica'chle bene' Israel.

<sup>32</sup>Na' lencze neto' chyixjue'eto' le'e diža' güen cont nezele ba



chac da' güen dan' gož Diosen' da' xozxta'ocho ca' cani'. <sup>33</sup>Ba benen' len chio' naccho xi'in diaža che da' bene' ca', dan' bosbane' Jesúsen' ladjo bene' guaten'. Na' goc can' nyojen che' le'e libr dan' nzi' Salmos, na' salmo gwchopen' žan: "Le' naco' xi'ina'; na'aža ba blo'a zoaczo."

<sup>34</sup>Na' Diosen' lecze bene' cont nyojen ga yoble che' dan' bosbane' le' ladjo bene' guaten' na' gwbat gožo' cuerp chen', žan: "Gona' güen len le' dołoł can' goša' rey Davin'."

<sup>35</sup>Na' nyoj yeto salmo žan: "Bi go'o latje gožo' cuerp chian' neda' naca' ben' chacchgüedo' na' ben' chon xšinon'." <sup>36</sup>Nezecho da' rey Davin' gwnabi'e bene' Israel ca' gwnita' ca' tiemp chen' can' gwnalaže' Diosen' na' beyožen' gote' na' bgaše' len yezica'chle da' xozxta'ocho ca' na' lecze gožo' cuerp chen'. <sup>37</sup>Perw na' Diosen' bosbane' Jesúsen' ben' nyoj Xtižen' žan ca', na' bi gožo' cuerp chen'. <sup>38</sup>Na' cheyala' nezele bene' migw, Jesúsen' ben' choa' diža' che', chezi'xene' xtola' note'tez bene' chejnilaže'ne'. <sup>39</sup>Bi beyaccho bene' güen len Diosen' da' bi benyane'cho can' ža ley dan' bzoj da' Moisésen', perw note'tezcho chejnilaže'cho Jesúsen', len' ba cheyone' chio' bene' güen. <sup>40</sup>Le gwsaca' cont bi gac chele can' bosozoj bene' ca' goso'e xtiža' Diosen' cani', žan:

<sup>41</sup>Cheyala' gonle xbab, le'e chnelaole chia', na' cheyala' yebanele, le gwžin ža cuiayi'le.

Neda' Dios gona' to da' yebanele šlac mbanle,  
to da' bi šejle'le la'czla' še no  
chixjue'e le'e can' gaca'.

<sup>42</sup>Beyož bzejni'i Pablon' bene' ca' že'na' nach besyechoje' lo' yodaon'. Nach bene' ca' ba goson cuine' bene' Israel gosata'yoede' Pablon' len Bernabén' yeside' ža che Dios xmanña' yeto cont yosozejni'ide' legaque' yelate' che da' ca' ba bosozejni'ide'. <sup>43</sup>Nach bene' zan bene' Israel len zan bene' ca' ba goson cuingaque' bene' Israel zja'aclene' Pablon' len Bernabén'. Nach Pablon' na' Bernabén' goseneyoede' legaque' cont nita'che' yesejnilaže'che' Diosen' ben' chaclen legaque'.

<sup>44</sup>Na' cate' bežag xmanña' ža che Dios yogo'lolcze bene' lo' ciudan' besežag cont bosozenague' xtiža' Diosen'. <sup>45</sup>Na' gwnita' bene' Israel bene' bi gosejle' che Jesúsen', na' cate' besele'ede' ba nac bene' zan chosozenague' che Pablon' na' gosacxi'ede' le' na' gosenelagüe' che' na' gosezi'diže' le'. <sup>46</sup>Perw na' Pablon' len Bernabén' bi besežebe' san gose'e bene' ca' že'na':

—Ba bento' can' gwnalaže' Diosen' na' zgua'tec bzejni'ito' le'e nacle bene' Israel gualaž cheto'. Na' na'a dan' bi chaclaže'le gwzenagle, chonle cont bi gon Diosen' le'e yela' mban toli' tocañe. Da'nan' na'a gwzejni'ito' bene' ca' bi zjanac bene' Israel. <sup>47</sup>Gonto' ca' neche Xanto' Diosen' bačh bene' mandadw gonton', le nyojen žan:

Bačh nzoa' le'e cont co'ole be'ni' chian' lo' yichjlaždao' bene' ca' bi zjanac bene' Israel,  
cont bene' ca' že' doxen yežlion' yesacbe'ede' guac nitlao  
xtola'gaque'.

<sup>48</sup>Na' bene' ca' bi zjanac bene' Israel chesebede' beyož gosende'

can' gwna Pablon', na' gosene' güenchgua nac xtiža' Diosen'. Na' yogo' bene' ca' ba gwlej Diosen' cont gata' yela' mban čhegaque' toli tocane, legaque' gosejle'e xtiža' Diosen' dan' be' Pablon' len Bernabén'. <sup>49</sup>Can' goc bene' ca' že' doxen distritwna' gosende' xtiža' Xancho Jesucriston'. <sup>50</sup>Perw ba| bene' Israelen' goso'e diža' len no'ol blao ca' gosonxen Diosen' na' len bene' gwnabia' blao ca' lo ciudan', na' bosoš'e'e xbab čhegaquen' cont gwzoloao gosone' contr Pablon' len Bernabén' na' bich goso'e latje yesenite' doxen distriton'. <sup>51</sup>Nach Pablon' len Bernabén' cate' besyeya'aque' ciuda Antioquían' gosebibe ni'agaque' cont bežib yo bište dan' žianna'. Gosone' ca' cont bosolo'ede' bene' ca' chesyebej legaque' malen' chesone' chosolague' legaque'. Nach jaya'aque' yež Iconio. <sup>52</sup>Na' mbalazchgua gwnita' bene' ca' chesonxen Jesucriston' ciuda Antioquían', na' Spiritw čhe Diosen' gwzoachguan len legaque'.

**Pablon' len Bernabén'  
besežine' yež Iconio**

**14** Na' goquen' Pablon' len Bernabén' besežine' yež Iconion' na' ja'aque' yodao' čhe bene' Israel. Na' cate' goso'e xtiža' Jesucriston', bene' zan bene' Israel ca' na' len zan bene' cbi zjanac bene' Israel gosejle'e čhe'. <sup>2</sup>Perw na' gwnita' bene' Israel ca' bene' bi gosejle'e čhe Jesucriston', na' legaque' gosenelagüe' čhe bene' ca' chesejnilaže' Jesucriston' na' gosone' cont bene' ca' bi zjanac bene' Israel gosezolagüe' besegue'ede' Pablon'

len Bernabén'. <sup>3</sup>Perw na' Pablon' len Bernabén' besyega'ane' sša Iconion' cheso'e xtiža' Xancho Jesucriston' sin cbi besežebe'. Na' Xancho' blo'e le diža' lin' cheso'e chesene' Diosen' chacde' benačhen', le be'e legaque' yela' guac cont gosone' da' zaca' yebanecho cont gosacene' bene'. <sup>4</sup>Na' bene' ca' že' lo yežen' gosaque' čhople, ba|e' gosede'e bene' Israel ca' ben' bi gosejnilaže' Jesucriston' na' yeba|e' gosede'e Pablon' len Bernabén'. <sup>5</sup>Nach bene' Israel ca' gosone' yela' güexi'a len bene' ca' cbi zjanac bene' Israel na' len justis čhegaque' cont yesone' contr Pablon' len Bernabén' na' yosočhele' legaque' yej. <sup>6</sup>Perw cate' gwneze Pablon' len Bernabén' dan' chesaclaže' yesone' len legaque', bosyoxonje' jaya'aque' yež Listra na' yež Derbe na' yezica'chle yež ca' zjachi' distritw dan' nzi' Licaonia. <sup>7</sup>Na' lecz goseyixjue'ede' xtiža' Xancho Jesucriston' len bene' ca' že' na'.

**Bosožie' Pablon' yej šlac zoe' Listran'**

<sup>8</sup>Na' yež Listran' besežague' to bene' golje' nxinj ni'e ca', cate' gocte' bidao' bi goc se'e. <sup>9</sup>Con čhi'teze' chzenague' choe' Pablon' dižan'. Nach Pablon' gwne'e le' na' gocbe'ede' bena' chejle'e Diosen' nape' yela' guac cont yeyone' ni'en'. <sup>10</sup>Nach Pablon' bo| güiže'ne' gože' le' zižje: —Gwzoža'.

Na' la' gwzoža'te' na' gwzoloao chde'. <sup>11</sup>Na' že' bene' zan chesene' can' goquen' na' legaque' bososye'e gosene' diža' Licaonia:

—Xancho bene' ca' chejnilaže'cho ba gosetje' nga chesone' yela' guac, na' chle'etecho legaque' ca benačh.

<sup>12</sup>Gosene' Bernabén' naque' xangaque' ben' zjansi'e Júpiter, na' Pablon' naque' xangaque' ben' zjansi'e Mercurio. Gosene' ca' le Pablon' choe'che' dižan'. <sup>13</sup>Na' yodao' gan' chesonxene' xangaque' Júpiteren' zoan cho'a yež. Na' bꝯoz che Júpiteren' jaxi'e go'ñ be ba zjanone' xdan zjanžie' legacba' corona yej. Nach bꝯoza' gwꝯhe'e bene' zan cho'a yežen' gan' zoa puert che ze'e dan' nyechj yežen' na' goclaže' yesote' go'nen' yesonxene' postlw ca'. <sup>14</sup>Na' Pablon' len Bernabén' cate' gosacbe'ede' can' yeson bene' ca', gosecheza' xagaque' dan' bi gosaclaže' yesonxen bene' ca' legaque'. Nach gosodie' gachol bene' ca' gose'e legaque' zižje:

<sup>15</sup>—Bene', žbixchen' chonle ca'? Lecz benač neto'. Za'to' cont chyixjue'eto' le'e cheyala' gwša' yichjlažda'olen' na' cuejyichjle costumbr quinga dan' bibi zaca' na' gonxenle Dios ben' zoa toli tocanē. Le' bene' yaban', yežlion', nisdaon', benač, be ca' chesaš na' bite'tezechle da' chle'echo le'e yaban', lo yežlion' na' lo' nis. <sup>16</sup>Cani' Diosen' bi bžone' gon benačen' bite'tez da' mal da' žan yesone'. <sup>17</sup>Perw zoacze' chone' da' güen len yogo' benač cont yesenezde' zoe' naque' Dios. Chone' cont chac yejw cont chac dan' chazcho na' chata' da' che'ej chagwcho cont zoacho mbalaz.

<sup>18</sup>Na' la'czla' Pablon' len Bernabén' gosene' yogo' da' ca', canē gosezoede' bosožone' yesot bene' Listra ca' go'ñna' yesonxene' legaque'.

<sup>19</sup>Nach besežin ba| bene' Israel bene' nita' yež Iconio na' ciuda

Antioquía dan' chi' distritw Pisidian', na' bene' ca' gosego'oye|e' bene' Listra ca' cont gosaque'ne' txen bosochele' Pablon' yej. Na' cate' gosone' xbab bač gote' nach gosexobe' le' cho'a yeža' na' bosyocua'ane' le' na'. <sup>20</sup>Perw na' bene' ca' chesonxene' Jesucriston' besedobe' gan' de Pablon', nach Pablon' beyase' beyeje' lo ciudan' da' yoble. Nach beteyo beza' Pablon' len Bernabén' jaya'aque' yež Derben'.

<sup>21</sup>Nach cate' besežine' Derben' bosozende' bene' ca' že' na' diža' güen che Jesucriston', na' bene' zan gosone' txen len legaque' gosejle'e che Jesucriston'. Na' gwdena' gosa'aque' ja'aque' da' yoble Listran' na' Iconion' na' Antioquían'. <sup>22</sup>Na' to to yež gan' ja'aque' gosone' chač laže' bene' ca' chesonxene' Jesucriston' na' gose'e legaque' yesenite' yesonxene' le' do yichj do laže', na' gose'e legaque' da' zan da' gac da' saca'zi'cho šlac chbezcho yeyejcho yaban' gan' zoa Diosen' chnabi'e. <sup>23</sup>Na' to to yež ga besyedie' gosebeje' bene' yosogüia yesene'e yezica'chle bene' ca' chesonxene' Jesucriston'. Na' Pablon' len Bernabén', cate' za' yesa'aque' to to yež, gosone' gwbas na' bosol güiže' Diosen' gosenabe' gaclen Xancho Jesucriston' bene' ca' ba chesejnilaže' le'.

**Pablon' len Bernabén' jaya'aque' Antioquía gan' mbane distritw Siria**

<sup>24</sup>Cate' gosa'aque'na' Pablon' len Bernabén' besyedie' distritw Pisidia na' besežine' distritw Panfilian'. <sup>25</sup>Na' goseyixjue'ede' xtiža' Jesucriston' yež Perge na'

beyožen' jaya'aque' yež Atalia.  
<sup>26</sup>Nach Atalian' besyeyo'e lo' barcw jaya'aque' ciuda Antioquían' gan' mbane distritw Sirian'. Le bene' Antioquíanan' gosesel'e Pablon' na' Bernabén' cana'te na' gosenabde' Diosen' šejlene' legaque' na' gaclene' legaque' cont yosozejni'ide' bene' xtiže'na'. Na' na'a besyežine' ba beyož gosone' dan' gosego'o bene' ca' lo' na'gaque' yesone'. <sup>27</sup>Na' bosyotobe' bene' ca' chesonxene' Jesucriston' na' gose'ene' yogo'lo' can' ben Diosen' len legaque' šlac zja'aque', can' goclene' legaque' cont zan bene' bi zjanac bene' Israel ba gwzolao chesejnilaže' Jesucriston'. <sup>28</sup>Na' besyega'ane' Antioquían' sša len bene' ca' chesonxene' Jesucriston'.

Gosone' yela' güexi'a len bene'  
 ca' že' ciuda Jerusalénna'

**15** Na' šlac Pablon' len Bernabén' ne' nite' ciuda Antioquían' besežin to čhope bene' za'ac distritw Judean' na' gosezologüe' bosozejni'ide' bene' ca' chesonxen Jesucriston' na'. Gose'ene' yogo'lo' bene' byo cheyala' yesezoe' señw dan' že' circuncisión can' že ley dan' bzoj da' Moisésen' cont gata' yela' mban čhegaque' toli tocane. <sup>2</sup>Na' Pablon' len Bernabén' gosacyože' len bene' ca' za'ac distritw Judea dan' chosozejni'ide' ca'. Nach bene' ca' chesonxene' Jesucriston' Antioquían' gosečhoglagüen' šja'ac to čhope' Jerusalén len Pablon' na' Bernabén'. Šja'aque' šjasene'e postlw ca' že'na' na' len bene' ca' chosogüia chese'ne'e lježgaquen' cont yesone'

yela' güexi'a len legaque' čhe dan' chosozejni'i bene' ca' za'ac distritw Judean'.

<sup>3</sup>Nach bene' ca' chesedop chesežag chesonxene' Jesucriston' Antioquían' gosesel'e legaque' Jerusalénna'. Na' bene' ca' zja'aquen' gosedie' distritw Fenicia na' distritw Samaria. Na' yež ca' gan' že' bene' chesonxene' Jesucriston', bene' ca' zja'aquen' gose'e legaque' zan bene' bi zjanac bene' Israel ba gosebejyichje' da' ca' gosejnilaže' do cana' cont chesejnilaže' Diosen'. Nach bene' ca' že' distritw Fenicia na' distritw Samaria besyebchgüede' gosende' dižan'.

<sup>4</sup>Na' cate' Pablon' len Bernabén' besežine' Jerusalénna', bene' ca' chesedop chesežag chesonxene' Jesucriston', na' postlw ca' na' len bene' ca' chosogüia chesena' lježgaquen' besežague' bosoguape' legaque' tiox. Nach Pablon' len Bernabén' gose'e legaque' yogo'lo' can' ba goclen Diosen' legaque'. <sup>5</sup>Nach nita' to čhope bene' Fariseo bene' ba chesonxene' Xancho Jesucriston', na' tgüeje tgüeje' gosezie' gosene':

—Note'tez bene' byo gonxene' Jesucriston' cheyala' soe' señw dan' nzi' circuncisión na' cheyala' gone' can' že ley dan' bzoj da' Moisésen'.

<sup>6</sup>Nach besedobe postlw ca' len bene' ca' chosogüia chesena' lježgaque', na' bosoxi'e še naquen can' chesena bene' ca'. <sup>7</sup>Ba chac sša cheso'e dižan' cate' gwzoža' Pedron' gože' legaque':

—Bene' migw, nezele ba goc zan iz Diosen' gwleje' neda' jatixjue'eda' diža' güen čhe Jesucriston' len bene' ca'

bi zjanac bene' Israel cont gosejle'e che'. <sup>8</sup>Na' Diosen' nombi'e yichjlaždao' yogo'lo' bene', na' cont nezecho chacde' bene' ca' bi zjanac bene' Israel can' chacde' chio' naccho bene' Israel, nacha' gwsele' Spiritw chen' gwyo'on lo' yichjlaždao' bene' ca' can' ba gwyo'on lo' yichjlažda'ochon'. <sup>9</sup>Toz ca chon Diosen' len chio' na' len legaque', note'tezcho ba beya' beyibe' lažda'ochon' dan' chejle'cho che Jesúcrison'. <sup>10</sup>Ba chonle contr Diosen' dan' chaquele gwchile bene' ca' bi zjanac bene' Israel cont yesa'ogüe' costumbr che chio' bene' Israel. Nezele catec zdebe zjanaquen, ne chio' ne xozxta'ocho ca' bi goc yesone' yogo' can' ža diža' gol cheto' ca'. <sup>11</sup>Bi cheya'la' goncho ca', le nezecho note'tez naccho, Xancho Jesúsén' chone' yela' mban checho toli' tocanē dan' chacde' chio', gague neche dan' choncho can' ža ley che Moisés.

<sup>12</sup>Beyož gwna Pedroa' ca' nach bich bi gosena bene' ca', san yogüe' gosenite' šize bosozenague' xtiža' Pablon' len Bernabén'. Goso'e diža' can' bnežjo Diosen' legaque' yela' guac cont gosone' da' zaca' yebanecho gan' že' bene' ca' bi zjanac bene' Israel. <sup>13</sup>Na' beyož goso'e dižan' nach postlw Jacobo be'e dižan', gwne':

—Bene' migw, le gwzenag diža' nga gua'a. <sup>14</sup>Simón Pedro nga ba bzejni'ide' chio' can' ben Diosen' da' nechw len bene' bi zjanac bene' Israel cont blo'e chacde' legaque', ba gwleje' bale' cont zjanaque' lo' ne'e. <sup>15</sup>Na' dan' goc ca' choti'len da' ca' bosozoj bene' goso'e xtiža' Diosen' cani', le nyojen žan:

<sup>16</sup>Tena' yida' da' yoble na' gona' cont nabia' xi'in diaža che da' rey David, la'czla' na'a nono xi'in diaža che' chnabia', na' gona' cont soa toe' da' yoble nabi'e.

<sup>17</sup>Gona' ca' cont yogo' bene' bi zjanac bene' Israel guac yeseyiljue' nac yesone' yesenite' binlo len neda'. Note'tez bene' nación guac yosol güiže' neda'.

<sup>18</sup>Can' gwna Xancho Diosen' cani'te, bene' cont goseneze bene' can' gagen'.

<sup>19</sup>Na' lagüe nyoj Xtižen' žan ca', chacda' neda' bi cheya'la' gonecho zed bene' ca' bi zjanac bene' Israel bene' ba chesebejyichje' costumbr gole chegaque' na' chesonxene' Diosen'. <sup>20</sup>Con gwzozcho ye'gacchone' bi yesone' txen len bi dan' cheson bene' dan' chesene' naquen che l' gua'a lsaca' dan' chesonxene', neca yesata'lene' no no'ol cbi nac no'ol chegaque' o bene' byo cbi nac bene' chegaque', neca yesagüe' be chesote' chosošoque' do l'ba'ba', neca yesagüe' chen che beyixe'. <sup>21</sup>Nabcho bi yesone' da' ca', le cani'te nita' bene' to to yež chosozejni'ide' ley chechon' dan' bzoj da' Moisésén' dan' žan bi goncho da' ca', na' chosolabe' leyna' yogo' ža che Dios.

<sup>22</sup>Nach postlw ca' len bene' chosogüia chesene'e yezica'chle bene' chesonxene' Jesucriston', na' len bene' chesedop chesežag, gosazlaže' can' gwna Jacobon', na' bosoxi'e choj chope bene' lježe'

šja'aque' ciuda Antioquían' txen len Pablon' na' Bernabén'. Na' gosebeje' Judas ben' lecze gože'ne' Barsabás, na' Silas, ben' zjanac bene' blao len legaque'. <sup>23</sup>Na' bosozoje' to cart da gosoxe' bene' ca' žan:

“Neto' postlw, len bene' chosogüia chesene'e yezica'chle bene' chesonxene' Jesucriston', na' len yogo' bene' chesedop chesežag len neto', chguapto' le'e tiox le'e zoale Antioquían' na' distritw Siria na' distritw Cilicia. Bi nacle bene' Israel perw ba nac lježcho chonxencho Jesucriston'. <sup>24</sup>Ba nezeto' to chope bene' besechoj nga ja'aque' gan' zoalen' gosone' šejlaže'le len dan' bosozejni'ide', na' chacle tole dan' chesene' cheyała' soale señw dan' že' circuncisión na' cheyała' gonle yogo' bichle dan' ža ley dan' bzoj da' Moisésen'. Bi nezeto' gosa'aque' na' gague mandadw che neto' gose'e le'e ca'. <sup>25</sup>Da'n'an' gwzoato' txen bento' yela' güexi'a gwlejto' chope bene' quinga chselä'to' gan' zoalen', txen len postlw Pablon' na' len Bernabén', bene' ca' chaquechgüeto'. <sup>26</sup>Nezeto' Pablon' len Bernabén' zan las ba ša' yesate' dan' cheso'e xtiža' Xancho Jesucriston'. <sup>27</sup>Na' chselä'to' Judasen' len Silasen' cont yosozejni'ide' le'e diža' cho'a yogo' dan' bzojto' le'e cart nga. <sup>28</sup>Chazlaže'to' can' bzejni'i Spiritw che Diosen' neto', na' da'n'an' bi gonto' mandadw bichle da' zdebe gonle san da' quinga chaqueto' chonen byen cbi gonlen. <sup>29</sup>Bi gagwle yela' guagw dan' ba bosozie' lo l gua'a lsacan' chesonxenen', na' bi gagwle be ca' chesote' chosošoque' do lba'ba', bi gagwle chen che beyixe', na' bi

gata'lenle no'ol cbi nac no'ol chele o bene' byo ben' cbi nac bene' chele. Na' še gwzenagle che da' quinga ba gwnato' bi gonle, güenna' chonle še ca'. Da' na'ze chzojto' le'e cart nga. Diosen' gaclenšque' le'e.”

<sup>30</sup>Can' goquen' bene' ca' chesonxene' Jesucriston' Jerusalénna' gosesele' bene' ca' chope len Pablon' na' len Bernabén' gosa'aque' zja'aque' ciuda Antioquían'. Na' cate' besežine' Antioquían' bosotobe' bene' ca' chesonxene' Jesucriston' na' bosonežjue' legaque' carten' goseseła' bene' Jerusalén ca'. <sup>31</sup>Na' cate' bene' Antioquía ca' bosolaben' besyebede' ca' consejon' nyoj le'e carta'. <sup>32</sup>Na' Judasen' len Silasen' lecze gosaque' bosozende' bene' bin' ba gwna Diosen'. Nach gosoe'lene' bene' Antioquía ca' diža' zan gosone' chach laže'gaque' na' gosaclene' legaque' cont gosonxenche' Jesucriston'. <sup>33</sup>Gosenite' Antioquían' zan ža, nach cate' bžin ža šjaya'aque', bene' Antioquía ca' gose'e legaque': “Nayežagcho”, na' lecze gose'e legaque' yesyežine' Jerusalénna' to šagüe' to güen. <sup>34</sup>Na' Silasen' bechoglaže' yega'ane' Antioquían'. <sup>35</sup>Na' Pablon' len Bernabén' gosenita'cze' Antioquían' na' txen len yezan bene' bosozejni'ide' bene' xtiža' Xancho Jesucriston'.

**Pablon' gwyeye' da' yoble gan'  
ba jatixjue'ede' xtiža' Diosen'**

<sup>36</sup>Nach cate' ba goc sša nite' Antioquían', Pablon' gože' Bernabén': —Šejcho da' yoble yogo' yež ca' gan' ba jatixjue'echo xtiža' Xancho

Jesucriston' šjana'cho nac cheson bene' ca'.

<sup>37</sup>Nach Bernabén' goclaze' šja'aque' na' yeseche'e Juan ben' lecz le Marcos. <sup>38</sup>Perw Pablon' gwne' bi gonen güen yeseche'ene' dan' gwlejšyichj Marcosen' legaque' cate' besežine' distritw Panfilian' na' bi benlene' legaque' xšin Diosen'. <sup>39</sup>Cate' gota'bia' ne toe' bi goclaze' gac can' ža ben' yeto, nach besyele'e. Bernabén' gwze'e gwche'e Marcosen' na' gosoe lo' barcw ja'aque' Chipren'. <sup>40</sup>Na' Pablon' gwleje' Silasen' cont che'e le'. Na' bene' ca' chesonxene' Jesucriston' Antioquían' bosol güiže' Xancho Diosen' gosenabe' gaclene' legaque' gate'tez šja'aque'. Nach Pablon' len Silasen' gosa'aque'. <sup>41</sup>Na' ja'aque' to to yež ca' zjachi' distritw Sirian' na' len distritw Cilician' gosone' chačh laže' bene' ca' chesedop chesežag chesonxene' Jesucriston'.

**Timoteon' gwzologüe' chonlene'  
Pablon' na' Silasen' txen**

**16** Na' Pablon' len Silasen' besyežine' yež Derben' nach gwdena' besyežine' yež Listran'. Na' Listran' zoa to bene' chonxene' Jesucriston' le' Timoteo. Xna' Timoteon' naque' bene' Israel na' chonxene' Jesucriston', na' xen' naque' bene' griego. <sup>2</sup>Na' bene' ca' chesonxene' Jesucriston' yež Listran' len yež Iconion' cheso'e diža' che Timoteon' chesene' zoacze' chone' da' güen. <sup>3</sup>Da'nan' Pablon' gwnabe' šejlen Timoteon' legaque', nach gwch'ene' gan' bosozoe' le' señw dan' že' circuncisión. Bene' ca' le' yogo' bene' že' na' gosenezde' xa

Timoteon' bi naque' bene' Israel na' Timoteon' bina' soe' señon', na' lecze Pablon' goclaze' yega'ane' güen len bene' Israel ca'. Cate' beyož bzoe'ne' señua' na' gosa'aque'. <sup>4</sup>Na' to to yež ga besežine' bosozende' bene' ca' chesonxene' Jesucriston' can' nac yela' güexi'a che postlw ca' len bene' chosogüia chesene'e lježgaque' Jerusalénna' che da' ca' cheyala' yesone'. <sup>5</sup>Na' bene' ca' chesedop chesežag chesonxene' Jesucriston' gosenita'chače' gosejnilaže'ne' na' gwyanche' tža tža.

**Pablon' ble'edagüede' to  
bene' distritw Macedonia  
chata'yoede' le' šeje' laže'**

<sup>6</sup>Nach Spiritw che Diosen' bi ben' latje šjasedixjue'e Pablon' len Silasen' len Timoteon' xtiža' Diosen' yež ca' zjachi' distritw gan' nzi' Asia. Da'nan' gosodie' yež ca' zjachi' distritw ca' gan' nzi' Frigia na' Galacia. <sup>7</sup>Besežinte' gała'ze distritw gana' nzi' Misia na' gosone' xbab yesoe' distritw da' nzi' Bitinia, perw lez na' bi be' Spiritw che Jesúsén' latje šja'aque'. <sup>8</sup>Nach gosodie' gała'ze distritw Misian' na' besežine' ciuda dan' nzi' Troas dan' chi' cho'a nisaon'. <sup>9</sup>Nach že'na' Pablon' ble'edagüede' zecha to bene' distritw Macedonia lagüe', che'e le': "Yo'o Macedonia cont gacleno' neto'." <sup>10</sup>Neda' Lucas gwzoa' len legaque' na' da' ble'edagüe Pablon' bene' Macedonian', nach gwnezeto' chaclaže' Diosen' šjazeneto' bene' Macedonia ca' diža' güen che Xancho Jesucriston'. Nach bsini'a cheto' cont gwza'to' gwyejto' distritw Macedonian'.



**Pablon' len Silasen' ja'aque' Filipos**

<sup>11</sup>Na' cate' gwza'to' ciuda da' nzi' Troas dan' chi' cho'a nisdao' gwyo'oto' to lo' barcw zejto' licha gan' chi' to yežlio lo' nisen' dan' nzi' Samotracia, nach beteyo bžinto' yežen' dan' nzi' Neápolis. <sup>12</sup>Nach gwza'to' Neápolis bžinto' ciudan' nzi' Filipos gan' mbane distritw Macedonia na' bega'anto' to chop ža. Filipos naquen ciuda blaoch che distriton' gan' že' bene' Roma.

<sup>13</sup>Na' cate' bžin ža che Dios bchojto' ciudan' na' gwyejto' cho'a yegw gan' chaqueto' chjasel' güiže' Diosen', nach gwche'to' na' be'lento' no'ol ca' ba zjandoben' diža' güen che Jesucriston'. <sup>14</sup>Toe' le Lidia naque' bene' Tiatira na' chote' lache' güen da' nac color moradw, na' chonxene' Diosen' do yichj do laže'. Xancho Diosen' bene' cont bzenague' che dan' bzejni'i Pablon' le'. <sup>15</sup>Nach le' len bene' lo' yo'o che' gosezoe' nis. Gwdena' gota'yoede' neto' gwne': —Še chejle'le da' li ba chonxena' Xancho Jesucriston', le šo'o soale ližan'.

Nach gwyejto' jasoato' ližen', le bene' byen.

<sup>16</sup>Na' to ža zejto' gan' chosol' güiže' Diosen' cate' bežagto' to no'ol güego' no'ole esclava. Yo'o nyaz da' xigüen' yichjlažda'oben' chonen' cont chac chneya'abe', na' gan' xen' chombe' par xambe' ca' chneya'abe'. <sup>17</sup>Na' lebe' na'obe' neto' len Pablon' gate'tez zejto', na' chosya'abe' žabe':

—Bene' quinga chesone' xšin' Diosen' ben' chnabi'e doxen, na' cheseyixjue'ede' le'e can' gata' yela' mban' chele toli' tocanē.

<sup>18</sup>Ba chac zan' ža chombe' ca' cate' goque Pablon' zed, na' gwyečhje' gože' da' xigüen' yo'o lo' yichjlažda'oben':

—Len yela' chnabia' che Jesucriston' chnia' le' bechoj lo' yichjlaždao' bi'nga.

Na' la' bechojte da' xigüen' lo' yichjlažda'oben'.

<sup>19</sup>Na' gwdena' cate' gosacbe'e xambe' ca' ba bechoj da' xigüen' lo' yichjlažda'oben' na' bich bi gan' yesone' len lebe', nach gosezene' Pablon' len Silasen' na' jasesane' legaue' lagüe ya'a gan' že' bene' ca' chesenabia' ciudan'. <sup>20</sup>Na' cate' besežine' gan' že' justis ca', gose'e legaue':

—Bene' Israel quinga chesaše' chesebeque' da' zed lo' ciuda nga.

<sup>21</sup>Na' chosolo'ede' costumbr da' bi de lsens gao' chio' naccho bene' Roma.

<sup>22</sup>Nach bene' ca' lo' ciudan' gosase' contr Pablon' len Silasen', na' bene' gwnabia' ca' gosone' mandadw goselečhje' xagaue' cont goseyine' legaue' xis. <sup>23</sup>Beyož goseyinchgüe' legaue' nach bosoži'e legaue' ližya, chese'e ben' chape' ližyan' gwna'yane' legaue' cont bi yesyechoje'. <sup>24</sup>Beyož gose'e le' ca', nach bži'e legaue' lo' cuart ližyan' dan' zoa la'zelaoze gan' nac biže'te na' bchide' ni'agaquen' len yag dan' nzi' cepo.

<sup>25</sup>Ca' gosenita' Pablon' len Silasen' ca' do chel, chosol' güiže' Diosen' na' chesole' no' himno chesonxene' Diosen', na' yezica'chle bene' ca' zjade ližyan' chosozenague'.

<sup>26</sup>Nach zejzenez leca gwxo' na' bsesechguan len yo'o ližyana'. Na'

to ši'ize yogo' puert che ližyana' beseyaljon na' besyeyež yogo' gden ca' dan' zjanchej nī'a na' bene' ca' že lo' ližyan'. <sup>27</sup>Bosbanen ben' chape' ližyan' na' cate' ble'ede' ba zjanyaljo puert ca', la' goljte spada chen' cont yeyot cuine', le bene' xbab ba bosyoxonj yogo' bene' ca' zjade ližyan'. <sup>28</sup>Nach Pablon' gože'ne' zizje:

—Bibi gone cuino'. Nga zoacze yogo'to'.

<sup>29</sup>Nach ben' chap ližyan' gwnabe' to yi', na' gwyo'osese' zjane'e gan' de Pablon' len Silasen'. Do chxizze' bzoa xibe' lao bene' ca', le chžebchgüe'.

<sup>30</sup>Na' la' bebejte' legaque' lo' cuart gan' zjajo'en', che'e legaque':

—¿Bi cheyala' gona' cont gata' yela' mban chia' toli tocane'?

<sup>31</sup>Nach gose'e le':

—Gwejnilaže' Xancho Jesucriston', le' na' bene' lo' yo'o chio', na' gata' yela' mban chele toli tocane'.

<sup>32</sup>Nach ben' chape' ližyan' gwche'e legaque' ližen' na' gosoe'lene' le' len bene' lo' yo'o chen' xtiža' Xancho Jesucriston'. <sup>33</sup>Nach ca' hora' ben' chap ližyan' gwdibe' lo' güe' che Pablon' na' che Silasen', na' gwdena' jasoe' nis len bene' lo' yo'o che' ca'.

<sup>34</sup>Nach ben' chape' ližyan' beche'e Pablon' len Silasen' liže' bgüe'ej bguagüe' legaque'. Mbalaz zoe' ba chejnilaže' Diosen' txen len bene' lo' yo'o che'.

<sup>35</sup>Cate' ba gwyeni' bene' gwnabia' ca' gosesele' xa'ag jaseže' ben' chap ližyan' yosane' bene' ca' šjaya'aque'.

<sup>36</sup>Nach le' gože' Pablon':

—Bene' gwnabia' ca' bačh gosesele' rson yosana' le'e. Guac yeyejle to šagüe' to güen.

<sup>37</sup>Nach Pablon' gože' xa'ag ca':

—Ba goseyine' neto' latje lagüe ya'a sin cbi gosone' yela' justis cheto' še bi nonto' na' gosegüe'e neto' ližya, len nacto' bene' nación Roma. ¿Na' chesone' xbab yososane' neto' šižize? Bi gac, san yesid cuine' yesyebeje' neto'.

<sup>38</sup>Nach xa'ag ca' jasyeyeže' bene' gwnabia' ca' can' gož Pablon' legaque'. Na' bene' ca' besežebe' cate' gosenezde' Pablon' len Silasen' zjanaque' bene' nación Roma.

<sup>39</sup>Nach bene' gwnabia' ca' ja'aque' gan' zjade Pablon' len Silasen' na' gosata'yoede' legaque' yesyezi'xene' can' ba goquen', na' diža' šagüe' gose'e legaque' yesyechoje' yesyeya'aque' lo' ciudan'. <sup>40</sup>Nach bechoj Pablon' len Silasen' ližyan' na' ja'aque' liž Lidian' da' yoble, na' da' yoble gosone' chačh laže' bene' ca' chesonxene' Jesucriston' na' beyožen' besyeya'aque'.

### **Bene' Tesalónica ca' gosone' contr Pablon'**

**17** Cate' Pablon' na' Silasen' gosa'aque' ciuda Filipos nach ja'aque' yež da' nzi' Anfípolis na' len yež da' nzi' Apolonia na' besyěžine' to ciuda da' nzi' Tesalónica gan' zoa to yodao' che bene' Israel. <sup>2</sup>Na' Pablon' ca' costumbr che' gwyeje' yodao' ža che Dios. Na' ca' goc, šone ža che Dios be'lene' legaque' diža'. <sup>3</sup>Bzejni'ide' legaque' gože'ne' bene' ca' goso'e xtiža' Diosen' cani' bosozoje' xtiža' Criston'. Gosene' ben' sela' Dios yedenabi'e, cheyala' yosoči yososaca' bene' le' na' yesote'ne' na' techle yeyas yebane' ladjo bene' guat ca'. Gože' bene' Tesalóncan':

—Jesús'en ben' choa' diža' che', le'na' Criston' ben' gwseła' Dios cont nabi'e.

<sup>4</sup>Nach bał bene' Israel gosejle'e xtiža' Pablon' len Silasen' na' gosaque' txen len legaque', na' lecze zan bene' griego bene' chesonxen Diosen' na' zan no'ole blao lecze gosejle'e. <sup>5</sup>Perw gwnita'ch bene' Israel bene' bi chesejle'e xtiža' Diosen'. Legaque' gosacxi'ede' Pablon' len Silasen' na' bosyotobe' xonj bene' mal bene' chesaš lagüe ya'a na' gosaque' txen gosone' cont gwche' žaš doxen ciudan'. Nach bene' že' lo ciudan' ja'aque' liž ben' le' Jasón chesacde' yesyebeje' Pablon' len Silasen' liže'na'. <sup>6</sup>Cate' besežine' liž Jasónna', noch no bene' ca' nita'. Nach cate' bi besyeželde' Pablon' len Silasen', na' gosoxe' Jasónna' len yebał bene' chesonxene' Jesucriston' na' goseche'e legaque' lao bene' ca' chesenabia' ciudan', na' bososye'e gosene':

—Bene' ca' nita' liž benga chesaše' chesebeque' da' zed doxen, na' na'a ba besele'e gan' zoacho nga. <sup>7</sup>Jasón ni ba blebe' legaque' ližen', na' bi chesone' can' ža ley che César ben' nac la'zelagüe bene' gwnabia' chechon' chi' ciuda Roman', na' chesene' zoa yeto rey bene' le Jesús bene' nabi'e chio'.

<sup>8</sup>Na' cate' gosende' diža'na', bene' lo ciuda ca' len bene' gwnabia' chegaque' ca' gosebecche' žaš. <sup>9</sup>Nach Jasónna' len bene' lježe' ca' bosožie' mechw cont bene' gwnabia' ca' bososane' legaque', con še bich yesyežin Pablon' na' Silasen' lo ciudan', chesene'.

**Pablon' len Silasen' ja'aque' yež Berea**

<sup>10</sup>Nach že'na' bene' ca' chesonxene' Jesucriston' lagüe ciuda Tesalónican'

bosyose'e Pablon' na' Silasen' cont ja'aque' yež gan' že' Berea. Na' cate' besyežine' nach ja'aque' lo' yodao' che bene' Israel ca'. <sup>11</sup>Na' bene' Israel ca' že' Berean' zjanacche' bene' šagüe' clel ca' bene' Israel ca' že' Tesalónican' na' besyebede' bosozenague' xtiža' Jesucriston' dan' bosozejni'i Pablon' len Silasen' legaque'. Na' tža tža besyeyiljue' gan' nyoj da' ca' bosozejni'i bene' ca', cont yesenezde' še le can' žan. <sup>12</sup>Na' zane' gosejle'e xtiža' Xancho Jesucriston' na' lecze zan bene' griego ca' na' zan no'ole blao. <sup>13</sup>Nach bene' Israel ca' že' Tesalónican' bene' ca' cbi chesejle' che Jesucriston', gosende' diža' ba zoa Pablon' len Silasen' Berean' chosozejni'ide' xtiža' Diosen'. Nach gosa'aque' ja'aque' Berean' na' gosone' cont bene' Berea ca' lecze gosone' contr Pablon'. <sup>14</sup>Perw na' bene' Berea ca' chesejnilaže' Jesucriston' la' bososa'te' Pablon' gwyeje' cho'a nisdao'. Na' ca' nac Silasen' len Timoteon', legaque' besyega'ane' Berean'. <sup>15</sup>Na' to chop bene' Berean' ja'aque' jasesane' Pablon' ciuda dan' nzi' Atenas. Na' cate' besyeya'aque' jaya'aque' Berean' Pablon' gwsele' rson len legaque' cont Silasen' len Timoteon' lecze šja'aque' cate gan' zoe'na'.

**Pablon' bsd blo'ede' bene' Atenas ca'**

<sup>16</sup>Na' Pablon' šlac zoe' ciuda Atenasen' chbeze' žin Silasen' len Timoteon', gocchgüe' tole lo' yichjlažda'ogüe' da' ble'ede' da' zan l' gua'a lsaca' da' chesejnilaže' bene' ca'. <sup>17</sup>Da'n'an' bzejni'ide' bene' Israel ca' lo' yodao' chegaque'na' len yezica'chle bene' ca' chesonxene'

Diosen'. Na' yogo' ža gwyeje' ga chac ya'a je'e xtiža' Diosen' len bene' ca' že'na'. <sup>18</sup>Nach bene' ca' že'na' gwzolaos chesoelene' le' diža'. Baļe' chesejle'e dan' bzejni'i to bene' le' Epicuro, na' yebaļe' chesejle'e dan' bosozoj bene' ca' chesene' estoico. Na' baļe' gosene':

—ĶBin' chon ža benga?

Na' yebaļe' gosene':

—Chacljede' gwzejni'ide' chio' che no bene' cobe bene' šejnilaže'cho.

Gosene' ca' le Pablon' ba bzejni'ide' legaque' xtiža' Jesúsen' na' ba be'e diža' Jesúsen' bebane' ladjo bene' guat. <sup>19</sup>Nach goseche'e Pablon' to latje dan' nzi' Areópago gan' chesedobe bene' blao chegaque' cate' chosoxi'e bi da' chesone'. Nach gose'e Pablon':

—Che'neto' gwzejni'ido' neto' bi da' coben' dan' chsed chlo'edo'. <sup>20</sup>Bina' yenetu' diža' can' nac dan' cho'o nga na' chaclaže'to' nezeto' bi zejen yogo' da' ca'.

<sup>21</sup>Ca nac bene' Atenas ca', de costumbr chegaque' yogo' ža con chesaše' cheso'e diža' o chosozenague' che bi da' cobe da' de, na' lecz ca' cheson no bene' zito' že' Atenas.

<sup>22</sup>Nach Pablon' gwzeche' gachol legaque' gan' chesone' yela' güexi'a na' gože' legaque':

—Le'e bene' Atenas, chacbe'eda' leca chejnilaže'le zan l gua'a lsaca'.

<sup>23</sup>Cate' gwdia' tnez ble'eda' gan' chonxenle zan l gua'a lsaca', na' ble'eda' to latje gan' nyojen žan: “Che Xancho ben' nono nombia'.” Na' ca nac ben' chonxenle sin cbi nombia'lnē', che banan' chyixjue'eda' le'e.

<sup>24</sup>Dios ben' ben yežlion' na' yogo' da' de lagüe yežlion', len' chnabi'e yaban' len yežlion'. Bi chyažjde' yo'o da' chon benachen' cont soe' len chio'. <sup>25</sup>Bibi chyažje Diosen' gwnežjo benachen' le', na' bibi gac yesone' yesaclene' le'. Diosen' cho'e yela' mban che yogo'lol bene', cho'e legaque' biš grasyw na' cho'e legaque' yogo' bi da' zjanape'.

<sup>26</sup>Diosen' bene' bene' nechon', na' toz ca nac yogo' benach xi'in diaža che'. Na' bsi'e xneze bat nita' to toe' na' ga yesenite'. <sup>27</sup>Diosen' bnite' yogo' benachen' lo yežlion' cont yeseyiljue' nacle yesone' yesombi'ene' na' yesonxene'ne'. Na' da' li Diosen' bi zoe' zito' len to to chio'. <sup>28</sup>Le' chone' cont zoacho mbancho na' chdacho. Nac da' li can' gosena to chope bene' poeta chele ben' goso'e diža' xdan, gosene': “Naccho diaža che Diosen'.” <sup>29</sup>Na' dan' naccho diaža che Diosen' bi cheyaļa' goncho xbab nac Diosen' ca no l gua'a lsaca' de oro, de plata o de yej. Chesaljlaže' benachen' chesone' da' ca'. <sup>30</sup>Cani' Diosen' be'e latje goson benachen' con ca gwna xbab chegaque' yela' cbi chejni'i chegaque', perw ņa'a Diosen' chone' mandadw yogo'lol bene' že' doxen yežlion' yesebejyichje' da' malen' chesonen'. <sup>31</sup>Diosen' chaclaže' cuejyichjcho da' malen', le ba mbeje' Jesucriston' gone' yela' justis che yogo' benach na' gwnežjue' castigw che yogo' bene' cbi chesejnilaže' le', na' Diosen' zejcz'e to liča dan' gone' ca'. Na' Diosen' ba nžie' bia' bat gone' yela' justis che benach. Na' dan' bosban Diosen' Jesucriston' ladjo bene' guaten', nezecho

Jesucristwnan' gone' yela' justis che benachen'.

<sup>32</sup>Cate' bene' Atenas ca' beyož gosende' gwna Pablon' yesyeban bene' guat ca', bale' gosezi'diže' le' na' yebale' gose'ene':

—Na' gwzenagto' xtižon' yeto ža yoble.

<sup>33</sup>Can' goc beza' Pablon' latje gan' že' bene' ca'. <sup>34</sup>Perw bal' bene' Atenas ca' gosaque' Pablon' txen na' gosonxene' Jesucriston'. Na' bene' ca' gosaque' Pablon' txen len to bene' byo le Dionisio na' yeto no'ole le Dámáris. Na' Dionision' naque' txen len bene' gwnabia' ca' ben' cheson yela' güexi'a gan' nzi' Areópago.

#### Ca goc šlac zoa Pablon' Corinto

**18** Gwde goc da' ca', Pablon' beze'e ciuda Atenasen' na' gwyeje' ciuda gan' nzi' Corinto.

<sup>2</sup>Cate' bžine' Corinton' bežague' to bene' Israel le' Aquila bene' naque' bene' distritw Ponto, na' len no'ol che' ben' le Priscila. Za' besyežingale' Corinton' zeya'aque' nación Italia, le rey Claudio, ben' chnabia' ca' hora' doxen gan' mbane naciónna', bene' mandadw besyežaš yogo' bene' Israel ca' že' ciuda Roma. Nach Pablon' gwyeje' jane'e Aquilan' len Priscilan'. <sup>3</sup>Xšingaque' naquen chesone' yo'o de lache', na' toze ca' nac xšin Pablon'. Nach bega'ane' gosenite' txen na' gosone' žinna' txen. <sup>4</sup>Na' yogo' ža che Dios Pablon' gwyeje' yodao' che bene' Israel ca' jazejni'ide' legaque' che Jesucriston', cont bal' bene' Israel len bal' bene' bi zjanac bene' Israel yesejnilaže'ne'.

<sup>5</sup>Nach Silasen' len Timoteon' gwde gosa'aque' distritw Macedonian'

besežine' gan' zoa Pablon', na' cana'ch Pablon' bsane' xšinen' cont gota'ch latje gwduxjue'ede' xtiža' Jesúsen' na' bzejni'ide' bene' Israel ca' Jesucristwnan' naque' bene' chesebeze' seła' Diosen' yedenabile'.

<sup>6</sup>Perw bene' Israel ca' beseže'e Pablon' na' bosožie' yela' ya' che'. Nach Pablon' gwšibe' xe'na' cont blo'e chbejyichje' legaque', gwne': —Bibi doła' napa' dan' cuiayi'le toli' tocañe. Le'e naple doła'. Na' na'a šjased šjalo'eda' bene' ca' bi zjanac bene' Israel.

<sup>7</sup>Nach bechoje' lo' yodao'na' na' beze'e bežine' liž to bene' le Justo. Justo na'na' zoe' chonxene' Diosen' na' liže' zoan cuit yodao'na'.

<sup>8</sup>Na' to bene' le' Crispo naque' bene' gwnabia' che yodaon'. Na' Crispon' len yogo' bene' lo' yo'o che' gosaque' txen chesejle'e che Xancho Jesucriston'. Na' yezan bene' Corinto gosejle'e cate' gosende' xtiža' Jesucriston' da' choe' Pablon' na' gosezoe' nis. <sup>9</sup>Na' goc to že' Pablon' ble'edagüede' Xancho Jesucriston', che'ene':

—Bi žebo' Pablo. Gwzoateze be' xtižan' na' bi so' šize. <sup>10</sup>Neda' zoa' len le' na' bi goña' latje no gone' le' da' mal, le bene' zan že' lo' ciuda nga bene' chesonxene' neda'.

<sup>11</sup>Ca' goquen' bega'an Pablon' Corinton' tgüiz yogašje bsd blo'ede' legaque' xtiža' Diosen'.

<sup>12</sup>Na' ca' tiempen' ben' le Galión naque' gobernador distritw gan' nzi' Acaya. Nach bene' Israel ca' nita' ciuda Corinto bene' cbi chesonxen Jesucriston' gosaque' toze gosone' contr Pablon'. Na' goseche'ene' jasesane'ne' gan' chon gobernadoren'

yela' justisen'. <sup>13</sup>Na' cate' besežine'na' gose'e gubernadoren': —Benga chde' chgo'oyeje' bene' lo' yežen' yesone' bi da' cobe cont yesonxene' Diosen' na' da' chzejni'ide' goncho, bi zejen to li len ley chechon'.

<sup>14</sup>Bach zoa ne Pablon' cate' gubernador Galiónna' gože' bene' Israel ca':

—Ca nac xya dan' chagwle nga, šaca' naquen to da' xinj o to da' malchgua, gonan' yela' justis.

<sup>15</sup>Perw naquen che diža', na' che bene', na' che ley chelen'. Da'nan' le gwy'e nacle gonle. Bi co'o lo na' gona' yela' justis che dan' nac ca'.

<sup>16</sup>Nach bešaše' legaque' gan' chone' yela' justisen'. <sup>17</sup>Nach bene' ca' bi zjanac bene' Israel gosenize' Sóstenes ben' ba nac bene' gwnabia' che yodaon', gosot goseyine' le' lao gubernador Galiónna', perw bena' bibi cuent bene' legaque'.

#### **Pablon' beyeje' Antioquían' da' yoble**

<sup>18</sup>Na' bega'anch Pablon' ciuda Corinton' yezan ža beyož goc da' ca', na' cate' beze'ena' gože' bene' ca' chesonxen Jesucriston': “Nayežagcho”, nach beze'e txen len Priscilan' na' Aquilan'. Ja'aque' to yež da' nzi' Cencrea gan' bšib yichj Pablon' da' bach beyož bene' to da' gwlo'o cho'e lao Diosen' gone'. Na' beyožen' Pablon', Aquilan' na' Priscilan' besyeyo'e lo' barcw da' zej nación Siria. <sup>19</sup>Na' cate' besyežine' ciuda Efeson' besyechoje' lo' barcon', na' Priscilan' len Aquilan' besyega'ane' Efeson'. Na' Pablon' gwyeye' yodao' che bene' Israel ca' je'lene' bene' ca' ba zjandob na' xtiža'

Dios. <sup>20</sup>Na' bene' ca' že' lo' yodaon' gosata'yoede' le' yega'anche' len legaque', perw bi goclaze'. <sup>21</sup>Nach gože' legaque':

—Nayežagcho, le chonen byen soa' lni dan' šo' ciuda Jerusalénna', perw güidhcza' dena'a le'e yeto še Diosen' gone' latje.

Nach beze'e ciuda Efeson' na' beyo'e lo' barcon' zeyeje'. <sup>22</sup>Cate' bežine' ciuda Cesarean' bechoje' lo' barcon' na' gwyeye' Jerusalénna' na' bguape' tiox bene' ca' chesedop chesežag chesonxene' Jesucriston'. Nach beze'e beyeje' ciuda Antioquían'. <sup>23</sup>Gwde to tiemp zoe' Antioquían', nach gwze'e da' yoble gwyeye' to to yež dan' nita' distritw Galacia na' Frigia, bene' chach laže' bene' ca' chesonxene' Jesucriston'.

#### **Apolos gwdixjue'ede' xtiža' Diosen' ciuda Efeson'**

<sup>24</sup>Na' ca' tiemp na' bžin to bene' Israel ciuda Efeson' bene' le Apolos. Naque' bene' ciuda Alejandría. Le' chac cho'e diža' güen lao yogo' bene', na' ba nsede' binlo doxen Xtiža' Diosen' dan' nyoj. <sup>25</sup>Apolosen' chejle'e dan' bzejni'i Juanna' che Xancho Jesúsén' na' nezde' can' bzoe' bene' nis caten' besyetingde' xtoła'gaquen'. Na' Apolosen' be'e diža' do yichj do laže' bzejni'ide' binlo che Jesúsén', la'czla' con dan' bsd blo'e da' Juan na'zen' nezde'. <sup>26</sup>Nach Apolosen' gwzolao be'e diža' che Xancho Jesucriston' lo' yodao' che bene' Israel ca' sin cbi chaž chžebe'. Na' cate' Priscilan' na' Aquilan' gosende' can' chzejni'i Apolosen', legaque' gosebejiže' le' na' bosozejni'ichde' le' che Jesucriston'

da' ca' bīna' neẓde'. <sup>27</sup>Gwdena' cate' Apolosen' bene' xbab šeje' distritw gan' nzi' Acaya, beṇe' Efeso ca' chesonxen Jesucriston' gose'e le' chone' güen dan' šeje' na' bosozoje' to cart da' beṅue' che beṇe' ca' chesonxen Jesucriston' distritw Acaya cont beṇe' ca' bosolebe' le'. Na' Diosen' nži'ilaže' beṇe' Acaya ca' na' ba goclene' zane' cont chesejnilaže' Xancho Jesucriston'. Na' cate' bžin Apolosen' Acayan' be'lene' legaque' diža' da' goclenchguan legaque'. <sup>28</sup>Bzejni'ide' yogo'loḷ bene' gože'ne' celen' cheson beṇe' Israel gualaž chen' bi chesejle'e che Jesús'en'. Bzejni'ide' legaque' can' nyoj Xtiža' Diosen' žan Jesús'en' naque' Cristo ben' chesebeze' yedenabi'e.

#### Šlac gwzoa Pablon' ciuda Efeson'

**19** Na' šlac zoa Apolosen' ciuda Corinto, Pablon' beze'e bedie' yež ca' zjachi' do ya'adao' na' bežinte' ciuda Efeson'. Efeson' bežague' baḷ beṇe' chesonxene' Jesucriston'. <sup>2</sup>Na' gože' legaque': —čZedesoa Spiritw che Diosen' lo' yichjlažda'olen' caten' gwzolač chejnilaže'le Jesucriston'?

Nach gose'e le':

—Bi nezeto' še zoa Spiritw che Diosen'.

<sup>3</sup>Nach Pablon' goze'e legaque':

—čBi dižan' chejle'le da' gwzoale nisen' še ca'?

Nach gose'e le':

—Gwzoato' nis can' bzejni'i da' Juanna'.

<sup>4</sup>Nach gož Pablon' legaque':

—Da' Juanna' bzoe' bene' nis cate' besyetenje xtoḷa'gaque' na' lecze gože' legaque' cheyaḷa' yesonxene'

beno' za' seḷa' Diosen'. Na' da' gwne' ca' be'e diža' che Jesucriston'.

<sup>5</sup>Beyož bosozenague' can' gwna Pablon' nach gosezoe' nisa' da' yoble cont bosolo'e da' li chesejnilaže' Xancho Jesús'en'. <sup>6</sup>Nach Pablon' gwṅoa ne'ena' yichj to toe' na' Spiritw che Diosen' gwzoan lo' yichjlaždao' to toe', nach gosene' diža' da' cbi chesejni'ide' na' goseyixjue'ede' bi dan' gož Diosen' legaque'. <sup>7</sup>Na' yogo' beṇe' ca' zjanac ca do šižinue'.

<sup>8</sup>Na' do šone bio' Pablon' bsed blo'ede' beṇe' ca' chesedop chesežag lo' yodao' che beṇe' Israel ca' dan' zoa Efeson'. Bi bžebe', na' bzejni'ide' legaque' na' gwneyoede' legaque' yeson cuingaque' lo na' Diosen' cont nabi'e legaque' len xbab chegaquen'. <sup>9</sup>Na' bchoj baḷ beṇe' güedenag beṇe' cbi chesejle'cze', na' lao beṇe' ca' že' yodao'na' gosene' diža' ya' che xtiža' Jesucriston' dan' chzejni'i Pablon'. Da'nana' Pablon' bechoje' gan' že' beṇe' ca' na' bebeje' ben' ba chesonxene' Jesús'riston' na' gwche'e legaque' gan' zoa to yo'o xen che to beṇe' le' Tiranno na' bzejni'ide' legaque' yogo' ža. <sup>10</sup>Na' gwzoa Pablon' chop iz bzejni'ide' beṇe' ca', na' can' goc, yogo' beṇe' že' distritw Asia gosende' xtiža' Xancho Jesús'en', beṇe' zjanac beṇe' Israel lente beṇe' bi zjanac beṇe' Israel. <sup>11</sup>Na' Diosen' bchine' Pablon' cont bene' yela' guac da' besyebanchgüe beṇe'. <sup>12</sup>Na' jasesane' no bay no lache' da' ba bchelen Pablon' gan' zjade beṇe' güe' na' la' chesyeyactede' bi yižgüe' chese'ede', na' beṇe' ca' yo'o nyaz da' xigüe' yichjlažda'ogaque'na' lecze besyechojen.



<sup>13</sup>Łecze chesaš baĭ bene' Israel chesybeje' da' xigüe' da' zjajo'o lo' yichĭlaždao' bene' na' gosacĭaže' yosoĭhine' la Xancho Jesúsen' cont yesybeje' da' xigüe' ca', nach gose'e da' xigüen':

—Len yela' chnabia' che Jesúsen' ben' choe' Pablon' xtiže'na' chonto' mandawd yechojle.

<sup>14</sup>Na' zoa to bĭox gwnabia' che bene' Israel le' Esceva, na' nita' gaže xi'ine'. Na' bene' quingan' bosocĭhine' la Jesúsen' gosacĭaže' yesybeje' da' xigüen'. <sup>15</sup>Nach goc to šlas chesone' ca' cate' to da' xigüen' boži'in xtižen', gožen ĩegaque':

—Nombi'a Jesúsen' na' ba benda' diža' che Pablon', perw bi nombi'a le'e cont šejli'a xtiža'len'.

<sup>16</sup>Nach bena' yo'o nyaz da' xigüen' bxite' gwĭize' bene' ca' betlate' ĩegaque' na' gwĭeze' xalana'gaque'. Nach bosyoxonje' liž bena' ga'alyide' na' bedo chen zjanaque' dan' bene' ĩegaque' zi'. <sup>17</sup>Na' goslas diža' can' goquen' gosenezete yogo' bene' že' Efeson', bene' Israel lente bene' cbi zjanac bene' Israel. Nach yogüe' besežebe' na' gosacbe'ede' Xancho Jesúsen' naque' bene' zaque'.

<sup>18</sup>Nach bene' zan ba chesejle'e xtiža' Xancho Jesúsen', na' zane' gosexoadole' lao bene' ca' chesedop chesežag chesonxene' Jesucriston' cheso'e diža' che da' malen' ba gosone'. <sup>19</sup>Na' bene' ca' gosac bene' guaža' na' bene' güene' ya'a bosyotob libr chegaquen' na' gosoxen' bosozeyen' lao bene' ĩježe' bene' chesonxene' Jesucriston'. Na' besybeje' cuent ca do gacate' zaca' libr ca' na' bžinen šiyon mil mechw plata, na' to to mechw plata

ca' zacan' do tža žin. <sup>20</sup>Can' goc, bene' zan gosende' xtiža' Xancho Jesucriston', na' gwyanch bene' bosozenague' che'.

<sup>21</sup>Nach gwde goc da' ca' Pablon' bene' xbab yeyeje' Jerusalenna', na' gocĭaže' yedie' šjayne'e bene' ca' že' yež gan' mbane distritw Macedonia len Acaya. Nach bene' xbab yeyož yeyeje' Jerusalenna' ĩecze cheyalā' šejje' ciuda Roma. <sup>22</sup>Na' gwleje' chope bene' chesonlene' ĩe' xšin Diosen' na' gwsele' ĩegaque' distritw Macedonian', zjale' Timoteo na' Erasto, perw na' ĩe' bega'anche' distritw Asian' yeto chope ža.

**Bene' ca' besegue'ede' Pablon' gosebecĭgüe' da' zed ciuda Efeson'**

<sup>23</sup>Na' gwche' to da' zed gual ciuda Efeson', ĩe nita' bene' beseže'e xtiža' Jesúsen' dan' bsed blo'e Pablon'.

<sup>24</sup>Quinga goc: gwzoa to bene' le' Demetrio bene' chon yodao' dao' de plata da' naquen ca nac yodao' gan' zoa xonax Diana ben' chesonxene'. Na' bene' ca' gosonlene' žinna' gosonchgüe' gan, ĩe gwda'ochguan. <sup>25</sup>Nach btobe' bene' ca' goson žin txen len ĩe' na' nochle bene' goson žin dan' nac ca', na' gože' ĩegaque':

—Nezele ca nac žin dan' nlancho choncho nga, chonlenchon gan xen. <sup>26</sup>Na' ba beneczele na' ba ble'eczele can' chon to bene' le' Pablo chsed chlo'ede' bene' ĩo ciuda Efeso checho nga na' ĩecze chsed chlo'ede' zan bene' že' doxen distritw Asia nga, che'e ĩegaque' bibi zaca' ĩ gua'a ĩsaca' da' cheson benachen' cont chesejnilažen'. Na' bene' zan ba chosozenague' che' na' chesebejyichje' dan' chejnilaže'cho.

<sup>27</sup>Le gonšc xbab nacle goncho, le xož yesene' che žin dan' choncho nga, na' gague lezen, san lecze xož yesone' cont yodao' che xonax Diana chechon' yega'anen ca to da' bibi zaca' na' len yela' chze na' yela' zaca' che xonaxen'. Na' nezele ca nac xonax Diana chechon', yogo'cze bene' distritw Asia nga na' bene' gate'tezechle chesonxene' le'.

<sup>28</sup>Beyož gosende' xtiža' Demetrimon' beselocchgüe' na' bososye'e gosene':

—Leca bene' zaca' xonax Diana che chio' bene' Efeso.

<sup>29</sup>Nach gwche' da' zed doxen lo ciudan', na' gosaque' toze' jasenize' chope bene' distritw Macedonia bene' gosaque' txen len Pablon', toe' le Gayo na' yetoe' Aristarco. Na' gosexobe' legaque' besežine' gan' chesedobe yogo' bene' lo ciudan'.

<sup>30</sup>Na' Pablon' goclaze' šo'e gan' zjandobe bene' ca' cont güe'lene' legaque' diža', perw bene' ca' chesonxene' Jesucriston' lo ciudan' bi goso'e latje šo'e. <sup>31</sup>Ba| bene' zjanaque' bene' gwnabia' distritwna' zjanac xmigw Pablon' na' lecze gosesele' rson gose'e Pablon' bi šeje' gan' zjandobe bene' ca'. <sup>32</sup>Na' bene' ca' zjandoben' gosone' sšag juisyw. Gwde gwdele bososya'a to toe'. Na' bene' zan bi zjanezde' bichen' zjandobe'na'. <sup>33</sup>Bene' Israel ca' bosožigue' to bene' le Alejandro lao bene' ca' že'na' cont be'lene' legaque' diža', na' bosozejni'ide' le' bin' cheyala' ne'. Na' Alejandron' gw|lis ne'e cont gwnabe' nite' šize yosozenague' diža' dan' güe'e laogaquen' gwzoe' rson che bene' ca' chesejnilaže' Jesucriston'. <sup>34</sup>Perw cate' besele'ede' le' gosacbe'ede'

lecze naque' bene' Israel, na' besyezolagüe' da' yoble bososye'e, gosene':

—Bene' zaca' juisyw xonax Diana che chio' bene' Efeso.

Ca do chop hor bososye'e ca' da' bi chesonxen bene' Israelen' xonax chegaquen'.

<sup>35</sup>Na' bene' güezoj chegaquen' cane' goc bebecžie' legaque'. Na' gože'ne':

—Le'e bene' gualaž, yogo' bene' že' doxen yežlion' zjanezde' naquen checho gapši'icho yodao' che xonax Dianan'. Naque' bene' zaque', le | gua'a |saca' chen' blažon' le'e yaba.

<sup>36</sup>Na' nono gac na' da' yoble. Da'nan' le soa šize na' bich gonle da' bi zejen. <sup>37</sup>Na' ca' nac bene' quinga nche'ele nga, bibi na' yesebane' lo' yodao' checho ca' na' neca' nacho chosožie' yela' ya' che xonax Diana chechon'. <sup>38</sup>Na' Demetrio nga len yezica'chle bene' lježe', še chac bi chac chegaque' len bene' yoble, nita' bene' gwnabia' chechon' cont yesone' yela' justis chegaquen', con šja'aque' yeso'e legaque' part še ca'. <sup>39</sup>Na' še bichle da' chnable gac, cheyala' goncho to yela' güexi'a cont choglaon. <sup>40</sup>Perw ca' nac žaš da' nga chac na'a, xož baga'cho choncho contr gobiern can' že'cho nga, na' bibi de ye'gacchone' še yesenabe' bixchen' goc žaš da' nga chac na'a.

<sup>41</sup>Beyož gože' legaque' ca' bene' mandaw besyežaše'.

#### Pablon' gwyejche' distritw Macedonia na' nación Grecia

**20** Nach cate' beyož gwche'ži da' zeden', Pablon' goxe' bene' Efeso ca' chesonxen

Jesucriston' cont ja'aque' gan' zoe'na' na' bene' chach laže'gaque' cont yesenite' yesejnilaže' Jesucriston'. Nach gože' legaque': "Nayežagcho", na' goseyela' lježe' na' beze'e beyeje' da' yoble distritw Macedonia. <sup>2</sup>Na' gwdie' to to yež da' zjachi' gała'ze Macedonian' bene' chach laže' bene' ca' chesonxene' Jesucriston', na' beyožen' gwyejche' nación da' nzi' Grecia. <sup>3</sup>Na' gwzoe' Grecian' šon bio'. Na' cate' bžin ža yeze'e, ba zoa yeyo'e lo' barcon' yeyeje' distritw Siria gan' nac laže' cate' gwneзде' zjachi'nao' bene' Israel ca' le'. Da'nan' bene' xbab yeza' ni'e yedie' gan' mbane distritw Macedonia na'le. <sup>4-5</sup>Na' xonj bene' ja'aque' ciuda da' nzi' Troas gan' gosebeze' Pablon' len neda' Lucas, na' gosa'aclene' neto' distritw Asia. Quinga zjale bene' ca': Sópater, bene' yež Berea, na' Aristarco len Segundo ben' zjanac bene' ciuda Tesalónica, na' Gayo bene' yež Derbe, na' Timoteon' na' chope bene' za'ac distritw Asia, Tíquico len Trófimo. <sup>6</sup>Na' gwde ĩnin' cate' chesagüe' yetextil da' bibi levadura nchixen, neda' len Pablon' gwza'to' Filiposen' na' goc gayo' ža cate' bžinto' ciuda Troas gan' ba nita' bene' ca' chesebeze' neto', nach gwzoato' na'ze gaže ža.

#### Can' goc šlac zoa Pablon' Troas

<sup>7</sup>Na' cate' bžin ža dmigw besedobe bene' ca' chesonxene' Jesucriston' lo' ciuda Troasen' na' gwyejto' güe'ej gwdagwto' txen len legaque', na' Pablon' bzejni'ide' legaque' xtiza' Diosen'. Na' dan' ba zoa yeza' Pablon' ca' gwxeze nach be'e diža' bžinte do chel. <sup>8</sup>Na'

yogo'to' ndop nžagto' to lo' yo'o de šon cuia, yo'oto' lo' cuarten' dan' zoa yichjen cha'te, na' zjaze da' zan yi' lámpara. <sup>9</sup>Na' to bi' güego' lebe' Eutico žiabe' cho'a ventan. Na' Pablon' ton' zej diža' dan' cho'ena' na' gwtas bi'na' gan' žiabe' cho'a ventanna'. Na' šlac chtasbe' blažo'be' lo' yo' che'ele. Nach cate' besyecose'be' bi' guat besyecose'. <sup>10</sup>Nach Pablon' betje' bžine' gan' jasyedixjue'eben' na' bcheque' lao bi' guata' gwdele'be'. Nach gože' bene' ca':

—Bi žeble, mbanczbe'.

<sup>11</sup>Nach Pablon' begüe' da' yoble na' gosagüe' na' bezolagüe' cheyo'e diža' len legaque'. Ne' choe'te' dižan' ca' cate' gwyeni'. Nach beze'e.

<sup>12</sup>Nach bi'na' blažo' cho'a ventanna', bene' ca' že'na' besyeche'ebe' besyebchgüede' dan' mbanczbe'.

#### Gosa'aque' ciuda Troasen' na' ja'aque' ciuda Mileto

<sup>13-14</sup>Nach bxi'ato' len Pablon' neto' bebialaoto' beyejto' lo' barcw bežinteto' ciuda gan' nzi' Asón na' Pablon' gwyazlaže'che' begüe'e nez bela'te' Asónna' cont gwyo'e lo' barcon' txen len neto'. Nach gwyejto' ciuda gan' nzi' Mitilene. <sup>15</sup>Bezsa'to' Mitilenen' na' beteyo bežinto' gała'ze to yežlio da' chi' lo' nisaon' gan' nzi' Quío. Na' gwde yeto ža bežinto' gan' chi' yeto yežlio lo' nisaon' da' nzi' Samos. Na' bechojto' lo' barcon' gwyejto' yež dan' nzi' Trogilio gan' bega'anto' tže' bezil'laže'to'. Nach beteyo bezyo'oto' lo' barcon' na' bežinto' ciuda Mileto. <sup>16</sup>Ca' bento' bi' gwdeto' ciuda Efeson', le Pablon' bi' goclaže' šede'

yež ca' zjachi' do distritw Asian'.  
Chacbyende' yob žine' Jerusalénna'  
še gała' soe' na' ža lni dan' nzi'  
Pentecostés.

**Pablon' bšaljlene' beņe' chosogüia  
chesene'e beņe' ca' chesonxen  
Jesucriston' Efeson'**

<sup>17</sup>Na' šlac zoato' ciuda da'  
nzi' Mileto Pablon' goxe' beņe'  
Efeson' beņe' chosogüia chesene'e  
yezica'chle beņe' ca' chesonxene'  
Jesucriston'. <sup>18</sup>Na' cate' besela'aque'  
Pablon' gože' legaque':

—Nezele can' bena' caten' gwzoa'  
distritw Asia gan' zoa lažlen',  
bena' da' güen šlac gwzoa' len  
le'e gwzolaotia' ža nechw žan'  
bžina' na'. <sup>19</sup>Gwzoa' bena' xšin  
Diosen' na' bi benxen cuina'. Zan  
ni'a gwchežchgua' chele. Na' da'  
zan da' bosochi bososaca' beņe'  
Israel ca' neda'. <sup>20</sup>Bzejni'ida' le'e  
yogo' dan' byažje šejni'ile, neca  
bezi'laža', bzejni'ida' le'e do gan'  
chdop chžagle na' len liž to tole.  
<sup>21</sup>Bzejni'ida' beņe' zjanac beņe'  
Israel gualaž chia' lente beņe' cbi  
zjanac beņe' Israel can' chaclaže'  
Diosen' yesyetinje xtoła'gaquen' na'  
yesejnilaže' Xancho Jesucriston'.  
<sup>22</sup>Na' na'a yeya'a Jerusalén, le  
Spiritw che Diosen' chonen byen  
yeya'a, na' bi nezda' bin' gac chia'  
yežina' na'. <sup>23</sup>Con nezda' to to yež  
gan' ba bedia' Spiritw che Diosen'  
ba bzejni'in neda' doła' gata' ližya  
na' gac bichle da' saca'zi'a. <sup>24</sup>Perw  
bi chi' yichja' che da' ca' saca'zi'a.  
Laczla' še yesote' neda', chzanda'  
yela' mban chia'. Toze da' chi' yichja'  
šalao gona' yogo' dan' gwlo' Xancho  
Jesucriston' lo na' gona', na' soa'

mbalaz lo' yichjlažda'oguan' šlac  
chonan', le Xanchona' gwleje' neda'  
cont chyixjue'eda' diža' catequen'  
nži'ilaže' Diosen' beņachen'.

<sup>25</sup>'Ca nac le'e, ba bzejni'ida' le'e  
che yela' chnabia' che Diosen',  
perw na'a ne tole bich le'ele neda'.  
<sup>26</sup>Da'nan' chnia' le'e bibi doła' napa'  
še nole cuiayi'. <sup>27</sup>Bač bzejni'ida'  
le'e yogo' dan' chaclaže' Diosen'  
nezele, bibi bcuaša'. <sup>28</sup>Da'nan'  
cheyala' cuec yichjle che yogo'loł  
dan' ba bzejni'ida' le'e na' lecze ca'  
le gwsed le gwlo'e yezica'chle beņe'  
chesedop chesežag chesonxene'  
Xancho Jesucriston' cont  
yosozenague' che dan' ba bzejni'ida'.  
Le gon ca' le Spiritw che Diosen'  
ba gwlejen le'e cont gwzejni'ile  
yezica'chle beņe' chesonxene'ne'.  
Jesucriston' bnežyw cuine' bedelałj  
xchene' beque'e xtoła'chon' cont  
bozoe' chio' binlo len Diosen' da'  
yoble. <sup>29</sup>Nezda' cate' bich zoa'  
len le'e yesela'ac beņe' yese'nde'  
yesexoayague' le'e cont cuejyichjle  
bich gwzenagle che Jesucriston'.  
<sup>30</sup>Ladjw le'e yesechoj beņe' yososed  
yosolo'ede' diža' güenlaže' gualaz da'  
yososed yosolo'ede' diža' li. Yesone'  
ca' cont ga'ole dan' yososed yosolo'e  
legaque'. <sup>31</sup>Da'nan' le gwsaca'  
cont nono yesexoayag le'e. Na' le  
gon xbab, le šon izen' ba gwzoa'  
bzejni'ida' le'e na' gwneyoeda' le'e  
do ža do yel gwchežtia' chele.

<sup>32</sup>'Na' na'a beņe' migw,  
Diosen' gaclene' le'e na' xtiže'na'  
gwzejni'ichen can' chacde' le'e.  
Na' xtiže'na' gaclenen le'e cont  
šjayzoalenle Diosen' txen len  
yezica'chle beņe' ba gwlej Diosen'  
zjanaque' lo ne'e. <sup>33</sup>Bi chzelaža' bi

da' de che bene', neca chzelaža'  
xmechwgaque' na' neca xagaque'.  
<sup>34</sup>Nezczele can' bená' žin cont bžel  
 da' byažjda' len da' beseyažje bene'  
 ca' gosenite' len neda'. <sup>35</sup>Na' bená'  
žinna' ca' cont blo'eda' le'e cheyala'  
gaclencho bene' še bi cheseyažjde'.  
 Na' šjasa'laže'le can' gwna Xancho  
Jesúsen': “Mbalazech zoacho caten'  
chnežjwcho bi dan' chnežjwcho  
bene' clél ca caten' chesone' chío' bi  
dan' chesone' chío'.”

<sup>36</sup>Na' beyož be' Pablon' dižan'  
 nach bzoa xiben' txen len yogo'  
bene' ca' na' bosoł güiže' Diosen'.  
<sup>37</sup>Na' yogo'lole' gosebeže' che  
Pablon' na' goseyele' le' na'  
bosonope' ne'ena'. <sup>38</sup>Nach gosa'aque'  
 len neto' bžinteto' gan' beyo'oto' lo'  
barcon'. Da' juisyw gosacde' dan'  
gože' legaque' bich yesele'ede' le'.

### Pablon' beyeje' Jerusalén

**21** Beyož bze diža' lježto' len  
bene' ca' nach beyo'oto' lo'  
barcon' na' zjaydato' licha bžinteto'  
gan' chi' to yežlio lo' nisdan' da'  
nzi' Cos, na' beteyon' bežinto' gan'  
chi' yeto yežlio lo' nisdan' da' nzi'  
Rodas, nach bezsa'to' bezžinto'  
ciuda Pátara. <sup>2</sup>Na' cate' bežinto'  
Pátaran' bželetó' yeto barcw dan'  
chzan' šejen distritw Fenicia, na'  
beyo'oto' lo'enna'. <sup>3</sup>Na' ba zjaydato'  
lo' barcon' cate' ble'to' yežlio dan'  
chi' lo' nisdan' dan' nzi' Chipre, chin'  
šla'a rovesle. Nach bedeto' zjaydato'  
gan' mbane distritw Siria. Nach  
cate' bezžinto' ciuda gan' nzi' Tiro  
besyeletje' yo'a' da' zonsa' barcon'  
na' neto' bechojto' lo' barcon'. <sup>4</sup>Na'  
jaydiljwto' bene' ca' chesonxene'  
Jesucriston' Tiron' na' bega'anlento'

legaque' to xman. Na' Spiritw  
che Diosen' bzenen legaque' cont  
gosata'yoede' Pablon' bi šeje' ciuda  
Jerusalénna'. <sup>5</sup>Perw na' cate' ba  
gwde to xman beza'to', na' yogiue'  
len xi'ingaque' len xo'olgaque'  
gosa'aque' len neto' cho'a yežen' na'  
bzoa xibto' len legaque' boł güižto'  
Diosen' cho'a nisdan'. <sup>6</sup>Beyožen'  
bze diža' lježto' na' gwdeła' lježto',  
nach beyo'oto' lo' barcon' na'  
legaque' besyeya'aque' zjaya'ac  
ližgaque'.

<sup>7</sup>Na' beza'to' ciuda Tiron' bežinto'  
gan' že' ciuda Tolemada. Nach  
beyetjto' lo' barcon' jayna'to' bene'  
ca' chesonxene' Jesucriston' lo'  
ciuda Tolemáidan' na' bega'anlento'  
legaque' tža. <sup>8</sup>Na' beteyo beza'lento'  
Pablon' na' bežinto' Cesarean' na'  
jayga'anto' liž Felipe ben' naque'  
txen len bene' ca' yexop ben'  
chesaclene' postlw ca' len žin bixjw  
da' gota'. Na' Felipen' zoateze' cho'e  
diža' che Jesucriston'. <sup>9</sup>Felipen'  
nita' tap xi'ine' no'ol güego' na'  
chosozende' bene' bi dan' ba gož  
Diosen' legaque'. <sup>10</sup>Zan ža ba  
gwzoato' liž Felipen' cate' bla' to  
bene' distritw Judean' bene' le  
Agabo, lecze chaque' chzende' bene'  
bi dan' ba gož Diosen' le'. <sup>11</sup>Nach  
Agabon' gwnabe' xpant Pablon' na'  
bchejen' ni'a ne'e, na' gože' neto':  
 —Spiritw che Diosen' ba bzenen  
neda' bene' Israel ca' že' Jerusalénna'  
yosocheje' ni'a na' ben' nac che' bant  
nga na' yesone' le' lo na' bene' ca' bi  
zjanac bene' Israel.

<sup>12</sup>Cate' beyož beneto' can' gwna  
Agabon', neto' len bene' Cesarea  
ca' gota'yoeto' Pablon' bi šeje'  
Jerusalénna'. <sup>13</sup>Nach Pablon' gwne':

—Bi cuežle chia' o gonle ga soayaša'. Chzane cuina' yosocheje' neda' na' yesote' neda' Jerusalénna' dan' chyixjue'eda' xtiža' Xancho Jesúsén'.

<sup>14</sup>Na' cate' gocbe'eto' bibi gac gonto' cont cbi šeje' ciuda Jerusalénna', nach bich bi gožto'ne', con gwnato':

—Gac con can' ža Xancho'.

<sup>15</sup>Nach bsin'ato' beza'to' zjaydato' Jerusalén'. <sup>16</sup>Na' to chope bene' Cesarean' bene' chesonxen Jesucriston' gosa'aque' txen len neto', na' goseche'e neto' liž to bene' le Mnasón. Bena' ba goc sša chonxene' Jesucriston'. Naque' bene' Chipre, perw ba zoa liže' Jerusalénna'. Na' ba bosoxi'e soato' liže'na'.

**Pablon' bežine' Jerusalénna'  
jane'e Jacobon'**

<sup>17</sup>Na' cate' bežinto' ciuda Jerusalénna' bene' lježto' ca' že'na' besyebede' bosoguape' neto' tiox. <sup>18</sup>Na' beteyo gwyejlento' Pablon' jana'to' Jacobon', na' bžinto'na' ba zjandop zjanžag yogo' bene' blaoben' chosogüia chesene'e yezica'chle bene' ca' chesonxene' Jesucriston' na'. <sup>19</sup>Nach Pablon' bguape' legaque' tiox na' beyožen' be'lene' legaque' diža' doxen can' ba ben Diosen', le zan bene' bi zjanac bene' Israel ba chesonxene' Jesucriston' gan' ba gwyeje' je'lene' legaque' xtiža' Diosen'. <sup>20</sup>Na' cate' bosozenague' dan' gož Pablon' legaque', nach gosoe' yela' choxclen che Diosen' na' gose'e Pablon':

—Bene' migw, nezdo' zan mil bene' Israel gualaž checho ca' ba chesonxene' Jesucriston' na' yogüe'

chesacde' chonen byen goncho yogo' da' ca' zjanyoj le'e ley chechon' dan' bzoj Moisés. <sup>21</sup>Na' zane' ba zjanende' chsed chlo'edo' bene' Israel gualaž chechon' nita' laž bene' zito' bich cheyala' yesone' can' ža le'e ley chechon' na' bi yesezoa' xi'ingaque' ca' señw dan' že' circuncisión.

<sup>22</sup>¿Nacxe ye'to' legaque'? le zane' yesežag nga cate' yesende' bach zo' nga da' yoble. <sup>23</sup>Güen goncho quinga: nita' tap bene' nga bene' zoa to da' zjango'o cho'en lao Diosen' na' chesaclaže' yesone' can' gosenen'. <sup>24</sup>Na' cheyala' chi'o legaque' yodao' blaon' na' gono'ne' txen chixjo' beyixe' ca' gwnežjwle bxozen' gote' cont yexi' yeyachle can' ža leyna'. Na' yeyožen' gac yosošib yichjgaque' can' zjango'o cho'en. Gono' ca' len legaque' cont yogo' bene' yesacbe'ede' bi chzo' ley chechon' to šla'ale can' chesenen', san chono' can' žanna'. <sup>25</sup>Na' ca' nac bene' ca' bi zjanac bene' Israel bene' ca' chesonxene' Jesucriston' yež yoble, ba bzojto' legaque' can' nac yela' güexi'a chechon', gožto'ne' bi yesagüe' yela' guagw dan' chesene' naquen che l gua'a lsacan' chesejnilaže' bene', na' bi yesagüe' chen, na' bi yesagüe' be chat chosošoque' lba'ba', lecze bi yesata'lene' no'ole bi nac xo'olgaque' o bene' byo bi nac bene' chegaque'.

**Gosezene' Pablon' yodao' blaona'**

<sup>26</sup>Beteyo gwza' Pablon' gwche' bene' ca' tap cont yesyexi yesyeyache' yodao' blaona' can' ža' ley chegaque'na'. Nach Pablon' gwyo'e gana' zoa bxozen' gwduxjue'ede' le' bi ža yanen' yeyož

yesaque' xi'laže' cont yosonežjue' beyixe' ca' gote' che to to legaque'.

<sup>27</sup>Bač zoa gac gaže ža chesone' can' ža leyna' cont chesyexi chesyeyache', nach gozej Pablon' lo' yodao' blaona'. Na' ba<sub>1</sub> bene' Israel ca' za'ac distritw Asian' besele'ede' le' lo' yodaon' na' gosego'oyele' bene' že' do na' cont yesezene' Pablon'.

<sup>28</sup>Bososya'adie', gosene':

—Le'e bene' gualaž, le gon txen sencho benga. Chde' doxen chsed chlo'ede' contr yež Israel chechon', na' contr ley chechon' dan' bzoj da' Moisésen', na' contr yodao' checho nga. Na' na'a ba none' yeto da' mal juisyw contr yodao' dan' nac che Dios chechon', ba gwlo'e bene' bi zjanac bene' Israel lo'en<sub>na</sub>'.

<sup>29</sup>Gosene' ca' neče da' besele'ede' Pablon' lo' ciudan' chdalene' to bene' ciuda Efeso le' Trófimo, na' gosacde' še Pablonan' gwče'e le' lo' yodao'na', la'czla' bi bene' ca'.

<sup>30</sup>Na' gosonchgüe' to žašyey. La' besedobte bene' zan cho'a yodaon' na' goso'e lo' yodaon' gosenize' Pablon', besyebeje' le' na' la' bosyosejwte' puert ca'. <sup>31</sup>Na' ba zoa yesote' le' cate' gwneze ben' yo'o lo ne'e soldadw che nación Roma ben' že' lo' ciudan'. Cate' gwnezde' ba chac to žašyey juisyw doxen ciudan', <sup>32</sup>nach btobe' soldadw ca' len bene' gwnabia' chegaque' ca', na' gosa'aque' zja'acsese' gan' chi' da' zeda'. Na' cate' bene' ca' chesote' Pablon' besele'ede' ba besežin soldadw ca' len bene' gwnabia' chegaque' ca', la' gosebezte' bich goseyine' Pablon'. <sup>33</sup>Cate' ben' yo'o lo' ne'e yogo' soldadon' bžine' gan' že' bene' ca', na' bene' mandadw

gosoxe' soldadw che' ca' Pablon' na' bosocheje' le' chope gden. Nach gw<sub>n</sub>abde' bene' ca' že'na' no nac Pablon' na' bi bene'. <sup>34</sup>Na' bene' ca' že'na' bososya'adie', gwde gwdele chesena to toe'. Na' gwde cbi gwyejni'i ben' yo'o lo' ne'e soldadw ca' bin' chac catec sšag chesone', nach bene' mandadw goseče'e Pablon' cuartel. <sup>35-36</sup>Nach yogo' bene' ca' zjana'ogüe' legaque' chesosye'e zjambeque' to žaš juisyw. Na' cate' besežine' cho'a nepe' che cuartelen' goselen soldadw ca' Pablon' neče dan' chesaclaže' bene' ca' yesenize' le', na' yogo' bene' ca' chesosye'e, chesene':

—Le gote'.

**Pablon' be'lene' bene' zan ca' diža'**

<sup>37</sup>Bač cheso'e lo' cuartelen' cate' Pablon' gože' ben' yo'o lo' ne'e soldadw ca':

—¿Gono' latje gua' to chope diža'?

Nach bena' gože'ne':

—¿Chaco' diža' griego? <sup>38</sup>¿Bi naco' bene' nación Egipto ben' gwda btob tap mil bene' güet bene' bat ngaze na' gwče'e legaque' latje dašen' gan' chesone' contr gobiernen'?

<sup>39</sup>Nach Pablon' gože'ne':

—Gague benan' neda'. Neda' naca' to bene' Israel na' ciuda blao gan' mbane distritw Cilician' dan' nzi' Tarso nac laža'. Ben goclen ben latje güe'lena' bene' quinga diža'.

<sup>40</sup>Nach bena' bnežjue' latje. Nach Pablon' gwzeche' lo nepen' bene' señw len ne'e cont bene' ca' že'na' gosenite' šize bosozenague' che'. Nach gwzologüe' be'e diža' len legaque' diža' hebreo.



**22** Gože' legaque':  
—Beñe' gole len beñe'  
xcuide', le gwzenag diža' dan' gua'  
laole nga.

<sup>2</sup>Na' cate' gosacbe'ede' chñe'  
legaque' diža' hebreo gosenite' šize.  
Nach Pablon' gože' legaque':

<sup>3</sup>—Neda' naca' beñe' Israel.  
Golja' ciuda Tarso gan' mbane  
distritw Cilicia, perw gwcha'ogua'  
ciuda Jerusalén ni. Na' bseda' len  
maestrw blao ben' le Gamaliel.  
Bzejni'ide' neda' doxen can' ža ley  
che da' xoxzta'ocho ca'. Na' godca'  
chonchgua' can' chazlaže' Diosen',  
cayanen' chaque le'e za'acle nga  
na'a. <sup>4</sup>Na' bchi bsaca' zan beñe' ca'  
chesejnilaže' Jesucriston', goclaza'  
gotto' legaque'. Na' gwxena' no  
beñe' byo na' no no'ole chesonxene'  
le' na' gwche'egaca'ne' ližya. <sup>5</sup>Bxoz  
ben' naquech beñe' blao na' nochle  
beñe' gole blao ca' chesenabia'  
nación Israel chechon' zjanezde'  
can' bena'. Legaque' gosone' yiš dan'  
beḡua' gwy'a ciuda Damascon' gan'  
godca' sena' bałtez beñe' chesonxen  
Jesucriston' cont che'egaca'ne'  
Jerusalén ni par gonto'ne' castigw.

**Pablon' cho'e diža' can' goc che' cate'  
Diosen' bocobe' yichjlažda'ogüe'**  
(Hch. 9:1-19; 26:12-18)

<sup>6</sup>Na' šlac zya'a ciuda Damascon'  
ca do guagwbiž cate' to be'ni' gual  
da' za' yaba gwyechjen neda'. <sup>7</sup>Na'  
gwbiḡa' lo yon' benda' to beñe' gože'  
neda': "Saulo, Saulo žbixchen' chchi  
chsaco' neda'?" <sup>8</sup>Nach boži'a xtižen',  
goša'ne': "žNo le' beñe'?" Nach  
gwne': "Nedan' Jesús beñe' Nazaret  
na' neda' chchi chsaco'." <sup>9</sup>Beñe'  
ca' zya'alena'na' besežebchgüe'

besele'ede' be'nin', perw bi  
gosejni'ide' dan' gož Jesúsen' neda'.

<sup>10</sup>Nach goša'ne': "žBin' cheyała'  
gona' Xana'?" Nach Xana' Jesúsen'  
gwne': "Beyas na' gwyejteze ciuda  
Damascon', na' cate' žino'na' to  
beñe' ye'e le' dan' cheyała' gono'."  
<sup>11</sup>Na' gwchola' catec gwna'chgua'  
be'nin', nach beñe' ca' zya'alena'  
txen gosoxe'de' taca' cont bžinto'  
Damascon'.

<sup>12</sup>Na' to beñe' le Ananías zoe'  
ciuda Damascon' ben' chonxene'  
Diosen' do yichj do laže' na'  
chzenague' che yogo' ley dan' bzoj  
Moisésen'. Na' yogo'loł beñe' gualaž  
checho ca' že'na' cheso'e xtiža'  
Ananíasen' naque' beñe' chon da'  
güen. <sup>13</sup>Ananíasna' bide' gan' z oan'  
na' cate' ble'e nach gože' neda':  
"Saulo, bele'e." Na' beyož gwne' ca'  
la' bele'eteda' na' ble'eda' le'. <sup>14</sup>Nach  
gože' neda': "Dios ben' chonxencho  
na' ben' benxen da' xoxzta'ocho  
ca', len' ba gwleje' le' cana'te cont  
nezdo' can' chaclaže' gono', na' ba  
ble'edo' Xi'ine' ben' nac la'zelagüe  
beñe' chon da' güen, na' ba bendo'  
xtiže'. <sup>15</sup>Nachen' go'o xtižen' len  
beñe' zan beñe' že' lo yežlion'  
gwzejni'igacdo'ne' da' ca' ba bendo'  
na' ba ble'edo'." <sup>16</sup>Na' lecz gož  
Ananíasen' neda': "žBičhen' cuezo'?  
Yo'o so' nis. Na' nabdo' Xancho  
Jesucriston' cont yeya' yeyibe'  
yichjlažda'oguoñ' len da' malen'."  
Can' gože' neda'.

**Diosen' gwleje' Pablon' cont  
be'e xtižen' len beñe' ca' bi  
zjanaque' beñe' Israel**

<sup>17</sup>Na' gwdena' beyeda' ciuda  
Jerusalén ni na' gwy'a lo' yodao'

blaon' jel' güiža' Diosen', na' šlac  
 chol' güiža'ne' ble'edagüeda' Xancho  
 Jesucriston'. <sup>18</sup>Na' Xancho' gože'  
 neda': "Bi šedo' chojo' ciuda  
 Jerusalén ni, le bi yosozenag bene'  
 quinga xtižo' dan' go'o chian'."  
<sup>19</sup>Nach goša'ne': "Xana', legaque'  
 zjanezde' neda' gwy'a'a to to yodao'  
 jet jatina' bene' ca' chesonxene' le'  
 na' bseyjwgaca'ne' ližya'. <sup>20</sup>Na' lecz  
 naca' bene' ca' txen cate' gosote'  
 Esteban ben' be' xtižon', na' neda'  
 gwna'a xadon' che bene' ca' gosot le'."  
<sup>21</sup>Nach Xancho Jesucriston' gože'  
 neda': "Bchoj na' sela' le' zito' go'o  
 xtižan' len bene' ca' bi zjanac bene'  
 Israel."

**Pablon' len ben' yo'o lo ne'e soldadw ca'**

<sup>22</sup>Bene' ca' zjandoben', nga  
 zelao bosozenague' xtiža' Pablon',  
 beseže'e da' be'e diža' che bene' zito'  
 bene' bi zjanac bene' Israel, nach  
 gosezolagüe' chososye'e, chesene':

—Le got bena'. Bich cheyla' bane'.

<sup>23</sup>Bososya'adie' na' beselocchgüe'  
 bosozala' xagaque' ca'ale na' gosaše'  
 bište yon' bosozalen' lo be'. <sup>24</sup>Cate'  
 ble'e ben' yo'o lo ne'e soldadw ca'  
 can' chesonen' nach bene' mandadw  
 gosego'o soldadw ca' Pablon' lo'  
 cuartelen' na' yeseyine'ne' cont  
 güe'e diža' bi da' malen' ba bene'.  
 Goclaže' nezde' bichen' bene' lo  
 ciudan' chososya'adie' che'. <sup>25</sup>Na'  
 ba zjancheje' Pablon' cont yeseyine'  
 le' cate' gože' to soldadw ben' zena'  
 bene' chnabi'e lao to gayoa soldadw:

—Can' ža ley, bi de šsens chinle  
 neda' sin cbi nezele še bin' nona', le  
 neda' naca' bene' nación Roma.

<sup>26</sup>Beyož gože' bene' gwnabia' che  
 soldadon' ca' la' gwyeyte ben' lao

ben' yo'o lo ne'e yogo' soldadw ca',  
 ježe'ne':

—Gwsaco' bin' gondo' ben' ba  
 bdojan', le naque' bene' nación Roma.

<sup>27</sup>Nach ben' yo'o lo ne'e soldadw  
 ca' gwyeye' lao Pablon' gože'ne':

—Gwna neda' le bene' nación  
 Roma le'?

Nach Pablon' gože'ne':

—Bene' nación Roma neda'.

<sup>28</sup>Nach ben' yo'o lo ne'e yogo'  
 soldadw ca' gože' Pablon':

—Mechw xen gwxaqueda' cont  
 naca' cuent len bene' nación Roman'.

Nach Pablon' gože'ne':

—Neda' golja' naca' bene' nación  
 Roma.

<sup>29</sup>Nach bene' ca' ba nita' cont  
 yeseyine' Pablon' la' besyecuaste'  
 cuiten', na' ben' yo'o lo ne'e yogo'  
 soldadw ca' lecze bžebe' dan' ba  
 bčeje' Pablon' cont yeseyine'ne'.

**Gosesele' Pablon' gan' chosoxi'a  
 bene' ca' chesenabia' Israelen'**

<sup>30</sup>Nach beteyo ben' yo'o lo  
 ne'e soldadw ca' gwseže' gden'na'  
 nchej Pablon'. Na' bene' mandadw  
 besedobe bžoz gwnabia' ca' len  
 yogo' bene' gole blao ca' chesenabia'  
 nación Israelen' cont nezde' bi dan'  
 chosocuiše' Pablon'. Na' cate' ba  
 besedobe bene' ca' nach gwleje'  
 Pablon' na' gwsele' le' gwzeche'  
 laogaquen'.

**23** Nach Pablon' gwne'e bene'  
 gole blao ca' chesenabia'  
 nación Israelen' na' gože' legaque':

—Bene' migw, ža na'aža nezda' lo'  
 lažda'ogua' ba bena' can' chazlaže'  
 Diosen'.

<sup>2</sup>Nach Ananías ben' nacch bžoz  
 blao bene' mandadw len bene' ca'

zjaze cuit Pablon' yesebaže' cho'ena'.  
<sup>3</sup>Na' Pablon' gože'ne':

—iDiosen' gone' le' castigw, bene'  
 güexoayag! Chi'o nga cont gono'  
 yela' justis chia' can' ža ley chechon'  
 na' chono' contr ley beno' mandadw  
 yesebaže' choa'.

<sup>4</sup>Bene' ca' že' gala'ze gose'e  
 Pablon':

—Bi cheyała' yoži'o xtižen' ca', le  
 naque' b̄xoz blao che Dios.

<sup>5</sup>Nach Pablon' boži'en gwne':

—Bene' migw, bi gwnezdā' še  
 bengā b̄xoz blaon'. Nezdā' Xtiža'  
 Diosen' dan' nyojen žan: “Bi yoži'ile  
 diža' zi' len bene' gwnabia' chelen'.”

<sup>6</sup>Pablon' gocbe'ede' bene' ca'  
 chesenabia' nación Israelen'  
 zjanaque' chople. Bałe' chesejle'e  
 can' chsed chlo'e bene' ca' zjansi'e  
 saduceo na' yebałe' can' chsed chlo'e  
 bene' ca' zjansi'e fariseo. Nach  
 Pablon' gože' bene' ca' že'na':

—Bene' migw, naca' bene' fariseo,  
 na' naca' xi'in bene' fariseo. Na' zoa'  
 nga chonle yela' justis chia' neche  
 chejli'a yesyeban bene' guat ca'.

<sup>7</sup>Beyož gwne' ca' bene' fariseo ca'  
 len bene' saduceo ca' ben' zjandop  
 zjanžag na' gosezolagüe' chosošaše',  
 na' besechoje' chople. <sup>8</sup>Le bene'  
 saduceo ca' chesene' bi yesyeban  
 bene' guat ca' na' bi chesejle'e nita'  
 angl o nochle spiritw yoble. Na' bene'  
 fariseo ca' chesejle'e yesyeban bene'  
 guat ca' na' chesejle'e nita' angl na'  
 nita' nochle spiritw. <sup>9</sup>Yogo' ben' že'na'  
 chesosye'e chosošaše'. Nach to chope  
 bene' zjansed ley dan' bzoj Moisésen',  
 ben' zjanac bene' fariseo, gosezože'e  
 gosone' Pablon' txen, gosene':

—Bibi da' mal non bengā. Še no  
 spiritw o no angl ba gwnełen le', bi

cheyała' goncho contr le', le contr  
 Diosen' goncho še ca'.

<sup>10</sup>Leča gwche' to žaš xen na' ben'  
 yo'o lo ne'e yogo' soldadw ca' bžebe'  
 še yosozoxj yosotine' Pablon'. Nach  
 bene' mandadw besežin soldadw  
 che' ca' cont jasyeleje' Pablon' ladjo  
 bene' ca' na' besyeche'ene' cuartelen'  
 da' yoble.

<sup>11</sup>Nach že' beteyon' Xancho  
 Jesucriston' bžine' gan' de Pablon'  
 na' gože'ne':

—Bi žebo' Pablo. Can' ba bi'o  
 xtižan' Jerusalén ni, lecz ca' cheyała'  
 go'o xtižan' ciuda Roma.

#### Bosoxi'e yesote' Pablon'

<sup>12</sup>Na' beteyo bał bene' Israel  
 besedobe' na' bosoxi'e yesote'  
 Pablon'. Na' gosechogbi'en, gosene':  
 —Diosen' gone' chio' castigw še  
 ye'ej gagwcho sin cbiņa' gotcho  
 Pablon'.

<sup>13</sup>Nde choa bene' bosoxi'e yesote'  
 Pablon'. <sup>14</sup>Nach ja'aque' gan' že' b̄xoz  
 gwnabia' ca' len bene' gole bene'  
 blaō ca' chesenabia' nación Israelen'  
 na' gose'e legaque':

—Bač gwchogbia'to' gon' Diosen'  
 neto' castigw še ye'ej gagwto' sin  
 cbiņa' gotto' Pablon'. <sup>15</sup>Na' le yotobe  
 lježle le gon yela' güexi'a gwxe  
 cont nabele ben' yo'o lo ne'e yogo'  
 soldadw ca' cueje' Pablon' yide'  
 laolen', gwde'ele za' yejiljwyožechle  
 bi da' xinj ba none'na'. Na' neto'  
 cue'na'oto'ne' tnez gotto'ne' cate' za'  
 le'e gan' nita'len'.

<sup>16</sup>Na' zoa to bi' byo bi' nac xi'in  
 bene' zan Pablon' na' lebe' benebe'  
 da'na' chesacde' yesonde' le'. Na'  
 gwyejbe' cuartelen' jazenebe'  
 Pablon'. <sup>17</sup>Nach Pablon' goxe' to

bene' chnabi'e to gayoa soldadw na' gože'ne':

—Ben goclen gwche' bi' nga lao bene' gwnabia' chelen'. De to da' ye'be' le'.

<sup>18</sup>Bene' gwnabia' che soldadon' gwche'e bi'na' lao ben' yo'o lo ne'e yogo' soldadw ca' na' gože' le':

—Pablo ben' de ližya goxe' neda' na' gwnabe' goclen lagua' cont zedesana' bi' nga laguon', že' de to da' ye'be' le'.

<sup>19</sup>Nach ben' yo'o lo ne'e yogo' soldadw ca' bexue' na'be' gwche'ebe' to šla'ale gwnabde'be':

—¿Bi che'ndo' nao' neda'?

<sup>20</sup>Nach bi'na' gožbe' le':

—Bene' blao che bene' Israel' gualaž cheto' ca' ba bosoxi'e yesenabe' cuejo' Pablon' gwxe' na' yosode'ede' se'lo'ne' gana' chesežag bene' gwnabia' chegaquen' cont yeseyiljwyože' bi' da' xinj non Pablon'. <sup>21</sup>Perw bi' šejli'o chegaque' Nde choa bene' ca' yesebe'na'ogüe' Pablon' tnez cont yesote' le' na' ba gosechogbi'en bibi yese'ej yesagüe' šlac bina' yesote'ne'. Na' ba chesebeze' gwzenago' chegaque' cont cuejo' Pablon'.

<sup>22</sup>Nach ben' yo'o lo ne'e soldadon' bose'e bi'na' na' gože'be':

—Gwsaco' bi' go'o diža' che rsonna' ba bedesano' lagua' nga.

**Goseše'le' Pablon' lao  
governador ben' le' Félix**

<sup>23</sup>Nach ben' yo'o lo ne'e yogo' soldadw ca' goxe' chope bene' gwnabia' ben' chesenabia' to gayoa güeje soldadw na' bene' mandadw yososini'a chegaque' cont šja'aque' ciuda Cesarea do cheda ga šeže'le

na' yeseche'e chop gayoa soldadw bene' yesa'ac ni'aze na' gayonši bene' yesebia cabayw na' yechop gayoa soldadw bene' yesoxe' lanza.

<sup>24</sup>Lecze gože' legaque' chyažje cabayw be' cuia Pablon', le' le'na' yeseche'e gana' zoa gobernadore' ben' le' Félix, na' yesape' Pablon' cont bibi gac che' tnez. <sup>25</sup>Nach bzoje' to cart che gobernadore' da' bgoxe' legaque', žan:

<sup>26</sup>“Señor Gobernador: Neda' Claudio Lisias chzoja' le' gobernador Félix, nacteco' bene' blao, chguapa' le' tiox. <sup>27</sup>Bene' Israel' ca' ba gosezene' bengana' ba bosoxi'e yesote'ne', perw cate' gwnezda' naque' bene' nación Roma, gwy'a'a len soldadw chia' ca' jasla'ne' lo na'gaquen'. <sup>28</sup>Na' cont nezda' bičen' chosocuiše' le', gwchi'ane' gan' chosoxi'a bene' gwnabia' che nación Israelen'. <sup>29</sup>Nach gwnezda' chosocuiše' le' che bize da' chesac che' len ley chegaque'na', na' bi' nacho bi' da' mal ba none' cont yesote' le' o cont gate' ližya. <sup>30</sup>Perw na' ba gwnezda' ba bosoxi'a bene' Israel' ca' yesote' le', da'nan' la' chsel'a'tia'ne' laguo' le' na' lecze bena' mandadw len bene' ca' chosocuiš le' šja'aque' laguo' na' yesene' bin' chesac chegaque' len le'. Si'xenšco' yogo' da' quinga chneyoeda' le'. Claudio Lisias.”

<sup>31</sup>Nach soldadw ca' gosone' can' ben' bene' gwnabia' chegaquen' mandadw, besyebje' Pablon' na' šeže'le' gosegüe'e nez len le' besežine' yež da' nzi' Antípatris. <sup>32</sup>Na' cate' gwyeni' besyebi'i soldadw ca' ja'ac ni'aze' jaya'aque' cuartelen' na' bene' ca' gosebia cabayon' ja'aclene'

Pablon'. <sup>33</sup>Na' cate' besežine' ciuda Cesarean' bosonežjue' gobernadore' carten' zjanoxe'na' na' lecz gosone' Pablon' lo' ne'e. <sup>34</sup>Na' gobernadore' cate' beyož blabe' carten' gwnabde' Pablon' ga bene' naque'. Na' cate' gwnezd' naque' bene' distritw Cilicia, <sup>35</sup>nach gože'ne':

—Gwzenaga' bin' nao' cate' yesela'ac bene' ca' chosocuiš le'.

Nach bene' mandadw bososeyjue' Pablon' lo' yo'o gan' chbe' rey Herodesen' cate' chone' yela' justis.

**Pablon' be'e diža' lao  
governador Félix**

**24** Cate' bačh goc gayo' ža zoa Pablon' ciuda Cesarean', nach bžin Ananías ben' nac bžoz blaoch che bene' Israelen' na' nche'e to chope bene' gole blao chegaque' na' len to bene' le Tértulo ben' chac chne' lao bene' gwnabia'. Na' ja'aque' lao gobernadore' gosagüe' xya che Pablon'. <sup>2</sup>Na' cate' jasexi'e Pablon', Tértulon' gwdagüe' xya che', gože' gobernador Félixen':

—Si'xeno', señor gobernador, za'to' laguo' nga. Bin'lo' juisyw zoa nación chechon' na' da' zan da' šagüe' ba chac da' chnabi'o' neto'. <sup>3</sup>Gate'tez zoato' žato' choxcleno' can' chono'na', señor gobernador, catec chbeto' can' chnabi'ona'. <sup>4</sup>Na' cont bi goneto' le' bichle zed, chata'yoeda' le' gwzenago' šlož dao' dan' zedenato' na'a. <sup>5</sup>Ben' ba goxo' laguo' nga, nezeto' naque' to bene' chbecchgua da' zed. Chde' doxen yežlion' chone' cont neto' bene' Israel chacto' chople. Na' naque' bene' blao len bene' ca' chesene' bene' nazareno lagüe' chesejnilaže' Jesús ben' nac

bene' yež Nazaret. <sup>6</sup>Na' goclaže' gone' da' mal juisyw lo' yodao' cheton' na' da'n'an' gwzento'ne' cont chogbia'to' che' con can' ža ley cheton'. <sup>7</sup>Perw na' gwyaz Lisiasen' ben' nac bene' gwnabia' che soldadw ca' na' beque'ene' lo' na'ton'. <sup>8</sup>Na' gože' neto' cheya'la' yidto' laguo' nga cont gwcuišto'ne'. Guac nabdo' Pablon' cuino' cont nezdo' nac da' li can' chcuišto'ne' nga.

<sup>9</sup>Nach bene' Israel ca' za'aclene' Tértulon' gosaque' toze len le' gosene' le can' naquen. <sup>10</sup>Nach gobernadore' bene' señw len Pablon' cont ne', na' Pablon' gwzolağüe' gwne':

—Nezda' ba goc zan iz chono' yela' justis che nación ni, na' da'n'an' chbeda' gwzoo' rson chian' laguon'.

<sup>11</sup>Na'a chac šižinw ža gwya'a Jerusalenna' jenxena' Diosen'. Na' guac nabdo' bene' ca' besele'e neda' še leca' naquen. <sup>12</sup>Bi nacho besele'ede' chacyoža' len no bene' lo' yodao' blaon' ne' lo' yodao' yoble o gate'teze lo' ciudan'. <sup>13</sup>Na' bibi gac yeson bene' quinga cont yosolo'e napa' dola' ca dan' chosocuiše' neda'. <sup>14</sup>Bi gwcuša' diža', da' li chonxena' Diosen' ben' gosonxen da' xozxta'oto' ca', la'czla' chonxena'ne' can' cheson bene' ca' zjanao' da' cobe dan' bi chesazlaže' bene' quinga, na' chejli'a che yogo'lol' Xtiža' Diosen' dan' nyoj le'e ley cheton' na' da' ca' bosozoj bene' ca' gosoe' xtiža' Diosen' cani'. <sup>15</sup>Na' zoa' lez yosban Diosen' bene' ca' ba gosat, bene' güen lente bene' mal. Lencze bene' gualaž chia' can' nite' lez gon Diosen' ca'. <sup>16</sup>Da'n'an' zoa' chi' yichja' chona' can' chaclaže' Diosen' neche nezda' lo'

yichjlažda'ogua' bibi doła' napa' lao Diosen' ne lao benachen'.

<sup>17</sup>Ba goc zan iz zoa' zito' na' za' bela'a Jerusalénna' na'a cont bnežjua' mechw da' btoba' da' gaclenen bene' yaše' ca', na' lecz ca' jasana' yelaten' lo' yodao' blaon'. <sup>18</sup>Ca' goquen' zoa' lo' yodao' blaon' ba bexi beyacha' can' cheyała' gacto' cont chnežjwto' bi dan' chnežjwto' lao Diosen', cate' to chope bene' Israel za'ac Asia besele'e gan' zoa'na'. Na' bi nacho mbeca' žaš, neca ndop nžaga' bene' zan. <sup>19</sup>Na' bene' ca' za'ac distritw Asian' cheyała' yesid cuine' yosocuiše' neda' laguo' nga še bi da' mal chesacde' chona'. <sup>20</sup>Na' bene' quinga nita' nga guac yesene' še bi da' mal nona' caten' bosodie' neda' lao bene' ca' chesenabia' nación Israelen'. <sup>21</sup>Še toz dan' bi chesazlaže' dan' goše'gacane' caten' zjandob bene' ca' chesenabia', gwnia': "Ca nac yela' justis chia' dan' chonle na'aža, chonlen dan' chejli'a gwžin ža yesyeban bene' ca' ba gosat."

<sup>22</sup>Gobernador Félixen' ba nezde' can' chosozejni'i bene' ca' ba chesejle' che Jesucriston', na' cate' bende' can' gwna Pablon', bich goclaže' gone' yela' justis che' ca hora', gwne':

—Cate' yid Lisiasen' ben' nac bene' gwnabia' che soldadw ca', cana' yeyož gwzenaga' can' nac dan' chagwle xya nga.

<sup>23</sup>Nach bene' mandadw beche' xan soldadon' Pablon' gan' die' ližyan' na' be'e latje gon Pablon' con bi chaclaže' gone', na' be'e latje jaseña' bene' migw chen' le' jasesane' bi dan' byažjde'.

<sup>24</sup>Nach beza' gobernador Félixen' ciuda Cesarean', perw cate' gwde to chope ža bežine' da' yoble nche'e no'ol che' ben' le Drusila. Na' Drusilan' naque' no'ole Israel. Nach gobernadore' bene' mandadw gosaxe' Pablon' da' yoble na' bzenague' be' Pablon' diža' gwne' yogo'loł bene' cheyała' yesejnilaže' Jesucriston'. <sup>25</sup>Nach Pablon' be'lenche' le' diža' can' cheyała' gaccho bene' güen lao Diosen', na' can' gwsaca'cho cont bi goncho da' mal, na' lecze be'lene' le' diža' can' gon Diosen' cate' žin ža gone' justis che yogo' benach na' gwnežjue' castigw che yogo' bene' bi chesejnilaže' le'. Na' gobernador Félixen' bžebe' na' gože' Pablon': —Da' na'ze gwzenaga' na'a, guac yeyejo'. Na' cate' nlatja' guaxcza' le' yeto.

<sup>26</sup>Gobernadore' gocde' še gwnežjo Pablon' le' mechw cont yosane' le'. Da'n'an' goxe' Pablon' güeltze be'lene' le' diža'. <sup>27</sup>Ca' chac gwde chop iz nach yeto bene' yoble bene' le Porcio Festo gwdie' blane' xlatje'. Na' Félixen' goclaže' yega'ane' binlo len bene' Israelen' cate' ba bechoje' gobernador, da'n'an' bene' mandadw bega'an Pablon' ližyan'.

**Pablon' bzoa rson che' lao  
gobernador Feston'**

**25** Na' cate' bžin Feston' ciuda Cesarean' gan' nabi'e, gwzoe' šone ža na' gwze'e gwyeje' Jerusalénna'. <sup>2</sup>Nach bžox gwnabia' ca' len nochle bene' blao che bene' Israel ca' ja'aque' jaseñe'e le' cont bosocuiše' Pablon'. <sup>3</sup>Na' gosata'yoe'de' Feston' gone'

mandadw šjasesane' Pablon'  
Jerusalén. Gosata'yoede' le' gone'  
ca' le gosaclaže' yesebe'na'ogüe'  
Pablon' cont yesote'ne' tnez.

<sup>4</sup>Na' gobernador Feston' boži'e  
xtiža'gaque', gwne':

—Yega'anche' Cesarean' gan' die'  
ližyan' le neda' bich chžeda' ša'a  
na'. <sup>5</sup>Na' le cuej no bene' gwnabia'  
chele seła'le legaque' len neda' cont  
yosocuiše' le' lagua' gan' gona' yeła'  
justis še bi da' xinj ba none'.

<sup>6</sup>Nach gwzoa gubernadoren' len  
legaque' Jerusalénna' do xono' o  
do ši ža na' gwdena' beze'e beyeje'  
Cesarean'. Na' beteyo gwchi'e  
gan' chone' yeła' justisen' na' bene'  
mandadw gwey Pablon' lagüen'.

<sup>7</sup>Nach cate' bžin Pablon' lagüen'  
ba nita' bene' Israel ca' za'ac  
Jerusalénna' na' la' gosechjte' le' na'  
gosezolağüe' bosocuiše' le' chesene'  
da' zan da' mal juisyw ba bene',  
perw bi blo'elaon še diža' li cheso'e.

<sup>8</sup>Nach Pablon' bzoa rson che', gwne':  
—Bibi doła' napa' len ley che neto'  
bene' Israel ne len yodao' blao  
cheton' na' ne len rey César ben'  
chnabia' doxen nación Roman'.

<sup>9</sup>Na' Feston' goclaže' yega'ane'  
binlo len bene' Israel ca', da'nan'  
gože' Pablon':

—¿Bi che'ndo' sao' Jerusalén gona'  
yeła' justis chion' na'le che yogo' da'  
ca' chosocuiš bene' quinga le'?

<sup>10</sup>Nach Pablon' gwne':

—Rey Césarén' ba nzoe' le' cont  
gono' yeła' justis, na' cheyała' gac  
yeła' justis chia' laguo' nga. Ca nac  
bene' Israel quinga, le' nezczedo'  
bibí da' xinj na' gona' len legaque'.  
<sup>11</sup>Šaca' ba gwdapa' doła' o bichle da'  
ba bena' da' cheyała' gata', bi žia' bi

gata'. Perw bibi nona' ca nac dan'  
chosocuiše' neda' nga, na' nono zaca'  
gwde neda' laogaque'na'. Da'nan'  
chnaba' tia' lao rey Césarén' cont  
gone' yeła' justis chian'.

<sup>12</sup>Nach Feston' bene' yeła' güexi'a  
len bene' gwnabia' che' ca' bi yesone'  
len Pablon' nach gože'ne':

—Ba gwñabo' tio' lao rey César na'  
lagüe' nan' šejo'.

### Gobernador Feston' bdie' Pablon' lao rey Agripan'

<sup>13</sup>Na' cate' ba gwde yeto chope  
ža, rey Agripa len no'ol che' ben'  
le Berenice besežine' Cesarean'  
bedeseğuape' Feston' tiox. <sup>14</sup>Na' cate'  
gwneze gobernador Feston' nite'  
yazan ža, nach be'lene' rey Agripan'  
diža' che Pablon', gože'ne':

—Zoa to bene' nyixjw Félixén' ližya  
nga cate' bechoje'. <sup>15</sup>Na' cate' gwy'a  
Jerusalénna' bxož gwnabia' ca' na'  
nochle bene' blao che bene' Israel ca'  
gosenabe' choglaguan' cont gaque'  
castigw. <sup>16</sup>Perw na' goše'gaca'ne' bi  
de costumbr che chio' bene' nación  
Roma gwdecho bene' yesaque'  
castigw še bi yesyedillagüen' len  
bene' ca' chosocuiš le' cont yosozoa  
rson chegaque'. <sup>17</sup>Nach cate'  
besela'aque' nga beteyo la' gwche'tia'  
gan' chona' yeła' justis na' bena'  
mandadw gosebeje' Pablon'. <sup>18</sup>Na' cate'  
bosocuiš bene' ca' le', ne toz da' mal  
dan' chacda' yosobague'de' le' bibi  
gosene'. <sup>19</sup>Dan' chac chegaque', bi  
chejnilaže' Pablon' can' chesejnilaže'  
legaque', na' cheso'e diža' che to bene'  
ba got, bene' le Jesús, na' Pablon' že'  
mbancze'. <sup>20</sup>Cate' bich bi bežellaža'  
gona' ca dan' chesac chegaquen' na'  
goša' Pablon' še chaclaže' yodia'ne'



Jerusalén cont gac yela' justis chen' che da' ca' chosobague'de' le'. <sup>21</sup>Nach Pablon' gwnabe' šeje' gone' yela' justis che' lao rey César Augusto, na' bena' mandaw beyeyjue' šlac gac gwdia'ne' lao rey Césaren'.

<sup>22</sup>Nach rey Agripan' gože' Feston': —Chaclaža' gwzenaga' can' choe' ben' dižan'.

Nach Feston' gože' le':

—Gwxe gwzenago' che' šeca'.

<sup>23</sup>Nach beteyo gosacxenchgua rey Agripan' len Berenice cate' goso'e gana' chi' gobernadoren', na' lec zjachi' bene' ca' chesenabia' soldadw ca' na' yogo' no bene' blao che ciudan'. Na' gwdena' Feston' bene' mandaw jasexi'e Pablon'. <sup>24</sup>Na' Feston' gwne':

—Rey Agripa, na' len yogo' le'e že'le nga len neto', ca' nac bengaz ze laole nga, yogo' bene' Israel bene' že' Jerusalén len bene' že' Cesarea nga ba gose'e neda' bengaz naque' bene' mal na' yogo'cze' chesene' bi cheyaļa' bane'.

<sup>25</sup>Na' ba gwnabyoža' na' gota'bia' bibi none' da' zaca' choglaguan' che' gate'. Na' ba gwnabe' tie' lao rey César gone' yela' justis che', na' ba gwcheba' gwdia'ne' ciuda Roma na'ale gan' zoa rey Césaren'. <sup>26</sup>Na' chacžejlaža', le' bibi chežellaža' gwzoja' reyen' yapa'ne' bin' none'. Da'nan' bach gwleja'ne' laole nga, na' chbechgüeda' chbeja'ne' laguo' le' rey Agripa, cont yeyož gwzenagcho che' na' gata' bi da' gwzoja'. <sup>27</sup>Chacda' bi naquen to' licha seļa'ne' Roman' sin cbi gwzoja' še bin' none'.

**Pablon' bzoe' rson che'**

**lao rey Agripan'**

**26** Nach rey Agripan' gože' Pablon': —Guac nao' bi da' gaclenen le'.

Nach Pablon' gwļis ne'en lao bene' ca' gwzolagüe' bzoa rson chen', gwne':

<sup>2</sup>—Chbechgüeda' rey Agripa, ba gosone' latje gua' diža' laguo' nga na'a ca' nac dan' chosocuiš bene' Israel gualaž checho ca' neda'. <sup>3</sup>Le' nombi'o costumbr che chio' bene' Israel na' nezdo' can' chesacyož bene' gualaž checho ca' legacze'. Da'nan' chata'yoeda' le' gapšco' yela' chxenlaže' gwzenago' chia' nga.

**Quinga ben Pablon' cate'**

**biņa' šejnilaže' Criston'**

<sup>4</sup>Yogo' bene' Israel gualaž chechon' zjanezde' can' ba gwzoa' chonxena' Diosen' cate' ne' nactia' bidao', caten' gwzoa' laža' lente caten' gwzoa' ciuda Jerusalén. <sup>5</sup>Na' še chese'nde' yeso'e diža', lecze zjanezde' goca' txen len bene' ca' zjansi'e fariseo cate' nactia' bi' xcuide' na' bene' fariseo ca' chesonche' yogoļoļ costumbr gole can' nyoj ley chechon' clel can' cheson yezica'ch bene' Israel gualaž checho ca'. <sup>6</sup>Na' legaque' chesagüe' xya chia' neche chejli'a gwžin ža cate' Diosen' yosbane' bene' guat ca' can' gože' da' xoxxta'ocho ca'. Neche da'nan' zoa' nga na'aža cont gac yela' justis chian'. <sup>7</sup>Bene' zan lo šižinw cue' chio' bene' Israel nite' chesebeze' batcan' yosban Diosen' bene' ca' ba gosat, can' že' gone'. Da'nan' chesonxene' le' do ža do yel. Lecz neda' zoa' lez gac ca', na' da'nan' bal bene' Israel gualaž chechon' chosocuiše' neda' nga rey Agripa. <sup>8</sup>Na' le'e chi'le chzenagle chia', žbixchen' chaquele nono šejle' dan' yosban Diosen' bene' ca' ba gosat?

**Cana' Pablon' bgue'ede' bene'  
chesejnilaže' Criston'**

<sup>9</sup>Cana' neda' godca' cheyala' gue'eda' bene' ca' chesonxen Jesús ben' nac bene' Nazaret, na' da' zan benchgua' contr legaque'. <sup>10</sup>Bene' zan bene' chesejle' che Jesús'en' Jerusalénna' gwdixjua' ližya, gwdapa' yiš dan' bosozoj b̄xoz gwnabia' ca' cho'en diža' napa' yela' gwnabia' cont gona' ca. Na' cate' gosechoglagüe' yesote' no bene' ca', goca' toze can' bosoxi'e yesone'. <sup>11</sup>Na' zan las gwy'a to to yodao' jasaca' legaque' cont yesebejyichje' bich yesonxene' Jesús'en'. Na' catec bgue'eda' legaque' gwy'a yež zito' jalagšiba' legaque'.

**Da' yoble Pablon' cho'e diža' can'  
goc che' cate' Diosen' bocobe'  
yichjlažda'ogüe'**

(Hch. 9:1-19; 22:6-16)

<sup>12</sup>Can' goc to ža cate' zya'a ciuda Damascon', noxa' yiš che b̄xoz gwnabia' ca' dan' žan gwčhi gwsaca' bene' ca' chesonxene' Jesús'en'. <sup>13</sup>Ca do guagwbiž zya'a ngua'a nezen' señor rey, cate'cze ble'eda' to be'ni' juisyw da' za' le'e yaba, chseni'chen ca gwbižen', na' gwyechjen neda' len bene' ca' zya'alena' txen. <sup>14</sup>Na' yogo'to' gwbižto' lo yon', na' neda' benda' to bene' chne' diža' hebreo gwne': "Saulo, Saulo žbixchen' chčhi chsaco' neda'? Dan' chondo' neda', chone zi' cuino' ca chon to go'n be chlibe lo ya dan' zoa lao carroš cheban'." <sup>15</sup>Nach bol giüiža'ne', goža'ne': "žNo le' bene'?" Nach Xana' Jesús'en' boži'en, gwne': "Neda' Jesús na' neda' chčhi chsaco'.

<sup>16</sup>Beyas, le bač blo'elagua' le' na' ba gwleja' le' gono' xšina' na' go'o diža' che da' nga ba ble'edo' na' che bichle dan' za' le'edo' da' za' gwlo'eda' le'. <sup>17</sup>Na' na'a seła' le' gan' že' bene' ca' bi zjanac bene' Israel. Na' bi gona' latje no got le', ne bene' Israel gualaž chio' ca' na' ne bene' bi zjanac bene' Israel. <sup>18</sup>Chseła' le' gan' že' bene' bi zjanac bene' Israel na' gwzejni'ido'ne' cont yesebejyichje' da' malen' zjanone' na' yesone' da' güen. Chaclaža' yesyechoje' lo na' Satanás dan' chnabia' da' xigüe' ca' na' yosozenague' che Diosen' cont nitlao xtolagaque', na' lecze chaclaža' yesaque' txen len nochle bene' chesejnilaže' neda' bene' ba zjanac lo na' Diosen'."

**Pablon' bsed blo'ede'  
bene' xtiža' Criston'**

<sup>19</sup>'Ca' goc chia' rey Agripa, bzenaga' ca dan' gož Jesús'en' neda' zoe' yaban' caten' ble'edagüeda'ne' tnez. <sup>20</sup>Zgua'tec jazejni'ida' bene' ca' že' ciuda Damasco xtiže'na' na' gwdechle jazejni'ida' bene' ca' že' Jerusalénna' len bene' že' doxen distritw Judean', goše'gaca'ne' cheyala' yesebejyichje' xtolagaque' na' yosozenague' che Diosen' na' yesone' da' güen cont gacbia' ba gosebejyichje' da' malen'. Can' bzejni'ida' bene' Israel gualaž checho ca' lente bene' ca' bi zjanac bene' Israel. <sup>21</sup>Na' neče dan' chona' ca', bene' gualaž checho bene' chesegue'ede' neda' gosezene' neda' yodao' blaon' na' gosaclaže' yesote' neda'. <sup>22</sup>Perw na' Diosen' zoe' chaclene' neda', na' da'nan' zoacza' cho'a xtižen' ža na'aža len yogo'lolle

že'le nga, le'e nacle beṇe' blao lente le'e bi nacle beṇe' blao. Bi n̄acho bichle chzejni'ida' beṇe' da' bi bzoj da' Moisésen' len yezica'chle ben' goso'e xtiža' Diosen' cani'. <sup>23</sup>Gosene' Criston' ben' za' seḷa' Diosen' saca'zi'e na' gate' na' gaque' beṇe' nechw yebane' ladjo beṇe' guat ca'. Na' lecz gosene' le'na' gwzende' beṇe' Israel len beṇe' bi zjanac beṇe' Israel can' cheyaḷa' yesone' cont šo' be'ni' che' lo' yichjlažda'ogaque'.

**Pablon' goclaze' šejnilaže'  
rey Agripan' Jesucriston'**

<sup>24</sup>Ca' cho'e dižan' cate'cze gubernador Feston' gwṇe' zižje gože'ne':

—iChactonton' Pablo! Dan' ba bsedteco' nan' bač chactonto'.

<sup>25</sup>Nach Pablon' gože'  
gubernadoren':

—Bi chactonta' señor gubernador, san diža' lin' cho'a, diža' da' zaca' gwzenago'. <sup>26</sup>Na' rey Agripa nga nombi'e da' quinga choa' diža' čhen, da'nan' bi chžeba' choa' diža' lagüe' nga. Nežda' chacbe'ede' choa' diža' li, le dan' goc che Jesús'en' bi n̄acho goquen bagaše'ze. <sup>27</sup>Le' rey Agripa, čhejli'o da' ca' bosozoj beṇe' ca' goso'e xtiža' Diosen' cani'? Nežda' chejli'on.

<sup>28</sup>Nach rey Agripan' gože' Pablon':  
—čChacdo' bedao' co'oyelo' neda' cont šejnilaža' Jesucriston'?

<sup>29</sup>Nach Pablon' gože'ne':  
—Chṇaba' lao Diosen' žin ža cate' le' len yezica'chle beṇe' že' nga šejnilaže'le Jesucriston' can' chejnilaža'ne', še yob o še ne' chžach, perw cbi gata'le ližya can' dia' neda'.

<sup>30</sup>Beyož gwna Pablon' ca' bežoža' rey Agripan' len no'ol čhen' Berenice, na' len gubernador Feston' na' len beṇe' ca' gosebe' len legaque'. <sup>31</sup>Nach cate' ba besyeyo'e ga yoble, rey Agripan' na' gubernador Feston' gose' lježe':

—Bi n̄acho ba non benga da' zaca' gate' o da' zaca' čixjwchone' ližya.

<sup>32</sup>Nach rey Agripan' gože' Feston':  
—Šaca' bi gwṇabe' tie' lao rey Césaren' cont gac yela' justis che'na' guac yosančhone'.

**Gosesele' Pablon' ciuda Roman'**

**27** Na' cate' bosoxi'e yesesele' Pablon' distritw Italia gan' chi' ciuda Roman', nach gwlo'e Pablon' len yezica'chle pres ca' lo na' to xan soldadw beṇe' le Julio. Na' Julion' naque' txen len soldadw ca' ben' zjansi'e Batallón che Augusto. Na' neda' Lucas gwzoa' len Pablon'. <sup>2</sup>Nach gwyo'oto' to lo' barcw da' za' ciuda da' nzi' Adramitio cont žinen distritw Asia, beza'to' ciuda Cesarean'. Na' za'len Aristarcon' neto'. Naque' beṇe' ciuda Tesalónica dan' chi' distritw Macedonia. <sup>3</sup>Nach ža beteyo bžinto' ciuda da' nzi' Sidón. Na' xan soldadw ben' le' Julio bencze' güen len Pablon', be'e latje gwyeje' gan' že' beṇe' migw che' ca' cont bosonežjue' le' bi dan' byažjde'. <sup>4</sup>Na' cate' bechojto' ciuda Sidónna' beza'to' bedeto' gaḷa'ze gan' nḷa' yežlio dan' chi' lo' nisdao' dan' nzi' Chipre. Chechjchgua be' clele ca horen', na' yežliona' bcue'ejen neto' len be'na'. <sup>5</sup>Na' beyož gwdeto' lo' nisdao' dan' de gaḷa'ze gan' zjambane distritw Cilicia na' distritw Panfilia, nach bžinto' ciuda

dan' nzi' Mira dan' chi' gan' mbane  
distritw Licia.

<sup>6</sup>Na' ciuda Miran' xan soldadon'  
bželde' yeto barcw da' za' ciuda  
Alejandría da' za' šej distritw Italia,  
na' bene' mandadw gwyo'oto' lo'en  
txen len Pablon'. <sup>7</sup>Nach gwza'to'  
zejto' lo nisen' da' yoble. Zan ža  
zejto' šolaže', canē bžinto' gwdeto'  
ciuda gan' nzi' Gnido. Na' dan' ne'  
chechj ben' clele gan' zejton', da'nan'  
bi goc šejto' licha, nach gwca'to'  
zejto' hcue'ej cuinto' len yelate'  
yežlio dan' nga'an lo' nisaon' dan'  
nzi' Creta, gan' bitec gwyechj be',  
na' gwdeto' gała'ze gan' zoa to ya'a  
da' nzi' Salmón. <sup>8</sup>Na' zejto' gała'ze  
ga zoa yo biž hcue'ej cuinto', canē  
bžinto' gan' nzi' Buenos Puertos  
gała'ze yež dan' nzi' Lasea.

<sup>9</sup>Goc zan ža zejto' ca' na' bač  
chžebto' šjažiyai' cuinto' lo'  
nisaon', le ba bžin tiemp zag  
cate' chechjchgua be'. Nach Pablon'  
gwneyoede' bene' ca' yesebeze' na'ze.  
<sup>10</sup>Gože' legaque':

—Le'e bene' le'e chsa'le barcon', ba  
chacbe'eda' can' zejcho nga canē  
chac chzan', xož cuiyai' barcon' len  
yoa' chelen', na' lente chio' yo'ocho  
lo' barcon' xož cuiyai'cho.

<sup>11</sup>Nach xan soldadw ca' bzenagche'  
che xan barcon' na' che ben' chsa'  
len clēl ca che Pablon'. <sup>12</sup>Le bi nac  
latje güen cho'a nisdau' gan' zoaton'  
ga'anto' tiemp zaguen', na' gwyān  
bene' ca' gosacde' cheya'la' sa'to'  
šejto' še gonēn žinto' Fenice gana'  
soato' šlac te da' zaguen'. Fenice  
naquen to yež ga chac cho'o barcw  
gan' mbane Creta na' bi chactec  
zag, le šla'ale nla' ga chla' gwbiž na'  
šla'ale ga chxoā gwbiž.

To be' gual gwyechjen lo nisaon'

<sup>13</sup>Cate' gwzolaō chechj to be'  
gol dan' za' che'e'le na' bene' ca'  
chososa' barcon' gosacde' guac  
šja'acche' gan' gosac'laže', nach  
gozsa'to' zejto' lo nisen' da' yoble  
to lcue'ej che Cretan'. <sup>14</sup>Gague goc  
sša cate' ba chac to be' gual da' nzi'  
Noreste chechjchguan clele gan' zej  
barcon'. <sup>15</sup>Na' chžiga'chguan barcon'.  
Bibi goc yesone' cont šejchto'. Na'  
btoblaže'to' gwžiga' ben' barcon' len  
neto' con can' chechjenna'. <sup>16</sup>Nach  
bžinto' to lcue'ej yežlio da' nga'an  
lo' nisen' dan' nzi' Claudia, gan' bitec  
chechj be'. Na' barcw cha'o gan'  
yo'oton' nxoben to barcw dao' da'  
chon žin choslan bene' cate' chac bi  
da' chac che barcw xenna'. Na' canē  
goc bocueto' barcw daon' lo' da'  
cha'ona'. <sup>17</sup>Beyoža' bchejto' barcw  
cha'ona' do gual cont gwlo'oto' fuers  
chen. Na' besežebe' gaga' barcon'  
to latje gan' nac yox da'na' nzi'in  
Sirte, nach bosoletje' lache' xen dan'  
chonen cont chžiga' ben' barcon'.  
Nach con zejto' lo nisen' con gan'  
gwyey barcon'. <sup>18</sup>Beteyo ba chož  
nisen' lo' barcon' da' chechjchgua  
ben', nach gosešaše' yoa' dan' nsa'  
barcon' gwzolaō bosozala'sazen' lo'  
nisen'. <sup>19</sup>Na' ža gwyone' goc'ento'  
legaue' bza'la'to' xšinlaz barcon' lo'  
nisen'. <sup>20</sup>Zan ža bi blo'elao gwbižen'  
na' šeže'le bibi beljw ble'eto', do ža  
do yel goc yejw na' gwyechj be', na'  
bich gwzoato' lez yelato'.

<sup>21</sup>Bač goc sša bi chagwto', nach  
Pablon' gože' bene' ca':

—Le'e bene', chac quinga dan' bi  
bzenagle chia' caten' gwnia' le'e bi  
sa'cho Cretan', na' dan' bi bzenagle

chia', ba gwžiai' yoa' che barcon' len xšinlazen. <sup>22</sup>Perw na'a bi soayaše'le, ne tole cbi cuiayi' yela' mban chele, san barcw ngazen' cuiayi'. <sup>23</sup>Neda' chonxena' Diosen' na' ba ben cuina' lo ne'e, na' le' ba gwsele' to angl bene' blo'elagüe' neda' nže'e. <sup>24</sup>Nach angla' gože' neda' diža' nga: "Bi žebo' Pablo. Cheyla' žino' lao rey César ben' chi' ciuda Roma, na' da'nan' yelao', bibi gac chio', na' lez yosla Diosen' yogo' bene' ca' že' lo' barcon'." <sup>25</sup>Na' dan' gwna anglen' ca', bene', le yebe. Nezda' Diosen' gone' gac dołoł can' gož anglen' neda'. <sup>26</sup>Da' gac checho yecho'onen chio' yo biž da' nga'an late' lo' nisen'.

<sup>27</sup>Na' cate' ba goc žta'gwbiž zejto' lo nisen' nžiga' ben' neto' nile nale lo nisdaon' dan' nzi' Adria, nach ca do chel bene' ca' zjansa' barcon' gosacbe'ede' ba zejto' gałaze yo biž. <sup>28</sup>Nach beseletje' to plom lo' nisen' cont boso'ochixe' ca do gaca'te' sitjw nac nisen'. Beyož bosochixen'na' gosenezde' goquen šino'tochoa metr. Nach gosezdie' yelate' na' bosozchixen' da' yoble na' ca horen' goquen gažechoa metr. <sup>29</sup>Na' besežebe' šjati'i barcon' yej lo' nisen', nach beseletje' tap ya xen dan' že' ancla, bosochjejen' xan barcon' cont gosoxen' len, na' do chesežebze' chesebeze' batcan' šeni'. <sup>30</sup>Nach bene' ca' zjansa' barcon' gosaclačže' yosyoxonje'. Besyeletje' barcw dao' dan' ncu'a' xina' barcon', con bosode'ede' yeseletje' ancla ca' dan' ncu'a' lagüen'. <sup>31</sup>Nach Pablon' boł güiže' xan soldadw ca', gože'ne': —Še bene' quinga bi yesyega'ane' lo' barcw nga, bi yelacho.

<sup>32</sup>Nach soldadw ca' gosechogue' don' zjanca' barcw daon' bososanen' lo' nisa'.

<sup>33</sup>Do šbal Pablon' gwzolaog wñeyoede' yesagw bene' ca' že' lo' barcon', gože' legaque':

—Ba chac žta'gwbiž zoale bi chtasle na' bi che'ej chagwle.

<sup>34</sup>Chata'yoeda' le'e le gagw cont soale binlo, le ne tole ca cuiayi'.

<sup>35</sup>Beyož gwne' ca' bexae' to yetextil, be'e yela' choxclen che Diosen' lao yogo' neto' že'to' lo' barcon' na' gwxi'e to pedasen' gwdagüen'. <sup>36</sup>Nach yogo'to' bebeto' na' lecz gwzolaoto' gwdagwto'.

<sup>37</sup>Chop gayoa gayonšino'to' nacto' že'to' lo' barcon'. <sup>38</sup>Na' beyož gwdagwto' ca beljeto', nach trigon' da' ne' nga'anch lo' barcon', gosebejen' bosozalen' lo' nisdaon' cont barcon' bich goctequen ži'i.

### Goxj barcon'

<sup>39</sup>Cate' gwyeni' bi zjanombi'e yežlion' gan' besežinen', perw besele'ede' de to latje ga žia nisen' šize na' cho'enña' nac laše' lo' yox. Nach gosaque' toze gosaclačže' yesone' cont žin barcon' šjačen' laše' lo' yoxen'. <sup>40</sup>Na' gosechogue' do che ancla ca', gosebejyichjen' lo' nisen'. Lecze goseseže' do dan' bosochjeje' yag dan' chsa' barcon' licha na' goselise' lache' dan' zoa yichj barcon' cont bžiga' ben' len, nach zja'aque' cho'a yo bižen'. <sup>41</sup>Na' gosodie' ga chedił nisdaon' len yeto da' yoble, na' jačhaz lagüe barcon' lo' yoxen', bich goc tan. Na' nisen' gwzolaog bzoxyen barcon' catec fuers nsan'. <sup>42</sup>Nach soldadw ca' gosaclačže' yesote' pres ca' cont bi yeseyele'

nisen' na' yosyo<sup>x</sup>onje'. <sup>43</sup>Perw xan soldadw ca' goclaze' yosle' Pablon', da'nan' bzone' yeson soldadw ca' can' chesac<sup>l</sup>aze' yesonen'. Bene' mandadw len pres ca' še noe' chac chyela' nisen' zgua'tec lega<sup>q</sup>ue' yesexite' lo nisen' cont yesyechoje' yo biž. <sup>44</sup>Na' bene' mandadw bene' ca' bi chac yeseyela' nis yosoc<sup>h</sup>ine' no yagla' o bichle xšin<sup>l</sup>az barcon' cont yesyežine' lo yo. Na' can' gosone' na' yogüe' besyežine' lo yo bižen'.

Dan' goc che Pablon' šlac zoe' Malta

**28** Cate' bechojto' lo' nisa<sup>o</sup>n' bžinto' yo bižen', bene' ca' že'na' gose'e neto' ba bžinto' gan' nzi' Malta, naquen to yež dan' chi' to lo yežlio da' nga'anen lo' nisa<sup>o</sup>n'. <sup>2</sup>Na' bene' ca' že'na' gosa<sup>q</sup>ue' bene' šagüe' len neto', bosoxene' to yi' xen na' goxe' yogo'to' gan' nite'na', le ba chac yejw na' chacch<sup>g</sup>ua zag. <sup>3</sup>Nach Pablon' btobe' xon<sup>j</sup> xis bcue'en lo yin', cate' bchoj to be<sup>l</sup> be nac venen lo xis ca' gwdi'ınba' ne'e gola'ditban'. <sup>4</sup>Na' besele'e bene' Malta ca' nalā'dit belen' na' Pablon', na' gose' lježe': —Benga naclje' bene' güet bene'. Da'nan' la'czla' bele' lo' nisen', Diosen' bi gü'e latje banche'. <sup>5</sup>Nach Pablon' con gwžib ne'ena' lo yin' na' bexope belen', na' bibi godce'. <sup>6</sup>Yogo' bene' ca' chesebeze' batcan' solao gata' ne'en yi o batca' gate'. Gosebeze' sša na' besele'ede' bibi godce'. Nach gosone' x<sup>b</sup>ab yoble, gosene' naque' to bene' šejnilaže'cho.

<sup>7</sup>Na' bene' gwnabia' che doxen Malta le' Publio na' yežlio che' zjaden ga<sup>l</sup>a'ze latje gan' bžinton', na'

blebe' neto', gwzoato' ližen' šone ža. <sup>8</sup>Na' xa Publion' chacšen<sup>g</sup>üede' yo'e da' la na' che'ede' yiž chen. Nach Pablon' gwyo'e gan' de'na' bol' güiže' Diosen', nach gw<sup>x</sup>oa ne'en yich<sup>j</sup> bene' güen' na' beyaque'. <sup>9</sup>Beyožen' jasexi'e yezica'chle bene' lagüe yeža' bene' chese'ede' yižgüe' na' gwnabde' Diosen' yeyone' lega<sup>q</sup>ue', na' lecze besyeya<sup>q</sup>ue'. <sup>10</sup>Na' da' zan da' güen goson bene' ca' len neto'. Na' cate' bžin ža beza'to' bosyoži'e lo' barcon' yogo' da' ca' chyažjeto'.

Pablon' bžine' ciuda Roman'

<sup>11</sup>Bega'anto' Malta šon bio', nach gwza'to' zejto' lo nisen' yo'oto' to lo' barcw da' za' ciuda Alejandría da' gwlezen latjen' šlac gwde da' zaguen'. Na' mben le'e barcon' l' gua'a lsaca' che bene' ca' le' Cástor na' Pólux. <sup>12</sup>Na' bžinto' ciuda dan' nzi' Siracusa gan' bega'anto' šone ža. <sup>13</sup>Nga gozza'to' cont bžinto' yež da' nzi' Regio. Na' bega'anto' tža. Nach gwzolao chech<sup>j</sup> be' dan' za' che'el<sup>l</sup>e, na' beza'to' da' yoble beteyo bezžinto' ciuda da' nzi' Puteoli na' bechojto' lo' barcon'. <sup>14</sup>Nga bežagto' bene' lježto' chesonxene' Jesucriston' Puteoli na' gosenabe' gwzoato' len lega<sup>q</sup>ue' to xman. Na' gwdena' gwza' ni'ato' zejto' Roman'. <sup>15</sup>Na' cate' za' žinto' ciuda Roman' goseneze bene' lježto' že' Roman' ba zoa žinto', na' ba<sup>l</sup>e' bedeseleze' neto' latje gan' nzi' Šone Tiend na' yeba<sup>l</sup>e' lagüe ya'a dan' nzi' Che Apio. Cate' ble'e Pablon' lega<sup>q</sup>ue' be'e yela' chox<sup>l</sup>clen che Diosen' na' gwbede' lo' yich<sup>j</sup>lažda'ogüe'. <sup>16</sup>Na' cate' bžinto' Roman', xan soldadw ca'

bene' yezica'chle pres ca' lo na' bene'  
gwnabia' che soldadw ca' nita' na',  
perw be'e latje gwzoa Pablon' toze'  
ga yoble na' con gwzoa to soldadw  
gwdape' le'.

### Pablon' be'e xtiža' Jesucriston' Roman'

<sup>17</sup>Beyon ža bžinto', Pablon' goxe'  
bene' blao che bene' Israel ca' že'  
ciuda Roman'. Na' cate' beyož  
besedobe'na' gože' legaque':

—Bene' migw, bene' gualaž  
checho ca' že' ciuda Jerusalén  
gosezene' neda' gosone' neda' lo  
na' bene' gwnabia' che nación  
Roman', la'czla' bibi bena' contr  
bene' gualaž ca' na' ne' contr  
costumbr che da' xozxta'ocho'.

<sup>18</sup>Nach bene' gwnabia' che nación  
Roman' gosenabyože' na' gosaclaže'  
yososane' neda' cate' gosacbe'ede'  
bibi nona' da' zaca' yesote'nda'.

<sup>19</sup>Nach bene' gualaž ca' že'  
Jerusalénna' bosožoncze' yososane'  
neda'. Da'nan' gwŋaba' tia' lao rey  
Césaren' cont gac yela' justis chia'.  
Perw bi nacho gagua' xya che bene'  
gualaž checho da' gosonde' neda'  
ca'. <sup>20</sup>Da'nan' zoa' nga bačh goxa'  
le'e cont le'eda' le'e na' güe'lena' le'e  
diža'. Na' ncheja' gden ni neče' dan'  
zoa' lez yosban Diosen' bene' ca' ba  
gosat, cacze zan chio' bene' Israel  
zoacho lez.

<sup>21</sup>Nach bene' ca' gose'ene':

—Bibi cart na' la' laoto' nga dan' za'  
distritw Judean' da' bosozoj bene'  
Jerusalén ca' güen' diža' še bin'  
chac len le', na' nono bene' gualaž  
na' la' bene' ne' mal chio'. <sup>22</sup>Perw  
chaclaže'to' yeneto' go'o diža' che  
dan' chejli'o che Jesúsén', le' nezeto'  
doxen chesene' che le'e chejle'le' che'.

<sup>23</sup>Na' bosožie' bia' to ža cont  
šjasene'e le' da' yoble, na' cate' bžin  
žan' bene' zan ja'aque' gan' zoen'.  
Nach Pablon' be'lene' legaque'  
diža' do ža. Be'e diža' che dan'  
cheyała' gwzenagcho che Diosen'  
ben' chnabia' doxen, na' bzejni'ide'  
legaque' da' ca' zjanyoj le'e ley dan'  
bzoj Moisésén' na' len dan' bosozoj  
yezica'chle bene' goso'e xtiža'  
Diosen' cani' che Jesucriston', cont  
yesejle'e che'. <sup>24</sup>Na' bał bene' ca'  
gosejle'e xtižen' da' be'e na' yebałe'  
bi gosejle'en'. <sup>25</sup>Dan' bi gosone'  
toz ca' yesone' xbab, gwzoloa  
besyeya'aque'. Nach Pablon' gože'  
legaque':

—Dan' gož Spiritw che Diosen'  
da' Isaíasén' dan' bzoje' che da'  
xozxta'ocho ca' naquen da' li, žan:

<sup>26</sup>Gwyej gož bene' gualaž chio' ca'  
xtižan':

Da' li yenele, perw na' bitw  
šejni'ile bi zeje dan' yenelen'.  
Na' da' li le'ele, perw bi  
gacbe'ele bi zejen dan' le'elen'.

<sup>27</sup>Nacle bene' güedenag na' bačh  
natcze yichjlažda'olen'.  
Bi chazlaže'le gwzenagle dan'  
chenele na' dan' chle'ele;  
con nacle bene' güedenag.  
Šaca' bi nacle bene' güedenag,  
šejni'ile bi zejen dan' chenele  
na' dan' chle'ele.

Nach yetinjele xtola'le  
cont yeca'an na' yocoba'  
yichjlažda'olen'.

<sup>28</sup>Che'nda' nezele ba gwzolaon na'a  
Diosen' chsele' bene' cheseyixjue'ede'  
xtižen' len bene' bi zjanac bene'  
Israel cont yosozenague' che' na'  
gata' yela' mban chegaque' toli  
tocane'.



<sup>29</sup>Beyož gwna Pablon' ca', beṇe'  
Israel ca' besyežaše' chesacyožchgüe'  
ḥe dan' gwnen'.

<sup>30</sup>Na' ḥop iz nya' gwzoa Pablon'  
ciuda Roman' to yo'o ga chyixjue',  
na' blebe' yogo'loḷ beṇe' jaseṇe'e

le'. <sup>31</sup>Na' bzejni'ide' legaque'  
Diosen' chnabi'e doxen, na' lecz  
bzejni'ide' ḥe Xancho Jesucriston'.  
Nono bžon gwzejni'ide' beṇe',  
na' be'e xtiža' Diosen' con can'  
goclaže'.

# CART DAN' BZOJ POSTLW SAN PABLO CHE BENE' CA' ŽE' ROMA

**1** Neda' Pablo chzoja' le'e. Chona' bite'tez dan' ža Xancho Jesucriston'. Diosen' gwleje' neda' cont naca' postlw che', na' gwsele' neda' cont chyixjue'eda' diža' güen che'. <sup>2</sup>Diosen' ba gwzolağüe' bzende' benachen' diža' güen che', bene' cont gwnita' bene' gosole' xtižen' cani' na' bozozojen'. <sup>3</sup>Na' diža' güen che' Diosen' chzejni'in chio' che' Xi'ine' Xancho Jesucriston'. Len' golje' benach lo diaža' che' da' rey David. <sup>4</sup>Na' Spiritw che' Diosen' blo'en Xancho Jesucriston' naque' dogualje Xi'in Dios na' nape' yela' guac, le' Jesucriston' bebane' ladjo bene' guat ca'. <sup>5</sup>Na' neto', da' chejnilaže'to' Xancho Jesucriston', Diosen' bene' da' güenchgua len' neto', le' gwleje' neto' na' gwsele' neto' chyixjue'eto' xtižen'. Na' gwsele' neto' chyixjue'eton' cont šanch bene' yesejnilaže'ne' na' yosozenague' che'. Na' Xancho Jesucriston' soe' blaoch cate' bene' že' yogo' nación yosozenague' che' Diosen'. <sup>6</sup>Can' naquen, Diosen' ba gwleje' le'e cont nacle lo na' Jesucriston'.

<sup>7</sup>Chzoja' da' nga par yogo' le'e že'le Roman' le'e ba mbej Diosen'

cont nacle lo ne'e. Diosen' chacde' le'e. Na' chnaba' lao Xacho Diosen' len' Xancho Jesucriston' yesaclene' le'e na' yesone' cont soa' cuezle binlo len' xbab da' yo'lo lo' yichjlažda'olen'.

**Pablon' goclaže' šjaņe'e bene' ca' chesejnilaže' Jesucriston' ciuda Roma**

<sup>8</sup>Zgua'tec ni'a le'e Jesucriston' zoe' chaclene' neda' cont choa' yela' choxclen che' Diosen' par yogo' le'e, le' bene' ca' že' doxen lo yežlion' cheso'e diža' can' chejnilaže'le' Criston'. <sup>9</sup>Nezcze Diosen' yogo' ni'a cate' cho' güiža'ne' chnaba' gaclene' le'e. Naque' ben' chejnilaža' do yichj do laža' na' chona' xšinen' choa' diža' güen che' Xi'ine' Jesucriston'. <sup>10</sup>Chnaba' lao Diosen' gone' latje yedena'a le'e še' ca' chnalaže' gona', le' ba chac sša zelaža' yida'. <sup>11</sup>Chaclaža' yedena'a le'e na' gwzejni'ichda' le'e cont soachachle šejnilaže'le' Diosen'. <sup>12</sup>Na' le'e len' neda' soacho gonchachlaže' lježcho dan' chejnilaže'cho Jesucriston'.

<sup>13</sup>Bene' migw, che'nda' nezele zan ni'a ba goclaža' yida' yedena'a le'e, perw bina' gac yedena'a le'e. Chaclaža' yida' gona' xšin Diosen' gan zoale cont šanle gwzenagle che'

Jesucriston' ca ba goc yezica'chle yež ga ba gwy'a. <sup>14</sup>Nezda' cheya<sub>la</sub>' gua' diža' güen che Jesucriston' len yogo'lo<sub>l</sub>' bene', bene' že' ciudan', na' bene' že' yixe', na' bene' chesac letr na' bene' cbi chesac letr. <sup>15</sup>Da'nan' che'nchgüeda' gua' xtižen' len le'e že'le Roman' can' ba bian' ga yoble.

**Diža' güen che Jesucriston'  
nsan' yela' guac che Diosen'**

<sup>16</sup>Bi cheto'eda' gua' diža' güen che Jesucriston', le xtižen' nsan' yela' guac che Diosen' cont bene' chesejle' chen gata' yela' mban chegaque' to<sub>li</sub> toca<sub>ne</sub>. Nsan' yela' guac len neto' bene' Israel, na' lecze len le'e bi nacle bene' Israel. <sup>17</sup>Na' diža' güen che Jesucriston' chzejni'in chio' še bene' yesejnilaže' Jesucriston', Diosen' gone' legaque' bene' güen, na' bi de bichle da' gac goncho cont gaccho bene' güen len le'. Can' nyoj Xtiža' Diosen' žan: "Diosen' že' bene' chejnilaže' le' naque' bene' güen len le' na' gata' yela' mban che' to<sub>li</sub> toca<sub>ne</sub>."

**De xto<sub>la</sub>' be<sub>na</sub>chen'**

<sup>18</sup>Diosen' zoe' yaban' na' ba blo'ede' be<sub>na</sub>chen' to<sub>li</sub> toca<sub>ne</sub> yesesaca'zi' yogo' bene' cbi chesejnilaže' le' na' chesone' da' xinj. Na' da' chesone' da' xinjen' bi chesac<sub>la</sub>že' yesombia' bene' yoble diža' li che Diosen'. <sup>19</sup>Na' Diosen' gone' yesezaca'z'e, le ba zjanezde' zoe' da' ba blo'ede' legaque' can' ba benen'. <sup>20</sup>Bi chle'echo can' nac Diosen', na' bi chle'echo can' zoe' chnabi'e, perw nezecho de yela' guac che' can' bene' bxie' yežlion', na' yogo' be<sub>na</sub>ch chesele'ede' da' ca' ba bene'. Da'nan' bibi de da'

yosode'e be<sub>na</sub>chen' yesene' bi zjanezde' še zoe'. <sup>21</sup>La'cz<sub>la</sub>' zjanezde' zoa Diosen', bi chesonxene' le', neca cheso'e yela' choxc<sub>len</sub> che'. Xbab chegaquen' bibi zacan' na' zjancho<sub>l</sub> yichjlažda'ogüen' yela' bi chejle' chegaquen'. <sup>22</sup>Chesene' zjanaque' bene' sina' perw chesone' xbab da' bibi zaca'. <sup>23</sup>Chosozoe' Diosen' to šla'ale la'cz<sub>la</sub>' naque' la'zelagüe' bene' zaca' na' zoe' to<sub>li</sub> toca<sub>ne</sub>. Na' gualaz le', chesejnilaže' no l gua'a lsaca' che be<sub>na</sub>ch bene' te che, na' no l gua'a lsaca' che be zoa xil, che be žia tap ni'a na'ba' na' che no be xigüe'.

<sup>24</sup>Da'nan' Diosen' ba gwlejyichje' legaque' cont chesone' da' xinj can' ža lo' lažda'ogaquen', na' bale' ba chesonchgüe' da' nac yela' zto' len cuerp chegaquen' toe' len yetoe'. <sup>25</sup>Diosen' gwlejyichje' legaque' cont chesone' yela' zto', le legaque' gosebejyichje' diža' li che Diosen' na' chesejle'e che da' güenlaže'. Chesejnilaže' da' ca' ben Diosen' na' bi chesejnilaže' Dios ben' cheya<sub>la</sub>' šejnilaže'cho na' gonxencho to<sub>li</sub> toca<sub>ne</sub>. Ca'czen' gacšca.

<sup>26</sup>Da'nan' Diosen' gwlejyichje' legaque' cont chesone' yela' zto' con da' žan lo' yichjlažda'ogaque'. Can' chac, nita' no'ole bene' bich chesone' can' cheya<sub>la</sub>' yeson no'olen', san cheseque'e ljež no'olgaque' cont chesone' len legaque' da' bi cheya<sub>la</sub>' yesone'. <sup>27</sup>Na' nita' bene' byo bene' bitw chese'nde' yesenita'lene' no'ole, san chesezelaže' ljež bene' byogaque' nach cheseca'a lježe' cont chesone' yela' zto'. Na' dan' ba chbiayi' cuerp chegaquen', naquen castigw da' cheya<sub>la</sub>' yesezi'e yela' güen da' xinj chen'.

<sup>28</sup>Bi chesaclaže' beṇačhen' yosozenague' che Diosen', da'nan' ba gwlejiychje' legaque' len xbab mal chegaquen'. Da'nan' nite' chesone' da' bi cheyała' yesone'.  
<sup>29</sup>Chesonchgüe' yogō' da' xinj. Beṇe' byo chesata'lene' no'ole bi nac no'ol chegaque', na' no'olen' chesata'lene' beṇe' byo bi nac beṇe' chegaque'. Chesexi'e beṇe'. Chesezelaže' bi da' de che beṇe'. Zjanaque' beṇe' xi'a juisyw, chesegue'e lježe', chesot lježe', chesedile', cheseziye'e, zjanacchgüe' beṇe' güedenag, na' chja'aque' chjaseleje' diža' che beṇe'.  
<sup>30</sup>Chesene' mal che beṇe' yoble, chesegue'ede' Diosen', na' bibi bala'an chesezoe' beṇe' yoble. Chesalaže'. Chesonxen cuine' cheso'e diža' zjanaque' beṇe' güen. Chesaljlaže' bichle da' mal da' yesone'. Bi chosozenague' che xaxne'e.  
<sup>31</sup>Bi chesejni'ide'. Bi chesone' da' ba gosene' yesone'. Bi chesacde' beṇe' yoble. Bi chesyexi'xen che lježe' na' bi chesyeyaše' lježe'.  
<sup>32</sup>Zjanezde' Diosen' že' toli' tocane yesezaca'zi' ben' cheson da' ca'. Na' la'czła' zjanezde' can' že', con nita'cze' chesone' da' xinjen' na' chesyebede' cate' beṇe' yoble chesone' can' cheson legaquen'.

Diosen' zejcz'e to licha da' chone' castigw che xtoła'chon'

**2** Še nacho che beṇe' yoble da' xinjen' chone', bibi zaca' ye'cho Diosen' gague bi xtoła'cho de, note'tez nacho. Cate' chnecho che da' chon beṇe' yoble, na' cheyechjen chio', le' toz can' choncho len da' cheson legaque'.  
<sup>2</sup>Nezecho še

choncho da' xinj ca' nac da' ca' ba gwnian', Diosen' gone' cont saca'zi'cho che xtoła'chon' na' zejcz'e to licha da' gone' ca'.  
<sup>3</sup>¿Chaquele Diosen' bi gone' da' saca'zi'cho cate' chnecho che da' xinj da' chon beṇe' yoble na' chontecho can' chesone'na'? Bi cheyała' gaguecho bi gone' da' saca'zi'cho, le' gonczen'.  
<sup>4</sup>¿Bi chacbe'ele Diosen' nacchgüe' beṇe' šagüe' na' beṇe' xenlaže' len chio' napcho doła' na' chone' ca' cont gacbe'echo da' xinjen' choncho na' yetinjechon?  
<sup>5</sup>Le'e bi chetinjele xtoła'len' nacle beṇe' yid, na' chonle cont Diosen' ža'ache' le'e na' gonche' ga saca'zi'le cate' žin ža' chogbi'e che benachen'. Cana' gwlo'e zejcz'e to licha can' chogbi'en saca'zi' to to beṇač che xtoła'gaquen'.  
<sup>6</sup>Na' cana' to tocho saca'zi'cho o gone' ga gac güen checho con ca' nac da' ba bencho.  
<sup>7</sup>Na' še cheyiljwlaže'cho nac goncho cont šjayzoacho len Diosen' toli' tocane, na' cont yebe Diosen' chio', na' cont gone' gacchcho beṇe' zaca', soacho goncho da' güen bite'teze da' gwžaglaacho. Nach Diosen' gone' cont bancho toli' tocane.  
<sup>8</sup>Na' še zoacho choncho con da' chazlaže'cho na' bi chzenagcho diža' li' che Diosen', san zoacho chzenagcho che da' malen', Diosen' ža'ayichje' chio' na' gone' ga saca'zi'cho toli' tocane.  
<sup>9</sup>Yogo' beṇač beṇe' chon da' xinj saca'zi'e na' žaglagüe', zgua'tec žaglao neto' beṇe' Israel na' tech yezica'chle beṇe'.  
<sup>10</sup>Yogo'cho še choncho da' güen, Diosen' gone' cont šjayzoacho mbalaz len le' na' gone' cont gacxencho, na' gone' cont soacho binlo len xbab dan' yo'o lo'

yichjlažda'ochon'. Zgua'tec gone' ca' len neto' nacto' bene' Israel, na' techle gone' ca' len le'e bi nacle bene' Israel.

<sup>11</sup>Toz ca chon Diosen' len yogo'lo' benach. <sup>12</sup>Bene' bi zjanombi'e ley dan' bzoj da' Moisésen' na' chesone' da' xinj, Diosen' gone' yesebiaye'e gague lagüe dan' bi zjanombi'e leyna', san lagüe dan' zjanezde' chesone' da' xinj. Na' bene' zjanombi'e leyna' na' chesone' da' xinj, Diosen' gone' ga yesebiaye'e da' bi chesone' can' žanna'. <sup>13</sup>Gague con yenecho can' ža leyna' cont Diosen' ne' naccho bene' güen len le', san goncho can' žanna', nach Diosen' ne' naccho bene' güen len le'. <sup>14</sup>Bene' bi zjanac bene' Israel na' bi zjanombi'e ley dan' bzoj Moisésen', tgüeje lo' lažda'ogaquen' chonen cont chesone' da' güen can' ža leyna' cheya'la' yesone', na' la'cz'la' bi zjanombi'e leyna' dan' zoa yichjlažda'ogaquen' chžian bia' yesone' da' güen, naquen ca to ley len legaque'. <sup>15</sup>Nacbia' zjanezde' lo' lažda'ogaque' cheya'la' yesone' da' ca' nžia bia' leyna' yesone', le chesone' late' güejen. Na' zjanezde' lo' yichjlažda'ogaquen' še da' chesone' naquen güen o še naquen mal. <sup>16</sup>Can' gac caten' žin ža Diosen' gone' lo' na' Jesucriston' choglagüen' che to tocho ca nac xbab chechon' da' ba bencho na' bichle da' ba bencho bagaše'ze še naquen güen o še naquen mal. Can' chnia' cate' chyixjue'eda' diža' güen che Jesucriston'.

**Bene' Israel bi chesone' can' ža' leyna'**

<sup>17</sup>Na' le'e nacle bene' Israel gualaž chia', šeca chonle xbab zoale binlo

len Diosen' da' nsedle ley dan' bzoj Moisésen', na' šeca cha'laže'le dan' nombia'le Diosen'. <sup>18</sup>Nezele bin' chazlaže' Diosen' na' chacbe'ele bin' nac da' güen na' bin' nac da' mal, le nsedle xtižen'. <sup>19</sup>Chaquele zaca'le cont co'ole be'ni' lo' yichjlaždao' bene' bi nombia' Diosen'. <sup>20</sup>Na' chaquele guac gwzejni'ile bene' cheson clele nac cheya'la' yesone', na' chaquele guac gwsed gwlo'ele bene' cobe xtiža' Diosen', le nombia'le diža' li chen' na' len nšan' doxen da' cheya'la' nezele. <sup>21</sup>Le'e chsed chlo'ele bene' yoble, žbixchen' bi chsed chlo'e cuinle? Le'e žale bi cheya'la' no cuan, žbixchen' chbanle? <sup>22</sup>Le'e žale nono gata'len no'ole bi nac no'ol che', na' no'olen' bi gata'lene' ben' bi nac bene' che', žbixchen' chonle da' che'le bene' bi gone'? Le'e chgue'ele l' gua'a lsaca' da' chesejnilaže' bene' žbixchen' chjalanle bi da' de lo' yo'o gan' že' l' gua'a lsaca' ca'? <sup>23</sup>Cha'laže'le da' nsedle ley da' bzoj Moisésen', perw chzoale Diosen' to šla'ale da' bi chonle can' ža leyna'. <sup>24</sup>Chac can' nyoj Xtiža' Diosen' žan: "Da' chonle da' xinj, bene' bi zjanac bene' Israel chesene' mal che Diosen'."

<sup>25</sup>Še choncho can' ža leyna' zaca'czen dan' ba gwzoacho señw lo' cuerp chechon' da' zejen chio' bene' Israel naccho yež che Diosen'. Perw še bi choncho can' ža leyna', bibi zejen da' ba gwzoacho señw dan' nzi' circuncisión. <sup>26</sup>Bene' bi naque' bene' Israel bi zoe' seña', na' še chone' can' ža ley che Diosen', Diosnan' ne' naque' txen len chio' zoacho seña'. <sup>27</sup>Na' bene' cheson can' ža leyna', la'cz'la' bi zjanaque'

be<sub>ne</sub>' Israel na' bi zjazoe' se<sub>ñw</sub> dan' nzi' circuncisión lo cuerp che<sub>n</sub>, chesone' cont nacbia' de xto<sub>la</sub>' le'e nsedle leyna' perw bi chon<sub>le</sub> can' žanna'. <sup>28</sup>Bi n<sub>acho</sub> nacccho dogualje be<sub>ne</sub>' Israel da' na'ocho costumbr che naci<sub>ón</sub> chechon' na' dan' zoa se<sub>ñw</sub> lo cuerp chechon'. <sup>29</sup>Naccho dogualje be<sub>ne</sub>' Israel gague dan' choncho can' ža leyna' da' nyojen, san da' chejni<sub>laže</sub>'cho Diosen' do yichj do laže'cho na' ba be'cho latje bocobe Spiritw che Diosen' yichj<sub>laže</sub>'da'ochon'. Da'n<sub>an</sub>' Diosen' güe'e diža' güen checho, la'cz<sub>la</sub>' še notno ch<sub>ne</sub> güen checho.

**3** ¿Bi da' güen da' chga'a<sub>n</sub> che chio' be<sub>ne</sub>' Israel da' goljcho lo diaža che da' xozxta'ochon' še ca'? ¿Bi da' güen da' chga'a<sub>n</sub> da' ba zoacho se<sub>ñw</sub> da' nzi' circuncisión? <sup>2</sup>Da' xen da' chga'a<sub>n</sub>. Na' da' blaoch da' chga'a<sub>n</sub>, Diosen' bnežjue' da' xozxta'ocho ca' Xtižen' da' nyojen par yogo' be<sub>nach</sub>. <sup>3</sup>Na' la'cz<sub>la</sub>' zan be<sub>ne</sub>' gualaż checho bi gosejle'e che<sub>n</sub>, bi n<sub>acho</sub> Diosen' bi gone' güen can' gwne' gone' len chio' naccho naci<sub>ón</sub> che'na'. <sup>4</sup>Goncze' con can' že'na'. Yogo' ni'a Diosen' ch<sub>ne</sub>' diža' li, la'cz<sub>la</sub>' še žin ža cate' yogo'<sub>lo</sub> be<sub>ne</sub>' yesene' diža' güen<sub>laže</sub>'. Chac can' nyoj Xtiža' Diosen' žan:

Le' gwlo'edo' be<sub>nachen</sub>' le cho'o diža' li.

Na' ca nac be<sub>ne</sub>' ca' cheson xbab bi chono' can' žon', yesacbe'ede' chonczo' can' žo'na'.

<sup>5</sup>Ba<sub>l</sub> be<sub>ne</sub>' chesene' cate' choncho da' xin<sub>j</sub> chlo'en ca be<sub>ne</sub>' güen nac Diosen', na' chesene' Diosen' bi zeje' to li še chone' cont saca'zi'cho che

da' xin<sub>j</sub> dan' chonchon'. <sup>6</sup>Clelen' chesone' xbab. Šaca' Diosen' bi chone' da' zej to<sub>li</sub>, bi gac gone' yela' justis che chio' be<sub>nach</sub>. Perw gonczen'.

<sup>7</sup>Na' nita' ba<sub>l</sub> be<sub>ne</sub>' chesone' xbab clele, chesene': "Cate' choe'cho diža' güen<sub>laže</sub>' chlo'en ca be<sub>ne</sub>' güen juisyw nac Diosen' da' cho'e pur diža' li. Da'n<sub>an</sub>' bi cheya<sub>la</sub>' ne' napcho do<sub>la</sub>' cate' chon<sub>laže</sub>'cho."  
<sup>8</sup>Lecze cheson<sub>laže</sub>' ba<sub>l</sub> be<sub>ne</sub>' chesene' neda' bzejni'ida' guaque goncho da' mal cont gac da' güen. Da' cheya<sub>la</sub>'cze gon Diosen' cont sacazi' note'tez be<sub>ne</sub>' ža ca'.

#### Yogo'cho napcho do<sub>la</sub>' lao Diosen'

<sup>9</sup>¿Bixen' ša? ¿Naquech chio' be<sub>ne</sub>' Israel be<sub>ne</sub>' güen<sub>ch</sub> ca be<sub>ne</sub>' bi zjanac be<sub>ne</sub>' Israel? Bi naccho ca'. Ba bzejni'ida' toz ca nac che chio' be<sub>ne</sub>' Israel len che be<sub>ne</sub>' bi zjanaque' be<sub>ne</sub>' Israel, yogo'cho de xto<sub>la</sub>'cho. <sup>10</sup>Na' Xtiža' Diosen' nyojen žan:

Nono zoa be<sub>ne</sub>' zej to li<sub>cha</sub>, ne toe'.

<sup>11</sup>Nono n<sub>la</sub>' be<sub>ne</sub>' chejni'i cont gwzenague' che Diosen', nono n<sub>la</sub>' be<sub>ne</sub>' cheyiljue' le'.

<sup>12</sup>Yogo' be<sub>nach</sub> ba zjanque'e nez mal.

Yogüe' ba zjanaque' ca to da' bibi zaca'.

Ne to nono zoa be<sub>ne</sub>' chone' da' güen.

<sup>13</sup>Len xtiža'gaquen' chesexoayague' be<sub>ne</sub>'.

Ca zban ch<sub>la</sub>' cho'a ba che be<sub>ne</sub>' guat še bi nyeyjon bin<sub>lo</sub>, ca' zban ch<sub>la</sub>' xtiža'gaquen'.

Na' ca venen che be<sub>l</sub> znia nac xtiža'gaquen' da' cheso'e.

14 Pur diža' mal diža' bya' že'  
cho'agaquen'.  
15 Con bize da' chosode'ede' cont  
chesote' bene'.  
16 Gate'teze chja'aque' zjanse'e  
yela' yaše' yela' zi' ca nac da'  
chesone'.  
17 Bi chesezoe' binlo len lježe'.  
18 Bi chesežebe' Diosen' len bi da'  
mal chesone'.  
19 Na' nezecho Diosen' bene' chio'  
bene' Israel ley chen'. Da'nan' ne  
tocho bi chac nacho bibi xtoła'cho  
de, le bi choncho can' žanna'.  
Nachen' Diosen' že' si'cho castigw  
che xtoła'chon', con can' že' che  
yogo' benačh, le yogüe' bi chesone'  
can' ža ley chen'. 20 Bi nacho zoa  
bene' naque' bene' güen len Diosen'  
da' chone' yogo' da' ža leyna', le  
notno chon ca'. Leyna' chlo'en chio'  
naccho bene' güen da' xinj.

**Bene' šejnilaže' Jesucriston'  
gague' bene' güen len Diosen'**

21-22 Na' na'a Diosen' ba blo'e  
can' goncho cont gaccho bene'  
güen len le', na' bich bi že' che  
da' ca' ža leyna' cheyala' goncho,  
san že' cheyala' šejnilaže'cho  
Jesucriston' cont gaccho bene' güen  
len le'. Doxen Xtiza' Diosen' dan'  
nyojen cani'te chzejni'in cheyala'  
šejnilaže'cho Jesucriston' cont  
gaccho bene' güen. Na' toz can'  
chon Diosen' len yogo'lol benačh.  
23 Le yogo'cho ba bencho da' xinj,  
na' ne tocho bi naccho bene' güen  
can' chaclaže' Diosen' gaccho.  
24 Perw na' Diosen' nži'ilaže'de' chio',  
na' gague bi chzi'e par že' naccho  
bene' güen len le', le Cristo Jesúsen'  
ba bnitagüe' xtoła'chon'. 25 Diosen'

gwsele' Jesucriston' bnežjw cuine'  
gosote'ne' neche xtoła' benačh. Na'  
note'teze bene' yesejnilaže'ne' nitlao  
xtoła'gague'. Diosen' gwsele'ne'  
cont nacbia' zeje' to licha da'  
gwdape' yela' chxenlaže' bezi'xene'  
xtoła' bene' ca' gwnita' cani' bene'  
gosejnilaže'ne'. 26 Na' lecze gwsele'ne'  
cont nacbia' zeje' to licha da' že' che  
yogo' chio' chejnilaže'cho Jesúsen'  
naccho bene' güen.

27 Bi cheyala' gonxen cuincho  
güe'cho diža' naccho bene' güen.  
Šaca' choncho doxen dan' ža leyna'  
zaca' gonxen cuincho güe'cho  
diža' naccho bene' güen, perw  
nono chon can' ža leyna'. Con da'  
chejnilaže'cho Jesucriston', da'nan'  
zaca' cont yeyaccho bene' güen len  
Diosen'. 28 Can' naquen, note'tez  
bene' chejnilaže' Jesucriston',  
Diosen' že' naque' bene' güen len le'  
da' chejnilaže'ne', gague lagüe dan'  
chone' can' ža leyna'.

29 ¿Chaquele Diosen' naque' Dios  
che chio' naccho bene' Israel ngaze?  
Lecze naque' Dios che bene' bi zjanac  
bene' Israel. 30 Le toze Diosen' zoa  
na' len' že' che yogo'cho naccho bene'  
güen len le' con še chejnilaže'cho  
Jesucriston', na' toz can' chone'  
len chio' zoacho señw dan' že'  
circuncisión na' len bene' cbi zjazoa  
señwna'. 31 ¿Chaquele choncho  
leyna' ca to da' bibi zaca' da' žacho  
cheyaccho bene' güen len Diosen'  
cate' chejni'laže'cho Jesucriston'? Bi  
chonchon ca to da' bibi zaca', san  
chlo'echo naquen da' zaca'chgua.

**Can' ben da' Abraham**

**4** Na' le'e bene' gualaž chia' len  
le'e bi nacle bene' Israel, da'



xozxta'oto' Abraham ĩbixe n̄acho che'? <sup>2</sup>Šaca' Abrahanna' bene' doxen can' ža leyna', zaca' gonxen cuine' da' naque' bene' güen, san bi bene' doxen can' žanna' na' bibi gota' da' zaca' gonxen cuine' lao Diosen'.

<sup>3</sup>Quinga ža Xtiža' Diosen' da' nyojen: "Abrahanna' gwejnilaže' Diosen' na' da'nan' Diosen' gwne' naque' bene' güen len le'." <sup>4</sup>Cate' to bene' chone' žin, chone' gan laxjue' na' xan žinna' bi chone' to goclen cate' chnežjue' laxjue'.

<sup>5</sup>San to goclen chon Diosen' že' che chio' chejnilaže'chone' naccho bene' güen len le', le bi choncho da' güen. Choncho da' xinj, na' Diosen' chñitlagüe' da' xinj chechon še chejnilaže'chone'. <sup>6</sup>Lecz da' Davin' be'e diža' ca mba chzoa ben' chñitlao Diosen' xtolen' na' bibi cuent chone' še ba ben ben' da' güen o ba bene' da' mal. <sup>7</sup>Bzoy Davin' da' nga žan:

Mba zoacho še ba bezi'xen  
Diosen' che da' xinj da' ba  
bencho.

Mba zoacho še ba bñitlagüe'  
xtola'chon'.

<sup>8</sup>Mba zoacho še Diosen' že'  
checho bibi xtola'cho de.

<sup>9</sup>¿Cahauele neto'zen' zoato' señw dan' že' circuncisión gac soato' mba can' gwnen'? Gague neto'zen'. Lencze le'e bi zoale señw dan' že' circuncisión guac soale mba. Nezecho Diosen' gwne' da' Abrahanna' naque' bene' güen len le' da' gwejnilaže'ne'. <sup>10</sup>Gwne' che da' Abrahanna' naque' bene' güen len le' cate' bina' soe' señw dan' že' circuncisión, gague beyož gwzoen'na' gwne' ca'. <sup>11</sup>Na'

gwdechle gwzoe' señwna' cont gwneзде' Diosen' bñitlagüe' xtole' da' ba chejnilaže'ne'. Na' da'nan' Abrahanna' naque' xozxtao' yogo' bene' chesejnilaže' Diosen' cont ñitlao xtola'gaquen' la'czla' bi zjazoe' señwna'. <sup>12</sup>Na' lecze naque' xozxtao' neto' bich bi xtola'to' de da' chejnilaže'to' Diosen', neto' zoato' señw dan' že' circuncisión. Perw gague naque' xozxta'oto' da' zoato' señwna', san da' chejnilaže'to' Diosen' can' gwejnilaže' da' Abrahanna' le'.

**Diosen' bene' güen len da'  
Abrahanna' da' gwejnilaže'ne'**

<sup>13</sup>Diosen' gože' da' Abrahanna' gone' cont le' len bene' za' yesalje lo diaža' chen' yesac chegaque' doxen yežlion'. Gož Diosen' da' Abrahanna' ca' da' gwejnilaže'ne'. Da'nan' gwna Diosen' naque' bene' güen gague da' bene' can' ža leyna'. <sup>14</sup>Šaca' ža Diosen' con bene' yeson doxen can' ža leyna' yesac chegaque' yežlion', bibi zaca' šejnilaže'cho Diosen' šeca', na' bibi zejen da' gwne' gone' güen len bene' za' yesalje lo diaža che da' Abrahanna'. <sup>15</sup>Na' leyna' nsan' castigw che benachen', le bi chesone' can' žanna. Šaca' bibi ley de da' gwžian bia' bi da' cheyała' gon chio' benach, bibi xtola'cho de šeca'.

<sup>16</sup>Can' naquen, note'teze bene' chesejnilaže' Diosen', none' legaque' ca xi'in diaža che da' Abrahanna', na' Diosen' gone' cont legaque' yesac chegaque' yežlion' can' gože' da' Abrahanna'. Gague neto'zen' nombia'to' ley da' bzoy da' Moisésen' gac cheto' yežlion'. Na' nacczen da' li

gon Diosen' güen len note'tez bene' chejnilaže'ne'. Na' gone' ca' cont gacia' to goclen chone' len bene' ca' chesejnilaže'ne' can' gweyjnilaže' da' Abrahanna' le'. Na' da' non Diosen' cuent Abrahanna' naque' ca xozxtao' yogo' chio' chejnilaže'chone', <sup>17</sup> chac can' gože' da' Abrahanna' gwne': "Ba nzoa' le' gaco' xozxtao' bene' še' nación zan." Dios ben' gweyjnilaže' da' Abrahanna' nape' yela' guac cont yosbane' bene' guat, na' chac chone' cont gac da' bina' gac.

<sup>18</sup>Abrahanna' bi gwneзде' nac gac can' gwna' Diosen' gac, san con gwzoe' gweyjele'e che Diosen' na' gwzoe' lez gon Diosen' cont nita' bene' zan xi'in diaža' che'.

<sup>19</sup>Gwzoacze' gweyjele'e can' gož Diosen' le' la'czla' ba naque' bene' gole par soa xi'ine', le ba zejgale' to gayoa iz, na' no'ol che' Sara naque' bene' güiž. <sup>20</sup>Gwzoateze' gweyjnilaže' Diosen' na' bi gocžjlaže' len da' gož Diosen' le' gone', san gwzoačache' gweyjnilaže'ne' na' benxene'ne'.

<sup>21</sup>Abrahanna' gwneзде' Diosen' nape' yela' guac cont gone' can' gwnen'. <sup>22</sup>Da'nan' Diosen' gwne' naque' bene' güen da' gweyjnilaže'ne'.

<sup>23</sup>Na' dan' nyojen žan Diosen' gwne' naque' bene' güen da' gweyjnilaže'ne', gague nyojen ca' che Abraham na'zen'. <sup>24-25</sup>Lece nyojen che yogo'cho, le Diosen' lece že' naccho bene' güen len le' da' chejnilaže'chone'. Cont gwnitlagüe' xtola'chon' Diosen' gwsele' Xancho Jesucriston' bnežjw cuine' gosote' le'. Na' Dios ben' chejnilaže'cho bečhis bosbane'ne'

ladjo bene' guat ca' cont beyone' chio' bene' güen.

### Zoacho binlo len Diosen' da' chejnilaže'cho Jesucriston'

**5** Na' ca nac chio', da' ba chejnilaže'cho Xancho Jesucriston', Diosen' ba gwne' naccho bene' güen len le', na' lecze da'nan' ba zoacho binlo len le'. <sup>2</sup>Da' chejnilaže'cho Jesucriston', Diosen' zoacze' nži'ide' chio'. Na' chebecho nezecho gone' soacho mbalaz juisyw can' zoa le' cate' šjayzoacho txen len le'. <sup>3</sup>Na' lecze chebe chezaque'cho cate' chzaca'zi'cho, le nezecho še gonxenlaže'cho cate' chzaca'zi'cho, nach gwyo gwchejecho cate' de bichle da' saca'zi'cho. <sup>4</sup>Na' še chonxenlaže'cho cate' chzaca'zi'chon', chlo'en zoačachcho chejnilaže'cho Diosen'. Na' še zoačachcho chejnilaže'chone', nezecho šjayzoacho txen len le'. <sup>5</sup>Na' dan' zoacho lez šjayzoacho txen len Diosen', bi nacho naquen to da' güenlaže' chaquecho gac checho ca'. Le Diosen' ba gwsele' Spiritw čhen' zoan len chio' na' čhnen lo' lažda'ochon' žan chacchgüe Diosen' chio'.

<sup>6</sup>Chio' benačh naccho bene' güen da' xinj na' bibi chac goncho cont yezoacho binlo len Diosen', perw bžin ža cate' Diosen' gwsele' Criston' bnežjw cuine' gote' neče chio' napcho doła'. <sup>7</sup>Nono zoa bene' gwnežjw cuine' yesot bene' le' neče bene' yoble, la'czla' še nac ben' bene' güen, o še gwchojlja tgüej bene' yeyaxjde' gwnežjw yela' mban che' yesote'ne' gualaz

to bene' šagüe'. <sup>8</sup>San Diosen' blo'ede' chacchgüede' chio' da' gwsele' Criston' gote' neče chio' la'czla' zoacho choncho da' xinj. <sup>9</sup>Na' dan' got Criston' neče chio', Diosen' že' naccho bene' güen da' chejnilaže'cho le'. Na' Criston' lecze gone' cont bi saca'zi'cho cate' žin žan' Diosen' chogbi'e che yogo'lol' bene'. <sup>10</sup>Can'a bi gwzoacho binlo len Diosen'. Perw Xi'ine' Criston' bnežjw cuine' gote' neče chio' cont bozoe' chio' binlo len Diosen'. Na' na'a ba zoacho binlo len le' na' nezecho zoacze Criston' chone' cont žin ža šjayzoacho len Diosen'. <sup>11</sup>Na' lecze chebecho nombia'cho Diosen', le Xancho Jesucriston' ba bozoe' chio' binlo len le'.

**Adánna' gwleque' da' mal yežlio nga, san Jesucriston' gwleque' da' güen**

<sup>12</sup>Yela' güedenag che bene' nechw ben' le Adán gwxe da' malen' yežlio nga, na' da' malen' nsan' yela' got. Can' goc, gwzolao chesat yogo' benachen', le yogo'lole' chesone' da' mal. <sup>13</sup>Benachen' gwzolao chesoncze' da' xinjen' cate' gwzoate da' Adán, la'czla' bina' gata' ley dan' bzoj da' Moisésen'. Na' gan' bibi ley de, nono chon xbab še cheson bene' da' xinj. <sup>14</sup>Perw na' gwzolaon len da' Adánna' na' len bene' gwnita' caten' gwbane', bžinten len bene' gwnita' caten' gwban Moisésen', yogo'lole' gosate' can' chesat bene' ža na'aža. La'czla' legaque' bi gosone' güedenag len to da' gož Diosen' legaque' can' ben Adánna', bia'cze yogüe' gosone' da' xinjen'. Adánna' gwleque' yela' goten', san Jesucriston' ben' ba naquen sela'

Diosen', len' bxie' yela' mban toli tocane.

<sup>15</sup>iNža' xen ca dan' gwxe caten' Adánna' bene' da' xinjen' na' ca dan' gwxe cate' Diosen' gwsele' Jesucriston'! Yogo' chio' benach gatcho lagüe da' ben Adánna' da' xinjen', san yogo' chio' benach guac soacho mba da' nži'i Diosen' benachen' na' gwsele' Xi'ine' Jesucriston' cont chaclene' note'tezcho. <sup>16</sup>Toz Adánna' bi bzenague' che Diosen' na' da'nan' Diosen' gwne' yesezaca'zi' yogo'cze benachen' toli tocane che xtołagaquen'. Nach Diosen' gwsele' toz bene' güen cont bnitlagüe' xtoła' note'tezcho chejnilaže'chone' na' beyone' chio' bene' güen la'czla' da' zan da' xinj ba bencho. <sup>17</sup>De yela' got che chio' benach neče da' xinj da' ben toz ben' gože' Adán, san mbalaz juisyw chac che chio' benach neče da' güen da' ben Jesucriston' bnežjw yela' mban che' neče yogo'cho. Diosen' nži'ide' chio', nachen' bibi chchixjue' chonze' chio' ca bene' güen še chejnilaže'cho Jesucriston', na' none' chio' yela' mban toli tocane cont nabia'cho txen len Jesucriston'.

<sup>18</sup>Can' naquen, da' ben toz Adánna' da' xinj, Diosen' gwchogbi'en saca'zi' yogo' benachen' che xtołagaquen'. Na' neče da' güen da' ben toz Jesucriston' da' bnežjw cuine' gosote'ne', da'nan' nitlao xtoła' note'tezcho chejnilaže'chone', cont none' chio' ca bene' güen. <sup>19</sup>Len da' xinj dan' ben Adánna' cate' bene' güedenag len Diosen', gwxe da' xinj da' chon yogo' chio' benach. Na' da' bzenag Jesucriston' che Diosen'

na' bnežjw cuine' cont n̄itlao xtol̄a' beṇachen', da'n̄an' note'tezcho chejnilaže'chone' none' chio' ca beṇe' güen.

<sup>20</sup>Cate' Diosen' bnežjue' ley chen' da' bzoj Moisésen' na' gwcha'o gwxench da' xin̄j da' goson beṇachen', le bi bosozenague' chen. Perw na' la'czla' gwcha'o gwxen da' malen', gwcha'o gwxench yela' ži'ilaže' che Diosen' len chio' beṇačh.

<sup>21</sup>Can' chac, de yela' got che yogo' chio' beṇačh da' naccho beṇe' chon da' xin̄j, ca'cze Diosen' n̄ži'ide' yogo' chio' beṇačh cont note'tezcho gaccho beṇe' güen len le' na' gata' yela' mban checho toli' tocaṇe še šejnilaže'cho X̄ancho Jesucriston'.

**Bi cheyala' soacho goncho da' xin̄j san soacho goncho can' chazlaže' Criston'**

**6** ¿Nacxen' cheyala' goncho na'a ba nezecho n̄ži'ilaže' Diosen' chio'? ¿Gonchcho da' malen' cont yezi'xenchcze Diosen' che chio'? <sup>2</sup>Gague can' goncho. Cate' gwzolao chejnilaže'cho Criston' bich goclaže'cho n̄abia' da' malen' chio'. Da'n̄an' guac n̄acho ba gotcho len da' xin̄jen cont bich gonchon. <sup>3</sup>¿Bi chache'ele can' zejen da' gwzoacho nis? Zejen da' chejnilaže'cho Jesucriston' ben' got neče chio', bačh naccho ca to beṇe' guat len da' xin̄jen' cont bich gonchon. <sup>4</sup>Na' dan' gwzoacho nis lecze guac n̄acho bgaše'cho can' bosocuaše' Criston'. Na' con can' bečhis bosban X̄ancho Diosen' Criston' ladjo beṇe' guaten' len yela' guac xen che', ca'czen' bene' len chio', ba bocobe' yichjlažda'ochon' cont soa cuezcho goncho da' güen.

<sup>5</sup>Na' can' žacho ba gotcho len da' xin̄jen' dan' chejnilaže'cho Criston', lecze guac n̄acho bečhis bosban Diosen' chio' can' bečhis bosbane' Criston', le ba bocobe' yichjlažda'ochon'. <sup>6</sup>Can'a' ne' chnabia' da' malen' chio' len yogo' da' choncho. perw na'a da' chejnilaže'cho Criston' ben' got neče chio', ba none' chio' ca to beṇe' guat len da' xin̄jen' cont bich gonchon na' cont da' mal dan' yo'o lo' yichjlažda'ochon' bich soan n̄abian' chio'. <sup>7-8</sup>Beṇe' ba got bich zoe' chone' da' xin̄j, na' ca' nacczen len chio' chejnilaže'cho Criston', bich che'necho n̄abia' da' malen' chio' na' bich zoacho chzenagcho chen. Na' chejle'cho gone' cont soacho bancho len le' na'a na' toli' tocaṇe. <sup>9</sup>Na' nezecho Criston' beyas bebane' ladjo beṇe' guaten' na' gwbat gate' da' yoble le bich soe yela' goten' le'. <sup>10</sup>Na' cate' gosote' Criston', tni'aze bnežjw yela' mban che' neče xtol̄a'chon'. Bich chyažjen gwnežjw cuine' da' yoble, san ba zoalene' Diosen' chone' con bi da' chazlaže' Diosen'. <sup>11</sup>Nach dan' gote' neče xtol̄a'chon', cheyala' soacho goncho cont da' mal dan' yo'o lo' yichjlažda'ochon' bich n̄abian' chio', na' cheyala' soacho txen len X̄ancho Jesucriston' cont goncho dan' chazlaže' Diosen'.

<sup>12</sup>Da'n̄an' bi güe'cho latje n̄abia' da' malen' cuerp chechon' dan' nac da' gat na' goncho bi da' xin̄j da' selažen'. <sup>13</sup>Bi cheyala' gon cuincho lo na' da' gwxiyen' cont goncho da' mal len cuerp chechon'. Cheyala' gon cuincho lo na' Diosen' cont goncho da' güen. Guac n̄acho

Diosen' bechis bosbane' chio' ladjo beñe' guaten' da' bocobe' yichjlažda'ochon'. <sup>14</sup>Bich nabia' da' malen' chio', le nezecho Diosen' chbede' chio' gague neche da' choncho can' ža ley dan' bzoj da' Moisés, san dan' naque' beñe' šagüe'.

**Beñe' chzenag che da' malen' naque' ca beñe' zoa xan, beñe' chnabia' le' cont gonche' da' malen'**

<sup>15</sup>¿Gontezcho da' xinjen' da' nezecho nži'i Diosen' chio' na' nezecho bi chone' cuent še ba bencho da' ža leyna' cheyaļa' goncho? Bitw goncho ca'. <sup>16</sup>Nezecho še ba chzenagcho che to beñe' cont goncho bite'tez že', choe'cho latje chnabi'e chio'. Na' ca'cze naquen len chio' še chzenagcho che da' malen' na' chontezchon, ba chnabia' da' malen' chio' še ca'; na' bi gac šjayzoalencho Diosen' toli tocane še ca' choncho. San še zoacho chzenagcho che Diosen', nachen' zejczcho choncho da' güen na' šjayzoalencho Diosen' toli tocane. <sup>17</sup>Na' choa' yela' choxcen che Diosen' na'a ba chzenagle do yichj do laže'le xtiza' Diosen' da' ba bzejni'ito' le'e, na' bich chzenagle che da' malen' can' beñe' cana'.

<sup>18</sup>Diosen' ba bebeje' le'e lo' da' malen' na' ba ben cuinle lo ne'en cont soale gonle da' güen. <sup>19</sup>Ba bzejni'ida' le'e bia' diža' che bi da' chac che chio' beñach cont šejni'ile. Nachen' chnia' le'e, con can' gwzoale bentezle da' nac da' yela' zto' len cuerp chelen', na' benchguale da' malen', lecze can' cheyaļa' gon cuinle lo na' Diosen' gonle da' güen cont chazlaže' Diosen' can' chonlen'.

<sup>20</sup>Caten' ne' zejcho choncho da' malen' bi chzenagcho che Diosen' neca choncho da' güen. <sup>21</sup>Na' bibi banez na' le'echo che da' mal ca' ba bencho, san na'a ba cheto'echo chen. Beñe' ca' ne' chesontez'e da' malen' gata' castigw chegaque' toli tocane. <sup>22</sup>Na' chio', Diosen' ba bebeje' chio' lo da' malen' na' yo'ocho lo ne'ena'. Da'n'an' zezech choncho da' güen can' chazlaže' Diosen' na' šjayzoacho len le' toli tocane. <sup>23</sup>Še zoacho choncho da' xinjen', gata' castigw checho toli tocane cate' gatcho. San Diosen' chonđadze' chio' to da' güen juisyw, chio' chejnilaže'cho Xancho Jesucriston', chone' cont šjayzoacho len Diosen' toli tocane.

**Naccho ca to beñe' ba got len ley da' bzoj Moisésen'**

**7** Beñe' migw, da' nga žia' le'e, le nombia'le ley dan' bzoj Moisésen'. Nezczecho con beñe' ca' zjamban cheyaļa'a'cze yosozenague' che leyna'. <sup>2</sup>Ca to no'ole nšagna', šlac mban beñe' che' cheyaļa' soalene' le', le can' chon leyna' mandadw gone'. Na' še ba got beñe' chen', cana' ba bele' len leyna' da' chon mandadw soalene' beñe' chen'. <sup>3</sup>Še no'olen' soalene' beñe' yoble šlac ne' mban beñe' chen', nape' doļa' len leyna' da' chzoa xtoe'. Perw na' še ba got beñe' chen', leyna' žan ba guac yošagna'lene' beñe' yoble na' bi nacho chone' da' xinj yošagne'e.

<sup>4</sup>Beñe' migw, can' naquen len chio' chejnilaže'cho Criston'. Ba belacho len leyna' da' žan saca'zi'cho che xtoļa'chon' toli tocane. Na' ba gwnitlao xtoļa'chon' dan' bnežjw Criston' yela' mban chen' gosote'ne'

le'e yag cruzen'. Da'nan' ba zoacho txen len Criston' ben' beban ladjo bene' guaten', na' zoacho cont goncho can' chazlaže' Diosen'.  
 5Can' zoacho chzenagcho che da' malen' dan' yo'o lo' yichjlažda'ochon'. Na' cate' gwnezecho can' ža ley dan' bzoj da' Moisésen', nachle be'laže'cho bencho da' malen', na' da' malen' nsan' castigw checho toli tocane cate' gatcho. 6Perw na'a ba belacho len ley da' žan cheyla' si'cho castigw toli tocane, le Criston' beque'e xtoła'chon'. Na' ba chaclaže'cho goncho can' chazlaže' Diosen', na' chonchon gague cont na Diosen' naccho bene' güen len len', san chonchon dan' ba bocobe Spiritw chen' yichjlažda'ochon'.

**Bi güe'cho latje nabia' da' malen' chio'**

7Bi cheyla' goncho xbab nac to da' mal ley dan' bzoj da' Moisésen'. Leyna' bzejni'in neda' bi dan' bi cheyla' gona' cont gocbe'eda' chona' da' xinj. Na' gwnezda' naquen mal chzelaža' bi da' de che bene', le leyna' žan: "Bi selaže'le bite'teze da' de che bene'." 8Na' cate' gwnezda' can' ža leyna', nachle da' mal dan' yo'o lo' yichjlažda'oguan' benen gwzelaže'cha'. Da' li cate' bi nezecho can' ža leyna', bi nezecho še choncho da' xinj. 9Neda' gwzoa' to tiemp bi gocbe'eda' bi cheyla' selaža'. Perw cate' bžin ža gwnezda' nžian bia' bi cheyla' selaža', nachle bzenagcha' che da' mal da' yo'o lo' yichjlažda'oguan' na' gwzelaže'cha'. Da'nan' gwnezda' cheyla' sia' castigw che xtołan' toli tocane.  
 10Leyna' nyojen cont gwzenagcho chen na' gata' yela' mban checho

toľi tocane, perw da' bi bzenaga' chen, bzejni'in neda' gata' castigw chia' toľi tocane. 11Can' goc, cate' bembia' leyna', da' malen' da' yo'o lo' yichjlažda'oguan' gwxoayaguen neda' cont bencha' da' malen', nach gwchoglaon chia' gata' castigw che xtołan' toľi tocane.

12Ley dan' bzoj Moisésen' nacczen che Dios, na' to to da' nžian bia' goncho naquen güen na' zejen to licha. 13¿Nacho leyna' da' naquen güenchguan' chonen cont saca'zi'cho che xtoła'chon' toľi tocane? Bi nac len. Da' mal da' yo'o lo' yichjlažda'ochon' bi ben' latje goncho can' cheyla' goncho, na' da'nan' gwchoglaon checho saca'zi'cho che xtoła'chon' toľi tocane. Leynan' da' nac da' güen chlo'en chio' Diosen' chgue'echgüede' da' mal da' choncho.

14Nezecho leyna' naquen che Spiritw che Diosen' na' naquen güen, san chio' yo'o da' malen' lo' yichjlažda'ochon' na' zoacho choncho da' xinj. 15Bi choncho da' güen da' chaclaže'cho goncho, san da' xinj da' chgue'echo jelen' choncho. Bi chacbe'echo bixchen' choncho ca'. 16Na' dan' chgue'echo da' mal dan' chonchon', zejen chacbe'echo nac leyna' güen.

17Gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon.

18Nezecho bi naccho bene' güen, le yo'o da' malen' lo' yichjlažda'ochon'. Chaclaže'cho goncho da' güen perw bi chac gonchon. 19Bi choncho da' güen da' chaclaže'cho goncho, san

choncho da' xinj da' bi che'necho goncho. <sup>20</sup>Da'nan' chnia', gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon.

<sup>21</sup>Can' chac checho, cate' che'necho goncho da' güen, da' mal dan' yo'o lo' yichjlažda'ochonan' chžonen gonchon. <sup>22</sup>Lo' yichjlažda'ochon' chbecho goncho can' ža ley che Diosen', <sup>23</sup>perw chacbe'echo, yo'o yeto da' yo'o lo' yichjlažda'ochon' chžonen goncho da' güen, na' lenna' chnabian' chio' cont choncho da' xinjen'.

<sup>24-25</sup>iNyaše' chac checho! Lo' yichjlažda'ochon' chaclaže'cho goncho can' ža ley che Diosen', perw da' mal dan' yo'o lo' yichjlažda'ochon' chnabian' chio' len cuerp chechon' cont choncho da' xinjen'. ¿Non' soe da' mal dan' yo'o lo' yichjlažda'ochon' cont bi nabian' cuerp chechon' len xbab chechon'? Le dan' chnabia' da' malen' chio' da'nan' si'cho castigw toli tocane. ChoxcLen Diosen' len' soede' da' mal dan' yo'o lo' yichjlažda'ochon' cont bich nabian' chio', le ba chejnilaže'cho Xancho Jesucriston'.

### Spiritw che Diosen' chonen chio' yela' mban toli tocane

**8** Na' na'a da' ba naccho txen len Cristo Jesúsén', bich gata' castigw checho toli tocane, le ba chzenagcho che Spiritw che Diosen' cont choncho da' güen na' bich chzenagcho che da' malen' dan' yo'o lo' yichjlažda'ochon'. <sup>2</sup>Cate' ne' zoacho chontezcho da' malen' nchoglaon checho si'cho

castigw che xtoła'chon' toli tocane, perw na'a Spiritw che Diosen' ba benen chio' yela' mban toli tocane da' chejnilaže'cho Cristo Jesúsén' na' Spiritw chen' chnabian' yichjlažda'ochon'. Da'nan' bich saca'zi'cho toli tocane. <sup>3</sup>Ley da' bzoj Moisésén' bi gwzoen yebejen chio' lo' da' malen', le yo'o da' malen' lo' yichjlažda'ochon'. Nach Diosen' gwsele' Xi'ine' Jesucriston' golje' yežlion, goccze cuerp chen' ca cuerp che chio' bene' güen da' xinj. Na' Jesucriston' bnežjw cuine' neche xtoła'chon' cont da' malen' bich nabian' chio' len xbab da' yo'o lo' yichjlažda'ochon'. <sup>4</sup>Diosen' gwsele'ne' cont soacho goncho da' güen can' ža ley chen' cheyala' goncho. Le bich chzenagcho che da' malen' dan' yo'o lo' yichjlažda'ochon', san ba zoacho choncho da' güen lagüe dan' chzenagcho che Spiritw che Diosen'.

<sup>5</sup>Še chzenagcho che da' mal dan' yo'o lo' yichjlažda'ochon', con da' malzen' chebecho choncho; san še chzenagcho che Spiritw che Diosen', chebecho choncho da' ca' chazlaže' Diosen'. <sup>6</sup>Le še zoacho chebecho da' malen', nachle si'cho castigw toli tocane, na' še chebecho da' ca' chazlaže' Spiritw che Diosen', guata' yela' mban checho toli tocane na' soa cuezcho binlo len xbab dan' yo'o lo' yichjlažda'ochon'. <sup>7</sup>Choncho ze bene' chgue'e Diosen' cate' chebecho da' malen', le cate' chebecho da' malen' bi chazlaže'cho neca chac gwzenagcho che ley chen'. <sup>8</sup>Na' še zoacho chzenagcho che da' mal dan' yo'o lo' yichjlažda'ochon', bi chebe Diosen' chio'.



<sup>9</sup>Na' chio', da' ba bedesoa Spiritw che Diosen' lo' lažda'ochon', bi zoacho chzenagcho che da' malen' da' yo'o lo' yichjlažda'ochon', san zoacho chzenagcho che Spiritw che Diosen'. Na' bene' bi zoa Spiritw che Criston' lo' lažda'ogüen', gague da' li chejnilaže' Criston'. (Spiritw che Criston' lecze naquen Spiritw che Dios.) <sup>10</sup>Perw na' še ba zoa Criston' len chio', Diosen' že' naccho bene' güen len le' na' lecze šjayzoacho len le' toli tocane la'czla' yesat cuerp chechon' neche da' malen' dan' de yežlion'. <sup>11</sup>Diosen' bechis bosbane' Cristo Jesús'en ladjo bene' guaten', na' lecze gwžin ža cate' Diosen' yechis yosbane' chio' len cuerp checho quinga da' chesat, le Spiritw chen' zoan lo' lažda'ochon'.

<sup>12</sup>Da'nan' bene' migw, chonen byen gwzenagcho che Spiritw che Diosen'. Bi cheyala' gwzenagcho che da' mal dan' yo'o lo' lažda'ochon'.

<sup>13</sup>Le še soacho gwzenagcho che da' mal dan' yo'o lo' lažda'ochon', saca'zi'cho toli tocane. Na' še gwzenagcho che Spiritw che Diosen' cont bi gwzenagcho che da' malen', nach gata' yela' mban checho toli tocane.

<sup>14</sup>Na' note'tezcho še chzenagcho che dan' chzejni'i Spiritw che Diosen' chio', naccho xi'in Dios.

<sup>15</sup>Diosen' bene' chio' Spiritw chen' caten' gwque'e chio' ca xi'ine'. Da'nan' bich chžebcho Diosen' can' chžebcho to bene' znia cate' choncho xšinen'. Bich chžebcho Diosen', san chol güižchone', che'chone': "Xa". <sup>16</sup>Na' lecze Spiritw chen' chnen lo' lažda'ochon' cont nezecho naccho xi'in Dios. <sup>17</sup>Na'

da' naccho xi'in Dios, gwžin ža cate' yogo' da' de che Criston' gaquen checho txen len le'. Na' can' bzanlaže' cuin Criston' gwdi gwxaque', can' cheyala'cze zanlaže' cuincho saca'zi'cho bi da' gac checho cont Diosen' gone' ga gacchgua güen checho txen len le' yaban'.

<sup>18</sup>Yežlio nga de da' chzaca'zi' chzaca'yaše'cho. Perw chacda' bibi zaca'czen cue' yichjcho che da' ca' chac checho, le gwžin ža leca mba juisyw gac checho cate' šjayzoacho len Diosen'. <sup>19</sup>Diosen' bene' benach, bene' beyixe', len bica'chle da' zjade. Na' yogo'cho len bichle da' ca' bene' zoacho lo' juisyw chbezcho batcan' gon Diosen' gacchgua mba che chio' naccho xi'ine'. <sup>20</sup>Na' yogo' da' ca' ben Diosen' bich zjanacšagüen'. Na' gague con to gualazen zjanaquen ca', san Diosen' bžie' bia' zjanaquen ca'. Perw za' yeyonšagüe' Diosen' legaquen len beyixe' ca' na' len chio' benach. Na' txen chbezcho gone' cont gac checho binlo.

<sup>21</sup>Yogo'cze da' ca' bene' yesebiayin', na' chesebezen batcan' žin ža cate' gone' cont yeyac cuerp che chio' naccho xi'in Diosen' da' cobe na' da' zaca'chgua can' nac che Criston', le canan' lecze yeseyyacšagüe' da' ca' cont bich te chegaquen.

<sup>22</sup>Nezecho ža na'aža yogo' da' ca' ben Diosen' chesežaglaon ca to no'ole bene' chzan. <sup>23</sup>Na' gague da' ca'ze chesežaglaon, san lencze chio' benach chžaglaochio na' chbežgüe'cho. Ba ben Diosen' chio' Spiritw chen' cont nezecho gwžin ža gaquech güen checho. Na' chbežgüe'cho lo' lažda'ochon'

chbezcho batcan' gon Diosen' cuerp cob chechon' cont gwlo'e ba nque'e chio' ca xi'ine'. <sup>24</sup>Cate' Diosen' bene' yela' mban checho toli tocane gwzoloa chbezcho gone' cuerp cobe chechon', na' lenna' ne' chbezcho. Nono zoa ne' chbeze' gac da' nezde' ba goc. <sup>25</sup>Na' še bina' le'echo da'na' chbezcho gac, cheyala' cuezcho gaquen sin cbi chjaxe'laže'cho.

<sup>26</sup>Na' Spiritw che Diosen' chaclenen chio', le bi nezecho can' cheyala' goncho yol güižcho Dios, san Spiritw che Diosen' chacbe'en cate' con chebanecho na' cate' bi cheželecho diža' da' güe'lencho Diosen', nach chnen gualazcho len diža' da' bi chejni'icho. <sup>27</sup>Na' Dios ben' chna' chgüie' yichjlaždao' yogo'cze bene', chejni'ide' bin' chaclaže' Spiritw chen' cate' chnen gualazcho, le ba gwleje' chio' naccho lo ne'e. Na' con da' chaclaže' Diosen' chnab Spiriton' lagüen'.

**Diosen' de'e chio' na'  
da'nan' nono soe chio'**

<sup>28</sup>Na' nezecho bite'tez dan' chac, Diosen' chone' cont gac güen che chio' chaquechone', le ba gwleje' chio' cont naccho lo ne'e can' gwналаže'. <sup>29</sup>Cate' bina' galjcho Diosen' gwneзде' šejnilaže'chone' na' bsi'e xnezen' gac yichjlažda'ochon' güen can' nac yichjlaždao' Xi'ine' Jesucriston'. Bsi'e xnezen' gac Jesucriston' bene' blao lao yogo'cho na' chio' gaccho ca biše' lježe' bi' xcuide'ch. <sup>30</sup>Can' naquen, cani'te Diosen' bsi'e xnezen' gac yichjlažda'ochon' güen can' nac yichjlaždao' Jesucriston' na' gwleje' chio' cont naccho lo ne'e. Lecze

beyone' chio' bene' güen len le' na' bene' cont gacchgua güen checho txen len Jesucriston' yaban'.

<sup>31</sup>iCatec güenna' chon Diosen' len chio' ba bsi'e xnezen' gac checho yogo' da' ca! Len' de'e chio', nachen' notno soe chio'. <sup>32</sup>Diosen' bi bžone' saca'zi' Xi'ine' Jesucriston', san gwsele'ne' cont yeque'e xtoła'chon'. Da'nan' nezecho yebede' gone' chio' yogo' bite'tez da' yažjecho. <sup>33</sup>Diosen' ba gwleje' chio' naccho lo ne'e, na' beque'e xtoła'chon'. Na' notno soe gwcuış chio' lagüen', le ba gwne' bibi xtoła'cho de. <sup>34</sup>Nono zoa no gac gon cont na Diosen' de xtoła'cho. Criston' bzanlaže' cuine' gosote'ne' cont beque'e xtoła'chon', na' beyas bebane' ladjo bene' guat ca', chi'e chnabi'e txen len Diosen'. Na' len' chnie' gualaz chio' lao Diosen'.

<sup>35</sup>¿De da' gwžon cont Criston' bich gacde' chio'? ¿Gwžon no da' mal da' gac checho? ¿Gwžon no yela' yaše' yela' zi' da' gac checho? ¿Gwžon no yela' xi'a che bene' chgue'e chio'? ¿Gwžon no yela' chbił chdon checho? ¿Gwžon cate' bi de xałana'cho? ¿Gwžon še bi da' xož gac checho? ¿Gwžon še za' no bene' gote' chio'? Bibi de da' gwžon cont Criston' bich gacde' chio'. <sup>36</sup>Chac can' nyojzce Xtiza' Diosen' žan:

Xanto' Dios, da' chejnilaže'to' le' nita' bene' chesclaže' yesote' neto' do ža do yel.

Chesone' xbab nacto' ca to xila' be yesote'.

<sup>37</sup>Na' la'czla' yogo' da' mal ca' za'ac len chio', bi chac chop laže'cho, san chebechgüecho le nezecho zoacze Criston' chacde' chio'. <sup>38</sup>Neda' nezda' bibi de da' gac gwžon cont Diosen'

len Criston' bich yesacde' chio'. Yeł̄a' goten' bi gonen, ne yeł̄a' mbanna', ne no angl, ne no da' xigüe', ne no bene' gwnabia', ne da' chac checho na'a o bichle da' za'za'. <sup>39</sup>Ne da' de le'e yaban', ne da' de gabilen', ne bichle da' ben Diosen' bi gac yosožonen cont Diosen' bich gacde' chio'. Ba blo'ede' catec chacde' chio' dan' gwsele' Xancho Jesucriston' beque'e xtoła'chon'.

**Diosen' gwque'e bene'  
Israel ca' ca xi'ine'**

**9** <sup>1-2</sup>Neda' naca' txen len Criston' na' choa' diža' li, bi chonlaža', chnia' chacyaše'chgüeda' na' chacchgüeda' lo' lažda'ogua' che bene' gualaž chia' bene' bi chesejnilaže' Criston'. Spiritw che Diosen' chaclenen neda' cont nezda' diža' lin' choa'. <sup>3</sup>Chacda' gwzanda' cuina' cuiaya'a šeca' da' cuejiže' Diosen' neda' cuit Criston' gonen cont bene' gualaž chia' ca' yesejnilaže' Criston'. Chacda' legaque', le gosaljē' zjanaque' bene' Israel ca neda'. <sup>4</sup>Diosen' gwque'e xozxtao' neto' bene' Israel ca xi'ine', na' gwzoe' len legaque' lo' be'ni' juisyw. Na' gwne' gaclene'ne', na' bnežjue' legaque' ley da' bzoj Moisésen'. Na' blo'ede'ne' naclen' yesonxene'ne', nach gože' legaque' bichle da' güen da' gone' len legaque'. <sup>5</sup>Bene' gole blao bene' za' che'el̄te gosaque' xozxtao' neto' bene' Israel. Na' lo diaža' chegaque'na' golje Criston' ben' gwseła' Diosen'. Criston' lecze naque' Dios na' chnabi'e yogo'te benačh, yogo'te beyixe' na' yogo'loł bichle da' de yežlio nga na' gate'teze. Cheyala'

gonxenchone' toli tocañe. Na' can' gonšcaczcho.

<sup>6</sup>Na' bi cheyala' goncho xbab bi ben Diosen' can' gwne' gone' güen len neto' bene' Israel. Gague yogo' neto' goljto' lo diaža' che da' Israelen' na Diosen' nacto' bene' Israel, le gague yogo'to' chejnilaže'to'ne'.

<sup>7</sup>Na' gague yogo' neto' goljto' lo diaža' che da' Abrahanna' nacto' dogualje xi'in diaža' che', le gague yogo'to' chejnilaže'to' Diosen' can' gwejnilaže' da' Abrahanna' le'. Quinga gož Diosen' Abrahanna' cani', gwne': "Xi'in diaža' che da' Isaaquen' gona' cuent lo diaža' chion." <sup>8</sup>Na' dan' gwne' ca' zeje diža' Diosen' chbeje' bene' zjanaque' xi'ine' gague da' gosaljē' lo diaža' che bene' Israelen', san bene' chesejle'e gon Diosen' gac chegaque' can' že' con can' gwejle' da' Abrahanna', legacze' zjanaque' xi'ine' na' zjanaque' xi'in diaža' che da' Abraham. <sup>9</sup>Quinga gož Diosen' Abrahanna' gone', gwne': "Cate' žin tiempen' bžia' bia' yida', cana' ba zoa to bi' che no'ol chio' Sara ni."

<sup>10</sup>Na' gague da' na'zen', san lecze ca' Diosen' be'e diža' che xi'in da' Rebecan' bin' gosac choptebe' xi'in da' xozxta'oto' Isaac. <sup>11-12</sup>Cate' bina' yesalje bi' cuaš ca' na' bibi na' yesombe' cont nacho zjanacbe' bi' güen o bi' mal, Diosen' blo'ede' chbeje' note'tez bene' chaclaže' cont gone' güen len legaque'. Le Diosen' gože' Rebecan': "Bin' galje da' nechw gwzexjw yichjbe' cont bin' za' cože'ben' nabiabe' lebe'." Gwne' ca' cont nezecho chbeje' bene' gac güen chegaque', gague lagüe da' chesone' bi da' güen, san cont gac

can' chnalazen'. <sup>13</sup>Na' ga yoble nyoj Xtiža' Diosen' žan: "Gocda' Jacob na' bgue'eda' Esaú."

<sup>14</sup>Bi cheyaļa' goncho xbab Diosen' cbi chone' da' zej to licha dan' chone' ca'. Zejze' to licha. <sup>15</sup>Chone' can' gože' Moisésen' cani'te, gwne': "Yeyaše'laža' con non' chazlaža' yeyaše'laža', na' ži'ilaže'da' con non' chazlaža' ži'ilaže'da'." <sup>16</sup>Diosen' chbeje' bene' cont yeyaše'laže'de' le', gague can' chaclaže' benachen', na' gague da' chesone' bi da' chesone', san Diosen' cheyaše'laže'de' con non' chbeje' yeyaše'laže'de'. <sup>17</sup>Na' Xtiža' Diosen' nyojen can' gože' bene' gwnabia' che Egipton', gwne': "Neda' bena' naco' rey cont chlo'eda' bene' yela' guac chia' da' chona' len le'. Chonan' cont yeseneze bene' že' doxen lo yežlion' zoa' chnabi'a." <sup>18</sup>Can' naquen, Diosen' cheyaše'laže'de' con non' chazlaže' yeyaše'laže'de', na' lecze bene' zjanaque' bene' güedenag, lecze chazlaže' gone' legaque' bene' güedenag.

<sup>19</sup>Na' da' chon Diosen' ca', guacte gonle xbab nale: "Con can' ba nžia Diosen' bia' chon chio' benačh. ěBixčhen' že' de xtola'chon' še ca'?" <sup>20</sup>Perw ěno nac chio' benačh gacyožlencho Diosen'? Ca to no yeso' xguague bi gac yen' bene' ben len: "ěBixčhen' beno' neda' quinga?" <sup>21</sup>Bene' güen yeso' xguaguen' guac gone' con can' chazlaže' len gonan'. Chac chone' ton da' nac xdanchgua na' len gona' na'ze gone' yeto da' gon žin len bite'teze.

<sup>22</sup>Na' bi nacho chon Diosen' con can' chazlaže' len chio' benačh yogo' ni'a, nžie' bia' gwnežjue' castigw toli

tocane che bene' ca' bi chosozenag che', na' nape' yela' guac cont gone' ca'. Perw chzoede' šša chape' yela' chxenlaže' len legaque' na' gague la' sela'te' legaque' lo yi' gabilen' la'czļa' zjazaque' yesebiaye'e. <sup>23</sup>Chone' ca' le nžie' bia' gone' da' güen juisyw len note'tezcho chejnilaže'chone', chion' cheyaše'laže'de'. Cani'te gwleje' chio' gac da' mba juisyw checho cate' šjayzoacho len le'. <sup>24</sup>Chion' ba gwleje' gac güen checho bałcho naccho bene' Israel na' bałcho bi naccho bene' Israel. <sup>25</sup>Can' ža le'e libr dan' bzoj Oseas ben' be' xtiža' Diosen' cani', žan:

Bene' ca' bi zjanaque' yež chia', neda' Dios nia' legaque' yež chia', na' bene' ca' bi gocda', yapegaca'ne' chacda' legaque'.

<sup>26</sup>Na' yež gan' gož Diosen' bene' ca': "Bi nacle yež chia'", na'teze Dios ben' zoa toli tocane ye'e legaque' xi'ine'.

<sup>27</sup>Na' Isaías ben' be' xtiža' Dios cani' gwne' quinga che da' xozxtao' neto' bene' Israel: "La'czļa' chio' bene' Israel šancho ca yox da' chi' cho'a nisdao', bał gacho šjayzoacho len Diosen'. <sup>28</sup>Le Diosen' gone' can' ba nchoglagüen' len chio' benačh, na' bedao'nez gone' doxen can' ba ngüie' gone'." <sup>29</sup>Gac can' ža yeto da' bzoj Isaíasen' cani', žan:

Šaca' Xancho Diosen' ben' nape yela' guac xen bi bocua'ane' to chope bene' lo nación Israel chechon', ba gwžiai'y'cho can' gosac che bene' Sodoma na' bene' Gomorra ca'.

**Bene' Israel bene' bi  
chesejnilaže' Criston'**

<sup>30</sup>Quinga ba goc, bene' bi zjanaque' bene' Israel bi besyeyiljue'

nacle yesone' cont Diosen' ne'  
 zjanaque' bene' güen len le', perw  
 ba<sup>le</sup>' ba chesejnilaže' Criston' na'  
 da'nan' ba zjanaque' bene' güen  
 len Diosen'. <sup>31</sup>Na' zan bene' Israel  
 gualaż cheto' zjanao' to ley da'  
 chžian bia' naclen' yesone' cont  
 yesaque' bene' güen len Diosen'.  
 Perw bi zjanaque' bene' güen len  
le', le bi chesone' doxen can' žanna'.  
<sup>32</sup>Na' bi goc yesaque' bene' güen  
 len Diosen', le gosacde' yesone' da'  
 güen cont yesaque' bene' güen len  
le' na' bi gosacbe'ede' con bene'  
 yesejnilaže'ne' yesaque' bene' güen  
 len le'. Goc chegaque' ca chac che  
 bene' jati'i to yej. <sup>33</sup>Quinga nyoj  
 Xtiza' Diosen' chegaque':

Gan' nzi' Sión sela' to bene',  
 na' bena' zaca'lebe' ca to yej da'  
chego' bene' na' ca to yej xen  
 da' šjati'i bene' na' bixe',  
le bene' zan bi yesejnilaže' ben'  
 sela'.

Na' note'teze' yesejnilaže' bena'  
 selan', gwbat yesyetinjde' che  
 dan' gosejnilaže'ne'.

**10** Bene' migw, lo' lažda'ogua'  
 che'nchgüeda' bene' Israel  
 gualaż chia' yesejnilaže' Jesucriston'  
 cont gata' yela' mban chegaque'  
 to<sup>li</sup> toca<sup>ne</sup>, nachen' cho<sup>l</sup> güiža'  
 Diosen' ch<sup>n</sup>aba' gaclene' legaque'.  
<sup>2</sup>Nezda' da' zan da' chesone'  
 chesacde' yebe Diosen' legaque',  
 perw bi chesacbe'ede' bin' chazlaže'  
 Diosen'. <sup>3</sup>Bi chesejni'ide' cheya<sup>la</sup>'  
 yesejnilaže' Criston' cont yesaque'  
 bene' güen, san chesyeyiljue' bi  
 da' güen da' yesone' chesacde' cont  
 yesaque' bene' güen len le'. Da'nan'  
 bi chesejnilaže' Jesucriston' can'  
 chaclaže' Diosen' yesone'. <sup>4</sup>Le

yogo' bene' chesejnilaže' Criston'  
 ba besyeyaque' bene' güen len  
 Diosen'. Na' chio' chejnilaže'chone'  
 ba nezecho nono gac gonyane' can'  
 ža ley dan' bzoj Moisésen', neca gac  
 yeyaque' bene' güen da' na'ogüe'  
lezen.

<sup>5</sup>Da' Moisésen' bzoje' can' cheya<sup>la</sup>'  
 gon bene' cont gaque' bene' güen  
 len Diosen', gwne': "Note'teze  
 bene' chone' cayanen' ža leyna',  
 nachen' guac bane' to<sup>li</sup> toca<sup>ne</sup>."

<sup>6-7</sup>Na' chio' ba naccho bene' güen  
 len le' da' chejnilaže'chone', na'  
 bich choncho xbab nacho: "žNo  
 gac cue yaban' na' no gac yetj  
 gan' že' bene' guaten'?" šaca' nacle  
 goncho šjaxi'cho Criston' cont  
 gaclene' chio'. <sup>8</sup>San diža' güen da'  
 chyixjue'eto' žan: "Ba nombia'cho  
 diža' da' chaclenen chio'. Choncho  
 xbab che len na' choe'cho diža' can'  
 žan." Len<sup>n</sup>a' diža' da' chyixjue'eto'  
 bene' cont yesejnilaže' Jesucriston'.

<sup>9</sup>Che'to' bene': "Še güe'lenle bene'  
 diža' cont yesenezde' chejnilaže'le  
 Jesucriston' na' chzenagle che'  
 da' naque' Xan<sup>le</sup>, na' še šejle'le  
lo' yichjlažda'ole Diosen' bechis  
 bosbane' Jesucriston' ladjo bene'  
 guaten', nachen' gata' yela' mban  
chele to<sup>li</sup> toca<sup>ne</sup>." <sup>10</sup>Le cheya<sup>la</sup>'  
 šejle'cho lo' yichjlažda'ochon' cont  
 yeyaccho bene' güen len Diosen' na'  
leceze cheya<sup>la</sup>' güe'lencho bene' diža'  
che dan' chejnilaže'cho Criston' cont  
 gata' yela' mban checho to<sup>li</sup> toca<sup>ne</sup>.

<sup>11</sup>Xtiza' Diosen' nyojen žan:  
 "Note'tez bene' yesejnilaže'  
 Diosen', gwbat yesyetinjde' che da'  
 gosejnilaže'ne'." <sup>12</sup>Balcho naccho  
 bene' Israel na' balcho bi naccho  
 bene' Israel, toz can' chon Diosen'

len yogo'cho, le Xancho Jesucriston' naque' Xan yogo'lo' bene', na' cheyaše'laže'de' note'tezcho chnabcho gaclene' chio'. <sup>13</sup>Can' gwne': "Note'tez bene' yesenabe' gaclena' legaque', neda' naca' Xanle yebeja' legaque' lo da' malen'." <sup>14</sup>Na' ĩnacxe yeson bene' yesenabe' goclen lagüen' še bi chesejnilaže'ne'? Na' ĩnacxe yesone' yesejnilaže'ne' še bina' yesende' xtižen'? Na' ĩnacxe yesende' xtižen' še nono zoa no güe'lene' legaque' xtižen'? <sup>15</sup>na' ĩnacxe yeson bene' yeseyixjue'ede' xtiža' Diosen' še Diosen' bi sele' legaque' yeseyixjue'eden'? Chac can' nyoj Xtiža' Diosen' žan: "Chbehgüecho caten' za'ac bene' cheseyixjue'ede' diža' güen chosozejni'ide' guac soacho binlo len Diosen'."

<sup>16</sup>Perw gague yogo' bene' gualaž cheto' chosozenague' diža' güen che Diosen'. Chac can' gwna Isaías ben' be' xtiža' Diosen' cani', gwne': "Xana', nono chzenagtec diža' dan' chzeneto'ne'." <sup>17</sup>Bia'cze cheyała'cze yesene bene' diža' güen da' chzejni'in che Criston' cont yesejnilaže'ne'.

<sup>18</sup>Na' chnaba': ĩbina' yesene bene' Israel gualaž cheton' diža' güen da' chzejni'in che Criston'? Bač gosenden'. Chac can' nyoj Xtiža' Diosen' žan:

Bene' že doxen lo yežlion' ba gosende' xtižen';

ba zej xtižen' doxen.

<sup>19</sup>Na' chnaba' da' yoble: ĩbi gosejni'i bene' Israel gualaž cheton' diža' dan' chzejni'in che Criston'? Ba gosejni'iczen'. Le da' Moisésen' bzoje' da' gwna Diosen' čhegaque', žan:

Neda' Dios gona' güen len bene' bi zjanac bene' nación chia', na' gue'ele legaque'.

Na' gona' güen len bene' nación ca' bene' bi chesejni'i, na' ža'ale.

<sup>20</sup>Nach Isaíasen' ben' be' xtiža' Diosen' cani' bi bžebe' gwdixjue'ede' da' nga gwna Diosen', žan:

Bene' bi besyeyiljw neda', besyeželde' neda'.

Na' bene' bi gosenab neda', blo'elagua' legaque'.

<sup>21</sup>Na' Diosen' gože' bene' Israel gualaž cheton', gwne': "Yogo' ni'a chneyoeda' le'e cont gwzenagle chia', na' zoachchle chonle güedenag len xtižan'."

#### Ba' bene' Israel yesejnilaže' Jesucriston'

**11** Bi cheyała' goncho xbab Diosen' bechojlaže' nación Israel cheto' to ši'ize. Neda' naca' bene' Israel, golja' lo diaža che da' Abraham na' naca' diaža' che da' Benjamín. <sup>2</sup>Bina' yechojlaže' Diosen' neto' nacto' diaža che ben' gože' Israel, le gwleje' neto' cani'te cont nacto' nación che'. Le gon xbab can' nyoj dan' gwna Elías ben' be' xtiža' Diosen' cani', gwdagüe' xya che da' xozxta'oto' ca', gože' Diosen': <sup>3</sup>"Xana', bene' gualaž chia' quinga ba gosote' bene' ca' gosote' xtižon', na' ba bosyochinje' mes de yej ca' gan' cheyała' yesonxene' le'. Yetoga neda' zoa' chzenaga' chio' na' lencze neda' chese'nde' yesote'." <sup>4</sup>Nach Diosen' boži'e xtižen' gože'ne': "Ne' nita' gaže mil bene' ba gwleja' bene' bina' yosozoa xibe' yesonxene' l gua'a lsaca' dan' nzi' Baal." <sup>5</sup>Na' ca'cze

naquen ža na'aža, neto' bene' Israel chejnilaže'to' Criston' bi nacto' bene' zan, perw Diosen' ba gwleje' neto' cont chonxento'ne', le nži'ilaže'de' neto'. <sup>6</sup>Diosen' gwleje' neto' cont chonxento'ne' da' nži'ilaže'de' neto'. Bi gwleje' neto' lagüe' da' nonto' bi da' güen. Šaca' gwleje' neto' lagüe' da' nonto' bi da' güen, bi naquen con to goclen da' choñ Diosen' neto' lo yela' bene' šagüe' che' cate' chbeje' neto' še ca', san naquen to goclenze.

<sup>7</sup>Zan bene' nación Israel cheton', la'czla' chesonchgüe' da' chesacde' cheyala' yesone', bi chesyěželde' naclen' yesone' cont yesaque' bene' güen len Diosen'. Perw Diosen' gwleje' balto' cont šejnilaže'to'ne' na' none' neto' ca to bene' güen. Na' bene' yezica'chle zjanaque' güedenag len Diosen'. <sup>8</sup>Chac čhegaque' can' nyoj Xtiža' Diosen' žan: "Diosen' bene' cont zjanaque' ca bene' bicze nte. Na' ža na'aža zjanaque' ca to bene' bi chle'e len yejlagüen', na' ca to bene' bi chene len naguen'." <sup>9</sup>Na' da' Davin' gwne' čhegaque':

Yogo' da' de da' chesyebede' yesaquen ca to da' yeben legaque',  
na' yesaquen ca to ga šjaselažoe' yesaque' castigw.

<sup>10</sup>Yesečhol' yichjlažda'ogaquen', na' yedote yesezaca'zi'e can' chzaca'zi' ben' nlegw čože' no'e yoa' zi'i.

**Diosen' gwleje' bal' bene' bi zjanac bene' Israel cont chesejnilaže'ne'**

<sup>11</sup>Nezeczecho zan bene' Israel gualaž četon' bi chesejnilaže' Criston'. Na' chñaba', čzjanaque' ca

bene' gwyo'o yeja' nle? čše zjanaque' ca bene' gwbiže' na' gote'? Zjanaque' ca to bene' con gwyo'o yeja' nle na'ze. Da' bi chesejle'e che Criston' de latje cont le'e bi nacle bene' Israel chzenagle xtižen'. Da'n'an' legaque' gwžin ža yesezelaže' gon Diosen' güen len legaque' ca ba chone' len le'e bi nacle bene' Israel. <sup>12</sup>Da' yoble chnia', da' bi chesejnilaže' bene' gualaž četo' ca' Criston', chac ca' cont yezica'chle bene' že' yežlion' yesenite' mba con še yesejnilaže'ne'. Na' da' bchoj nación Israel cheton' lo na' Diosen', de latje cont le'e bi nacle bene' Israel soale mba lo na' Diosen'. Perw gwžin ža cate' yogo'te bene' gualaž četo' yesenite' yesejnilaže' Diosen', na' cana'ch gac mba juisyw.

<sup>13</sup>Na' le'e bi nacle bene' Israel, che'nda' nezele Diosen' gwsele' neda' cont güe'lena' le'e xtižen' le'e bi nacle bene' Israel. Na' chona' con ga zelao chzaque'da' cont bene' yosozenague' che Diosen'. <sup>14</sup>Le chaclaža' gona' cont bene' gualaž čhia' ca' yesezelaže' gon Diosen' güen len legaque' can' chone' len le'e chejnilaže'lene', na' gata' yela' mban čhegaque' toli tocanē. <sup>15</sup>Diosen' ba bnite' zan bene' Israel gualaž četon' ca'ale to tiemp cont le'e bi nacle bene' Israel gwbiga'le len le'. Na' gwžin ža cate' gon Diosen' yesyebiga' yezan bene' gualaž četo' len le'. Na' leca mba gac cate' yesyebigue' len Diosen'. <sup>16</sup>De costumbr che neto' nacto' bene' Israel cate' chonto' yetextil, na' chnežjwto' Diosen' to bloj dao' cuazin' cont chlo'eto'ne' doxenen naquen che'. Na' lecze še



nacho to loe yaguen' naquen che Diosen', zejen lecze xoze' yaguen' naquen che'. Na' da' xozxta'oto' ca' ben' gosejnilaže' Diosen' cani' zjazaca'lebbe' ca' bļoļ' dao' cuazina' na' ca' loe yaguen'.

<sup>17</sup>Nación Israel cheton' zaca'leben ca' xoze' yag da' ba nchog xan yaga' to lao yag olivo güen na' ba bniten' šļa'ale. Na' le'e bi nacle bene' Israel zaca'lebbe' ca' xoze' yag olivo da' ze do yixe', da' ba gwchogue' lagüen na' ba bozoen' yag güen cont beyaquen toze. Nach guac nacho loe yag güenna' ba noxen' le'e na' niže' chenna' chac banlenle. <sup>18</sup>Bi gaquele naquechle bene' güen ca' bene' Israel gualaž cheto' da' chac chele ca'. Gague le'e chnežjwle yela' mban che loe yaguen', san loe yaguen' chonen le'e yela' mban.

<sup>19</sup>Le'e bi nacle bene' Israel, šeca che'lja lježle: "Diosen' bene' bene' Israel ca' yag da' gwchogue' xozen' cont goc bozo' chio' gualaž legaue'." <sup>20</sup>Da' li can' žalen'. Perw da' bi gosejnilaže' Criston', Diosen' bene' len legaue' ca' xoze' yag da' ba gwchog xan yaguen' len, na' ba bozo' le'e lagüe da' chejnilaže'le Criston'. Da'nana' bi ga'laže'le, san le gwsaca' cont soachachle šejnilaže'lene'. <sup>21</sup>Da' bi gosejnilaže' Criston', Diosen' bene' cont gwdi gwxaca' bene' Israel gualaž cheto' ca' bene' zjazaca'lebbe' ca' xoze' yag güenna', na' lecze ca' gone' saca'zi'le še bi soachachle šejnilaže'lene'.

<sup>22</sup>Le gonšč xbab can' nži'ilaže' Diosen' chio' chejnilaže'chone' na' can' chone' cont saca'zi' bene' ca' bi chesejnilaže'ne'. Nachen' cheyala' soachachle šejnilaže'lene' cont bi

gone' saca'zi'le can' ba bene' len bene' Israel gualaž cheton' bi gosejnilaže'ne'. <sup>23</sup>Na' Diosen' yebede' si' lo ne'e bene' Israel gualaž cheto' ca' cate' yesejnilaže'ne', le nape' yela' guac cont yozoe' legaue' binlo len le', nach yesaque' ca' xoze' yag da' bezyone' toze len yag chen da' yoble. <sup>24</sup>Le'e nacle ca' xoze' yag olivo da' ze yixe', Diosen' gwchogue' le'e na' bozo' le'e lo xoze' yag güen ļa'czļa' bi nacle dogualje xozen'. Na' naquechxe yebede' yozoe' bene' Israel gualaž cheto' ca' le'e yaguen' da' yoble bene' ca' zjazaca'lebbe' ca' dogualje xoze' yaguen'.

**Bene' zan bene' Israel  
yesyeyaque' lo na' Diosen'**

<sup>25</sup>Bene' migw, che'nda' šejni'ile da' nga da' nono na' neze cont bi ga'laže'le gaquele zaca'chle clel ca' bene' Israel gualaž cheto' ca'. Diosen' be'e latje zane' zjanaque' bene' güedenag len xtižen' šlac yesejnilaže' bene' bi zjanaque' bene' Israel ben' ba bsi'e xneze yesejnilaže'ne'. <sup>26</sup>Nach gwžin' ža yogo' bene' Israel gualaž cheto' ca' yesenita' yesaque' lo na' Diosen'. Gac can' nyoj Xtiža' Diosen' žan:

To bene' choj lo ciuda Sión  
yebeje' le'e lo da' mal da'  
chonle,

le'e za'le lo diaža che da' Jacob.

<sup>27</sup>Na' cate' žin' ža yeca'a xtoļa'len', cana'ch ba goc can' ba gwnia' gona'.

<sup>28</sup>Dan' bi chesejle' zan bene' Israel gualaž cheton' diža' güen che Diosen', da'nana' ba bzoe' šļa'ale nación cheton' na' ba gwleje' le'e bi nacle bene' Israel cont chejle'le che'.

Perw na' Diosen' ne' chacde' bene' ca', le gwleje' da' xozxta'oto' ca' cont yesaque' naci<sup>o</sup>n che'. <sup>29</sup>Na' Diosen' bi cheti<sup>n</sup>jde' che bene' mbeje' yesaque' naci<sup>o</sup>n che', neca cheti<sup>n</sup>jde' che goclen da' chone' len benachen'.

<sup>30</sup>Canate le'e bi bzenagle che Diosen' na' da' bi gosac<sup>l</sup>aze' bene' Israel gualaz cheton' yosozenague' che', nach beya<sup>s</sup>e'la<sup>s</sup>e' Diosen' le'e na' goclene' le'e cont chzenagle che'.

<sup>31</sup>Na' da' bi chosozenag bene' Israel gualaz cheto' ca' che Diosen' na'a, chac ca' cont zin za gwlo'e Diosen' ne' cheya<sup>s</sup>e'la<sup>s</sup>e' de' lega<sup>q</sup>ue' can' cheya<sup>s</sup>e'la<sup>s</sup>e' de' le'e. <sup>32</sup>Diosen' ba gwchoglague' che yogo' benachen' de xto<sup>l</sup>a'ga<sup>q</sup>ue' da' bi chosozenague' che', na' ba bene' ca' cont lecze gwlo'ede' cheya<sup>s</sup>e'la<sup>s</sup>e' de' yogo'cze'.

<sup>33</sup>Leca bene' sina' Diosen'. Nezczede' yogo'lo<sup>l</sup>. Gwbat šejni'icho da' n<sup>z</sup>ie' bia' gac o da' n<sup>z</sup>ie' bia' gone' lo yela' sina' che'. <sup>34</sup>Ny<sup>o</sup>j Xtizen' žan: "Nono neze yogo' xbab che Xancho Diosen'; nono nape yela' sina' cont gwzejni'ide' le' can' cheya<sup>l</sup>a' gonen'. <sup>35</sup>Na' nono cheya<sup>l</sup>a' gon xbab yebi'i Diosen' güen len le' še bi da' ba be'ene'." <sup>36</sup>Yogo'lo<sup>l</sup> da' de naquen che Dios. Bene' benach, beyixe' na' bica'chle da' zjade. Na' lagüe yogo'lo<sup>l</sup> da' bene' zoe' blao. Len' gacxene' to<sup>l</sup>i tocane. Can' gacšca.

**Cheya<sup>l</sup>a' gon cuincho lo na' Diosen'**

**12** Bene' migw, Diosen' ba cheya<sup>s</sup>e'la<sup>s</sup>e' de' chio'. Da'n<sup>a</sup>n' ch<sup>n</sup>eyoeda' le'e le gon doxen cuinle lo na' Diosen' na'a mbanle. Le gonen do yichj do laže'le. Na' le gac bene' laždao' xilaže' le can' chazlaže'

gonxenchone'. <sup>2</sup>Bi goncho ca cheson bene' bi zjanombia' Diosen'. San cheya<sup>l</sup>a' nabecho Diosen' gwše'e xbab chechon' cont yebecho goncho dan' chazlažen'. Na' chaclaže' goncho da' güen, da' chebede' na' yogo' da' zej to licha.

<sup>3</sup>Diosen' n<sup>z</sup>i'ilaže'de' neda' na' ba gwsele' neda' cont chyixjue'eda' xtižen'. Da'n<sup>a</sup>n' chnia' bi cheya<sup>l</sup>a' gonxen cuincho, san cheya<sup>l</sup>a' gacbe'echo Diosen' ba goclene' chio' cont chejnilaže'chone' na' none' grasyw checho cont goncho bi da' goncho. <sup>4</sup>Can' nac cuerp chechon', zan cuen naquen na' gague toze žin da' cheson to to cuenen. <sup>5</sup>Lecze can' naquen len chio', bene' zan naccho chejnilaže'cho Criston' na' yogo' chion' naccho txen len le' na' len lježcho zaca'lebcho ca toze cuerp.

<sup>6</sup>Diosen' none' grasyw chechon' gwde gwdele da' gon to tocho. Še ba none' checho chixjue'echo bi da' gože' chio', nach cheya<sup>l</sup>a' chixjue'echon na' šejle'cho gaclene' chio' gonchon. <sup>7</sup>Na' še Diosen' ba none' checho gaclencho bene', cheya<sup>l</sup>a' gaclencho lega<sup>q</sup>ue'. Na' še ba none' checho gwsed gwlo'echo bene', cheya<sup>l</sup>a' gwsed gwlo'echone'.

<sup>8</sup>Na' še Diosen' ba none' checho neyoecho bene' cont yesone' da' güen, cheya<sup>l</sup>a' neyoechone'. Na' še ba none' checho gwnežjwcho da' chyaže' bene', cheya<sup>l</sup>a' gwnežjwchon do yichj do laže'cho. Na' še ba none' checho gaccho bene' blao na' güia na' ljež chio' chonxenchone', cheya<sup>l</sup>a' cue' yichjcho güia na'cho lega<sup>q</sup>ue'. Na' še ba none' checho yeyaše'cho no bene' yaše', no bene' gole o

no be<sub>ne</sub>' güe', cheya<sub>la</sub>' yebecho  
gaclenchone'.

**Da' cheya<sub>la</sub>' gon chio'  
chejnilaže'cho Jesucriston'**

<sup>9</sup>Cheya<sub>la</sub>' gaque ljež be<sub>nach</sub>cho  
do yichj do laže'cho, na' cheya<sub>la</sub>'  
gue'echo da' malen' na' soaczcho  
goncho da' nac da' güen. <sup>10</sup>Ca  
chaque biše' goljcho, ca'cze cheya<sub>la</sub>'  
gaquecho note'teze be<sub>ne</sub>' lježcho na'  
gonchone' be<sub>ne</sub>' xench ca cuincho.

<sup>11</sup>Bi gaccho be<sub>ne</sub>' xagüed, san  
goncho da' non Diosen' chio' goncho  
do yichj do laže'cho, le chonxencho  
Xancho Jesucriston' len dan'  
chonchon'.

<sup>12</sup>Cheya<sub>la</sub>' yebecho da' nezecho  
šjayzoacho len Diosen'. Cheya<sub>la</sub>'  
gwyo gwčejcho cate' chy  
chzaca'cho. Na' lecz cheya<sub>la</sub>' yol  
güižcho Diosen' zan ni'a yogo' ža.

<sup>13</sup>Cheya<sub>la</sub>' gaclencho be<sub>ne</sub>'  
lježcho be<sub>ne</sub>' chesejnilaže'  
Diosen' še bi da' cheseyažjde' na'  
gwlebcchone' ližcho še zjanaque'  
be<sub>ne</sub>' zito'.

<sup>14</sup>Cheya<sub>la</sub>' nabcho lao Diosen' gac  
güen che be<sub>ne</sub>' chosoči chososaca'  
chio'. Nabcho gac da' güen  
čegaque', gague da' mal.

<sup>15</sup>Cheya<sub>la</sub>' yebecho txen len be<sub>ne</sub>'  
chesyebe na' cuežcho txen len be<sub>ne</sub>'  
chesebež.

<sup>16</sup>Yogo'cho cheya<sub>la</sub>' goncho toze  
xbab. Bi cheya<sub>la</sub>' ga'laže'cho, san yol  
güižcho be<sub>ne</sub>' yaše' be<sub>ne</sub>' bibi chac  
na' bi gon cuincho be<sub>ne</sub>' sina'.

<sup>17</sup>Še bi da' mal chone be<sub>ne</sub>' chio',  
bi n<sub>acho</sub> lecze da' mal yebi'cho  
len le'. Cheya<sub>la</sub>' cue' yichjcho  
goncho da' güen cont yesena be<sub>ne</sub>'  
le naczen güen dan' chonchon'.

<sup>18</sup>Cheya<sub>la</sub>' goncho bi da' gac goncho  
cont soacho binlo len yogo'lol  
be<sub>ne</sub>'. <sup>19</sup>Chacda' le'e, nachen' chnia'  
cheya<sub>la</sub>' gwdecho to šla'ale bite'teze  
da' chesone be<sub>ne</sub>' chio'. Diosen'  
gwyoecze' nac gone' len be<sub>ne</sub>'  
chosochi chososaca' chio'. Xtizen'  
nyojen žan: "Xancho Diosen' že':  
Neda' yoži'a che da' mal da' chesone',  
na' neda' gwnežjua'ne' castigw."  
<sup>20</sup>Na' lecze žan: "Še chbil chdon  
be<sub>ne</sub>' chgue'ede' chio', cheya<sub>la</sub>'  
güe'chone' da' ye'ej gagüe'; le še  
goncho güen len le', guacbe'eljde'  
chone' da' mal." <sup>21</sup>Bi güe'cho latje  
n<sub>abia</sub>' da' malen' chio' na' yebi'cho  
mal len be<sub>ne</sub>' chonde' chio' mal,  
san yebi'cho güen len legaque'  
cont yesyetinjde' che da' malen'  
chesonen'.

**13** To tocho cheya<sub>la</sub>'  
gwzenagcho che justis  
be<sub>ne</sub>' chesenabia', le Diosen'  
bnite' legaque' chesenabi'e. <sup>2</sup>Še bi  
chzenagcho che be<sub>ne</sub>' chesenabia',  
bi choncho da' nžia bia' Diosen'  
goncho, na' lecze chyiljwze  
xto<sub>la</sub>'cho na' gaccho castigw da' bi  
chzenagcho čegaquen'. <sup>3</sup>Bi cheya<sub>la</sub>'  
žebcho be<sub>ne</sub>' ca' chesenabi'e še  
zoacho choncho da' güen, san še  
zoacho choncho da' xinj, nachen'  
žebcho yesone' chio' castigw. Na'  
cont bi žebcho legaque', con soacho  
goncho da' güen da' yesyebede'.  
<sup>4</sup>Justis ca' chesone' xšin Dios cont  
soacho güen. Perw še choncho  
da' xinj, cheya<sub>la</sub>' žebcho legaque',  
le zjanape' yela' chn<sub>abia</sub>' cont  
yesone' castigw che note'teze  
be<sub>ne</sub>' cheson da' mal, le Diosen'  
none' lo na'gaquen' yosonežjue'  
castigw che be<sub>ne</sub>' cheson da' mal.

<sup>5</sup>Da'nan' cheyała' gwzenagcho c̄hegaque' cont bi si'cho castigw na' lecze cont gacbe'echo lo' yichjlažda'ochon' choncho can' cheyała' goncho. <sup>6</sup>Lecze da'nan' cheyała' c̄hixjwcho no c̄he bien na' bichle da' cheyała' c̄hixjwcho, cont bene' ca' chesenabia' guac yesone' da' yo'o lo ne'e yesone', na' cheyała' gwzenagcho c̄hegaque', le Diosen' ba bzoe' legaque' cont chesone' dan' cheyała' yesone'.

<sup>7</sup>Chixjwcho še bi da' čala'cho c̄he bene'. Še čala'cho c̄he bien, c̄hixjwchon. Še čala'cho c̄he impuestw, c̄hixjwchon. Na' gapcho bala'an' bene' cheyała' dap bala'an'. Na' gonxencho bene' cheyała' gaxen. <sup>8</sup>Cheyała' c̄hixjwcho doxen bi da' čala'cho c̄he bene', na' lecze cheyała' gaque yogo' ljež benačcho, le še chaquecho legaque', ba choncho da' non ley c̄he Diosen' mandadw goncho. <sup>9</sup>Leyna' žan: "Bi gata'lenle no'ole bi nac no'ol c̄hele o bene' byo bi nac bene' c̄hele, bi gotle bene', bi cuanle, bi güe'le diža' güenlaže' c̄he bene' lježle, bi selaže'le bite'teze da' de c̄he bene'." Na' dech da' ža leyna'. Na' yogo'cze da' nžia bia' leyna' goncho, bač chonchon še chzenagcho c̄he dan' žanna': "Le gaque ljež benačhle ca chaque cuinle." <sup>10</sup>Še chaque lježcho, bibi da' mal gonechone'. Da'nan' choncho doxen can' nžia bia' leyna' še ba chaque lježcho.

<sup>11</sup>Caten' gwzolaochó chejnilaže'cho Criston' gwnezecho gwžin ža yide' da' yoble. Na' na'a ba za' bagwze yide' da' yoble. Da'nan' bich cheyała' gaccho ca bene' c̄htas, bene' bi chon xbab. <sup>12</sup>Yežlio

nga zaca'leben ca ga nac c̄hol, le že'chgua bene' cheson da' xinj; san gan' zoa Diosen' naquen ca ga yo'o be'ni'. Nach cheyała' cuejyichjcho bich goncho da' xinj na' goncho con da' chazlaže' Diosen', le ba zoa yide Criston' yedyexi'e chio'. <sup>13</sup>Cheyała' goncho da' güen, le ba yo'o be'ni' c̄he Criston' lo' yichjlažda'ochon'. Bi cheyała' goncho txen lo' l̄nin' ga chbe' žaš, bi cheyała' gaccho borrašw, bi cheyała' gata'lencho no'ole bi nac no'ol c̄hecho o bene' byo bi nac bene' c̄hecho o goncho bichle da' nac da' yela' zto', na' bi cheyała' tillen lježcho o gue'echo bene'. <sup>14</sup>Cheyała' gon cuincho lo' na' Xancho Jesucriston' na' cue' yichjcho goncho da' chazlaže' cont da' malen' da' yo'o lo' yichjlažda'ochon' bi nabian' chio'.

Toz Diosen' nezde' še bene'  
lježcho nape' doła'

**14** Še zoa to bene' ba chejnilaže' Criston' na' bina' šejni'ide' nac cheyała' gone', con zoe' chacžejlaže', le gwlebe' gaque' txen len le'e, perw bi gacyožlenlne' c̄he xbab c̄hen'. <sup>2</sup>Nita' bene' chesejnilaže' Diosen' chesacde' bi zjanape' doła' da' chesagüe' bite'teze yela' guagw, na' lecz nita' bene' yoble bina' yesejni'ide' bite'teze da' ye'ej gagwcho naquen güen lao Diosen'. Da'nan' chesacde' bi cheyała' yesagüe' bela' na' chesagüe' yixe' cuanze. <sup>3</sup>Ben' chagw bite'teze yela' guagw bi cheyała' gue'ede' ben' bi chagüe' bela', na' ben' bi chagw bela' bi cheyała' ne' c̄he ben' chagüe' bela', le Diosen' ba none' chopte' ca xi'ine'. <sup>4</sup>čNoxe nac chio' gwlaže' c̄hecho še

nac chon ben' ba gwlej Diosen' ca xi'ine'? Diosen' naque' Xan xi'ine' ca', na' len' ne' che to tocho še choncho da' güen o še choncho da' xinj. Na' lecze len' gone' cont soacho goncho da' güen.

<sup>5</sup>Nita' bene' cheson xbab nchoj to ža xen da' zaca'ch len Diosen' ca yezica'chle ža ca', na' lecze nita' bene' chesacde' toz ca zaca' yogo' ža ca'. To tocho cheyała' soacho do yichj do laže'cho goncho da' chejni'icho cheyała' goncho. <sup>6</sup>Bene' cheson xbab de ža da' zaca'ch ca ža ca' yezica'chle, chesebeje' žan' cont chesonxene' Dios. Na' bene' chesacde' toz can' zaca' ža ca', lecze chesonxene' Diosen' chesone' xbab' ca'. Na' ben' chesagw bite'tez yela' guagw, chesonxene' Xancho Diosen' cate' chesagüen', le cheso'e yela' choxclen che Diosen' che dan' chese'ej chesagüen'. Na' ben' bi chesagw bela', chosožone' yesagüen' da' chesonxene' Diosen' na' lecze cheso'e yela' choxclen che'.

<sup>7</sup>Ne tocho bi yo'o lo na'cho gwziacho bia' can' soa cuzcho šlaque mbancho, na' neca yo'o lo na'cho gwziacho bia' nac gatcho. <sup>8</sup>Šlac mbancho zoacho cont goncho da' chaclaže' Xancho Jesucriston', na' še gatcho lecze cate' chaclaže' len' gatcho. Can' naquen, mbancho o gatcho, yo'ocho lo na' Xanchon'. <sup>9</sup>Cuin Xancho Criston' gote' na' beyas bebane' ladjo bene' guat ca' cont naque' Xan yogo' bene' chesejnilaže'ne' bene' zjamban na' bene' ba gosat.

<sup>10</sup>Bi cheyała' nacho che bene' lježcho zjanape' doła' še bi da' chesone', na' bi cheyała' gue'e

lježcho. Yogo'czecho techo lao Criston' cont le' chogbi'en checho še de xtoła'cho o še bibi de. <sup>11</sup>Nyojcz Xtiža' Diosen' žan:

Xancho Diosen' že':  
Da' li naca' Dios, zoa' mbana',  
na' yogo' bene' yedesezoa  
xibgaque' laguan',  
na' yogüe' yesene' toz neda' zaca'  
yesonxen benačh.

<sup>12</sup>Can' naquen, yogo'czecho yodecho cuent lao Diosen' che bite'teze da' ba bencho šlac mbancho.

**Bi goncho da' gwžigan' bene'  
lježcho gone' da' mal**

<sup>13</sup>Da'nan' chnia', bi cheyała' necho che bene' lježcho neche bi da' chesone'. Da' cheyała' yechoglaže'cho goncho, cuejyichjcho bi da' choncho še len chžigan' note'teze bene' lježcho gone' da' xinj o še len chonen ca šjabix šjalažoe'. <sup>14</sup>Xancho Jesucriston' bzejni'ide' neda' cont nezda' bi napcho doła' še gagwcho bite'teze yela' guagw. Perw še bene' chone' xbab gape' doła' lagüe da' gagüe' to da' gagüe', naquen mal gagüen' še ca'. <sup>15</sup>Še bene' lježcho chaque' tole lagüe da' chagwcho to da' chone' xbab naquen mal len Diosen', bi chaquechone' še chagwtezchon. Criston' brežjw cuine' gote' neche bene' lježchon', na' chio' bi cheyała' gagwcho bi da' gonen cont gac choplaže' bene' lježchon' cuejyichje' Criston' na' cuiaye'e. <sup>16</sup>Še choncho bi da' chaquecho naquen güen, perw na' bene' lježchon' chesacde' naquen mal, bi gonchon cont bi yesene' choncho da' xinj. <sup>17</sup>Še ba choe'cho

latje chnabia' Diosen' chio' len xbab chechon', dan' che'ej chagwchon' bi naquen da' žialao xen len chio'. Da' nac da' žialao xen, goncho da' zej to licha, soacho binlo len Dios na' len bene' lježcho, na' soacho mbalaz da' yo'o Spiritw che Diosen' lo' lažda'ochon'. <sup>18</sup>Še choncho da' zej to licha, na' zoacho binlo len Diosen' na' len lježcho, na' zoacho mbalaz da' yo'o Spiriton' lo' lažda'ochon', da' li chzenagcho che Criston'. Nachen' chebe Diosen' can' chonchon', na' lecze yezica'chle bene' chesene' choncho güen.

<sup>19</sup>Da'nan' cheyala' yeyiljwlaže'cho can' goncho soacho binlo tocho yetocho na' can' gaclen bene' lježcho ca' cont yesenita'chache' yesejnilaže' Criston'. <sup>20</sup>Diosen' ba bnitlagüe' xtoła' bene' lježcho na' bi cheyala' gagwcho da' gonen gac choplaže' no bene' lježcho na' gone' da' chacde' naquen mal. Nezda' de latje gagwcho bite'teze yela' guagw, perw naquen mal gagwchon še len chonen choplaže' bene' lježcho. <sup>21</sup>Güenczen bi gagwcho bela' neca ye'ejcho vino na' neca goncho bichle da' goncho še len chonen cont bene' lježcho chacchoplaže' o gone' da' xinj o cuejyichje' bich šejnilaže' Criston'. <sup>22</sup>Še nezecho zoacho binlo len Diosen' da' chejnilaže'chone' na' chaquecho bi napcho doła' len bica' da' choncho, chopzcho len Diosen' nezecho. Mbalazen' zoacho še nezecho lo' yichjlažda'ochon' bi napcho doła' len bica' da' choncho. <sup>23</sup>Na' de xtoła'cho še chagwcho to yela' guagw na' chacžejlaže'cho chaquecho bilja cheyala' gagwchon, le bite'teze da' choncho še

chaquecho naquen mal gonchon, napcho doła' chonchon še ca'.

**Cheyala' cue' yichjcho bene' lježcho**

**15** Balcho ba zoachachcho chejnilaže'cho Criston' na' nezecho de latje ye'ej gagwcho bite'teze. Perw cheyala' gapcho yela' chxenlaže' len bene' bina' yesejni'išagüe'de', na' bi goncho con da' žan checho. <sup>2</sup>To tocho cheyala' goncho bi da' güen da' chazlaže' bene' lježcho ca' goncho, cont gaclenen legaque' yesejnilaže'che' Diosen'. <sup>3</sup>Goncho ca', le ne Criston' bi bene' con da' gwnazen che', san goc che' can' nyoj Xtiža' Diosen', žan gože' Xe' Diosen': "Bene' besegue'ede' le' na' gosene' diža' bya' chio', lencze chia' neda' gosene'." <sup>4</sup>Na' Xtiža' Diosen' da' bosozoj bene' can' chzejni'in chio' cont gwyo gwčhejcho šejnilaže'cho Diosen' cate' chzaca'zi'cho. Na' še goncho xbab can' žanna', na' gaclenchen chio' cont soacho lez gwžin ža gon Diosen' güen len chio'. <sup>5</sup>Diosen' chone' chio' yela' chxenlaže' cont chyo chčhejcho cate' chzaca'zi'cho. Na' chnablaža' lecze gone' gac yichjlažda'ole toze tole yetole, con can' chazlaže' Cristo Jesús'en'. <sup>6</sup>Na' gone' ca' cont toze can' nale gonxenle Dios ben' nac Xa Xancho Jesucriston'.

**Diosen' chaclaže' bene' bi zjanac bene' Israel yesonxene' le'**

<sup>7</sup>Da'nan' cheyala' le'e to to bene' lježcho binlo ca' Criston' chle'ede' to to chio' binlo, chio' chejnilaže'chone'. Goncho ca' cont gacxen Diosen'. <sup>8</sup>Can' goc len Cristo

Jesúsen', bzeḡjw yichje' ben cuine'  
ca to bene' güen žin cont goclene'  
neto' bene' Israel. Blo'ede' diža' li be'  
Diosen' cate' gože' da' xozxta'oto' ca'  
gone' güen len legaque'. <sup>9</sup>Na' lecze  
bid Criston' cont le'e bi nacle bene'  
Israel lecze gonxenle Diosen' da' ba  
beyaše'laže'de' le'e. Chac ca nyoj  
Xtiža' Diosen' dan' žan:

Da'nan' gua' yela' choḡcnen chio'  
gan' že bene' bi zjanac bene'  
Israel,

goļa' gonxena' le'.

<sup>10</sup>Na' ga yoble žan:

Le'e bi nacle bene' Israel, le yebe  
txen len neto' bene' gwlej  
Diosen' nacto' nación che'.

<sup>11</sup>Na' lecze žan:

Yogo' le'e bi nacle bene' Israel, le  
gonxen Xancho Diosen'.

Yogo'lolle le güe' diža' che yela'  
gwnabia' che'.

<sup>12</sup>Na' da' Isaías ben' be' xtiža' Diosen'  
cani' bzoje' da' nga žan:

To bene' gualaž yide', bene' galje'  
lo diaža che da' Isaí.

Le' nabi'e bene' že' to to yež na'  
to to nación,

na' bene' ca' bi zjanac bene'  
Israel yesebeze' gaclene'  
legaque'.

<sup>13</sup>Diosen' chone' cont chebecho  
dan' nezecho šjayzoacho len le'. Na'  
chḡaba' gonšque' cont soale mbalaz  
juisyw na' soa cuezle binlo len xbab  
da' yo'o yichjlažda'olen' da' zoale  
chejniłaže'le Criston'. Gonšque' ca'  
cont Spiritw che Diosen' gaclenen  
le'e soačhačhle yebele da' nezele  
šjayzoale len le'.

<sup>14</sup>Bene' migw, nezda' ba nacle  
bene' šagüe' bene' chon da' güen,  
na' nezda' chejni'ichgüele na'

chac chḡeyoe lježle. <sup>15</sup>Pero le'e  
cart nga ba beyaxjda' gwdila' le'e  
cont gonchle xbab, le Diosen'  
beži'ilaže'de' neda' gwleje' neda'.

<sup>16</sup>Gwleje' neda' cont chyixjue'eda'  
xtižen' len bene' bi zjanac bene'  
Israel. Na' Diosen' yebede' da' ba  
goclena' legaque' cont bale' gosejle'e  
xtižen' na' gosaque' lo ne'e cate'  
Spiritw chen' benen lažda'ogaquen'  
xilaže'.

<sup>17</sup>Chbeda' chona' xšin Diosen'  
da' ba goclen Cristo Jesúsen' neda'  
chona'. <sup>18</sup>Bi cheyaxjda' gua' diža'  
che bi da' ba ben bene' yoble, san  
choa' diža' che da' ba ben Criston',  
le chaclene' neda' choa' xtižen' na'  
bichle da' chona' cont zan bene' ca'  
bi zjanac bene' Israel chosozenague'  
che'. <sup>19</sup>Spiritw che Diosen' goclenen  
neda' cont bena' yela' guac na'  
bichle da' besyebane bene' gate'teze  
gwy'a' be'lena' legaque' xtiža'  
Diosen', gwzolağa' Jerusalén na'  
bžintia' gan' nzi' Ilírico. Na' ba  
gwdixjue'eda' xtižen' doxen gan'  
gwsele' neda'. <sup>20</sup>Na' ba bena' byen  
ba bia' diža' güen da' chzejni'in che  
Criston' gan' nono na' šejnilaže'ne',  
le bi chaclaža' tia' gwłana' xlatje  
bene' ba chosozejni'ide' xtiža'  
Diosen'. <sup>21</sup>Da'nan' chac can' nyoj  
Xtiža' Diosen' žan:

Bene' ca' biḡa' yesende' xtižen'  
yesombi'ene',

na' bene' ca' biḡa' yesenezde' che'  
yesejni'ide' che'.

#### Pablon' šeje' Roma

<sup>22</sup>Da' chzejni'ida' bene' ga yoble  
xtiža' Criston', da'nan' bi goc yida'  
gan' zoalen' la'czla' zan ni'a ba  
goclaža' yida'. <sup>23</sup>Canate zelaža'



yedena'a le'e, perw na'ach ba beyož bena' da' gwlo'o Diosen' lo na' gona' do nga. <sup>24</sup>Nach cate' ša'a España cana' chacda' tia' yedena'a le'e. Na' mbalaz soa' yeyož le'eda' le'e na' gaclenle neda' cate' ša'a Españan'. <sup>25</sup>Na'a ša'a Jerusalén šjasana' mechw da' gaclenen bene' lježcho ca' že' na' bene' ca' ba gwlej Diosen' chesejnilaže'ne'. <sup>26</sup>Le bene' lježchon' že' yež ca' zjachi' distritw Macedonia na' Acayan' bosotobe' mechw da' gaclenen bene' lježcho ca' chesejnilaže' Diosen' Jerusalén ben' zjanac bene' yaše'. <sup>27</sup>Bene' ca' bosotoben' besyebede' bosonežjue' mechon', na' naquen to goclen da' cheyała' yesone' len bene' Israel gualaž cheto' ca', le la'czla' legaque' bi zjanaque' bene' Israel, ba zjanone' čhegaque' yogo' da' güen da' ba bzejni'i Diosen' neto' bene' Israel, na' da'nan' cheyała'cze yesaclene' bene' gualaž cheto' ca' len da' cheseyažjde'. <sup>28</sup>Cate' bačh beyož bena' lo na' bene' Jerusalén ca' mechon' bdooben', cana'ch sa'a ša'a Españan' na' tia' na'a le'e. <sup>29</sup>Na' nezda' Criston' gaclene' neda' la'a gan' zoalen' cont güe'lena' le'e diža' güen che' da' gaclenen yichjlažda'olen' na' soachguacho mba.

<sup>30</sup>Bene' migw, nezda' chaquele Xancho Jesucriston' can' chacda'ne' neda', na' Spiritw che Diosen' chonen cont chaque lježcho tocho yetocho. Da'nan', bene' migw, chnaba' gacle neda' txen yol güižcho Diosen' cont gaclene' neda'. <sup>31</sup>Nabechone' bi gaca' lo na' bene' gualaž cheto' ca' bene' bi chesejnilaže' Criston' Judean', na' lecze nabechone' cont bene'

lježcho ca' že' Jerusalén bene' yo'o lo na' Diosen' yesazlaže' ca dan' güe'gaca'ne'. <sup>32</sup>Nach še Diosen' gone' latje, mbalaz yedena'a le'e na' yeyaclaža' soa' na' len le'e. <sup>33</sup>Dios ben' chon chzoa chbezcho binlo len xbab da' yo'o lo' yichjlažda'ochon' gaclene' yogo'le len xbab chelen'. Ca'šcacze gac.

**Pablon' chguape' tiox  
bał bene' že' Roma**

**16** Chņeyoeda' le'e le gon txen len bene' zanco Febe cate' le'e gan' zoalen'. Ba benchgüe' xšin Diosen' len bene' ca' chesedop chesežag chesonxene' Jesucriston' lo yež Cencrea. <sup>2</sup>Le gwlebe' ca cheyała' gonle len ljež chio' yo'ocho lo na' Diosen'. Na' le gaclene' še bi da' chyažjde', le len' ba goclene' bene' zan na' lecze ba goclene' neda'. <sup>3</sup>Le gwguap tiox Priscila len bene' che' Aquila. Legaque' ba gosone' žin che Cristo Jesús'en' txen len neda'. <sup>4</sup>Besezanlaže' cuingaque' yesate' cont bososle' neda' lo na' yela' goten'. Choa' yela' choxclen čhegaque' can' gosonen'. Na' lecze yogo' bene' ca' bi zjanac bene' Israel bene' chesedop chesežag chesonxene' Jesucriston' cheso'e yela' choxclen čhegaque'. <sup>5</sup>Le gwguap tiox bene' ca' chesedop chesežag liž Priscilan' na' Aquilan' chesonxene' Jesucriston'. Na' le gwguap tiox bene' xmigua' Epeneto. Chacda'ne', le naque' bene' nechw bene' Acaya gwyejnilaže' Criston'. <sup>6</sup>Nach le gwguap tiox María no'olen' ba benchgua xšin Diosen' gan' zoalen'. <sup>7</sup>Na' le gwguap tiox bene' gualaž cheto' Andrónico len Junias. Legaque' byobch gosejnilaže'

Criston' clēl ca neda' na' txen gota'to ližya. Lecz ca' postlw ca' yezica'chle cheso'e diža' güen c̄hegaque'.

<sup>8</sup>Le gwguap tiox bene' xmigua' Amplias, le chacda'ne' da' ba chejnilaže' X̄ancho Criston'. <sup>9</sup>Na' le gwguap tiox Urbano ben' chon xšin Criston' txen len chio', na' lecze Estaquis, le chacda'ne'. <sup>10</sup>Lecze le gwguap tiox xmigua' Apeles. Da' zan ba bene' blo'e chejnilaže' Criston' do yichj do laže'. Na' le gwguap tiox bene' ca' že' liž Aristóbulo. <sup>11</sup>Na' le gwguap tiox bene' gualaž chia' Herodión na' lecze bene' ca' že' liž Narciso, con noe' chesejnilaže' Criston'. <sup>12</sup>Le gwguap tiox no'ole xmigwcho Trifena len Trifosa, no'ol ca' cheson xšin X̄ancho Jesucriston'. Na' lecze le gwguap tiox bene' zanchó Pérsida. Chaquechone' da' ba benchgüe' xšin X̄anchon'. <sup>13</sup>Na' le gwguap tiox Rufo. Naque' bene' blao len chio' chejnilaže'cho X̄ancho Jesucriston'. Na' lecze le gwguap tiox xne'ena', le ba none' neda' ca xi'ine'. <sup>14</sup>Le gwguap tiox Asíncrito, Flegonte, Hermas, Patrobas na' Hermes len bene' lježcho zjanita' len legaque'. <sup>15</sup>Na' le gwguap tiox Filólogo na' Julia na' len Nereo na' bene' zanen', na' Olimpas na' yogo' bene' lježcho nita' len legaque'.

<sup>16</sup>Na' cate' chežagle txen le gwnopa' na' lježle cate' chguap lježle tiox cont nacbia' chaque lježle. Na' bene' ca' chesedop chesežag chesonxene' Criston' yogo'te yež gan' ba gwy'a chosoguape' le'e tiox.

<sup>17</sup>Bene' migw, chneyoeda' le'e le gwsaca' cont bi gwzenagle c̄he

bene' zjanac bene' güetil, bene' chesaclaže' gonle da' xinj, le bi chesone' txen len dan' ba bsedle c̄he Diosen'. <sup>18</sup>Bi chosozenague' c̄he X̄ancho Jesucriston' san chosozenague' c̄he da' mal da' yo'lo lo yichjlažda'ogaquen' na' chesone' con can' žanna'. Na' cheso'e diža' xdan chosopedē' bene' chesejle'daze cont chesexoayague' legaque'.

<sup>19</sup>Yogo'ze bene' zjanezde' chzenagle c̄he bene' chosozejni'ide' le'e, na' danan' chbeda'. Perw chaclaža' gacle bene' sina' cont gwzenagle c̄he da' nac da' güen, gague gwzenagle c̄he da' nac da' mal.

<sup>20</sup>Nach Dios ben' chon cont chzoa chbezcho binlo lecze yob gone' cont Satanásen' dan' chnabia' da' xigüe' ca' bi soen nabi'an chio'. Na' X̄ancho Jesucriston' soašque' gaclenšcace' le'e.

<sup>21</sup>Timoteo ben' chonlen neda' xšin Criston' nga chguape' le'e tiox, na' lecze ca' cheson bene' gualaž c̄heto' Lucio na' Jasón na' Sosípater.

<sup>22</sup>Neda' Tercio chzoja' cart nga con can' ža Pablon', na' lecze chguapa' le'e tiox, le naccho txen chejnilaže'cho X̄anchon'.

<sup>23</sup>Lecze Gayo chguape' le'e tiox. Neda' Pablo zoa' liže' na' lecze liže' nga chesežag bene' ca' chesonxen Criston'. Na' lecze Erasto ben' nac lo ne'e mechw c̄he ciudan' chguape' le'e tiox na' len bene' biše' Cuarto.

<sup>24</sup>Soašca X̄ancho Jesucriston' gaclenšque' yogo'le. Na' cašcace' gac.

#### Chonxene' Diosen'

<sup>25</sup>Le gonxench Diosen'. Len' nape' yela' guac cont gaclene' le'e

soačhachle šejnilaže'lene' can'  
 ža diža' güen da' chyixjue'eda'  
 chzejni'ida' bene' che Jesucriston'.  
 Na' chzejni'ida' xtiža' Diosen'  
 da' nono na' neze cate' za' xete  
 yežlion', <sup>26</sup>perw na'a Diosen' ba  
 bzejni'ide' chio' bi zejen da' ca'  
 none' mandadw bosozoj bene' ca'  
 bosozoj Xtižen' cani'. Na' Dios ben'  
 zoa toli tocane chaclaže' šej diža'

chen' yogo' yež cont yogo' chio'  
 benach šejnilaže'cho Jesucriston'  
 na' gwzenagcho che'.

<sup>27</sup>Toze Diosen' zaque' gonxen  
 chio' benach, na' tozen'  
 napchgüe' yela' sina'. Na' da'  
 gwsele' Xancho Jesucriston'  
 chaclene' chio', da'nan' chac  
 chonxenchone' toli. Cašcacze  
 gac.

# CART NECHW DAN' BZOJ POSTLW SAN PABLO CHE BENE' CA' ŽE' CORINTO

Pablon' chzoje' bene' chesedop  
chesežague' chesonxene'  
Jesucriston' Corinto

**1** Neda' Pablo chzoja' cart nga.  
Diosen' gwleje' neda' par  
naca' postlw che Jesucriston', le  
can' gwnalaže'. Na' chguapa' le'e  
tiox txen len bene' migw checho  
Sóstenes ben' lecze chejnilaže'  
Jesucriston'. <sup>2</sup>Chzoja' cart nga  
par le'e chdop chžagle chonxenle  
Diosen' lo ciuda Corinto. Da'  
chejnilaže'le Jesucriston', da'nan'  
Diosen' ba gwleje' le'e cont yo'ole lo  
ne'e, can' gwleje' yogo' ben' chosol  
güiže' Xancho Jesucriston' na'  
zjanaque' le' txen gate'tezechle, le  
lecze naque' Xangaquen'. <sup>3</sup>Chnaba'  
lao Xacho Diosen' na' lao Xancho  
Jesucriston' yesaclene' le'e na'  
yese' cont soa cuezle binlo len  
xbab da' yo'o lo' yichjlažda'ole.

Diosen' chaclene' chio'  
chejnilaže'cho Criston'

<sup>4</sup>Yogo' ni'a choa' yela' choxcen  
che Diosen' par le'e can'  
chaclene' le'e lagüe chejnilaže'le  
Jesucriston'. <sup>5</sup>Na' da' chejnilaže'lene'  
chaclenchgüe' le'e cont chejni'ile

yogo' da' ba bzejni'i Diosen' le'e  
na' cont choe'le diža' chen. <sup>6</sup>Na' ba  
chonle cont nacbia' xtiža' Criston' da'  
chejle'le naquen da' li. <sup>7</sup>Spiritw che  
Diosen' chonen cont chac chonle  
yogo' da' ca' chyažjen gonle šlac  
chbezcho yid Xancho Jesucriston'  
yeto. <sup>8</sup>Na' Diosen' gaclene' le'e  
soachachle gonle can' chazlažen'  
cont bibi doła' gapple caten' yid  
Xancho Jesucriston' yeto. <sup>9</sup>Diosen'  
zoacze' chone' can' ba gwne' gone',  
na' le'na' gwleje' le'e cont nacle txen  
len Xi'ine' Jesucriston' ben' nac  
Xancho.

Nža' nža'te chesena bene'  
chesonxen Jesucriston' Corinton'

<sup>10</sup>Bene' migw, le'e chejnilaže'le  
Jesucriston'. Da'nan' chneyoeda' le'e,  
le gon txen len lježle na' bich gacle  
chople o šon taple len da' chonle xbab  
na' len da' žale. <sup>11</sup>Chnia' ca' bene'  
migw, le bene' nita' liž Cloé ba gose'e  
neda' chdile chšašle. <sup>12</sup>Chnia' chdile  
chšašle, le balle žale: "Naca' txen len  
da' chsed chlo'e Pablon'." Na' yeballe  
žale: "Naca' txen len da' chsed chlo'e  
Apolosen'." Na' yeballe žale: "Naca'  
txen len da' chsed chlo'e Pedron'." Na'  
yeballe žale: "Naca' txen len da' chsed

chlo'e Criston'." <sup>13</sup> ¿Chaquele bid Criston' neche to chopzle? ¿Chaquele nedan' Pablo bnežjw cuina' gota' le'e yag cruz neche le'e? ¿Zsoale nis cont blo'ele chejnilaže'le neda'? Gague can'. <sup>14</sup> Choa' yela' choxclen che Diosen' bi bzoa' le'e nis, san Crispo na' Gayo na'zen' bzoa' nis. <sup>15</sup> Da'n'an' noch no zoa len le'e bene' yesene' bzoa' legaque' nis, le bi chaclaža' no yesena gwzoe' nis cont blo'e chejnilaže' neda'. <sup>16</sup> Na' neda' lecze bzoa' nis bene' ca' že' liž Estéfanas, na' bi zalaža' še zoa nochle bene' bzoa' nis. <sup>17</sup> Nezda' Criston' bi gwsele' neda' cont gwzoa' bene' nis san cont chixjue'eda' diža' güen chen'. Na' bi cheyiljua' no diža' da' chaque benachen' diža' sina' choa' cate' chyixjue'eda' diža' güen chen', le še bene' yesone' xbab che yela' sina' chia', nach bi yesone' xbab che dan' ben Criston' bnežjw cuine' gosote'ne' le'e yag cruzen', na' lenna' nsan' yela' guac che Diosen'.

**Criston' bedelo'ede' yela' guac  
che Diosen' na' yela' sina' che'**

<sup>18</sup> Bene' ca' yesebiaye'e lagüe bi chesejnilaže' Jesucriston', chesacde' bibi zaca' xtiža' Criston' da' choe'cho che'cho legaque' bnežjw cuine' neche xtoła'gague' le'e yag cruzen'. San chio' chejnilaže'chone', chio' ba de yela' mban checho toli tocane, nezecho diža' nan' naquen da' zaca'chgua, le nsan' yela' guac che Diosen'. <sup>19</sup> Chac can' nyojen žan:

Neda' gona' cont nacbia' gague da' li zjansina' bene' ca' chesene' zjanaque' bene' sina'. Na' gona' cont bene' ca' chesejni'i da' zan yežlio nga, bibi de gon ca dan' chesejni'ide'.

<sup>20</sup> Chacljele ¿chixe bene' ca' zjansed yela' sina' che benachen'? na' ¿chixe bene' chososed chosolo'ede' ley che Diosen'? na' ¿chixe bene' chac chesene' diža' xdan diža' sina' che dan' chac yežlio nga? Quinga nac chegaque', Diosen' ba blo'e yela' sina' chegaquen' bi naquen da' sina'. <sup>21</sup> Diosen' naque' bene' sina' na' ba bene' cont yela' sina' che benachen' bi chaclenen legaque' yesombi'ene'. Le Diosen' chazlaže' con bene' yesejle' xtiže' dan' choe'to' gata' yela' mban chegaque' toli tocane, la'czla' yezica'chle bene' chesacde' bibi zaca' xtižen' dan' choe'ton'.

<sup>22</sup> Bene' Israel gualaž cheto' chesenabe' yesele'ede' yela' guac cont yesejle'e bin' ža Diosen', na' bene' chesac diža' griego cheseyljue' no diža' da' chesacde' naquen da' sina'. <sup>23</sup> San neto' chyixjue'eto' xtiža' Criston' can' bnežjw cuine' gosote'ne' le'e yag cruzen'. Na' bene' Israel gualaž cheto' ca' bi chesazlaže' da' chyixjue'eto' na' bitw chesejle'en. Na' bene' bi zjanaque' bene' Israel lecze chesacde' bibi zaca' dižan' chyixjue'eton'. <sup>24</sup> Perw chio' ba gwlejš Diosen' naccho xi'ine', la'acžla' še naccho bene' Israel o še bi naccho bene' Israel, nezecho Diosen' blo'e yela' guac chen' na' yela' sina' chen' dan' gwsele' Criston' bnežjw cuine' neche chio'. <sup>25</sup> Bene' ca' bi chesejnilaže' Diosen' chesacde' bi nac Diosen' bene' sina' lagüe da' be'e latje got Criston' le'e yag cruzen', na' chesacde' chlo'en bibi yela' guac nap Diosen'. Perw gague can', san xbab che Diosen' naquen da' sina'ch ca xbab che benachen', na' nape' yela'

guac xench ca be<sub>n</sub>achen'. <sup>26</sup>Bene' migw chia', le gon xbab can' nacle cate' Diosen' gwleje' le'e cont nacle xi'ine'. Gague zanle nacle bene' sina' len xbab che be<sub>n</sub>achen', gague zanle nacle bene' chnabia', gague zanle golje lo diaža che bene' blao. <sup>27</sup>Diosen' ba gwleje' chio' naccho xi'ine' la'czla' bibi yela' sina' che yežlio nga napcho, na' chesaque be<sub>n</sub>achen' bibi chac goncho; nach Diosen' chaclene' chio' len yela' guac che' na' yela' sina' che' cont bene' zjanac bene' sina' len xbab che be<sub>n</sub>achen' yesacbe'ede' na' yesacde' zto'. <sup>28</sup>Diosen' ba gwleje' chio' naccho xi'ine', zanchi naccho no bene' yixe', no bene' chesegue'e be<sub>n</sub>ach, na' gwleje' chio' cont gwlo'ede' bene' zjanaque' blao len be<sub>n</sub>achen' bibi zjazaque' len le'. <sup>29</sup>Diosen' bene' cont nono gac gonxen cuine' lagüen'. <sup>30</sup>Diosen' ba none' chio' txen len Cristo Jesúsén', na' Criston' nse'e yela' sina' che Diosen' na' naque' la'zelagüe bene' güen bene' laždao' xilaže'. Na' dan' naccho txen len Criston', chone' chio' yela' sina' chen', na' yela' bene' güen chen', na' yela' bene' laždao' xilaže' chen', na' ba beque'e xtoła'chon'. <sup>31</sup>Da'nán' Xtiža' Diosen' nyojen žan: "Bi cheyala' gonxen cuincho san gonxencho Xanchon'."

**Pablo be'e xtiža' Criston' ben' gosote' le'e yag cruz**

**2** Bene' migw, cate' bedetixjue'eda' xtiža' Diosen' len le'e, bitw bia' diža' zdebe da' bi gwejni'ile na' gague bia' diža' xdan cont gaquele naca' bene' sina'. <sup>2</sup>San bečoglaža' be'lena' le'e

diža' che Jesucriston' can' bnežw cuine' gosote'ne' le'e yag cruz neče xtoła'chon', na' bi be'lena' le'e bichle diža'. <sup>3</sup>Na' cate' gwzoa' len le'e gocbe'eda' bibi chac gona', na' leca bžeba' na' gola' gw xiza' bena' xbab še bi gwzenagle xtižan'. <sup>4</sup>Na' diža' da' be'lena' le'e gague bian' len yela' sina' che be<sub>n</sub>achen' cont co'oyela' le'e gwzenagle chia', san Spiritw che Diosen' goclenen neda' len yela' guac chen na' benen cont bzenagle. <sup>5</sup>Goclaža' šejnilaže'le Criston' gague neče yela' sina' che be<sub>n</sub>achen', san neče da' gwša' Diosen' xbab chelen' len yela' guac chen'.

**Spiritw che Diosen' chonen yela' chejni'i**

<sup>6</sup>Na' len bene' ba zjayolagüe' chosozenague' che Diosen' choe'cho diža' sina' da' za' che Diosen', bi zan' che yežlio nga ne che bene' blao o bene' gwnabia' zjanita' na'a, le te che bene' ca' na' te che yela' sina' chegaquen'. <sup>7</sup>Diosen' ba bzejni'ide' neto' to yela' sina' da' nono gwejni'i cani', to da' bi'e xnezen' gac cate' bina' xe yežlion', le cana'te bi'e xnezen' yid Criston' yeque'e xtoła'chon' cont soacho mbalaz toli tocane. <sup>8</sup>Na' ne toze bene' gwnabia' bene' že' yežlio nga bi gosejni'ide' yela' sina' che Diosen', le šaca' gosejni'iden', bi bosode'e Xancho Jesucriston' ben' nac bene' zaca' juisyw le'e yag cruzen' še ca'. <sup>9</sup>Na' Xtiža' Diosen' da' nyojen žan: Nono zoa bene' ba ble'ede' da' güen da' gon Diosen' len bene' ca' chesacde' le'. Nono na' yende' diža' can' gone', neca na' yesone' xbab lo' lažda'ogüen' can' gaquen'.

<sup>10</sup>Perw Diosen' ba bene' cont Spiritw chen' bzejni'in chio' can' gone', le Spiriton' chejni'in tcho'a yogo' da' chon Diosen', na' nezen da' ngaše' len beṇachen'.

<sup>11</sup>Can' naquen len beṇachen', nono neze bi xbab chon bene' yoble, con to tocho nezecho bi xbab choncho. Na' ca'cze naquen len Diosen', con Spiritw che' na'zen' nezen bi xbab chone'. <sup>12</sup>Na' Diosen' ba bene' chio' Spiritw chen' cont nezecho yogo' da' güen da' chon Diosen' len chio' lagüe nzi'ilaže'de' chio'. Da'n'an' bi choncho xbab can' cheson bene' bi chosozenag che Diosen'. <sup>13</sup>Na' cate' choe'lento' le'e xtiža' Criston', gague choe'to' diža' len yela' sina' cheton', san choe'to' diža' da' bzejni'i Spiritw che Diosen' neto', na' bene' ba yo'o Spiritw che Diosen' lo' yichjlažda'ogaquen', legacze' chesejni'ide' da' chsed chlo'eto'ne'.

<sup>14</sup>Na' bene' bi yo'o Spiritw che Diosen' lo' yichjlažda'ogaque' bi chesejle'e che diža' da' chon Spiritw che Diosen' neto' da' choe'to' len legaque', san chesacde' naquen to da' bibi zaca'. Na' bi chesejni'ide', le bi yo'o Spiriton' lo' yichjlažda'ogaque' cont gaclenen legaque' yesejni'iden'. <sup>15</sup>Na' cate' yo'o Spiritw che Diosen' lo' yichjlažda'ochon' chabc'e'echo che bite'teze še naquen da' zaca', perw bene' bi yo'o Spiritw chen' lo' lažda'ogaquen', bi zaca' yesene' še da' choncho naquen da' zaca'. <sup>16</sup>Na' Xtiža' Diosen' da' nyojen žan: "Nono zoa chejni'i xbab che Diosen' cont gwzejni'ide' Diosal." Perw Diosen' ba bene' chio' Spiritw che' cont šejni'icho xbab che Criston'.

### Gaccho txen len nochle bene' cheson xšin Diosen'

**3** Bene' migw, bi goc gua' xtiža' Diosen' len le'e can' chona' len bene' chosozenag che Spiritw che Diosen', le ne' chzenagle che xbab chezle. Da'n'an' zaca'leble ca bidao'. <sup>2</sup>Cate' gwzolao be'lena' le'e xtiža' Diosen' žinten ža' na'aža, biṇa' šejni'ile da' ca' chaclaže' Diosen' šejni'ile. Da'n'an' ba bsed blo'eda' le'e da' bi naquen zdebe šejni'ile. <sup>3</sup>Chzenagle che xbab chezle na' da'n'an' bi chac šejni'ile xtiža' Diosen' da' naquen zdebe. Da' chgue'e lježle na' chdi'e chšašle, nacbia' chzenagle che xbab chezle can' cheson bene' bi chesejni'ilaže' Criston'. <sup>4</sup>Chnia' chonle ca bene' bi chesejni'ilaže' Diosen', le ba'le žale: "Nacto' txen da' chsed chlo'e Pablo", na' yeba'le žale: "Nacto' txen da' chsed chlo'e Apolos."

<sup>5</sup>Le gon xbab chia' neda' Pablo na' che Apolosen', con nacto' bene' güen xšin Dios. Na' Diosen' bene' cont gwyejni'laže'le Xancho Criston' cate' be'lento' le'e xtižen', na' lecze gwleje' to to neto' cont gonto' con da' chnalaže'. <sup>6</sup>Neda' zaca'leba' ca to bene' goz, le be'lena' le'e xtiža' Diosen' da' nechw, na' Apolosen' zaca'lebe' ca' bene' chyilen, le bsed blo'ede' le'e gwdechle. Na' toz Diosen' chone' cont chac cosešen'. Ca'cze goc len le'e, Diosen' bene' cont gwyejle'le xtižen' da' be'lento' le'e. <sup>7</sup>Bitec bi zaca' neda' da' be'lena' le'e xtiža' Diosen' da' nechw, na' neca Apolosen' da' bsed blo'echde' le'e, san Diosen' zaca'chgüe' da' bene' cont gwyejle'le xtižen'. <sup>8</sup>Bene'



chyixjue'ede' xtiža' Diosen' da' nechw na' bene' chyixjue'eden' da' gwchope txen chesone' xšin Diosen'. Na' Diosen' gone' cont to toe' yesenite' mbalaz con can' gosone' xšine'na'. <sup>9</sup>Neto' chzejni'ito' le'e xtiža' Diosen', guac nacho nacto' bene' goz go'on che Diosen' na' le'e nacle yežlio gan' chac žinna'.

Na' le'e chdop chžagle chonxenle Criston' lecze zaca'leble ca to yo'o che Diosen'. <sup>10</sup>Na' guac nacho neda' naca' to bene' chac chon yo'o na' neda' bxia' len yo'ona', le Diosen' goclene' neda' cont bxia' xšinen' gan' zoalen'. Na' na'a nita' bene' yoble chosozejni'ide' le'e, na' guac nacho chesebeque' ze'en. Na' note'teze bene' chacde' gone' xšin Diosen' cheyała' gonyane' xbab še xšinen' gonen txen len lene yo'o dan' ba gwlecan'. <sup>11</sup>Na' nono gac cuec bichle lene yo'o, le ba gwlecan', na' Jesucristo bene' chejnilaže'cho, len nacho naque' lene yo'ona'. <sup>12</sup>Na' bite'teze ze'e da' chozoa bene' lo lene yo'ona', chchejen con nac nonen', še nonen' de oro, de plata, de yej da' zaca', de yag o de yix o de dod. Na' ca'cze nac bite'teze da' choncho chaquecho chonchon par Diosen', chchejen še naquen da' zaca'. <sup>13</sup>Na' cate' žin ža yid Criston', gone' cont gabcia' che da' ben to tocho še naquen da' zaca' o še bitw naquen. Na' yogo' da' bencho da' bi naquen da' zaca', Diosen' yonitlagüen' len yi' che'na' can' chac che to yo'o de yag, de yix o de dod cate' cheyen. <sup>14</sup>Na' še bencho da' naquen da' zaca', lenna' bi yeniten, na' Diosen' gone' cont soacho mbalaz da' benchon. <sup>15</sup>Na'

še dan' benchon' bi naquen da' zaca', da' ca' benchon' yesebiayin' lo yi' che Diosen' na' bitec soacho mbalaz, con nacchguaze gac yechojcho bi šeycho.

<sup>16</sup>¿Ba beyanlaže'le chio' chdop chžagcho chonxencho Jesucriston' yogo'cho txen zaca'lebocho ca to yodao' gan' chesonxene' Diosen'? ¿Ba beyanlaže'le zoa Spiritw che Diosen' len chio'? <sup>17</sup>Na' še no gone' cont chio' chdop chžagcho chonxencho Criston' cuejyichjcho diža' li chen', Diosen' gwnežjue' castigw toli tocanē che bene' gon ca', le Diosen' zoe' len chio' na' naccho lo ne'e.

<sup>18</sup>Bi siye' cuinle. Note'tezele še chaquele nacle bene' sina' len yela' sina' che yežlio nga, cheyała' gacbe'ele yela' sina' chelen' bi gaclenen le'e len Diosen'. Na' cheyała' gacle ca to bene' bibi chejni'i cont Diosen' gone' le'e yela' sina' chen'. <sup>19</sup>Bene' bi chesejnilaže' Diosen', yela' sina' chegaquen' bi naquen da' zejen len Diosen'. Na' Xtiža' Diosen' nyojen žan: "Bene' ca' chesacde' zjanaque' bene' sina', Diosen' gone' cont yela' sina' chegaquen' gwžiyayin' legaque'."

<sup>20</sup>Na' yeto gan' nyojen žan: "Xancho nan' nezde' da' yesede che xbab che bene' sina' ca'." <sup>21</sup>Da'n'an' bi cheyała' ga'laže'le da' nacle txen len note'teze bene' chsed chlo'ede' le'e, le yogo'lol' bi da' de zjanaquen chele cont yesaclenen le'e. <sup>22</sup>Neda', len Apolosen', na' len Pedron', gwseła' Diosen' neto' cont chaclento' le'e. Na' yežlio nga na' yela' mbanna', na' yela' goten', na' da' de na'a na' da' gata' bate'teze, yogo' da' ca' zjaden

cont yesaclenen le'e. <sup>23</sup>Na' nacle lo na' Criston' na' Criston' naque' lo na' Diosen'.

Da' yo'o lo na' postlw ca' yesone'

**4** Cheyała' gacbe'ele neto' ba gwɔdixjue'eto' xtiža' Diosen' len le'e nacto' bene' güen xšin Diosen'. Diosen' ba bzejni'ide' neto' da' nono gwneze cani' cont gwsed gwlo'eton' bene'. <sup>2</sup>Na' chonen byen gonto' con can' ngü'e lo na'to' gonto'. <sup>3</sup>Na' ca naca' neda', bibi nonen len neda' še no justis che yežlio nga o še le'e nale bi chona' can' cheyała' gona'. Na' neca chnia' che cuina' še chona' can' cheyała' gona'. <sup>4</sup>Lo' lažda'ogua' chacda' bibi doła' napa' len bite'tez da' chona', perw gague da'nana' na Diosen' chia' bibi xtoła' de. Xancho Jesucriston' ne' še chona' can' cheyała' gona' o še bi chonan'. <sup>5</sup>Da'nana' bi cheyała' žialaole nale che note'teze bene' še chone' can' cheyała' gone' o še bi chone'. Caten' yid Xancho Criston' yeto, canan' gone' cont nezecho da' nono neze na'a, na' gone' cont gacbe'echo can' nac xbab da' yo'o lo' yichjlaždao' benachen'. Na' cana' na Diosen' še nocho chon güen.

<sup>6</sup>Bene' migw, ba be'lena' le'e xtiža' Apolosen' na' xtiža' cate' bzejni'ida' le'e, cont soale gonle can' ža Xtiža' Diosen', le bi cheyała' ga'laže'le da' nacle txen len to bene' chsedde' le'e na' gue'ele yetoe'. <sup>7</sup>Na' žbixchen' chaquele zaca'chle ca yezica'chle bene'? Diosen' bene' yogo' da' de chele, na' da' ben Diosen' yogo' da' de chele, bi cheyała' ga'laže'le. <sup>8</sup>Chacljele bibi chyažjele na' chacljele ba nacle bene' zaca'chgua

len Diosen' na' guac nabia'le ca no rey, na' chaquele bi chyažjele neto'. Yebet' šaca' da' li nacle ca no rey can' chaquelen' cont soato' mbalaz txen len le'e. <sup>9</sup>Chacda' Diosen' ba bene' cont bene' že' yežlion' yesele'ede' neto' postlw ca bene' zjanac la'zelagüe bene' bibi zaca', ca bene' nchoglaon chegaque' yesate'. Na' benachen' len angl ben' že' gan' zoa Diosen' chesene'e can' chac cheto' ca to bene' chne'e to da' yežejde'. <sup>10</sup>Na' da' chonto' xšin Criston' da'nana' bene' zan chesacde' bibi zaca'to', perw le'e, dan' ba chejnilaže'le Criston' chaclaže'le yesacde' nacle bene' sina'. Chesacde' bibi chac gon neto', perw le'e chaclaže'le yesacde' guac gonle bite'teze. Chesonxen bene' le'e na' chesegue'ede' neto'. <sup>11</sup>Ža na'aža zan ni'a chdeto' gwbin chbił chdonto', bibi xalana'to' de, chesebaže' bene' neto' na' bibi ližto' de. <sup>12</sup>Len ni'a na'to' chonto' žin cont chabanto'. Cate' chesezi'diža' bene' neto', con chnabto' nite' mbalaz, na' cate' chosoči chososaque' neto', chy chčejt'o' bi da' chesonde' neto'. <sup>13</sup>Cate' chesene' cheto', chol güižto' legaue' diža' šagüe'. Na' ža na'aža nita' bene' zan chesonde' neto' ca to no beb dao' o to no da' naquen zban da' ba becho'onen.

<sup>14</sup>Chzoja' da' nga gague cont gaquele zto' san cont gwzejni'ida' le'e, le nacle ca xi'ina' na' chacda' le'e. <sup>15</sup>Na' la'czla' bene' zan yesaclaže' yososed yosolo'ede' le'e che Criston', bi yesenita' zane' yesacde' le'e ca xale. Perw neda' naca' ca xale, le neda' gwžialagua' gwɔdixjue'eda' le'e diža' güen che

Jesucriston' cont chejnilaže'lene'.

<sup>16</sup>Na' da'nan' chneyoeda' le'e gonle can' chonan'.

<sup>17</sup>Da'nan' chsela' Timoteon' gan' zoalen'. Lecze ba nona'ne' ca xi'ina', le bzejni'ida'ne' cont chejnilaže' Xancho Jesucriston', na' zoacze' chone' can' cheyała' gone'. Na' chsela'ne' cont šjays'e'de' laže'le can' gwzoa gwleza' šlac bzejni'ida' le'e che Criston', na' da' bzejni'ida' le'e naquen lebe len da' chzejni'ida' bene' gate'teze chesedop chesežague' chesonxene' Criston'. <sup>18</sup>Na' balle cha'laže'le chaquele bich yida' gan' zoalen'. <sup>19</sup>Perw chacda' yob yida' gan' zoalen' še Diosen' gonšque' latje. Na' cate' yida', cana'ch yedena'a bene' ya'laže' ca' še yesone' can' chesenen'. <sup>20</sup>Cate' Diosen' chnabi'e yichjlaždao' bene', dan' chesonen' chlo'en yela' guac chen', gague xtiža'gague' na'zen' gwlo'en še chnabi'e yichjlažda'ogaque'. <sup>21</sup>¿Nac chaclaže'le gona'? ¿Yida' gan' zoalen' na' gona' le'e castigw, še yida' gwlo'a chacda' le'e na' yedeya' diža' šagüe' len le'e? Le gon xbab naquen' chaclaže'le yedeyena'.

To bene' gwzoalene' xna'zie' ca xo'ole'

**5** Chesene' to le'e zoalenle xna'zile ca xo'olle. Da' nga naquen to yela' zto' xen, ne bene' ca' bi chesonxen Diosen' bi chžinlaže' yesone' ca'. <sup>2</sup>Na' la'czła' tole chonle da' malen' nac ca', chaquele güenchgua chonle lao Diosen'. Cheyała' yegüine'le na' cheyała' yebejle ben' chon ca' len le'e. <sup>3</sup>La'czła' bi zoa' na' len le'e, zoaczcho txen na' ba gwchoglagua' can' cheyała' gonle len ben' chon

da' malen', can' gonle la'czła' ca zoa' len le'e. <sup>4</sup>Nach cate' ndop nžagle chonxenle Xancho Jesucriston', le gon xbab naccho txen, na' zoacze Xancho Jesús'en' chaclene' le'e len yela' guac chen'. <sup>5</sup>Nach le cuej ben' ca'ale na' le gone' lo na' Satanás dan' chnabia' da' xigüe' ca' cont gonen can' chaclažen' len le'. Le gon ca' cont še yoša'šca yichjlažda'ogüe' na' bi cuiaye'e toli tocañe cate' žin ža yid Xancho Jesús'en' yeto.

<sup>6</sup>Bi cheyała' gaquele chonchguale güen lao Diosen'. ¿Bi chache'ele chcha'o da' malen' cate' cho'echo latje, can' ža diža' dan' chesene': "Late'ze levadura da' chosočhine' cate' chesone' yetextil chonen cont cheyas doxen cuazin"?" <sup>7</sup>Bene' Israel gualaž cheto' bi chesagüe' yetextil da' nchixen levadura lo lni pascw cheto' na' bi cheso'e latje yega'an ne late'ze levaduran' lo ližgaque' lo lnin'. Na' ca'cze chio' chejnilaže'cho Criston' bi cheyała' güe'cho latje šo' da' malen' yichjlažda'ochon'. Cheyała' cuejyichjcho yogo' da' malen' cont gaccho ca to bene' cobe, le Criston' bnežjw cuine' gote' cont bocobe' yichjlažda'ochon', na' len chio' Criston' zaca'lebe' ca to be gosot bene' Israel gualaž cheton' lo lni pascon'. <sup>8</sup>Da'nan' cheyała' cuejyichjcho bite'teze da' mal, cont gaccho ca to bene' cobe, soacho do yichj do laže'cho na' goncho da' zej to li.

<sup>9</sup>Cana' bzoja' to cart gwnia' bi cheyała' soacho binlo len bene' chosozoa xtoe' na' bene' cheson bichle da' nac da' yela' zto' len cuerp chegaque'. <sup>10</sup>Gwnia' bi gac soacho binlo len bene' cheson da' nac yela'

zto, na' bene' chesezelaže' bi da' de che bene', na' bene' cheseque'e da' de che bene' na' bene' chesonxene' l̄ gua'a l̄saca'. Na' can' gwnia' bi gac soacho binlo len legaque', cho'a diža' che ljež chio' chejnilaže'cho Criston'. Le šaca' cho'a diža' bi gac soacho binlo len note'tez bene' cheson ca', bich gac bi goncho lo yežlio nga še ca'. <sup>11</sup>San da' žia' cheyała' goncho, bi soacho binlo len to bene' lježcho bene' chejnilaže' Criston' še nzoa xtoe' o še chone' bichle da' nac da' yela' zto' len cuerp che', o še chzelaže' da' de che bene', o chejnilaže' l̄ gua'a l̄saca', o chzi'diže' bene', o naque' bene' borrašw o bene' gwban. Neca cheyała' gagwlencho bene' lježcho bene' cheson ca'. <sup>12</sup>Bi naquen checho chogbi'acho che bene' bi chesejnilaže' Criston' še da' chesone' naquen güen o naquen mal, san chio' chdop chžagcho chejnilaže'cho Criston' cheyała' chogbi'acho che lježcho še chesontez'e da' mal. <sup>13</sup>Na' Diosen' chogbi'e che xtoła' bene' ca' bi chesejnilaže' Criston', san le'e, le yebej bena' gwnia' chon da' malen' ladjwle.

**Bene' Corinto chesejnilaže'  
Criston' chesagüe' xya che  
lježgaque' lao justis ca'**

**6** Chebanda' chele can' chonle da' chagwle xya tole yetole na' chjana'le bene' bi chosozenag che Diosen' cont chesone' yela' justis chele. Cheyała' nabe lježle le'e ba gwlej Diosen' nacle lo ne'e cont legaque' yesone' yela' justis chele. <sup>2</sup>Bi nezele žin ža cate' chio' naccho lo na' Diosen' goncho yela' justis

che yezica'chle bene' že' yežlio nga? Na' še goncho yela' justis chegaque', guac goncho yela' justis che bi da' dao' da' bitec zjazaca'. <sup>3</sup>Na' lecze žin ža goncho yela' justis che angl ca'. Na' naquechxe goncho yela' justis che bi da' cheson bene' lo yežlio nga. <sup>4</sup>Na' cate' gagwle xya che lježle, bi šejle lao bene' bi chesejnilaže' Criston' cont yesone' yela' justis chele, le xbab chegaquen' bi naquen da' zaca'chgua len chio' chejnilaže'cho Criston'. <sup>5</sup>Žia' ca' cont yeto'ele che dan' chonle na' bich gonle ca'. <sup>6</sup>Ne tole bi nacle bene' sina' cont gon yela' justis che lježle cate' bi chac chele? <sup>6</sup>Da'nan' chjatagwle xya che lježle len justis ca' bene' bi chesejnilaže' Criston'?

<sup>7</sup>Da' chacyož len lježle na'zen' chlo'en leca clelen' chonle. Mbalazech zoale šaca' chdele ca'ale še bi da' chone bene' lježlen' le'e. Yejni'a güe'le latje yeseque'e bi da' de chele. <sup>8</sup>Perw le'e chca'ale bi da' de che lježle na' da' zan da' chone lježle. <sup>9</sup>Bi nezele bene' ca' zjanaque' bene' mal lao Diosen' bi yesyežine' yaban' gan' zoa Diosen' chnabi'e? Bi güe'le latje no gonle le'e. Nita' bene' chosozoa xtoe' na' bene' cheson bichle da' yela' zto' da' nac ca'. Na' nita' bene' chesonxen l̄ gua'a l̄saca'. Na' nita' bene' chesata'lene' no'ole bi nac no'ol chegaque' o bene' byo bi nac bene' chegaque', na' nita' bene' byo bxej. <sup>10</sup>Nita' bene' chesebane' na' bene' chesezelaže' bi da' de che bene', na' bene' borrašw, na' bene' chesezi'diža' lježgaque' na' bene' cheseziye'e bene' yoble cont yeseque'e da' de chegaque'. Na' ne

to bene' chon da' mal dan' zjanac ca' bi yesyežine' yaba gan' zoa Diosen' chnabi'e. <sup>11</sup>Balle benle da' mal dan' zjanac ca', perw na'a da' chejnilaže'le Xancho Jesús'en, Spiritw che Diosen' ba benen cont beyac lažda'olen' xilaže', na' benen cont nacle lo na' Diosen' na' cont nacle bene' güen len le'.

**Cheyała' goncho da' güen  
len cuerp chechon'**

<sup>12</sup>Da' li can' chesena bene', de latje goncho bite'teze, perw nezecho gague yogo' da' gonchon' naquen güen. Na' la'czla' še de latje goncho bite'teze, bi cheyała' güe'cho latje nabia' bi dan' gonchon' chio'. <sup>13</sup>Na' da' li can' chesena yebale', chesene': "Nsa' le'echon' par yela' guagw na' decze yela' guagw par gagwchon žinten lo' le'echo." Perw na' le'echon' len yela' guagon', chopten žin ža te chegaquen. Na' cuerp chechon' bi nsa'chon cont gata'len xtocho o goncho bichle yela' zto' nac ca'. San nsa'chon cont gonxencho Xancho Jesucriston'. Na' Xancho Jesucriston' lecze chaclene' chio' len cuerp chechon'. <sup>14</sup>Diosen' bosbane' Xancho Jesucriston' ladjo bene' guat ca', na' lecze žin ža cate' yosbane' chio' ladjo bene' guat ca' len yela' guac chen'.

<sup>15</sup>¿Bi nezele naccho txen len Criston' na' cuerp chechon' zjanaquen che'? Na' bi cheyała' goncho cuerp chechon' da' nac che Criston' lo na' no no'ole zle'. <sup>16</sup>Note'tezle še chata'le len no'ole bi nac no'ol chele o bene' byo bi nac bene' chele, cuerp chelen' gaquen toze len cuerp chen', can' ža Xtiža'

Diosen' da' nyojen žan: "Bene' ca' chope yesaque' toze cuerp."

<sup>17</sup>Perw note'tezcho cate' chon cuincho lo na' Xancho Jesucriston', yichjlažda'ochon' chaquen toze len yichjlažda'ogüen'.

<sup>18</sup>Da'nan' bi cheyała' gata'lencho no'ole bi nac no'ol checho o bene' byo bi nac bene' checho o goncho bichle yela' zto' da' nac ca'. Yezica'chle da' mal ca' bitec chosožiayin' cuerp chechon', perw da' ca' zjanac ca' chosožiayin' cuerp chechon'. <sup>19</sup>¿Bi chacbe'ele Spiritw che Diosen' zoan lo' yichjlaždao' to tocho ca' zoa to bene' liže'? le Diosen' ba gwsele' Spiritw chen' zoan lo' yichjlaždao' chio' chejnilaže'cho Criston', na' bi gac goncho con bi žan checho. <sup>20</sup>Na' da' zaca' xen da' ben Xancho Criston' cont bechojcho lo na' gwxiyen'. Da'nan' cheyała' goncho can' chazlaže' Diosen' len cuerp chechon' na' len yichjlažda'ochon', le chopten zjanaquen che'.

**Pablon' cho'e diža' che yela' güešagna'**

**7** Na' che dan' chnabele neda' le'e cart chelen', še bene' byon' bi chaclaže' si'e no'olen' gague' xo'ole', güenna' chone'. <sup>2</sup>Perw na' že'chgua bene' chesedalene' no'ole bi nac no'ol chegaque', na' bene' cheson bichle da' nac da' yela' zto' len cuerp chegaquen', na' da'nan' yejni'a gwšagna'le na' to to bene' byo soa xo'ole' na' to to no'ole soa bene' che'. <sup>3</sup>Na' to to bene' byo cheyała' gone' da' naquen gone' len no'ol che' na' to to no'ole cheyała' gone' da' naquen gone' len bene' che'. <sup>4</sup>No'olen' bi gac ne' to gualaze' nac

gone' len cuerp chen' na' neca bene' byon' bi gac ne' to gualaze' nac gone' len cuerp chen', san cheyala' yosozenag che lježe'. <sup>5</sup>Na' le'e nšagna'le bi gwžonle gonlen lježele da' cheyala' gonle len cuerp chelen', perw še naquen yela' güexi'a che choptele guaccze bi gonlen to term dao' cont soatezle yol güižle Diosen'. Na' te termen' yezoalen lježele da' yoble, le Satanás dan' chnabia' da' xigüe' ca' co'oyelan' le'e gonle da' mal še leca žan soalen lježele.

<sup>6</sup>Ba gwnia' yogo' da' ca' cont nezele de latje soa xo'olle, perw gague nacho chon Diosen' mandadw gwšagna'le. <sup>7</sup>Chebeda' šaca' soa yogo'le can' zoa' neda' nono xo'ola' zoa. Perw nža'le grasyw da' non Diosen' to tocho che bi da' goncho.

<sup>8</sup>Na' le'e nac to gualazle, chacda' güench bi gwšagna'le, na' lecze le'e ba got bene' chele bi yošagna'le, san soale to gualazle can' zoa' neda'. <sup>9</sup>Perw še leca žan soalenle no'ole o soalenle bene' byo, vejni'a gwšagna'le cont bi nabia' yela' chzelažen' le'e.

<sup>10</sup>Na' le'e no'ole le'e nšagna'le, chona' mandadw bi yela'ale len bene' chelen'. Na' gague neda'ze žia' ca', le naquen da' chon Xancho Criston' mandadw. <sup>11</sup>Na' še no'olen' yele'e len bene' che', cheyala' soa to gualaze' bi yeque'e bene' yoble o cheyala' yeyeje' šjayzoalene' bene' che' da' yoble. Na' lecze le'e bene' byo le'e nšagna'le, bi yela'ale len xo'ollen'.

<sup>12</sup>Na' le'e bene' yezica'chle, nia' can' chona' xbab cheyala' gonle, la'czla' Xanchon' bibi gwne' che da' ca'. To to le'e bene' byo še ba

nšagna'lenle no'ole bi chejnilaže' Criston' na' chaclaže' soalencze' le', bi cheyala' yela'ale len le'. <sup>13</sup>Na' to to le'e no'ole še ba nšagna'lenle bene' bi chejnilaže' Criston' na' chaclaže' soalene' le', bi yela'ale len le'. <sup>14</sup>Bi naquen mal lao Diosen' soalenle bene' chele o no'ol chele bene' bi chejnilaže' Criston', le Diosen' chi' yichje' choptele dan' chejnilaže'lene' tole. Šaca' bi naquen ca', xi'ine' ca' zjanacbe' ca' xi'ine' bene' bi chesejnilaže' Diosen', perw gague can', le lente legacbe' chi' yichj Diosen' dan' chejnilaže'lene' tole. <sup>15</sup>Perw še bene' chele o no'ole chele bi chejnilaže' Criston' na' bich chaclaže' soalene' le'e, le yela'a, le Diosen' chaclaže' soacho binlo len lježcho. <sup>16</sup>Na' le'e no'ole še gonle güen len bene' chele na' le'e bene' byo še gonle güen len no'ol chelen', guacte gonen cont yesejnilaže' Criston'.

<sup>17</sup>To tocho cheyala' soacho goncho da' non Xancho Diosen' lo na'cho goncho cate' gwleje' chio' naccho xi'ine'. Chona' mandadw yesone' ca' gate'teze chesedop chesežague' chesonxene' Criston'. <sup>18</sup>Še ba zoale señw dan' že' circuncisión cate' gwlej Diosen' le'e nacle xi'ine', bi gonle cont yenit señon'. Na' še bina' soale señon' cate' gwlej Diosen' le'e nacle xi'ine', bi nabile yosozoe' le'e señon'. <sup>19</sup>Bibi nonen len Diosen' še nsa'cho señw che circuncisión o še bi nsa'chon. Da' naquen da' zeje, cheyala' goncho con bi chaclaže' Diosen'. <sup>20</sup>Con can' naccho caten' gwlej Diosen' chio' naccho xi'ine', ca'tezeczen' cheyala' soa cuescho. <sup>21</sup>Še nacle esclavo

cate' Xancho Diosen' gwleje' le'e, bibi sa'laže'le che dan'. Perw še guata' latje chixjwle cont chojle lo na' xanlen', le chixjon na' yechojle. <sup>22</sup>Na' la'czla' še nacle esclavo che bene' cate' Xancho Criston' gwleje' le'e, Criston' ba naque' Xanle na'a, gague benachen'. Na' chio' bina' gaccho esclavo che bene', nac Criston' Xancho, na' guac nacho naccho esclavo che'. <sup>23</sup>Da' zaca' xen da' ben Xancho Criston' cont bechojcho lo na' gwxiyen'. Da'nan' bi cheyała' goncho xbab no benach naque' xancho. <sup>24</sup>Bene' migw, da' yoble žia' le'e, con can' naccho cate' gwlej Diosen' chio' naccho xi'ine', can' soa cuezcho, le lao Diosen' chzoa chbezcho.

<sup>25</sup>Na' can' cheyała' gac che no'ol güego' ca', Xancho Criston' bi bene' mandadw can' gac chegacbe', perw neda' nia' can' chacda' cheyała' gac, na' ba beyaše' beži'ilaže' Xancho' neda', na' da'nan' diža' da' choa' zaca'czen gwzenagle chen. <sup>26</sup>Ba za' da' saca'zi'cho na'a, na' da'nan' chacda' güench soa cuezcho con can' ba zoacho. <sup>27</sup>Le'e nšagna'le, bi yela'ale len xo'olle, na' le'e bina' soa xo'olle, bi chiljw xo'olle. <sup>28</sup>Perw bi nacho naquen mal še gwšagna'le, na' neca naquen mal še no no'ol güego' gwšagna'. Con da' zan da' zed de yežlio nga che bene' zjanšagna', na' chaclaža' bi gac chele ca'.

<sup>29</sup>Bene' migw, chaclaža' nia' le'e da' nga: Bich chega'an yezan iz cont goncho dan' ngüia Diosen' goncho. Da'nan' le'e zoa xo'olle cheyała' soale gonle xšin Diosen' ca bene' nono xo'ole' zoa. <sup>30</sup>Na' še de da' yegüine'le, cheyała' soale gonle xšin

Diosen' ca bene' bi chegiüne'. Na' še zoale mbalaz, cheyała' soale gonle xšine' ca bene' bi zoa mbalaz. Na' še si'le bi da' si'le, cheyała' soale gonle xšin Diosen' ca bene' bibi gwxi'e.

<sup>31</sup>Na' še bi da' chchinle da' de yežlio nga, bi cheyała' cue' yichje' che len, le da' te che yogo' da' chle'echo yežlio nga.

<sup>32</sup>Na' chaclaža' bi cue' yichje' che da' ca' chac yežlio nga. Bene' nono xo'ole' zoa nlatje' gone' xbab che xšin Xancho Diosen' na' che bi da' chaclaže' Xancho' gone'. <sup>33</sup>Perw bene' nšagne'e chi' yichje' che da' chac yežlio nga, le chone' xbab che bi da' chaclaže' xo'olen' gone', na' gague gac gone' xbab che toz Diosen'. <sup>34</sup>Na' lecze nža' can' chac che no'ole nšagna' na' che no'olen' bi nšagna'. No'ole bi nšagna' mbec yichje' che xšin Xancho Diosen' na' chon cuine' lo ne'e do yichj do laže'. Na' no'ole nšagne'e chbec yichje' che da' chac yežlio nga na' bi da' chaclaže' bene' che' gone'.

<sup>35</sup>Ba gwnia' ca' gague cont gwžona' gwšagna'le san cont gaclena' le'e. Con chaclaža' gaquele Xancho Diosen' do yichj do laže'le sin cbi gwžonen gonle can' chazlaže'.

<sup>36</sup>Na' še to bene' chacde' cheyała' güe'e latje gwšagna' xi'ine' no'ole, na' še no'olen' ba ngole' na' chaclaže' gwšagne'e, nacczen güen gone' can' ba gwchoglaže' gone' na' güe'e latje gwšagna' xi'inen'. Bi naquen mal gwnežjue' xi'ine' no'olen' bene' chnabe' le'. <sup>37</sup>Perw še zoa to bene' chacde' güench nono si' xi'ine' no'olen' na' bi nacho chonen byen gwšagna'be', nacczen güen gone'



can' chazlažen' na' bi gwnežjue' bi' čhen' gwšagna'be'. <sup>38</sup>Can' naquen, bene' chnežjue' bi' čhen' chšagna'be' chone' güen, na' bene' bi chnežjue'be' chone' güench.

<sup>39</sup>Na' note'teze no'ole nšagna', cheyała' soe' len bene' che'. Perw še ba got bene' che', guac yequ'e bene' yoble, con še bene' chejnilaže' Xancho Criston'. <sup>40</sup>Perw chacda' neda' soache' mbalaz še yega'ane' to gualaze', na' chacda' xbab čhian' naquen toze len xbab che Spiritw che Diosen'.

Yela' guagw da' chosožia bene'  
lao l gua'a lsaca' chesejnilaže'

**8** Na' gwnable nac cheyała' goncho len yela' guagw da' chosožie' lao l gua'a lsacan' chesejnilaže'. Da' li yogo'cho chejni'icho bibi zjazaca' l gua'a lsaca' ca'. Na' cate' choncho xbab che da' chejni'icho, con chonxen cuincho, perw cate' chaque lježcho, cheyljwlaže'cho nacle goncho cont gaclen lježcho. <sup>2</sup>Na' še chaquecho ba gwejni'icho to da' zejen, cheyała' gacbe'echo bibi de da' chejni'icho ca cheyała' šejni'ichon. <sup>3</sup>Perw cate' chaquecho Diosen', nachle Diosen' nombi'e chio'.

<sup>4</sup>Gwnable še guac gagwcho yela' guagw da' chosožia bene' lao l gua'a lsacan' chesejnilaže'. Nezecho l gua'a lsaca' ca' bibi zjazacan', na' toz Diosen' zaque' šejnilaže'chone'.

<sup>5</sup>Da' li de da' zan da' chesena benachen zjanaquen xanguaque' da' chesejnilaže'. Na' la'czla' nita' bene' chesejnilaže' da' de yaba na' yežlion' chesene' da' ca' zjanaquen xanguaque', <sup>6</sup>chio' nezecho toze Xacho Diosen'

zaque' gonxencho, na' le' bene' cont gwxe yogo'te da' zjade na' zoacho cont gonxenchone'. Na' nezecho toze Jesucriston' naque' Xancho, na' le' bene' yogo' benach, beyixe' na' bichle da' zjade, na' le' chone' yela' mban checho.

<sup>7</sup>Gague yogo' bene' lježcho bene' chesejnilaže' Criston' chesejni'ide' da' nga nezecho. Ba le' zjayolagüe' chesone' xbab bene' zaca' l gua'a lsaca' ca', na' cate' chesagüe' yela' guagw da' ba bžia bene' lao l gua'a lsacan', chesacde' chesagüe' da' naquen che l gua'a lsacan'. Da'n'an' lo' yichjlažda'ogaque' chesacde' malen' chesone', le bina' yesejni'išagüe'de' naquen' naquen. <sup>8</sup>Na' yela' guagon' bibi zaca' gonen cont yebe Diosen' chio', neca chžonen yebede' chio' še bi gagwcho to yela' guagw o še gagwchon'. <sup>9</sup>Perw bal bene' bina' yesejni'išagüe'de' gague bi nonen len Diosen' še bin' ye'ej gagwcho. Na' neche legaque' cheyała' gwsaca'cho can' goncho cont bi goncho ca yeselažoe' lo da' malen' neche dan' che'ej chagwchon'. <sup>10</sup>Le'e nezele nono nac l gua'a lsaca' ca', na' da'n'an' guac cue'le ye'ej gagwle ga chesone' lni che l gua'a lsacan' sin cbi bi doła' gapple. Na' bene' bina' šejni'ide' cate' le'ede' che'ej chagwle da'na', nach gacde' lecze guac gone' ca', perw lo' yichjlažda'ogüe' gacde' da' malen' chone'. <sup>11</sup>Na' guacte gwžiai'cho bene' lježcho yela' chejni'i checho, la'czla' Criston' bnežjw cuine' gote' neche le'. <sup>12</sup>Cate' choncho cont bene' lježcho chesone' to da' ža yichjlažda'ogaque' naquen da' mal, choncho contr Criston' še

ca'. <sup>13</sup>Da'nan' chnia' še dan' chagua' bela' chonen cont bene' lježa' lažoe' lo da' mal, gwbatech gagua'ba' cont ca lažoe' lo da' malen'.

**Pablon' že' naque' dogualje postlw**

**9** Nezele neda' naca' postlw na' guac naba' gonele neda' ca chonle len yezica'chle postlw ca'. Neda' ble'eda' Xancho Jesúsén' na' bena' xšine' gan' zoale na' da'nan' chejnilaže'lene'. <sup>2</sup>Na' la'czla' še yezica'chle bene' bi chesejle'e naca' postlw, perw le'e chejle'le chia', le da' chejnilaže'le Xanchon' ben' gwseła' neda', chlo'en da' li naca' postlw.

<sup>3</sup>Quinga choži'a xtiža' bene' ca' chesene' bi gwseła' Diosen' neda' naca' postlw: <sup>4</sup>Guac naba' yeson bene' da' ye'ej gagua' šaca' chaclaža' gona' ca'. <sup>5</sup>Na' guac gwšagna'lena' no'ole chejnilaže' Criston', na' yechi'ane' gan' šjena' xšin Diosen', can' chon Pedron', na' can' cheson yezica'chle postlw ca' na' can' cheson bene' biše' Xanchon'. <sup>6</sup>¿Bixčen' neda' len Bernaben' lao yogo' postlw ca' chonto' žin len nia' na'to' cont si'to' da' ye'ej gagwto' na' chixjwto' bichle gastw cheto' da' de šlac chyixjue'eto' xtiža' Diosen'?

<sup>7</sup>Nono soldadw zoa bene' nacho cuinze' chyixjue' gastw che'. Na' nono gaz yag uvas še bi gagüe' uvasen' cate' chbian. Na' le'cze ca' nono bene' chyoē šib xila' ca' nacho bi che'eje' late' xiže'ba' cate' chsien'. <sup>8</sup>Na' dan' žia' nga bi naquen con xbab cheza', le lez can' ža ley dan' bzoj da' Moisésén'. <sup>9</sup>Quinga bzoje' le'e ley: "Bi gwseyjwle cho'a goḥ ca' šlac chosolej chosošošjba'

trigon' cont choj xen." Na' gague da' chi' yichj Diosen' che goḥ ca' bene' cont byojen žan ca'. <sup>10</sup>San že' ca' chzejni'icзде' chio' che bene' ca' cheson xšin Diosen'. Da'nan' že' bene' chgua'ane' goḥ na' bene' chonšagiue' trigw cheyała' yesenite' lez yesezi'e late' güeje cosešen'. <sup>11</sup>Na' ca' neto' ba bzejni'ito' le'e xtiža' Diosen', le gon xbab čnaquen da' zča'och ca' da' cheyała' gonle šaca' gonle da' ye'ej gagwto' na' bichle da' chyažjeto'? <sup>12</sup>Naquen da' cheyała'cze gonle dan' choe'le da' cheseyažje yezica'chle bene' chososed chosolo'ede' le'e, perw nacchen da' cheyała' gonle gonle neto' da' chyažj chchine neto' clel ca' legaque'.

Perw bi gwnabto' gonle neto' da' chyažj chchineto'. Chyo chchejlaže'to' bite'teze da' chac cheto' cont bibi gwžon šanch le'e gwzenagle diža' güen che Criston'. <sup>13</sup>Nezele bene' cheson mandadw lo' yodao' che neto' bene' Israel chesacbane' len da' chosonežjw bene' Israel gualaž cheton' che yodaon', chosyocua'ane' late' güeje beyixe' ca' chesote' lao Diosen' chesagüe'ba'. <sup>14</sup>Na' ca'czen' non Xancho Criston' mandadw, bene' chosozenag xtižen' cheyała' yosonežjue' da' cheseyažje ben' cheseyixjue'ede' diža' güen chen'. <sup>15</sup>Perw neda' bi gwḥaba' gonle da' chyažj chhinda', na' gague chzoja' da' nga cont gonle ca'. Yejni'acle gata' clel ca' naba' gonle da' chyažjda', le chebechgüeda' dan' bibi gan chona' chyixjue'eda' xtiža' Criston'.

<sup>16</sup>Bi gac nia' chona' to goclen cate' chyixjue'eda' diža' güen che

Jesucriston', le Diosen' gwleje' neda' chyixjue'edan' na' chonen byen gona' can' že'na'. Nyaše'chguaze naca' neda' še bi chixjue'edan'.

<sup>17</sup>Šaca' chona' to da' ža xbab chia' chyixjue'edan', guac nia' zacaczen sia' bi da' gonle neda' ca laxjua'. Perw chona' da' gwlo'o Diosen' lo na' gona', na' gague chona' to da' ža xbab chezan'. <sup>18</sup>Na' še nable bi chcuanaen len neda' da' chyixjue'eda' xtiža' Diosen', nach nia' chcuanaen da' chbechğüeda' bibi laxjua' chzia' chyixjue'eda' xtižen', la'czla' zacacza' si' laxjua'.

<sup>19</sup>Bi naca' xmos bene', perw chzexjw yichja' chon cuina' ca xmos yogo'te bene' cont šanch bene' yesejnilaže' Criston'. <sup>20</sup>Cate' zoa' len bene' Israel gualaž cheton', chona' can' cheson legaque' na' chona' ca nac costumbr che ley dan' bzoj Moisés cont yosozenague' cate' güe'lena' legaque' xtiža' Diosen', la'czla' nezda' bi chonen byen ga'oguan' cont soa' binlo len Diosen'. <sup>21</sup>Na' cate' zoa' len bene' bi zjanombia' ley dan' bzoj Moisésen', bi na'ogua' costumbr da' non leyna' mandadw, le chaclaža' yosozenag bene' ca' bi zjanombia' leyna' cate' choe'lena' legaque' xtiža' Diosen'.

Perw bi nacho chzoa' ca'ale dan' ža Diosen', le chzenaga' can' ža Criston'. <sup>22</sup>Na' cate' zoa' len bene' chesacde' da' zan bi de lsens goncho, bi chona' da' ca' chesacde' naquen mal goncho, la'czla' nezda' bi naquen mal. Chona' ca' cont gac gwzejni'ichda' legaque'. Chon cuina' lebe len yogo'lol bene' cont gaclena' legaque' na' bale' yesejnilaže' Criston'. <sup>23</sup>Chi' yichja' yosozenague' diža' güen che

Criston' cont soa' mbalaz txen len yezica'chle bene' chosozenague' xtiža' Criston'.

<sup>24</sup>Nezecho cate' chosoxonj zan bene' cont choj to bene' gon gan, yogüe' chesa'acsese', la'czla' tozen' gon gan na' si'e premio. Na' ca chesa'acsese' bene' ca' do yichj do laže', ca' to to chio' cheyla' soacho gwzenagcho che Diosen' do yichj do laže'cho cont gone' soacho mbalaz cate' yežincho gan' zoen'. <sup>25</sup>Bene' güitj ca' chosochelaže' bi chesone' con can' ža cuerp chegaquen' cont chesaque' bene' gual, le chesaclaže' yesone' gan cate' yeseyitje' na' yesezi'e premio, la'czla' dan' chesezi'en naquen to da' te che. Na' chio', chzenagcho che Diosen' cont si'cho to da' güen da' bi te chen. <sup>26</sup>Da'nana' bi gona' ca to bene' chxonj, to bene' bi nezde' ga cheyla' yežine', o ca to bene' chdile' len ponet, bene' bi nezde' ga cuaže'. <sup>27</sup>Bi chzenaga' che da' mal cate' žan gona' da' mal len cuerp chian', san chona' con ga zelao chzoeda' cont chona' can' chazlaže' Diosen'. Le nezda' še gwzenaga' che da' malen', bi yebe Diosen' neda' la'czla' ba gwdixjue'eda' xtižen' len bene' yoble.

#### Cheyla' na'yan'cho cont bi goncho da' malen'

**10** Bene' migw, chaclaža' nezele Diosen' gwzoe' len yogo'lol da' xozxtao' neto' bene' Israel cate' besyechoje' Egipto, le yogüe' gosenite' xan to bejw gan' gwyo'o Diosen', na' Diosen' bene' cont yogüe' gosodie' nisdao' da' nzi' Nisdao' Xna. <sup>2</sup>Na' yogüe'

gosaque' txen len da' Moisésen' cate' gwche'e legaque' gan' gwzialao bejon' laogaque' na' cate' gosodie' nesdaon'. <sup>3</sup>Na' yogüe' gosagüe' toze yela' guagw da' bnežjw Diosen' legaque'. <sup>4</sup>Na' yogüe' gose'eje' toze nis da' bnežjw Diosen' legaque'. Na' nis da' gose'eje' bchojen lo yej, na' guac nacho Criston' goque' yej gan' bchoj nisen', le Criston' gwyejlene' legaque'. <sup>5</sup>Na' la'czla' Diosen' goclene' yogüe', zane' bi gosone' cont yebe Diosen' legaque', na' da'nan' gosebiaye'e latje dašen'.

<sup>6</sup>Na' yogo' da' goc chegaque' chzejni'in chio' bi cheyala' selaže'cho goncho bi da' mal can' goson legaque'. <sup>7</sup>Da'nan' chnia' le'e, bi šejnilaže'cho l gua'a lsaca' can' goson bal da' xozxta'oto' ca'. Le nyoj Xtiža' Diosen' žan: "Gosebi'e gose'ej gosagüe' na' gosenite' gosone' lni." <sup>8</sup>Na' lecze bi cheyala' gata'lencho no'ole bi nac no'ol checho o bene' byo bi nac bene' checho. Can' goson zan da' xozxta'oto' cani', na' da'nan' šonechoa mile' gosate' yela' güen da' xinj chegaquen' lao toze ža. <sup>9</sup>Bi cheyala' goncho Xancho Criston' prueba še gone' can' ba gwnen'. Cani' bal da' xozxta'oto' ca' bi gosejle'e Diosen' gaclene' legaque' can' gwnen', na' Diosen' gwsele' bel znia gosotba' legaque'. <sup>10</sup>Na' lecze bi cheyala' bixjwcho len Diosen' can' goson bal da' xozxta'oto' ca' cani', na' Diosen' gwsele' to angl che' bene' betue' legaque'.

<sup>11</sup>Yogo' da' ca' gosac chegaque' zjanyojen le'e Xtiža' Diosen' cont chosozejni'in chio' nac cheyala' goncho zoacho na'a, le ba zoa yeyož yežlion'. <sup>12</sup>Da'nan' note'tezcho

še chaquecho ba zoachachcho chejnilaže'cho Jesucriston', cheyala' na'yane'cho naquen' goncho cont bi lažo'cho lo da' malen'. <sup>13</sup>Bite'teze da' mal da' žan goncho o da' chac checho, bi nacho zdebechle chac checho can' chac che note'teze bene'. Diosen' zoacze' chaclene' chio' can' žen', bi cho'e latje gac checho da' bi soecho. Na' chzejni'ide' chio' nac goncho cont soecho bi goncho da' malen'.

<sup>14</sup>Da'nan' bene' migw ben' chacda', le cuejyichj yogo' bi da' cheson bene' chesejnilaže' l gua'a lsaca' ca'. <sup>15</sup>Ba chejni'ile na' guac gonle xbab che da' quinga chzejni'ida' le'e cont šejni'ile choa' diža' da' zaca'. <sup>16</sup>Na' da' ca' che'ej chagwcho chjayze'echo bi zejen len chio' da' got Criston', choe'cho yela' choxclen che Diosen' cate' che'ej chagwchon. Na' dan' che'ejcho zejen chio' chejnilaže'chone' naccho txen len Criston' can' blalj xchene' cate' gosote'ne'. Na' dan' chagwcho late' güeje, zejen naccho txen len cuerp che Criston'. <sup>17</sup>Na' can' nac toze yetextil da' chzoxjcho chagw yogo'cho late' güejen, lecze ca' yogo' chio' chejnilaže'cho Criston' naccho toze len lježcho, le toze yetextilen' chagwcho txen.

<sup>18</sup>Le gon xbab can' cheson bene' Israel gualaž cheto' ca', chesote' beyixe' cate' chesonxene' Diosen', na' note'tez bene' chesagüe' xpela' ben' chesoten' zjanaque' txen chesonxene' le'. <sup>19</sup>Bi chaclaža' gonle xbab žia' l gua'a lsaca' ca' zjanaquen da' zaca' o yela' guagw da' chjasežia bene' laogaquen naquen nža'le len bite'teze yela' guagw. <sup>20</sup>Gague

can', le cate' bene' chosožie' bi da' chosožie' lao l̄ gua'a lsacan' dan' chesejnilažen', chosožien' lao da' xigüe' ca', gague lao Diosen', na' bi chaclaža' gacle txen len da' xigüe' ca'. <sup>21</sup>Bi gac ye'ej gagwcho da' che'ej chagwcho chjayze'echo bi zejen da' got Xancho Criston' na' lecze ye'ej gagwcho gonxencho da' xigüe' ca'. Bi gac ye'ej gagwcho chopten. <sup>22</sup>Ža'a Diosen' chio' še goncho ca'. Na' bi naccho bene' gual ca Diosen' cont soecho bi da' gone' gac checho.

**Bi goncho da' chaque bene'  
lježcho naquen mal**

<sup>23</sup>Chesene': "De latje goncho bite'teze", perw nezecho gague yogo' da' choncho naquen güen, na' la'czla' še de latje goncho bite'teze, gague yogo' da' choncho chaclenen chio'. <sup>24</sup>Ne tocho bi cheyała' goncho da' naquen güen len chio'ze, san goncho xbab še naquen güen len bene' lježcho.

<sup>25</sup>Bite'teze bela' chesote' lagüe' ya'a le gagon' na' bi nable' še bosožien' lao l̄ gua'a lsacan' chesejnilaže', cont bi gacžejlaže'le še nable' doła' gagwlen. <sup>26</sup>Le Xtiža' Diosen' nyojen žan: "Che Xancho Dios yežlio nga, benačh, beyixe' na' yogo'te da' zjade lo yežlion'."

<sup>27</sup>Na' cate' bene' bi chesejnilaže' Criston' chesaxe' chio' gagwcho ližgaque', še šejcho nach guac gagwcho bite'teze da' yesone' gagwcho sin cbi nabcho še bosožien' lao l̄ gua'a lsacan', le Diosen' bi che'nde' gacžejlaže'cho še napcho doła' che'ej chagwchon. <sup>28</sup>Perw še no ye' chio': "Da' nga bosožie' lao l̄ gua'a lsacan'", bi gagwchon cont

bene' gwna ca' bi gacde' lenczcho chejnilaže'cho l̄ gua'a lsacan', o gacde' napcho doła' chagwchon. <sup>29</sup>Bi nacho naquen da' mal len Diosen' gagwchon, con naquen da' mal len ben' gwna ca'.

Na' chnable' čbixchen' cheyała' cuejyichjcho bich goncho bi da' choncho še bene' lježcho chesacde' napcho doła' chonchon? <sup>30</sup>Na' chonle xbab čbixchen' ža bene' lježcho choncho da' mal chagwcho to yeła' guagw še choe'cho yeła' choxclen che Diosen' neche len?

<sup>31</sup>Quinga naquen, cate' che'ej chagwcho o bite'teze da' choncho, cheyała' gonchon cont gacxen Diosen'. <sup>32</sup>Na' bi cheyała' goncho bite'teze da' choncho še gonon cont bene' yoble yeselažoe' lo da' mal, la'czla' še zjanaque' bene' Israel gualaž cheton', o še bene' bi zjanaque' bene' Israel, o še ljež chio' chdop chžagcho chonxencho Diosen'. <sup>33</sup>Can' chona' neda', bite'teze da' chona' cheyiljwlaža' nacle gona' cont to to bene' soe' mba. Na' bi cheyiljwlaža' nacle gona' da' gaclen cuina' san da' gaclen bene' zan cont gata' yeła' mban chegaque' toli tocane.

**11** Neda' chona' con can' ben Criston', na' chneyoeda' le'e gonle can' chonan'.

**Can' cheyała' yeson no'ol ca' cate'  
chdop chžagcho chonxencho Diosen'**

<sup>2</sup>Na' na'a chnia' le'e chonle güen zoale chjayze'ele neda' na' chonle ca ba bzejni'ida' le'e. <sup>3</sup>Na' chaclaža' šejni'ile da' nga. Yogo' bene' byo cheyała' yosozenague' che Criston', le Criston' naque'

blaoch ca legaque', na' yogo' no'ole cheyala' yosozenague' che bene' che', le bene' chen' naque' blaoch ca no'olen'. Ca'cze chon Criston', chzenague' che Xe' Diosen', le lecze naque' blaoch ca le'. <sup>4</sup>Note'teze bene' byo še nzoa xlape' cate' chol güiže' Diosen' šlac ndop nžagle txen o cate' chyxjue'ede' bi da' ža Diosen', naquen da' yela' zto', le zejen bi nac Criston' bene' blaol len le'. <sup>5</sup>Na' note'teze no'ole še chol güiže' Diosen' o chyxjue'ede' xtiža' Diosen' sin cbi gwcuaše' yichje' cate' chdop chžagle txen, naquen yela' zto' par bene' che', le naque' blaoch ca le'. Na' no'olen' chon ca' naque' lebe len no'ol ca' nšibdi yichjague', no'ole ca' bibi yela' zto' zjanombi'e. <sup>6</sup>Na' še no'olen' bi chaclaže' gwcuaše' yichje' can' ba gwnian', yejni'a gwšib doxen yichjen'. Da'nan' še chaquele zto' gwšiblen, nach gwcuaše'czlen can' cheson yezica'chle no'ol ca'. <sup>7</sup>Na' le'e bene' byo, bi cheyala' gwcuaše' yichjlen' cate' yol güižle Diosen' o cate' chixjue'ele bi da' ba gwna Diosen' le'e, le Diosen' gwleje' le'e cont gwlo'ele bene' nacchgüe' bene' zaca'. Na' le'e no'ole, Diosen' gwleje' le'e cont gwlo'ele nac bene' che to tole bene' zaca'. <sup>8</sup>Diosen' bi bene' bene' byo len žit costiy che bene' byo nechon' benen' no'ole. <sup>9</sup>Na' Diosen' bi bene' bene' byon' cont gaclene' no'olen', san bene' no'olen' cont gaclene' bene' byon'. <sup>10</sup>Da'nan' no'ol ca' cheyala' yosocuaše' yichjague' cont yosolo'e nac bene' byon' blaoch ca legaque', le angl ca' chosocuaše' laogaque' lao Diosen'. <sup>11</sup>Perw naccho txen len Xancho Jesucriston'

la'czla' še naccho bene' byo o še no'ole, na' bi cheyala' yeson no'olen' xbab bi cheseyažjde' bene' byo na' neca bene' byo yesone' xbab bi cheseyažjde' no'olen'. <sup>12</sup>Naquen da' li Diosen' gwleje' žit costiy che bene' byo na' benen' no'ole, na' lecze naquen da' li yogo' bene' byo zoa no'ole gwxan le', na' Diosen' bene' yogo' benach len bica'chle da' zjade. <sup>13</sup>Le gon xbab chele na' gacbe'ele bi chazlaže'cho cate' to no'ole chol güiže' Dios sin cbi chcuaše' yichje', le can' nac costumbr chechon'. <sup>14</sup>Na' lecze bi chazlaže'cho še bene' byo bi gwšib yichjen' na' con chosožien' ca cheson bene' bxej. <sup>15</sup>Perw no'olen' xdanchgua nac yiša' yichjgaquen' cate' žian' da' tone, na' Diosen' none' yiša' yichjgaquen' gaquen to da' gwcuašen' yichjen'. <sup>16</sup>Še nole chaquele gwšaše' che da' nga ba gwnia', cheyala' nezele neto' postlw bi choe'to' latje yesone' nža'le gate'teze chesedop chesežag bene' chesejnilaže' Diosen'.

**Bi chjasyeze'ede' Criston'  
cate' chese'ej chesagüe'**

<sup>17</sup>Na' de yeto da' nia' le'e, le bi chonle güen cate' chdop chžagle chonxenle Criston' na' bi chaclenen le'e, san chonen mal. <sup>18</sup>To da' bi chonle güen, chesene' cate' chdop chžagle chonxenle Criston' bi chonle txen len lježle, na' chacda' nacljan' li can' chesenen'. <sup>19</sup>Na' ca'ljan' cheyala'cze gac da' bi chon lježle txen, le chlo'en non' chejnilaže' Criston' do yichj do laže' na' non' gague da' li chejnilaže'ne'. <sup>20</sup>Na' cate' chežagle chagwle txen, bi chonle xbab bnežjw cuin Xancho

Jesucriston' neche xtoła'chon', la'czła' chdop chżagle cont šjayze'elen.

<sup>21</sup>To tole che'ej chagwle da' chyob chdoxe'le, neca chbez lježle. Da'nan' balle ne' chdonle cate' chedagwle na' yeballe che'ej chagwxattele na' chzože'le. <sup>22</sup>Yejni'a yega'an ližle ye'ej gagwle clel ca gagwle lao bene' yaše' bene' bi de čhegaque'. Da' chonle ca', nachbia' chgue' lježle bene' cheyała' yesaque' txen len le'e da' chonxenle Diosen', na' chonle cont chesaque' tole da' bi de čhegaque'. Na' naquen malchgua da' chonle ca', bi gac ni'a chonle güen.

**Chjayze'echo bnežjw cuin Xancho Criston' neche xtoła'chon'**

(Mt. 26:26-29; Mr. 14:22-25; Lc. 22:14-20)

<sup>23</sup>Xancho Jesúsén' bzejni'ide' neda' can' šjayze'echo da' bnežjw cuine' neche xtoła'chon'. Na' neda' ba bzejni'ida' le'e can' goquen', že' cate' Judasen' bdie'ne' lo na' ben' besegue'ede' le', Xancho Jesúsén' beḡue' to yetextil. <sup>24</sup>Na' be'e yela' choxclen che Diosen' na' beyož be'e yela' choxclen che' na' bzoxjen', na' gwne': "Le gagw yetextil nga. Lenna' naquen cuerp chia' da' chnežjua' neche xtoła'le. Na' quinga gonle šjayze'ele bi zejen len le'e dan' gwnežjw cuina' yesote' neda'." <sup>25</sup>Na' lecze ca' bene' cate' beyož gosagüe' xše', beḡue' to vas nis uvas na' gwne': "Dan' yože lo vas nga zejen da' cobe dan' gwna Diosen' gone' gaclene' le'e. Na' lalje xchenan' cont gac can' gwne' gonen'. Na' bate'teze ye'ejle ca da' nga chona' che'ejle na'a, le šjayze'e bi zejen len le'e dan' gwnežjw cuina' yesote' neda'." <sup>26</sup>Nachen' yogo' ni'a cate' chagwcho

yetextilen' na' cate' che'ejcho nis uvasen' chjayze'echo can' bene'na', na' chyixjue'echo can' bnežjw cuine' gote' neche xtoła' benachen'. Na' can' gonczczcho šlac bina' yide' da' yoble.

**Naquen' goncho cate' chjayze'echo yela' got che Xancho Jesúsén'**

<sup>27</sup>Can' naquen, še chagwcho yetextilen' na' che'ejcho nis uvasen' cont chjayze'echo yela' got che Xancho Jesúsén' perw še bi chonxenchone' cate' choncho ca', napcho doła', le chonchon ca da' bibi zaca' cuerp che' dan' bnežjue' na' xchene' da' blalje' neche xtoła'chon'. <sup>28</sup>Da'nan' cheyała' gonyane'cho xbab še choncho can' chazlaže' Diosen' cate' za' gagwcho yetextilen' na' ye'ejcho nis uvasen' cont šjayze'echo yela' got che Xancho Jesúsén'. <sup>29</sup>Le še ye'ej gagwcho sin cbi gonxencho Xancho Jesúsén' da' bnežjw cuine' gote' neche xtoła'chon', Diosen' gone' chio' castigw. <sup>30</sup>Na' zanle bi zoale güen na' chacšenele na' bał bene' ba gosate' da' bi gose'ej gosagüen' do laže'. <sup>31</sup>Na' še gacbe'echo na' goncho byen soacho binlo len Xancho Diosen', bi gone' chio' castigw cate' che'ej chagwchon. <sup>32</sup>Na' cate' napcho doła' can' che'ej chagwchon, Xancho Diosen' chone' chio' castigw cont yetinjecho da' malen' choncho na' bi si'cho castigw toli' tocane can' yesezi' bene' bi chesejnilaže'ne'.

<sup>33</sup>Da'nan' bene' migw chia', cate' chdop chżagle txen che'ej chagwle, le cueze lježle na' ye'ej gagwle txen. <sup>34</sup>Na' še chbił chdonle, yejni'a yega'an ližle ye'ej gagwle, clel ca gon Diosen' le'e castigw can' chonle



caten' chdop chžagle. Na' che bichle da' chaclaža' gwzejni'ida' le'e, cate' yida' gan' zoalena' nach nia' can' gonlen'.

**Spiritw che Diosen' chaclenen to tocho cont choncho bi da' choncho**

**12** Na' bene' migw, chaclaža' nezele ca chon Spiritw che Diosen' chaclenen to to chio' chejnilaže'cho Jesucriston'.

<sup>2</sup>Nezele cate' biṇa' šejnilaže'le Criston' gweyjele'le diža' güenlaže' na' da'nan' gwejnilaže'le l gua'a lsaca' da' bibi biš grasyw nye'. <sup>3</sup>Na' da'nan' chaclaža' šejni'ile da' nga na'a. Note'teze bene' že': "Chgue'eda' Jesúsén", bi zoa Spiritw che Diosen' len le', perw bene' že': "Jesúsen' naque Xana", že' ca' da' zoa Spiritw che Diosen' chaclenen le'.

<sup>4</sup>Toz Spiritw che Diosen' zoa, perw nža' nža' da' chaclenen to tocho choncho o nezecho. <sup>5</sup>Toz Xancho Jesucriston' chonxencho la'czla' nža' nža' ca chon to tocho xšinen'. <sup>6</sup>Na' la'czla' nža' nža' da' chon to tocho, toz Diosen' chone' cont to tocho chac choncho xšinen'. <sup>7</sup>Nacbia' zoa Spiritw che Diosen' len chio', le chonen cont to tocho chac choncho da' chaclenen yogo'cho.

<sup>8</sup>Diosen' ba nsi'e xnezen' chon Spiritw chen' cont bałcho chac chzejni'icho bene' yoble xbab sina' chen', na' lecze Spiriton' chonen cont yebałcho nezecho to da' nezecho na' chzejni'ichon bene'. <sup>9</sup>Na' lecze toz Spiritw chen' chonen cont bałcho chejnilaže'chguacho Diosen' na' chac bite'teze da' chṇabechone'. Na' da' chaclen Spiriton' chio', bałcho chac choncho cont chesyeyaque

bene' chesacšene. <sup>10</sup>Na' lecze Spiritw nan' chonen cont bałcho chac choncho yela' guac, na' bałcho chac chyixjue'echo bi da' ba gwna Diosen' chio'. Na' Spiritw che Diosen' chonen cont bałcho chacbe'echo che da' chesena bene' o da' cheson bene' še zan' che Diosen' o še zan' che da' xigüe' ca', na' Spiriton' chonen cont bałcho choe'cho gwde gwdele diža' da' bi nsedcho, na' yebałcho chac che'cho bene' lježcho bi zeje diža' ca'. <sup>11</sup>Toz Spiritw che Diosen' chaclenen yogo'cho cont choncho yogo' da' chaclažen' gon to tocho.

**Yogo' chio' chejnilaže'cho Criston' naccho toze can' nac cuerp chechon'**

<sup>12</sup>Cuorp chechon' nsan' zan part, perw zjangoden' txen na' naquen toze. Na' lecze ca' chio' chejnilaže'cho Criston' naccho toze len le' na' len bene' lježcho ca'. <sup>13</sup>Bał chio' naccho bene' Israel na' yebał chio' bi naccho bene' Israel. Bałcho naccho esclavo na' yebałcho bi naccho. Perw yogo'czcho gwzoacho nis par blo'echo ba ben Spiritw che Diosen' cont naccho txen len Criston', na' lecze toze Spiritw che Diosen' zoan lo' yichjlaždao' yogo'cho.

<sup>14</sup>Cuorp chechon' nsan' zan part, na' nža' can' nac to to parten'. <sup>15</sup>Ni'acho guac nan': "Bi naca' toze len cuerpen', le bi naca' ne'en." Perw la'czla' še nan ca', naquen toze len cuerpen'. <sup>16</sup>Na' nagcho guac nan': "Bi naca' toze len cuerpen', le bi naca' yejlagüen'." Perw la'czla' še nan ca', naquen toze len cuerpen'. <sup>17</sup>Šaca' doxen cuerp chechon' naquen yejlaecho, bi gag yenecho. Na' šaca'

doxen cuerpen' naquen nagcho, bi gac le'echo. <sup>18</sup>Perw Diosen' bžie' bia' nsa' cuerp chechon' zan part da' cheson žin con can' gwyazlaže'. <sup>19</sup>Na' bi nya' cuerp chechon' šaca' nsan' toze part. <sup>20</sup>San cuerpen' nsan' zan part da' naquen txen cont naquen toze cuerp.

<sup>21</sup>Da'nan' yejlaochon' bi gac yen' na'chon': "Bi chyažjda' le'." Na' neca gac ye' yichjchon' ni'achon': "Bi chyažjda' le'." <sup>22</sup>Na' la'czla' bal part cuerp chechon' chaquecho bitec naquen da' gual, perw chyažjechon. <sup>23</sup>Na' la'czla' bal part cuerp chechon' chaquecho bitec bi zacan', perw chi' yichjchon, da'nan' cheyacw xacho. Na' part che cuerp chechon' da' bi chaclaže'cho le'e bene', chcuaše'chon len xacho. <sup>24</sup>Perw part da' nsa' cuerp chechon' da' naquen xdan, bi chcuaše'chon. Na' Diosen' none' cont chi' yichjcho che part ca' da' bi zjanaquen xdan. <sup>25</sup>Na' none' cuerp chechon' toz cont to parten' chapši'i lježen lebze na' chesonen žin txen. <sup>26</sup>Na' še guecho chac, bi zoa güen doxen cuerp chechon' še ca'. Na' še to parten' chaquecho xdan o chac chonen güenchgua, doxencho chebecho.

<sup>27</sup>Na' chio' chejnilaže'cho Criston', yogo'cho ngode'cho txen len le' na' yogo'cho txen naccho cuerp chen', na' guac nacho to tocho naccho ca to part güeje cuerp chen'. <sup>28</sup>Na' ca nac chio' chdop chžagcho chonxencho Criston', da' nechw Diosen' gwleje' neto' nacto' postlw, na' da' gwchope gwleje' bal bene' cont cheseyixjue'ede' da' ba gož Diosen' legaque'. Na' da' gwyone gwleje' yebal bene'

chososed cheselo'ede' xtižen'. Na' lecze gwlej Diosen' bene' cheson yela' guac, na' gwleje' bene' cheson cont cheseyaque bene' chesacšene, na' gwleje' bene' chesaclene' bene' yoble cate' bi da' cheseyažjde'. Na' gwleje' bene' chesenabia' chio' chdop chžagcho chonxencho Criston', na' gwleje' bene' chac cheso'e gwde gwdele diža' da' bi zjansede'. <sup>29</sup>Gague yogo'cho naccho postlw. Gague yogo'cho chac chyixjue'echo bi da' ba gwna Diosen'. Gague yogo'cho chac chsed chlo'echo bene' xtižen', na' gague yogo'cho chac choncho yela' guac. <sup>30</sup>Gague yogo'cho chac choncho cont cheseyaque bene' chesacšene. Gague yogo'cho chac choe'cho gwde gwdele diža' da' bi nsedcho. Gague yogo'cho chac chozejni'icho bi zejen diža' ca'. <sup>31</sup>Le yeyiljwlaže' gaclen Spiritw che Diosen' le'e cont gac gonle da' ca' zjanacch da' zaca'.

Na' de yeto da' zaca'ch naquen' cheyala' soa cuezcho.

### Cheyala' gague lježcho

**13** La'czla' še chaccho gwde gwdele diža' da' chesac benachen' na' da' chesac angl ca', perw še bi chaque ljež benachcho, bibi zaca'cho. Zaca'lebcho ca ya da' chonen sšag cate' chososižen' o ca platiy da' chososiž bene' güecuež. <sup>2</sup>Na' la'czla' še ba goclen Spiritw che Diosen' chio' cont chac chyixjue'echo bi da' ba gwne' chio', bibi zaca'cho še bi chaque ljež benachcho. Na' la'czla' še nezecho yogo'lol da' nono na' neze, na' la'czla' še chejni'icho yogo'lol da' naquen da' zaque', bibi zaca'cho

še bi chaque ljež beṇaḅcho. Na' la'czla' še leca chejnilaže'cho Diosen' cont chone' bite'teze da' zdebe cate' chṇabechone' gonen', bicze bi zaca'cho še bi chaque lježcho. <sup>3</sup>Na' še gwnežjwcho beṇe' yaše' yogo' bi da' de checho na' gwnežjw cuincho yosozey beṇe' chio', bi gaclenen chio' lao Diosen' še bi chaque lježcho.

<sup>4</sup>Še chaque lježcho, chapcho yela' chxenlaže' len legaque', na' choncho güen len legaque', bi chgue'echo legaque' še chac güen chegaque', na' bi chonxen cuincho len xtiža'cho, na' bi cha'laže'cho. <sup>5</sup>Na' cate' chaque lježcho bi choncho nacteze len legaque', bi choncho xbab che cuinzcho, bi chbixjwcho, na' bi chgo'olaže'cho. <sup>6</sup>Na' cate' chaque lježcho bi chbecho še chon beṇe' lježcho da' mal, san chbecho še chone' da' zej to li. <sup>7</sup>Na' cate' chaque lježcho, chapcho yela' chxenlaže' bite'teze da' chesonde' chio', na' choncho xbab güen che yogo'lol beṇe', na' zoacho lez yesone' güen yogo' las, na' chyó chchejlaže'cho bite'teze da' chesone beṇe' chio'.

<sup>8</sup>Gwbát te che da' cheyała' gague ljež beṇaḅcho. Perw gwžin ža cate' noch no chixjue'e bi da' ba gož Diosen' le', na' gwžin ža cate' bich yesoe' beṇe' gwde gwdele diža' da' bi zjansede', na' gwžin ža cate' bich yažje bichle da' šejni'icho. <sup>9</sup>Biṇa' nezecho na'a yogo' da' za' nezecho, na' biṇa' gac chixjue'echo binlo yogo'lol da' ba gož Diosen' chio'. <sup>10</sup>Perw gwžin ža cate' gon Diosen' cont yogo' da' de gaquen can' cheyała' gaquen. Cana' te che da' bi naquen ca cheyała' gaquen.

<sup>11</sup>Cate' goccho bidao' be'cho diža' can' chesoe' note'teze bidao' diža', bencho xbab can' cheson note'teze bidao' xbab, na' gwyejni'icho can' chesejni'i bidao'. Na' na'a ba gwcha'ocho na' ba gwlejiychjcho bich choncho can' cheson bidao'. <sup>12</sup>Na'a biṇa' nezecho binlo da' nac che Diosen'. Zaca'lebcho ca beṇe' chṇe'e to lo spejw da' bitec chlo'e binlo. Perw gwžin ža cate' le'echo binlo na' nezecho doxen da' nac che Diosen', na' canan' gombia'chone' binlo ca binlo nombi'e chio'. <sup>13</sup>Nachen' da' quinga šone non Diosen' mandadw goncho toli tocane: šejnilaže'chone', soacho lez gone' ga gacch güen checho, na' gaguecho Diosen' na' ljež beṇaḅcho. Na' da' zejehen goncho lao da' ca' šone, gaguecho Diosen' len ljež beṇaḅcho.

**Beṇe' ca' chesoe'lene' Diosen' diža' da' bi zjansede'**

**14** Cheyała' cue' yichjle gaguele Diosen' na' len ljež beṇaḅche, na' lecze cheyała' selaže'le gaclen Spiritw che Diosen' le'e gonle con bi da' chaclažen' gonle. Na' lao da' ca' chaclenen beṇe' bi da' chesone', da' zaca'chen da' cheseyixjue'ede' bi da' ža Diosen'. Lenṇa' cheyała' selaže'chguale gonle. <sup>2</sup>Baḷcho chon Spiritw che Diosen' cont chac choe'lencho Diosen' gwde gwdele diža' da' bi nsedcho. Na' cate' choe'lenchone' dižan' nac ca', bi choe'lencho beṇaḅchen' diža', le notno chejni'i xtiža'chon', con naquen diža' da' chon Spiritw che Diosen' choe'lenchone' la'czla' bi chejni'ichon. <sup>3</sup>Perw beṇe'

chyixjue'ede' bi da' ba gwna Diosen', chaclene' bene' yoble yesenita'chache' yesejnilaže' Diosen', na' yesenite' mbalazech, na' chesyeyacxenlaže' še bi da' chesac chegaque'. <sup>4</sup>Cate' choe'cho gwde gwdele diža' da' bi nsedcho, yichjlažda'ocho na'zen' chaclenen. Perw še chyixjue'echo bi da' ba gwna Diosen', chaclenen yogo' chio' chdop chžagcho chonxencho Criston'. <sup>5</sup>Yebeda' šaca' yogo'le gac güe'lenle Diosen' gwde gwdele diža' da' bi nsedle, perw yebechda' juisyw šaca' yogo'le gac chixjue'ele bi da' ye' Diosen' le'e. Lenna' zejehen clal ca güe'lenchone' gwde gwdele diža' šlac ndop nžagcho chonxencho Diosen'. Le še nono zoa no gwzejni'i bi zejen gwde gwdele diža' dan' chon Spiriton' nacho, bitw gaclenen bene' ljezcho yesenita'chache' yesejnilaže'ne'. <sup>6</sup>Bene' migw, nezda' bi gaclenen le'e še güe'lena' Diosen' gwde gwdele diža' da' bi chejni'ile caten' yedena'a le'e. Perw gaclenen le'e še gwzejni'ida' le'e bi da' ba bzejni'i Diosen' neda'. Na' gaclenczen še gwzejni'ida' le'e bichle da' nezda' che Diosen', o bi da' ba gože' neda' cont chixjue'eda' le'e, o še gwsed gwlo'eda' le'e bi zeje xtižen'.

<sup>7</sup>Ca nac bžejo, bi mbanen perw zoa ši'in cate' chcuež bene' len, na' lecze ca' arpan' cate' chyin bene' len. Na' še toz nota da' chcuež ben' len bžejoa' o toz nota da' chyin ben' cate' chyine' arpan' bate'teze, nono gacbe'e bin' chosocueže' še bi yosoše'e güeltze nota dan' chosocuežen'. <sup>8</sup>Cate' zoa to bene' chcueže' trompeta cont cheseneze

soldadw ca' naquen' yesone', še bi gwcuežen' binlo, bi yesejni'ide' cheyala' šja'aque' lo gwdiļe. <sup>9</sup>Ca'cze naquen len chio', še güe'lencho Diosen' diža' da' bi chesejni'i bene', bi gaclenen legaque', le len legaque' naquen ca che bene' chšalj toze'. <sup>10</sup>Nezecho bene' že' doxen yežlion' gwde gwdele diža' da' chesaque', na' to to benačh chesejni'ide' dižan' goljelene'. <sup>11</sup>Na' še chio' bi chaccho diža' da' chac yeto bene', nezecho naque' bene' zito' len chio' na' naccho bene' zito' len le'. <sup>12</sup>Na' dan' chi' yichjle gaclen Spiritw che Diosen' le'e cont gac gonle bi da' chaclaže'le gonle, ca'czen cheyala' cue' yichjle gaclenen le'e gonle da' gaclen lježle cont yogo'le soačhachle šejnilaže'le Diosen'.

<sup>13</sup>Na' še Spiritw che Diosen' gonen cont güe'lencho Diosen' gwde gwdele diža' da' bi nsedcho, cheyala' nabcho lecze gaclenen chio' gwzejni'icho bene' bi zeje diža' dan' choe'lencho Diosen'. <sup>14</sup>Le cate' Spiriton' chonen cont chol' güiža' Diosen' len diža' da' bi nseada', con nezda' lo' yichjlažda'ogua' choe'lena' Diosen' diža', perw bi chona' xbab chen, le bi chejni'idan'. <sup>15</sup>Quinga cheyala' goncho cate' chol' güižcho Diosen', cheyala' güe'lenchone' bite'teze diža' da' chon Spiritw chen' chio' la'czla' še bi chejni'ichon, na' lecze cheyala' güe'lenchone' diža' da' chejni'icho. Na' cheyala' golcho bite'teze da' chon Spiritw che Diosen' golcho la'czla' še bi chejni'ichon, na' lecze cheyala' golcho da' chejni'icho. <sup>16</sup>Le še chonxencho Diosen' o choe'cho yela' choxcen che' len diža' da' bi chejni'i

beñe' yoble, beñe' bi chesejni'i dižan' choe'chon' bi gac yesonxene' Diosen' txen len chio'. <sup>17</sup>La'czla' še choe'cho yela' choxc̄len che Diosen' binlo, perw bi chaclenen beñe' yoble še bi chesejni'ide' xtiža'chon'. <sup>18</sup>Choa' yela' choxc̄len che Diosen' da' choe'lencha'ne' gwde gwdele diža' da' bi nseda' clcl ca le'e. <sup>19</sup>Perw cate' ndop nžagcho chonxencho Criston' yejni'a gua' gayo'ze diža' da' yesejni'i beñe' cont gwzejni'ida' legaque', clcl ca gua' ši mil diža' da' bi yesejni'ide'.

<sup>20</sup>Beñe' migw, bi cheyała' šo'cho xbab che bidao' bina' šejni'i, san šo'cho xbab che beñe' chejni'i. Perw len da' malen' cheyała' gaccho ca bidao' bi' bina' gon da' mal. <sup>21</sup>Xtiža' Diosen' nyojen žan: "Neda' Dios gona' cont beñe' zito' yesoe'lene' beñe' Israel quinga xtiža', perw ñe ca'cze bi yosozenague' chia'." Can' ža Xancho Diosen'. <sup>22</sup>Da'nan' ñezecho Diosen' chchine' gwde gwdele diža' da' choe'lenchone' cont beñe' bi yesejnilaže'ne' yesacbe'ede' zoacze' len chio'. Na' chio' chejnilaže'chone', Spiritw che Diosen' chonen cont beñe' cheseyixjue'ede' chio' bi da' ba gož Diosen' legaque'. Can' chone' chzejni'ide' chio'. <sup>23</sup>Le gon xbab nac gac še šlac ndop nžag yogo'cho txen chonxencho Criston' yogo'cho güe'lencho Diosen' gwde gwdele diža' da' bi nsedcho, na' yesela' bał beñe' bi chesejni'i naquen' choncho chonxenchone' o beñe' bi chesejnilaže'ne', legaque' yesene' chactontcho. <sup>24</sup>Perw še beñe' ca' bi chesejnilaže' Diosen' o beñe' ca' bi chesejni'i naquen' chonxenchone' yesela'aque' šlac

yogo'cho chzejni'i lježcho bi da' ba gož Diosen' chio', nach yesacbe'ede' zjade xtole' cate' yesende' xtiža' yogo'cho, na' yesyetiñjde' da' malen' chesonen'. <sup>25</sup>Le yesacbe'ede' Diosen' nombi'e xbab da' chesone' lo' yichjlažda'ogüen', nach yosoza xibe' yesonxene' Diosen' na' yesene': "Da' licze zoa Diosen' len beñe' quinga."

**Cheyała' gonxencho Diosen' binlo na' bi gonchon nacteze**

<sup>26</sup>Beñe' migw, cate' chežagle chonxenle Diosen' quinga gonle: Bałle de to da' golle gonxenle Diosen', na' bałle de da' gwsed gwlo'e lježle, na' bałle de da' ba gož Spiritw che Diosen' le'e, na' bałle de gwde gwdele diža' da' güe'le da' bi nsedle, na' yebałle chaclaže'le chixjue'ele bi zejen gwde gwdele dižan' ba gwna beñe' lježlen'. Naquen' güen gonle yogo' da' ca' con še gonlen ga gaclenen lježle. <sup>27</sup>Na' še nole güe'lenle Diosen' gwde gwdele diža' da' bi nsedle, le güen', perw do chopzle o še šonzle na' tgüeje tgüejle, na' tena' choj beñe' yozejni'ide' bi zejen diža' dan' ba be'le. <sup>28</sup>Na' še nono zoa no yozejni'i bi zeje dižan', bi cheyała' güe'le dižan' zižje gan' ndop nžaglen', con lo' lažda'ole na'zen' güe'lenle Diosen' diža', še ca'. <sup>29</sup>Na' še chixjue'ele bi da' ba gwna Diosen', lecze do chopzle o šonzle chojle chixjue'elen šlac ndop nžagle na' yezica'chle beñe' yosozenague' na' yesone' xbab še dan' žalen' naquen' lebze len Xtiža' Diosen' dan' nyoj. <sup>30</sup>Na' še šlac tole choe'le diža', Diosen' gwzejni'ide' yetole to da' chixjue'ele,

cheyala' cuezle na' güe'le latje  
 chixjue'e ben' yeto dižan'. <sup>31</sup>Yogo'le  
 guac chixjue'ele da' gož Diosen'  
 le'e, perw gonlen tğüeje tğüeje  
 cont yogo'le šejni'ichle na' gaclenen  
 le'e. <sup>32</sup>Na' le'e chyixjue'ele bi da' ba  
 gwna Diosen', cheyala' chixjue'elen  
 con baten' naquen güen chixjue'elen.  
<sup>33-34</sup>Le Diosen' chaclaže' gwsa'le  
 binlo da' chonle caten' chdop  
 chžagle chonxenle' na' bi gonlen  
 nacteze.

Na' caten' chdop chžagle  
 chonxenle Criston', cheyala'  
 gwžonle yesoe' no'ol ca' diža' šlac  
 ndop nžagle, can' chesežone'  
 gate'teze chesedop chesežague'  
 chesonxene'ne'. Cheyala' yesenita'  
 no'ol ca' yosozenague', le can' ža  
 leyna'. <sup>35</sup>Na' še bi da' chesac্লাže'  
 no'ol ca' yesenezde', guac yesenabde'  
 bene' chegaque' cate' yesyežin  
 ližgaque', le naquen da' yela' zto'  
 še no no'ole güe'e diža' šlac ndop  
 nžagcho.

<sup>36</sup>Le gon xbab, gague le'e gocle  
 bene' nechw bene' gwyejnilaže'  
 xtiža' Criston', na' bi nacho nezechle  
 ca bene' chesedop chesežag ga  
 yoble chesonxene'ne'. <sup>37</sup>Še nole  
 chaquele chac chyixjue'ele bi da'  
 ba gwna Diosen' o še chaquele  
 chaclen Spiritw che Diosen' le'e len  
 bichle da' chonle, nachen' cheyala'  
 gabe'ele da' quinga chzoja' le'e  
 naquen da' non Xancho Criston'  
 mandadw goncho. <sup>38</sup>Na' note'teze  
 bene' bi chejle'e še Xancho Criston'  
 bene' cont bzoja' da' quinga, bi zaca'  
 šejle'cho che' bite'teze da' že'.

<sup>39</sup>Na' quinga naquen bene' migw,  
 le cuec yichjle gaclen Spiritw  
 che Diosen' le'e cont chixjue'ele

bi da' na Diosen', na' bi gwžonle  
 yesoe' bene' gwde gwdele diža' da'  
 chnežjw Spiritw che Diosen' yesoe'.  
<sup>40</sup>Perw binlo gonle yogo' da' chonle  
 cate' chdop chžagle na' bi gonlen  
 nacteze.

**Beban Criston' ladjo bene' guaten'**

**15** Bene' migw, chaclaža'  
 gonle xbab che diža' güen  
 che Criston' da' ba be'lena' le'e.  
 Ba bzenagle chen na' zoachachle  
 chejle'len. <sup>2</sup>Na' nezele šjayzoale  
 len Diosen' še soatezle gwzenagle  
 che diža' güen chen'. Na' še bi  
 gwzenagle chen, bibi zejen da' žale  
 chejle'len.

<sup>3</sup>Diosen' bzende' neda' da' quinga  
 da' zjanaquen la'zelagüe' da' zejen  
 na' bač gwduxjue'edan' le'e. Criston'  
 bnežjw cuine' gote' cont beque'e  
 xtoja'chon' con can' nyoj Xtiža'  
 Diosen'. <sup>4</sup>Nach bosocuaše'ne', na'  
 beyon ža beyas bebane' ladjo bene'  
 guat ca' con can' nyoj Xtiža' Diosen'.  
<sup>5</sup>Nach jaylo'elagüe' Pedron' na'  
 gwdechle jaylo'elagüe' yezica'chle  
 postlw ca'. <sup>6</sup>Beyoža' jayezlo'elagüe'  
 gwdele gayo' gayoa bene' to ši'ize,  
 bene' chesonxene' le'. Na' zan bene'  
 ca' ne' zjamban, la'czla' baļe' ba  
 gosate'. <sup>7</sup>Nach jayzlo'elagüe' Jacobo.  
 Gwde na' jayzlo'elagüe' yogo' postlw  
 ca'.

<sup>8-9</sup>Bzebte bedyelo'elagüe' neda',  
 zaca'leba' ca' bi' golje cate' bina' žin  
 ža, le cana' bchi bsaca' bene' ca'  
 chesedop chesežag chesonxene'  
 Criston'. Na' da'nan' chacda' bicze  
 zaca' yososi'e neda' postlw. <sup>10</sup>Perw  
 Diosen' nži'ilaže'de' neda' na'  
 gwleje'nda' naca' postlw che', na'  
 choncha' xšinen' clcl ca' bene' lježa'

ca' yezica'chle. Na' nezda' gague chonan' neda', san Diosen' chaclene' neda' cont chonan'. <sup>11</sup>Da'nan' bibi nonen še xtiža' nedan' ba bzenagle o še xtiža' nochle postlw ca', le toze can' chyixjue'eto' che Criston' na' can' nac dan' ba chejle'le chen'.

### Yesyeban bene' guat ca'

<sup>12</sup>Yogo' neto' chyixjue'eto' beban Criston' ladjo bene' guat ca'. Da'nan' čbixchen' ža balle bi yesyeban bene' guat ca'? <sup>13</sup>Šaca' naquen diža' li dan' žale bi chosban Diosen' bene' guat ca', zejen bi beban Criston' še ca'. <sup>14</sup>Na' šaca' Criston' bi bebane' ladjo bene' guat ca', bibi zaca' xtižen' da' be'lento' le'e na' bibi zejen da' chejnilaže'lene' še ca'. <sup>15</sup>Ba be'lento' le'e diža' güenlaže' gwnato' Diosen' bosbane' Criston' ladjo bene' guaten' šaca' naquen diža' li dan' žale bi chosbane' bene' ba gosat. <sup>16</sup>Le šaca' bi chosbane' bene' ba gosat, lecze bi bosbane' Criston'. <sup>17</sup>Šaca' naquen da' li Diosen' bi bosbane' Criston', bibi zejen da' chejnilaže'chone' na' bi nacho beque'e xtoła'chon'. <sup>18</sup>Šaca' naquen da' li bi bosbane' Criston', ba gosebiayi' yogo' bene' ba gosat bene' gosejnilaže' Criston' še ca'. <sup>19</sup>Na' šaca' da' zoacho lez šjayzoalencho Criston' cate' yeza'cho yežlio nga naquen da' güenlaže', yela' zi' xench chac che chio' chejni'ilaže'cho Criston' clel ca' che yezica'chle bene' še ca'.

<sup>20</sup>Perw na' da' li Diosen' bosbane' Criston' ladjo bene' guat ca', na' da'nan' nezecho žin ža yosbane' yezica'chle bene' chesejnilaže'ne' še ba gosate'. <sup>21</sup>Gwx e yela' goten' yežlio nga da' gwzoa' to bene' bene'

da' mal, na' lecze ca'czen' goc, to bene' bene' cont žin ža yebancho ladjo bene' guat. <sup>22</sup>Le gwxe yela' goten' cate' Adanna' bene' da' malen', da'nan' yogo' bena<sup>h</sup>chen' chesate'. Nach Criston' bene' cont yogo' bene' yesaque' txen len le' yesenite' toli' toca<sup>ne</sup>. <sup>23</sup>To tocho yebancho ladjo bene' guaten' cont soalencho Criston' con caten' ba bsi'e xnezen<sup>na</sup>'. Criston' gwžialagüe' bebane' ladjo bene' guat ca' na' cate' yide' da' yoble chio' chejnilaže'chone' lecze yebancho ladjo bene' guat še ba gotcho.

<sup>24</sup>Nach te che yežlio nga. Na' Criston' gwnitlagüe' yela' chnabia' che yogo' bene' chesegue'ede' Diosen' na' yeque'e yela' chnabia' che yogo' da' xigüe' ca'. Na' yeyožen' Criston' gone' lo na' Xe' Diosen' yogo' da' nłane' chnabi'e na' yogo' non' chnabi'e.

<sup>25</sup>Diosen' bžie' bia' zoa Criston' chnabia'che' ca' yogo' bene' ca' na' bichle da' ca', na' Diosen' gone' cont žin ža cate' gwlej gwšošje' bene' ca' na' bichle da' ca' bi cheson txen len le'. <sup>26</sup>Na' cate' yeyož gwlej gwšošje' yogo' bichle da' bi chon txen len le', nach gwcueze' yela' goten'. <sup>27</sup>Diosen' ba nsi'e xnezen' cont yogo'loł' da' zjade zjanaquen lo na' Criston'. Perw bi nacho zejen Diosen' naque' lo na' Criston', san Diosen' nsi'e xnezen' cont yezica'chle bene' na' bica'chle da' zjade yesaquen lo na' Criston'.

<sup>28</sup>Nach cate' ba ben Diosen' cont yogo' da' zjade ba zjanaquen lo na' Criston', nach Criston' gwlo'e lecze le' naque' lo na' Xe' Diosen'. Can' gac cont yogo' bena<sup>h</sup>ch na' yogo' angl yesacbe'ede' Diosen' naque' Xanguaque', na' lecze yesacbe'e da' xigüe', beyixe' na' bichle da' zjade.



<sup>29</sup>Nita' beñe' chesezoe' nis gualaz beñe' ba gosat. Na' bibi zejen da' chesone' ca' šaca' bi žin ža yesyeban beñe' guat ca'.

<sup>30</sup>Na' neto' yogo' ža nita' beñe' chesaclašē' yesote' neto' da' choe'to' xtiža' Criston', na' bibi zejen zoa chbezto' ca' šaca' bi yesyeban beñe' guat ca'. <sup>31</sup>Beñe' migw, choa' diža' li chnia' chbechgüeda' ba chejnilaže'le Xancho Jesucriston', na' lecze ca' choa' diža' li chnia' yogo' ža chzanlaže' cuina' gac bi da' gac chia'. <sup>32</sup>Guac nacho bež znia ba gwdiljena' Efeso nga ga ba gosadabaga'chgua beñe' neda. Na' bibi zejen ba bchejda' yogo' da' ba gosonde' neda' šaca' bi yesyeban beñe' guat ca'. Na' šaca' bi yesyeban beñe' guat ca', yejni'a goncho can' ža dižan' žan: "Ye'ej gagwtezcho, le gwxezen' gatcho."

<sup>33</sup>Bi güe'le latje yesonlede' le'e. Da' li can' ža to diža' da' de, žan: "Beñe' chejlen beñe' cheson da' mal lecze solao gone' can' chesone'na'." <sup>34</sup>Le yeyon xbab šagüe' na' cuejyichjle xbab mal dan' chonlen, le balle biña' šejni'ile che Diosen'. Chnia' ca' da' chaclaža' gaquele zto' che da' malen' chonle.

#### **Cuorp che beñe' yesyeban ladjo beñe' guat ca'**

<sup>35</sup>Balle nabljale nac gac yesyeban beñe' guat ca' o nac gac cuorp chegaquen' cate' yesyebane'. <sup>36</sup>Nchol yichjlažda'olen' še chaquele bi gac yesyebane' ladjo beñe' guat ca'. Nezecho to to xoa' dao' da' chazcho cheyala' yexinjen cont la' yel dao'. <sup>37</sup>Na' caten' chazcho, bi chazcho yel daon', san chazcho xoa', nach

chexinjen cont la' yel daon'. Na' can' chac len bi da' chazcho, con xsen' chazcho na' chla' yag dao' chen.

<sup>38</sup>Diosen' chone' cont chla' yag dao' dan' chazchon', bi chla' yag yoble da' bi gozcho. <sup>39</sup>Na' gague toze ca nac cuerp che chio' beñach len cuerp che be žia tap ni'a na'ba'. Nža' cuerp che beñach na' nža' cuerp che be žia xil, na' lecze nža' cuerp che be chesaš lo' nis. <sup>40</sup>Nža' cuerp che beñach, nža' cuerp che beyixe', na' nža' da' ca' chle'echo le'e yaban', gwbiž, bio' na' beljw ca'. Na' nža' yela' xdan che gwbiž, bio' na' beljw ca', na' nža' yela' xdan che beñach na' che beyixe' ca' chesaš lo yežlion'. <sup>41</sup>Na' nža' ca' chseni' gwbiž, nža' ca' chseni' bio' na' lecze nža' ca' chseni' to to beljw ca'. <sup>42</sup>Nach cate' yesyeban beñe' ca' ba gosat, cuerp chegaquen' bi gaquen ca cuerp da' gosape' cate' gosebane'. Cuorp chegaque' da' bosocuaše' lo' ban' ba beyožen', perw cuerp cobe chegaquen' gague da' te chen. <sup>43</sup>Bibi zaca' cuerp che beñe' guat ca', zjanaquen cuerp šen, na' cheyožen', da'nan' chcuaše'chon lo' ba. Perw beñe' gosejnilaže' Criston', cate' yesyebane' ladjo beñe' guat ca' yesyeyac cuorp chegaque' da' güen juisyw na' da' gual. <sup>44</sup>Cuorp chegaquen' zjanaquen de bela' chen cate' chosocuašen' perw cate' yesyebane' ladjo beñe' guat ca' nža' ba zjanac cuorp chegaquen', le yesyeyaquen cuerp cobe da' yeson con can' ža Spiritw che Diosen'. Nezecho cuerp chechon' da' de na'a naquen de bela' chen, na' lecze cheyala' nezecho žin ža cate' yeyaquen da' cobe na' gonon con can' ža Spiritw che Diosen'.

<sup>45</sup>Xtiža' Diosen' nyojen žan Adán bene' goc bene' nechw gwzoe' gwbané' caní'. Na' ná'a zoa Criston' zaca'lebde' ca Adánna', le Criston' chone' yela' mban toli tocane.  
<sup>46</sup>Ná'a cuerp chechon' bi naquen to da' chzenag che Spiritw che Diosen', perw žin ža yeyaquen da' cobe na' gwzenaguen che Spiriton'.  
<sup>47</sup>Diosen' bene' bene' nechw len bište yo cont gwzoe' lo yežlio nga, perw Xancho Criston' ben' zaca'lebde' ca bene' nechon' ze'e yaba. <sup>48</sup>Na' chio' benačh, cuerp chechon' naquen ca cuerp che bene' nechon' da' ben Diosen' len bište yo, da'nán' naccho che yežlio nga. Na' chio' chejnilaže'cho Criston', žin ža cate' cuerp chechon' yayaquen da' cobe can' nac cuerp che Criston' bene' za' yaba. <sup>49</sup>Ná'a šlac zoacho yežlion' naccho ca bene' ben Diosen' len bište yo, perw cate' žin ža šjayzoacho yaban', gaccho ca Cristo ben' za' yaba.

<sup>50</sup>Bene' migw, chnia' le'e bi gac yežincho yaba gan' zoa Diosen' len cuerp chechon' de bela' chen. Da' te che cuerp checho quinga, da'nán' bi gac šjayzoalenchon len Diosen' toli tocane. <sup>51</sup>Chnia' le'e to da' nono gwneze caní', gague yogo'chon' gatcho, perw yogo'chon' yeža' can' gaccho. <sup>52</sup>Bedao'nez, ca bedaon' chžode' yejlaochon', yeža' can' gaccho cate' cuež trompeta che Diosen'. Cuež trompetan' na' yesyeban yogo' bene' ba gosat bene' gosejnilaže' Criston'. Na' cuerp chegaquen' yesyeyaquen da' cobe da' bi yesat na' lecze ca' chio' ne' mbancho yeža' cuerp chechon'.  
<sup>53</sup>Le cuerp chechon' da' mbanecho

yežlio nga da' te chen. Naquen da' chat, na' cheyala' yayaquen da' cobe da' bi gat, da' bi gožo' na' da' bi te che. <sup>54</sup>Cate' ba beyac cuerp chechon' da' cobe da' bi gat na' bi te chen, cana' ba goc can' nyoj Xtiža' Diosen' gan' žan: "Diosen' gwzoede' bcueze' yela' goten', na' chone' yela' mban toli tocane. <sup>55</sup>Bich soe yela' goten' chio' da' yoble. Gwbatech gatcho šo'cho lo' ba." <sup>56</sup>De yela' got checho ná'a le chio' benačh choncho da' mal. Da' neze chio' benačh can' ža ley che Diosen' cheyala' goncho na' bi chzenagcho gonchon, da'nán' chnabia' da' malen' chio'.  
<sup>57</sup>ChoχcLen Diosen' gwsele' Xancho Jesucriston' beque'e xtoła' chio' chejnilaže'chone'. Da'nán' bi soe yela' goten' chio', san de yela' mban toli tocane checho.

<sup>58</sup>Da'nán' bene' migw chia', chacda' le'e na' chneyoeda' le'e le soačhačh len toze xbab. Na' le gonchgua xšin Xanchon', le nezczecho cate' choncho xšinen' chejnilaže'chone', gague da' chondadzchon'.

**Bene' Corinto chosotobe' mechw cont yesaclene' bene' Jerusalén ca'**

**16** Nach nia' naquen' gonle cate' gwtoble mechw da' gaclenen bene' ca' chesejnilaže' Diosen' Jerusalénna'. Le gon can' bena' mandadw yeson bene' ca' chesedop chesežag chesonxene' Criston' to to yež da' zjachi' distritw Galacia. <sup>2</sup>Yogo' ža dmigw to tole cheyala' cuejle late' güeje mechw según gaca'te' benle gan lagüe' xman. Na' co'ošagüe'le mechon' cont den cate' yida' gan' zoale na' gague za' gwtoblen cate' yedena'a

le'e. <sup>3</sup>Nach cate' la'a gan' zoalen', cana' gwzoja' cart da' yesoxe' bene' ca' chaclaže'le šjasesane' xmechwlen' Jerusalénna'. <sup>4</sup>Na' še chonen byen ša'a, cuina' čhi'a legaque' Jerusalénna'.

**Pablon' chone' xbab šjane'e  
bene' Corinto ca'**

<sup>5</sup>Na' yida' gan' zoale cate' yeyož yedia' Macedonia, le cheyla' šjayna'a bene' lježcho ca' nita' na'. <sup>6</sup>Na' chacda' yega'anlena' le'e do tbio' do čop bio' o še yega'ana' doxen tiemp zag, nach gaclenle neda' cate' yeza' ša'a gate'teze ša'a. <sup>7</sup>Bi chaclaža' yedena'a le'e na'a, le con teza' še ba za'a, na' chaclaža' soa' sša len le'e cate' yida' še Xancho Diosen' gonšque' latje. <sup>8</sup>Chaclaža' yega'ana' Efeso nga žinch ža gała' lni dan' že' Pentecostés. <sup>9</sup>Le bene' zan že' nga bene' chesaclaže' yosozenague' che Criston' na' lecze že' bene' zan bene' bi chesaclaže' čixjue'eda' xtizen'.

<sup>10</sup>Na' še la' Timoteon' gan' zoalen', le gwlebe' na' le gwzenag che' cont bi žebe' gwsed gwlo'ede' le'e, le can' chona' xšin Xancho Diosen', lecz can' chonen'. <sup>11</sup>Ne tole bi cheyla' gonle xbab bibi zaca' da' chsed chlo'ede', san soale güen len le' na' gaclenlne' cate' yeze'e cont yeyede' gan' zoa' nga to šagüe' to güen, le chbeza'ne' txe len yezica'chle bene' lježcho ca'.

<sup>12</sup>Na' ca' nac Apolosen', gota'yoeda'ne' lecze šejlene' Timoteon' gan' zoalen', txe len yezica'chle bene' lježcho ca' yesaclene' le'. Perw bi chaclaže' šeje' na'a, na' šeje' cate' soe' to latje.

**Yeto čhope diža' da' choe'len  
Pablon' bene' Corinto ca'**

<sup>13</sup>Le soa le na' can' chonlen', na' le soa len toze xbab šejnilaže'le

Criston'. Bi žeble, san le soačhach gonle can' chazlaže' Diosen'. <sup>14</sup>Na' le gaque lježle bite'teze da' chonle.

<sup>15</sup>Bene' migw chia', nezele bene' ca' že' liž Estéfanos gosaque' bene' nechw gosejnilaže' Criston' distritw Acayan' na' ba gosaclenchgüe' yezica'chle bene' lježcho bene' chesejnilaže'ne'.

<sup>16</sup>Da'nan' chneyoeda' le gwzenag čhegaque' na' gonle can' chesenen', na' le gwzenag che nochle bene' cheson xšin Diosen' na' chesaclene' bene' lježcho ca' can' chesone'na'.

<sup>17</sup>Chebeda' ba besela' Estéfanos, Fortunato, na' Acaico gan' zoa' nga. Legaque' ba gosaclene' neda' cont bich chacyaše'da' dan' bi zoale nga len neda'. <sup>18</sup>Ba gosone' cont beyaclaža' can' ba gosoncze' len le'e cana', na' da'nan' cheyla' güe'cho yela' choxclen čhegaque' che dan' ba gosonen'.

<sup>19</sup>Bene' ca' chesedop chesežag chesonxene' Criston' doxen distritw Asian' chosoguape' le'e tiox. Na' Aquila na' Priscila na' bene' ca' chesežag ližgaque' chesonxene' Criston' lecze chosoguapchgüe' le'e tiox. <sup>20</sup>Nach yogo' bene' lježcho že' nga chosoguape' le'e tiox. Na' cate' chdop chžagle txe, le gwnopa' na' lježle cate' gwguap lježle tiox cont gabcia' chaque lježle.

<sup>21</sup>Cuincza' neda' Pablo chzoja' late' dao' le'e cart nga chguapa' le'e tiox.

<sup>22</sup>Na' še ne' nchixe bałle bi chaquele Xancho Jesucriston', Diosen' gone' cont cuiaye'e toli tocane. Xancho Jesucristo, yidšco' da' yoble.

<sup>23</sup>Gaclenšca Xancho Jesucriston' le'e. <sup>24</sup>Chacda' yogo'le da' naccho txe chejnilaže'cho Cristo Jesúsén'. Da' na'zen' žia' le'e.

# CART GWCHOPE DAN' BZOJ POSTLW SAN PABLO CHE BENE' CA' ŽE' CORINTO

---

Postlw Pablo chzoje' bene' chesonxen  
Jesucriston' ciuda Corinto

**1** Neda' Pablo naca' postlw che  
Jesucriston', le can' chaclaže'  
Diosen'. Chzoja' cart nga che le'e  
chdop chžagle chonxenle Diosen' lo  
ciuda Corinto, na' che note'tezechle  
bene' že' doxen distritw Acaya bene'  
ba gwlej Diosen' cont zjanaque' lo  
ne'e. Neda' len bene' migw checho  
Timoteo chguapto' le'e tiox. <sup>2</sup>Na'  
chṇabeto' Xacho Diosen' na' Xancho  
Jesucriston' yesaclene' le'e na'  
yesone' cont soa cuezle binlo len  
xbab da' yo'o lo' yichjlažda'olen'.

Da' ca' gwdi gwxaca' Pablon'

<sup>3</sup>Cheyała' soacho gonxencho  
Diosen', le naque' Xa Xancho  
Jesucriston', na' Jesucriston' lecze  
chonxene' le'. Xacho Diosen'  
cheyaše' cheži'ilaže'de' chio' na'  
len' cheyoe'xene' chio' cate' chac bi  
da' chac checho. <sup>4</sup>Ba cheyoe'xene'  
neto' len yogo' da' chzaca'zi'to' cont  
chac cheyoe'xento' yezica'chle bene'  
cate' bi da' cheseyi chesezaque'.  
Can' cheyoe'xen Diosen' neto', lecze

can' cheyoe'xento' bene'. <sup>5</sup>Leca  
chyi chzaca'to' can' gwdi gwxaca'  
Criston', na' ca'cze leca cheyoe'xen  
Diosen' neto' da' chejnilaže'to'  
Criston'. <sup>6</sup>Da' zan da' chac cheto' da'  
chsed chlo'eto' xtiža' Diosen', perw  
zaca'czen' cont cheyoe'xento' le'e  
len da' chzaca'zi'le na' chaclenen  
le'e cont šjayzoale len Diosen'.  
Na' cheyoe'xen Diosen' neto' cate'  
bin' chac cheto', cont lecze neto'  
cheyoe'xento' le'e len bi da' chac  
chele. Na' cheyoe'xento' le'e cont  
chzoele cate' chzaca'zi'le can' lecze  
chzaca'zi' neto'. <sup>7</sup>Chbezto' gwyo  
gwchejle da' chac chele, le nezeto'  
caten' chzaca'zi'le can' chzaca'zi'  
neto', Diosen' lecze cheyoe'xene' le'e  
can' cheyoe'xene' neto'.

<sup>8</sup>Bene' migw, chaclaža' nezele  
can' gwdi gwxaca'to' caten' gwzoato'  
distritw Asia. Gwdi gwxaca'chguato',  
con bich bi goc gonto' na' bento'  
xbab gatzeto'. <sup>9</sup>Da' li bento' xbab  
lo' yichjlažda'oto' ba za' yeła' goten'.  
Na' goc cheto' ca' cont gocbe'eto'  
bi soeczeto' gwyo gwchejto'  
dan' chzaca'zi'ton' san cheyała'  
šejnilaže'to' Diosen' cont gone'

chach laže'to', Dios ben' chosban beñe' guat ca'. <sup>10</sup>Na' caten' bento' xbab gatzeto' catec da' gosonde' neto', Diosen' bosle' neto' cont bi gotto' na' ñe' choslacze' neto' ña'a. Na' zoato' lez yoslache' neto' bate'teze. <sup>11</sup>Zoato' lez yoslacze' neto' con še gaclenle neto' yol güižlene' cheto'. Na' še zanle gonle ca', nach lecze zanle güe'le yeł'a choxcen che' cate' ba goclene' neto'.

### Pablon' gwžede' šeje' ciuda Corinto

<sup>12</sup>Chbeda' choa' diža' can' chonto', le nezeto' lo' lažda'oto' chonto' güen len le'e do yichj do laže'to' na' lecze len note'tezehle beñe'. Bi ñacho chonto' güen neche da' nacto' beñe' sina', san da' nži'ilaže' Diosen' neto', da'nan' chaclene' neto' chonto' güen len yogo'lo' beñe'. <sup>13</sup>Cart quinga chzoyto' le'e, bi gonle xbab še naquechle zejen, san šejni'ilen con can' nyojen, na' zoa' lez šejni'ilen binlo'. <sup>14</sup>Na' zoa' lez žin ža cate' gache'eyane'le cont yebele güe'le diža' nacle neto' txen, can' ba chache'ele late' dao' ña'a. Na' cate' žin ža yid Xancho Jesús'en' da' yoble, yebele güe'le diža' nacle neto' txen na' neto' yebet'o' güe'to' diža' nacto' le'e txen.

<sup>15</sup>Cana' godca' yedena'a le'e cont da' yechop ñi'a soacho txen, le bena' xbab yebele yedena'a le'e. <sup>16</sup>Goclaža' tia' yedena'a le'e caten' gwy'a Macedonia na' lecze goclaža' yedia' gan' zolna' cate' beza' Macedonian'. Na' godca' yeyoža' gaclenle neda' yeya'a Judean'. <sup>17</sup>Do laža' godca' gona' ca', gague chona' con can' žan chia' ca' cheson bal beñe' bi cheseniłaze' Diosen', to

chesene' yesone' to da' yesone' na' to chesene' bi yesonen'. <sup>18</sup>Ca Diosen' chone' con can' že', lecze ca' neto' chnato' do laže'to' cate' chnato' to da' gonto'. <sup>19</sup>Na' lecze Jesucriston' beñe' naque' Xi'iq Diosen', toz can' naque' bate'teze, na' nac da' li yogo' can' gwnen', con can' gwdixjue'to' xtižen' len le'e, neda', Silvano na' Timoteo. <sup>20</sup>Na' yogo' da' güen da' ba gwna Diosen' gone', nezecho gonon' da' gwsele' Jesucriston'. Da'nan' len yeł'a chaclen che Jesucriston' chonxencho Diosen' che'chone': "Gačšca ca'." <sup>21</sup>Na' Diosen' chone' cont neto' na' le'e zoachachcho chejnilaže'cho Criston'. Na' beñe' chio' Spiritw che'na' cont gac goncho xšinen'. <sup>22</sup>Na' lecze zoa Spiriton' lo' yichjlažda'ochon' cont nezecho Diosen' ba gwque'e chio' ca' xi'iqe' na' cont nezecho yogo' da' güen da' gwne' gone', žin ža cate' gonon'.

<sup>23</sup>Da' biña' yida' da' yoble Corinto gan' zوالen' yedena'a le'e can' gwnia' gona', biña' yida' cont bi yedetila' le'e che da' malen' chonle. Diosen' nombi'e yichjlažda'ogua' na' nezde' choa' diža' li chnia' ca'. <sup>24</sup>Nezeto' gague neto' ye'to' le'e da' ni da' na' šejle'le. Ba zoachachle chejnilaže'le Criston', na' neto' con chaclento' le'e cont soachle mbalazch.

**2** Ca' goquen' bechoglaža' bi yedena'a le'e, le gocbe'eda' šaca' bedena'a le'e gocyas'e'cho. <sup>2</sup>Na' šaca' bena' cont gocyas'e'le, nono zoa no yeyon cont yezoa' mbalaz, le ba bena' cont gocyas'e'laže'le še ca'. <sup>3</sup>Bzoja' carten' ca' cont cate' yida' gan' zolna' bich gonle da' mal da' gonon' gacyas'e'da', le cheyał'a gonle cont

yebeda'. Na' zoa' lez lecze mbalaz  
soa le'e cate' gonle soa' neda' mbalaz.  
<sup>4</sup>Bzoja' le'e do chegiüne'laža', da'  
gwzoachgua' gocyasē'da' che dan'  
chonlen', na' gwchežchgua' chele. Na'  
da' bzoja' carten' ca', gague gwzelaža'  
yegüüne'le, san gwzelaža' gacbe'ele  
leca chacda' le'e.

**Gwne' cheyala' yesyezi'xene'  
che bene' ben da' malen'**

<sup>5</sup>Da' li gocyasē'da' can' ben  
bena' ben da' malen', perw gague  
neda'zen' gocyasē'da'. Yogo'czle  
ba gocyasē'laže'le late' güeje can'  
ba goquen'. Chnia' gocyasē'le late'  
güeje cont bi nia' benche' chio' zi'ch  
ca cheyala' nia'. <sup>6</sup>Ndop nžagle txen  
gwchoglaole castigw che', na' da'  
na'zen' cheyala' si'e. <sup>7</sup>Bich güe'lnē'  
castigw, san yezi'xenle che' na' le  
gon chach laže' cont soede' yela'  
chacyasē'laže' chen' na' bi cuejyichje'  
Diosen'. <sup>8</sup>Da'nan' chneyoeda' le'e  
le gon cont gacbe'ede' chaquelene'.  
<sup>9</sup>Ba bzoja' le'e cana' cont gwnezda'  
naquen' chonle, še chzenagle chia'  
len yogo' dan' gwnia' gonle. <sup>10</sup>Na'  
na'a chaclaža' nezele note'teze  
bene' chezi'xenle che', lecze neda'  
chezi'xena' che'. Na' cate' chezi'xena'  
che bene', še zoa da' cheyala'  
yezi'xena', chezi'xenan' lao Criston',  
na' ba bezi'xena' che bena' cont  
chaclena' le'e. <sup>11</sup>Na' chezi'xenco  
che bene' cont Satanás dan' chnabia'  
da' xigüe' ca' bi soen gonen chio'  
gan, le nezecho can' chaclažen'  
siye'czen chio'.

**Pablon' goclaže' yežague' Titon'**

<sup>12</sup>Cate' bžina' Troas gan'  
gwdixjue'eda' diža' güen che

Criston', nacbia' Diosen' ba bene'  
cont bene' že' na' gosaclaže'  
bosozenague'. <sup>13</sup>Perw benchgua'  
xbab che bene' migw checho Titon'  
da' bi bžine' na'. Da'nan' goša' bene'  
ca': "Nayežagcho", na' beza' beya'a  
distritw Macedonian'.

**Zoacho mbalaz da'  
nombia'cho Criston'**

<sup>14</sup>Choxclen Diosen', none' cont  
Jesucriston' ba bebeje' chio' lo na'  
gwxiyen' na' mbalaz cheche'e chio'  
soacho len le'. Na' gate'teze zoacho,  
Diosen' chone' cont chesacbe'e bene'  
naquen da' güen juisyw nombia'cho  
Criston'. <sup>15</sup>Diosen' chebede' choncho  
cont chesacbe'e bene' naquen da'  
güen juisyw yesejnilaže' Criston'.  
Na' bale' chesejnilaže'ne' na' de  
yela' mban chegaque' tolí tocane,  
na' yebale' bi chesejnilaže'ne'  
na' chesebiaye'e. <sup>16</sup>Na' bene' ca'  
chesebiayi' bi chesyebede' can'  
chonchon', le che'chone' yesebiaye'e.  
Na' bene' chesejnilaže'ne' chesyebede',  
le ba goclenchone' cont ba de yela'  
mban chegaque' tolí tocane. Perw  
chio' bi chaccho to gualazcho  
gwlo'echo bene' ca' güenna' naquen  
yesejnilaže' Criston'. <sup>17</sup>Bene' zan  
chosoše'e diža' da' cheso'e che Diosen'  
cont chesyebe bene' len xtiža'gague'  
na' chosonežjue' legaque' mechw.  
Neto' bi chonto' ca', san do laže'to'  
choe'to' diža' lao Diosen' da' nacto'  
Criston' txen, le Diosen' gwsele' neto'  
choe'to' xtižen'.

**Da' cobe da' gwna Diosen' gone'  
cont gaclene' benačhen'**

**3** Bi gonle xbab chonxen  
cuinto' choe'to' diža' quinga.

Nezele chonto' xšin Diosen' do laže'to', na' bi chyažjen goxe'to' cart cont nezele nac nacto', na' neca chyažjen gwzojle cart da' goxe'to' cate' šejto' ga yoble. <sup>2</sup>Chaqueto' le'e da' gwđixjue'eto' xtiža' Criston' len le'e cont gwejnilaže'lene'. Na' yogo'ze bene' guac yesele'ede' can' ba boša' yichjlažda'olen' na' guac yesenezde' can' chonto' xšin Diosen'. <sup>3</sup>Gwejnilaže'le Criston' caten' be'lento' le'e xtižen', na' Spiritw che Diosen' bocoben yichjlažda'olen'. Na' da' nacbia' becobe yichjlažda'olen' zaca'chen ca no cart da' nyoj to le'e yiš o ca ley che Diosen' da' nyoj to le'e yej.

<sup>4</sup>Cheyaxjeto' žato' ca' le Criston' zoe' chaclene' neto' cont nezeto' chonto' can' chazlaže' Diosen'. <sup>5</sup>Nezeto' bi chac bi gonto' to gualazto', na' nezeto' gague neche bi da' ba ben neto' bchoj xšin Diosen' güen, le Diosen' chone' cont chac bite'teze da' chac. <sup>6</sup>Na' Diosen' ba bene' cont chac chyixjue'eto' da' coben' da' gwne' gone' gaclene' chio' benačh. Na' da' coben' bi naquen ca ley che' dan' byoj cani' chzejni'in chio' benačh cuiayi'cho yela' güen da' mal chechon', san na'a Spiritw chen' chonen yela' mban toli tocane che chio' chejnilaže'chone'.

<sup>7</sup>Cate' Diosen' bnežjue' da' Moisésen' ley che' dan' byoj le'e yej ta'a ca', bene' cont bene' Israel ca' gosacbe'ede' ley chen' naquen da' zaca'. Na' cana' catec goctitechgua cho'ala Moisésen', bi goc yesena' bene' Israel ca' cho'alagüen', la'czla' gwdechle bega'a yela' chactiten' šolaže'. Na' ley nan' con bzejni'in benačhen' cuiayi'cho yela' güen

da' mal chechon'. <sup>8</sup>Da'nan' nezecho leca zaca'ch da' chon Spiritw che Diosen' na'a cont gata' yela' mban checho toli tocane. <sup>9</sup>Diosen' blo'e yela' zaca' che ley chen' la'czla' bzejni'in chio' benačh si'cho castigw da' bi choncho can' žanna'. Na' zaca'ch xtiža' Diosen' da' de na'a da' chzejni'in cheyone' chio' bene' güen. <sup>10</sup>Da' naquen da' zaca'chgua cani', bičh naquen da' zaca' na'a, le ba de yeto da' zaca'chgua da' xench. <sup>11</sup>Na' da' blo'e Diosen' yela' zaca' che da' ben žin šložze cani', cheyala' gacbe'echo leca da' xench zaca' da' coben' da' bi te che.

<sup>12</sup>Na' da' nezeto' gague da' te che da' cobe da' ba gwđixjw Diosen' cont chaclene' benačhen', da'nan' bi chedi'ito' chyixjue'eto' xtižen' sin cbi chžebto'. <sup>13</sup>Da' Moisésen' bcuaše' cho'alagüen' len to lache' bxin cont bene' Israel ca' bi besele'ede' chenit late' güeje yela' chactit che cho'alagüen'. Perw na'a gague chcuaše'to' yela' zaca' che da' chon Diosen'. <sup>14</sup>Bene' Israel gualaž cheto' ca' bi gosejni'ide', ne ža na'aža bi chesezejni'ide' cate' chosolabe' ley dan' byoj cani' gan' nyoj da' ca' gwna Diosen' gone' gaclene' legaue'. Con bene' ca' chesejnilaže' Criston' chesejni'ide' bi zejen. <sup>15</sup>Ža na'aža cate' bene' Israel gualaž cheto' ca' chosolabe' da' ca' bzoj Moisésen', zjanaquen ca to da' ngaše' len legaue' yela' bi chejle' chegaquen'. <sup>16</sup>Perw note'teze' cate' chesejnilaže' Xancho Criston', da' ca' zjanyoj bich chesaquen ca to da' ngaše' len legaue'. <sup>17</sup>Xancho Criston' naque' toze len Spiritw che Diosen'. Na' cate' ba zoa Spiritw



che Xanchon' lo' yichjlaždao' bene', bach zoe' binlo len Diosen'. <sup>18</sup>Yogo' chio' chejnilaže'cho Criston', yela' zaca' juisyw che Xancho Criston' bich ngašen' len chio', na' ba zejech cheyaquechcho bene' güen can' nac le', le zoa Spiritw che Xancho Criston' lo' lažda'ochon' chocoben xbab chechon'.

**4** Diosen' beyaše' beži'ilaže'de' neto' na' gwleje' neto' cont chyixjue'eto' xtižen'. Da'nan' bi cheche'eto' chyixjue'eton'. <sup>2</sup>Na' bibi chonto' bagaše'ze ca no da' nac da' yela' zto'. Bi chonleto' bene' na' neca choša'to' xtiža' Diosen' cont yesyebe bene' chosozenag xtiža'ton'. San chle'ecze Diosen' chyixjue'eto' xtižen' con can' naquen cont yogo' bene' yesene xtiža'ton' yesenezde' lo' lažda'ogaquen' choe'to' diža' li. <sup>3</sup>Con bene' ca' ba zjambiyi' yela' bi chejle' chegaquen', legacze' bi chesejni'ide' diža' güen dan' choelento' legaque'. <sup>4</sup>Le bene' bi chesejle' xtiža' Diosen' chosozenague' che Satanás dan' chnabia' da' xigüe' ca' latje da' yosozenague' che Diosen', na' Satanásen' chonen cont nchol yichjlažda'ogaquen'. Da'nan' diža' güen che Criston' bi chsenin' lo' yichjlažda'ogaquen' ca to be'ni' cont yesenezde' Criston' naque' bene' zaca' juisyw. Cayane' nac yichjlaždao' Diosen' nac yichjlaždao' Criston', na' toz can' chesone'. <sup>5</sup>Na' ca nac diža' da' chyixjue'eto', chyixjue'eton' gague cont gwzenagle che neto', san cont gwzenagle che Jesucriston' ben' naque' Xancho. Na' da' chaqueto' Jesucriston', zoato' chonto' bite'teze da' chaclenen le'e. <sup>6</sup>Na' Dios ben' gwne' gata' be'ni'

yežlio nga gan' goc chol, ba gwlo'e be'ni' chen' lo' yichjlažda'ochon' cont nombia'cho Jesucriston' ben' nac bene' zaca' juisyw, na' cate' ba nombia'chone' chacbe'echo can' nac yela' bene' zaca' che Diosen'.

**Pablo cho'e xtiža' Diosen' lagüe' da' chejnilaže'ne'**

<sup>7</sup>Cuorp checho quinga da' chesat zjazaca'leben ca to che'e nis da' naquen de gona'. Perw Diosen' ba gwlo'e be'ni' chen' lo' yichjlažda'ochon' na'a šlac ne' mbancho len cuerp checho quinga cont gacbe'echo bibi chac goncho še bi gone' yela' guac xen chen' cont gac bi da' goncho. <sup>8</sup>Na' neto', da' zan da' chyi chzaca'to', perw bi chbejyichjto' xšin Diosen'. Zan ni'a bi chežellaže'to' nacle gonto', perw nezeto' Diosen' chaclene' neto'. <sup>9</sup>Chosolagšibe' neto', perw Diosen' bi chbejyichje' neto'. Chosoči chososaque' neto', perw Diosen' bi cho'e latje yesote' neto'. <sup>10</sup>Gate'teze chejto', con yogo' ni'a chosoči chososaca' bene' neto' na' chesaclaže' yesote' neto' can' gosote' Jesúsén'. Na' Diosen' cho'e latje chac cheto' ca' cont nacbia' zoacze Jesúsén' chaclene' neto' šlac mbanto' len cuerp cheto' quinga. <sup>11</sup>Na' šlac ne' mbanto', yogo' ža nita'cze bene' chesaclaže' yesote' neto' lagüe' da' chyixjue'eto' xtiža' Jesúsén'. Na' chac cheto' ca' cont nacbia' zoacze Jesúsén' chaclene' neto' šlac mbanto' len cuerp cheto' quinga da' yesat. <sup>12</sup>Can' chac, tža tža chesaclaže' yesote' neto', san le'e ba de yela' mban chele toli tocañe.

<sup>13</sup>Xtiža' Diosen' nyojen žan: "Chejnilaža' Diosen' na' da'nan'

choa' diža' che.' Na' ca ben' bzoj da'na' gwyejnilaže' Diosen', ca'czen' chejnilaže'to'ne' na' da'nana' choe'to' xtižen'. <sup>14</sup>Le nezeto' Dios ben' bosban Xancho Jesúsena' ladjo bene' guat ca' lecze žin ža yosbane' chio' še ba gotcho, na' neto' txen len le'e šjayzoacho gan' zoe'na'. <sup>15</sup>Neče le'e bžaglaoto' yogo'lo' da' ba goc četo'. Le chaclaže'to' gac zancho gaclenchgua Diosen' chio' cont šejnilaže'cho Xancho Jesúsena', na' lecze gac zancho güe'cho yela' choxclen che' catec bene' zacan' naque'.

<sup>16</sup>Da'nana' bi chjaxaque'laže'to'. La'czla' tža tža zej chaxo'ch cuerp četo' quinga, lecze tža tža Diosen' chocobche' yichjlažda'oto'. <sup>17</sup>Yob te che bite'teze da' dao' da' chžaglaochi yežlio nga. Na' da' ca' chy chzaca'cho chesaclenen chio' cont soacho mbalaz juisyoch cate' šjayzoacho len Diosen' to'li tocanē, na' lenna' da' zaca'ch ca bite'tezchle. <sup>18</sup>Nachen' bi chi' yichjcho che da' chle'echo yežlio nga, san chi' yichjcho che da' bi chle'echo. Le yesede che da' ca' zjade yežlio nga da' chle'echo, na' da' ca' bi chle'echo, gague da' yesede čegaquen, nita'czen to'li tocanē.

**5** Cuerp chechon' zaca'leben ca to yo'o da' bi chzibia'. Na' nezecho še ba byinjen, Diosen' ba none' to yo'o güen checho yaban' da' soa to'li tocanē; na' lenna' gague naquen to da' ben benach. <sup>2</sup>Na' šlac ne' zoacho mbancho yežlio nga, chbežyaše'cho lo' lažda'ochi zelaže'chguacho šjayzoacho lo' yo'o da' non Diosen' checho yaban'. <sup>3</sup>Chona' xbab cuerp cobe da' gone'

zaca'leben ca to xacho da' chyažjen chazcho cate' yežincho yaba. <sup>4</sup>Da' li chio' ne' chžaglaochi len cuerp checho quinga chbežyaše'cho lo' lažda'ochon'. Gague da' chaclaže'cho gatcho, san chaclaže'cho yeža' cuerp checho quinga da' te čen len to da' soa to'li tocanē. <sup>5</sup>Na' Diosen' gwleje' chio' cont šjayzoacho len le' na' gwsele' Spiritw čen' zoan lo' yichjlažda'ochon' cont nezecho dech da' gone' checho.

<sup>6</sup>Da'nana' bi chaczejlaže'cho, le nezecho šlac mbancho len cuerp checho quinga bina' šjayzoacho len Xancho Criston'. <sup>7</sup>Na' la'czla' bina' le'echo da' ca' gone' checho, zoacho chejnilaže'chone'. <sup>8</sup>Na' da'nana' bi chaczejlaže'cho, le chaclaže'cho cuejyichjcho cuerp checho quinga cont šjayzoacho len Xancho Criston'. <sup>9</sup>Nachen' zoacho choncho da' chazlaže' cont yebede' chio' šlac ne' mbancho na' cate' ba gotcho. <sup>10</sup>Le to tocho cheyala' techo lao Criston' gan' chone' yela' justisen' cont čhogbi'en checho na' gone' soacho mbalaz o saca'zi'cho con can' ba bencho šlac mbancho, še bencho da' güen o da' mal.

**Benachen' guac yesenite'  
binlo len Diosen'**

<sup>11</sup>Na' dan' nezeto' yogo'cho yodecho cuent lao Xancho Criston' che yogo'lo' da' ba bencho, da'nana' chneyoeto' bene' yosozenague' che'. Diosen' nezde' do laže'to' chneyoeto' bene' yosozenague' che', na' zoa' lez lecze le'e chacbe'ele lo' lažda'olen' zoato' chonton' do laže'to'. <sup>12</sup>Bi nacho chonxen cuinto' da' yoble dan' chnia' ca', san chnia' ca' cont yebele

can' chonton' na' nezele naquen' yoži'ile xtiža' bene' ca' chesenelagüe' cheto'. Bene' ca' chesalaže' da' ba zjansede' na' da' zjanaque' no zjanaque'. Bibi xbab chesone' che can' nac yichjlažda'ogaquen'.

<sup>13</sup>Še chaquele chactontto' can' ba benton', le gon xbab bento' con can' gwna Diosen'. Na' še chaquele zoašagüe'cze yichjlažda'oto', le gon xbab chonto' bi da' chonto' cont chaclento' le'e. <sup>14</sup>Leca chaque Criston' chio' na' da'nan' chonto' xšinen'. Na' nezecho toz Criston' bnežjw cuine' gote' neche yogo'cho, na' da' naccho txen len le' guac nacho yogo'cho ba gotcho len le'.

<sup>15</sup>Bnežjw cuine' gote' neche yogo' chio' benach, cont soa cuezcho goncho can' chazlaže' na' bich soa cuezcho goncho con ca žan checho. Gote' na' bebane' ladjo bene' guaten' neche chio'. <sup>16</sup>Neto' cate' bina' šejnilaže'to' Criston' goqueto' bibi zaque', le bento' xbab zaca' bene' še no naque' lo yežlio nga o še bi da' de che'. Perw na'a bich chonto' xbabent' ca' che Criston' o che note'teze bene'. <sup>17</sup>Na' note'tezcho še naccho Criston' txen, Diosen' ba bocobe' yichjlažda'ochon'. Na' bich chebecho da' ca' bebecho cana' na' bich choncho can' bencho cana'. Zoacho ca bene' cobe.

<sup>18</sup>Diosen' bozoe' chio' binlo len le' na' bene' cont beyaccho ca bene' cobe cate' gwejnilaže'cho Criston'. Na' gwlo'e lo na'cho ye'cho bene' can' yesenite' binlo len Diosen'. <sup>19</sup>Ye'cho legaque' Diosen' gwsele' Criston' cont note'teze bene' yesejnilaže' le' yesenite' binlo len Diosen', na' Diosen' bich gone' cuent

che da' xinj dan' ba gosone'. Can' cheyala' ye'cho bene' cont yesenite' binlo len Diosen'. <sup>20</sup>Criston' gwsele' chio' ca cuine' na' Diosen' chaclaže' neyoecho bene' ca cuincze Criston' chneyoede' legaque', ye'chone': "Le soa binlo len Diosen'." <sup>21</sup>Criston' bibi da' mal bene'. Perw na' Diosen' bene' cont Criston' gwxcaca'zi'e neche xtol'a'chon' cont none' chio' bene' güen da' chejnilaže'chone'.

**6** Neto' chonto' xšin Diosen' txen len le'. Da'nan' chneyoeto' le'e, le gon can' chazlaže' Diosen' cont gwlo'ele naquen to da' zaca'chgua da' beyaše' beži'ilaže'de' chio'. <sup>2</sup>Nyoj can' gwne':

Cate' bžin ža goc da' bžia' bia', cana' bzenaga' chio'.

Na' cate' bžin ža benan', cana'chen' goclena' le'.

Na' dan' nyojen ca' zejen na'a bach bžin žan' chaclen Diosen' benachen', le ža na'aža chnežjue' yela' mban toli tocanē che bene' chesejnilaže' Jesucriston'.

<sup>3</sup>Bi chonto' bite'teze da' gwžon cont bene' bi yesejnilaže'ne', le chaclaže'to' bibi gata' da' yesenelagüe bene' che xšin Diosen' da' chonto'. <sup>4</sup>Da'nan' bite'teze da' chonto' chlo'eto' chonto' xšin Diosen' ca cheyala'. Chyo chchejto' cate' chosoči chososaca' bene' neto', cate' chzaca'zi' chzaca'yaše'to', na' cate' za'ac bichle da' mal len neto'.

<sup>5</sup>Zoa cate' goseyine' neto', cate' goseyixjue' neto' ližya, na' cate' gosebeque' žaš che xtiža'ton'. Zan las bento' žin gual, na' gwlejtto' bišgal na' gwbił gwdonto'. <sup>6</sup>Na' da' chi' yichjto' chonto' xšin Diosen' can' chazlažen', bitw bi da' yela'

zto' chonto'. Chzejni'ito' bene' len yela' chejni'i che Diosen', napt'o yela' chxenlaže' len yogo'loł bene' na' chonto' güen len yogo'lole'. Chonto' con can' chzejni'i Spiritw che Diosen' neto', na' do laže'to' chaqueto' yogo'loł bene'. <sup>7</sup>Zoato' chzejni'ito' bene' diža' li, na' chonto' yogo'loł da' chonto' len yela' guac che Diosen'. Na' da' zoato' chonto' da' zej to licha, chaclenen cont soeto' tillento' da' malen' na' cont bi gwzenagto' che gwxiyen'. <sup>8</sup>Zoato' chonto' xšin Diosen' can' chazlaže' cate' chesonxen bene' neto' na' cate' chesegue'ede' neto', cate' chesene' güen cheto' na' cate' chesene' mal. Choe'to' diža' li, cate' bene' chesejle'e cheto' na' cate' bene' chesacde' chonlaže'to'. <sup>9</sup>Bał bene' bi chesejle'e chonto' da' zaca', perw yebale' zjanezde' chonto' da' zaca'. Zan las chonto' xbab gatzto', perw ne' mbanto'. Na' la'czla' yogo' da' ca' chac cheto', biņa' yesote' neto'. <sup>10</sup>Da' zan da' chac cont gacyaše'to', perw chbeto' lo' lažda'oton'. Nga'anyaše'to', perw chonto' cont bene' zan nite' mbalaz. Na' la'czla' bibi de cheto', yogo'loł bi da' de naquen cheto' da' nacto' Criston' txen.

<sup>11</sup>Le'e bene' Corinto, bačh be'lento' le'e yogo' diža' da' yo'o lo' lažda'oton', le chachgüeto' le'e. <sup>12</sup>Nži'ilaže'to' le'e, perw le'e bitec nži'ilaže'le neto'. <sup>13</sup>Chata'yoeda' le'e ca chon to bene' len xi'ine', le gaque neda' ca chacda' le'e.

**Spiritw che Diosen' zoan lo'**  
yichjlaždao' chio' chejnilaže'chone'  
<sup>14</sup>Bi cheyała' gaccho txen len bene' bi chesejnilaže' Criston'.

Še Diosen' ba none' chio' bene' güen len le', bich gac goncho txen len bene' cheson da' malen'. Chio' yo'o be'ni' che Criston' lo' yichjlažda'ochon' bi cheyała' goncho txen len bene' bi yo'o be'ni' chen' lo' yichjlažda'ogaque'. <sup>15</sup>Criston' bi chac gone' txen len Satanás dan' chnabia' da' xigüe' ca', na' ca'cze bene' chejnilaže' Criston' bi cheyała' gone' txen len bene' bi chejnilaže' Criston'. <sup>16</sup>Nezecho bi gac še' l gua'a lsaca' da' chesejnilaže' bene' lo' yodao' gan' chejnilaže'cho Diosen', na' ca'cze bi chac soa Diosen' len chio' chejnilaže'chone' še zoa bichle da' chejnilaže'cho. Chac can' gwna Diosen':

Soa' len legaque' na' talena' legaque'.  
Neda' Dios naca' ben' yesejnilaže'  
na' legaque' yesaque' yež chia'.

<sup>17</sup>Da'nan' cheyała' goncho can' gwna Xancho Diosen':

Le yechoj len bene' bi  
chesejnilaže' neda' na' bi gacle  
toze len legaque'.

Na' bi gonle da' xinjen'.  
Nachen' yebeda' soa' len le'e.

<sup>18</sup>Na' gaca' Xale, na' le'e gacle xi'ina'.

Can' ža Xancho Dios ben' nape  
la'zelagüe yela' guac xen.

**7** Le'e bene' chacda', ba nezecho can' gwna Diosen' gone' güen len chio'. Da'nan' cheyała' cuejyichjcho bich goncho bite'teze da' xinj da' gwchenen cuerp chechon' o yichjlažda'ochon'. Na' cheyała' gapcho Diosen' bala'an gwzenagcho che' tža tža na' šejch gaccho bene' güen can' chaclaže'.

**Ba bža' xbab che bene' Corinto ca'**  
<sup>2</sup>Le gaque neto'. Ne tole bibi beneto'. Ne tole bi bzejni'ito' clele,

na' ne tole bi gwziye'to'. <sup>3</sup>Gague žia' ca' cont tīla' le'e, le can' ba gwnia' cana', chacda' le'e na'a šlac mbancho na' lecz ca' gacda' le'e cate' ba gota'. <sup>4</sup>Nezda' lo' lažda'ogua' gonle can' chazlaže' Diosen', na' chbeda' choe'lena' bene' diža' ca giüenna' chonle. Ba beyacxenlaža' da' gwnezda' chonle güen, na' zoa' mbalaz la'czla' da' zan da' chac chia'.

<sup>5</sup>Cate' bežinto' Macedonian' bibi latje gota' cont yezi'laže'to' len da' gwdi gwxaca'to'. Gwnita' bene' bososašlene' neto' na' lecze bžebto' lo' yichjlažda'oto' goqueto' nac gacto'. <sup>6</sup>Na' Dios ben' cheyoe'xene' bene', beyoe'xene' neto' da' bela' Titon'. <sup>7</sup>Na' beyacxenlaže'to' gague da' bele'e na'zen' san da' bedeye' diža' chebede' can' chonlen'. Na' be'e diža' zelaže'le yedena'to' le'e da' yoble. Na' že' chegüine'le che dan' ba goquen' na' chi' yichjle gonle can' gwnian'. Nachen' leca bebedhda' gwnezda' da' ca'.

<sup>8</sup>Chacbe'eda' gocyaše'le can' gwnia' le'e carten' bzoja' le'e. Na' gwdechle betinjda' da' bena' cont gocyaše'le, perw na'a bich chetinjda' da' gwseja' carten', le šložzen' gocyaše'le. <sup>9</sup>Chbeda' na'a, le goclenen le'e cont begüine'laže'le che da' xinjen' benle na' betinjele chen, can' goclaže' Diosen'. Na' can' goquen' bi bchojen mal dan' gocyaše'len'. <sup>10</sup>Cate' ba bencho da' xinj, Diosen' chaclaže' yegüine'cho che dan' benchon' na' yetinjechon. Na' chone' yela' mban toli tocane che chio' chetinje xtoła'chon', na' leca mbalazch soacho še ba betinjecho xtoła'chon'. Perw bene' zan cate' chesegüine'laže'

bi chesyetinjde' xtoła'gaquen', nach yesebiaye'e. <sup>11</sup>Chebe Diosen' can' begüine'len', le goclenen gwzelaže'le benle can' gwna Diosen'. Goclaže'le gwlo'ele bich chonle txen len ben' ben da' xinjen', san bža'ale che da' xinjen' benen'. Bžeble yedeyena' le'e castigw na' gwzelaže'le gonle ca yebeda'. Nach be'le castigw che ben' ben da' xinjen'. Nacbia' bich bi xtoła'le de can' benina'. <sup>12</sup>Na' ca nac carten' bzoja' le'e, gague gwche' yichja' che ben' ben da' xinj na'ze, o che ben' bende' ca', san gwche' yichja' che le'e cont gacbe'ele lao Diosen' ne' chaquele neto' na' ne' chaclaže'le gonle can' che'to' le'e. <sup>13</sup>Na' na'a ba beyacxenlaže'to' da' bzenagle cheto'.

Na' lecze chebechgüeto' ca mbalaz zoa' Titon', le yogo'le benle ga bezoa' Titon' binlo len xbab da' yo'o lo' yichjlažda'ogüen'. <sup>14</sup>Goša' Titon' nezda' gonle güen. Na' bi cheto'eda' da' goša'ne' ca', le ca da' li zjanac yogo' da' chzejni'ito' le'e, lecz ca' da' li bchoj dan' gožto' Titon', na' nacbia' be'to' diža' li. <sup>15</sup>Na' ba chacchde' le'e cate' chjayze'ede' da' bzenagle che' na' da' bžeble caten' gwnezele benle da' xinjen'. <sup>16</sup>Da'n'an' chebeda' na' nezda' yeyož gonle can' chazlaže' Diosen'.

**Besezande' da' gota' chegaque' gosaclene' bene' yoble**

**8** Bene' migw, chaclaže'to' nezele can' ba goclen Diosen' to cuen to cuen bene' ca' chesedop chesežag chesonxene' Criston' to to yež gan' mbane distritw Macedonian'. <sup>2</sup>Gocchgua yela' yaše' yela' zi' chegaque', perw

Diosen' bene' cont gwnita'chgüe' mbalaz lo' yichjlažda'ogaquen' na' besyebechgüede' bosotobe' mechw xen cont gosaclene' bene' yoble. <sup>3</sup>Nezda' na' choa' diža' bosonežjochgüe' da' beseyažje bene' yoble la'czla' bibi gota' čhegaque', na' con xbab čhegaczen' gosone' ca'. <sup>4</sup>Goseneyoede' güe'to' latje yosonežjue' mechw cont yesaclene' bene' ca' chesejnilaže' Diosen'. <sup>5</sup>Na' gosonche' can' bento' xbab yesone', le zgua'tec goson cuingaque' lo' na' Xancho Criston' na' lecze goson cuine' lo' na' neto' dan' gosaclaže'chgüe' yesone' can' chazlaže' Diosen'. <sup>6</sup>Da'nan' ba gota'yoeto' Titon' yeyede' yeto gan' zoale cont gaclene' le'e yeyož gwtoble mechw dan' goclene' le'e gwzolao btoble cana'. <sup>7</sup>Güenchgua chonle chejnilaže'chguale Criston' na' choe'chguale xtižen', da' zan da' chejni'ile che Diosen', chonchguale xšinen', na' chaquechgüele neto'. Lecze le gon güenchgua na' le gwtobe da' cheseyažje bene'.

<sup>8</sup>Bi chona' byen gwnežjwle mechon', san chaclaža' gonle xbab še chaquele Diosen' na' še chaque lježle do laže'le can' goson bene' Macedonian' da' chesacde' Diosen' na' lježgaque'. <sup>9</sup>Nezele leca nži'ilaže' Xancho Jesucriston' chio'. Da' chacde' chio' bcua'ane' yogo'lol da' šagüe' da' de che' gan' zoe' len Diosen' na' bide' golje' bene' yaše' yežlio nga, bedeyene' cont yogo' dan' de che' gaquen čhecho naccho txen len le'.

<sup>10</sup>Nachen' gwzejni'ida' can' chacda' naquen güen gonle. Godgüiz goclaže'le gaclenle bene' yaše' ca' na'

gwzolaole btoble mechon' do yichj do laže'le. <sup>11</sup>Na' chacda' güen yeyož gwtoblen na'a do yichj do laže'le can' gwzolaole, na' gwnežjwle con ca zelao saque'le. <sup>12</sup>Note'tezcho še do laže'cho chaclaže'cho gwnežjwcho bi da' gwnežjwcho, Diosen' yebede' la'czla' late'ze da' de da' gwnežjwchone'. Bi chnabe' gwnežjwchone' da' bi de čhecho.

<sup>13</sup>Bi žia' gonle cont bich bi yega'an chele na' gata' che bene' yoble. <sup>14</sup>Con chaclaža' gata' da' chyažje yogo'le. Šlac na'a de che le'e, chyała' gaclenle bene' ca' cheseyažjde'. ĆChixe še gwžin ža cate' gata' čhegaque' na' le'e chyažjele? Cana'chen' yesaclene' le'e cont gata' da' chyažje yogo'le. <sup>15</sup>Nach gac can' nyoj Xtiža' Diosen' žan: "Bene' botobe' da' z'cha'o, bitw nacho becho'onen che', na' bene' botobe' late'ze, gota'cze da' byažjde'."

#### Titon' na' bene' lježe' ca'

<sup>16</sup>Choxcen Diosen' bene' cont Titon' zelaže'chgüe' gaclene' le'e con can' zelaža' neda'. <sup>17</sup>Na' cate' goša'ne' yedene'e le'e da' yoble cont gaclenche' le'e, bebede', le to gualaze' bene' xbab yeyede' gaclenche' le'e.

<sup>18</sup>Na' chsel'a'to' yeto bene' lježcho len Titon'. Na' to cuen to cuen bene' ca' chesedop chesežag chesonxen Jesucriston' cheso'e diža' che benga chsel'a'to', chesene' binlo chyixjue'ede' diža' güen che Jesucriston'. <sup>19</sup>Nachen' lecze gosebeje' le' cont sa'lene' neda' cate' ša'a gan' že' bene' lježcho ca' šjasana' mechw dan' chtobcho. Na' gwnežjwcho mechon' cont

gacxen Xancho Jesucriston' na' cont gwlo'ele chbele chaclen bene' lježle. <sup>20-21</sup>Yo'o yichjto' gonto' da' nac güen lao Xanchon' na' lao benachen', le mechw xenna', na' bi chaclaže'to' yesene' chonto' clele len len.

<sup>22</sup>Na' lecze chsela'to' yeto bene' lježcho len legaque'. Zan nia' ba ble'eto' chone' xšin Diosen' do yichj do laže' na' na' leca žan yide' gan' zoalen' da' nezde' zelaže'chgualē gonle can' chazlaže' Diosen'. <sup>23</sup>Na' ca nac Titon', chone' xšin Diosen' txen len neda' cont chaclento' le'e. Na' bene' ca' yechope, zjanite' chesone' cont Criston' chacxene', na' bene' ca' chesedop chesežag chesonxene' Jesucriston' gosebeje' legaque' na' chesesele' legaque'. <sup>24</sup>Da'nan' chnia' le gon güen len legaque' cont bene' ca' chesonxene' Criston' to to yež yesenezde' chaquēle legaque', na' le gwlo'e chonle güen can' gwnato' cate' be'to' diža' güen chele.

### Bosotobe' mechon'

**9** Bi chonen byen gwzoja' le'e nia' cheyla' gwnežjwle mechw da' gaclen bene' chesejnilaže' Criston' ga yoble. <sup>2</sup>Nezda' chaclaže'le gaclenle legaque'. Na' ba be'lēna' bene' Macedonia ca' diža' cont yesenezde' le'e zoale distritw Acaya chaclaže'le gaclenle bene' yaše' ca' na' gwzolaole btoble mechon' godgüiz. Da'nan' bene' ca' že' zan yež distritw Macedonia lecze ba chesone' ca'. <sup>3</sup>Perw bia'cze chsela' bene' ca' len Titon' cont diža' dan' ba bia' chele catec güenna' chonle bi gaquen ca da' güenlaže'. Chaclaža' yeyož gwtoble mechua'

cont ba den cate' yida'. <sup>4</sup>Le še sa'len no bene' Macedonia neda' cate' yedēna'a le'e da' yoble, na' yeto'eda' chele še bina' gata' mechua', na' lecze le'e yeto'ele da' bi benle can' gwnia' gonle. <sup>5</sup>Da'nan' godca' güen yesebialao bene' lježcho ca' šone yeside' gan' zoalen' cont yesaclene' le'e yeyož gwtoble mechw dan' gwnale gwnežjwle. Nachen' gwnežjwlen do yichj do laže'le, gague gwnežjwche'elen.

<sup>6</sup>Le gon xbab can' chesene': "Bene' chaz late'ze, late'ze chelape', na' bene' chaz da' zcha'o, da' zcha'o chelape'." <sup>7</sup>Da'nan' to tole cheyla' gwnežjwle gaca'te' da' chebele gwnežjwle, na' bi gwnežjwche'elen, san gwnežjwlen do laže'le, le chebe Diosen' bene' zoa mbalaz chzande' bi da' chnežjue'. <sup>8</sup>Diosen' nape' yela' guac cont chaclenchgüe' chio' len bite'teze da' chyažjecho. Na' chac chone' cont chata' yogo'lol da' chyažjecho bate'teze neche gac gwnežjwcho da' chyažje bene' yoble na' goncho bichle da' güen. <sup>9</sup>Quinga nyoj Xtiža' Diosen' che bene' chzande' da' de che', žan:

Ba bnežjue' da' beseyaže' zan bene' yaše'.

Na' bi ganlaže' Diosen' da' güen dan' benen'.

<sup>10</sup>Diosen' chone' cont chata' no xoa' bin na' bichle da' chazcho; chone' cont chata' da' che'ej da' chagwcho. Lecze le' gone' cont gata' bichle da' chyažjele na' cont cha'o xenchen, na' gone' cont šejchle gonchle da' güen. <sup>11</sup>Bite'teze da' chac chele, Diosen' gone' cont gata' da' zcha'o da' gwnežjwle bene' yoble. Nach cate' šjanežjwto' bene' yaše' ca' dan'



ba btohle, yeso'e yela' choxc̄len che Diosen'. <sup>12</sup>Le da' gwnežjwle da' cheseyažje bene' chesejnilaže' Jesucriston' ga yoble, bene' zan yeso'e yela' choxc̄len che Diosen'. <sup>13</sup>Na' cate' bene' yaše' ca' yesezi'e mechon' chtoble, gwlo'en chzenagle diža' güen che Criston' do yichj do laže'le. Nach legaque' yeso'e yela' choxc̄len che Diosen' da' gwseļa'le da' zcha'o mechw da' gaclenen legaque'. Lecze yeso'e yela' choxc̄len che' da' chaclenle yogo' bene' chesejnilaže' Criston'. <sup>14</sup>Na' do chesacde' le'e yosol güiže' Diosen' yesenabe' gaclenche' le'e, le nacbja' ba nži'ilaže'chgua Diosen' le'e. <sup>15</sup>Choxc̄len Diosen' gwseļa' Xancho Jesucriston' len chio'. Bibi diža' de da' nacho catec zaca' goclenna' da' bene' len chio' gwseļa'ne'.

**Diosen' gwleje' Pablon'  
cont bzejni'ide' bene'**

**10** Chesena baļ bene' chžeba' tiļa' le'e cate' zoa' len le'e na' con cate'ze zoa' zito' chzoja' cart chdiļa' le'e. Bi naquen ca', san chņeyoeda' le'e diža' šagüe' ca' Criston' gwņeyoede' bene' diža' šagüe' da' goque' bene' xenlaže' na' bene' šagüe'. <sup>2</sup>Chņeyoeda' le'e gonle da' güen cont bi tiļa' le'e caten' yedetiļa' bene' chesacde' chona' con can' žan chia'. <sup>3</sup>Na' la'czļa' zoato' lo yežlion' na' nacto' benačze, cate' chdillento' da' malen' bi chdillenton' ca' benačze. <sup>4</sup>San Diosen' nonē' neto' yela' guac cont choeto' chlej chšoštjo' yogo' da' chon gwxiyen, le bi soeto' tillenton' to gualazto'. <sup>5</sup>Can' chac, Diosen' chaclene' neto' chonto' cont chosozexjwyichj bene'

chosozenague' che Criston' na' chesebejyichje' xbab mal čhegaquen' na' bichle da' cheseza'laže' da' chžonen yesombi'e Diosen'. <sup>6</sup>Na' cate' yeyož gata'bia' še yogo'le gwzenagle che Diosen', cana' ngüiato' gonto' castigw che nole bi chzenagle che'.

<sup>7</sup>Le gon xbab che dan' chle'ele chonto'. Še nole chaquele nacle txen len Criston', le yeyon xbab lecze neto' nacto' txen len le'. <sup>8</sup>Na' bi yeto'eda' güe'cha' diža' yelate' can' ba bian', le chebeda' gwseļa' Xancho Criston' neto' cont bzejni'ito' le'e diža' da' goclenen le'e, gague da' bžiyain' le'e. <sup>9</sup>Bi chaclaža' no gacde' še chzoja' cart quinga cont gwšeba' le'e. <sup>10</sup>Bene' ca' chesenelagüe' chia' chesene' cate' zoa' zito' chzoja' cart znia ca' che no bene' gwnabia', na' chesene' bi chac bi gona' cate' zoa' len le'e na' bi choa' diža' da' zaca' gwzenagle. <sup>11</sup>Bene' ca' chesenelagüe' chia' cheyaļa' yesenezde' can' žato' le'e cart da' chzojto' le'e cate' zoato' zito', lecz ca' gonto' cate' yedesoato' len le'e.

<sup>12</sup>Bi chaclaže'to' gonlebeto' bene' ca' chesonxen cuingaque'. Chesacde' güenchgua chesone', le to toe' con chesena' lježe' cont chesene' chesonche' güenč clcl ca' cheson bene' lježe', na' bibi zejen chesone' ca'. <sup>13</sup>Neto' bi gonxen cuinto'. Con güe'to' diža' che da' ca' goclen Diosen' neto' bento' gan' ba gwseļa' neto', le lecze gan' zoalen' ba gwseļa' neto'. <sup>14</sup>Da'n'an' bi chonlaže'to' cate' choe'to' diža' che da' ba bento' gan' zoalen', le nacto' bene' nechw bzejni'ito' le'e diža' güen che Criston'. Šaca' bi bento'

žin gan' zoalen' chonlaže'to' choe'to' dižan' ca', perw benton'. <sup>15</sup>Na' bi güe'to' diža' che da' ben bene' yoble, bi nato' neto' benton'. Zoato' lez šejnilaže'chle Criston' cont gaclenle neto' gonchto' xšin Diosen' gan' zoalen'. <sup>16</sup>Na' chaclaže'to' chixjue'eto' diža' güen che Criston' ga naquen zito'ch ca gan' zoale na'. Chaclaže'to' chixjue'eton' ga nono na' chixjue'eden' cont güe'to' diža' che xšin Diosen' da' ba bento' na' bi güe'to' che da' ba ben bene' yoble.

<sup>17</sup>Bi cheyała' gonxen cuincho, san cheyała' gonxencho Xancho Dios. <sup>18</sup>La'czła' še to bene' ne' chone' güen, bi naquen da' šejle'cho. Perw še Xancho Diosen' ne' chone' güen nachen' nezecho da' li chone' güen.

**Pablon' na' bene' ca' cheson  
cuingaque' postlw**

**11** Chaclaža' gwzenagle yeto chop diža' güen da' gua' che cuina' la'czła' še chaquele naquen diža' da' bibi zaca'. Le gwzenag chia'. <sup>2</sup>Neda' bzejni'ida' le'e xtiža' Criston' da' nechw cont gwyejnilaže'lene', na' Diosen' chone' cont chacda' le'e do yichj do laža'. Na' chaclaža' gaquele toze Criston' cont zaca'le gona' le'e lo ne'e, gacle ca to no'ol güego', no'ole napši'i cuine' da' chacde' toz bene' byo bene' si' le'. <sup>3</sup>Chxožda' yeseziye' bene' le'e cont bich šejnilaže'le Criston' do laže'le na' bich gaquele toz le'. Can' gwziye' bejen' da' no'ole nechon', no'olen' gože' Eva, da' nacba' be xigüe'. <sup>4</sup>Cate' chesela'ac bene' gan' zoale na' chosozejni'ide' le'e che Jesús'en' nža'le can' ba bzejni'ito' le'e, o chosozejni'ide' nža'le che

Spiritw che Diosen' o che diža' güen chen', la' chzenagtele chegaque'. Da'nan' chxožda' yeseziye'e le'e. <sup>5</sup>Ba nonle bene' ca' ca postlw chele na' chonxenle legaque'. Na' neda' zaca'cha' ca legaque'. <sup>6</sup>La'czła' bi choa' diža' xdan ca chesoe' legaque', ba ble'eczele yogo' dan' ba bento' na' nezczzele chejni'ito' xtiža' Diosen' binlo.

<sup>7</sup>¿Chaquele malen' bena' bibi laxjua' gwxia' cate' be'lena' le'e diža' güen che Diosen'? Ben cuina' ca to bene' bibi zaca' da' bibi laxjua' gwxia' cont bena' ga zoachle mbalaz. <sup>8</sup>Gwxia' mechw da' goson bene' ca' chesedop chesežag chesonxene' Criston' ga yoble cont be'lena' le'e xtiža' Diosen'. <sup>9</sup>Na' cate' gwzoa' len le'e, la'czła' bi gota' da' byažjda', bi gw nabdan' le'e. Bene' ca' zeya'ac Macedonia gosone' da' byažjda' cont bi benda' le'e zed, na' bate'teze gwbatech gonda' le'e zed gonle da' chyažj chchinda'. <sup>10</sup>Chebeda' chac chnia' bibi gan' chona' chyixjue'eda' xtiža' Diosen' len le'e o len bene' že' yež yoble ga mbane distritw Acayan'. Na' can' nezda' chaclen Criston' neda' choa' diža' li, can' nezda' gwbat gonda' le'e zed cont gonle da' chyažj chchinda'. <sup>11</sup>Perw gague da' bi chacda' le'e bi gonda' le'e zed. Diosen' nezde' chacda' le'e.

<sup>12</sup>Na' gonchcza' can' chona' bibi laxjua' chzia' cont bi žel bi yosode'e bene' ca' yesene' toz can' chesone' len da' chon neto', le can' chesaclaže' yesene'. <sup>13</sup>Legaque' bi zjanaque' dogualje postlw. Con chosozejni'ide' diža' güenlaže' na' chesonlede' le'e cont gaquele gwseła'

Criston' legaue'. <sup>14</sup>Bi yebanele can' chesonen', le ca'czen' chziye' Satanásen' chio', cheyon cuinen ca to angl bene' chactitchgua cont gaquecho naquen to angl güen bene' za' gan' zoa Diosen'. <sup>15</sup>Na' ca'czen' cheson bene' ca' chosozenag chen, chesonlede' le'e cont gaquele chosozejni'ide' diža' güen. Perw žin ža yezezaca'zi'e toli tocaņe yela' güen da' mal chegaquen'.

**Da' ca' gwdi gwxcaca' Pablo  
da' naue' postlw**

<sup>16</sup>Da' yoble žia' le'e, bi gaquele chona' xbab da' bibi zaca' can' chon bene' bi chejni'i. Perw la'czla' še chaquele chona' xbab da' bibi zaca', le gwzenag chia' šlac gua' to chope diža' güen che cuina'. <sup>17</sup>Gua' diža' güen che cuina' la'czla' nezda' Xancho Criston' bi be'e diža' güen che cuine'. Guan' ca bene' chon xbab da' bibi zaca', bene' bi chejni'i. <sup>18</sup>Bene' zan cheso'e diža' güen che cuingaque' che bi da' ba gosone' o bi da' ba goc chegaque', na' ca'czen' gona' neda'. <sup>19</sup>Ba non cuinle bene' sina' na' da'na'ljan' chbele chzenagle che bene' cheson xbab da' bibi zaca'. <sup>20</sup>Chzenagle che bene' ca' ba gosone' le'e ca xmosgaque'. Choe'le latje cheseziye'e le'e cont chnežjwle legaue' bi da' de chele na' chontezle bi da' chesene'. Chesonxen cuingaque' na' chesebaže' le'e cont chzenagle chegaque', na' bia'cze choe'le latje chosozejni'ide' le'e. <sup>21</sup>Chonljale xbab bžebto' le'e dan' bi beneto' le'e ca'.

Na' da' yoble gua' diža' ca bene' chon xbab da' bibi zaca', le bite'teze diža' güen da' cheyaxje bene' güe'e

che cuine' note'teze naue', lecze cheyaxjda' gua' dižan' nac ca' che cuina'. <sup>22</sup>Chesonxen cuingaque' da' gosalje' gan' že' bene' chesaque' diža' hebreo. Nezczele lecze goljelena' bene' chesaque' diža' hebreo. Na' chesonxen cuingaque' da' zjanaque' bene' Israel. Nezczele lecze bene' Israel neda'. Na' chesonxen cuingaque' da' gosalje' lo diaža che da' Abraham. Na' nezeczele lecze diaža che da' Abrahanna' neda'. <sup>23</sup>Chesene' Criston' gwsele' legaue' cont yesone' xšine'. Nezczele Criston' gwsele' neda' na' ba bencha' xšinen' ca legaue'. Si'xenle dan' choa' diža' ca bene' chon xbab da' bibi zaca', ca bene' bi chejni'i. Ba bencha' žin gual ca legaue', zan ni'ach ba goseyin justis ca' neda' da' choa' xtiža' Diosen' clel ca da' ba goc che legaue'. Na' zan ni'ach bene' ca' chesegue'ede' neda' ba goseyixjue' neda' ližya clel ca dan' ba goc che bene' ca' chosozejni'ide' le'e. Na' zan ni'a ba bela' cbi gota'. <sup>24</sup>Gayo' ni'a goseyin bene' Israel gualaž chia' neda' tašjw de yid togaljechoa ni'a güeje. <sup>25</sup>Šone ni'a bene' justis ca' goseyine' neda' xis. Na' tni'a bosotacue' neda' yej yelate'ze ca gosote' neda'. Na' cate' zya'a yež zito' to lo' barcw, šon ni'a bočinj nisaon' barcon', na' canē bžina' yo biž. Na' lo šon ni'an beyinjenna', tni'a gwdeļa' nisaon' tža tyel. <sup>26</sup>Zan ni'a ba gwy'a yež zito' jatixjue'eda' xtiža' Criston'. Zan ni'a canē goc gwdia' yegw ca'. Zoa cate' goca' lo na' bene' gwban. Zoa cate' bene' Israel gualaž chia' gosaclaže' yesote' neda', na' zoa cate' bene' bi zjanaque' bene' Israel gosaclaže'

yesote' neda'. Na' zan n̄i'a do lo ciuda, do ga nono bene' že' na' do lo nisaon' yelate'ze bi gota'. Na' yogo' že' chaš bene' chesonlaže' chesene' zjanaque' chio' txen na' chxožda' yosožiaye'e xšin Diosen' dan' chonan'. <sup>27</sup>Zan n̄i'a ba bena' xšin Diosen' benten ga jaŋaque'chgüeda', na' zan n̄i'a bchejda' bi gwtasa'. Nombi'a yela' chbił chdon, le zan n̄i'a bi gota' da' ye'ej gagua'. Na' lecze zan n̄i'a beyaga' bi gota' xa' da' byažjda'.

<sup>28</sup>Da' zanch da' ba gwdi gwxaca' da' bi choa' diža', na' lecze yogo' že' chi'chgua yichja' nac chac che le'e chdop chžagle chonxenle Criston' to to yež. <sup>29</sup>Note'tezle cate' bi zoachachle len Criston' o bi chzoele gonle can' chazlaže' Diosen', chacyaše'chgüeda' cacze n̄acho nedan' chona' ca'. Na' lecze cate' bene' chesego'oyele' le'e cont chonle da' mal, leca chacda' lo' yichjlažda'ogua' na' chža'a dan' ba chonle can' že'na'. <sup>30</sup>Na' da' chonen byen güe'cha' diža' che cuina', nach gua' diža' che da' ca' chlo'en bi chac bi gona' to gualaza'. <sup>31</sup>Dios bene' cheyała' gonxencho toli tocane neзде' choa' diža' li. Len' naque' Xa Xancho Jesucriston' na' chonxen Jesucriston' le'. <sup>32</sup>Na' yeto da' goc chia', cate' gwzoa' ciuda Damasco, bene' goc gobernador šlac gwnabia' rey Aretas bnite' bene' gosape' cho'a puert da' zoa le'e ze'e da' nyechj ciudadan' cont yesezene' neda' cate' yechoja'. <sup>33</sup>Perw bene' lježcho ca' gosegüe'e neda' to lo' žome xen na' besyeletje' neda' to cho'a ventan le'e ze'e da' nyechje ciudadan' cont bi gosezene' neda'.

### Da' ble'edagüe' Pablon'

**12** Bi chazlaža' güe'cha' diža' güen che cuina', san gua' diža' che da' ca' da' ba ble'edagüe'da' na' da' ca' ba bzejni'i Xancho Criston' neda'. <sup>2-3</sup>Ba chejnilaža' Criston' cate' goc chia' quinga ba goc žta' iz. Diosen' bene' neche gwy'a yaban' gan' zoen'. Bi nezda' še gwy'a len cuerp chia', Dios nan' neзде'. <sup>4</sup>Con nezda' bžina' gan' zoa Diosen' na' benda' bene' ca' že' na' cheso'e diža' zaca' da' bi chac n̄ia', diža' zaca' da' bi de latje güe' benačh yežlio nga. <sup>5</sup>Šaca' žan gonxen cuina', yejni'a gonxen cuina' che da' ca' ba blo'e Diosen' neda', perw bi žan gonxen cuina' che bi da' ba bena' neda'. Con gua' diža' che da' ca' ba goc chia' da' chosolo'en bi chac bi gona' to gualaza'. <sup>6</sup>Šaca' žan gonxen cuina', da' zan da' güen ba bena' da' gac gua' diža' chen, diža' da' naquen da' li, gague da' güenlaže'. Perw bi gua' diža' che bi da' güen da' ba bena', le bi chaclaža' no gonxench neda' ca cheyała'. Yejni'a yesone' xbab še zaca' con ca nac da' chesele'ede' chona' na' can' chesende' choa' xtiža' Diosen'.

<sup>7</sup>Cont bi ga'laža' che da' ble'edagüe'da' na' da' ba bzejni'i Xancho Criston' neda', Diosen' be'e latje chžaglagua' len to da' zoa cha'an ca cha'a yeše' lo cuerp chia' nga, na' leca chaclaže' Satanásen' gacda' tole da' chac chia' ca'. <sup>8</sup>Šone n̄i'a ba gwnabda' Xancho Criston' yeque'e dan' chžaglagua' len cuerp chian'. <sup>9</sup>Nach Xancho' gože' neda': "Bi yeca'a dan' chžaglaguon', san soacza' gaclena' le'. Lezen da'

chyažjdo. Cate' bi chac bi gono', canan' gacbe'edo' chaclena' le' cont gono' bi da' cheyała' gono'." Da'nan' chbeda' güe'cha' diža' che da' ca' chosolo'en bi chac bi gona' še Criston' bi chaclene' neda' len yela' guac chen'. <sup>10</sup>Na' da'nan', cont gacxen Criston', chbeda' bite'teze da' chac chia' da' chlo'en chyažjda' gaclene' neda'. Chbeda' cate' chesezi'diža' bene' neda', cate' bi de da' chyažjda', cate' bene' chosolagšibe' neda', na' cate' bichle da' chžaglagua', le cate' chac chia' ca', cana'ch chaclench Criston' neda' len yela' guac chen'.

**Pablon' gwche' yichje' che bene' chesonxen Criston' Corinto**

<sup>11</sup>Ba bia' diža' benxen cuina' ca' chon bene' bi chejni'i. Le'e cheyała' güe'le diža' chia' naca' bene' zaca', perw bi chonle ca'. Da'nan' benen byen bia' dižan' ca'. Da' juisyw chonxenle bene' ca' ba nonele ca' postlw chele. Na' neda' ne late'ze bi chyažjen cont gaca' bene' zaca' ca' legaque'. Žia' ca' la'czła' chacbe'eda' bibi zaca' šaca' bi zoa Diosen' len neda'. <sup>12</sup>Ba ble'ele naca' dogualje postlw, le cate' gwzoa' len le'e, Diosen' blo'e zoa yela' guac chen' len neda' na' bene' cont goc bichle da' zaca' yesyebane bene', na' goclene' neda' bchejda' yogo' da' goc chia' šlac bena' xšinen' gan' zoenen'. <sup>13</sup>Toze ca' güenna' bena' len le'e na' can' bena' len bene' yež yoble ga chesedop chesežague' chesonxene' Criston', con da' bi bia' latje gonle da' chyažj chchinda'. Le si'xen da' malen' bena' bi benda' le'e zed.

<sup>14</sup>Chaclaža' yida' deña'a le'e da' gwyone ni'a. Na' bi gonda' le'e

zed cate' yida'. Bi chaclaža' gonle neda' bi da' de chele, con chaclaža' gwzenagle chia' na' gon cuinle lo na' Criston'. Ca no bidao' bi cheyała' gwnežjwbe' bi da' chyažje xaxna'be', san xaxna'be' cheyała' gwnežjue' da' chyažje lebe', ca'czen' naquen len le'e na' len neda'. <sup>15</sup>Chbeda' chzanda' bite'teze da' de chia' na' lente cuina' cont gaclencha' le'e, la'czła' šlac neda' chaquechda' le'e, le'e bi chaquetecle neda'.

<sup>16</sup>Na' balle, la'czła' chacbe'ele bi benda' le'e zed len da' byažj bchinda', žale gwziya'a le'e. <sup>17</sup>¿Bi nezele bi gwziya'a le'e cate' gwseła' note'teze bene' ca' ba gwseła' gan' zoale na'? <sup>18</sup>Gwneyoeda' Titon' bedene'e le'e na' gwseła' yeto bene' lježcho len le'. ¿Bi nezele bi gwziye' Titon' le'e? Le' len neda', toz can' chonto', na' toz can' chaclaže'to' gaciento' le'e.

<sup>19</sup>¿Chaquele ba bia' diža' quinga cont nezele bibi da' xinj chonto'? Gague da'nan' ba bia' dižan' ca'. Ba gwnia' yogo' da' ba gwnia' cont chaclena' le'e gonchle xbab can' chazlaže' Diosen', le chacda' le'e. Diosen' nezde' yogo' da' ba gwnia' le'e, na' naca' Criston' txen chzejni'ida' le'e. <sup>20</sup>Con chžeba' cate' yedena'a le'e še gata'bia' bi chonle güen can' chaclaža' gonlen', na' še ba chonle da' mal, bi šolaže'le can' gona' len le'e. Chacda' chixe še chdile chšašle na' chgue'e lježle o chloc lježle o chazlaže'le gac güen che cuinze. Chixe še chne che lježle, še chchitjle diža', še cha'laže'le o še de da' zed chele. <sup>21</sup>Chžeba' cate' yedyena'a le'e še gata'bia' zanle biña' cuejyichje da'

malen' ba benle, na' bina' yetinjele che da' yela' zto' chonle, che da' nzoa no xtole, o da' chata'lenle no bene' bi nac bene' chele o no'ole bi nac xo'olle. Na' Diosen' gone' yeto'eda' chele na' yegüine'da' chele še naquen ca'.

**Pablon' že' gone' castigw  
che no chon da' malen'**

**13** Na'a gac šone nī'a yedena'a le'e. Cate' gagwcho xya che note'teze bene', guata'bia' nape' dola' še yotilen can' chesena chope o šone bene' cheso'e diža' can' goquen'.<sup>2</sup> Goša' le'e šlac gwzoo' len le'e caten' bedena'a le'e da' gwchope, bi yeyaše'da' bene' ca' goson da' xinjen' še bi yesyetinjde', na' gona' castigw che yogo' nochle chon da' xinjen'. Na' da' yoble žia' ca' na'a šlac zoa' zito' len le'e.<sup>3</sup> Chaclaže'le gona' to da' gwlo'en chne Criston' len neda'. Da'nan' gona' castigw che nole chon da' xinjen'. Na' Criston' gwlo'e yela' guac xen che' cont saca'zi'le che da' xinj da' nonle.<sup>4</sup> Na' la'czla' Criston' ben cuine' ca' bene' bibi chac gon cate' gosote'ne' le'e yag cruzen', zoe' na'a da' nape' yela' guac xen che Diosen'. Na' lecze neto' nacto' txen len Criston' ben cuinto' ca' bene' bibi chac gon, perw gwlo'eto' le'e zoa yela' guac che Diosen' len neto'.<sup>5</sup> Le gonyane' xbab chelen' še da' li chejnilaže'le Jesucriston'. Nach gacbe'ele zoe' len le'e še da' li chejnilaže'lene'.<sup>6</sup> Na' zoa' lez lecze gacbe'ele zoe' len neto' na' nacto' postlw che'.<sup>7</sup> Choļ güižto'ne' chele chnabto' bich bi da' mal

gonle, gague cont gacbe'ele zoa Jesucriston' len neto', san cont soale gonle da' güen. Le toze ca' nonen še chesacbe'e bene' zoe' len neto' o še bi chesacbe'ede'.<sup>8</sup> Na' bibi castigw gonto' le'e še chzenagle diža' li che Jesucriston', con gacento' le'e, še ca'.<sup>9</sup> Yebetoo' gonto' ca' bene' bibi yela' chnabia' nape', con še le'e ba chnabia'le chonle can' cheyala' gonle. Na' zoaczt' choļ güižto' Diosen' chnabto' gaclene' le'e gonle doxen can' cheyala' gonlen'.<sup>10</sup> Ba bzoja' da' quinga za' yedena'a le'e cont yetinjele xto'la'len' na' bi yažjen gona' znia len le'e. Diosen' gwsele' neda' naca' postlw che' na' bene' neda' yela' chnabia' cont gaclena' le'e, gague cont gwžiaya'a le'e.

<sup>11</sup> Bene' migw chia', chnaba' gacšca güen chele. Le cuec yichjle gonyane'le yogo' da' chaclaže' Diosen' gonle. Le gon chach laže'le len bi da' chac chele. Le gac toze len ljež le'e chejnilaže'le Criston', na' le soa binlo tole yetole. Diosen' chacde' chio' na' chone' cont chzoa chbezcho binlo len xbab da' yo'o lo' yichjlažda'ochon', nachen' chnaba' soašcacze' len le'e.<sup>12</sup> Le gwnopa' na' lježle gwguap lježle tiox cate' chežagle txen, cont gacia' chaque lježle tole yetole.<sup>13</sup> Yogo' bene' ca' chesejnilaže' Criston' do nga chosoguape' le'e tiox.

<sup>14</sup> Na' chnaba' Xancho Jesucriston' gaclenšcacze' le'e. Na' Diosen' gonšque' gacbe'echle chacde' le'e, na' gonšca Spiritw che Diosen' cont xbab chele gaquen toze len xbab chen. Da' na'zen' chzoja'.

# CART DAN' BZOJ POSTLW SAN PABLO CHE BENE' GALACIA CA'

**Pablon' chguape' tiox bene' ca'  
chesonxene' Criston' Galacia**

**1** <sup>1-2</sup>Neda' Pablo chzoja' le'e  
chdop chžagle chonxenle  
Criston' yež ca' zjachi' distritw  
che Galacia. Neda' len yogo' bene'  
lježcho ca' nite' nga chguapto' le'e  
tiox. Gague benach gwlej neda' cont  
gona' xšine', san Jesucriston' txen  
len Xe' Diosen' ben' bosban le' ladjo  
bene' guat ca', legaque' gosebeje'  
neda' cont naca' postlw chegaque'.  
<sup>3</sup>Na' chnaba' lao Xacho Diosen' len  
Xancho Jesucriston' yesaclene' le'e  
na' yesone' cont soa cuezle binlo  
len xbab da' yo'o lo' yichjlažda'ole.  
<sup>4</sup>Jesucristnan' bnežjw cuine' neche  
xtola'chon' cont bich goncho txen  
len da' malen' chac lo' yežlio nga.  
Bene' ca' le can' gwyazlaže' Xacho  
Diosen' <sup>5</sup>ben' cheyala' gonxencho  
toli tocanē. Na' ca'ščacze goncho.

**Bich bi yeto diža' de da' gac  
nacho diža' güen che Diosen'**

<sup>6</sup>Diosen' gwleje' le'e cont Xi'ine'  
Criston' gaclene' le'e. Na' chebanda'  
can' chonlen' bedao'nez ba  
chbejyichjle Diosen' na' chzenagle  
che yeto da' chaquele naquen diža'

güen. <sup>7</sup>Perw bi naquen diža' güen.  
Con nita' bene' chososed chosolo'ede'  
xtiža' Diosen' clele na' chesone' cont  
chacžejlaže'le che diža' güen che  
Criston' dan' bsed blo'eto' le'e. <sup>8</sup>Šaca'  
neto' chixjue'eto' yeto da' bi naquen  
diža' güen che Criston', chnabda'  
Diosen' gone' cont cuiayi'to'. Na'  
la'czla' to angl bene' za' gan' zoa  
Diosen' chixjue'ede' yeto da' bi  
naquen diža' güen che Criston',  
lecze chnaba' gon Diosen' cont  
cuiaye'e. <sup>9</sup>Can' ba gwnian', lecze  
can' žia' da' yoble na'a: še note'teze  
bene' ba chyixjue'ede' xtiža' Criston'  
nža'le can' ba nsedlen, chnaba' gon  
Diosen' cont cuiaye'e toli tocanē.

<sup>10</sup>Chnia' ca' cont na Diosen' chona'  
güen, gague cont yesena benachen'  
chona' güen, na' gague cont yebe  
benachen' neda'. Šaca' chi' yichja'  
nacle gona' cont yebe benachen' can'  
chonan', bi chzenaga' che Criston'  
šaca'.

**Diosen' gwleje' Pablon' na'  
gwsele'ne' cont goque' postlw**

<sup>11</sup>Bene' migw, che'nda' nezele diža'  
güen che Criston' dan' ba be'lena'  
le'e bitw naquen xbab che benach.

<sup>12</sup>Gague benachen' bzenden' neda',



na' nēca nācho benāchen' bene' cont gwejni'idan', san cuin Jesucriston' bzejni'ide' neda' diža' güen chen'.

<sup>13</sup>Ba beneczele diža' can' ba bena' cate' ne' na'ogua' costumbr che neto' bene' Israel. Lēca bchi bsaca' bene' ca' chesonxene' Criston', goclaža' yesyēnite'. <sup>14</sup>Na' gwche'chgua yichja' che costumbr dan' gosa'o da' xozxta'ogua' ca' na' bsedchan' clel ca zan bene' l gualja' bene' lecze zjanac bene' Israel. <sup>15</sup>Perw cate' bina' galjtia', Diosen' bzie' bia' gona' xšinen'. Gwleje' neda' cont gonan', le nži'ide' neda'. Na' cate' bžin ža ben Diosen' can' gwchoglagüen' gone', <sup>16</sup>nach bene' cont bembia' Xi'ine' Jesús. Na' bzejni'ide' neda' cont chyixjue'eda' xtiža' Jesúsēn' len bene' ca' bi zjanac bene' Israel. Na' cate' ben Diosen' ca' len neda' notno gwnabda' gwzejni'ide' neda'. <sup>17</sup>Na' nēca gwy'a'a Jerusalēnna' cont postlw ca' yososed yosolo'ede' neda', bene' ca' gwlej Diosen' cont chesone' xšine' cate' neda' za' gonan'. San la' gwy'atia' gan' nzi' Arabia, na' gwdechle beza' Arabia bežina' Damasco.

<sup>18</sup>Na' gocch šon' iz gwy'a'a Damascon', nach beza' beya'a Jerusalēnna' cont bembia' Pedron' na' jaso'a' len le' žta'gwbiž. <sup>19</sup>Perw bitw bšaga' yezica'chle postlw ca' san toze Jacobo bene' biše' Xanchon'. <sup>20</sup>Nezeczē Diosen' da' nga chzoja' naquen diža' li.

<sup>21</sup>Nach gwy'a'a yež ca' zjachi' gan' nzi' Siria na' Cilicia. <sup>22</sup>Na' bene' ca' chesedop chesežag chesonxene' Criston' yež ca' zjachi' distritw Judean', legaque' bina' yesombie' neda' ca' hora'. <sup>23</sup>Con ba gosende'

chesena bene' chia': "Ben' bchi bsaque' neto' bich chone' ca'. Ba chyixjue'ede' cheya'la' šejnilaže'cho Criston', la'czla' cana' goclaže' gone' cont nono yesejnilaže' Criston'."

<sup>24</sup>Na' bene' Judea ca' chesejnilaže' Criston' gosonxene' Diosen' cate' gosende' can' chonan'.

#### Yezica'chle postlw gosazlaže' can' chon Pablon'

**2** Na' gocch žta' iz gwy'a'a Jerusalēnna' nach da' yoble gwy'a'a len Bernabēn', na' lecze gwchi'a' Titon'. <sup>2</sup>Diosen' bzejni'ide' neda' cheya'la' ša'a, na' da'nān' gwy'a'a. Na' btoba' bene' ca' zjanaque' blao len bene' ca' chesonxen Criston' Jerusalēnna' na' legače' bzejni'ida' bin' chyixjue'eda' len bene' ca' bi zjanaque' bene' Israel cate' choe'lēna' legaque' diža' güen che Criston'. Bzejni'ida' legaque' bin' chsed chlo'eda', le goclaža' yesēnezde' cont bi yesene' bibi zaca' dan' chona' na' da' ba bena'. <sup>3</sup>Ca' goquen' bitw chole gosone' byen soa bene' lježa' Titon' señw dan' nzi' circuncisión la'czla' bi naque' bene' Israel. <sup>4</sup>Goc ca' la'czla' gwnita' bal' bene' gosaque' txen len bene' lježcho ca' Jerusalēnna' ca' hora', bene' gague do laže' gosejnilaže' Criston', con bedesēne'e še na'oto' costumbr ca' zjanyoj le'e ley che neto' bene' Israel. Legaque' gosaclaže' yesone' byen ga'oto' costumbr ca', la'czla' nezecho chebe Diosen' chio' dan' chejnilaže'cho Criston', gague dan' choncho can' ža leyna'. <sup>5</sup>Perw neto' ne' late'ze bi bzenagto' che legaque', le goclaže'to' bi gata' da' gwžon gwzenaguechle diža' güen che Criston' da'

naquen da' li. <sup>6</sup>Na' ca nac bene' ca' gosac bene' blao len bene' ca' chesejnilaže' Criston' Jerusalénna', bitw gosazlaže' gwša'a can' chsed chlo'eda' che Criston'. (Žia' ca' la'czla' bitw bi nonen len neda' še gosaque' bene' blao o še bi gosaque', le len Diosen' tozcze can' zjazaca' yogo'lo' bene'.) <sup>7</sup>Gosacbe'ede' Diosen' ngüe'e lo na' chyixjue'eda' diža' güen che Criston' len bene' ca' bi zjanaque' bene' Israel can' ngüe'en lo na' Pedron' chyixjue'eden' len bene' Israel gualaž cheto' ca'. <sup>8</sup>Le Diosen' ben' chaclene' Pedron' len yela' guac chen' cont chyixjue'ede' xtiža' Criston' len bene' Israel gualaž cheto', leczen' chaclene' neda' len yela' guac chen' cont chyixjue'eda' xtiža' Criston' len bene' bi zjanaque' bene' Israel.

<sup>9</sup>Can' goquen', Jacobon' len Pedron' len Juanna', bene' zjanacch blao len bene' ca' chesejnilaže' Criston' Jerusalénna', cate' legaque' gosacbe'ede' can' chaclen Diosen' neda' chona' xšinen', nach gosoxe' taca' len taca' Bernabén' cont bosolo'e zjanaque' txen len neto' na' gosazlaže' can' chonto'. Le gosacde' güencze gonto' xšin Diosen' len bene' ca' bi zjanac bene' Israel na' legaque' yesonen' len bene' Israel gualaž cheto' ca'. <sup>10</sup>Toze dan' gose'e neto' gonto', gaclento' bene' yaše' ca'. Na' da' licze chi'chgua yichja' chona' ca'.

**Pablon' gwdila' Pedron'  
gan' nzi' Antioquia**

<sup>11</sup>Na' gwdechle gwya'a gan' nzi' Antioquia. Na' šlac zoa' na' bid Pedron', na' gwdila'ne' can' chone',

le bla'alaon chone' da' mal. <sup>12</sup>Cate' za' bžine' Antioquían', gwzologüe' che'ej chagüe' txen len bene' ca' chesejnilaže' Criston' la'czla' bi zjanaque' bene' Israel; perw gwdechne' cate' besežin bene' Jerusalén ben' gwse'la' Jacobon', bich goclaže' ye'ej gagüe' txen len bene' ca' bi zjanaque' bene' Israel. Bžebe' še bi yesena bene' ca' cheson xbab note'teze bene' chejnilaže' Criston' cheya'la' soe' señw dan' že' circuncisión. <sup>13</sup>Nach yezica'chle bene' Israel ca' chesejnilaže' Criston' lecze besyebixe' bich gose'ej gosagüe' txen len bene' ca' bi zjanaque' bene' Israel, na' gosego'oyele' Bernabén' cont lencze' bebixe'. Na' gosone' ca' cont yesebe bene' Jerusalén ca' legaque', la'czla' gosenezde' bi naquen mal yese'ej yesagüe' txen len bene' ca' bi zjanaque' bene' Israel. <sup>14</sup>Gocbe'eda' bi chesone' can' cheya'la' gon chio' nombia'cho diža' li che Criston'. Na' da'n'an' gwdila' Pedron' lao yogo' bene' ca' chesedop chesežag chesonxene' Criston', goša'ne': "Le' naco' bene' Israel, perw ba gwlejiychjo' costumbr che chio' bene' Israel cont chono' txen len bene' ca' bi zjanaque' bene' Israel. Da'n'an' bitw cheya'la' gono' byen yeson bene' ca' bi zjanaque' bene' Israel can' nac costumbr che chio' bene' Israel."

**Con bene' chesejnilaže' Jesucriston'  
zjanaque' bene' güen len Diosen'**

<sup>15</sup>Neto' goljto' nacto' bene' Israel na' bitw goljto' ladjo bene' ca' cbi chesonxen Diosen'. <sup>16</sup>Perw ba nezeto' Diosen' bitw že' nacto' bene'

güen len le' neche da' chonto' can' za ley dan' bzoj da' Moisésen'. Con bene' chesejnilaže' Jesucriston' zjanaque' bene' güen len Diosen'. Da'n'an' lencze neto' chejnilaže'to' Criston' cont Diosen' že' cheto' ba nacto' bene' güen lagüe'na'; že' ca' gague neche dan' chonto' can' za leyna'. Le bi nacho zoa bene' nac bene' güen len Diosen' neche chone' bi da' za leyna'.

<sup>17</sup> Ba<sub>l</sub> neto' bene' Israel ba chejnilaže'to' Criston' cont Diosen' none' neto' ca bene' güen. Da'n'an' chacbe'eto' toz ca bene' güen da' xinj nacto' len bene' bi zjanac bene' Israel. Perw bi nacho Criston' chone' cont nacto' bene' mal. Leca clelen' cheson bene' xbab še chesacde' ca'. <sup>18</sup> Nezecho bi chyažjen ga'ocho costumbr che da' xozxta'o neto' bene' Israel cont gaccho bene' güen len Diosen'. Na' še ba gwlejyichjcho costumbr ca' na' yezolaocho yeya'ochon da' yoble, gwlo'elaon naccho bene' güen da' xinj. <sup>19</sup> Ley dan' bzoj da' Moisés ba bzejni'in neda' bi naca' bene' güen len Diosen', le bi chona' can' žanna'. Perw dan' bi gwzoen yeyonen neda' bene' güen len Diosen', da'n'an' bich chonxenan', san yo'o yichja' soacza' gwzenaga' che Diosen'. <sup>20</sup> Criston' bnežjw cuine' gote' neche xtolan', na' dan' chejnilaža'ne' da'n'an' ba none' neda' ca to bene' guat len da' xinjen' cont bich gonan'. Na' bich zoa' to gualaza', san Criston' zoalene' neda'. Na' dan' chona' na'a chonan' con can' za' Xi'in Diosen' ben' chejnilaža'. Len' chacde' chio' na' bnežjw cuine' gote' neche chio'. <sup>21</sup> Diosen' nži'ilaže'de' chio' na' da'n'an' gwsele' Criston',

perw chzoacho to šla'ale dan' bnežjw cuine' gote' še chaquecho naccho bene' güen len le' neche choncho dan' za leyna', le bitw byažjen bnežjw cuin Criston' neche chio' šaca'.

**Naccho bene' güen len Diosen'  
dan' chejnilaže'cho Criston'**

**3** Le'e bene' Galacia, ncho<sub>l</sub> yichjlažda'olen'. ¿No gwziye' le'e cont chaquele cheya<sub>l</sub>a' gonxen<sub>l</sub>e costumbr che da' xozxta'oto' ca'? Ba bzejni'iyane'da' le'e che dan' got Criston' le'e yag cruzen' neche chio'. <sup>2</sup> Da' ngazen' chnabda' le'e: ¿Zoa Spiritw che Diosen' lo' yichjlažda'ole neche dan' chonle can' za ley dan' bzoj da' Moisésen'? Bitw naquen ca', san zoan len le'e neche dan' chejnilaže'le Criston'. <sup>3</sup> Spiritw che Diosen' gwyo'on lo' yichjlažda'olen' caten' gwzolao chejnilaže'le Criston'. ¿Da' leca ncho<sub>l</sub> yichjlažda'olen' chaquele chyažjen gonle can' za leyna' cont yeyož gacle can' chazlaže' Diosen'? <sup>4</sup> Da' zan da' boso<sub>ch</sub>i bososaca' bene' le'e dan' chejnilaže'le Criston'. ¿Na' bixe zacan' byo bchejele len da' ca' še na'a chaquele cheya<sub>l</sub>a' gonle can' za leyna'? <sup>5</sup> Nezele Diosen' ba bene' Spiritw chen' zoan len le'e na' chone' yela' guac da' chle'ele neche chejle'le xtiža' Criston' dan' bzeneto' le'e, gague chac ca' neche dan' chonle bi dan' za leyna'.

<sup>6</sup> Da' Abrahanna' gwyejnilaže' Diosen', na' da'n'an' Diosen' gwne' naque' bene' güen lagüen'. <sup>7</sup> Da'n'an' cheya<sub>l</sub>a' nezele yogo' bene' chesejnilaže' Diosen', Diosen' none' legaque' ca xi'in diaža che da'

Abrahanna'. <sup>8</sup>Diosen' b'zie' bia' gone' len le'e bi nacle bene' Israel can' chone' len neto' bene' Israel, con note'tezcho chejnilaže'chone' none' chio' bene' güen lagüen'. Da'nan' Xtižen' dan' nyojen žan gože' da' Abrahanna' diža' güen qui cate' bina' žin ža gaquen': "Dan' chejnilažo' neda' gona' güen len bene' ca' že' yogo' nación." <sup>9</sup>Na' can' naquen, Diosen' chone' güen len bene' ca' chesejnilaže' le' can' bene' güen len da' Abrahanna' ben' gwejnilaže'ne'.

<sup>10</sup>Na' note'tez bene' chon xbab gague' bene' güen len Diosen' lagüe' chone' bi dan' ža ley dan' bzoj da' Moisésen', da' mal juisyw gac che' še ca', le nyoj Xtiža' Diosen', žan: "Da' mal juisyw gac che note'tez bene' še bi nita'teze' yesone' yogolo' can' ža leyna' bate'teze." <sup>11</sup>Na' Xtiža' Diosen' nyojen, žan: "Bene' chesejnilaže' Diosen' zjanaque' bene' güen lagüe', na' da'nan' guata'cze yela' mban čhegague' toli tocane." Na' da' žan ca' nezecho bitw že' čhe note'tezcho naccho bene' güen lagüen' neče choncho bi dan' ža leyna' goncho. <sup>12</sup>Na' leyna' bi žan cheyala' šejnilaže'cho Diosen', san con žan: "Note'teze bene' chon doxen can' ža leyna' gac bane' toli tocane."

<sup>13</sup>Perw Criston' bnitlagüe' xtola'chon' cont bi gac da' mal juisyw čhecho dan' bi chzoecho goncho doxen can' ža leyna'. Bnežjw cuine' goc da' mal juisyw čhe' laz chio'. Goc čhe' can' nyojen, žan: "Da' mal juisyw chac čhe note'tez bene' chesote' chosode'ene' le'e yag." <sup>14</sup>Goc ca' cont lencze le'e bi nacle bene' Israel šejnilaže'lene' na'

soale mbalaz ca mbalazen' gwzoa da' Abrahanna' dan' gwejnilaže' Diosen'. Nachen' da' chejnilaže'cho Cristo Jesúsén', Diosen' gwsele' Spiritw čhen' zoan len chio' can' gwne' gone'.

**Ley dan' bzoj da' Moisésen'  
na' dan' gwna Diosen' gone'  
len da' Abrahanna'**

<sup>15</sup>Bene' migw, gwzejni'ida' le'e len da' nga chac yežlio nga: Cate' to bene' chze'e yiš o chone' testament, bi nacho cate' beyož bosochele' can' gwne' gone' cbi gone' can' žanna' o gwzanche' can' žanna', la'czla' naquen to da' chon benačze. <sup>16</sup>Na' ca nac dan' gož Diosen' Abrahanna' gone' da' güen len le' na' len xi'in diaža čhe', Xtiža' Diosen' dan' nyojen bi choen' diža' čhe zan diaža čhe da' Abrahanna', san choen' diža' čhe toze', na' zejen Cristo. <sup>17</sup>Na' dan' gož Diosen' Abrahanna' gone' gac da' güen čhe', chzaca'leben ca to yiš dan' chosoza' bene', le Diosen' bitw gwše'e can' gwne' gone'. Na' ba gwde tap gayoa šichoa iz gož Diosen' da' Abrahanna' gone' gac da' güen čhe' cate' bene' cont bzoj da' Moisésen' ley čhen'. Perw la'czla' Diosen' bnežjue' leyna', bitw nacho cbi chone' can' gwne' gone' len Abrahanna' na' len xi'in diaža čhe' ca'. <sup>18</sup>Šaca' Diosen' že' con bene' cheson doxen can' ža leyna' zjanaque' bene' güen, bitw chone' da' güen čhe xi'in diaža čhe da' Abrahanna' can' ba gwne' gone' šaca'. Perw Abrahanna' goque' bene' güen len le' da' gwejle'e gon Diosen' can' gože'ne'.

<sup>19</sup>Še naquen ca' čbixchen byažje ley dan' bzoj da' Moisésen'? Diosen'

bnežjuen' da' xozxta'oto' bene'  
 Israel cate' ba gwde tiemp che da'  
 Abrahanna' cont gosacbe'ede' bi  
 chesone' can' non Diosen' mandadw  
 yesone'. Na' bžie' bia' gonen žin  
 šlac biña' yid Criston' ben' gwna  
 Diosen' galje' lo diaža che da'  
 Abrahanna', na' che le' be' Diosen'  
 diža' caten' gwne' gone' güen len  
 xi'in diaža che da' Abraham. Na' ca  
 nac leyna', Diosen' bene' cont angl  
 ca' bosonežjuen' da' Moisésen'. Na'  
 Diosen' bchine' Moisésen' bzejni'ide'  
 xozxta'oto' bene' Israel ca' can'  
 žanna'. <sup>20</sup>Perw cate' Diosen' gože' da'  
 Abrahanna' gone' güen che', cuincze'  
 bzejni'ide' da' Abrahanna', na' bi  
 byažjde' bene' yoble gwzejni'ide' le'  
 can' gone'.

#### Da' chzejni'i leyna' chio'

<sup>21</sup>Na' bitw cheya'la' gaquecho  
 ley dan' bzoj da' Moisésen' chonen  
 clele len da' gwna Diosen' gone'  
 la'czla' leyna' bitw gac yocoben  
 yichjlažda'ochon'. Šaca' gac yocoben  
 yichjlažda'ochon' guac goncho can'  
 ža leyna' nach gaccho bene' güen  
 len Diosen' šaca'. <sup>22</sup>Perw Xtiža'  
 Diosen' dan' nyojen žan yogo'lol  
 benachen' yesezi'e castigw toli  
 tocane neche xtola'gaquen', na'  
 con bene' yesejnilaže' Jesucriston'  
 nitlao xtola'gaque' can' bsi Diosen'  
 xnezen', cont gac güen chegaque'  
 can' gwne' gac che xi'in diaža che  
 da' Abrahanna'.

<sup>23</sup>Ca nac neto' bene' Israel, cate'  
 biña' nezeto' cheya'la' šejnilaže'to'  
 Criston', nchoglaon cheto' si'to'  
 castigw toli tocane dan' nombia'to'  
 leyna' na' bitw chonto' can' žanna'.

<sup>24</sup>Len neto' leyna' zaca'leben ca to

bene' chgüia chne'e xi'in bene', da'  
 zan da' chi'ebe' gombe' na' da' zan  
 da' chi'ebe' bi gombe'. Perw na'a  
 ba bid Criston', na' note'tezcho  
 chejnilaže'chone', Diosen' že' naccho  
 bene' güen len le'. <sup>25</sup>Na' dan' ba bid  
 Criston' leyna' bich naquen ca bene'  
 chgüia chne'e neto' bene' Israel,  
 neto' chejnilaže'to'ne'.

<sup>26</sup>Yogo' chio' chejnilaže'cho  
 Cristo Jesúsén' naccho xi'in Dios.  
<sup>27</sup>Na' note'tezcho še ba gwzoacho  
 nisen' cont blo'echo naccho  
 txen len Criston', ba chzolao  
 chac yichjlažda'ochon' can' nac  
 yichjlažda'ogüen'. <sup>28</sup>Na' tozeczce  
 can' zaca'cho lao Diosen' še naccho  
 bene' Israel o še bi naccho, na' še  
 naccho bene' esclavo o še bi naccho,  
 na' še naccho bene' byo o še naccho  
 no'ole. Yogo'cho ba naccho ca toze  
 bene' neche dan' naccho txen len  
 Cristo Jesúsén'. <sup>29</sup>Na' dan' naccho  
 txen len Criston', lao Diosen' naccho  
 xi'in diaža che da' Abraham, na'  
 gon Diosen' güen len chio' can'  
 gwne' gone' len xi'in diaža che da'  
 Abrahanna'.

**4** To bene' gwni'a še zoa xi'ine',  
 bi'nan' gac lo na'be' da' de che'.  
 Perw na' šlac ne' nache' bidao' bitw  
 nacho mbalazech chac chebe' cled  
 ca che to bene' güen žin la'czla' žin  
 ža gac lo na'be' yogo' dan' de che  
 xaben'. <sup>2</sup>Bene' güen žin ca' nite'  
 lo' yo'o chosogüia chesene'ebe' na'  
 chesenabi'ebe' šlac biña' cha'obe'  
 na' šlac žin ža co'o xaben' lo na'be'  
 dan' de chen'. <sup>3</sup>Can' goc len neto'  
 bene' Israel šlac biña' yid Criston',  
 gwxaca'lebto' ca xi'in bene' gwni'an'.  
 Na' leyna' gwzaca'leben ca bene' ca'  
 chesenabia' xi'in bene' gwnian' šlac

biṇa' žin ža si'be' dan' de che xaben'.

<sup>4</sup>Perw cate' bžin ža bžia Diosen' bia' gwseła' Xi'inen' yežlio nga, gwxaṇ to no'ole le'. Na' Xi'in Diosen' lecze benen byen bzenague' che leyna'.

<sup>5</sup>Na' len' bedeyene' cont yogo' chio' chejnilaže'chone' ba non Diosen' chio' ca xi'ine' na' zoacho mbalaz dan' nezecho bich chonen byen gonxencho costumbr ca' da' zjanyoj le'e ley che neto' bene' Israel.

<sup>6</sup>Na' cont nezecho ba non Diosen' chio' ca xi'ine', ba gwsele' Spiritw chen' dan' lecze naquen Spiritw che Xi'ine' Criston', zoan lo' lažda'ochon'. Na' Spiriton' chaclenen to tocho cont choľ güižcho Diosen' che'chone': "Xa'". <sup>7</sup>Nachen' dan' ba non Diosen' chio' ca xi'ine' bich cheyała' soacho ca to esclavo len dan' non leyna' mandaw goncho. None' chio' ca xi'ine' na' chone' güen len chio' doxen can' gwne' gone' len xi'in diaža che da' Abrahanna'.

**Pablon' chi' yichje' nac cheson  
bene' ca' chesejnilaže' Criston'**

<sup>8</sup>Cate' biṇa' gombiale Diosen', gwejnilaže'le da' ca' bi cheyała' šejnilaže'cho, na' legaquen gosnabian' xbab chele. <sup>9</sup>Perw na'a ba nombiale Diosen', o še güenč nacho Diosen' ba nombie' le'e. Na' chebančgüeda' chele dan' chebiga'le cosxaṇle na' da' yoble chonxenle costumbr ca' ca no che da' ye'ej gagwcho, che ža ca', na' che cuerp chechon', na' cho'ele latje chesenabian' xbab chele la'czla' bitw zjazacan' cont yesaclenen chio'. <sup>10</sup>Ba chonxenle costumbr che no ža lni, che bio' ca', che tiemp ca' na' che iz ca'. <sup>11</sup>Chžeba' še bich

chzenagle che dan' ba bsd blo'eda' le'e, le še bich chzenagle chen, ba gwžiai' dan' bena' len le'e.

<sup>12</sup>Bene' migw, chata'yoeda' le'e gacbe'ele costumbr che neto' bene' Israel dan' zjanyoj le'e leyna' bi yesaclenen le'e lao Diosen' ca chacbe'eda' bi yesaclenen neda' lao Diosen'. Na' caten' bedesoa' len le'e cana', bitw nacho ba benle mal len neda'. <sup>13</sup>Nezeczele bega'anlena' le'e da' nechw dan' gocšenda' na' gwduxje'eda' diža' güen che Criston' len le'e. <sup>14</sup>Na' dan' gocšenda' ca hora' zacan' gue'ele neda', perw bitw bgue'ele neda', san do yichj do laže'le bleble neda' ca šale bleble to no angl che Dios o ca šale cuin Jesucriston'. <sup>15</sup>Mbalaz gwzoale cate' gwzoa' len le'e cana'. ¿Bixchen' bich chebele xtižan' na'a? Nežda' da' leca goquele neda' bzanele bite'teže da' de chele na' goclaže'le lente cuinle zanele gaclenle neda'. <sup>16</sup>Na' na'a žba chaquele chgue'eda' le'e dan' choe'lena' le'e diža' lin'?

<sup>17</sup>Bene' ca' chososed chosolo'ede' le'e na'a leca zjachi' yichjgaque' le'e, perw gague cont yesone' güen len le'e, san cont yesyebeje' le'e bich gonle txen len neto', na' cont cue' yichjle legacze'. <sup>18</sup>Naqueczen güen yesebe' yichj bene' le'e bate'teže, gague cate'zen' zoa' len le'e, con še yesone' güen len le'e. <sup>19</sup>Xi'indagua', da' yoble chžaglagua' lo' lažda'ogua' neche le'e can' chžaglao to no'ole bene' chzan, na' bich žaglagua' ca' cate'ch gac yichjlažda'olen' can' nac yichjlaždao' Criston'. <sup>20</sup>Yebechgüeda' šaca' netec na'a zoa' len le'e na' šaca' gac nia' chonle güen, perw leca chacžejlaža' chele.

### Da' Agar na' da' Saran'

<sup>21</sup>Le'e chaclaže'le gonxenle costumbr che neto' bene' Israel dan' zjanyoj le'e ley dan' bzoj da' Moisésen' čbina' yenele can' ža dan' nyojen? <sup>22</sup>Žan gwnita' čhope xi'in da' Abrahanna' bi' byo, tobe' gwzan to no'ol ben' goque' esclava che' na' yetobe' gwzan no'ol čhecze', no'ole nga bi goque' esclava. <sup>23</sup>Na' bin' gwzan no'ole esclavan' goljbe' dan' gwzoalen da' Abrahanna' le', perw bi' gwzan no'ol čhecze', goljbe' neče Diosen' gože'ne' san no'ol čhen' la'czla' naque' no'ol güiž. <sup>24</sup>Na' dan' goc che no'ol ca' chzejni'in chio' che chop dan' gwna' Diosen' gone' cont gaclene' bene' Israel ca'. No'ole esclava ben' le Agar zaca'lebde' ca ley dan' ben Diosen' mandaw bzoj da' Moisésen'. Bzojen' par da' xozxta'o neto' bene' Israel lo ya'a Sinaí, na' bene' ca' zjazaca'lebde' ca esclavos. <sup>25</sup>Na' doxen nación Israelen' zaca'leben ca da' Agaren' no'ole esclava che da' Abrahanna'. Diosen' bnežjue' da' xozxta'oto' ca' leyna' lo ya'a Sinaín' gan' nzi' Arabia, na' ža na'aža bene' Israel gualaž četo', bene' guac nacho bene' Jerusalén, ne' zjanaque' ca esclavos neče chesacde' chonen byen yesa'ogüe' costumbr ca' dan' ža leyna'. <sup>26</sup>Perw chio' chejnilaže'cho Criston' naccho txen len yogo' bene' šjaya'aque' yaba gan' zoa Diosen' gan' lecze nzi' ciuda Jerusalén. Na' nezecho bitw chonen byen ga'ocho costumbr ca' dan' ža leyna'. <sup>27</sup>Quinga ža Xtiža' Diosen' dan' nyojen:

Bebe no'ole güiž, no'ole cbi chzan,

bosya'a yela' chbe chio', le' bina' gaco' bes che yela' sanna'. Chacdo' bi chaque Diosen' le' da' nono xi'ino' zoa, perw nita' zanch xi'ino' clel ca nita' che no'olen' ba gwzan xi'in bene' byon' gwzoalene'.

<sup>28</sup>Bene' migw, xi'in da' Abrahanna' bin' le Isaac goljbe' neče gož Diosen' Abrahanna' san no'ol čhen' la'czla' goque' no'ole güiž. Na' ca'cze chio' chejnilaže'cho Criston', Diosen' none' chio' ca xi'in diaža che da' Abrahanna' bin' goljbe' neče goc dan' gož Diosen' le'. <sup>29</sup>Bi' che da' Agaren', bin' goljbe' neče gwzoalen da' Abrahanna' le', bchi bsaca'be' Isaaquen' bin' ben Spiritw che Diosen' cont gwzan da' Saran'. Ca'cze naquen ža na'aža, bene' ca' chesa'o costumbr ca' dan' ža leyna' chosoči chososaque' chio' chejnilaže'cho Criston'. <sup>30</sup>Na' Xtiža' Diosen' dan' nyojen žan Diosen' gože' da' Abrahanna': "Bebej no'ole esclavan' len bi' čhen', le bitw gwnežjua'be' dan' gwnia' gwnežjua' bi' gwzan no'ol chio'na'." <sup>31</sup>Da'n'an' bene' migw, nezecho zaca'lebcho ca xi'in da' Saran', gague ca xi'in da' no'ole esclavan'.

### Bi cheya'la' yesa'ogüe' costumbr da' bi zjazaca'

**5** Caten' gwejnilaže'cho Criston', le' bebeje' chio' lo yogo' da' choncho chaquecho chebe Diosen' chio' lagüe dan' chonchonna'. Da'n'an' bi cheya'la' yeyonxencho costumbr da' bi zjazacan' len Diosen'.

<sup>2</sup>Neda' Pablo žia' le'e to da' žialao. Še soale señw dan' nzi'



circuncisión na'a ba chejnilaže'le Criston', bibi zacan' dan' ba gwzolao chejnilaže'lene' še ca'. <sup>3</sup>Da' yoble žia' le'e, note'teze beñe' soe' señw dan' nzi' circuncisión, lecze cheyała' gone' yogo'loł bite'teze dan' ža ley dan' bzoj da' Moisésen'. <sup>4</sup>Na' še chaquele gonle doxen can' ža ley na' cont gacle beñe' güen len Diosen', ba chzoale Criston' to šla'ale še can' chaquele, na' bich chonle xbab catequen' nži'ilaže' Diosen' chio'. <sup>5</sup>Da' chejnilaže'cho Jesucriston' zoa Spiritw che Diosen' lo' lažda'ochon', na' chonen ga chebecho nezecho Diosen' ne' naccho beñe' güen len le' cate' yežincho gan' zoe'na'. <sup>6</sup>Ca nac chio' chejnilaže'cho Cristo Jesúsén', bitw bi nonen len Diosen' še ba zoacho señw da' nzi' circuncisión o še cbi zoachon. Le dan' naquen da' žialao xen len Diosen', soateze soacho šejnilaže'cho Criston' na' gague lježcho cont gacbia' chejnilaže'chone'.

<sup>7</sup>Cana' gwzoale chonle can' chebe Diosen', perw na'a čnon' ba ben cont bich chzenagle che diža' li che Diosen'? <sup>8</sup>Dios ben' gwleje' le'e nacle xi'ine', bitw nacho le'na' chone' cont chzenagle che diža' yoble. <sup>9</sup>Le gon xbab can' ža diža' nga: "Late'ze levadura chonen cont chas doxen cuazina'." <sup>10</sup>Perw na' zoa' lez gon Xancho Jesucriston' cont gwzenagle chia'. Na' Diosen' gwnežjue' castigw che beñe' chon cont chacžejlaže'le, note'teze naque'.

<sup>11</sup>Beñe' migw, ca nac neda', šaca' ne' chsed chlo'eda' nia' yogo' beñe' byo cheyała' yesezoe' señw dan' že' circuncisión cont yesenite' binlo len Diosen', bilja chosoči chososaca'

beñe' Israel gualaž čhian' neda' šaca', le can' chososed chosolo'e legaque'. Perw dan' žia' Criston' bnežjw cuine' gote' le'e yag cruzen' cont soacho binlo len Diosen', da'nan' bi chesazlaže' xtižan'. <sup>12</sup>Na' ca nac beñe' ca' cheson cont chaquele bilja chebe Diosen' le'e še bi zoale señoñ', yebeda' šaca' yesečhog cuingaque' yelate'.

<sup>13</sup>Beñe' migw, Dios ben' gwleje' chio' cont naccho xi'ine' chaclaže' nezecho bich chonen byen ga'ochon dan' ža ley cont soacho binlo len le'. Perw bitw cheyała' goncho bite'teze da' mal dan' ža lažda'ochon' goncho. Dan' cheyała' goncho, cheyała' gaclen lježcho lagüe dan' chaque lježcho tocho yetocho. <sup>14</sup>Na' ba zoaczcho choncho yogo'loł can' ža ley na' še choncho can' nyojen žan: "Cheyała' gague lježcho ca chaque cuincho." <sup>15</sup>Perw še chacyožlen lježcho o chdillen lježcho, chžiayi'cho dan' non Diosen' cont naccho toze.

#### Can' goncho še gwzenagcho che Spiritw che Diosen'

<sup>16</sup>Chnia' le'e to da' zejen, cheyała' soateze soacho goncho can' chaclaže' Spiritw che Diosen'. Na' še goncho ca', bitw gwzenagcho che da' mal dan' yo'o lo' yichjlažda'ochon'. <sup>17</sup>Cate' chzenagcho che da' mal dan' yo'o lo' lažda'ochon', bitw choen' latje gwzenagcho che Spiritw che Diosen'. Na' cate' chzenagcho che Spiritw che Diosen', bi choncho con can' žan checho. Na' dan' zoa Spiriton' len chio', da'nan' bitw choncho da' mal dan' ža lažda'ochon' goncho. <sup>18</sup>Na' še chzenagcho che

dan' chsed chzejni'i Spiritw che Diosen' chio', bich chonxencho costumbr ca' dan' ža ley dan' bzoj da' Moisésen'.

<sup>19</sup>Nacbia'cze bene' ca' chosozenag che da' malen' dan' yo'o lo' lažda'ogaque' chesone' bite'teze da' mal quinga: chesata'lene' no'ol bi zjanac no'ol chegaque' o bene' byo bi zjanac bene' chegaque'; chesebede' chesone' bichle da' yela' zto' len cuerp chegaque'; <sup>20</sup>chesejnilaže' l gua'a lsaca'; chosozenague' xtiža' bene' ca' chesenelen da' xigüe'; chesegue'e lježe'; bitw nite' binlo len lježe'; chesacxi'a lježe'; cheseloque'; zjachi' yichje' gac güen che cuingacze' sin cbi yesone' xbab nac gac che lježe'; bitw chesone' txen len lježe'; <sup>21</sup>chesezelaže' bi da' de che bene' yoble; chesote' bene'; zjanaque' bene' borrašw; zjalene' no lni gan' chac žaš; na' chesone' bichle da' mal dan' zjanac ca da' mal quinga ba gwnia'. Na' da' yoble chnia' le'e can' ba gwnicza', nono yežin yaban' gan' zoa Diosen' chnabi'e še chone' da' xinj ca' zjanac ca'.

<sup>22</sup>Perw na' še chzenagcho che Spiritw che Diosen', goncho yogo' da' quinga: gaquecho ljež benačcho; soacho mbalaz dan' nombia'cho Diosen'; soacho binlo len xbab dan' yo'o lo' yichjlažda'ochon'; gapcho yela' chxenlaže' len ljež benačcho bite'teze da' chesonde' chio'; goncho güen len bene' yezica'chle; gaccho bene' šagüe' len yogo'lol bene'; goncho bi da' si' lo na'cho goncho; <sup>23</sup>gaccho bene' gwzexjwlaže'; bitw soacho goncho con can' žan checho. Na' še choncho da' güen

can' chaclaže' Spiritw che Diosen', bitw bibi ley de da' nan choncho da' mal. <sup>24</sup>Na' chio' ba naccho txen len Cristo, bich choe'cho latje nabia' da' malen' chio' cont goncho can' žanna'. <sup>25</sup>Spiritw che Diosen' ba benen yela' mban toli tocane checho, na' da'nan' cheyala' soacho goncho can' chaclažen'.

<sup>26</sup>Na' bi cheyala' ga'laže'cho gaquecho leca bene' güen naccho, le še goncho ca', chonen cont yeseža'a bene' lježcho chio' na' yesegue'ede' chio'.

### Cheyala' gaclen lježcho

**6** Bene' migw, še to bene' lježchon' ba blažoe' bene' da' mal, chio' chzenagcho che Spiritw che Diosen' cheyala' gaclenchwne' yetinjden' cont yezoe' binlo len Diosen'. Na' cheyala' gwsaca'cho, le xož lecze chio' lažo'cho goncho da' malen'. <sup>2</sup>To tocho cheyala' gaclen bene' lježcho ca' bite'teze da' chesac chegaque', le can' gwna Criston' chaclaže' goncho.

<sup>3</sup>Na' še goncho xbab naccho bene' güen cate' bi naccho, chziye'ze cuinchon' še ca'. <sup>4</sup>To tocho cheyala' goncho xbab še dan' ba benchon' naquen da' güen o da' mal. Na' yebecho še ba bencho da' nac güen, perw bitw goncho xbab güench ba ben chio' clcl ca' bene' yoble. <sup>5</sup>Le to tocho chogläo Diosen' checho še bencho güen o še bencho mal.

<sup>6</sup>Še no chsed chlo'e chio' xtiža' Diosen', cheyala' gwnežjwchone' late' bi da' šagüe' da' güen da' de checho.

<sup>7</sup>Bitw güe'le latje no si'ye' le'e, bitw gac gwcuša'cho da' choncho

len Diosen'. Le še goncho da' mal, gone' cont si'cho castigw; na' še goncho da' güen, gone' cont soacho mbalaz. Can' zeje diža' dan' žan: "Con dan' chazcho, lenna' yelapcho." <sup>8</sup>Ben' chon con can' ža da' mal dan' yo'o lo' lažda'ogüe', gwžin ža cuiaye'e toli tocane; perw ben' chon can' chazlaže' Spiritw che Diosen', Spiriton' gonen cont bane' toli tocane. <sup>9</sup>Na' bitw cheyaļa' yeche'echo goncho da' güenna', le gwžin ža cate' Diosen' gone' cont soacho mbalaz juisyw, con še bi cuejyichjcho choncho can' chaclažen'. <sup>10</sup>Da'nana' cheyaļa' goncho güen len yogo'lol bene' bate'teze de latje, na' chonchen byen goncho güen len bene' chesejnilaže' Criston' clal ca len yezica'chle bene'.

**Yeto chope dan' che' Pablon' legaque'**

<sup>11</sup>Le našc letr cha'o quinga, le cuina' chzoja' le'e. <sup>12</sup>Bene' ca' chesaclaže' yesone' byen soale señw dan' že' circuncisión chesacde' yesyebe bene' Israel gualaž cheto' ca' legaque' še ba bosozoe' le'e señoñ'. Cheseyiljwlaže' nacle yesone' cont nono yosochi yososaca' legaque' da' chesejle'e Criston' bnežjw cuine' neche chio' cate' gote' le'e yag cruzen'. <sup>13</sup>Bene' ca' chesene' cheyaļa'

soale señoñ' zjachi' yichjgaque' ley dan' bzoj da' Moisésen' perw ne legaque' cbi chesone' can' žanna'. Con chesaclaže' soale señoñ' cont yesonxen cuingaque' lao bene' Israel gualaž cheton'. <sup>14</sup>Ca nac neda', bitw gonxen cuina', san gonxena' Xancho Jesucriston' dan' bnežjw cuine' gote' le'e yag cruzen' neche chio'. Bitwbi nonen len neda' še benachen' yesyebede' neda', le neda' bich chebeda' da' ca' chesena benachen'. <sup>15</sup>Na' len chio' chejnilaže'cho Cristo Jesús en' nezda' bibi nonen še zoacho señw dan' že' circuncisión o še bi zoachon, perw zaca'chgua dan' ba bocob Diosen' yichjlažda'ochon'. <sup>16</sup>Lao Diosen' naccho dogualje bene' Israel še ba chejnilaže'cho Jesucriston'. Na' chnaba' gaclen Diosen' yogo'le ba zoale chzenagle che' cont soa cuezchle binlo len xbab chele, na' lecze chnaba' yeyaše' yeži'ilaže'de' le'e.

<sup>17</sup>Na' na'a chnabšca' bich gonle güedenag len xtižan', le cuerp chia' nga nsan' yiž che dan' bosochi bososaca' bene' neda' neche chyixjue'eda' xtiža' Xancho Jesús en'.

<sup>18</sup>Bene' migw, chnaba' soašca' Xancho Jesucriston' gaclenšque' le'e len xbab dan' yo'o yichjlažda'olen'. Da' na'zen' chzoja' na'a.

# CART DAN' BZOJ POSTLW SAN PABLO CHE BENE' CA' ŽE' EFESO

---

Pablon' bzoje' bene' chesejnilaže'  
Criston' ciuda Efeso

**1** Neda' Pablo naca' postlw  
che Jesucriston' con can'  
gwnalaže' Diosen'. Na' chzoja'  
le'e zoale Efeso le'e nacle lo na'  
Diosen' da' chejnilaže'le Criston'.  
<sup>2</sup>Chnabda' Xacho Diosen' na'  
Xancho Jesucriston' yesaclene' le'e  
na' yesone' cont soa cuezle binlo len  
xbab chelen'.

Diosen' chaclenchgüe' chio' da'  
ngode'cho txen len Criston'

<sup>3</sup>Cheyała' gonxencho Diosen' ben'  
nac Xa Xancho Jesucriston' na'  
le' lecze chonxene' Diosen'. Chio'  
naccho txen len Criston', Diosen'  
ba bene' chio' yogo' da' chyažje  
yichjlažda'ochon' cont šjayzoacho  
len le' yaban'. <sup>4</sup>Na' da' bnežyw cuin  
Criston' neche chio', da'nan' Diosen'  
gwleje' chio' cate' biņa' xe yežlion'  
cont gaccho bene' laždao' xilaže' na'  
bibu doła' gapcho lagüen'. <sup>5</sup>Diosen'  
chacde' chio' cate' biņa' soacho.  
Da'nan' bsi'e xnezen' none' chio' ca  
xi'ine' con can' gwnalaže', na' da'nan'  
gwsele' Jesucriston' neche chio'.  
<sup>6</sup>Cheyała' soaczcho gonxencho

Diosen' catec nži'ilaže'de' chio', le  
gwsele' Jesucriston' ben' chacde'  
cont le' goclenchgüe' chio'. <sup>7</sup>Caten'  
got Criston', blalj xchene' neche da'  
xinjen' ben chio' chejnilaže'chone'.  
Da'nan' Diosen' bezi'xene' xtoła'chon',  
le nži'ilaže'chgüede' chio'. <sup>8</sup>Na'  
chonchgüe' güen len chio', chone'  
chio' doxen yela' sina' na' yela'  
chejni'i da' chyažjecho. <sup>9</sup>Na'  
bzejni'ide' chio' da' gwnalaže' da'  
nono gwneze cani' da' bžie' bia' gac.  
<sup>10</sup>Le Diosen' bžie' bia' žin ža cate'  
yogo' bene' že' yaba len bene' že'  
yežlion' yosozenague' che Criston'  
na' yesaque' txen len le'.

<sup>11</sup>Ca nac chio' naccho txen len  
Criston', Diosen' bsi'e xnezen'  
none' chio' ca xi'ine' cont gac lo  
na'cho da' chaclaže' gone' chio'.  
Na' Diosen' chone' cont chac dan'  
chsi'e xnezen' na' chone' da' nezde'  
naquen güen. <sup>12</sup>Cani'te neto' bene'  
Israel ba chbezto' yid Criston', le  
zgua'tec gwlej Diosen' neto' cont  
gonxento'ne' da' naque' bene' zaca'  
juisyw. <sup>13</sup>Na' lecze ca' le'e, cate'  
benele diža' güen che Criston' dan'  
nac da' li na' gwnezele chaclaže'  
gone' yela' mban checho toli  
tocane, nach gweyjnilaže'lene'.

Da'nan' lecze le'e ba nacle txen len Criston', na' Spiritw che Diosen' bžinen zoan lo' yichjlažda'olen', can' gwne' soan. Na' Spiriton' zoan len chio' cont nezecho ba non Diosen' chio' ca xi'ine'. <sup>14</sup>Lecze zoan lo' yichjlažda'ochon' cont nezecho žin ža gac lo na'cho yogo' da' ca' za' gonch Diosen' chio' naccho xi'ine' cate' gone' cuerp cobe chechon'. Na' gonche' chio' da' ca' cont gonxenchone' da' naque' bene' zaca' juisyw.

**Pablon' gwnabe' gwnežyw Diosen' bene' chesejnilaže'ne' yela' sina' che'**

<sup>15</sup>Da'nan' cate' benda' diža' can' chejnilaže'le Xancho Jesús'en' na' can' chaquele yezica'chle bene' chesejnilaže'ne', gwzolagua' <sup>16</sup>choa' yela' choxclen che Diosen' neche le'e cate' choj güiža' Diosen', na' bi chezi'laža' chona' ca'. <sup>17</sup>Dios ben' chonxen Xancho Jesucriston', ben' nac Xe' na' ben' nac bene' zaca' juisyw, len' choj güiža'. Na' chnabda'ne' cue' yela' sina' chen' lo' yichjlažda'olen' na' gaclene' le'e cont gombia'chlene'. <sup>18</sup>Na' chnaba' šo' be'ni' che' lo' yichjlažda'olen' cont nezele bi da' güenna' zoacho lez gone' len chion' ba gwleje' naccho xi'ine'. Na' chnaba' gone' cont nezele catec güen juisyw nac yogo' da' ca' za' gone' yesaquen che chio' chejnilaže'chone'. <sup>19</sup>Na' lecze chnaba' šo' be'ni' che' lo' yichjlažda'olen' cont nezele leca nape' yela' guac xen cont gaclene' chio' chejnilaže'chone'. Blo'e yela' guac xen juisyw che' <sup>20</sup>cate' bosbane' Criston' ladjo bene' guaten'. Na' gwde bosbane'ne' nach nzoe'ne'

cuite' yaban' gan' chesenabi'e txen. <sup>21</sup>Le Criston' chnabia'che' ca note'teze angl. Chnabia'che' ca beñach, na' ca da' xigüe', na' ca bi da' chesejnilaže' bene', na' ca note'tezechle chesenabia' na'a na' tiemp da' za' za'. <sup>22</sup>Diosen' ba gwlo'e lo na' Criston' yogo' bene' na' bica'chle da' zjade cont le' chnabi'e. Na' Diosen' bzoe' Criston' ca Xancho cont chnabi'e yogo' chio' chejnilaže'chone'. <sup>23</sup>Da'nan' chio' chejnilaže'chone' zaca'lebcho ca to cuerp, na' Criston' zaca'lebe' ca yichj cuerpen'. Guac nacho nya' Criston' neche chio' chejnilaže'chone'. Na' Criston' zoe' chnabi'e doxen.

**Diosen' chacde' chio'**

**2** Na'a Diosen' ba bocobe' yichjla'ažda'olen' da' chejnilaže'le Criston'. Cana' gwzoale bentezle da' malen' na' gwdaple dol'a' lao Diosen'. Da'nan' gocle ca bene' guat da' bi bzenagle che'. <sup>2</sup>Con gwdaczle benje da' mal can' cheson yezica'chle bene' bi chesejnilaže' Diosen', na' bzenagle che Satanás dan' chnabia' da' xigüe' ca' dan' zjanyechjen beñachen'. Na' ža na'aža Satanás'en' ne' chnabian' yichjlaždao' bene' bi chosozenag che Diosen'. <sup>3</sup>Na' ca'cze gwzoa yogo'cho, gwzoatezcho bencho bi da' mal can' gwnan checho na' bi da' mal da' gwzelaže' yichjlažda'ochon'. Na' da' bebecho da' malen' lo' yichjlažda'ochon', da'nan' gwchoglaon checho si'cho castigw che xtola'chon' toli tocane, can' gac len yezica'chle bene' bi chosozenag che Diosen'. <sup>4-5</sup>Goccho ca bene' guat len yichjlažda'ochon'

da' gwzoacho bentezcho da' malen'. Na' šlac ñe' naccho ca', Diosen' leca beyaše' beži'ilaže'de' chio' na' gocchgüede' chio'. Na' lagüe da' nži'ilaže' Diosen' chio', da'nan' bocobe' yichjlažda'ochon' cate' gweynilaže'cho Criston', na' bene' yela' mban checho toli tocane. <sup>6</sup>Na' da' bocobe' yichjlažda'ochon', guac ñacho bene' len chio' can' bene' len Cristo Jesúsén' cate' bosbane' le' ladjo bene' guat ca'. Na' da' naccho txen len Criston', mbalaz bach zoacho chbezcho len le' ña'a can' soacho cate' yežincho yaban' gan' chi'ena'. <sup>7</sup>Diosen' goclene' chio' ca' cont tiempen' za' za' gwlo'echde' catequen' nži'ilaže'chgüede' chio', le gonchgüe' zanch da' güen len chio' naccho txen len Cristo Jesúsén'. <sup>8</sup>Da' nži'ilaže' Diosen' chio', ba bene' yela' mban checho toli tocane cate' gweynilaže'cho Criston'. Con bene' to goclen, gague ñeche bi da' güen da' ben chio'. <sup>9</sup>Le Diosen' bi chaclaže' güe'cho diža' o gaguecho bñitlagüe' xtoła'chon' ñeche bi da' güen da' ba bencho. <sup>10</sup>Diosen' bene' chio' na' cate' gweynilaže'cho Cristo Jesúsén' bocobe' yichjlažda'ochon' cont soacho goncho da' güen. Cate' bina' soacho, bsi'e xnezen cont soacho goncho da' güen.

**Bene' Israel na' bene' bi zjanaque' bene' Israel, Criston' bozoe' legaque' binlo toe' yetoe'**

<sup>11</sup>Da'nan' le gon xbab can' goc len le'e cana', le'e goljle bi nacle bene' Israel can' nac neto'. Canan' neto' che' lježto: "Chio' zoacho señw da' že' circuncisión", na' che'to' le'e: "Bi zoale señw da' že' circuncisión"

(señw da' chosoza bene' Israel gualaž cheto' ca' lo cuerp che bi' byo dao' ca'). <sup>12</sup>Na' le gon xbab can' gwzoale cana', bi nombia'le Criston', bi nacle nación che Diosen' ca neto' bene' Israel nacto', na' Diosen' bi gwne' gaclene' le'e can' gwne' gaclene' neto' bene' Israel. Bi gwzoale lez šjayzoale len Diosen' na' ñeca gweynilaže'le Diosen' lo yežlio nga. <sup>13</sup>Perw Criston' bnežjw cuine' gosote'ne' na' blalj xchene' ñeche chio'. Na' ña'a da' chejnilaže'lene' ba nacle txen len Cristo Jesúsén'. Na' ba nacle toze len neto' bene' Israel, la'czla' cana' gocle bene' zito' len neto' na' len Diosen'. <sup>14</sup>Cana' neto' bene' Israel na' le'e bi nacle bene' Israel bgue'e lježcho. Perw Criston' ba bene' cont naccho toze na' ba bozoe' chio' binlo tocho yetocho. <sup>15</sup>Caten' bnežjw cuine' gote', bzoe' ca'ale ley da' bzoj da' Moisésén' len yogo' da' žan cheyała' goncho. Na' bzoen' ca'ale cont bozoe' chio' chejnilaže'chone' binlo tocho yetocho na' beyone' chio' to yež cobe che', chio' naccho bene' Israel lente chio' bi naccho bene' Israel. <sup>16</sup>Da' bnežjw cuine' gote' le'e yag cruzen', zoacho binlo len Diosen', chio' naccho bene' Israel na' chio' bi naccho bene' Israel, na' lecce naccho toze na' bich chgue'e lježcho.

<sup>17</sup>Na' Criston' caten' bide' yežlion' bedeye'e diža', gwne' benačhen' guac yesenite' binlo len Diosen', gwdixjue'eden' len le'e bi nacle bene' Israel, le'e bi nombia'le xtiža' Diosen' cana', na' lente neto' nacto' bene' Israel, neto' nombia'to' xtižen'. <sup>18</sup>Le chio' chejnilaže'cho Criston', chio' naccho bene' Israel na' len chio' bi

naccho bene' Israel, toz Spiritw che Diosen' chaclenen chio' cont choe'lencho Diosen' diža'. <sup>19</sup>Da'nan' le'e bi nacle bene' Israel bich nacle ca bene' zito' len Diosen'. San yogo' chio' chejnilaže'cho Criston' ba naccho txen, le Diosen' ba none' chio' ca bene' lo' yo'o che'. <sup>20</sup>Chio' chejnilaže'chone' zaca'lebcho ca to yo'o de yej. Na' neto' postlw na' yezica'chle bene' chesoe'lene' le'e xtiža' Criston' zaca'lebo' ca lene yo'ona'. Na' Jesucriston' zaca'lebe' ca yej squin che yo'ona'. <sup>21</sup>Na' chio' naccho txen len Criston' lecze zaca'lebcho ca yej da' zjancua' zjangoden' gan' chac yo'o de yeja'. Zjangoden' txen na' zej cha' yo'ona'. Ca'cze chio' naccho txen len Xancho Criston' na' len lježcho, na' naccho ca to yo'o gan' zoa Diosen'. <sup>22</sup>Le'e txen len neto' na' len note'teze bene' chesejnilaže' Criston' naccho ca to yo'o gan' zoa Diosen', le zoa Spiritw chen' lo' yichjlažda'ochon'.

**Diosen' gwleje' postlw Pablon' cont jatixjue'ede' xtižen' len bene' bi zjanac bene' Israel**

**3** Na' da' naquen ca', neda' Pablo chol' güiža' Diosen' neche le'e. Dia' ližya nga da' chyixjue'eda' xtiža' Cristo Jesús'en' len le'e bi nacle bene' Israel. <sup>2</sup>Chacda' ba nezeljele nži'ilaže' Diosen' neda' na' bsi'e xnezen' chzejni'ida' le'e xtižen'. <sup>3</sup>Ba bzejni'ide' neda' da' nono gwneze, can' ba bzoja' le'e to chope diža' le'e cart nga. <sup>4</sup>Cate' gwlable cart nga gacbe'ele chejni'ida' da' nono gwyejni'i cana' che Criston'. <sup>5</sup>Cana' Spiritw che Diosen' bi bzejni'in bene' da' nono gwneze che Criston',

perw na'a ba bzejni'in neto' postlw che Diosen', na' ba bzejni'in nochle neto' gwleje' cont choe'to' xtižen', neto' nacto' lo' na' Diosen'. <sup>6</sup>Da' nga bzejni'in neto', le'e bi nacle bene' Israel txen len neto' nacto' bene' Israel si'cho da' gwna Diosen' gone' che chio' naccho xi'ine' neche da' chejnilaže'cho Cristo Jesús'en', na' txen naccho ca toze bene', na' txenna' chaclen Diosen' chio' can' gwne' gone'.

<sup>7</sup>La'czla' bitec bi zaca', Diosen' gwleje' neda' len yela' guac chen' cont chyixjue'eda' diža' güen chen'. <sup>8</sup>Chacda' ne late'ze bibi zaca' ladjo yogo' bene' ba gwlej Diosen' zjanaque' lo' ne'e. Bia'cze nži'ilaže'de' neda' na' gwleje' neda' cont chyixjue'eda' len bene' bi zjanac bene' Israel catec da' zan da' güen juisyw gone' len yogo' chio' chejnilaže'cho Criston'. <sup>9</sup>Na' Diosen' gwlo'e lo' na' chzejni'ida' yogo'lol bene' da' nžie' bia' gac. Gwzolaoten cate' gwxe yežlion', nono gwneze da' nžie' bia' gac, con toz Diosen' gwnezde', Dios ben' bene' yogo'lol bene', yogo' beyixe' na' yogo' bichle da' de. <sup>10</sup>Le Diosen' nžie' bia' bene' ca' zjanac angl blao che' na' angl gwnabia' zjanita' yaban' yesele'ede' can' chone' len chio' chdop chžagcho chonxencho Jesucriston', cont yesacbe'ede' nape' yela' sina' len yogo'lol da' chone'. <sup>11</sup>Chone' can' bžie' bia' gone' caten' bina' xe yežlion', le cani'te bsi'e xnezen' sele' Xancho Jesucriston'. <sup>12</sup>Na' naccho txen len Criston' da' chejnilaže'chone'. Da'nan' bi chžebcho Diosen', san chbecho nezecho chac choe'lenchwn'e



diža'. <sup>13</sup>Nachen' chneyoeda' le'e bi gaczejlaže'le che da' chac chia' nga chy' chzaca' lagüe da' chyixjue'eda' xtiža' Jesucriston' len le'e. Naquen da' yebele, gague da' gaczejlaže'le.

### **Criston' chacde' chio' chejnilaže'chone'**

<sup>14</sup>Na' da' naquen ca', chzoa xiba' chol' güiža' Xa Xancho Jesucriston'. <sup>15</sup>Le' bxie' yogo' diaža che chio' zoacho yežlio nga na' che bene' že' yaba. <sup>16</sup>Diosen' naque' bene' zaca' juisyw na' nape' la'zelagüe' yela' guac xen. Nachen' chnabda'ne' gone' ga soa Spiritw chen' lo' lažda'olen' cont soa chach laže'le len yela' guac chen. <sup>17</sup>Chnaba' soateze soa Criston' len le'e da' chejnilaže'lene'. Na' chnaba' soaczele gaquele Diosen' na' gague lježle do yichj do laže'le, <sup>18</sup>cont gac šejni'ile txen len yezica'chle bene' zjanaque' lo' na' Diosen' catec chaquechgüe Criston' chio'. Da' xen chaquechgüede' chio', con bi cheyož yedo ca chacde' chio'. <sup>19</sup>Le' biña' šejni'icho catec chaquechgüede' chio'. Na' lecze chnaba' zej gacchle bene' güen doxen can' nac Diosen'.

<sup>20</sup>Na' Diosen' chac chone' yogo'lol, na' chone' da' gualch ca da' chnabechone' o da' choncho xbab gone'. Na' chone' cont Spiritw chen' zoan lo' yichjlažda'ochon' chaclenen chio' len yela' guac chen'. <sup>21</sup>Na' chio' chdop chžagcho chonxencho Criston', cheyała' gonxencho Diosen' na'a na' toli' tocañe da' gwsele' Cristo Jesúsén' neche chio'. Na' can' gonšcaczcho.

### **Naccho toze len yogo' bene' chesejnilaže' Criston'**

**4** Neda' dia' ližya nga da' chyixjue'eda' xtiža' Xancho

Jesucriston'. Nachen' chneyoeda' šejšcale gonle güen can' cheyała' goncho da' gwlej Diosen' chio' naccho xi'ine'. <sup>2</sup>Na' chata'yoeda' le'e bi gonxen cuinle, san le gon xbab bitec bi zaca'le; na' gacle bene' šagüe' na' gaple yela' chxenlaže' len bene' lježle na' le gacde' bite'teze yesone'. <sup>3</sup>Spiritw che Diosen' ba nonen chio' toze da' chejnilaže'cho Criston', na' le gon con ga zelao saque'le cont soaczele gonle toze xbab len bene' lježle, le Diosen' ba bozoe' le'e binlo' tole yetole. <sup>4</sup>Yogo' chio' chejnilaže'cho Criston' naccho ca toz bene', na' toz Spiritw che Diosen' zoan lo' yichjlaždao' yogo'cho. Na' cate' Diosen' gwleje' chio' cont naccho xi'ine', lecze bene' cont toz can' zoacho lez gone' güen len chio'. <sup>5</sup>Toz Jesucriston' naque' Xancho, na' toz can' chejnilaže'chone', na' toz ca zejen cate' chzoacho nis. <sup>6</sup>Na' toz Diosen' chonxencho ben' nac Xa yogo'cho. Len' chnabi'e yogo'cho, na' chchine' yogo'cho choncho xšinen', na' zoacze' len yogo'cho.

<sup>7</sup>Na' Criston' chaclene' to tocho na' none' checho gwde gwdele da' gon to tocho. <sup>8</sup>Da'nán' nyoj Xtiža' Diosen' žan:

Cate' beyepe' yaban' bebeje' bene' zan lo' na' gwxiyen' cont bechi'e legaque'.

Na' bi'e che benachen' da' gac gon to toe'.

<sup>9</sup>Na' can' žan: "Beyepe' yaban'", zejen betje' golje' benach yežlio nga na' gwden' gote' bgaše'. <sup>10</sup>Na' ben' betj golje' benach, lecze len' beyepe' yaban' gan' zoa Diosen', na' na'a zoe' chnabi'e doxen. <sup>11</sup>Na' lecze len'

none' che balcho naccho postlw, na' none' che balcho chyixjue'echo bi da' ba gwne', na' none' che yebalcho chje'cho diža' güen chen' len bene' biña' yesenden', na' yebalcho none' checho chgüia chna'cho bene' chesonxene' le' na' chsed chlo'echo legaque'. <sup>12</sup>Can' chon Criston' cont chio' naccho lo ne'en chac choncho xšinen'. Na' chonchon cont to to chio' naccho toze len le' zejeh gacchcho can' chazlažen'. <sup>13</sup>Diosen' chaclaže' yogo'cho gaccho toze šejnilaže'cho Xi'inen' do yichj do laže'cho na' gombia'chone' binlo. Chaclaže' gacyane'cho can' cheyała' gaccho, na' gaccho bene' güen can' nac Criston'. <sup>14</sup>Na' še gaccho ca', bich šo'cho xbab ca che to bidao', šejcho qui šejcho ca'ale na'ocho to to yela' chejnilaže' da' chesaljlaže' bene' güenlaže' na' bene' gwxiye' cont chesonlede' chio'. <sup>15</sup>Na' cheyała' güe'lencho bene' diža' li, perw gaccho bene' šagüe' len legaque' cont yesacbe'ede' le chaquechone'. Goncho ca' cont zejeh gacchcho bene' šagüe' bene' güen can' nac Criston' ben' chnabi'e chio'. <sup>16</sup>Cate' to to cuen cuerp chechon' ngoden' na' noxe' lježen len bela' na' len žit na' len bechj bnia ca' da' ncan', na' to to cuenen chesonen ž'in, nach doxen cuerp chechon' chonen žin ca cheyała'. Na' ca'cze chio' chejnilaže'cho Criston' ngode'cho txen cont to tocho goncho da' non Diosen' checho goncho, na' yogo'cho txen zej gacchcho bene' šagüe' na' zej gaquech lježcho.

**Diosen' ba bocobe' yichjlaždao'  
chio' chejnilaže'chone'**

<sup>17</sup>Da' nga chnia' le'e, Xancho Criston' none' mandadw

gwzejni'idan' le'e: bi cheyała' soacho goncho xbab ca cheson bene' bi chesejnilaže' Diosen', le bibi zacan'. <sup>18</sup>Nchoi yichjlažda'ogaque'. Na' bi zjanape' yela' mban toli tocañe ca da' non Diosen' chio', neca chesejni'ide' che Diosen', le zjanaque' bene' güedenag len le'. <sup>19</sup>Bibi zto' zjanombi'e che da' malen' chesone', na' con chesonteze' yogo' yela' zto', na' chesezelaže' yesenite' yesonche' da' malen'. <sup>20</sup>Le'e ba nsedle can' ža Criston' na' nezele bi cheyała' goncho ca', <sup>21</sup>le chacda' ba benele dižan' gwne' lo' yichjlažda'olen', na' neto' lecze ba bzejni'ito' le'e diža' li chen'. <sup>22</sup>Nezele bich cheyała' gwzenagcho che da' malen' da' chzelaže' lažda'ochon' goncho, can' bencho cana' cate' yela' gwzelaže' chechon' ne' chonlen chio' cont bentezcho da' malen'. <sup>23</sup>San na'a cheyała' gwša'cho xbab da' choncho lo' yichjlažda'ochon'. <sup>24</sup>Cheyała' güe'cho latje yocobech Diosen' yichjlažda'ochon' cont soacho goncho da' zej to li can' chon le', na' gaccho bene' laždao' xilaže' can' chazlaže' le'.

<sup>25</sup>Da'n'an' bich gonlaže'cho, san güe'len lježcho diža' li, le ngode' lježcho naccho ca toze bene'.

<sup>26</sup>Na' cate' chža'acho bi cheyała' goncho da' xinj. Cheyała' yob yeyacxenlaže'cho na' bich ža'acho do ža. <sup>27</sup>Na' bi güe'cho latje cont Satanás dan' chnabia' da' xigüe' ca' nabian' xbab chechon' cont goncho da' xinj.

<sup>28</sup>Na' nole še ba yolaole chbanle, bich cheyała' cuanle. Cheyała' gonle žin da' nac güen len nia' na'le cont gata' da' gwnežjwle bene' chyažj chchine.

<sup>29</sup>Na' bi cheya<sub>la</sub>' güe'cho bite'teze diža' zban, san güe'cho diža' šagüe' len yogo'lo<sub>l</sub> bene', con can' chyažje to toe' cont gaclenen le'. Goncho ca' cont xtiža'chon' gaquen da' zaca' gwzenag bene'. <sup>30</sup>Na' bi goncho cont yeyaše'laže' Spiritw che Diosen', le Diosen' ba bene' ga zoan lo' yichjlažda'ochon' cont nezecho naccho xi'ine' na' nezecho žin ža yedyexi'e chio'.

<sup>31</sup>Cheya<sub>la</sub>' cuejyichjcho yogo' da' mal, bich gonchon. Bich co'olaže'cho, bich ža'acho, na' bich güe'cho diža' loc diža' lžej. Bi necho che bene', neca gaccho bene' xi'a.

<sup>32</sup>San cheya<sub>la</sub>' gaccho bene' šagüe' na' yeyaše' lježcho tocho yetocho. Na' cheya<sub>la</sub>' yezi'xen che lježcho bite'tez da' chesonde' chio' con can' bezi'xen Diosen' checho cate' gwyejnilaže'cho Criston'.

### Cheya<sub>la</sub>' goncho can' chon Diosen'

**5** Nachen' cheya<sub>la</sub>' soacho goncho can' chon Diosen', le naccho xi'ine' na' chacde' chio'.

<sup>2</sup>Cheya<sub>la</sub>' soacho gague lježcho ca Criston' chacde' chio' na' bnežjw cuine' gote' neče chio'. Na' chebe Diosen' da' bene' ca', can' chebe bene' to da' chl'a' zix.

<sup>3</sup>Da' naccho lo' na' Diosen' cheya<sub>la</sub>' gue'echo da' malen'. Gwbatech cheya<sub>la</sub>' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto' len cuerp chechon'. Na' bi cheya<sub>la</sub>' selaže'cho da' de che bene'. <sup>4</sup>Bi cheya<sub>la</sub>' güe'cho diža' da' naquen da' yela' zto' o bite'teze diža' le'e, diža' da' bibi zaca' da' bi nca' xneze, le bi zejen güe'cho dižan'

zjanac ca'. San cheya<sub>la</sub>' soacho güe'cho yela' choxc<sub>l</sub>en che Diosen'.

<sup>5</sup>Nita' bene' byo ben' chesata'lene' no'ole bi nac xo'olgaque' na' nita' no'ole ben' chesata'lene' bene' byo bi nac bene' chegaque', na' nita' bene' chesyebede' dan' naquen da' yela' zto'; na' nita' bene' chesezelaže' bi da' de che bene'. Ba nezecele bene' ca' cheson da' malen' zjanac ca' bi yesyežine' yaban' gan' chnabia' Criston' len Diosen'. (Na' ca nac bene' chesezelaže' bi de che bene', toz ca malen' chesone' len da' cheson bene' chesejnilaže' l' gua'a l'sacan'.) <sup>6</sup>Bi güe'le latje no siye' le'e len diža' güenlaže'. Diosen' chnežjue' castigw toli' tocane che bene' ca' bi chosozenag che', bene' cheson da' mal ca' ba gwnia'. <sup>7</sup>Da'nan' bi cheya<sub>la</sub>' gaccho txen len bene' cheson ca'.

<sup>8</sup>Cana' ncho<sub>l</sub> yichjlažda'ochon', perw na'a ba yo'on be'ni' che Xancho Criston', na' cheya<sub>la</sub>' soacho goncho da' güen can' chaclaže' Diosen' gon chio' nombia'chone'. <sup>9</sup>Na' še ba gwyo'o be'ni' che Criston' lo' yichjlažda'ochon', nach gaccho bene' šagüe' na' goncho da' güen da' zej to licha. <sup>10</sup>Cheya<sub>la</sub>' gwsedcho cont nezecho can' chaclaže' Xancho Criston' goncho. <sup>11</sup>Bi cheya<sub>la</sub>' goncho txen len da' malen' cheson bene' ca' zjancho<sub>l</sub> yichjlažda'ogaque', le chesone' da' bibi zaca'. San cheya<sub>la</sub>' gwzejni'icho legaque' da' malen' chesone', <sup>12</sup>le naquen da' cheto'echo güe'cho diža' che da' ca' chesone' do bagaše'ze. <sup>13</sup>Na' cate' be'ni' che Criston' šon' lo' yichjlaždao' bene', nach yesacbe'ede' che bite'teze da' chesone' še naquen da' mal, le

be'ni' chen' chzejni'in be\_nachen' che xbab chegaque' na' bi da' chesone' še naquen güen o še naquen mal. <sup>14</sup>Da'n'an' nyojen quinga che note'teze bene' chon da' malen':

Naco' ca bene' chtas na' ca bene' guat da' bi chzenago' che Diosen'.

Bzenag che' cont Criston' cue'e be'ni' lo' yichjlažda'oguo'.

<sup>15</sup>Nachen' cheya\_la' soacho na'cho dan' choncho. Cheya\_la' goncho da' naquen da' sina', gague goncho ca bene' bi chejni'i. <sup>16</sup>Na' yogo' ža cheya\_la' goncho can' chazlaže' Diosen', le na'a ž'e'chgua bene' chesone' da' malen'.

<sup>17</sup>Bi goncho ca bene' bibi xbab nye'. Cheya\_la' šejni'icho can' chaclaže' Diosen' goncho cont gonchon. <sup>18</sup>Na' bi cheya\_la' gaccho bene' borrašw, le bene' chesezožde' chosožiai' cuine'. San chio' cheya\_la' güe'cho latje soachgua Spiritw che Diosen' lo' lažda'ochon' nabian' chio' len da' choncho. <sup>19</sup>Cheya\_la' gwšaljlen lježcho no salmos na' gollen lježcho no himnos o bichle da' ža Spiritw che Diosen' golcho. Na' cheya\_la' nechon na' golchon do yichj do laže'cho gonxencho Xancho Jesucriston'.

<sup>20</sup>Yogo' ni'a cheya\_la' güe'cho yela' choxclen che Xacho Diosen' che yogo' da' chone' chaclene' chio'. Na' Xancho Jesucriston' zoe' chaclene' chio' cont güe'cho yela' choxclen che'.

**Can' cheya\_la' soalen bene'  
lo' yo'o chechon'**

<sup>21</sup>Da' chapcho Diosen' bala'an cheya\_la' gwzexjw yichjcho gwzenagcho tocho yetocho.

<sup>22</sup>Na' le'e no'ole, le'e nšagna'le, to tole cheya\_la' gwzenagle che bene'

chele, le chzenagle che Xancho Criston' cate' chzenagle chegaque'.

<sup>23</sup>Diosen' nzoe' bene' chele cont zjanacche' blao ca le'e, can' nzoe' Criston' nacche' blao ca chio' chdop chžagcho chonxenchone'. Le chion' guac nacho naccho cuerp che Criston', na' le' none' chio' yela' mban toli tocane. <sup>24</sup>Na' ca chio' chonxencho Criston' cheya\_la' gwzenagcho che', ca'czen' le'e no'ole le'e nšagna'le, to tole cheya\_la' gwzenagle che bene' chele yogo' bin' chese'e le'e.

<sup>25</sup>Na' le'e bene' byo le'e nšagna'le, to tole cheya\_la' gague no'ol chelen' con can' chaque Criston' chio' chonxenchwne' na' bnežjw cuine' neche chio' cate' gosote'ne'. <sup>26</sup>Na' cont gwlo'e chio' lo' na' Diosen', beyone' lažda'ochon' xilaže' cate' gwyejle'cho xtižen'. <sup>27</sup>Na' bene' ca' cont yebede' chio' cate' yežincho lagüen', bibi xto\_la'cho gata' na' ne bichle da' mal yo'o nyaz lo' yichjlažda'ochon', san gac lažda'ochon' xilaže' lagüen'. <sup>28</sup>Na' con can' nži'ilaže' Criston' chio', can' cheya\_la' ži'ilaže' to to bene' byo no'ol chen'. Le'e bene' byo, to tole cheya\_la' ži'ile no'ol chelen' can' nži'ile cuerp chelen', le nži'icze cuinle cate' chonle ca'. <sup>29</sup>Nono zoa no chgue'e cuerp che', san yogo'cho nži'icho cuerp chechon' na' chapši'ichon. Na' can' chon Criston' len chio' chonxenchone', nži'ide' chio' na' chapši'e chio'. <sup>30</sup>Na' chone' ca' da' naccho ca to cuen güeje cuerp chen', ca žit da' yo'e na' ca xpele'. <sup>31</sup>Na' Xtiža' Diosen' nyojen žan: "Da'n'an' bene' byo le'e len xaxne'e na' si'e no'olen'

gwšagna'lene' le' na' yesaque' toze.”  
<sup>32</sup>Diža' quinga ba bzoja' naquen to da' nono gwyejni'i cani', perw chnia' naquen to da' chzejni'in chio' chdop chžagcho chonxencho Criston' cont nezecho can' cheyała' soacho len le'.  
<sup>33</sup>Na' lecze ca' le'e bene' byo le'e nšagna'le, to tole cheyała' gague no'ol chele can' chaque cuinle, na' le'e no'ole nšagna'le, to tole cheyała' gape bala'an bene' chele.

**6** Na' le'e bidao, le gwzenag che xaxna'le, le can' cheyała' gon chio' naccho txen len Xancho Criston'.  
<sup>2</sup>Cate' Diosen' bnežjue' xoxxta'oto' ca' ley chen', gwne': “Le gap bala'an xaxna'le.” Na' goquen da' nechw da' bžie' bia' yesone' da' nsa' to da' güen da' gone' len legaue' še yosozenague' chen, gwne': “Le gap bala'an xaxna'le  
<sup>3</sup>cont gac güen chele na' cont banle sša lo yezlio nga.”

<sup>4</sup>Na' le'e nita' xi'inle, le yosgol le yoscha'o bi' chele ca' binlo, diža' šagüe' gwzejni'ile legacbe' cont yosozenagbe' che Xancho Criston' na' gague con gonle ga yeseža'a yeselocbe'.

<sup>5</sup>Na' le'e mos, le gwzenag che xan žin chelen' do laže'le na' le yeyiljwlaže' naquen' gonle da' yesazlaže' to toe', le lecze chzenagle che Criston' caten' chzenagle chegaue'.

<sup>6</sup>Le gwzenag chegaue' do yichj do laže'le, gague cate'zen' chesene' can' chonlen', le nacle bene' güen xšin Criston', na' can' chaclaže' Diosen' goncho.  
<sup>7</sup>Na' cheyała' güe'laže'cho goncho žin che bene' cont yebe Xancho Criston' chio', gague cont yebe bene' nac xan

žin na'ze.  
<sup>8</sup>Goncho ca', le nezecho bite'teze da' güen da' choncho, Xancho Criston' gone' cont žin ža yebi'in güen len chio', chio' naccho esclavos na' len chio' bi naccho esclavos.

<sup>9</sup>Na' le'e nacle bene' xan žin, le gon güen len bene' ca' cheson xšinle. Bitw co'ole legaue' šeb, le Xancho Diosen' zoe' yaban' chna'cze' can' chonlen', na' lecze chna'cze' can' cheson bene' güen žin chelen', na' toz can' chone' len yogo'lol bene' note'teze zjanaue'.

#### Can' goncho cont Satanásen' bi gonen chio' gan

<sup>10</sup>Nachen' bene' migw, da' naccho txen len Xancho Criston', cheyała' soachachcho šejnilaže'chone', le nape' yela' guac xen cont chaclene' chio'.  
<sup>11</sup>Cheyała' gon cuincho gual doxen can' chaclaže' Diosen' goncho, cont soachachcho bi šejle'cho che Satanás dan' chnabia' da' xigüe' ca' cate' chyiljwlažen' siyen' chio'.  
<sup>12</sup>Le gague bene' nac bela' chenna' chdillencho, san chdillencho da' xigüe' ca', da' ca' besyeyaquen da' mal, na' bichle da' chesenabia' bene' že' yezlio nga bene' nchol yichjlažda'ogaue' len da' malen'. Chdillencho yogo'lol spiritw mal ca' gate'teze chesašen.  
<sup>13</sup>Da'nan' cheyała' gon cuincho gual doxen can' chaclaže' Diosen', cont Satanásen' bi soeczen chio' ža cate' tillenen chio'. Na' cate' ba bencho can' chazlaže' Diosen', nach cheyała' soachachcho len le'.  
<sup>14</sup>Na' cont soachachcho bi siye' Satanásen' chio', cheyała' güe'cho diža' li yogo' ni'a. Na' še goncho

ca', gaclenen chio' ca da' chčhej soldadon' cho'a li'e. Na' cheyała' goncho da' nac güen yogo' ni'a, le še goncho ca', gwcue'ejen chio' ca xa soldadon' da' naquen de ya chcue'ejen cho'alcho'e. <sup>15</sup>Na' cheyała' soacho probnidw güe'lencho bene' diža' güen che Criston' da' chzejni'in can' guac soacho binlo len Diosen'. Na' še soacho probnidw güe'lenchon bene', gaclenen chio' can' chaclen xel soldadon' le'. <sup>16</sup>Na' da' zejechen ca bichle da' goncho, cheyała' soachachcho šejnilaže'cho Diosen'. Na' še soachachcho šejnilaže'chone', nach gaclenen chio' cont bi gwzenagcho che Satanásen'. Gaclenen chio' ca escudo da' chčhin soldadon' chaclenen le', chosolen yi' che flechas ca' da' chesala'ninen zja'aquen gan' zien', na' chcue'ejen le' len da' ca' zja'ac yesevidjon cuerp chen'. <sup>17</sup>Na' cheyała' yosa'laže'cho Criston' ba bene' yela' mban checho toli tocane, cont gaclenen chio' ca chaclen lapa' de ya da' chčhin soldadon'. Na' lecze Xtiža' Diosen' da' ben Spiritw che Diosen' cont nyojen, le gonchgua xbab chen cont gaquen len le'e ca to spada da' chčhin soldadon'. <sup>18</sup>Na' do tiemp cheyała' yol güižcho Diosen' nabcho yogo' da' chzejni'i Spiritw chen' chio'. Na' cheyała' gaccho bene' banlaže' na'

yol güižchone' sin cbi yeche'echo, nabcho gaclene' yogo' bene' ba gwleje' cont zjanaque' lo ne'e. <sup>19</sup>Na' le nab gon Diosen' latje gua' xtižen', na' le nab bi žeba' gua' diža' tcho'a gwzejni'ida' bene' diža' güen che Criston' da' nono gwneze cani'. <sup>20</sup>Le Diosen' gwsele' neda' ca gualaze' cont bia' xtižen', na' da'nan' dia' ližya nga. Nachen' le nabe Diosen' gaclene' neda' bi žeba' gua' xtižen' tcho'a can' cheyała' guan'.

**Pablon' chone' chach laže'gaque'**

<sup>21</sup>Chsela' bene' migw checho Tíquico güe'e diža' doxen can' chac cont nezele can' chac chia' na' yogo' da' chona'. Chaquecho Tíquicon' da' naque' txen len chio' chonxencho Criston' na' zoateze' chone' xšin Xancho Criston' can' cheyała' gone'. <sup>22</sup>Nachen' chsela'ne' cont nezele can' chac cheto' na' cont gone' chach laže'le.

<sup>23</sup>Chnaba' lao Xacho Diosen' len Xancho Jesucriston' yesonšque' cont yogo'le chonxenle Criston' soa cuezle binlo len yichjlažda'olen', na' lecze yesonšque' cont yogo'le gaque lježle na' soachachle šejnilaže'lene'. <sup>24</sup>Soašcacze Diosen' gaclene' yogo' bene' chesacde' Xancho Jesucriston' sin cbi yesebeze'. Da' na'zen' chzoja'.

# CART DAN' BZOJ POSTLW SAN PABLO CHE BENE' CA' ŽE' FILIPOS

---

**Pablo bzoje' carten' šlac die' ližya**

**1** Neda' Pablo chseļa' cart nga txen len bene' lježa' Timoteo. Chopte neto' gwlej Diosen' cont chonto' xšinen', bite'tezen' že'. Na' chzoja' cart nga che yogo' le'e zoale ciuda Filipos, le'e yo'ole lo na' Diosen' lagüe chejnilaže'le Cristo Jesúsēn'. Na' le'e nchojle chgüia chṇa'le bene' lježle chesejnilaže'ne', na' le'e nchojle chonle žin bixjw da' chata' ladjo le'e chdop chžagle chonxenlne', decze da' ṇia' le'e len cart nga. <sup>2</sup>Chṇabšca' lao Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab da' yo'ole lo' yichjlažda'olen'.

**Pablo chṇabde' Diosen' gaclene' bene' ca' chesejnilaže' Criston' Filipos**

<sup>3</sup>Yogo' ṇi'a cate' chjayze'eda' le'e, choa' yela' choxcen che Diosen' ba naccho txen chejnilaže'chone'. <sup>4</sup>Na' yogo' ṇi'a cate' chol güiža' Diosen', chbeda' chṇaba' gaclene' le'e. <sup>5</sup>Na' choa' yela' choxcen chen' naccho txen chejle'cho diža' güen che Jesucriston', gwzolaoten cate' za' gwyejnilaže'lne'. <sup>6</sup>Na' da' nga nezda',

Diosen' gwzolaגיע' chone' to da' güen lo' yichjlažda'olen' cana', na' gone' cont yeyož yeyac yichjlažda'olen' can' chazlažen' cate' žin ža yid Jesucriston' da' yoble. <sup>7</sup>Da' cheyaļa'cze gona' xbab chele ca', le chacchgüeda' le'e. Na' nezda' Diosen' ba goclene' le'e can' ba goclene' neda' šlac dia' ližya nga, na' šlac ba gwduxje'eda' diža' güen che Criston' len bene' bi gosejle'e chen, bzejni'ida' legaque' naquen diža' li. <sup>8</sup>Diosen' nezde' chacchgüeda' yogo'le, le Cristo Jesúsēn' chone' cont chacda' le'e. <sup>9</sup>Na' chṇabda' Diosen' gonšque' cont gaquechlne' na' gaqueche lježle na' lecze šejni'ichle yogo'lo' da' chaclaže' Diosen' šejni'ile na' gacbe'ele bi da' naquech güen gonle cont gaclen lježle. <sup>10</sup>Chṇaba' da' ca' cont gacbe'ele bin' chazlaže' Diosen' gonle, na' lecze cont soacze do laže'le na' bibi doļa' gapple cate' žin ža yid Criston' da' yoble. <sup>11</sup>Nach gaclen Jesucriston' le'e gonchgüale da' nac güen, na' Diosen' si'e yela' bala'aṇ na' yezica'chle bene' yesonxene' Diosen' can' chonlen'.

**Pablon' chacde' Criston'  
do yichj do laže'**

<sup>12</sup>Bene' migw, che'nda' nezele yogo' dan' ba goc chia' ba



gosaclenen cont bene' zanch  
 gosende' diža' güen che Criston'.  
 13Le yogo'lol soldadw gop ca'  
 cheson žin che bene' gwnabia'  
 nga, na' yezica'chle bene' že' do  
 nga zjanezde' dia' ližya neche  
 choa' xtiža' Criston'. 14Na' bene'  
 zan bene' lježcho že' nga lecze ba  
 chesejnilaže'chgüe' Xancho Criston'  
 da' ba besele'ede' can' chaclene'  
 neda' šlac dia' ližya nga. Da'nan'  
 legaque' lecze ba chesyeyaxchde'  
 cheso'e xtiža' Diosen' sin ca  
 chesežebe'.

15Da' li bale' chesyixjue'ede' xtiža'  
 Criston' da' chesacxi'ede' neda' na'  
 da' chesaclaže' yesacche' blaoch  
 ca neda', perw yezica'chle bene' ca'  
 chesyixjue'eden' do laže'. 16Na'  
 bene' ca' to cuen chesyixjue'ede'  
 xtiža' Criston' cont yesacxen  
 cuine', gague chesyixjue'eden' do  
 laže'gague'. Chesone' xbab zoayaša'  
 da' chesyixjue'eden'. 17Na' bene'  
 ca' yezica'chle chesyixjue'eden'  
 lagüe chesacde' Criston' na'  
 chesacde' neda', le zjanezde' neda'  
 dia' ližya nga neche chzejni'ida'  
 bene' bi chesejle'e diža' güen che  
 Criston', chape'gaca'ne' naquen  
 da' li. 18Perw bibi nonen len neda'  
 še chesyixjue'eden' do laže' o še  
 gague do laže', con chebeda' cheso'e  
 diža' che Criston' da' nac diža' li.

Na' dechcze da' chebeda', 19le  
 nezda' yechoja' güen len da' quinga  
 chac chia' lagüe dan' chñable gaclen  
 Diosen' neda' na' lagüe dan' zoa  
 Spiritw che Jesucriston' len neda'  
 chonen chačh laža'. 20Da'nan' zoa'  
 lez gaclen Diosen' neda' gua' xtiža'  
 Criston' sin cbi žeba'. Na' la'czla' še  
 soacha' o la'czla' še gata', chaclaža'

si' Criston' yela' bala'an na'a len da'  
 gona' na' len da' gac chia' con can'  
 ba gwxi'e yela' bala'an. 21Chzelaža'  
 gacxen Criston' len bite'tez da'  
 chona' šlac ne' mbana', na' lecze  
 nezda' soa' mbalazchgua cate' ba  
 gota', le šjayzoalena'ne'. 22Perw še  
 soacha' yežlio nga na' goncha' xšin  
 Xancho Criston' cont šanch bene'  
 yesejnilaže'ne', o še gata', bi nezda'  
 non' nac güench. 23Naquen zdebe  
 nia' non' naquech güen, še soacha' o  
 še gata', le yebeda' gata' na' šjayzoa'  
 len Criston', na' mbalazech soa'  
 neda', še ca'. 24Perw lecze chona'  
 xbab le'e chyažjele soacha' banča'.  
 25Na' da' chacbe'eda' chyažjele  
 soacha', nezda' soacha' len le'e  
 cont gaclena' soachle mbalaz da'  
 chejnilaže'le Criston' na' soačhačle  
 šejnilaže'ln'e'. 26Na' cate' yechoja'  
 nga soacha' len le'e da' yoble, yebele  
 güe'le diža' can' ben Cristo Jesús'en'  
 cont bechoja' ližyan'.

27Na' bite'teze gac, le soa le  
 gon da' güen can' cheyała' gon  
 chio' ba bzenagcho che diža' güen  
 che Criston'. Le gon ca' cont še  
 yedena'a le'e o še bi yedena'a le'e,  
 con che'nda' yenda' rson chele  
 zoačhačle len toze xbab, chonle  
 txen len bene' lježle, na' chonle  
 con ca zelao chzaque'le cont  
 yezica'chle bene' yosozenague'  
 xtiža' Criston' da' ba chejnilaže'le,  
 28neca žeble še bi yesone bene'  
 le'e neche chesegue'ede' le'e.  
 Še bi žeble da' yesonde' le'e,  
 gonen cont yesacbe'ede' ba zoa  
 yesebiaye'e toli tocane; lecze  
 gonen cont yesacbe'ede' Diosen'  
 gone' cont šjayzoale len le'. Yogo'  
 da' ca' zjanaquen da' gon Diosen'.

<sup>29</sup>Na' Diosen' ba bsi'e xnezen' gacxen Criston', gague lagüe da' chejnilaže'lene' na'zen', san lecze gacxene' da' yosoči yososaca' bene' le'e neche chejnilaže'lene'. <sup>30</sup>Le'e len neda', toz can' chosoči chososaca' bene' chio'; na' ba ble'ele can' bchejda' len da' ba gosonde' neda' cana', na' ba nezele can' chac chia' na'a.

**Criston' chaxene' da' bzande' yela' zaca' che' cont bide' golje' benach**

**2** Nezda' zoale mbalaz da' chejnilaže'le Criston', nezda' chaclaže'le gonle da' güen lagüe dan' chaque Criston' le'e, nezda' zoa Spiritw chen' len le'e, na' nezda' chaque lježle na' cheyaše'laže'lene' cate' bi da' chesac che'. <sup>2</sup>Da'nan' chneyoeda' le'e, le gon cont yebechgüeda' nezda' lecze yogo'czle nacle toz len lježle, na' yogo'czle toz can' zoale chaquele Criston', toz can' chonle xbab, na' toz can' chaclaže'le gac. <sup>3</sup>Bibi cheyala' goncho cont gac güen che cuinzcho na' bibi goncho cont gacxen cuincho, san cheyala' gwzejwlaže'cho na' goncho xbab zaca'ch bene' lježcho clal ca chio'. <sup>4</sup>Ne tocho bi cheyala' cue' yichjcho che cuinzcho, san cheyala' cue' yichjcho che dan' gaclenen bene' lježcho ca'.

<sup>5</sup>Cheyala' goncho xbab ca xbab da' ben Cristo Jesúsén'. <sup>6</sup>Le la'czla' naque' Dios, bzande' yela' chnabia' che' na' yela' bala'an xen che' dan' nape' lagüe da' naque' toz len Xe' Diosen' cont bide' golje' benach. <sup>7</sup>Bzoe' to šla'ale yogo' da' zaca' dan' gota' che', na' ben cuine' bene' güen xšin Diosen' cate' golje' benach. <sup>8</sup>Na'

ba naque' benachen' bzejwlaže' cont bene' con can' gwna Xe' Diosen'. Bzenague' che' cont bnezjw cuine' gosote'ne' le'e yag cruz ca chesote' bene' malchgua. <sup>9</sup>Da'nan' Diosen' benxenchgüe' le' na' bsi'e xnezen' cont Jesucriston' naque' Xan benach, angl, da' xigüe' na' yogo' bichle da' de, na' cont Jesucriston' chnabia'che' ca note'tezechle. <sup>10</sup>Na' žin ža cate' yogo'lol benach na' yogo'lol angl ca' yosozoa xibgaque' lao Jesucriston', bene' že' yaba, yežlion' na' gate'tezechle. Na' lecze ca' yeson da' xigüe' ca'. <sup>11</sup>Yogo'lol bene' yo'o biš grasyw yosozexjwyichje' yesene' le Jesucriston' nape' la'zelagüe yela' gwnabia' xen. Na' Xancho Diosen' gacxene' cate' yogüe' yesene' ca'.

**Bene' chesejnilaže' Criston' zjazaca'lebde' ca be'ni'**

<sup>12</sup>Da'nan' bene' migw, con can' ba gwzoale bzenagle chia' cate' gwzoa' len le'e, ca'czen' chonchen byen gwzenagle chia' na'a bi zoa' len le'e. To tole le gon cont nacbia' Diosen' ba bene' le'e yela' mban toli tocane, na' le soa cueze gwsaca'le gonle can' chazlaže' Diosen'. Le gon ca' do chžeble, le nezecho bi soečo da' malen' še ba chzenagčo chen. <sup>13</sup>Na' Diosen' chone' cont che'nele gonle can' chazlažen', na' chaclene' le'e chonlen.

<sup>14</sup>Le gon yogo' dan' chazlaže' sin cbi gacyožlenine', neca žeše'le che'. <sup>15</sup>Le gon ca' cont yesacbe'e bene' chonle can' chazlaže' Diosen' sin cbi dol'a gapple. Bibi da' xinj gonle. Bi gonle ca' cheson bene' laždao' mal ben' chesonchgua clele. Nach gacle ca to da' chseni' len yezica'chle bene'

že' yežlio nga, <sup>16</sup>güe'lenle legaque' xtiža' Criston' da' nsa' yela' mban toli tocanē. Še gonle ca', nach cate' yid Criston' da' yoble, yebechgüeda' can' benlen' na' nezda' dan' bžaglagua' bena' xšin Diosen' gan' zoalen', gague bendadzan'na'. <sup>17</sup>Le'e chzane cuinle chonle xšin Diosen' lagüe dan' chejnilaže'lene', na' da'nan' zaca'leble ca to beyixe' be ba gosot bene' cont bosozeye'ba' gosonxene' Diosen'. Na' neda', chebeda' chzanda' yela' mban chia' cont gac doxen can' chazlažen', na' da'nan' zaca'leba' ca to vino da' chosolalje bene' lao Diosen' cate' chesonxene'ne'. <sup>18</sup>Le yebe len neda' da' chzane cuina' gac da' gac chia', na' le soa mbalaz can' zoa' neda'.

#### Timoteo na' Epafrodito

<sup>19</sup>Zoa' lez gon Xancho Jesúsen' latje yob sela' Timoteo gan' zoalen', le yebechgüeda' yenda' can' ba chonlen'. <sup>20</sup>Le nono nochle zoa bene' sela' bene' chi'chgua yichje' gac güen chele can' chi' yichj Timoteon'. <sup>21</sup>Yezica'chle bene' con zjachi' yichjgaque' che dan' chac chegaque', na' bi zjachi' yichje' can' chaclaže' Jesucriston' gac. <sup>22</sup>Perw nezeczele ca zoacze Timoteon' chone' da' zaca', na' nezele can' ba goclene' neda' cont gwduxjue'eda' xtiža' Diosen' zan yež. Ca bene' chaque xe' zoe' chaclene'ne' len xšinen', can' zoa Timoteon' chaclene' neda'. <sup>23</sup>Da'nan' zoa' lez guac sela'ne' gan' zoalen' cate' la' nezteda' nac gac chia' nga, <sup>24</sup>na' sela'ne' la'czla' chejli'a gon Xancho Criston' cont lecze neda' yob yedena'a le'e.

<sup>25</sup>Na' lecze chacda' chonen byen yesela' bene' lježcho Epafrodito

gan' zoalen', ben' gwseła'le nga cont chaclene' neda' len bi da' chyažjda'. Ba bene' xšin Diosen' txen len neda', na' lecze ba gwdi gwxaca'to' txen. <sup>26</sup>Che'nchgüede' yele'ede' le'e, na' leca da' chacde' gwnezele gocšende'. <sup>27</sup>Na' da' li gocšenchgüede', yelate'ze ca gote', perw Diosen' beyaše'de' le', na' bi nacho toz le' beyaše'de', san lecze beyaše'de' neda' cate' beyone' le', le da' zan da' ba goc chia' na' nyaše'chgua goc chia' šaca' gote'. <sup>28</sup>Da'nan' zelaže'cha' yesela'ne' gan' zoalen' cont soale mbalaz yežagle da' yoble na' cont bich soayaše'le che'. <sup>29</sup>Le gwlebe' binlochgua da' naque' txen len chio' chejnilaže'cho Xancho Criston', na' le gon xbab ba bene' to da' zaca', na' lecze ca' le gon xbab che nochle bene' chon can' ba benen'. <sup>30</sup>Le yelate'ze ca gote' da' bzane cuine' goclene' neda' nga len xšin Criston', can' goncze le'e šaca' zoale nga len neda'.

#### Soa cuezcho goncho can' chazlaže' Diosen'

**3** Na' na'a bene' migw, cheyala' soacho mbalaz da' chejnilaže'cho Xancho Criston'. Bi chacda' zed chozoja' che da' ca' ba bzoja', le chyažjen gonchle xbab chen. <sup>2</sup>Le gwsaca' cont bi gwzenagle che bene' ca' chesene' cheyala' soale señw dan' že' circuncisión da' yesechogue' lo cuerp chelen', le zjanaque' bene' zban na' chesyelalde' chesone' da' mal. <sup>3</sup>Le de to señw checho cont nezecho naccho xi'in Dios. Señwna' naquen da' ba ben Diosen' chio' Spiritw chen' cont chaclenen chio'

chonxenchone'. Chebechgüecho chejnilaže'cho Cristo Jesúsén', na' bi zoacho lez gata' bichle da' gaclenen chio' lao Diosen', ca no señw da' zoa lo cuerp chechon' o bichle da' goncho. <sup>4</sup>De da' zan da' guac gona' xbab gaclenen neda' lao Diosen' šaca' chacda' yebe Diosen' neda' neče da' ba bena' o nac naca'. Nono zoa no nacho ba benche' da' zan da' yebe Diosen' ca neda'. <sup>5</sup>Le naca' bene' Israel na' golja' lo diaža che da' Benjamín, na' bosozoe' neda' señw che circuncisión to xmanzda'. Na' goljlena' diža' hebreo da' nac xaxna' a bene' chesaque' diža' hebreo. Na' bsedyana' ley dan' bzoj da' Moisésén' con can' chosozejni'i bene' fariseo ca' len. <sup>6</sup>Na' leca gwche' yichja' diža' gole che bene' Israel gualaž chia'. Da'n'an' bchi bsaca' bene' ca' chesejnilaže' Criston'. Na' con ga zelao gwzoeda' bzenaga' che yogo' dan' ža ley cheton' cheyala' gonto' o bi cheyala' gonto'. <sup>7</sup>Na' cana' bena' xbab yogo' da' ca' yesaclenen neda' cont yebe Diosen' neda', perw na'a ba chacbe'eda' bi yesaclenen. Ba bchojyichja' da' ca' cate' gwejnilaža' Criston', le gocbe'eda' bi yesaclenen neda' lao Diosen'. <sup>8</sup>Na' na'a da' nombi'a Xana' Cristo Jesúsén' naquen da' zaca'chgua len neda'. Bibi zaca' yogo' da' ca' godca' cana' yesaclenen neda' lao Diosen'. Yogo' da' ca' bebeda' cana' ba zjanaquen ca to da' bibi zaca' len neda', na' nonan' ca to beb da' ba gwcho'ona' cont gombia'cha' Criston'. <sup>9</sup>Le zelaže'chgua' gaca' toz len Criston', na' zelaža' na Diosen' naca' bene' güen len le'. Na' nezda' ne' naca' bene' güen len le' da'

chejnilaža' Criston', gague lagüe da' chona' bi da' ža ley dan' bzoj Moisésén' cheyala' goncho. Le con bene' chesejnilaže' Criston' none' legaque' ca bene' güen. <sup>10</sup>Chaclaža' gombia'cha' Criston' na' gombi'a yela' guac che' dan' nape' lagüe bebane' ladjo bene' guaten', na' chzanlaže' cuina' saca'zi'a can' gwdi gwxaca' le'. Na' ca Criston' gote' neče xtolan', chaclaža' gaca' ca to bene' guat len da' malen', bich gonan'. <sup>11</sup>Zoa' chbeza' ca', le cheyiljwlaža' nacle gona' cont yechis yosban Diosen' neda' ladjo bene' guat ca' cate' ba gota'.

**Pablo chaclaže' gac yichjlažda'ogüe'  
can' nac yichjlaždao' Criston'**

<sup>12</sup>Bi nia' bach nac yichjlažda'ogua' can' cheyala' gaquen, le bina' gaquen can' nac yichjlaždao' Cristo Jesúsén'. Perw chona' con ga zelao saqueda' cont gaquech yichjlažda'ogua' can' nac che le', le ba gwleje' neda' naca' xi'ine'. <sup>13</sup>Bene' migw, nezda' bina' gac yichjlažda'ogua' can' cheyala' gaquen, perw ba bchojyichja' yogo' da' ca' gosac da' zaca' len neda' cana' na' yogo' bin' ba bena', na' chi' yichja' da' mbalaz da' chbeza' gac. <sup>14</sup>Chona' con ga zelao saqueda' cont Diosen' yebede' neda' cate' yežina' gan' zoen'. Le Diosen' gwleje' neda' cont gac yichjlažda'ogua' can' nac yichjlaždao' Cristo Jesúsén' lagüe da' chejnilaža'ne'.

<sup>15</sup>Na' yogo'cho še ba zej chaccho can' chaclaže' Diosen' gaccho, cheyala' goncho xbabén' ca', na' še yo'ocho bichle xbab yoble, Diosen' gwzejni'iden' chio'. <sup>16</sup>Perw na'

cheyala' soaczcho goncho can' ba bzejni'i Diosen' chio'.

<sup>17</sup>Beñe' migw, le gon can' chona' neda', na' le na' can' cheson yezica'chle beñe' cheson can' ba bzejni'ida' le'e, cont gonle can' chesonen'. <sup>18</sup>Da' yoble žia' can' ba gwnia' zan las, can' zjanita' beñe' zan, nacia' chesegue'ede' Criston' ben' bnežjw cuine' gote' le'e yag cruzen' neche xtoła'chon'. Na' chbeža' da' chesone' ca'. <sup>19</sup>Žin ža yesebiayi' beñe' ca' toli tocane, le chesyebchde' chese'ej chesagüe' clal ca yesonxene' Diosen'. Chesacłaze' cheso'e diža' che bi da' yela' zto' da' chesone', na' zjachi' yichje' tloaze da' chac yežlio nga. <sup>20</sup>Perw chio', bich choncho xbab nac lažcho yežlion', le nezecho naquen gan' zoa Xancho Jesucriston' ben' non chio' yela' mban toli tocane, na' chbezcho batcan' yide' da' yoble. <sup>21</sup>Na' caten' yide' da' yoble, gone' cont cuerp checho quinga da' bitec bi zaca' yesyeyaquen da' cobe, na' yesaquen leca güen can' ba nac cuerp che le'. Gone' ca', le nape' yela' guac neche gone' cont yogo'lol da' zjade yosozenaguen che'.

**Cheyala' soacho mbalaz da' chejnilaže'cho Criston'**

**4** Na' na'a beñe' migw, chacda' le'e na' che'nchgüeda' le'e lježcho da' yoble. Chbechgüeda' da' chejnilaže'le Criston', na' zoa' mbalaz neche le'e. Le'e beñe' chacda', le soachach šejnilaže'le Xancho Jesucriston'.

<sup>2</sup>Na' chneyoeda' le' Evodia, na' lecce ca' le' Síntique, le soašca binlo na' le gac txen tole yetole

da' chejnilaže'le Xancho'. <sup>3</sup>Na' ca nac le' beñe' lježa', len' beno' xšin Diosen' do yichj do lažo' txen len neda' cana', na' chneyoeda' gacleno' no'ol quinga yesyenite' binlo len lježe' da' yoble, le legaque' ba gosone' xšin Diosen' txen len neda' na' len Clemente na' len yezica'chle beñe' lježcho ca', na' zjanyoj la yogo' beñe' ca' le'e libr che Diosen' gan' zjanyoj la beñe' ba zjanape' yela' mban toli tocane.

<sup>4</sup>Le yebe yogo'te ža da' chejnilaže'le Xancho Jesucriston'. Da' yoble žia', le yebe. <sup>5</sup>Le gon cont yogo'lol beñe' yesenezde' nacle beñe' šagüe', le ba zoa yid Xancho' da' yoble.

<sup>6</sup>Bi gacle tole bite'teze da' chac chele, san le yol güiž Diosen', nable gaclene' le'e bite'teze da' chac, na' le güe'e yela' choxcen cate' bi da' nabelene'. <sup>7</sup>Nachen' Diosen' gone' soa cuezle binlo len xbab da' yo'o lo' yichjlažda'olen' lagüe da' chejnilaže'le Cristo Jesús'en', cont bi gacle tole. Na' cate' le' ba chone' cont zoa chbezcho binlo len xbab chechon', neca gacbe'echo bixchen' zoachguacho binlo.

**Cheyala' cue' yichjcho che da' zjanac güen**

<sup>8</sup>Na' da' la'zelagüe dan' chaclaža' neyoeda' le'e beñe' migw, cue' yichjle che diža' li, che dan' nac da' zaque', che dan' zej to licha, che dan' bibi da' mal nsa', che dan' naquen binlo, na' che da' zaca' yebecho. Bite'teze da' naquen da' güenchgua na' bite'teze da' chazlaže' Diosen', le cuec yichjle che dan' zjanac ca'.

<sup>9</sup>Da' ca' bzejni'ida' le'e, yogo' dan' benele gwnia' cate' bsd blo'eda' le'e can' cheyała' gonle, na' da' ca' ba ble'ele chona' neda', da' ca' le gon. Na' Dios ben' chon cont chzoa chbezcho binlo len xbab da' yo'o lo' yichjlažda'ochon' soacze' gaclene' le'e.

**Can' gosaclen beņe' Filipos ca' Pablon'**

<sup>10</sup>Chbechgüeda' lao Xancho Cristo Jesúsen' da' ba chi' yichjle chaclenle neda' da' yoble. Nežda' gwzoale chonle xbab chia', perw bi beņen gaclenle neda'. <sup>11</sup>Na' žia' da' qui gague neche byažjda' da' ca' byažjda', le Diosen' ba bzejni'ide' neda' cont zoa' mbalaz cate' de da' chyažjda' na' cate' bibi de. <sup>12</sup>Ba yolagua' yela' yaše' yela' zi', na' yolagua' yela' šagüe'. Diosen' ba bzejni'ide' neda' cont zoa' mbalaz bite'teze chac chia', cate' de da' che'ej chagua' na' cate' chbił chdona', cate' de bichle da' chyažjda' na' cate' bibi de. <sup>13</sup>Chac chona' bite'teze da' cheyała' gona', le zoa Criston' len neda' chaclene'nda'. <sup>14</sup>Perw beņle güen gwseła'le da' goclenen neda' cont naccho txen len dan' chy chzaca' nga.

<sup>15</sup>Na' le'e zoale Filipos, nezele caten' beyož gwyejle'le diža' güen che Criston' dan' bia' len le'e, beņle txen len neda' cate' beza' distritw Macedonian', gwseła'le da' byažjda',

na' nono nochle beņe' ca' chesedop chesežag chesonxene' Criston' yež yoble goson ca'. <sup>16</sup>Le cate' ne' zoa' Tesalónica gwseła'le da' byažjda' zan nia'. <sup>17</sup>Perw gague chzelaža' bi da' gonle neda', san chzelaža' soacze gonle güen cont yebe Diosen' le'e. <sup>18</sup>Ba beņle doxen da' cheyała' gonle na' da' zcha'och cate' da' cheyała' gonle. Ba decze da' zcha'o chia' na'a. Bibi chyažjda', le ba beņ Epafrodito da' gwseła'le chia'. Na' da' gwseła'le zaca'leben ca to yal da' chl'a' zix da' chzey bxozen' lao Diosen', le Diosen' chebede' can' beņen'. <sup>19</sup>Na' Dios chia' nan' goncze' yogo'te bi da' chyažjele lagüe chejnilaže'le Cristo Jesúsen', le yogo' da' de yo'on lo ne'e. <sup>20</sup>Cheyała' gonxencho Xancho Diosen' toli tocane. Can' gonščaczccho.

**Pablon' zelagüe' bzede' legaque' diža'**

<sup>21</sup>Le gwguap tiox yogo'lol beņe' Filipos ca' yo'o lo na' Diosen' da' chesejnilaže' Jesucriston'. Beņe' lježcho ca' nita' nga len neda' chguapto' le'e tiox. <sup>22</sup>Na' lecze yogo' beņe' Roma quinga ba yo'o lo na' Diosen' chosoguape' le'e tiox, lente beņe' ca' cheson žin che rey ben' nac la'zelagüe' beņe' gwnabia' ben' chi' Roma.

<sup>23</sup>Xancho Jesucriston' soašque' gaclenšque' le'e len xbab da' yo'o lo' yichjlažda'olen'. Da' na'zen' chzoja'.

# CART DAN' BZOJ POSTLW SAN PABLO CHE BEÑE' CA' ŽE' COLOSAS

Pablon' chzoje' beñe' chesonxen  
Jesucriston' ciuda Colosas

**1** Jesucriston' gwleje' neda' Pablo  
cont naca' postlw che', le can'  
chazlaže' Diosen'. Neda' txen len  
beñe' lježcho Timoteon' chguapto'  
le'e tiox. <sup>2</sup>Chzoja' le'e zoale Colosas,  
le'e chejnilaže'le Criston' na' nacle  
lo na' Diosen'. Chñaba' gaclenšca  
Xacho Diosen' le'e na' gone' cont soa  
cuezle binlo.

Pablo chñabde' Diosen' gaclene'  
beñe' ca' že' Colosasen'

<sup>3</sup>Yogo' ni'a cate' chol' güižto' Dios  
ben' nac Xa Xancho Jesucriston'  
choe'to' yela' choxclen che' can'  
chonlen'. <sup>4</sup>Le ba beneto' diža' can'  
chejnilaže'le Cristo Jesúsén' na' can'  
chaquele yogo' beñe' ca' yezica'chle  
zjanaque' lo na' Diosen'. <sup>5</sup>Na' nezeto'  
chejnilaže'lene' na' chaquele legaque'  
lagüe da' zoale lez šjayzoale len  
Diosen'. Caten' gwzolao bzenagle  
che xtiža' Diosen' da' naquen da'  
güen na' da' li, gwejni'ile gac  
chele ca'. <sup>6</sup>Na' xtiža' Diosen' da'  
ba bzenagle ba goslasen doxen,  
na' beñe' zan ba chosozenague'  
chen. Na' legaque' lecze chesone'

güen ca gwzolao le'e chonle caten'  
gwejni'ile diža' li da' chzejni'in  
nži'ilaže' Diosen' le'e, na' ne' chonle  
güen ža na'aža. <sup>7</sup>Chaqueto' Epafras  
ben' bzejni'ide' le'e xtiža' Criston'.  
Chone' xšin Diosen' can' chon neto',  
na' zoateze' chone' can' ža Criston'  
da' chaclaže' gaclene' le'e. <sup>8</sup>Len'  
ba gože' neto' ba ben Spiritw che  
Diosen' cont chaquele Diosen' na'  
chaquete lježle.

<sup>9</sup>Da'nan' caten' gwnezeto' ca  
güenna' chonle, gwzolaoto' yogo'  
ni'a cate' chol' güižto' Diosen'  
chñabeto'ne' gaclene' le'e. Chñabto'  
gon Spiritw chen' le'e yogo' cuen  
yela' sina' na' yela' chejni'i cont  
nezele nacyanen' chaclaže' gonle.  
<sup>10</sup>Chñabto' soale gonle can' cheyalā'  
gon chio' nombia'cho Xanchon',  
cont yebede' yogo' dan' chonle.  
Na' chñabto' gaclene' gonle zan  
cuen da' güen na' gaclene' šejch  
gombia'le'. <sup>11</sup>Chñabto' gaclen  
Diosen' le'e len yela' guac xen che'  
cont soatezle šejnilaže'lene' na'  
gagle yela' chxenlaže' bite'tezen'  
chac. <sup>12</sup>Na' chñabto' soale mbalaz  
güe'le yela' choxclen che Xacho  
Diosen', le le'na' ba gwleje' chio' ba  
naccho lo ne'e cont šjayzoacho len



le' gan' yo'o be'ni' juisyw. <sup>13</sup>Bebeje' chio' lo na' gwxiyen' cate' da' cholen' ne' chnabian' yichjlažda'ochon', na' gwlo'e chio' lo na' Xi'ine' Jesucriston' ben' chacde', cont na'a gwzenagcho che le'. <sup>14</sup>Na' Xi'in' Diosen' bnežjw cuine' gote' cont beque'e xtol'a'chon' na' chezi'xen Diosen' checho.

**Criston' bozoe' chio' binlo len Diosen'**

<sup>15</sup>Criston' naque' cayanen' nac Xe' Dios ben' nono chle'e. Ba zoacze Criston' cate' bina' xe yežlion' na' cate' bina' gata' yogo'lol' da' de le'e yaban' na' lo yežlion'. <sup>16</sup>Criston' bene' yaban' na' yežlion', bene' bene' že' yaba na' yežlio, len bica'chle da' zjade yaban' na' yežlio nga. Bene' da' ca' chle'echo na' da' ca' bi chle'echo. Bene' cont nita' angl gwnabia' ca' na' da' ca' besyeyac da' xigüe' ca' na' bichle da' ca' chesenabia' yichjlaždao' bene' ca' bi chosozenag che Diosen'. Na' Criston' bene' cont nita' bene' ca' na' yogo' da' ca' cont gaxene'. <sup>17</sup>Criston' ba zoacze' cate' bina' nita' yogo'lol' da' de le'e yaban' na' lo yežlion'. Na' yogo' bite'teže da' zjade zjanaquen con can' zjanaquen, le Criston' zoacze' chone' cont zjanaquen ca'. <sup>18</sup>Na' Criston' chnabi'e chio' chdop chžagcho chonxenchone'. Len' bxie' yela' mban toli tocane che bene' chesejnilaže'ne', na' naque' bene' nechw bebane' ladjo bene' guaten' ben' bich nabia' yela' goten' le'. Da'nan' naque' la'zelaogüe bene' blao na' chnabi'e yogo'lol' bene' na' bica'chle da' zjade. <sup>19</sup>Na' Diosen' chazlaže' dan' nac yichjlaždao' Criston' cayanen' nac yichjlaždao' le' na' dan' nac yela' guac che

Xi'ine' Criston' doxen can' nac yela' guac che le'. <sup>20</sup>Na' lecze chazlaže' yozoe' binlo len le' yogo' bene' že' yaban' na' yežlion', le Xi'ine' Criston' bnežjw cuine' blalj xchene' le'e yag cruzen' cont gac yesenite' binlo len le'.

<sup>21</sup>Cana' bi nombia'le Diosen'.

Bgue'elne' na' gwzoale benle da' malen'. Perw na'a ba bozoa Criston' le'e binlo len Diosen', <sup>22</sup>le bnežjw cuine' neche chio' caten' gosote'ne'. Na' beyone' lažda'ochon' xilaže' cont bibi doła' gapcho cate' yežincho lao Diosen', na' bibi de da' zaca' yosocuiše' chio' lagüen'. <sup>23</sup>Na' še soacho šejnilaže'cho Criston' na' soachachcho len tože xbab, na' soateze soacho lez šjayzoacho len Diosen' can' gwzelaže'cho gac checho cate' bzenagcho xtižen' da' nechw, nachen' bibi doła' gapcho cate' yežincho lao Diosen'. Na' diža' güen chen' ba bžinen doxen yežlion' cont beñačen' chesenden', na' Diosen' gwleje' neda' Pablo chyixjue'edan'.

**Diosen' gwleje' Pablon' cont bsed blo'ede' bene' chesonxen Criston'**

<sup>24</sup>Da' zan da' chy chzaca' lagüe da' chyixjue'eda' xtiža' Diosen' len le'e bi nacle bene' Israel. Na' le'e chdop chžagle chonxenle Criston' nacle ca' cuerp che'. Na' chbeda' chžaglagua' yogo' da' chaclaže' Criston' žaglagua' da' gaclenen le'e. Na' cate' chžaglagua' neda', guac nacho cuin Criston' chžaglagüe'. <sup>25</sup>Diosen' gwleje' neda' chyixjue'eda' xtižen' len le'e chdop chžagle chonxenle Criston', cont gwzejni'ida' le'e doxen can' zeje

xtižen'. <sup>26</sup>Canì' nono ña' ñeze da' güen da' chon Diosen' len bene' chesejnilaže'ne', perw ña'a Diosen' ba bzejni'iden' chio', chion' naccho lo ne'e. <sup>27</sup>Diosen' chaclaže' ñezecho leca güen juisyw chone' len note'tezcho chejnilaže'chone', la'czla' bi naccho bene' Israel. Cana' nono gwñeze gone' da' güen juisyw len note'tezcho, perw ña'a Diosen' ba bzejni'ide' chio' zoacze Criston' len chio' chejnilaže'chone' na' da'nan' zoacho lez šjayzoacho len Diosen' gan' yo'ochgua be'ni'. <sup>28</sup>Choe'lena' yogo' bene' diža' che Criston', chata'yoeda' yogüe' yosozenague' che', na' chzejni'ida' yogüe' xtižen' cont yesejni'iden' binlo, le chaclaža' yogo' bene' chesejnilaže' Criston' yesaque' cayanen' chaclaže' Diosen'. <sup>29</sup>Da'nan' chona' con ga zelao chzoeda' chyixjue'eda' bene' xtižen', na' chaclenchgüe' neda' len yela' guac xen chen'.

**2** Chaclaža' ñezele chonchgua' ga zelao chzoeda' cont chaclena' le'e na' bene' lježcho že' Laodicea na' yezica'chle bene' lježcho bina' yesele'ede'nda'. <sup>2</sup>Chaclaža' gona' chačh laže'le cont yichjlažda'olen' yesaquen toze lagüe da' chaque lježle. Na' chaclaža' ñezeyane'le can' cheyala' gonle xbab cont šejni'ile da' ba bzejni'i Diosen' chio' che Criston' da' nono gwñeze cani'. <sup>3</sup>Criston' nse'e doxen yela' sina' na' yela' chejni'i che Diosen' cont gwzejni'iden' chio'. <sup>4</sup>Chnia' ca' cont nono siye'e le'e len diža' da' chaquele naquen xdan. <sup>5</sup>Na' la'czla' bi zoa' na'le len le'e, zoa' chona' xbab chele na' chebeda' ñezda' chonle can' cheyala' gonle na' zoachachle chejnilaže'le Criston'.

<sup>6</sup>Na' ña'a, con can' ba gwzolaole chejnilaže'le Criston' na' ba nonlene' Xanle, con can' soachachle len le'.

<sup>7</sup>Le soachach le šejnilaže'ch Criston' can' ba bsedlena', cont gacle ca to yag da' ba gwyaz loen sitjw. Na' le soa le güe'chgua yela' choxclen che Diosen' can' chaclene' le'e.

**Criston' ba bocobe' yichjlažda'ochon'**

<sup>8</sup>Le gwsaca' cont nono co'oyele' le'e gwzenagle che diža' sina' che yežlio nga da' naquen da' güenlaže'. Bene' že' yežlion' chosozejni'ide' da' zan da' chesene' cheyala' goncho da' bibi zjazaca', na' bitw chosozejni'ide' che Criston'.

<sup>9</sup>Yichjlaždao' Criston' naquen' cayanen' nac yichjlaždao' Diosa', na' nac yela' guac che Criston' doxen can' nac yela' guac che le'. <sup>10</sup>Na' Criston' chnabia'che' ca note'teze angl blao na' ca note'teze da' xigüe', na' chio', da' chejnilaže'chone', bich bi chyažjecho cont soa cuezcho binlo. <sup>11</sup>Na' lecze da' naccho txen len Criston' de to checho da' zaca'leben ca señw da' že' circuncisión, perw bi naquen señw da' bzoa bene' lo cuerp chechon', san da' ba bocob Criston' yichjlažda'ochon' cont da' malen' bich chnabian' chio'. <sup>12</sup>Na' da' gwzoacho nis caten' gwyejnilaže'chone', zejen con can' got Criston' ñeche xtola'chon', lecz ca' chio' ba naccho ca to bene' guat len da' malen' cont bi gonchon. Zejen bgaše'cho can' bgašen', na' lecze zejen bechis bosban Diosen' chio' ladjo bene' guat ca' can' bene' len Criston'. Zejen ca' le chejle'cho Diosen' bosbane'

Criston' len yela' guac chen'. <sup>13</sup>Cana' gwxcacalebcho ca to bene' guat len yichjlažda'ochon' da' bi bzenagcho che Diosen' na' gwzoacho bzenagcho che da' malen'. Nach Diosen' bene' len chio' can' bene' bosbane' Criston' ladjo bene' guat ca', le bocobe' yichjlažda'ochon' na' bezi'xene' xtoła'chon'. <sup>14</sup>Bi bencho yogo'loł can' ža ley che Diosen' cheyała' goncho, na' bencho da' žan bi cheyała' goncho. Da'nan' gota' xya checho len leyna' na' nchoglaon checho saca'zi'cho toli' tocanē. Perw Criston' bnežjw cuine' bosode'ene' le'e yag cruza' neche doła' xya chechon', na' da'nan' nezecho Diosen' ba bnitlagüe' xtoła'chon'. <sup>15</sup>Criston' cate' gote' le'e yag cruza' beque'e yela' gwnabia' che da' xigüe' ca' na' blo'ede' benachen' ba blej bšožen'.

**Cue' yichjcho che da' ca'  
zjazacan' len Diosen'**

<sup>16</sup>Bi gwzenagle che bene' ca' chesena chonle mal che'ej chagwle bi da' che'ej chagwle, o bene' chesene' chele da' bi chonle no ža lni, o bene' chesena qui ca' goncho cate' naquen bio' che'en, o bene' chesena ža ni ža na' nac ža che Dios. <sup>17</sup>Yogo' da' ca' con bosozejni'in late'lasze che Criston', perw na'a da' bid Criston' bich chyažjecho da' ca', le ba nombia'chone'. <sup>18</sup>Bi gwzenagle še no bene' chzejni'ide' cheyała' gon cuinle ca to da' bibi zaca' cont soale binlo len Diosen', o bene' chzejni'ide' cheyała' gonxenle no angl o gonle bi da' že' ble'edagüede', le bi chebe Diosen' bene' cheson da' ca'. Bene' ca' chosozejni'ide' ca' chesacde' xbab da' chesaljlaže' zaca'chguan, len

bitw bi zacan', <sup>19</sup>le bi chosozenague' che Criston'. Perw chio' chdop chžagcho chonxenchone', Diosen' none' cont Criston' chnabi'e chio' ca yichjchon' chnabian' cuerp chechon'. Na' naccho txen len le' na' len bene' lježcho ca to cuen güeje cuerp chechon' ngoden' txen, le xpela'chon' na' bechj bnia' ca' zjanoxen' len con ca non Dios chegaquen.

<sup>20</sup>Chio' naccho txen len Criston', guac nacho Criston' ba none' chio' ca to bene' guat len da' xinjen' cont bi gonchon, ca bene' guaten' goc le' le'e yag cruzen'. Da'nan' bi cheyała' gwzenagcho cate' chesena bene' da' zan da' goncho cont soacho binlo len Diosen', le bi naccho bene' che yežlion'. ¿Bixchen' chzenagle che yela' sina' che yežlio nga da' ca' chesene' cheyała' gonle na' da' ca' chesene' bi cheyała' gonle?

<sup>21</sup>Chesene': "Bi goxe'le da' nga", "Bi ye'ej gagwle da' na'", "Bi canle da' na'". <sup>22</sup>Na' yogo' da' ca' chesene' bi goxe'cho, bi ye'ej gagwcho na' bi cancho, da' chesede chen cate' chchinchon, na' dan' chesene' cheyała' goncho len da' ca', con xbab chegaczen'. <sup>23</sup>Guacte goncho xbab nac da' sina' da' chesene' cheyała' goncho, na' goncho xbab gaclenen chio' gonxencho Diosen', le chesene' cheyała' gwchi gwsaca' cuincho na' gon cuincho ca to da' bibi zaca'. Perw bibi zejen goncho ca', le bi chaclenen chio' cont bitw gwzenagcho che da' malen'.

**3** Can' bechis bosban Diosen' Criston' ladjo bene' guat ca', lecze can' bocobe' yichjlažda'ochon'. Da'nan' cheyała' cuec yichjcho goncho can' chazlaže' Diosen'

na' cuec yichjcho gac can' chebe  
 Criston' ben' zoa yaba chnabi'e  
 txen len Diosen'. <sup>2</sup>Na' cheyała'  
 yebecho da' naquen da' zaca' len  
 Diosen', gague da' naquen da' zaca'  
 len beṇachen'. <sup>3</sup>Le guac ṇacho  
 Criston' ba none' chio' ca to beṇe'  
 guat len da' malen' cont da' malen'  
 bich ṇabian' chio', na' mbancho len  
 Criston' ṇa'a cont naccho txen len  
 Diosen'. <sup>4</sup>Criston' none' chio' yeła'  
 mban toli tocane. Na' cate' le' yide'  
 da' yoble, šjayzoacho txen len le'  
 gan' yo'ochgua be'ni'.

**Can' bencho cana' na' can'  
 cheyała' goncho ṇa'a**

<sup>5</sup>Da'nan' cheyała' cuejyichjcho  
 da' mal da' žan goncho len cuerp  
 chechon' dan' nac che yežlio nga.  
 Bitw gata'lencho no'ole bi nac no'ol  
 checho o beṇe' byo bi nac beṇe'  
 checho. Bitw goncho bichle da'  
 yeła' zto' len cuerp chechon' neca  
 yebecho bi da' nac da' yeła' zto'.  
 Bitw selaže'cho goncho bite'teze  
 da' mal, neca selaže'cho da' zan  
 da' gata' checho, le toz ca malen'  
 nac yeła' chzelažen' len da' cheson  
 beṇe' chesejnilaže' l gua'a lsaca'  
 ca'. <sup>6</sup>Žin ža cate' Diosen' gone' cont  
 beṇe' cheson da' ca' yezezaca'zi'e  
 toli tocane. <sup>7</sup>Le'e lecze gwzoale  
 cana' benle da' mal ca' ba gwnia'.  
<sup>8</sup>Perw ṇa'a cheyała' cuejyichjle  
 yogo' da' mal. Bitw ža'a lježle, bitw  
 loclē, bitw gacle beṇe' xi'a len lježle,  
 bitw nele che lježle, na' bitw gü'e'le  
 diža' zban. <sup>9</sup>Na' bich gü'e'len lježle  
 diža' güenlaže'. Ba gwlejyichjle da'  
 mal da' gwnabia' yichjlažda'olen'  
 cana' na' bich cheyała' gwzenagle  
 chen da' yoble. <sup>10</sup>Ba chzenagcho

che Dios ben' ben chio', le ba  
 bocobe' yichjlažda'ochon'. Na'  
 tža tža chzejni'ide' chio' cont zej  
 chacch xbab chechon' can' nac  
 chen'. <sup>11</sup>Na' chio' ba bocob Diosen'  
 yichjlažda'ochon', bibi nonen še  
 naccho beṇe' Israel o še bi naccho.  
 Bibi nonen še zoacho seṇw da' že'  
 circuncišion o še bi zoachon, na'  
 bibi nonen še naccho beṇe' zito',  
 la'czla' še za'cho gan' že' beṇe' bi  
 chesejni'i, na' bibi nonen še naccho  
 esclavo o še bi naccho. Da' naquen  
 da' zeje, ba chejnilaže'cho Criston'  
 na' len' zoe' len yogo'cho.

<sup>12</sup>Diosen' gwleje' chio' cont  
 naccho lo ne'ena' na' chacde' chio'.  
 Da'nan' cheyała' yeyaše'cho beṇe'  
 na' gaccho beṇe' šagüe' len yogo'lol  
 beṇe'. Bi cheyała' ga'laže'cho, san  
 gaccho beṇe' chzexjwlaže' na'  
 gapcho yeła' chxenlaže' len yogo'lol  
 beṇe'. <sup>13</sup>Na' cheyała' gwdecho  
 ca'ale še bi chac checho len beṇe'  
 lježcho na' yezi'xencho še bi da'  
 ba gosonde' chio', yezi'xencho con  
 can' ba bezi'xen Xancho Criston'  
 checho. <sup>14</sup>Na' yeto da' zejechen  
 goncho ca yogo' da' ca', cheyała'  
 gague lježcho, le še chaque lježcho  
 gaclenen goncho yogo' da' ca' can'  
 cheyała' gonchon. <sup>15</sup>Diosen' gwleje'  
 chio' cont soa cuezcho binlo, na'  
 cheyała' gwzenagcho che Criston'  
 na' gabe'echo yogo'cho naccho  
 toze cont soa cuezcho binlo. Na'  
 lecze cheyała' soacho güe'cho yeła'  
 choxclen che Diosen'.

<sup>16</sup>Cheyała' soacho goncho xbab  
 che xtiža' Criston' na' gwzenagcho  
 chen, na' lecze soacho gwzejni'i  
 lježcho na' neyoe lježcho len doxen  
 yeła' sina' che Diosen' cont yogo'cho

goncho da' güen. Na' cheyała' golcho no salmos, no himnos, na' bichle da' ža Spiritw che Diosen' golcho, na' güe'cho yela' choxcen che Diosen' lo' yichjlažda'ochon'.<sup>17</sup>Na' bite'teže da' goncho na' bite'teže diža' güe'cho, cheyała' nabcho gaclen Xancho Jesúsen' gonchon can' chazlaže', na' güe'cho yela' choxcen che Xacho Diosen' con can' chaclen Xancho Jesúsen' chio' chonchon'.

### Can' cheyała' goncho len lježcho

<sup>18</sup>Le'e no'ole nšagna'le, to tole le gwzenag che bene' chele, le can' cheyała' gon chio' chejnilaže'cho Xancho Criston'.<sup>19</sup>Na' le'e bene' byo nšagna'le, to tole le gague no'ol chele na' bi gonle znia len legaque'.<sup>20</sup>Na' le'e bi' bixjw, le gwzenag che yogo'lol bi da' yesena xaxna'le, le can' chazlaže' Xancho Criston' gonle.<sup>21</sup>Na' le'e nacle xaxna' bi' bixjw, bi gonle cont yeseloc bi' chele ca', le še gonle ga yeselocbe', yesaquebe' zdebe yosozenagbe' chele.<sup>22</sup>Na' le'e chonle xšin bene', le gwzenag yogo'lol can' ža xan žinna' gonle. Bitw gonlele xan žinna' gonle ca bene' chonchgua žin cate'zen' chne'e le'e, san le gon žinna' do yichj do laže'le da' chejnilaže'le Diosen'.<sup>23</sup>Na' bite'teže da' gonle, le gonen do yichj do laže'le cont yebe Xancho Criston', gague contze yebe bene'.<sup>24</sup>Nezczele Xancho Criston' gone' cont yežincho gan' zoen' še soacho goncho can' chazlažen'. Na' zoacho cont goncho con can' ža Xancho Criston'.<sup>25</sup>Na' note'tezcho še bi choncho can' cheyała' goncho, Xancho Diosen' gone' saca'zi'cho neče dan' ba

bencho. Na' toz can' chon Diosen' len yogo'lol bene'.

**4** Na' le'e nacle xan žin, le gon güen na' le gac bene' šagüe' len bene' cheson xšinlen', le nezczele Criston' ben' zoa yaban' naque' Xanle.

<sup>2</sup>Yogo'te ža cheyała' nabcho gaclen Diosen' chio' len da' choncho na' len bichle da' chac checho, na' cheyała' güe'cho yela' choxcen che', na' bi cheyała' güedcho yol güižcho Diosen'.<sup>3</sup>Na' le nabe Xancho Diosen' gone' cont gac güe'lento' bene' xtiža' Criston' da' bina' yesejni'ide', le neče dan' ba bia' xtiže'n'an' dia' ližya nga.<sup>4</sup>Na' le nabe Diosen' gaclene' neda' gwzejni'ida' bene' diža' güen che Criston' binlo cont yesejni'iden'.

<sup>5</sup>Cheyała' soacho goncho güen len bene' bina' yesejnilaže' Criston' na'a šlac de latje.<sup>6</sup>Na' cheyała' güe'cho diža' šagüe' diža' da' zejen len yogo'lol bene', na' cheyała' goncho xbab nac yoži'icho xtiža' yogüe'.

### Pablo chguape' bene' migw che' ca' tiox

<sup>7</sup>Bene' lježcho Tíquico ye'e le'e yogo'lol can' chac chia'. Chaquechone', le zoacze' chaclene' neda' can' cheyała' gone' na' chone' xšin Xancho Criston' txen len neda'.<sup>8</sup>Ba gwsela'ne' gan' zoalen' cont nezele can' chac cheto' na' cont gone' chačh laže'le.<sup>9</sup>Na' txen len le' zeza' bene' lježcho Onésimo ben' nac bene' gualaž chele. Zoacze' chejnilaže' Criston' can' cheyała' gone' na' chaquechone'. Legaque' ye'e le'e yogo' da' ba chac nga.<sup>10</sup>Aristarco die' ližya nga txen len neda', na' le' chguape' le'e

tiox. Na' lecze Marcos ben' nac biše' ljež Bernabé chguape' le'e tiox. Ba gwnia' can' cheyala' gonle güen len le' cate' le'e gan' zoalen'.  
<sup>11</sup>Nach Jesús ben' lecze le' Justo lecze chguape' le'e tiox. Šonze bene' Israel ca' chesaclene' neda' len da' chona' cont bene' zan yosozenague' che Diosen' na' nabi'e yichjlažda'ogaquen'. Ba gosonchgüe' chach laža' can' ba gosaclene' neda'.  
<sup>12</sup>Nach lecze bene' gualaž chele Epafras chguape' le'e tiox. Chone' xšin Criston' na' yogo' ni'a cate' chol güiže' Diosen' chnabchgüe' gwzejni'i Diosen' le'e yogo'lol da' chaclaže' gonle cont soachachle gonlen na' gacle cayanen' chazlaže' Diosen'.  
<sup>13</sup>Che'nda' nezele zoateze' chol güiže' Diosen' neche le'e chejnilaže'le Criston' le'e nita'le

Colosas, Laodicea na' Hierápolis.

<sup>14</sup>Nach Lucas ben' chon rmed, ben' chaquecho, chguape' le'e tiox na' lecze ca' Demas.

<sup>15</sup>Le gwguapšca tiox bene' lježcho ca' že' Laodicea, len Ninfas na' bene' ca' chesedop chesežag chesonxene' Diosen' ližen'.  
<sup>16</sup>Na' cate' yeyož gwlable cart nga, le gwnežjon bene' ca' chesedop chesežag chesonxene' Diosen' Laodicean' cont yosolaben'. Na' lecze le gwlab dan' gwsela' che bene' Laodicean'.  
<sup>17</sup>Na' le ye' Arquipo chneyoeda'ne' gwza'lagüe' gone' dolol xšin Diosen' da' gwlo'o Xancho Criston' lo ne'e gone'.

<sup>18</sup>Guincza' neda' Pablo chzoja' late' dao' da' nga le'e carten'. Bi ganlaže'le can' dia' ližya nga. Diosen' soašque' gaclenšque' le'e. Da' na'zen' chzoja' na'a.

# CART NECHW DAN' BZOJ POSTLW SAN PABLO CHE BEÑE' CA' ŽE' TESALÓNICA

Pablo bzoje' beñe' Tesalónica ca' ben' chesonxene' Jesucriston'

**1** Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chnabto' lao Xacho Diosen' na' lao Xancho Jesucriston' yesaclene' le'e na' yesone' ca soa cuezle binlo len xbab dan' yo'o lo' yichjlažda'olen'.

Beñe' Tesalónica bosolo'ede' chesejle'e che Jesucriston'

<sup>2-3</sup>Yogo' ni'a cate' choł güižto' Xacho Diosen' choe'to' yela' choxclen che' par yogo'le. Na' cate' choł güižto'ne' chjayza'laže'to' yogo'lol' da' güen dan' chonle dan' chejnilaže'le Diosen' na' chaquelne'. Na' chjayza'laže'to' can' zoachachle chbezle yid Xancho Jesucriston' yeto. <sup>4</sup>Nezeto' bene' migw, Diosen' chacde' le'e na' ba gwleje' le'e cont nacle lo' ne'e. <sup>5</sup>Na' diža' güen da' bzejni'ito' le'e che Jesucriston' gague naquen con to diža'ze. Spiritw che Diosen' goclenen neto' bzejni'ito' le'e len yela' guac chen na' nezeto' diža' dan' bzejni'ito' le'e naquen da' li.

Na' nezele can' bento' da' güen šlac gwzoato' len le'e cont gocleno' le'e.

<sup>6</sup>Na' le'e zoale chonle da' güen can' ba ben neto' na' can' ben Xancho Jesucriston'. Bzenagle dan' gwdixjue'eto' le'e che Jesucriston', na' Spiritw che Diosen' chonen cont chbele chzenaglen, la'czla' da' zan da' ba gwdi gwzaca'le dan' ba bzenagle chen'. <sup>7</sup>Na' da' zoale chonle da' güenna', bene' ca' chesejnilaže' Jesucriston' distritw Macedonia na' distritw Acaya ba zjanezde' naquen cheyała' yesone'. <sup>8</sup>Doxen ba bzenele bene' xtiža' Xancho Jesucriston', gague bene' že' Macedonia na' Acaya na'zen'. Na' ca'cze yogo'ze bene' ba zjanezde' can' chejnilaže'le Diosen', na' da'nan' bi chyažjen güe'to' diža' chele. <sup>9</sup>Na' bene' zan cheso'e diža' ca güen benle len neto' caten' bedena'to' le'e na' cheso'e diža' can' benle gwlejyichjle cbich chejnilaže'le l' gua'a šsaca' chele ca', san na'a ba chejnilaže'le ben' nac dogualje Dios ben' zoa toli tocanē. <sup>10</sup>Na' cheso'e diža' can' chbezle yetj Xi'ine' Jesúsēn' yaban' yide' yežlio nga yeto, ben' bosban Diosen' ladjo bene' guaten'. Na' dan'



chejnilaže'cho Jesúsen' ba bosle' chio' cont bi saca'zi'cho cate' žin ža bene' bi chosozenague' che Diosen' yesale'chgüede' toli tocane.

Pablon' gwzoe' Tesalónican'

**2** Bene' migw, le'e nezele dan' bedena'to' le'e goclenchguan le'e. <sup>2</sup>Na' nezele can' gwdi gwxaca'to' cate' gweyjo' Filipos, na' can' gosezidiža' bene' ca' neto' dan' gwduxjue'eto' che Jesucriston'. Perw Diosen' goclene' neto' cont bi bžebto' gwduxjue'eto' diža' güen che' len le'e la'czla' bene' zan bosožone' chixjue'eton'. <sup>3</sup>Dan' gota'yoeto' le'e gwzenagle che Diosen' bitw nacho bzejni'ito' le'e clele, neca goclaže'to' gonto' da' mal, na' neca bento' xbab gonleto' le'e. <sup>4</sup>San zoato' choe'to' diža' can' chazlaže' Diosen' ben' ba gwleje'nto' par chyixjue'eto' diža' güen che'na'. Na' chyixjue'eton' gague cont yebe bene', san cont yebe Diosen' ben' neze bin' yo'o lo' yichjlažda'ochon'. <sup>5</sup>Nezele can' bento', ne tni'aze biņa' gwpeto' le'e len xtiža'ton', na' neca benleto' le'e cont gonle cheto' bi da' de chele. Cuiw Diosen' nezde' can' naquen. <sup>6</sup>Na' neca cheyiljwlaže'to' nacle gonto' cont yesonxen bene' neto'. Neca nacho chaclaže'to' gonxenle neto', na' neca chaclaže'to' yezica'chle bene' yesone' ca'. Zaca'to' gonto' ga gwzenagle cheto' la fuers da' gwseła' Criston' neto' choe'to' xtiže'na', perw bitw chonto' ca'. <sup>7</sup>Nži'ito' le'e cacze no'ole šagüe' nži'ide' xi'ine' bi' chosgol chosča'ogüe'. <sup>8</sup>Na' dan' chaqueto' le'e, be'lento' le'e diža' güen che Diosen'. Na' gague da' na'zen' bento',

lecze bzanlaže' cuinto' bento' ga zelao gwzaque'to' cont goclento' le'e, le chaqueto' le'e. <sup>9</sup>Za'laže'czle bene' migw, cate' gwzoato' len le'e benchguato' žin con ga zelao gwzoeto'. Bento' žin do ža do yel cont cbi bi gastw bzoato' le'e. Can' bento' gwduxjue'eto' le'e diža' güen che Diosen'.

<sup>10</sup>Txcenczen' nezele len Diosen' gwzoato' do laže'to' cate' gwzoato' len le'e chejnilaže'le Jesucriston'. Benczto' con can' chazlaže' Diosen' cont ne to cono gwna napt'o' doła'. <sup>11</sup>Nezele can' gota'yoeto' le'e gonle da' güen na' can' bento' chačh laže' to tole gonlen. Bento' can' chon to bene' byo len xi'ine'. <sup>12</sup>Bento' mandadw gonle da' güen ca cheyała' gon chio' naccho lo na' Diosen', le ba gwleje' chio' par nabia'cho txen len le' na' par gone' gac da' mba juisyw checho cate' šjayzoacho len le'.

<sup>13</sup>Bate'teze choe'to' yela' choxclen che Diosen' dan' bzenagle xtiže'na' caten' gwduxjue'eton' le'e. Zacbe'ele bi naquen xtiža' benačh, san naquen xtiža' Dios dan' choe'to'. Na' xtiža' Diosen' dan' chejle'le chša'an xbab dan' yo'o lo' yichjlažda'olen'. <sup>14</sup>Na' bene' migw, ba goc chele can' goc che bene' chesedop chesežag chesonxene' Jesucriston' zan part Judean'. Bene' Israel gualaž chegaque' bosochi bososaque' legaque', na' lecze can' bosochi bososaca' bene' gualaž chelen' le'e. <sup>15</sup>Na' bene' Israel ca' gosote' Xancho Jesucriston' con can' gosote' da' bene' gosoe'lene' legaque' xtiža' Diosen' cani'. Na' lecze can' gosone' bosolagšibe' neto'. Na' ža na'aža ne'

nite' chesone' da' bi chazlaže' Diosen'  
na' chesegue'ede' yogo'loł benachen',  
<sup>16</sup>le chosožone' gwzejni'ito'  
yezica'chle bene' bi da' cheyała'  
goncho cont gata' yela' mban  
checho toli' tocaņe. Can' chesone' do  
tiemp chosozanch xtoła'gaquen' na'  
Diosen' ba chža'achgüe' legaque'.

**Pablo goclaže' šjayne'e  
bene' nita' Tesalónica**

<sup>17-18</sup>Na' neto' bene' migw,  
cate' zoato' ga bi chle'e lježcho,  
chjayze'eto' le'e. Da'nan' cate'  
ba goc sša bina' le'e lježcho ba  
chacžejlaže'to' chele na' goclaže'to'  
yedenato' le'e. Na' to chop ni'a  
godca' yida', perw Satanás dan'  
chnabia' da' xigüe' ca' bi benen latje.  
<sup>19-20</sup>Chebeto' chonchguale güen  
na' da'nan' zoato' lez soachguato'  
mbalaz cate' yid Xancho Jesucriston'  
da' yoble, le yebede' bzjenni'ito' le'e  
cont chzenagle che'. Da' li le'e  
chonle cont chbeto' na' cont zoato'  
mbalaz.

**3** <sup>1-2</sup>Na' bich gwzoeto' dan'  
bi chle'e lježchon'. Da'nan'  
bechoglaže'to' gwseła'to' bene'  
lježcho Timoteon' gan' zoalen'  
na' neto' bega'anto' Atenas.  
Timoteon' chone' xšin Diosen' na'  
chone' txen len neto' chyixjue'eto'  
diža' güen da' chzejni'in bene'  
che Criston'. Gwseła'to'ne'  
bedeyata'yoede' le'e bi soayaše'le  
na' bedeyene' chach laže'le cont  
zoachachle chejnilaže'chle Criston'.  
<sup>3</sup>Gwseła'to'ne' gan' zoalen' cont  
ne tole bi gacžejlaže'le bixchen'  
chyi chzaca'le. Ba nezele chio'  
chejnilaže'cho Criston' cheyała'  
saca'zi'cho lo yežlio nga. <sup>4</sup>Caten'

gwzoalento' le'e bzeneto' le'e leca  
yosoči yososaca' bene' chio'. Na'  
nezele ba chac can' gwnato'na'.  
<sup>5</sup>Na' dan' bi gocxenlaža' dan' bina'  
la' rson chelen', nachen' gwseła'  
Timoteon' gan' zoalen' cont nezda'  
še do laže'le chejnilaže'le Criston'.  
Le bena' xbab godca' še ba gwzoe  
gwxiyen' benlen le'e. Le še ba  
benlen le'e, con bendadzeto' xšin  
Diosen' len le'e še ca'.

<sup>6</sup>Perw na' bela' Timoteon' dan'  
bide' gan' zoalen' na' be'lene' neto'  
diža' güen, gwne' zoale chejnilaže'le  
Criston' na' chaquele yogo'loł bene'.  
Na' lecze gwne' chjayze'ele neto'  
na' zelaže'le yežagcho da' yoble  
lecze can' chaclaže' neto'. <sup>7</sup>Ca'czen'  
bene' migw, chžaglaoto' na' chyi  
chzaca'to', perw ba beyacxenlaže'to'  
gwnezeto' can' zoateze zoale  
chejnilaže'le Criston'. <sup>8</sup>Da' li ba  
beyacxenlaže'to' na' zoato' mbalaz  
dan' zoachachle chejnilaže'le  
Xancho Criston'. <sup>9</sup>Na' da'nan' leca  
chbeto' lao Diosen' can' chonle na'  
leca choe'chguato' yela' choxcen  
che' can' chonlen'. <sup>10</sup>Leca chol  
güižto'ne' do ža do yel chnabeto'ne'  
gone' ga yele'e lježcho da' yoble  
cont gwzejni'ichto' le'e na' šejchle  
šejnilaže'chlene'.

<sup>11</sup>Chnabeto' Xacho Diosen' len  
Xancho Jesucriston' yesone' latje  
yedenato' le'e. <sup>12</sup>Na' chnabeto'  
Xancho' gone' cont gaquech lježle  
tole yetole na' gone' ga gaquechle  
yogo' benachen' con catezen'  
chaqueto' le'e. <sup>13</sup>Chnabeczeto'ne'  
gone' cont soachachle šejnilaže'lene'  
na' gac lažda'olen' xilaže' lao  
Xancho Diosen' sin cbibi doła' gaple  
cate' yid Xancho Jesús'en' da' yoble

nche'e yogo'lo<sub>l</sub> bene' ba gwlej Diosa' cont zjanaque' lo ne'e.

**Pablon' bzejni'ide' can' che'ne  
Diosen' yesezoa yesebeze'**

**4** Na'a bene' migw, bach bsed blo'eto' le'e gonle can' chazlaže' Diosen', na' bach zoale chonle ca'. Na' can' ža Xancho Jesucriston' chata'yoeto' le'e na' chonto' mandadw šejchle gonchle dan' chazlaže' Diosen'.

<sup>2</sup>Ba nezczele bica' da' ca' bento' mandadw gonle na' zjanaquen con ca ža Xancho Jesúsén'. <sup>3</sup>Diosen' chaclaže' soatez soacho gaccho bene' laždao' xilaže'. Bi chazlaže' gata'lencho no'ol bi nac no'ol checho o bene' byo bi nac bene' checho. <sup>4</sup>Chaclaže' neze to tole naquen' cheya<sub>l</sub>a' soalen xo'ollen' sin cbi gaple do<sub>l</sub>a' na' gonelene' ca bene' zaca'. <sup>5</sup>Bitw gonle can' cheson bene' bi zjanombi'e Diosen', con chesezoalene' no'olen' contze yesone' can' chzelaže' lažda'ogaquen'. <sup>6</sup>Ne tole bitw gonle da' bi cheya<sub>l</sub>a' gonle na' siye' bene' lježle na' soalenle no'ol che'. Ba be'czto' diža' bosniseto' le'e can' gon Xancho Diosen' cont yesezaca'zi'chgua bene' cheson bite'tez da' xinjen' zjanac ca'. <sup>7</sup>Diosen' gwleje' chio' cont gaccho bene' laždao' xilaže', gague cont goncho bi da' xinj da' zjanac ca'. <sup>8</sup>Da'nán' note'tez le'e še bi chzenagle che da' qui ba bzejni'ito' le'e, gague xtiža' benachen' chzoale ca'ale, san Diosa' chzoale ca'ale. Len' bene' chio' Spiritw chen' na' Spiriton' naquen laždao' xilaže'.

<sup>9</sup>Bitw chyažjen gwzoja' le'e can' cheya<sub>l</sub>a' gague ljež chio'

chejnilaže'cho Jesucriston'. Dios nan' ba bsedde' le'e cont chaque lježle tole yetole. <sup>10</sup>Na' da' li ba chaquele yogo' bene' lježcho ca' nita' doxen Macedonian'. Na' chata'yoeto' le'e bene' migw, le gaguech legaque'. <sup>11</sup>To tole le yeyiljwlaže' bi žin gonle cont soa cuezle binlo can' nonto' mandadw na' bitw tale gwgüia na'le bi cheson bene' yoble. <sup>12</sup>Le gon can' ba gwnia' cont bene' bi zjanaque' txen len chio' yesacbe'ede' chonle güen, na' lecze cont bibi gac falt še bi dan' chyažj chchinele.

**Can' gac cate' yid Criston' da' yoble**

<sup>13</sup>Bene' migw, chaclaže'to' nezele can' yesac che bene' gosejnilaže' Jesucriston' na' ba gosate'. Chaclaže'to' nezelen cont bi yegüine'le ca cheson bene' bi nita' lez šjasyezoe' len Jesucriston'. <sup>14</sup>Nezecho gosot bene' Jesúsén' na' bebane' ladjo bene' guat ca'. Lecze nezecho Diosen' gone' cont yid Jesúsén' da' yoble nche'e bene' ca' ba gosat con bene' gosejnilaže' le'.

<sup>15</sup>Na' diža' nga chzeneto' le'e naquen dan' non Xancho Jesúsén' mandadw gwzeneto'. Chio' mbancho na'a chejnilaže'chone', še ne' mbancho cate' yide' da' yoble, bitw nacho yobch yežagchone' clcl ca bene' ca' ba gosat. <sup>16</sup>Na' ca nac Xancho Jesúsén', cuine' yetje' le'e yaban', na' ne' zižje gone' mandadw yesyeban bene' guaten', na' to angl blaona' ne', na' yenecho cuež trompeta che Diosen'. Nach bene' ca' ba gosat bene' gosejnilaže' Criston', legaque' zgua'tec yesyebane' ladjo bene' guaten'. <sup>17</sup>Na' ca yeyoža', chio' chejnilaže'chone' še ne' mbancho

yežlio nga, gon Diosen' cont  
yeyepcho txen len legaue' le'e  
yaban' to lo' bejw na' yežagcho  
Xancho Jesús'en le'e yaban'. Nach  
šjayzoacho len le' toli tocane.

<sup>18</sup>Da'nan' le gon chach laže' lježle  
tole yetole güe'le diža' can' gaca'.

**5** <sup>1-2</sup>Beñe' migw, bitw chyažjen  
gwzoja' cont gwzenda' le'e  
bi ža bi hor yid Xancho Jesús'en  
yeto. Nezele con yalzelaže'le žin  
ža žin hor can' chžin beñe' gwban  
beñe' chda šeže'le. <sup>3</sup>Na' šlac  
chesena beñe': "Mba zoacho, bibi  
chac checho", cate' concze žin ža  
yesebiaye'e. Can' chac che no'ole  
cate' yalzelaže' chaque' bes che yela'  
san, ca'czen' zjalyzelaže' yesebiayi'  
bene' ca' bi chesejniłaže'ne'. Bitw  
gac yosoxonje'. <sup>4</sup>Perw chio' beñe'  
migw, bi nchole yichjlažda'ochon',  
da'nan' bitw gac checho can' chac  
che beñe' chzenyal gwbanna'  
le'. <sup>5</sup>Diosen' ba bzejni'ide' chio'  
nombia'chone' na' be'ni' chen' ba  
chsenin' len chio'; da'nan' bitw  
nchole yichjlažda'ochon'. <sup>6</sup>Cheyla'  
gonyane'cho xbab naquen' chaclaže'  
Diosen' goncho na' nabia' cuincho  
goncho can' chazlaže'na'. <sup>7</sup>Beñe'  
ca' cbi chosozenag che Diosen'  
zjazaca'lebe' ca beñe' zjantas na' ca  
beñe' chesezože. <sup>8</sup>Perw ba bzejni'  
Diosen' chio' cont bi goncho can'  
chesone'na'. Da'nan' cheyla' nabia'  
cuincho goncho can' chazlažen'.  
Cheyla' šejnilaže'cho Diosen' na'  
gaque lježcho na' yebecho dan'  
nezecho šjayzoacho len Diosen'.  
Še goncho yogo' da' ca' gaccho  
ca soldaw ben' nyaze' to de ya  
da' hcue'ejen le' cont bibi chac  
che' cate' chdilē' len beñe'. <sup>9</sup>Gague

gwlej Diosen' chio' cont saca'zi'cho  
che xtola'chon'. Gwleje' chio' cont  
šejnilaže'cho Xancho Jesucriston' na'  
šjayzoacho len le'. <sup>10</sup>Na' Jesucriston'  
bnežjw cuine' neche chio' cate'  
gosot beñe' le' cont šjayzoacho  
len le' la'czla' še mbancho o še  
ba gotcho cate' yide' da' yoble.

<sup>11</sup>Da'nan' le gonch can' ba chonle, le  
gon chach laže' lježle tole yetole na'  
le gaclench lježle cont soachachle  
šejnilaže'le Jesucriston'.

**Pablon' bzejni'ide' beñe' chesejniłaže'  
Jesucriston' can' cheyla' yesone'**

<sup>12</sup>Chata'yoeto' le'e beñe' migw,  
gagle bala'an beñe' ca' cheson xšin  
Xancho Jesucriston' chosogüia  
chesene'e le'e na' chosozejni'ide'  
le'e naquen' cheyla' soa cuezle.

<sup>13</sup>Gapchualne' bala'an na'  
gaquechgüele legaue' dan' chesone'  
xšin Diosen' do laže'. Na' le soa  
binlo len lježle tole yetole.

<sup>14</sup>Ca'cze beñe' migw, le tile beñe'  
bi chesaclaže' yeson žin, le gon  
chach laže' beñe' chesacde' zdebe  
chosozenague' che Jesucriston', na'  
le gaclen beñe' biña' yesejni'ide'  
naquen' cheyla' yesone'. Le soa le  
gap yela' chxenlaže' len yogo'lol  
beñe'.

<sup>15</sup>Še bi da' mal cheson beñe' len  
le'e, le gon byen bi yoži'ile da' mal  
len legaue'. Le yeyiljwlaže' naclen'  
gonle güen len lježle tole yetole na'  
len note'tez beñe'.

<sup>16</sup>Do tiemp le yebe. <sup>17</sup>Le soateze  
le soa le yol güiž Diosen'. <sup>18</sup>Le güe'  
yela' choxclen che Diosen' bite'tez  
da' chac chele, le da'nan' chaclaže'  
gon chio' chejniłaže'cho Cristo  
Jesús'en.

<sup>19</sup>Bitw gwžonle gon Spiritw che Diosen' can' chaclažen' gonen len le'e o len bene' yoble. <sup>20</sup>Bi gwzoale ca'ale dan' chesena bene' cheso'e diža' dan' ba gož Diosen' legaque'. <sup>21</sup>Na' le gonyane' xbab che yogo'loł diža' da' cheso'e cont soale gwzenagle che da' nac güen. <sup>22</sup>Na' bitw gonle bite'tez da' nac da' mal.

<sup>23</sup>Diosen' chone' ca chzoa chbezcho binlo len xbab dan' yo'o lo' yichjlažda'ochon'. Na' chnabda'ne' gone' cont lažda'olen' gacyanen' xilaže'. Na' lecze gonšque' cont bibi da' mal gonle len yichjlažda'olen' neca len cuerp chelen' cont bibi doła' gapple caten' yid Xancho Jesucriston' yeto. <sup>24</sup>Diosen' ben'

ba gwleje' chio' cont naccho xi'ine' chone' con da' že' gone', na' da'nan' gone' cont gac lažda'ochon' xilaže'.

**Pablon' gwnabe' gaclen  
Diosen' bene' Tesalónican'**

<sup>25</sup>Bene' migw, le soa le nab gaclen Diosen' neto'.

<sup>26</sup>Na' cate' chežagle le gwnopa' na' lježle cont nacbia' chaque lježle.

<sup>27</sup>Chona' mandadw gwlable cart nga ga yesene yogo'loł bene' lježcho ca' nita' gan' zalna', le can' chaclaže' Xancho Jesucriston' gonle.

<sup>28</sup>Na' soateze Xancho Jesucriston' gaclenšque' le'e. Da' na'ze chzoja' na'a.

# CART GWCHOPE DAN' BZOJ POSTLW SAN PABLO CHE BENE' CA' ŽE' TESALÓNICA

---

Pablon' bzoje' bene' Tesalónican'  
bene' chesonxen Jesucriston'

**1** <sup>1-2</sup>Neda' Pablo chzoja' le'e  
chdop chžagle chonxenle  
Xancho Jesucriston' Tesalónica  
na' nacle txen len le' na' len Xacho  
Diosen'. Na' neda' len Silvano  
na' Timoteo chnabto' lao Xacho  
Diosen' na' lao Xancho Jesucriston'  
yesaclene' le'e na' yesone' cont soa  
cuezle binlo len xbab dan' yo'o lo'  
yichjlažda'olen'.

Cate' yid Criston' da' yoble  
Diosen' gwnežjue' da' yesezaca'zi'  
bene' bi chosozenag che'

<sup>3</sup>Bene' migw, neto' cheyała'  
soateze soato' güe'to' yela'  
choxclen che Diosen' che dan'  
chonlen'. Cheyała' gonto' ca' da'  
zejle chejnilaže'chle Diosen' na'  
zej chaquech lježle. <sup>4-5</sup>Da'nan'  
chbeto' choe'to' xtiža'len' len  
yezica'chle bene' ba gwlej Diosen'  
na' chesežague' chesonxene'  
Jesucriston' ga yoble. Choe'to' diža'  
ca güen chonle dan' chyo chchejele  
chejnilaže'le Jesucriston' la'czla'

da' zan da' chac chele na' chosoči  
chososaca' bene' le'e. Da'nan'  
nezecho Diosen' zejczje to licha da'  
nchogbi'e zaca'le par yeyejle yaban'  
gan' zoe' chnabi'e.

<sup>6</sup>Na' Diosen' zeje' to licha da' gone'  
cont yesezaca'zi' bene' ca' chosoči  
chososaque' le'e. <sup>7</sup>Na' lecze zeje' to  
licha da' gwcueze' yogo'te dan' chyi  
chzaca'chon'. Gwcuezen' cate' le'echo  
yetj Xancho Jesús'en' le'e yaban' len  
angl che' ca' bene' zjans'e yela'  
guac che'. Yetje' nyechjde' yi' bel.

<sup>8</sup>Na' gwnežjue' da' yesezaca'zi' bene'  
ca' bi zjanombi'e Diosen', na' neca  
chosozenague' che diža' güen dan'  
chzejni'in che Xancho Jesucriston'.

<sup>9</sup>Legaque' yesezaca'zi'e toli tocanē.  
Gwbat šjasyenite' len Xancho  
Jesucriston' ben' nac bene' zaca'  
juisyw na' nape' yela' guac xen. <sup>10</sup>Cate'  
žin žan' yid Jesucriston' da' yoble,  
chio' chejnilaže'chone' na' naccho  
lo ne'e gwlo'echo naque' bene' zaca'  
juisyw na' yebanecho catec bene'  
güen naque'. Nacto' txen len le'e da' ba  
chejle'le che diža' dan' be'lento' le'e.

<sup>11</sup>Da'nan' zoatez zoato' chnabeto'  
Diosa' gaclene' le'e gonle güen

cont yebede' ba gwleje' le'e par nacle xi'ine'. Na' chnabeto'ne' gaclene' le'e len yela' guac chen' cont yeyoż gonle yogo' da' güen da' ba gwchoglaole gonle na' len bica'chle dan' che'nele gonle dan' chejnilaže'lene'. <sup>12</sup>Chnabto' gonle cont Xancho Jesucriston' gacxene', na' le' gone' ga gacxenle txen len le', le Dios chechon' na' Xancho Jesucriston' nita'cze' chesaclene' le'e.

### Choj ben' gonchgua güedenag len Diosen'

**2** Bene' migw, da' yoble chnia' le'e ca gac cate' yid Xancho Jesucriston' yeto, yotobe' chio' šjayzoacho txen len le'. <sup>2</sup>Chneyoeto' le'e bitw gacžejlaže'le o žeble še no yid yedezejni'ide' le'e, ne' Spiritw che Diosen' žan ba bžin ža yid Jesucriston' da' yoble. Na' neca gacžejlaže'le še bi da' yenele o še la' no cart güenlaže' da' chesena bene' gwseła' neto', žan ba bžin ža yid Jesucriston'. <sup>3</sup>Bi güe'le latje no siye' le'e še bi yesene' o še bi da' yesone'. Le cate' za' yid Xancho Jesúsén' da' yoble, bene' zan yesase' yesyedabague' Diosen'. Lecze cana' choj to bene' blao bene' gonchgüe' güedenag len Diosen'. Benan' ba naquen yeyeje' lo yi' gabilen'. <sup>4</sup>Gaque' bene' ya'laže' na' gue'ede' Diosen' na' lecz ca' gue'ede' bite'tezech da' chesejnlaže' bene'. Na' cui'e lo' yodao' blao gan' chesonxene' Diosen', gon cuine' ca Dios cont yesonxen bene' le'.

<sup>5</sup>¿Bi za'laže'le cate' gwzoa' len le'e bzejni'ida' le'e can' gac cate' yid Jesucriston' da' yoble? <sup>6</sup>Na' na'a nezczele bi dan' chžon choj bene'

blao ben' gonchgua güedenag len Diosen', perw cate' ba bžin ža bžin hor, cana' choje'. <sup>7</sup>Ba nita' bene' chesonchgüe' güedenag len Diosen' na'a, perw ne' ngaše' can' chesone'. Na' gwžin ža cate' bich soa dan' gwžon yesyedabaga'chgüe' Diosen'. <sup>8</sup>Cana'chen' choj bene' blaon' ben' gonchgua güedenag len Diosen'. Nach Xancho Jesúsén' yide' nyechjchgüede' be'ni', na' cate' bene' blaon' le'ede' le' nach Xancho' güe'le diža' na' ši'en goten le'. Can' gone' yonitlagüe'ne'. <sup>9</sup>Na' cate' choj bene' blaon' ben' gonchgua güedenag len Diosen', Satanás dan' chnabia' da' xigüe' ca' gonen cont gapchgüe' yela' guac, na' gone' da' yesyebane bene' contze gonlede' legaque'. <sup>10</sup>Yogo'te da' mal gone' gonlede' bene' ba naquen yesebiaye'e toli' tocañe. Yesebiaye'e da' bi chesejle'e diža' lin', le lenña' zaca' yesejle'e cont gata' yela' mban chegaque' toli' tocañe. <sup>11</sup>Na' da'nán' Diosen' güe'le latje yeseziye'e legaque' cont yosozenague' diža' güenlaže'. <sup>12</sup>Nach yesezaca'zi'e toli' tocañe da' bitw gosejle'e diža' li che Xancho' san besyebede' da' malen'.

### Diosen' chbeje' bene' na' chone' cont gac šjasyenite' len le' toli' tocañe

<sup>13</sup>Bene' migw, chaque Xancho Jesucriston' le'e. Na' neto' cheyała' soatez soato' güe'to' yela' choxcen che Diosen' da' gwleje' le'e cate' bina' xe yežlion' cont šjayzoale len le'. Na' cate' gwzolao chejle'le diža' li che Diosen' nach gwsele' Spiritw chen' chonen cont nacle bene' laždao' xilaže'. <sup>14</sup>Neche da'nán' gwlej Diosen' le'e, na' dan' gwyejle'le diža'



güen che Jesucriston' da' be'lento' le'e, žin ža gon Diosen' cont soale mba juisyw can' zoa Xancho Jesucriston'.

<sup>15</sup>Da'nan' bene' migw, le soa chach le gwzenag do yichj do laže'le che dan' bzejni'ito' le'e, diža' dan' ba be'lento' le'e na' dan' ba bzojto'. <sup>16-17</sup>Xacho Diosen' chacde' chio'. Gague da' te che dan' bene' cont beyone'xenlaže'cho, na' zoacho lez gonche' güen len chio', le nži'ilaže'de' chio'. Na' chnabda' cuin Xancho Jesucriston' len Xacho Diosen' yesone' chach laže'le na' yesaclenšque' le'e cont yogo' da' gonle na' diža' da' güe'le yesaquen güen.

**Gwnab Pablon' yosoł güiže' Diosen' gaclene' le' len bene' lježe' ca'**

**3** Na'a bene' migw, yoł güižšcale Diosen' gaclene' neto' cont yob šjadixjue'eto' che Xancho Jesucriston' doxen, na' cont bene' yezica'chle yesebede' yosozenague' can' ba ben le'e. <sup>2</sup>Lecze nabšquele Diosen' yosle' neto' lo na' bene' mal bene' cheson clele, le gague yogo' bene' chesejnilaže' Jesucriston'. <sup>3</sup>Xancho Jesucriston' zoatez zoe' chone' can' že' gone', na' gaclene' le'e cont soachachle šejnilaže'lene'. Na' lecze gwcuas gwcue'eje' le'e len da' malen'. <sup>4</sup>Na' nezeto' chaclencze' le'e cont chonle da' ba bento' mandadw gonle na' cont nita'czle gonlen. <sup>5</sup>Chnabda' Xancho Jesucriston' gone' cont nezele catec chaque Diosen' chio'. Na' lecze chnabda'ne' gone' cont gwyo gwchejle len da' chyi chzaca'le can' gwzoa Criston' byo bcheje' len da' gwdi gwxaque'.

**Pablon' bene' mandadw yesone' žin**

<sup>6</sup>Bene' migw, chzeneto' le'e can' chon Xancho Jesucriston' mandadw, bi cheyała' gonle txen len notetez bene' lježchon' bene' bi chesaclaže' yesone' žin, le bi chesone' ca nac da' bsd blo'eto' legaque'. <sup>7</sup>Neto' benczto' žin cate' gwzoato' len le'e, na' da'nan' nezele can' cheyała' gonle. <sup>8</sup>Cuent cheto' güe'ej gwdagwto'. Bžaglaoto' bento' žin do ža do yel cont güe'ej gwdagwto', na' bi gwnabeto' le'e da' byažje bchineto'. <sup>9</sup>Zaca'czto' ša gwnabeto' le'e da' ye'ej gagwto' cate' bento' xšin Diosen' gan' zoalen', perw bi goclaže'to' gonto' ca', le goclaže'to' gwlo'eto' le'e ca cheyała' gonle. <sup>10</sup>Caten' gwzoato' len le'e bžiato' bia' gwnato': "Še no bi gon žin, bi cheyała' gagüe'." <sup>11</sup>Perw na' ba beneto' diža' chesene' balle bitw bi žin chonle, con chdale chacle diža'. <sup>12</sup>Na' še nole chonle ca', chata'yoeda' le'e na' chona' mandadw gonle can' ža Xancho Jesucriston', bich tale ca', san le yezolaošaze le yeyon žin cont gac si'le da' ye'ej gagwle. <sup>13</sup>Na' le'e bene' migw, bitw yeche'ele gonle da' güen. <sup>14</sup>Na' še no bene' chon güedenag len dan' ba bzojto' nga, le gon xbab non' chon ca' na' bich gonle txen len le' cont gacde' zto' che dan' chone'na'. <sup>15</sup>Perw bitw gue'elne', san gwzejni'ilne' diža' šagüe', le naque' bene' lježcho.

**Pablon' gwñabde' Diosen' gaclene' bene' Tesalónica**

<sup>16</sup>Na' chnabda' Xancho Jesucriston' ben' chone' cont soa

cuezcho binlo len xbab da' yo'o lo'  
yichjlažda'ochon', gonščacze' cont  
soa cuezle ca' yogo'te ža bite'teze da'  
chac. Len' soaščacze' len yogo'le.

<sup>17</sup>Na' cuincza' neda' Pablo chzoja'  
late' dao' le'e cart nga chguapa' le'e

tiox. Can' choncza' len yogo' cart  
dan' chselā' cont nachbia' nedan'  
chselan', le ba nombia'le letr chian'  
can' chzojan'. <sup>18</sup>Xancho Jesucriston'  
gaclenšque' yogo'le. Da' na'zen'  
chzoja' na'a.

# CART NECHW DAN' BZOJ POSTLW SAN PABLO CHE TIMOTEO

---

**Pablo chzoje' cart che Timoteo**

**1** Neda' Pablo chzoja' cart nga chio' le' Timoteo. Naca' postlw che Jesucriston', le Diosen' len Xancho Jesucriston' gosone' mandadw chona' xšinen'. Dios nan' none' chio' yela' mban toli tocane na' Xancho Jesucriston' chone' cont zoacho lez šjayzoacho len le' toli tocane. <sup>2</sup>Chzoja' le' Timoteo, le naco' ca dogualje xi'ina' da' bzejni'ida' le' cont chejnilažo' Criston'. Na' chnablaža' nita' Xacho Diosen' len Xancho Jesucriston' yesyeyaše' yesyeži'ilaže'de' le' na' yesaclene' le', na' yesone' cont soa cuezo' binlo len xbab da' yo'o lo' yichjlažda'oguoñ'.

**Nita' bene' chosozejni'ide'  
diža' güenlaže'**

<sup>3-4</sup>Caten' gwza'a Efeson' gwy'a Macedonian' gwneyoeda' le' cont bega'ano' Efeson' neche nita' bal bene' chosozejni'ide' bene' Efeso ca' diža' güenlaže'. Con bi cheyož yedo chesonchgüe' xbab che diaža che da' xozxta'ocho ca' na' cheso'e zan cuent che legaque'. Na' da' yoble chneyoeda' le' gono' mandadw bich yosozejni'ide' che da' ca'.

Dan' chosozejni'ide' chonen ga yesacžejlaže' bene', na' bi chaclenen yesone' dan' gwlo'o Diosen' lo na'cho gon chio' ba chejle'cho xtižen'.

<sup>5</sup>Na' gono' mandadw yesone' güen, le chaclaža' yesenite' yesaque lježe'. Na' cont bibi gwžon yesaque lježe', cheyała' yesaque' bene' laždao' xilaže', cheyała' yesone' dan' nezecho naquen güen yogo' ni'a, na' cheyała' yesejli'e diža' li che Diosen' do yichj do laže'. <sup>6</sup>Bene' ca' chosozejni'ide' diža' güenlaže' bi chesone' ca', na' da'nana' cheso'e diža' da' bibi zaca'. <sup>7</sup>La'czla' chesaclaže' yosozejni'ide' ley dan' bzoj Moisésen', bi chesejni'ide' dižan' cheso'e na' neca chesejni'ide' da' ca' chesene' cheyała' goncho.

<sup>8</sup>Nezecho ley nan' naquen güen con še gwchinchon can' cheyała' gwchinchon. <sup>9</sup>Na' lecze nezecho ley nan' gague chosbagan' bene' cheson da' güen, san chosbagan' bene' cheson da' mal na' bene' cheson güedenag len dan' nonen mandadw goncho. Chosbagan' bene' bi chosozenag che Diosen', na' bene' chesonteze' da' malen', na' bene' bi chesape' Diosen' bala'an neca chesonxene'ne', na' bene'

chesot no xaxna'gaque', na' len nochle bene' güet bene'. <sup>10</sup> Lecze chosbagan' bene' chesata'lene' no'ole bi nac xo'olgaque' o bene' byo bi nac bene' chegaque', na' no bene' byo bene' chesata'lenteze' ljež bene' byoe' gualaz no'ole, na' bene' cheseche'xoxje' bene' yoble cont chesote' legaque' chesezi'e mechw, na' bene' ca' chesonlaže', na' bene' ca' cheso'e diža' güenlaže' lao justis, na' note'teze bene' cheson da' zej clele len diža' güen da' ba bzejni'i Diosen' chio'. <sup>11</sup> Na' diža' güen da' ba bzejni'i Diosen' chio' zaca'chguan, na' Dios ben' zoa mba juisyw, le'na' ba gwlo'en lo na' chyixjue'edan' bene'.

**Pablon' cho'e yela' choxclen che  
Diosen' na' che Jesucriston'**

<sup>12</sup> Choa' yela' choxclen che Xancho Jesucriston' ben' chon cont chac chyixjue'eda' xtiže'na'. Choxclenen' chacde' gona' xšinen' can' chazlaže' na' da'nan' gwleje'nda' gonan'. <sup>13</sup> Gwleje' neda' la'czla' cana' bia' diža' bya' che' na' bgue'eda'ne' na' bchi bsaca' bene' ca' chesonxene' le'. Na' la'czla' bena' ca', Diosen' beyaše' beži'ilaze'de' neda', le bina' šejnilaža'ne' ca hora' na' bina' gacbe'eda' chona' clele. <sup>14</sup> Nach Xancho Jesucriston' nži'ilaze'chgüede' neda' na' goclene'nda' cont gwyejnilaža'ne', na' na'a chacda'ne' na' lecze chacda' yezica'chle bene'.

<sup>15</sup> Da' nga naquen to diža' li da' zaca' šejle'cho: Jesucriston' bide' yežlio nga cont beque'e xtoła' chio' bene' güen da' xinj. Na' chacda' neda' naca' bene' la'zelagüe

gwyanch xtoła'. <sup>16</sup> Na' la'czla' naca' bene' la'zelagüe gwyanch xtoła', Jesucriston' beyaše'de' neda' na' bezi'xene' chia' cont blo'e napchgüe' yela' chxenlaže'. Bene' ca' cont bene' za' za'ac yesacbe'ede' nape' yela' chxenlaže' xen na' yesejnilaže'ne' na' gata' yela' mban chegaque' toli tocañe. <sup>17</sup> Cheyala' gonxencho Diosen' ben' nac Rey chechon' toli tocañe. Gague da' te chen'. Zoacze' la'czla' bi chle'echone' na' naque' la'zelagüe bene' sina'. Totc le' zaque' gonxencho na' gapchone' bala'an toli tocañe. Na' can' gonšcaczcho.

<sup>18</sup> Xi'ina' Timoteo, ben xbab che dižan' gosoe' bene' ca' bosozende' le' can' gwna Diosen' chio' cana'. Na' can' ba gose'e le' gono' xšin Diosen', lecze can' chneyoeda' le' gonon' do yichj do lažo', la'czla' še gacdo' zdebe gonon'. Soačacho' šejnilažo' Diosen', na' soatezo' gono' cont nezdo' lo' laždaguo' bibi da' mal chono'. <sup>19</sup> Bał bene' chesonteze' da' malen' la'czla' zjanetzede' lo' lažda'ogüe' bi cheyala' yesonen', na' da'nan' ba gosebejyichje' bich chesejnilaže' Diosen'. <sup>20</sup> Can' goc che Himeneo na' che Alejandro. Da'nan' ba gwnabda' Diosen' yesaque' lo' na' Satanás dan' chnabia' da' xigüe' ca', na' gonen con ca chaclažen' len legaque' cont yesacbe'ede' bi cheyala' yeseneye'e che Diosen'.

**Dan' cheyala' nabecho Diosen' gone'**

**2** Na' dan' nac da' žialao xen gon chio' chonxencho Diosen': cheyala' nabecho Diosen' gone' bi dan' chyažje chio' lente dan' cheseyažje yogo'lol bene', na' nabechone' gaclene' yogo'lol bene',

na' güe'cho yela' choxc̄len c̄he  
 Diosen' c̄he bi da' güen da' chesac  
 c̄he yogüe'. <sup>2</sup>Cheyała' nabecho  
 Diosen' gac̄lene' bene' gwnabia'  
 ca', no rey, no gobernador na'  
 nochle bene' ca' chesenabia', cont  
 soa cuzcho binlo na' bibi gwžon  
 gonxencho Diosen', neca gata' da'  
 gwžon goncho bichle da' cheyała'  
 goncho. <sup>3</sup>Naquen güen nabecho  
 Diosen' gac̄lene' yogüe' na' naquen  
 da' chazlaže' Diosen', Dios ben' none'  
 chio' yela' mban toli tocane. <sup>4</sup>Le  
 chaclaže' gwnežjue' yela' mban  
 toli tocane c̄he yogo'lol bene'  
 na' chaclaže' yesejni'ide' diža' li  
 c̄he'. <sup>5</sup>Toz Diosen' zoa bene' zaca'  
 yesonxen yogo'lol bene', na' lecz toz  
 ben' chozoe' chio' binlo len Diosen',  
 le'na' Jesucriston' ben' golje benačh.  
<sup>6</sup>Jesucristw nan' bnežjw cuine' gote'  
 neche da' mal da' goson yogo'lol  
 benačh, na' cate' bžin ža Diosen'  
 bžie' bia', cana' bene' cont goseneze  
 benačen' c̄he'. <sup>7</sup>Na' Diosen' gwleje'  
 neda' cont naca' postlw c̄he' na' cont  
 chyixjue'eda' xtiže'. Choa' diža' li,  
 bi chonlaža', le naca' Criston' txen,  
 gwleje'nda' cont chzejni'ida' bene'  
 ca' bi zjanac bene' Israel diža' li c̄he'  
 cont yesejnilaže'ne'.

<sup>8</sup>Na' dan' che'nda' gac gate'teze  
 chesedop chesežague' chesonxene'  
 Diosen', chaclaža' bene' ca' yosol  
 güiže' Diosen' yesaque' bene' laždao'  
 xilaže' cont yeselis na'gaquen'  
 laogüen' sin cbi yeseže'e bene' o  
 yosoššlene' bene'. <sup>9</sup>Na' ca' nac  
 no'ol ca' chesonxen Jesucriston', bi  
 cheyała' yesebec yichjague' še nite'  
 xdanchgua, še yosoguale' bga o  
 ret de oro o de perlas dan' naquen  
 da' zaque', še nac yiša' yichjen'

xdanchgua, na' še nac xagaque' da'  
 chzaca' la'ay. <sup>10</sup>San cheyała' yesebec  
 yichjague' yesone' da' güen ca  
 chaclaže' Diosen' yeson yogo' bene'  
 chesejnilaže'ne'. <sup>11</sup>Na' no'ol ca' lecze  
 cheyała' nite' šize yosozenague'  
 c̄he bene' ca' chososed chosolo'ede'  
 xtiža' Diosen', na' yesone' con da'  
 yese'ene'. <sup>12</sup>Neda' bi chona' latje  
 cont no'ol ca' yosozejni'ide' bene'  
 byo latje lagüe', na' neca chona'  
 latje yesenabi'e bene' byo. Cheyała'  
 yesenite' šize, <sup>13</sup>le cate' Diosen' bene'  
 benačen' zgua'tec bene' Adánna'  
 na' gwdechle bene' Evan'. <sup>14</sup>Na' cate'  
 Satanás dan' chnabia' da' xigüe'  
 ca' gwxoayaguen bene' nechw ca',  
 gague gwxoayaguen Adánna', san  
 gwxoayaguen Evan' cont bene'  
 dan' gwna Diosen' bi gone', na'  
 da'nana' beyaque' bene' güen da'  
 xinj. <sup>15</sup>Perw na' la'czla' no'ol ca'  
 chesežaglagüe' chesezan xi'ingague',  
 žin ža šjasenite' len Diosen' še  
 zjanite' chesejnilaže'ne' na' še  
 zjanite' chesacde'ne' na' chesacde'  
 yezica'chle bene', na' še zjanite'  
 chesone' can' chazlaže' Diosen' len  
 yela' sina' da' ba bnežjue' legaque'.

**Can' yeson bene' ca' yosogüia  
 yesene'e yezica'chle bene'  
 chesonxene' Diosen'**

**3** De to diža' da' zaca' šejle'cho  
 da' žan: "Bene' chesaclaže'  
 yosogüia yesene'e yezica'chle bene'  
 chesonxene' Diosen', chesaclaže'  
 yesone' to da' güen, še ca'." <sup>2</sup>Na'  
 bene' gwłane' gone' žin dan' nac  
 ca' cheyała' soateze' gone' da' güen  
 yogo' ža sin cbi gone' da' zaca'  
 tilchone'. Cheyała' soa toz no'ol c̄he',  
 na' cheyała' gague' bene' yo'o xbab,

na' gaque' bene' chnabia' cuine' chone' da' güen, na' gaque' bene' chon da' zej toli cont bene' yoble yesape' le' bala'an. Cheyala' yebede' gwlebe' bene' liže, na' cheyala' gaque' bene' chac chzejni'ide' xtiža' Diosen' binlo. <sup>3</sup>Bene' chzože bi gac gwlane' žinna'. Bi cheyala' gaque' bene' yolao chdile chšaše'. Cheyala' gaque' bene' šagüe' bene' chon güen len yezica'chle bene', na' bi cheyala' gaque' bene' chon znia, neca selaže'chgüe' gone' gan mechw. <sup>4</sup>Na' cheyala' gaque' bene' neze can' gone' cont xi'ine' ca' na' nochle bene' nita' liže' yosozenague' che' na' yesape' le' bala'an. <sup>5</sup>Le še bi nezde' nac gone' cont xi'ine' ca' yosozenagbe' che' na' yesapbe' le' bala'an, bi gac gone' cont bene' chesedop chesežag chesonxene' Diosen' yosozenague' che'. <sup>6</sup>Bi cuejle bene' za' chzolao chejnilaže' Diosen' cont gwgüia ne'e bene' ca' chesonxene' Diosen', le bene' coben' xož gonxen cuine' na' tena' Diosen' gü'e le' castigw še gone' ca'. Can' goc che Satanásen' cani'te cate' benxen cuinen na' Diosen' bebejen' gan' zoe'na'. <sup>7</sup>Na' bene' cuejle cheyala' soe' gone' cont bene' ca' bi zjanac txen yesenezde' chone' güen, le še gone' da' malen' yesene' bene' che' na' Satanásen' co'oyelan' le' gonche' da' malen'.

#### **Bene' ca' yeson žin bixjw**

<sup>8</sup>Na' lecze cate' cuejle bene' yeson žin bixjw da' chata' len bene' ca' chesonxene' Diosen', le cuej bene' cheson güen cont gapcho legaque' bala'an. Lecze cheyala' yesaque' bene' chesoe' diža' li da' šejle'cho, bene' bi zjayolagüe' chesezožde',

na' bene' bi yesezelaže' yeseni'e che xšin Diosen' dan' yesone'na'. <sup>9</sup>Cheyala' yesaque' bene' chesejle'e cayanen' ba bzejni'i Diosen' chio' che Jesucriston' dan' nono gwneze cana', na' bene' cheson da' güen cont yesenezde' lo' yichjlažda'ogüe' chesone' can' chazlaže' Diosen'. <sup>10</sup>Na' cate' za' cuejle bene' ca' yeson žin bixjwna', le na'yane' can' chesonen', na' še gata'bia' chesonen' binlo bibi chesechoe', nachen' cuejle legaque'. <sup>11</sup>Na' no'ol ca' yeson xšin Diosen' lecze cheyala' yesone' cont gapchone' bala'an. Bi cuejle no'ole chnie' che bene' o no'ole yolagüe' sožde', san cuejle no'ol ca' yesenite' yesone' can' chazlaže' Diosen'. <sup>12</sup>Na' cate' cuejle bene' byo yeson žin bixjw da' chata' ladjo bene' ca' chesonxene' Diosen', le cuej bene' zoa toze no'ol che', na' bene' chon cont bi' che' ca' na' nochle bene' nita' liže' chosozenague' che'. <sup>13</sup>Le še bene' ca' cheson žin bixjon' yesone' binlo dan' yo'o lo na'gaque' yesone', nach yesejnilaže'chgüe' Jesucriston' sin cbi yesežebe', na' yezica'chle bene' yesape' legaque' bala'an.

#### **Da' chejni'icho che Diosen' dan' nono gwneze cana'**

<sup>14</sup>Chzoja' le' da' quinga da' cheyala' gonle la'czla' zoa' lez yob yida' gan' zon', <sup>15</sup>cont še šeda' ba nezdo' nac cheyala' yeson bene' ca' zjanac diaža che Diosen', le chio' chdop chžagcho chonxencho Jesucriston' naccho diaža che Diosen' ben' zoa toli tocanē. Na' chio' chdop chžagcho chonxenchone' yo'o lo na'cho choncho cont chesombia' bene' diža' li che Diosen'. <sup>16</sup>Da'

licze da' zaca'chgua dan' ba bzejni'i Diosen' chio'. Cana' nono gwneze da' quinga dan' bzejni'ide' chio' che Jesucriston', žan:

Diosen' bide' golje' be<sub>n</sub>ach,  
na' Spiritw che Diosen' blo'en  
naque' bene' güen juisyw.  
Na' bene' ca' zjanac angl che  
Diosen' bedese<sub>n</sub>e'e le'.  
Na' bžin ža Diosen' bene' cont  
beyepe' yaba gan' yo'ochgua  
be'ni'.  
Na' bene' ca' cheso'e xtižen' ba  
goseyixjue'eden' len bene' že  
nación zito',  
na' zan bene' že lo yežlion' ba  
chesejle'e che'.

Žin ža ba<sub>l</sub> bene' yesebejyichje'  
diža' li che Diosen'

**4** Na' Spiritw che Diosen' ba  
ben' diža' li cont šejni'icho  
žin ža cate' ba<sub>l</sub> bene' yesebejyichje'  
diža' li che Diosen' dan' chejle'cho  
na' yesejle'e che bi da' yeson da'  
xigüe' ca' cont yese<sub>x</sub>oayaguen  
lega<sub>q</sub>ue'. <sup>2</sup>Da' xigüe' ca' yesonen  
cont nita' bene' yosozejni'ide' diža'  
güenlaže' da' siyen' bene', na' bene'  
ca' yosozejni'ide' diža' güenlažen'  
bibu yesacde' lo' yichjlažda'ogüe'  
caten' yeseziye'e bene'. <sup>3</sup>Yosožone'  
yosožagna' bene' na' yosožone' ye'ej  
gagwcho ba<sub>l</sub> yela' guagw, la'czla'  
Diosen' bene' cont zjade yela'  
guagw ca' cont chio' chonxencho  
Criston' na' nombia'cho diža' li čhen'  
gagwchon na' güe'cho yela' choxc<sub>l</sub>en  
che'. <sup>4</sup>Yogo' dan' ben Diosen' naquen  
güen na' bi naquen da' gue'echo,  
con še güe'cho yela' choxc<sub>l</sub>en che'  
caten' gagwchon. <sup>5</sup>Na' nezecho guac  
gagwcho bite'teze yela' guagw, le

ba gwna Diosen' naquen güen, na'  
güe'cho yela' choxc<sub>l</sub>en che' cate'  
gagwchon.

Can' gon Timoteo xšin Diosen'

<sup>6</sup>Ca nac bene' ljež chio'  
chonxencho Jesucriston', cheya<sub>l</sub>a'  
gwzejni'ido' lega<sub>q</sub>ue' da' quinga  
ba gwnia' le' cont gacleno' lega<sub>q</sub>ue'  
can' chazlaže' Jesucriston', le  
gwleje' le' cont gwzejni'ido'  
bene'. Lecz gonen čačhlažo' še  
gwzejni'ido' bene' xtiža' Diosen'  
dan' chejle'cho, le naquen to diža'  
güen, na' ba bzenago' čhen do  
yichj do lažo'. <sup>7</sup>Bi gwzenago' che  
diža' güenlaže' dan' chesaljaže'  
bene' bi chesonxene' Diosen'. Ben  
byen soaczo' gono' can' chazlaže'  
Diosen'. <sup>8</sup>Nezecho cate' chda ni'a  
na'cho chaclenen cuerp chechon'  
late'. Perw na' cate' choncho can'  
chazlaže' Diosen', chaclenchen chio'  
cont zoa chbezcho binlo na'a na'  
lecz ca' cate' šjayzoacho len le' toli  
tocane. <sup>9</sup>Can' ža to diža' dan' zaca'  
šejle'cho na' dan' zaca' gwzenagcho  
čhen do yichj do laže'cho. <sup>10</sup>Na'  
cont choncho can' chazlaže' Diosen',  
da'nan' chonchguacho xšinen' na'  
chyho čhčejaže'cho cate' čzi'diža'  
bene' chio', le nezecho Diosen'  
zoe' toli tocane na' zoacho lez  
gone' güen len chio'. Le' chaclaže'  
gwnežjue' yela' mban toli tocane  
che yogo' be<sub>n</sub>ach, na' can' naczen  
gone' len bene' chesejnilaže'  
Jesucriston'.

<sup>11</sup>Da'nan' bzejni'i bene' da' ca'  
ba gwnian' na' ben mandadw  
yosozenague' che yogo'czen. <sup>12</sup>Bi  
go'o latje yosozoa bene' le' šla'ale  
lagüe da' naco' bene' xcuide'. Len



xtižo' na' len da' chono' ben güen  
 cont yogo' beñe' chesejnilaže'  
 Criston' yesape' le' bala'an. Len  
 xtižo' na' len da' chono' blo'e  
 legaque' ca cheyała' yesacde' Diosen'  
 na' beñe' lježgaque', ca cheyała'  
 yesenita'chache' yesejnilaže'ne' na'  
 ca cheyała' yesaque' beñe' laždao'  
 xilaže'. <sup>13</sup>Na' na'a šlac bina' yida'  
 da' yoble, gwlec yichjo' gwlabo'  
 Xtiža' Diosen' dan' nyojen len beñe'  
 ca' chesedop chesežag chesonxene'  
 Jesucriston'. Na' gwneyoede'  
 yosozenague' chen na' bzejni'ide'  
 bi zejen. <sup>14</sup>Bi gatlažo' dan' gwlo'o  
 Diosen' lo' nao' gono' caten' gosexoa  
 na' beñe' blao ca' yichjon', beñe'  
 ca' chosogüia chesene'e ljež chio'  
 chonxencho Diosen', bosozende' le'  
 gwlej Diosen' gono' xšinen'.

<sup>15</sup>Cheyała' cuec yichjo' do  
 yichj do lažo' gono' da' ca' gwlej  
 Diosen' le' gono' cont yogo' beñe'  
 yesele'ede' zejcho' chono' da' güen.  
<sup>16</sup>Na' gwsaco' can' soa cuezo' cont  
 soačacho' gono' con can' chazlaže'  
 Diosen' na' soačacho' gwzejni'ido'  
 beñe' xtiža' Diosen' con can' naquen.  
 Ben ca' cont gaclenen le' na' lecze  
 gaclenen beñe' ca' chosozenag  
 xtižon' cont šjayzoalenle' Diosen'  
 cate' žin ža.

**Can' cheyała' gon Timoteo  
 len yezica'chle beñe'  
 chesejnilaže' Criston'**

**5** Še no beñe' byo gole chone'  
 bi da' mal, bi tilo'ne', san  
 gwneyoede' cuejyichjen', con  
 ben xbab naque' xao'. Na' še no  
 beñe' xcuide' chone' bi da' mal,  
 gwneyoede' cuejyichjen', con ben  
 xbab naque' beñe' bišo'. <sup>2</sup>Na' še

no no'ol gole chone' bi da' mal,  
 gwneyoede' cuejyichjen', con  
 ben xbab naque' xnao'. Na' še no  
 no'ol xcuide' chone' bi da' mal,  
 gwneyoede' cuejyichjen', con ben  
 xbab naque' beñe' zano'. Cheyała'  
 gwsaco' cont gaco' beñe' laždao'  
 xilaže' len legaque'.

<sup>3</sup>Chio' chdop chžagcho  
 chonxencho Criston' cheyała'  
 gwnežjwcho da' cheseyaže' no'ol  
 ca' ba gosat beñe' čegaque' še da'  
 li zjanaque' beñe' chyažj chchine.  
<sup>4</sup>Perw še nita' no xi'ingaque' no  
 xesoagaque', bzejni'ide' legaque'  
 cheyała' yosonežjue' da' cheseyaže'  
 no'ol ca', le' no'ol ca' ba bosogole'  
 legaque', na' Diosen' chaclaže'  
 yesone' güen len legaque' cont  
 yosolo'e chesejnilaže'ne'. <sup>5</sup>No'ol ca'  
 nono' zoa beñe' gwnežjw' legaque' da'  
 cheseyažjde' na' zjanaque' dogualje  
 güezebe, yesenite' lez gaclen Diosen'  
 legaque' na' do ža do yel yesenite'  
 yesenabde'ne' gaclene' legaque'.  
<sup>6</sup>Perw no'ol güezeb ca' chesacde'  
 yesone' con ca' žan čegaque', len  
 Diosen' yichjlažda'ogaquen' naquen  
 ca' che to beñe' ba got la'czla' ne'  
 zjambane'. <sup>7</sup>Ben mandadw neche  
 beñe' ca' chesedop chesežag  
 chesonxene' Jesucriston' yesone' can'  
 žia' nga na' bibi da' mal yesone' da'  
 zaca' no tile' legaque'. <sup>8</sup>Še no beñe'  
 bi chaclene' cont gata' da' chyažje  
 beñe' zjanac diaža' che', ba bzoe'  
 šla'ale xtiža' Diosen' dan' chejle'cho  
 chen, na' malech chone' ca' beñe' bi  
 chesejnilaže' Jesucriston'. Na' leca  
 da' mal chone' še bi chaclene' beñe'  
 lo' yo'o che'.

<sup>9</sup>Quinga nezdo' no no'ol güezeb  
 ca' cheyała' gwchelo' le'e yiš

cont be<sub>ne</sub>' ca' chesedop chesežag chesonxene' Jesucriston' yosogü'e'ej yosoguagü'e'ne' na' yosonežjue' bichle da' cheseyažjde'. Cuejle no'ol gol ca' be<sub>ne</sub>' ba gwde gayon iz, no'ole goc toze be<sub>ne</sub>' che'. <sup>10</sup>Cuejle con no'ol ca' zjaneze be<sub>ne</sub>' ba gosonchgü'e' da' güen, ca no da' quinga: še bosgole' bi' che' binlo, še blebe' be<sub>ne</sub>' liže', še goclene' yezica'chle be<sub>ne</sub>' chesonxene' Diosen', še goclene' be<sub>ne</sub>' ca' cheseyi chesezaque', o še ba bene' bite'tezechle da' güen.

<sup>11</sup>Be<sub>ne</sub>' ca' chesedop chesežag chesonxene' Jesucriston' bi cheya<sub>la</sub>' yesego'o lo na'gaque' yosogü'e'ej yosoguague' no'ol güezeb xcuide' ca'. Le no'ol ca', gwžin ža yesaclaže' yosyošagne'e da' yoble, <sup>12</sup>na' yesape' do<sub>la</sub>' še yesebejyichje' xšin Criston' dan' gosechebe' yesone'. <sup>13</sup>Na' lecze no'ol güezeb xcuide' ca' bi naquen güen gwco'olaochwne' yeselaže' to to liž be<sub>ne</sub>', cont bi yesaque' be<sub>ne</sub>' xagüed, na' cont bi yesaque' be<sub>ne</sub>' güetob diža'. Bi yeselaže' to to liž be<sub>ne</sub>' yesezi'diže' bi chac, le bi cheya<sub>la</sub>' yesone' dan' nac ca'.

<sup>14</sup>Da'n'an' chaclaža' no'ol güezeb xcuide' ca' yosyošagne'e da' yoble na' yesezanche' cont yosyosgole' xi'ingaque' na' yosogüia yesena' ližgaquen' binlo, na' bi yesone' cont be<sub>ne</sub>' ca' chesegue'ede' chio' yesene' chesone' da' mal. <sup>15</sup>Chnia' ca' le nita' ba<sub>l</sub> no'ol güezeb xcuide' ca' ba gosebejyichje' Criston' na' chosozenague' che Satanásen'.

<sup>16</sup>Note'tez be<sub>ne</sub>' chejnilaže' Criston', še nita' no'ol güezeb lo diaža chegaque', cheya<sub>la</sub>' yosonežjue'ne' da' yese'ej yesagüe'

cont bibi da' zed yesone' len be<sub>ne</sub>' ca' chesedop chesežag chesonxene' Criston'. Nach con no'ol ca' nono zoa yesaclen legaque', legacze' cheya<sub>la</sub>' yesego'o lo na' be<sub>ne</sub>' ca' chesedop chesežag chesonxene' Criston'.

<sup>17</sup>Na' ca nac be<sub>ne</sub>' blao ba zjanchoj chosogüia chesene'e be<sub>ne</sub>' ca' chesedop chesežag chesonxene' Criston' to to yež, še chesene'e be<sub>ne</sub>' ca' binlo, da' xen cheya<sub>la</sub>' yesacxene', na' cheya<sub>la</sub>' gwnežjwchone' da' yesacbande'. Na' zaca'che' yesacxene' še cheseyixjue'ede' xtiža' Diosen' na' chosozejni'ide' be<sub>ne</sub>' bi zejen. <sup>18</sup>Cheya<sub>la</sub>' yesacxene' na' gwnežjwchone' da' yesacbande', le nyoj Xtiža' Diosen' žan: "Bitw gwseyjwle cho'a go<sub>n</sub> cont ca gagwba' cate' chlej chšošjba' trigon' neche choj xen'." Na' lec<sub>z</sub> nyojen žan: "Be<sub>ne</sub>' güen žin cheya<sub>la</sub>' si' laxjue'."

<sup>19</sup>Bi gono' cuent cate' no be<sub>ne</sub>' gagw xya che to be<sub>ne</sub>' blao be<sub>ne</sub>' nchoj chgüia chne'e be<sub>ne</sub>' lježe' chesonxene' Criston' še bi zoa yeto be<sub>ne</sub>' o yechope be<sub>ne</sub>' co' da' ba<sub>li</sub>. <sup>20</sup>Na' še da' li ba bene' da' malen', cheya<sub>la</sub>' tilo'ne' lao be<sub>ne</sub>' ca' chesedop chesežag chesonxene' Criston' cont yezica'chle be<sub>ne</sub>' ca' yesežebe' yesone' da' malen' nac ca'. <sup>21</sup>Na' toze can' cheya<sub>la</sub>' gono' len note'teze be<sub>ne</sub>', bitw nacho ba<sub>l</sub> be<sub>ne</sub>' gonxenchguachone' na' yeba<sub>l</sub>' gonchone' nacteze. Na' Diosen' len Xancho Jesucriston' na' len angl be<sub>ne</sub>' ca' zjanchoj chesone' mandadw che' zjanezde' chona' mandadw gono' yogo' da' ca' ba gwnia' nga. <sup>22</sup>Bitw yob cuejo' be<sub>ne</sub>' güia ne'e lježe' cont gague leno'

gapo' doła' še ben' gwlejon' gone' da' mal. Gwsaco' cont bibi doła' gapo'.

<sup>23</sup>Na' dan' tolize chac li'o, bi ye'ejo' toze nis, san gü'e'ej late' güeje vino.

<sup>24</sup>Baĭ bene' nacbia' chesone' da' mal na' yog'o'ze bene' zjanezde' can' chesonen' la'czĭa' bina' žin ža yesezi'e castigw chen. Na' baĭ bene' chesone' da' malen' dan' ngaše' na' da' bi nacbia', perw žin ža gwlo'elaon. <sup>25</sup>Na' lecz ca' naquen len bene' ca' cheson da' güen, nacbia' še da' güenna' chesone', na' la'czĭa' gague nĭa' da' güenna' chesone', bi nacho yega'an'cze bagaše'ze dan' chesonen'.

**6** Na' bene' ca' chesejnilaže' Criston', bene' zjanac esclavos, cheyaĭa' yesacbe'ede' bene' ca' zjanaque' xan žin chegaquen' zjazaque' cont yosozenague' chegaque'. Cheyaĭa' yesape' legaque' bala'an' cont nono ne yela' ya' che Diosen', neca no ne che dan' chzejni'ichon'. <sup>2</sup>Bene' ca' zjanac esclavos, še xangaque' lecze chesejnilaže' Criston', bi cheyaĭa' yesone' xbab bi yosozenague' chegaque' neche zjanaque' txen chesonxene' Criston', san nachle cheyaĭa' yesone' žinna' do laže'che' na' cheyaĭa' yesacde' xan žin ca' ca' bene' biše', lagüe zjanaque' txen chesejnilaže' Criston'. Bzejni'i da' ca' ba gwnia' cheyaĭa' yesone' na' gwneyoe bene' yosozenague' chen.

**Cheyaĭa' soacho mbalaz  
len da' de checho**

<sup>3</sup>Nita' bene' chosozejni'ide' xbab chegacze' na' bi chososed chosolo'ede' diža' li che Xancho Jesucriston' dan' ba blo'eda' le', na' chosozejni'ide'

clele, chesene' bi chonen byen soacho goncho can' chazlaže' Diosen'. <sup>4</sup>Bene' ca' chosozejni'ide' dan' zej clele chesonxen cuingaque', chesacde' zjanezde' da' zan, len bibi chesejni'ide'. Chosošaše' che no diža' o che bichle da' bi naquen da' zaque', chesacxi'e lježe', chesacyože' len lježe', chesezi'diža' lježe', na' chesacde' chesacxi'a' bene' legaque'.

<sup>5</sup>Con bi cheyož chedo chesediĭ chosošaše', le ba yo'o da' malen' lo' yichjlažda'ogüe' na' bi zjanombi'e diža' li che Diosen'. Con chesacde' yososed yosolo'ede' xtiža' Diosen' cont yesaque' bene' gwni'a. Bi gono' txen len ben' cheson ca'. <sup>6</sup>Da' li zoachguacho binĭo cate' choncho can' chazlaže' Diosen' na' cate' zoacho mbalaz len bi da' dao' de checho. <sup>7</sup>Ga'alcho bla'cho yežlion' na' ga'alcho cate' yeza'cho. <sup>8</sup>Na' še de da' che'ej chagwcho na' še de xaĭana'cho da' chyažjecho, cheyaĭa' soacho mba len da' ca'. <sup>9</sup>Bene' ca' chesezelaže' yesaque' bene' gwni'a chosozenague' che da' malen' na' cheselažoe' lo na' gwxiyen'. Chesezelaže' da' zan da' gata' chegaque' da' yesede chen, na' da' ca' chesezelaže' chesonen mal len legaque' na' žin ža yesebiaye'e. <sup>10</sup>Bene' chzelaže' mechw nach chzenague' che bite'teze da' mal. Na' nita' bene' ba gosebejyichje' diža' li che Diosen' dan' chesezelaže' mechon', na' da' zan dan' chosožaglaochgüe' yela' güen da' mal chegaque'na'.

**Cheyaĭa' cuec yichj Timoteon'  
gone' xšin Criston'**

<sup>11</sup>Na' ca' nac le' Timoteo, bi gono' can' cheson bene' ca', le Diosen'

gwleje' le' cont gono' xšinen'.  
 Cuec yichjo' gono' da' zej to licha,  
 ben con can' chazlaže' Diosen',  
 soachacho' šejnilažo'ne', goque bene',  
 byo bchejlaže' cate' de da' saca'zi'o,  
 na' goc bene' šagüe'. <sup>12</sup>Gwlec yichjo'  
 ben con ga zelao saquedo' cont  
 gono' yogo' dan' chazlaže' Diosen'.  
 Na' bebe dan' šjayzo' len Diosen'  
 toli tocane, le Diosen' gwleje' le'  
 šjayzo' len le', na' ba bi'o diža'  
 lao bene' zan žo' chejnilažo'ne'.  
<sup>13</sup>Dios ben' chnežjo yela' mban  
 che yogo' benachen', che beyixe'  
 ca' na' che bica'chle da' zjamban,  
 na' Jesucristw ben' be' diža' li  
 lao Poncio Pilato, gwne' Diosen'  
 gwsele'ne', legaque' zjanezde' chona'  
 mandadw <sup>14</sup>gwzenago' che yogo'  
 dan' ba gwnia' le', na' bi go'o latje  
 ten ca'ze, cont bi gono' da' zaca' no  
 tile le'. Bzenag che yogo' dan' bena'  
 mandadw gono' žinte ža yid Xancho  
 Jesucriston' da' yoble. <sup>15</sup>Le cate' žin  
 ža gwžia bia' Diosen', nach yide' da'  
 yoble. Toz Dios nan' chnabi'e doxen  
 na' zoachgüe' mba. Len' naque' Rey  
 ben' chnabi'e yezica'chle rey ca',  
 na' naque' Xancho ben' chnabi'e  
 yezica'chle bene' gwnabia'. <sup>16</sup>Totec  
 Dios nan' bi nacho žin ža gate'. Na'  
 catec yo'ochgua be'ni' gan' zoen',  
 nono gac bigue' gala'ze gan' zoe'na'.  
 Nono zoa yežlio nga bene' ba  
 ble'ede' Diosen' na' nono gac le'e le'.  
 Cheyala' gonxenchone' le chnabi'e  
 toli tocane. Na' can' gonšcaczcho.

<sup>17</sup>Na' ca nac bene' ca' chesejnilaže'  
 Criston', bene' zjanac bene' gwni'a  
 lo yežlio nga, gože' bi yesaque' bene'  
 ya'laže'. Na' yo'o legaque' bi yesone'  
 xbab yesenite' mba lagüe zjanaque'  
 bene' gwni'a, le yob te che bite'tez  
 da' de chegaque'. Yo'o legaque'  
 yesezoe' lez yesenite' mbalaz len  
 Dios ben' zoe' toli tocane. Toga  
 le' chone' chio' yogo' da' güen da'  
 chyažjecho na' da' chbecho. <sup>18</sup>Na'  
 yo'one' yesenite' yesonchgüe' da'  
 güen, yesone' yogo' cuen da' güen  
 can' chazlaže' Diosen', nach lecze  
 yo'one' yesezande' da' de chegaque'  
 cont yesaclene' bene' na' yesebede'  
 yesone' ca'. <sup>19</sup>Še yesone' ca', na'  
 gaquen ca to yela' gwni'a da' bi te  
 chen, le Diosen' chaclaže' yesaclene'  
 bene', na' gone' cont yesenite' mba  
 cate' šjasyenite' len le' toli tocane še  
 yesone' ca'.

#### Pablon' chzože' carten'

<sup>20</sup>Timoteo, gwlecchgua yichjo'  
 che yogo' dan' ba bzejni'i Diosen' le'.  
 Bi gwzenago' che bene' chosošalj  
 diža' da' bibi zaca', ne che dan'  
 chesene bene' dan' bi zej lebe len  
 diža' li che Diosen'. Chesonlaže'  
 chesene' cheso'e diža' sina'. <sup>21</sup>Bene'  
 bosozenague' che dižan' nac  
 ca' ba gosebejyichje' diža' li che  
 Diosen' da' chejle'cho na' bich  
 chesejnilaže'ne'.

Chnabšca' gaclen Diosen' le'. Da'  
 na'zen' chzoja'.

# CART GWCHOPE DAN' BZOJ POSTLW SAN PABLO CHE TIMOTEO

Pablon' chzoje' Timoteon'

**1** Neda' Pablo naca' postlw  
che Jesucriston', le  
Diosen' gwnalaže' gwsele' neda'  
chyixjue'eda' can' gwne' gone'  
cont note'teze bene' yesejnilaže'  
Jesucriston' gata' yela' mban  
chegaque' toli' tocane. <sup>2</sup>Na' chzoja'  
le' Timoteo, ba nona' le' ca xi'ina'.  
Chnaba' lao Xacho Diosen' na' lao  
Xancho Jesucriston' yesaclenšque'  
le' na' yesyeyaše'laže'de' le', na'  
yesonšque' ca so' binlo len xbab da'  
yo'o lo' yichjlažda'oguoñ.

Cheyała' güe'cho diža'  
che Jesucriston'

<sup>3</sup>Chonxena' Diosen' do yichj do  
laža' can' goson da' xozxta'ogua', na'  
nezda' lo' yichjlažda'ogua' chona'  
can' chazlaže' Diosen'. Na' yogo' ni'a  
cate' choł güiža' Diosen', lagüe ža na'  
šeže'le, choa' yela' choxcen che dan'  
chonon'. <sup>4</sup>Chjaza'laža' gwchežo' cate'  
beza' gan' zon', na' zelaža' le'e lježcho  
da' yoble, le yebechgüeda' še ca'. <sup>5</sup>Na'  
chona' xbab can' chejnilažo' Diosen'  
do yichj do lažo' can' zgua'tec goson  
taguo' Loida na' xna'o Eunice, na'  
nezda' lecz ca' chono' le' na'a.

<sup>6</sup>Da'nan' chneyoeda' le' da'  
yoble, güe'lažo' gono' da' gwlo'o  
Diosen' lo' nao' gono' caten' gwxo'a  
na'ton' yichjon'. <sup>7</sup>Diosen' bene' chio'  
Spiritw chen' zoan lo' lažda'ochon',  
na' Spiriton' chaclenen chio' cont  
bi žebocho, na' chonen chio' yela'  
guac cont goncho can' chazlaže'  
Diosen'. Lecze chaclenen chio' cont  
chaque lježcho na' cont choncho  
da' zejen na' güe'cho diža' da'  
zaca'. <sup>8</sup>Da'nan' chneyoeda' le', bi  
yeto'edo' chixjue'edo' xtiža' Xancho  
Jesucriston', na' neca' yeto'edo' chia'  
la'czla' dia' ližya nga da' chzenaga'  
che Jesucriston' na' chyixjue'eda'  
xtižen'. Cheyała' gono' can' chonan'  
na' gwyo gwchejlažo' bi da' gac chio'  
cate' chixjue'edo' diža' güen chen', le  
zoa Diosen' chaclene' chio' len yela'  
guac chen'. <sup>9</sup>Diosen' ba none' chio'  
yela' mban toli' tocane na' gwleje'  
chio' cont naccho lo' ne'en. Na' bene'  
ca' da' nži'ilaže'de' chio', gague  
neče bi da' güen bencho. Cate'  
bina' xe yežlion' bsi'e xneze sele'  
Jesucriston' cont gaclene' chio'. <sup>10</sup>Na'  
na'a Diosen' ba blo'e nži'ilaže'de'  
chio', le ba gwsele' Jesucriston'  
ben' chon yela' mban chechon'  
tołi' tocane. Na' žin ža gwcuez

Jesucriston' yela' goten' na' gone'  
cont chio' chejle'cho diža' güen chen'  
šjayzoacho len le' toli tocane.

<sup>11</sup>Na' Diosen' gwleje' neda' naca'  
postlw che' na' gwsele'nda' cont  
chyixjue'eda' diža' güen che  
Jesucriston' na' chsed chlo'eda' bene'  
bi zjanac bene' Israel. <sup>12</sup>Na' dan'  
chona' ca', chžaglagua' da' quinga  
chac chia', perw bi cheto'eda' chen,  
le nombi'a Diosen' ben' chejnilaža'.  
Ba ben cuina' lo ne'e, na' nezda'  
nape' yela' guac gone' cont ne'  
soachacha' šejnilaža'ne' caten' žin ža  
yid Jesucriston' da' yoble.

<sup>13</sup>Soachacho' gwzejni'ido'  
bene' diža' zaca' can' ba bendo'  
chzejni'idan', na' soatezo' šejnilažo'  
Jesucriston' na' gacdo'ne' do yichj do  
lažo'. <sup>14</sup>Be' latje gaclen Spiritw che  
Diosen' le' cont soatezo' gwzejni'ido'  
bene' diža' li da' bsed blo'eda' le'e, le  
zoa Spiriton' lo' lažda'ochon'.

<sup>15</sup>Nezdo' Figelo na' Hermógenes  
len yezica'chle bene' migw  
chia' ca' že' distritw che Asia ba  
gosebejyichje'nda'. <sup>16</sup>Na' chnaba'  
gaclenšca Xancho Diosen' Onesiforo  
len bene' lo' yo'o che', le bi beto'ede'  
chia' da' dia' ližya nga, san zan ni'a  
bedetipe' laža' nga. <sup>17</sup>Cate' bide'  
Roma nga, bene' byen beyiljue'  
neda' con cate'ch beželde'nda'.

<sup>18</sup>Nezdo' lecze da' zan bene' goclene'  
neda' cate' gwzoa' Efeso. Chnaba'  
lao Xancho Diosen' gacšca güen che'  
cate' žin ža yid Xancho Jesucriston'  
da' yoble.

**Cheyała' gwyo gwčhejcho  
len da' saca'zi'cho**

**2** Xi'indagua', chnaba' soachacho'  
šejnilažo' Jesucriston' lagüe'

da' nži'ilaže'de' le'. <sup>2</sup>Na' yogo' da' ba  
bendo' gwdixjue'eda' lao bene' zan,  
da' ca' bsed blo'en bene' yosozenag  
chen do yichj do laže'gague', bene'  
ca' guac yosozejni'iden' bene' yoble.

<sup>3</sup>Na' byo bchej len da' saca'zi'o  
šlac chono' xšin Jesucriston'. Goc  
ca to soldadw bene' bi chžeb bi  
gac che'. <sup>4</sup>Nezecho bene' zej yela'  
soldadon' bi chac gon xšine' šlac  
zeje' lao gwdiła', san chbejyichjen'  
cont gone' bin' ža ben' nac xan  
soldadw ca'. <sup>5</sup>Na' nezecho bene'  
chja'ac lo güitj cheyała' yesone'  
cayanen' ba bosoxi'e yesone' cate'  
yesejitje', cont gac yesezi'e da'  
yesone' gan. <sup>6</sup>Na' leze nezecho  
bene' chelale chone' žin yixe' chzi'e  
da' nechw da' chbia lao coseš chen'.  
<sup>7</sup>Ben xbab che da' quinga ba gwnia'  
le', na' Xancho Jesucriston' gaclene'  
le' šejni'ido' yogon'.

<sup>8</sup>Ben xbab che Jesucristw ben'  
beyas bebane' ladjo bene' guaten',  
ben' nac xi'in diaža che da' rey  
Davin'. Che len' chzejni'ida' cate'  
chyixjue'eda' diža' güen che'. <sup>9</sup>Na'  
da' chyixjue'eda' diža' güen chen'  
chosochi chososaque'nda' na' dia'  
ližya nga ca to no bene' mal juisyw.  
Perw nezda' bibi gac yesone' cont  
bi gas lalje xtiža' Diosen' lo yežlion'.  
<sup>10</sup>Da'nan' chzanlaže' cuina' gac bi  
da' gac chia' lagüe da' chyixjue'eda'  
xtiža' Diosen', le chaclaža'  
yezica'chle bene' ba gwleje' cont  
gata' yela' mban čhegague' toli  
tocane yesejnilaže' Jesucriston', na'  
žin ža šjasyezoe' len le' toli tocane  
gan' chac da' güen juisyw. <sup>11</sup>Diža'  
quinga zjanaquen da' li:

Še chejnilaže'cho Criston' ben'  
got neche xtola'chon',

chío' lecze naccho ca to bene'  
guat len da' xinjen' cont bich  
gonchon.

Na' con can' bosban Diosen'  
Criston' ladjo bene' guaten',  
lecze ca' bocobe' yichjlaždao'  
chío' cont šjayzoacho txen len  
le'.

<sup>12</sup> Na' še soachachcho  
šejnilaže' chone' bite'teze  
chac checho, lecze gone' cont  
nabia'cho txen len le'.

San še cuejyichjcho Criston',  
lecze le' cuejyichje' chío'.

<sup>13</sup> Na' la'czla' še chío' bi goncho can'  
gwnacho goncho,  
Diosen' zoe' chone' con da' ba  
gwne' gone',  
le Diosen' bi gac gwše'e da' ba  
nžie' bia' gone'.

#### Ben' chon xšin Diosen' binlo

<sup>14</sup> Bi go'o latje yesanlaže' bene' ca'  
chesejnilaže' Jesucriston' da' ca' ba  
bzejni'ida'. Na' yosnisdo' legaque'  
naquen mal len Xancho Diosen'  
yeseđil yosošašlen lježe' che bize  
diža'. Bibi zejen yesone' ca', le cate'  
bene' chesende' chesedil chosošaše',  
chonen cont bi yesejle'e che xtiža'  
Diosen'. <sup>15</sup> Ben con ga zelao saque'do'  
cont yebe Diosen' can' chonon'  
na' cont bi gacdo' zto' lagüen' can'  
chono' xšinen'. Gwsed gwlo'edo'  
xtižen' to licha'. <sup>16</sup> Bi gono' txen len  
bene' chesoe'chgüie' bite'teze diža'  
da' bibi zaca', diža' da' bibi zejen len  
Diosen', le dižan' zjanac ca' chziyen'  
bene' yesonche' da' mal. <sup>17</sup> Dižan'  
nac ca' chžiayin' bene' ca to yižgüe'  
mal. Can' ba goc che Himeneo na'  
Fileto, <sup>18</sup> gosebejyichje' diža' li da'  
chzejni'in che Criston'. Chososed

chosolo'ede' chesene' bi soacho lez  
žin ža yebancho ladjo bene' guaten',  
le chesene' ba gwde che da' ca'. Na'  
bal bene' ba chesejnilaže' Criston'  
chesacžejlaže' na'a neche xtiža'  
bene' ca'. <sup>19</sup> San chío' zoachachcho  
chzenagcho diža' li che Criston'  
na' Diosen' chone' cont bi  
chbejyichjchon. Da'nan' zaca'lebcho  
ca to lene yo'o da' nac da' gual. Na'  
nyojcze Xtiža' Diosen' žan: "Diosen'  
neзде' no bene' zjyao'o lo ne'e." Na'  
lecze nyojen žan: "Note'tez bene' že'  
chejnilaže' Xancho Diosen', cheyla'  
cuejyichje' bich gone' da' mal."

<sup>20</sup> Nezecho to liž bene' gwni'a  
de no tas platw na' no yeso' xguag  
de oro de plata da' zjazaca'chgua.  
Lecze de yeso' xguag de gona', na'  
de no batia na' bichle de yag da'  
chesonen žin da' bitec zjazaca'.  
<sup>21</sup> Can' naquen len chío', note'tezcho  
še cuejyichjcho da' malen', nach  
Xancho Diosen' gwchine' chío'  
neche goncho da' zan da' güen da'  
chac laže' goncho. Na' še goncho ca',  
saca'lebcho ca to tas o to xguag de  
oro da' zaca'chgua.

<sup>22</sup> Na' ca nac le', cheyla'  
cuejyichjo' bite'teze da' mal da'  
chzelaže' lažda'oguon' gono', da'  
ca' chesezelaže' note'teze bene'  
güego' yesone'. Beyiljwlaže' nac  
gono' cont gaco' bene' güen  
len Diosen' na' cont soachacho'  
šejnilažo'ne', cont gacdo' Diosen',  
na' cont soa cuezo' binlo len bene'  
lježo' ca'. Ben ca' txen len yogo'  
bene' chesenab goclen lao Xancho  
Diosen', bene' zjanac bene' laždao'  
xilaže'. <sup>23</sup> Bi gono' txen len bene'  
bi chzejni'ide', bene' chosošaše'  
cheso'e diža' da' bibi zejen, le



xtiža'gaquen' chonen ga chesacyož bene'. <sup>24</sup>Chio' choncho xšin Diosen' bi cheyała' tile gwšašlencho bene'. Cheyała' gaccho bene' šagüe' len yogo'ze bene', cheyała' nezecho naquen' gwzejni'icho legaque' che Diosen', na' cheyała' gapcho yela' chxenlaže' len legaque'. <sup>25</sup>Na' cate' güe'cho consejw che bene' bi chesaclaže' yosozenague' diža' li che Criston', cheyała' güe'lencho legaque' diža' šagüe', na' cuescho gaclen Diosen' legaque' yosoša' xbab čegaquen' cont yosozenague' che diža' li čen'. <sup>26</sup>Can' goncho cont Diosen' gwnežjue' legaque' to xbab šagüe' na' yesyechoje' lo na' Satanás dan' chnabia' da' xigüe' ca', le chonen cont nite' chesone' con can' chazlažen'.

**Naquen' yeson bene' cate' ba zoa yid Xancho Jesucriston' da' yoble**

**3** Na' che'nda' šejni'ido' da' nga, cate' žin ža ba zoa yid Xancho Jesucriston' da' yoble, da' zan da' mal gac. <sup>2</sup>Bene' zan yesonxen cuingaque', na' zane' yesebec yichje' gata' da' zča'o xmechwgaque'. Zane' yeso'e diža' ca güenna' chesone' na' yesaque' bene' ya'laže'. Yeseneye'e che Diosen'. Bi yosozenague' che xaxna'gaque'. Bi yeso'e yela' choxcen che Diosen' na' bi yesape' le' bala'an'. <sup>3</sup>Bi yesacde' bene', bi yesyezi'xen che lježe', yesene' mal che bene' yoble, con yesonteze' bite'teze da' mal da' žan čegaque', yesacchgüe' bene' znia, na' yesegue'ede' bite'tez da' nac da' güen. <sup>4</sup>Yosode lježgaque' lo na' bene' chesegue'ede' legaque', bi yesežebe' yesone' bite'ze da' mal, yesone'

xbab zjazaca'chgüe', na' yesaclaže' yesone' con da' chpe legacze' na' bi yesaclaže' yesone' xbab che Diosen'. <sup>5</sup>Lecze da' zan da' yesone' cont yesaque' bene' chesonxenchgüe' Diosen', perw bi soa yela' guac che Diosen' len legaque'.

Bi gono' txen len bene' ca' cheson da' ca' ba gwnian'. <sup>6</sup>Bene' ca' cheson ca' chja'aque' liž no'ole bene' chesejle'daze', na' chesonlede' legaque' len diža' da' cheso'e. No'ol ca' zjadechgua xtoła'gaque', le chesonteze' da' mal can' ža lo' lažda'ogaquen'. <sup>7</sup>No'ol ca' chosozenague' che note'teze' že' gwzejni'ide' legaque', perw na' bi chžin ža yesejni'ide' diža' li che Diosen'. <sup>8</sup>Canite da' Janes na' da' Jambres besegue'ede' Moisésen' na' bi gosaclaže' yosozenague' diža' li da' be'len da' Moisésen' legaque', na' ca'czen' nita' bene' gwxiye' na'a chesegue'ede' diža' li che Diosen'. Nčhol yichjlažda'ogaque' yela' güen da' mal čegaquen', na' gague da' li chesejnilaže' Diosen'. <sup>9</sup>Bi gac yesonlede' bene' sša, le yob gac čegaque' can' goc che da' Janes na' da' Jambres, žin ža cate' yezica'chle bene' yesacbe'ede' chosozejni'ide' clele yela' bi chejni'i čegaque'.

**Consejw da' zelagüe' da' benežjw Pablon' Timoteon'**

<sup>10-11</sup>Na' le' Timoteo, nezeczedo' can' ba bzejni'ida' le' na' can' zoa' chona' da' güen. Nezdo' chi' yichja' gona' yogo'lol da' ža Diosen'. Nezdo' zoačhača' chejnilaža' Diosen' bite'tez da' chac čia'. Na' nezdo' napa' yela' chxenlaže' len ljež benača' na' zoacza' chacda'

legaue'. Nezdó' bi chbejyichja' xšín Diosen' da' chona', la'czlá' da' zan da' ba bosoči bososaca' bene' neda'. Na' nezdó' da' ca' gosonde' neda' cate' gwzoa' ciuda Antioquía' na' cate' gwy'a yež Iconio len yež Listra, na' can' gwdi gwxaca'. Na' nezdó' Xancho Jesucriston' bosle' neda' lo yogo' da' ca' da' goc chia'. <sup>12</sup>Da' li yesenita' bene' yosoči yososaque' note'tez chio' chejnilaže'cho Cristo Jesúsén', chio' chi' yichjo chzenagcho che'. <sup>13</sup>Bene' mal bene' güexoayag ca' šja'acze' yesonche' da' xinjen', yeseziye'e bene' na' lecze yesejle'e che diža' güenlaže' da' yesoe' bene' yoble.

<sup>14</sup>Na' le' Timoteo, cheyala' soachacho' gwzenago' che da' ca' chejni'ido' che Criston'. Nezdó' naquen diža' li, le bzejni'iton' le'. <sup>15</sup>Cate' nactio' bidao' ba nombi'o Xtiža' Diosen' da' nyojen. Na' Xtiže' nan' chzejni'in chio' cheyala' šejnilaže'cho Cristo Jesúsén' cont gata' yela' mban checho toli tocanē. <sup>16</sup>Cuin Diosen' bzejni'ide' bene' ca' bosozoj Xtižen' cont bosozoje' xbab chen'. Da'nán' doxen Xtiža' Diosen' dan' nyojen zaca'chguan da' chzejni'in chio' che Diosen', chdilēn chio' cate' choncho da' xinj, na' chzejni'in chio' nac goncho cont na' Diosen' choncho da' güen. <sup>17</sup>Na' chio' chejnilaže'cho Diosen', Xtižen' chzejni'in chio' yogo'lol da' cheyala' nezecho cont soacho goncho yogo' da' güen.

**4** Yid Xancho Jesucriston' da' yoble cont gone' yela' justis che yogo' benach, bene' ne' zjamban lente bene' ba gosat, na' caten' yide' da' yoble nach solao

nabi'e yežlio nga. Na' Timoteo, Diosen' len Xancho Jesucriston' zjanezde' chona' mandadw gono' da' quinga: <sup>2</sup>Chixjue'edo' xtiža' Diosen' cate' nlatjo' na' cate' chacdo' bi nlatjo'. Be'len bene' diža' cont yesenezde' chesone' da' xinj, gwdi'legaue' che da' malen' chesone' cont yesyetinjden', na' gwdap yela' chxenlaže' bzejni'ide' da' cheyala' yesone'. <sup>3</sup>Gwžin ža cate' bi yesaclaže' bene' yosozenague' xtiža' Diosen' da' chzejni'icho da' naquen da' li, na' yosotobe' bene' yosozejni'ide' legaue' diža' yoble da' yesazlaže' legacze'. <sup>4</sup>Yesebejyichje' bich yosozenague' che diža' lin' na' yosozenagche' che diža' da' chesaljaže' bene'. <sup>5</sup>Perw ca' naco' le', cheyala' gaco' bene' yo'o xbab, na' gwdap yela' chxenlaže' len yogo'te da' sacazi'o, na' soatezo' go'o diža' güen che Jesucriston' do yichj do lažo'. Ben yogo' da' gwlo'o Diosen' lo nao' gono'.

<sup>6</sup>Na' ca' nac neda', ba zoa yesote' neda', da' li ba chžin ža šjayzoa' len Diosen'. <sup>7</sup>Na' chebeda' guac nia' do yichj do laža' ba gwdi'llena' da' chgue'e Diosen'. Ba bena' yogo'lol da' gwlo'o Diosen' lo na' gona' na' ba gwzoachacha' chejnilaža' Jesucriston' na' ne' zoachachcza'. <sup>8</sup>Na' cate' šjayzoa' len Diosen', gone' cont soa' mba da' bena' güen šlac mbaná. Xancho Jesucriston' zeje' to licha, na' cate' žin ža choglagtie' nac gac che yogo'lol bene', gague nedažen' gone' soa' mba, san yogo' nochle bene' chesyebede' chesebeze' baten' yide' da' yoble, lecze gone' cont legaue' yesenite' mba.

**Da' chaclaže' Pablon' gon Timoteon'**

<sup>9</sup>Ben byen con ga zelao saque'do' yob yido' nga. <sup>10</sup>Ben ca', le Demas ba gwlejyichje'nda' na' ba zjayde' yež Tesalónica da' chi'chgua yichje' bin' gata' che' lo yežlio nga. Na' Crescente ba zeje' Galacia na' Titon' ba zeje' Dalmacia. <sup>11</sup>Yetoga Lucas nga'anlen neda' nga. Na' che'šco' Marcos cate' yido', cont gaclene' neda' len xšin Dios da' chona'. <sup>12</sup>Ca nac Tíquicon', ba gwseła'ne' ciuda Efeso. <sup>13</sup>Na' chaclaža' goxo' xadon chia' da' bocua'ana' yež Troas liž Carpo cate' yido', na' lecze goxo' libra' ca', na' da' žialaoch goxo' yid ca' da' ba zjanyoj.

<sup>14</sup>Alejandro bene' güechach yan' ba benchgüe' mal len neda'. Xancho Diosen' gwnežjue' le' castigw che da' malen' bene'. <sup>15</sup>Na' gwsaco' len le', le chonchgüe' clele len xtiža' Diosen' da' chyixjue'echo.

<sup>16</sup>Cate' bosodie' neda' lo na' justis ca' da' nechw, nono gwzoo na' gaclen neda', yogo' bene' ca' gocda' yesaclen neda' gosebejyichje'nda'. Diosen' yezi'xene' chegaque' da' bi

gosaclene'nda'. <sup>17</sup>Bia'cze Xancho Jesucriston' gwzooalene' neda' na' goclenchgüe' neda' cont bia' xtižen' len yogo' bene' ca' že' na', bene' bi zjanac bene' Israel. Na' bosle' neda' lo na' yela' goten'. <sup>18</sup>Na' nezda' yoslacze Xancho Jesucriston' neda' lo yogo' da' mal da' gac chia', na' guaclencze' neda' šlac žin ža šjayzoalena'ne' gan' zoe' chnabi'e. Cheyała' gonxenchwne' toli tocaņe. Can' gonščaczcho.

**Pablo chguape' tiox yeto čhope' na' chñablaže' gaclen Diosen' legaque'**

<sup>19</sup>Gwguapšco' tiox Prisca na' Aquila na' lecz ca' bene' lo' yo'o che Onesíforo. <sup>20</sup>Erasto bega'ane' ciuda Corinto, na' bocua'ana' Tróximo yež Mileto, le gocšende'. <sup>21</sup>Ben con ga zelao saque'do' cont yido' cate' za' žin tiemp zag. Eubulo, Pudente, Lino, Claudia na' len yezica'chle bene' chesejnilaže' Jesucriston' nga chosoguape' le' tiox.

<sup>22</sup>Chñaba' soašca Xancho Jesucriston' len le' na' gaclenšca Diosen' yogo'le. Da' na'zen' chzoja'.

# CART DAN' BZOJ POSTLW SAN PABLO CHE TITO

---

Pablon' bzoje' cart nga

**1** Neda' Pablo chona' xšin  
Diosen' na' naca' postlw che  
Jesucriston' cont gaclena' bene' ca'  
gwlej Diosen' yesejnilaže'ne', cont  
yese<sup>2</sup>nezde' can' ža diža' li che  
Diosen'. Na' diža' li chen' chzejni'in  
can' goncho da' chazlaže', <sup>2</sup>na'  
chzejni'in zoacho lez šjayzoacho len  
Diosen' toli tocane. Za' xe yežlion'  
Diosen' gwne' bene' yesejnilaže' le'  
šjasyenite' len le' toli tocane, na'  
Diosen' bi chonlaže' bite'teze da'  
že'. <sup>3</sup>Na' na'a ba chac da' bžie' bia'  
gac da' ba chzejni'ida' bene' xtižen',  
le Dios ben' none' yela' mban  
checho toli tocane gwlo'e lo na'  
chyixjue'eda' bene' xtižen'. <sup>4</sup>Chzoja'  
le' Tito, naco' ca dogualje xi'ina'  
da' bzejni'ida' le', na' naccho txen  
chejnilaže'cho Jesucriston'. Xacho  
Diosen' na' Xancho Jesucriston' ben'  
none' yela' mban checho toli tocane  
yesaclenšque' le'e na' yesyeyaše'de'  
le'e na' yesone' cont soa cuezle binlo  
len xbab chelen'.

Da' chon Titon' gan' nzi' Creta

<sup>5</sup>Cate' bocua'ana' le' gan' zoa  
yežlio da' nzi' Creta dan' chi' lo

nisdaon', gwnia' gwzožo' gono' dan'  
chona' cate' gwzoa' na', to to yež  
cuejo' bene' blao bene' yosozejni'i  
na' yosogüia yesene'e yezica'chle  
bene' chesejnilaže' Jesucriston'.  
<sup>6</sup>Na' še zoa bene' zoacze' chone'  
da' güen cont bibi de da' yosode'e  
bene' yesene' da' xinjen' chone', še  
naque' bene' zoa toz no'ol che', še  
xi'ine' ca' chesejnilaže' Criston', na'  
še bi zjanaque' bene' chesyedabaga',  
san chosozenague' cont bi zjalaže'  
chesone' da' xinj, ca bene' nac ca'  
cheyala' cuejo' güia na' lježe'. <sup>7</sup>Cate'  
cuejo' bene' co' Diosen' lo ne'e güia  
ne'e yezica'chle bene' chesejnilaže'  
Jesucriston', cuejo' bene' zoacze'  
chone' güen. Bi cuejo' bene' ya'laže',  
bene' naque' bene' loc, na' bene'  
borrašw. Bi cuejo' bene' chebede'  
cueque' žaš, na' neca cuejo' bene'  
zelaže' gone' da' xinj cont gone' gan  
mechw. <sup>8</sup>Bene' cuejo' cheyala' gague'  
bene' chbede' chlebe' bene' zito'  
ližen'. Cheyala' gague' bene' zoateze'  
chone' da' güen na' bene' chon xbab,  
bene' chon da' zej to licha, bene'  
chon da' chazlaže' Diosen' na' bene'  
chon con ga zelao chzaque'de' cont  
chone' bi da' ža Diosen'. <sup>9</sup>Cheyala'  
gague' bene' zoachache' do laže'

chzenague' diža' li che Diosen' da' bzejni'ida' cont gac gwzejni'ide' bene' yoble diža' güenna', na' gone' chachlaže' cont yesenite' yesejle'e da' naquen da' li, na' gac gwlo'ede' bene' ca' chesene' contr diža' li che Diosen' cont yesenezde' clen' chesone'.

<sup>10</sup>Chnia' gono' ca', le nita' bene' zan bene' Israel gualaž chia' na' yebał bene' yoble chesene' zjanaque' chio' txen, perw bi chosozenague' che Diosen'. Bibi zaca' xtiža'gaque' da' chosozejni'ide', con chesonlede' bene'. <sup>11</sup>Na' da' zjachi' yichjgaque' yesone' gan mechw, da'nan' chosozejni'ide' da' zej clele. Cheyała' gonle cont yesenite' šize bich yosozejni'ide' diža' güenlažen', le clen' chesone'. Na' bene' zan len bene' lo' yo'o chegaque' chesaczejlaže' che xtiža' Diosen' neche xtiža'gaquen'.

<sup>12</sup>Cana' gwzoo to bene' gwneya'a, goque' bene' Creta, na' gwne' che bene' gualaž che' ca': "Bene' Creta bate'teze zjanaque' bene' güenlaže' na' zjanaque' ca' bež znia' yela' güen da' xinj chegaquen'. Lecze zjanaque' bene' lia na' bene' xagüed." <sup>13</sup>Na' da' li can' gwnen'. Da'nan' tiło' legaque' che da' xinjen' chesonen' cont nita'chache' yesejle'e xtiža' Criston'. <sup>14</sup>Gono' ca' cont bich yosozenague' che diža' güenlažen' chesaljaže' bene' Israel gualaž chia' ca', na' neca yosozenague' che nochle bene' ba gosebejyichje' diža' li che Diosen'.

<sup>15</sup>Diosen' ba none' yichjlažda'ochon' xilaže', na' ne da' chagwcho ne da' choxe'cho bi chžonen gac yichjlažda'ochon' xilaže'. San ca' nac bene' yichjlaždao' mal ca', bene' bi chesejnilaže'

Criston', bibi de da' naquen da' xilaže' len legaque'. Chesone' xbab mal, na' bibi de cheseza'laže' cate' chesone' da' xinjen'. <sup>16</sup>Chesene' zjanombi'e Diosen', perw nacbja' bi zjanombi'ene', le chesonteze' da' xinjen'. Chesone' da' chgue'e Diosen'; zjanaque' bene' güedenag len xtižen' na' bi chesac yesone' da' güen.

### Xtiža' Diosen' da' chsed chlo'echo bene' naquen güen

**2** Na' le', cheyała' gwzejni'ido' bene' yesone' can' ža diža' li che Diosen'. <sup>2</sup>Bzejni'i bene' byo gol ca' bi yesezožde', san yesenite' cont bene' yezica'chle yesape' legaque' bala'an. Bzejni'i legaque' to toe' cheyała' yesenabia' cuine' cont yesenite' yesone' da' güen, na' bzejni'i legaque' cheyała' yesenita'chache' yesejnilaže' Diosen'. Cheyała' yesacde' bene' na' yesape' yela' chxenlaže' bite'teze da' chac. <sup>3</sup>Lecze ca' bzejni'i no'ol gole ca' cont yesenite' yesonxene' Diosen', na' bi yesene' che bene', neca yesezožde'. Cheyała' yesenite' yesone' da' güen cont yesenze bene' yezica'chle can' cheyała' yesone'. <sup>4</sup>Na' no'ol gol ca' cheyała' yosozejni'ide' no'ol xcuide' ca' yesenite' binlo len bene' che to toe' na' yesacde' legaque' len bi' chegaque' ca'. <sup>5</sup>Na' yosozejni'ide' legaque' cont to toe' yesenabia' cuine' na' yesone' da' zaca' yesone' cont yesaque' bene' laždao' xilaže' len yogo' da' chesone', na' yosogüia yesena' ližgaque' binlo, yesaque' bene' šagüe' na' yosozenag to toe' che bene' chegaque'. No'ole xcuide' ca' cheyała' yesone' güen can' ba gwnian' cont nono ne mal che xtiža' Diosen'.

<sup>6</sup>Na' lecze cheyala' neyoedo' bene' byo xcuide' ca' cont to toe' yesenabia' cuine' na' yesone' da' cheyala' yesone'. <sup>7</sup>Na' le', bite'teze da' gono', ben con da' nac güen cont yesacbe'e bene' yoble naquen' cheyala' yesone'. Cate' chsed chlo'edo' bene', bzejni'i legaue' do lažo', benen cont nacia' chapo' Diosen' bala'an'. <sup>8</sup>Bsed blo'e diža' li cont nono na xtižon' naquen mal. Na' še soatezo' gwsed gwlo'edo' diža' li, nachen' bene' ca' chesexi'a chio' yesyeto'ede' da' bi chesyēzelde' bi da' mal yesene' checho.

<sup>9</sup>Gož bene' güen žin ca' yosozenague' che xangaquen' na' yesone' bite'teze da' yese'ene' sin cbi yosyoži'e xtiža'gaquen'. <sup>10</sup>Bi yesebane' bi da' de che xangaquen', san yesenite' do laže' cont yezica'chle bene' yesele'ede' chesone' güen na' yesacbe'ede' güenna' nac xtiža' Diosen', Dios ben' none' yela' mban checho toli tocane.

<sup>11</sup>Diosen' nži'ilaže'de' chio' benach na' ba blo'e chaclaže' gone' yela' mban toli tocane che yogo'cho.

<sup>12</sup>Na' da' none' ca' chzejni'in chio' cheyala' cuejyichjcho yogo' da' choncho da' bi chazlaže' na' yogo' da' chzelaže'cho gata' checho o da' chzelaže'cho goncho da' bi naquen güen lagüen'. To tocho cheyala' soa cuezcho nabia' cuincho cont goncho da' nac da' zaca'. Na' cheyala' goncho da' zej to liča; na' cheyala' soacho gonxencho Diosen' yežlio nga. <sup>13</sup>Le šlac zoacho yežlio nga zoacho mbalaz nezecho žin ža yid Jesucriston' da' yoble nse'e be'ni' juisyw. Naque' Dios checho ben' chonxencho na' ben' none'

yela' mban checho toli tocane, na' zaca'chgüe'. <sup>14</sup>Len' bnežjw cuine' neche chio' cate' gosote'ne' cont bnitlagüe' xtola'chon', na' beya' beyibe' yichjlažda'ochon' len da' malen' cont none' chio' ca xi'ine'. Na' bene' ca' cont yebecho goncho da' güen.

<sup>15</sup>Can' cheyala' gwzejni'ido' bene'. Na' cheyala' gono' chach laže' yesone' da' güen na' tilo' bene' cheson da' xinj, le Diosen' ba gwsele' le' na' ba bene' le' yela' chnabia' cont gwzejni'ido' legaue'. Bi go'o latje yosozoe' le' to šla'ale.

#### Can' cheyala' gon chio' chejnilaže'cho Jesucriston'

**3** Da' yoble yozzendo' bene' chesejnilaže' Jesucriston' cheyala' yosozexjwyichje' yosozenague' che justis ca' na' che bene' gwnabia' chegaque' ca' na' bate'teze cheyala' yesone' da' güen. <sup>2</sup>Yozzendo' legaue' bi cheyala' yesene' mal che note'teze bene'. Bi cheyala' yesedil yosošaše', san cheyala' yesaque' bene' šagüe' na' yesape' yela' chxenlaže' len yogo'lol bene'.

<sup>3</sup>Chio' lecze bi gwejnjicho cana' na' bencho güedenag len Diosen'. Gwejle'cho diža' güenlažen' na' bentezcho bi da' xinj da' gwzelaže' lažda'ochon'. Gwdacho bencho con da' bebecho. Gwzoacho bxi'a lježcho. Besegue'e bene' chio' na' bgue'e lježcho. <sup>4</sup>Perw bžin ža Dios ben' none' yela' mban checho toli tocane blo'ede' chio' catec bene' šagüe' naque' na' catec chacde' chio' benach. <sup>5</sup>None' chio' yela' mban toli tocane gague

neche bi da' güen benchon', san da' beyaše'de' chio'. Nachen' beya' beyibe' yichjlažda'ochon' len da' malen' cate' gwzola chejnilaže'chone', na' Spiritw chen' bocoben yichjlažda'ochon'. <sup>6</sup>Diosen' gwsele' Spiritw chen' zoan lo' yichjlažda'ochon' chaclenchguan chio', le Jesucristw ben' none' yela' mban checho toli tocane gwnabdene' sejen'. <sup>7</sup>Na' ca' ba beyaše' beži'ilaže'de' chio' cont beyone' chio' bene' güen lagüen' na' cont soa cuezcho nezecho žin ža šjayzoacho len le' toli tocane.

<sup>8</sup>Da' ca' ba gwnia' nga zjanaquen da' li, na' gono' byen yosozenag bene' ca' gwzejni'ido' chen. Le bene' ca' ba chesejnilaže' Diosen' cheyala' yesebec yichjgaque' yesone' da' güen. Na' da' quinga ba gwnia' zjazaca'chgwan na' yesaclenen note'teze bene'. <sup>9</sup>Perw bi gono' txen len bene' chesedił chosošaše' che bize diža' da' bi zejen. Na' bi cuec yichjo' che diaža che da' xozxta'ochoc ca'. Bi gono' txen len bene' chesedił chosošaše' che bi zejen dan' nyoj le'e ley da' bzoj da' Moisésen', le da' chesone' ca' bi chaclenen bene' na' bi naquen da' zaca'.

<sup>10</sup>Na' bene' ca' cheson cont bene' ca' chesedop chesežague' chesonxene' Jesucriston' chesechoje'

chople, neyoedo' legaque' bich yesone' ca'. Na' še ba gwneyoedo' legaque' to chope ni'a na' bi chosozenague', yebejo' legaque' ca'ale. <sup>11</sup>Le da' bi chosozenague' nachen' nezecho zjambiaye'e na' zjanape' doła' che da' xinjen' chesone'.

#### Can' cheyala' gon Titon'

<sup>12</sup>Cate' sela' Artemas o Tíquico gan' zon', ben con ga zelao saque'do' cont yido' yežagcho lo' ciuda Nicópolis, le ba bechoglaža' yega'ana' na' tiemp zag. <sup>13</sup>Na' ben yogo' da' gac gono' par gacleno' Zenas ben' nsed ley, na' Apolos, cate' yesa'aque' gan' zon' cont bibi yeseyažjde' chanez. <sup>14</sup>Bene' lježcho ca' chesejnilaže' Criston' cheyala' yesoe'laže' yesone' da' nac güen na' yesaclene' bene' chyažj chchine. Le cheyala' gaccho bene' chon da' zaca'.

#### Bene' ljež Pablon' chosoguape' Titon' tiox

<sup>15</sup>Yogo' bene' cheson xšin Diosen' txen len neda' nga chosoguape' le' tiox. Na' chnaba' gwguapšco' tiox bene' ca' zoaleno' na', bene' ca' chesacde' chio' da' naccho txen chejnilaže'cho Criston'. Diosen' gaclenšque' yogole. Da' na'zen' chzoja'.



# CART DA' BZOJ POSTLW SAN PABLO CHE FILEMÓN

---

## Pablo chzoje' carten'

<sup>1</sup>Neda' Pablo dia' ližya nga da' chyixjue'eda' xtiža' Cristo Jesúsén'. Chzoja' le' Filemón, na' txen len bene' lježcho Timoteon' chguapto' le' tiox. Chaqueto' le' da' naccho txen choncho xšin Diosen'. <sup>2</sup>Na' lecze chguapto' tiox bene' ca' chesedop chesežague' chesonxene' Jesucriston' ližo'. Na' le' Apia, naco' ca bene' zanto', na' le' Arquipo, chono' neto' txen choncho xšin Diosen', lecze chguapto' le'e tiox. <sup>3</sup>Chnabeto' Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab chelen'.

## Filemónna' chejnilaže' Jesucriston' na' chacde' bene' lježe'

<sup>4</sup>Na' le' Filemón, yogo' ni'a cate' chjayze'eda' le' šlac chol giüiza' Diosen', choa' yeļa' choxclen che' can' ba chono'. <sup>5</sup>Ba benda' diža' can' chejnilažo' Xancho Jesucriston' na' can' chacdo' lježcho bene' lecze chesejnilaže' Jesucriston'. <sup>6</sup>Na' chnaba' gaclen Diosen' bene' ca' ba gosejnilaže' Jesucriston' lagüe be'leno' legaque' diža' can'

chejnilažo'ne'. Chnaba' gaclene' legaque' cont yesache'ede' yogo' da' güen juisyw da' chon Diosen' lo' yichjlaždao' chio' chejnilaže'chone'. <sup>7</sup>Bene' migw, leca chbeda' na' chac chach laža' nezda' chacchgüedo' bene' lježcho ca' chesejnilaže' Jesucriston', le chacleno' legaque' cont nita'che' mbalaz.

## Gwnabe' yezi'xen Filemónna' che Onésimo

<sup>8-9</sup>Dan' chacdo' Criston' na' chacdo' bene' lježo' ca', da'nán' chneyoeda' le' gono' to da' chaclaža' gono'. Da' naca' postlw che Criston' guac gona' byen gono' da' gwžia' bia' gono' šaca' žan gwchina' yeļa' chnabia' da' yo'o lo na'. Perw bi žan gona' ca'. Neda' Pablo ba naca' bene' gole na' lecze na'a ba dia' ližya nga da' chyixjue'eda' xtiža' Jesucriston'. <sup>10</sup>Na' chnaba' goclen laguon' par Onésimo ben' ba nona' ca xi'ina'. Le šlac dia' ližya nga bsded blo'eda'ne' cont chejnilaže' Jesucriston'. <sup>11</sup>Cana' bi goque' mos güen chio', san na'a ba naque' mos güen chio' na' lecze ca' chia' neda'. <sup>12</sup>Ba chezsel'a'ne' laguo', na' chneyoeda' le' yolebo'ne' na' yezi'xeno' che', le leca

chacda'ne'. <sup>13</sup>Zelaža' yega'anlene' neda' cont gaclene' neda', gone' da' cheyała' gono' šlac dia' ližya nga da' chyixjue'eda' xtiža' Jesucriston'. <sup>14</sup>Perw bi chaclaža' nabda'ne' bi gone', le naquen chio' le' nao' nac gone', cont do lažo' gono' bi da' güen da' gono' na' gague gonchi'on. <sup>15</sup>Diosen' be'e latje beza' Onésimon' ližon' šlož' cont soale txen toli tocane. <sup>16</sup>Na' na'a bich naque' mos chio' na'ze san naque' ca bene' bišo' da' naque' txen len chio' chejnilaže'cho Xancho Jesucriston'. Leca chacda'ne', na' le' cheyała' gacchdo'ne', gague con ca chacdo' note'teze benach, san can' chacdo' bene' lježo' chesejnilaže' Xanchon'. <sup>17</sup>Da'nana' še da' li naccho txen chejnilaže'cho Jesucriston', yolebo'ne' cacze chlebo' neda' cate' chedena'a le'e. <sup>18</sup>Na' še bi da' mal bende' le' o še bi da' chale' chio', neda' chixjuan'. <sup>19</sup>Cuincza' neda' Pablo chzoja' da' nga, neda' chixjua' bi da' chale'. Na' bibi chnia' che da' chal'o' le' chia' neda' da' ba de yela'

mban chio' toli tocane. <sup>20</sup>Bene' migw, da' chaquecho Xancho Jesucriston' chaclaža' gono' dan' chnaba' nga ca to goclen chia'. Benšca ca soa' mbalaz, le naccho txen len Criston'.

<sup>21</sup>Zoa' lez gwzenago' chia' na' goncho' güen clel ca dan' žia' le', da'nana' chzoja' le'. <sup>22</sup>Na' yeto da' chnaba', chaclaža' yedesoa' ližon' cate' yida' gan' zoalen'. Le zoa' lez yob gac yedyena'a le'e can' chnable lao Diosen' cate' choi güižlene'.

**Bene' ca' nita' len Pablon'  
chosoguape' Filemónna' tiox**

<sup>23</sup>Epafras die' ližya nga txen len neda' da' chyixjue'ede' xtiža' Cristo Jesúsena'. Na' le' chguape' le'e tiox. <sup>24</sup>Na' lecza' ca' bene' ca' chesaclene' neda' len xšin Diosen' nga, Marcos, na' Aristarco, na' Demas, na' Lucas, chosoguape' le'e tiox.

<sup>25</sup>Xancho Jesucriston' soašque' len le' gaclenšcacze' le'. Da' na'zen' chzoja'.

# CART DAN' NYOJ ÇHE BENE' HEBREO CA'

---

Diosen' gwsele' Xi'ine' cont  
be'lene' benachen' diža'

**1** Cani' Diosen' be'lene' da'  
xozxta'ocho ca' diža' len bene'  
gwsele' goso'e xtižen. Zan las goso'e da'  
bene' ca' xtižen' na' nža'te ca goso'en  
to toe'. <sup>2</sup>Perw na'a ba zoa žin ža yeyož  
yežlion' na' Diosen' ba be'lene' chio'  
diža' dan' gwsele' Xi'inen' bedezejni'ide'  
chio'. Na' Xi'in Dios nan' bene' yaba na'  
yežlio nga len yogo' bichle da' de nga  
na' gate'teze. Na' bengaquen' con can'  
gwnalaže' Diosen'. Na' gwžin ža gac lo  
na' Xi'in Diosen' yogo' benach, beyixe',  
na' bica'chle da' bene'. <sup>3</sup>Na' Xi'in Diosen'  
chlo'e catec bene' zaca' nac Diosen', le  
cayane' nac yichjlaždao' Xe' Diosen' nac  
yichjlažda'ogüen. Na' Xi'in Diosen' chone'  
cont yaban', yežlion' na' da' ca' chle'echo  
le'e yaban' na' yežlion' chesonen žin, le  
nape' yela' guac cont chac con can' že'.  
Len' bzanlaže' cuine' gote' cont bexi  
beyach chio' len xtoła'chon. Na' beyož  
bene' ca' beyepe' yaban' zjajchi'e cuit Xe'  
Diosen' ben' nac bene' zaca' juisyw na'  
chnabi'e txen len le'.

Xi'in Diosen' zaca'che' ca angl ca'

<sup>4</sup>Naque' bene' zaca'chgua ca  
angl ben' cheson žin che Diosen',

na' Diosen' bene' cont leca ba  
chacxenche' ca angl ca'. <sup>5</sup>Diosen'  
bina' ye'e ne to angl ca dan' gože'  
Xi'inen', gože'ne':

Len' naco' Xi'ina';

na'aža ba blo'a zoaczo'.

Na' bina' güe'e diža' che note'teze  
angl can' bi'e diža' che Xi'inen',  
gwne':

Neda' gona' cont gacbia' naca' Xe',  
na' gona' cont gacbia' naque'  
Xi'ina'.

<sup>6</sup>Na' da' nac Xi'in Diosen' la'zelagüe  
bene' zaca', da'nann' cate' Diosen'  
gwsele'ne' yežlio nga gwne':

Yogo'lol angl chia' cheyala'  
yesonxene' le'.

<sup>7</sup>Na' che angl ca' gwne':

Chona' cont angl chia' ca' bene'  
chesone' žin chia' chesaque' ca  
be' dan' chechj na' chesaque'  
ca yi' bel'.

<sup>8</sup>Perw che Xi'inen' be'e diža', gwne':

Len' naco' Dios na' nabi'o toli  
tocane'.

Na' leca güen chnabi'o, chono'  
con da' zej to licha.

<sup>9</sup>Chebedo' da' zej to licha na'  
chgue'edo' da' malen'.

Da'nann' neda' Dios ben'  
chonxeno' ba bena' cont

zoacho' mbalazech ca  
note'teze bene'.

<sup>10</sup>Na' da' yoble gozna Diosen' che  
Xi'inen':

Xana' Dios, beno' yežlion' ža  
gwlaste,  
na' yogo' da' chle'echo le'e yaban'  
lecze le' benon'.

<sup>11-12</sup>Na' gwžin ža cate' te che yogo'  
dan' chle'echo le'e yaban' na'  
lo yežlion',  
perw le' bi te chio'; soaczo' toli  
tocane.

Na' gwša'a le'e yaban' na' yežlion'  
ca to bene' chša' xe' cate' ba  
beyoen na' chaze' yeton.

Na' le'e yaban' na' yežlion', gono'  
len len can' chon to bene' cate'  
chotob xe'.

Perw le', tozecze can' gaco' toli  
tocane, gwbat žin ža te chio'.

<sup>13</sup>Diosen' biŋa' ye'e ne to angl ca  
dan' gože' Xi'inen', gože'ne':

Gwche'edo' cuita' nga nabia'cho  
txen,

na' gona' cont yogo' no  
cheseque'e le' yosozejw  
yichje' yosozenague' chio'.

<sup>14</sup>Na' ca nac angl ca', yogue'  
zjanaque' bene' cheson xšin Diosen',  
na' chsele' legaque' chesaclene' chio'  
ba gwleje' šjayzoacho len le'.

**Cheyała' gwzenagcho che Diosen'  
cont yeque'e xtoła'chon'**

**2** Na' da' nac Xi'in Diosen' bene'  
zaca'ch ca angl ca', do yichj  
do laže'cho cheyała' gwzenagcho  
xtižen' da' ba benecho. Le še  
bi gwzenagcho chen do yichj  
do laže'cho, guanlaže'chon na'  
cuejyichjchon. <sup>2</sup>Diosen' goclaže'  
yosozenag da' xozxta'ocho ca' che

ley che' dan' goseyixjue'e angl ca'.  
Da'nan' Diosen' bnežjue' castigw  
da' cheyała' si' to toe' bate'tez bi  
bosozenague' chen, con ca nac  
da' mal da' gosone'. <sup>3</sup>Gague da'  
yelacho bi si'cho castigw še bi  
gwzenagcho xtiža' Xancho Jesúsén'  
da' gwduxjue'ede' že' chaclaže' gone'  
yela' mban checho toli tocane. Da'  
zaca'chgua da' ben Xancho Jesúsén'  
cont gata' yela' mban checho toli  
tocane. Cuine' gwduxjue'eden' da'  
nechw, na' bene' ca' goseden le'  
bosolo'ede' chio' le naquen da' li.  
<sup>4</sup>Diosen' bene' cont gosone' da' zaca'  
yebanecho, na' bnežjue' legaque' zan  
yela' guac, na' Spiritw chen' benen  
cont gosone' da' zan da' güen len  
yela' guac chen. Na' yogo' da' ca'  
goc con can' gwnalaže' Diosen'. Na'  
Diosen' bene' ga gosac da' ca' cont  
nezecho xtiža' Xancho Jesuscriston'  
naquen da' li.

**Jesucriston' goque' can' nac chio' benach**

<sup>5</sup>Na' gague angl can' yesenabia'  
cate' žin ža gata' yežlio cobe dan'  
choe'cho diža' chen. <sup>6</sup>Na' de late'  
Xtiža' Diosen' gan' nyoj diža' da'  
be'len to bene' Diosen', gwne':  
čBixchen' nži'ilažo' neto' benach?  
le bitec bi zaca'to'.  
Na' čbixchen' chi' yichjo'  
chacлено' neto'?

<sup>7-8</sup>Beno' cont benachen' zjanaque'  
blao, na' con angl ca'ze  
zjanaquech blao ca benach.  
Na' beno' cont benachen' naque'  
bene' zaca' na' cont chacxene'.  
Beno' cont yogo'lol da' zjade  
yesaquen lo na' benach, na'  
len yogo'lol beyixe' yesacba' lo  
na'gaque'.

Na' da' ben Diosen' cont yogo'lo'lo  
 da' de yesaquen lo na' beṇachen' na'  
 yogo' beyixe' yesacba' lo na'gaquen',  
 bibi bocua'an Diosen' da' bi gwlo'e  
 lo na' beṇachen', la'czla' na'a bina'  
 le'echo yesac yogon' na' yogo'ba' lo  
 na' beṇachen'. <sup>9</sup>Perw yogo'lo'lo' ba  
 yo'ocze lo na' Jesúsén', la'czla' šlac  
 gwzoe' yežlio nga angl ca' gosacche'  
 blaoch ca' le'. Perw na'a da' bzanlaže'  
 cuine' gote', da'nán' Diosen' bene'  
 cont chacxenche' ca' legaque' na'  
 cont nacbia' naque' bene' zaca'  
 juisyw. Le da' nži'ilaže' Diosen'  
 chio' beṇač, da'nán' bžie' bia' got  
 Jesúsén' cont gac yequ'e xto'la' to to  
 beṇač.

<sup>10</sup>Diosen' bene' beṇač, bene'  
 beyixe' ca' na' bite'tezechle da'  
 zjade cont chacxene'. Na' Diosen'  
 chaclaže' bene' zan yesaque' xi'ine' na'  
 šjasyezoe' len le' gan' yo'ochgua be'ni',  
 na' güenna' bene' bžie' bia' gwxaca'zi'  
 Jesúsén' cont gac gone' yela' mban  
 to'li to'cane che chio' beṇač.

<sup>11</sup>Jesúsén' ba gwlo'e chio' lo na'  
 Diosen' na' txen len Jesúsén' naccho  
 xi'in Dios. Da'nán' bi cheto'e Jesúsén'  
 ne' naccho biše' lježe'. <sup>12</sup>Quinga  
 gwna Jesúsén' gože' Diosen':

Gwzejni'ida' bene' biše' lježa' ca'  
 can' nac yichjlažda'oguon',  
 na' txen len bene' ca' zjandop  
 zjanžag chesonxene' le' gola'  
 gonxena' le'.

<sup>13</sup>Nach Jesúsén' gwne':

Neda' soacha' šejnilaža' Diosen'.  
 Nach da' yoble gozne':

Nga zoa' txen len bene' ca' gwlo'o  
 Diosen' lo na', bene' ca' ba  
 gwque'e ca' xi'ine'.

<sup>14</sup>Chion' ba gwca'a Diosen' ca  
 xi'ine' naccho bene' bela' chen, na'

da'nán' Jesúsén' lecze golje' goque'  
 bene' bela' chen cont bnežjo cuine'  
 gosote'ne'. Na' da' got Jesúsén',  
 da'nán' gwzoe'de' bzoe' šla'ale  
 Satanás dan' chnabia' da' xigüe'  
 ca' na' dan' chonen yela' got che  
 beṇachen'. <sup>15</sup>Jesúsén' bene' cont  
 bich chžebcho gatcho, can' chesežeb  
 yezica'chle beṇač šlac de yela'  
 mban čhegaque', chesežebe' yesate'.  
<sup>16</sup>Jesúsén' bide' yežlion', gague  
 cont gaclene' angl ca', san cont  
 goclene' chio' naccho xi'in diaža  
 che da' Abrahanna'. <sup>17</sup>Na' da'nán'  
 benen byen goc Jesúsén' doxen can'  
 nac chio' beṇač cont naque' bžoz  
 blao čecho lao Diosen'. Na' bnežjw  
 cuine' bnitlagüe' xto'la'chon' na' zoe'  
 cheyaše'de' chio' con can' chazlaže'  
 Diosen'. Na' da' bnežjw cuine'  
 bnitlagüe' xto'la'chon', zaca'lebde' ca'  
 bžoz blao che nación Israel čechon'  
 ben' gwyej lao Diosen' be'xue' chen  
 che beyixe' cont gw'nabe' yezi'xen  
 Diosen' xto'la'gaquen'. <sup>18</sup>Na' da'  
 bžaglao Jesúsén' cate' gwlo'oyela'  
 gwxiyen' le' gone' da' mal, perw bibi  
 da' mal bene', da'nán' ne'zde' naclen'  
 gaclene' chio' cate' chgo'oyela'  
 gwxiyen' chio' goncho da' mal.

Jesúsén' zaca'che' ca da' Moisésén'

**3** Bene' migw, Diosen' ba gwleje'  
 chio' naccho lo ne'e, na'  
 cheyala' goncho xbab che Cristo  
 Jesús ben' gwsele'. Naque' bžoz  
 blao čecho na' ben' chejnilaže'cho.  
<sup>2</sup>Jesúsén' bene' cayanen' gwna  
 Dios ben' gwse'la' le' šlac gwde'  
 yežlion', ca'cze ben da' Moisésén'  
 cate' le' goclene' da' xozxta'ochó  
 ca' cani', bene' ca' gosac diaža che  
 Dios. <sup>3</sup>Perw Jesúsén' zaca'che' ca

da' Moisésen', le len' bxie' diaža che Diosen', na' da' Moisésen' naque' con to bene' za' lo diaža che Diosen'.  
 4Gwnita' benach bene' bxie' to to diaža yežlio nga, san ca nac Diosen', len' bxie' yogo'te da' zjade. 5Da' Moisésen' goque' ca xmos Diosen' cate' bene' con can' gwna Diosen' cont goclene' da' xozxta'ocho bene' ca' gosaque' diaža che Diosen'. Na' da' Moisésen' be'e diža' che da' za' gac da' za' chixjue'e Diosen' benachen' ca tiempa'. 6Perw Criston' bi goque' ca to mos dan' gwzoe' bene' can' gwna Diosen', san da' naque' Xi'in Diosen' da'nan' bene' can' gwnen', na' naque' Xan yogo' chio' naccho diaža che Diosen'. Na' da' li naccho diaža che Diosen' še zoachachcho chejnilaže'chone' na' chebecho nezecho gac güen checho.

#### Guac soacho mbalaz len Diosen'

7Da'nan' cheyala' gwzenagcho can' ža Spiritw che Diosen' len da' nga da' nyojen, žan:

Še Diosen' nie' le'e na'a,

8bi gonle güedenag can' goson da' xozxta'ole cani' cate' besyedabague' Diosen' latje daš gan' chesaše'.

9Nach Diosen' gwne':

Bi gosejle'e še leda' dan' goša' legaque' gwnežjua' da' yezacaza'ie neche xtola'gaquen'.

Bi gosejle'e chia' cate' gosaše' latje dašen', la'czla' choa iz besele'ede' can' bena' len legaque'.

10Da'nan' bža'a bene' ca' gwnitan' na' gwnia':

“Yogo' las chesejle'e diža' güenlaže',  
 na' bi chosozenague' chia' cont yesone' can' chazlažan.”

11Nachen' bža'a legaque' na' da' bali gwlo'a gwnia':

“Gwbat nite' mbalaz yesyezi'laže' can' chezi'laža' neda'.”

12Bene' migw, bi güe'le latje nabia' da' malen' yichjlažda'ole na' gonen cont cuejyichjle bich šejnilaže'le Diosen' ben' zoa toli tocañe. 13Na' šlac na'a ne' decze latje gwzenagcho che Diosen', le neyoe lježle tža tža cont ne tole bi gonle xbabn' clele, gaquele bibi nonen gontezle da' xinj. 14Da' li naccho Criston' txen še ne' zoacho chejnilaže'chone' cate' žin ža gatcho, con can' gwzolacho chejnilaže'chone'.

15Nyoj Xtiža' Diosen' che chio', žan:

Še Diosen' nie' le'e na'a,  
 bi gonle güedenag can' goson da' xozxta'ole cani' cate' besyedabague' Diosen'.

16Na' da' žan ca', choen' diža' che da' xozxta'ocho ca' bebej da' Moisésen' nación gan' nzi' Egipto. Gosende' can' gož Diosen' legaque', perw bi bosozenague', besyedabague' Diosen'. 17Da'nan' choa iz Diosen' bže'e legaque' neche gosone' da' xinjen', na' gosat ben' besyedabague' Diosen' šlac ne' zjalaže' latje dašen'.

18Na' legaque', da' bi bosozenague' che Diosen', da' bali gwlo'e, gwne' bi güe'le latje yesenite' mbalaz yesyezi'laže' can' chezi'laže' Diosen'.

19Na' nacbia' da' bi gosejle'e che Diosen', da'nan' bi goc nite' mbalaz yesyezi'laže' can' chezi'laže' le'.

**4** Na' ca' nezecho lecze neche chio' Diosen' gwne' bene' yesejle' xtiže' yesenite' mbalaz yesyezi'laže' can' chezi'laže' le'. Da'nan' cheyała' gwsaca'cho cont bi goncho güedenag len le'. <sup>2</sup>Chio' ba benecho diža' güen cont gac soacho mbalaz ca diža' dan' gosene da' xozxta'ocho ca' cani', perw diža' da' gosende' bi goclenen legaque', le bi gosejle'en. <sup>3</sup>Na' chio', še chejle'cho da' ža Diosen', ba zoacho mbalaz chezi'laže'cho can' chezi'lažen'. Na' nyoj da' gwne' che da' xozxta'ocho ca', žan:

Nachen' bža'a legaque' na' gwlo'a da' bałi, gwnia':

“Gwbat nite' mbalaz yesyezi'laže' can' chezi'laža' neda'.”

Na' nezecho Diosen' gwzolağüe' chezi'laže' cate' beyož bxie' yaban' na' yežlion' na' bichle da' bene' ža gwlaste. <sup>4</sup>Na' zoa late' gan' nyoj Xtiža' Diosen' can' bene' ža gažen', žan:

Xop ža ben Diosen' yaban', na' bichle da' bene' cate' bxie' yežlion'.

Na' bžin ža gaže, bich bi bene', con gwzoe' mbalaz bezi'laže'.

<sup>5</sup>Na' lecze nyojen can' gwne', žan:

Gwbat nite' mbalaz yesyezi'laže' can' chezi'laža' neda'.

<sup>6</sup>Na' ne' naquen da' li bał bene' yesejle'e xtiža' Diosen' na' nite' mbalaz yesyezi'laže' can' chezi'laže' le', na' bene' ca' gosende' diža' güen chen' cani' bi gosejle'en, na' bi goc yesenite' mbalaz yesyezi'laže' yela' güedenag chegaquen'. <sup>7</sup>Na' gwdechle gwne' Diosen' da' yoble gwne': “Na'a guac nita'le mbalaz yezi'laže'le.” Na' bene' cont da' rey David bzoje' da' nga, žan:

Še Diosen' nie' le'e na'a, bi gonle güedenag.

<sup>8</sup>Da' Josué gwchi'e da' xozxtao' chio' bene' Israel gan' gosezi'e yežlion' da' bnežjw Diosen' legaque', perw bi bene' cont yesenita' bene' ca' mbalaz yesyezi'laže'. Da'nan' Diosen' be'e diža' gwdele, gwne' gwžin ža yesenite' mbalaz yesyezi'laže'.

<sup>9</sup>Na' da'nan' bene' ba gwlej Diosen' cont yesaque' lo ne'e, legaque' guac yesenite' mbalaz yesyezi'laže' ca' mbalazen' gwzoo le' cate' gwzolağüe' chezi'laže'. <sup>10</sup>Na' bene' ca' ba nita' mbalaz chesyzezi'laže' can' chezi'laže' Diosen', bich chesone' can' ža xbab chegaquen', san chesone' can' ža Diosen'. Da'nan' žacho zjanite' mbalaz chesyzezi'laže' can' zoa Diosen' mbalaz chezi'laže' da' beyož bxie' yogo' da' zjade.

<sup>11</sup>Da'nan' cheyała' güe'laže'cho šejle'cho xtiža' Diosen' do yichj do laže'cho cont soacho mbalaz yezi'laže'cho can' chezi'laže' Diosen' na' cont bi cuiayi'cho can' gac checho še goncho güedenag len xtižen' can' goson da' xozxta'ocho ca'.

<sup>12</sup>Xtiža' Diosen' chazen lo' yichjlaždao' bene' chesenden' na' chaclenen bene' chosozenag chen. Na' zaca'leben ca to spada da' nłachgua chop la'a. Perw chonch Xtiža' Diosen' ca to spada, le chlo'en chio' še chzenagcho che Diosen' o še che cuincho, na' chzejni'in chio' che xbab da' yo'o lo' yichjlažda'ochon' na' len yogo' da' chzelaže'cho še naquen güen o naquen mal. <sup>13</sup>Bibi de da' bi neze nle'e Diosen', ne to benach, angl, da' xigüe' o bi da' zjade. Diosen' nezde' yogo'te da' yo'o



lo' yichjlažda'ochon'. Na' gwžin ža nabyožde' chio' che yogo'te da' ba bencho.

**Jesúsen' naque' b̄xoz gwnabia' checho**

<sup>14</sup>Jesús ben' naque' Xi'in Diosen' ba beyepe' yaban' na' zoe' gan' zoa Diosen'. Na' naque' b̄xoz blao checho bene' la'zelagüe zaca'. Da'nan' cheyała' soachachcho šejnilaže'chone' can' ba be'cho diža' goncho. <sup>15</sup>Jesúsen' ben' nac b̄xoz blao chechon' chacbe'ede' bi da' naquen zdebe len chio', le gwxiyen' goclažen' co'oyelan' le' gone' da' mal, na' bžaglagüe' cayanen' chžaglao chio', perw bibi da' mal bene'. <sup>16</sup>Na' dan' zoe' naque' b̄xoz blao chechon' ben' cheyaše'de' chio', da'nan' cheyała' yol' güižcho Diosen' gan' chi'e chnabi'e, na' bi žebcho güe'lenchone' diža', nabechone' yezi'xene' checho na' gaclene' chio' bate'teze chacbe'echo chyažjecho gaclene' chio', le nži'ilaže'de' chio'.

**5** Yogo' bene' ca' ba gosaque' b̄xoz blao che nación Israel chechon' gosac lo' ne'e šjasesane' bi da' šjasesane' lao Diosen' na' gosote' beyixe' bosolalje' xchengacba' cont Diosen' bezi'xene' xtola' da' xozxta'ocho ca'. <sup>2</sup>Na' b̄xoz ca' gosape' yela' chxenlaže' len bene' bina' yesejni'i can' cheyała' yesone' na' len bene' ba n̄xoayag da' malen' legaque', le lecze beňach bene' güen da' xinj' legaque'. <sup>3</sup>Da'nan' benen byen b̄xoz ca' gosote' beyixe' na' bosolalje' xchemba' cont gosenabe' yezi'xen Diosen' xtolen' lente xtola' yezica'chle bene'.

<sup>4</sup>Na' ne to b̄xoz ca' bi benxen cuine' neca gwlej cuine' cont gaque'

b̄xoz blao, san Diosen' gwleje' to toe' gosaque' b̄xoz blao can' gwleje' da' Aarón. <sup>5</sup>Na' ca'cze goc len Criston', bitw beyiljue' nac gone' cont gacxene', neca gwlej cuine' cont naque' b̄xoz blao checho, san Diosen' gwleje'ne' na' gože'ne':

Len' naco' Xi'ina',  
n̄a'aža ba bena' cont nacbia'  
zoaczo'.

<sup>6</sup>Na' ga yoble nyoj yeto da' gwne':  
Naco' b̄xoz toli' tocane can' nac  
b̄xoz ben' le' Melquisedec.

<sup>7</sup>Na' Criston' šlac gwzoe' yežlion' bol' güiže' Xe' Diosen' ben' nape' yela' guac cont yosle' le' bi gate', gwne' zižje na' gwcheže' gwnabe' gaclene' le'. Na' da' bzeɣjw yichj' Criston' bene' con can' gwna Xen', na' Xe' Diosen' bzenague' na' goclene'ne' cont bi bžebe' yela' goten'. <sup>8</sup>Na' la'czla' Criston' naque' Xi'in Dios, bžaglagüe' yogo'lol' da' ca' goc che' cate' bzenague' che Diosen' cont gweyjni'ide' can' chac che chio' beňach. <sup>9</sup>Na' beyož goc che' yogo'lol' da' goclaže' Diosen', nach ba guaque' gwnežjue' yela' mban toli' tocane che yogo' bene' yosozenague' che'. <sup>10</sup>Can' naquen, Diosen' gwleje' le' cont naque' b̄xoz blao checho, na' naque' ca b̄xoz Melquisedec.

**Gwsaca'cho cont bi  
cuejyichjcho xtiža' Diosen'**

<sup>11</sup>Na' ne' de da' zan da' chaclaža' nia' le'e che da' ngan', perw naquen zdebe nian' ca šejni'ilen, le bich chebele šejni'ilen. <sup>12</sup>Ba gole' gwzejni'ile bene' xtiža' Diosen', perw gualaz da' gonle ca', chyažjele no yozejni'i le'e da' yoble da' ca' bsdle da' nechw. Da'nan' zaca'leble

ca to bidao' bina' gac gagw na' con chaže'be'. <sup>13</sup>Na' bene' zjanac ca to bidao' ne' chaže', bina' yesejni'ide' xtiža' Diosen' binlo cont yesone' da' zej to licha len Diosen'. <sup>14</sup>Na' dan' ža xtiža' Diosen' da' naquech zdebe, zaca'leben ca yela' guagw da' chagw bene' gole. Na' bene' chesejni'i lenna' chesacbe'ede' še to da' yesende' o to da' yesone' naquen güen o naquen mal, le ba zjayolagüe' chosozenague' che Diosen'.

**6** <sup>1-2</sup>Cana' betinjecho xtolachon', gwejniłaze'cho Criston', na' bsdcho diža' güen che'. Goccho ca to bene' guat len yichjlažda'ochon' neche da' choncho da' xinj, perw ba betinjecho xtolachon' na'a. Bich chyažjen yezolaocho šejnilaze'cho Diosen'. Bich chyažjen gwsedchcho che dan' chesezoa bene' nis o che dan' chxoa na'cho yichj bene' na' chnabcho gaclen Diosen' legaque'. Bich chyažjen gwsedchcho can' gac cate' yechis yosban Diosen' bene' guat ca' o caten' chogbi'en yezezaca'zi' bene' ca' ba goson da' xinj. Ba nsedcho da' ca', na' na'a bach cheyala' gwsedcho xtiža' Diosen' da' nacch zdebe cont gacch yichjlažda'ochon' can' nac yichjlaždao' Criston'. <sup>3</sup>Lenna' goncho na'a še Diosen' gonšque' latje.

<sup>4</sup>Nita' bene' ba gwyo'o be'ni' che Criston' lo' yichjlažda'ogaque', na' ba chesacbe'ede' can' nac yela' mban da' chon' Criston', na' ba zoa Spiritw che Diosen' lo' yichjlažda'ogaque'. <sup>5</sup>Ba zjanezde' xtiža' Diosen' naquen güen na' ba zjanombi'e yela' guac che Diosen' da' za' gwlo'echde' benachen'. <sup>6</sup>Na' še žin ža bich yesejniłaze'

Criston' na' yesebejyichje' xtižen', bich gac yesyetinjde' che dan' ba gosebejyichje'ne', le lo' yichjlažda'ogaque' chesone' txen len bene' ca' bosode'e Xi'in Diosen' le'e yag cruzen', na' chesone' cont nochle bene' yesegue'ede' le'. <sup>7</sup>Cheyala' gac yichjlažda'ochon' ca to yežlio güen gan' chesaz bene'. Cheyož chac yejon' zan ni'a, nach chac cosešen'. Na' chata' dan' cheseyažje bene' chesazen'. Na' nacbia' Diosen' chebede' yežlion' nac ca'. <sup>8</sup>Bi gaccho ca to yežlio gan' chla' yag yeše' na' bichle yixe' da' nono chagw. Yežlion' nac ca' bibi zacan', na' ba zoa cuejyichj xanen len na' yixe' da' chla' lagüen žin ža šeyen.

#### Nezecho šjayzoacho len Diosen'

<sup>9</sup>Le'e bene' migw, chacda' le'e, na' la'czla' ba bia' dižan' ca', nezda' bilja gonle can' cheson bene' chesebejyichje' xtiža' Diosen'. Chacda' gonle güen da' ba gwlej Diosen' le'e cont šjayzoale len le'. <sup>10</sup>Diosen' zeje' to licha, na' bi ganlaže' can' ba benle xšinen' na' can' ne' chonlen na'a chaclenle yezica'chle bene' chesejniłaze'ne'. Na' chonle ca' da' chaquele Diosen'. <sup>11</sup>Na' chaclaža' to tole soatezle gonchle ca' do yichj do laže'le šlac bina' žin ža gatle, cont nezele šjayzoale len Diosen'. <sup>12</sup>Chaclaža' bi gacle bene' xagüed len da' ža Diosen'. Na' chaclaža' gonle can' ba goson bene' zan bene' gosenite' gosejniłaze' Diosen' cani', gosejle'e gon Diosen' can' gože' legaque' gone', na' gosape' yela' chxenlaže' cate'ch bžin ža benen'. <sup>13</sup>Cate' Diosen' gože' da' Abraham xi'in diaža che' yesaque' bene'

zan, bzoa cuine' gwlo'e da' bałi gac can' gwnen', le nono zoa bene' napch yela' gwnabia' ca Diosen'. <sup>14</sup>Gwne': "Da' li goncza' cont gac güen chio' na' cont yesac xi'in diaža chio' bene' zan." <sup>15</sup>Na' Abrahanna' gwdape' yela' chxenlaže' šlac gwleze', nach bžin ža gwzoloa chac can' gwna Diosen'. <sup>16</sup>Benachen' zjayolagüe' chosozoe' Diosen' cue'e da' bałi che bi dan' chesene', le Diosen' chnabia'che' ca legaue'. Chesone' ca' cont bene' ca' chesacyože' len legaue' yesejle'e na' yesyeyacxenlaže'. <sup>17</sup>Na' Diosen' bzoa cuine' cue'e da' bałi cont neze bene' ca' zjanac xi'in diaža che da' Abrahanna' gague da' te che dan' gwne' gonen'. <sup>18</sup>Diosen' bene' chope da' qui: gwne' can' gone' na' lecze bzoa cuine' cue'e da' bałi gac can' gwnen', na' gague da' te bi gac can' gwnen'. Chaclaže' chio' ba betinje xtoła'chon' yebecho nezecho šjayzoacho len le'. Na' Diosen' bi chac güe'e diža' güenlaže'. <sup>19-20</sup>Na' da' nezecho šjayzoacho len Diosen', bi soa xbab chechon' quile ca'le. Jesúsen' ba gwžialagüe' gwyo'e gan' zoa Diosen' gan' nono benach goc šo', na' bene' cont chio' gac šo'cho. Le naque' bžoz blao checho toli tocane, na' naque' ca bžoz Melquisedec.

#### Jesúsen' naque' ca bžoz Melquisedec

**7** Na' Melquisedequen' goque' rey na' gwnabi'e gan' nzi' Salem, na' Dios ben' nac la'zelagüe' bene' blao gwleje' le' cont goque' bžoz. Na' goquen' Abrahanna' zeze'e lao gwđile gan' bene' gan' gayo' rey, na' Melquisedequen' jašague'ne' na'

gwdixjue'ede' gac da' güen che da' Abrahanna'. <sup>2</sup>Ca horen' Abrahanna' zeze'e zonse'e yogo'loł da' jaytobe' da' bene' gan' lo yela' gwđilen', na' gwlequen' ši cuen na' bnežjue' to cuen che bžoz Melquisedequen'. Na' Melquisedec zejen diža' "rey bene' zej to licha". Na' goque' rey che bene' zjanite' binlo, le Salem gan' gwnabi'e zejen diža' "zjanite' binlo". <sup>3</sup>Bi nyojen še no goc da' xaxna' Melquisedequen'. Neca nyojen še no goc xozxta'ogüe', na' neca nyojen baten' golje' na' baten' gote'. Da'n'an' žacho Melquisedequen' zaca'lebde' ca Xi'in Dios ben' zoa toli tocane naque' bžoz checho, le bi golje Melquisedequen' lo diaža che nochle bžoz, na' neca gwzoo nochle bene' lo diaža che' bene' tie' gwłane' xlatje'.

<sup>4</sup>Le gon xbab catec bene' blao goc bžoz Melquisedequen'. Da'n'an' da' xozxta'ocho Abrahanna' gwleje' to cuen lo ši cuen da' ca' jaytobe' lo na' rey ca' na' bnežjuen' bžoz Melquisedequen'. <sup>5</sup>Na' da' xozxta'ocho bene' ca' gosaljle lo diaža che da' Leví, ben' besyeyale' gosaque' bžoz che nación Israel chechon', gosone' con can' nyojen le'e ley da' bzoj Moisés, na' bosochixjue' to cuen lo ši cuen yogo' bi da' gota' che yezica'chle bene' gualaž' chegaue' ca'. Na' yogo'cze' gosaque' diaža che da' Abrahanna', bžoz ca' na' bene' yezica'chle. <sup>6</sup>Perw Melquisedequen' la'czla' bi golje' lo diaža che da' Leví, Abrahanna' bnežjue'ne' to cuen lo ši cuen da' ca' jaytobe', na' Melquisedequen' gwnabde' Diosen' gac güen che da' Abrahanna' ben' gwna Diosen'

yesac xi'in diaža che' bene' zan. <sup>7</sup>Na' nezecho bene' chac chnabde' Diosen' gac güen che bene' yoble zaca'che' ca ben' gac che' da' güenna'. <sup>8</sup>Na' bene' ca' zjanac b̄xoz can' ža ley dan' bzoj Moisésen' chesezi'e to cuen güeje lo ši cuen yogo' bi da' de che bene' Israel gualaž chechon', na' b̄xoz ca' zjanaque' con l̄jež benachcho bene' chesat. Na' che b̄xoz Melquisedequen' ben' gwxi' to cuen lo ši cuen da' jaytob da' Abrahanna', Xtiža' Diosen' choen' diža' che' ca to bene' ne' zoacze. <sup>9-10</sup>Na' da' bnežjo Abrahanna' le' da' ca', guac n̄acho da' Leví bnežjue' Melquisedequen' to cuen güeje lo ši cuen da' ca', le gwdechle Levín' golje' lo diaža che da' Abrahanna', na' Leví nan' goque' xozxtao' bene' ca' gosac lo na'gaque' bosotobe' da' ca' bosonežjo bene' Israel gualaž checho ca' che Diosen'.

<sup>11</sup>Na' Diosen' bnežjue' bene' Israel gualaž checho ca' ley chen' cani' cont benen žin txen len da' goson b̄xoz ca' bene' gosalje' lo diaža che da' Levín'. Perw b̄xoz ca' bi goc yesone' cont yichjlaždao' benachen' yesaquen xilaže' len Diosen'. Da'nan' byažjecho bid Jesúsén' naque' b̄xoz checho toli tocane, na' le' naque' ca b̄xoz Melquisedequen', gague ca da' b̄xoz Aarón. <sup>12</sup>Na' cont goc zoa Jesúsén' naque' b̄xoz chechon', byažjen bža' ley da' nonen mandadw non' gac b̄xoz. <sup>13</sup>Le Xancho Jesúsén' ben' nac b̄xoz chechon' bi golje' lo diaža che da' Leví, na' noch no na' choj lo diaža che Jesúsén' bene' naque' b̄xoz. <sup>14</sup>Nezczecho Xancho Jesúsén' golje' lo diaža che da' Judá, na' da'

Moisésen' bi bzoje' le'e leyna' ga nan bene' galje' lo diaža che da' Judán' guac yesaque' b̄xoz.

<sup>15</sup>Na' nacbía' ba bža' leyna', le ba zoa Jesúsén' naque' b̄xoz cobe chechon' na' naque' ca b̄xoz Melquisedequen'. <sup>16</sup>Bito golje' lo diaža che da' Leví can' gosac b̄xoz ca' bene' goson žin can' ža ley da' bzoj da' Moisésen', san naque' b̄xoz da' bi gwzoe yela' goten' le' na' zoe' toli tocane. <sup>17</sup>Quinga nyoj da' gwna Diosen' che', žan:

Naco' b̄xoz toli tocane, can' nac b̄xoz ben' le' Melquisedec.

<sup>18</sup>Na' b̄xoz ca' gwna Diosen' nita' cana', bich nžie' bia' nite' na'a, le dan' bžia bia' leyna' yesone' bi goc yeca'an xtoła' benachen' to ši'i. <sup>19</sup>Na' leyna' lecze bi goc gonen cont yesac yichjlaždao' benachen' xilaže' len Diosen'. Perw na'a ba chaquech güen checho, le ba zoa b̄xoz checho bene' ba beca'a xtoła'chon' to ši'i cont zoacho binlo len Diosen' na' chac chnelenchone'.

<sup>20</sup>Na' cont nezecho Jesúsén' naque' b̄xoz checho, Diosen' bzoa cuine' gwlo'e da' bałi le soacze Jesúsén' gague' b̄xoz chechon'. <sup>21</sup>Bene' ca' gosaque' b̄xoz can' bzoj da' Moisésén', Diosen' bitw bzoa cuine' cue'e da' bałi cont šejle'cho zjanaque' b̄xoz. Perw nyoj can' gože' Jesúsén', žan:

Diosen' bzoa cuine' gwlo'e da' bałi na' bi gwše'e can' ba gože'ne' gone':

“Naco' b̄xoz toli tocane can' nac b̄xoz ben' le' Melquisedec.”

<sup>22</sup>Na' da'nan' zoa Jesúsén' chone' cont nezecho Diosen' gaclene' chio' toli tocane can' gwne' gone'.

Na' can' za' gwne' gaclene' chio' na'a, zaca'chen ca da' gože' da' xozxta'ocho ca' cani'. <sup>23</sup>Na' bene' ca' gosaque' b̄xoz can' ža ley dan' bzoj da' Miosésen', gosaque' bene' zan, le cate' gosat tgüeje tgüeje', la' benita'te bene' yoble. <sup>24</sup>Perw Jesúsén' zoe' toli tocane, na' da'nán' naque' b̄xoz checho toli tocane. <sup>25</sup>Da'nán' chac chone' yela' mban toli tocane che chio' chnabcho yezi'xen Diosen' checho, le zoacze' toli tocane chnabe' goclen lao Diosen' che chio' chejnilaže'chone'. <sup>26</sup>Na' Jesúsén' nacyane' bene' chyažjecho gaque' b̄xoz blao checho cont gaclene' chio', le naque' bene' laždao' xilaže'. Bibi da' xinj none' na' neca none' bi xbab mal, con bibi dola' nape'. Nža'le naque' len benach' bene' cheson da' xinj. Jesúsén' ba beyepe' zoe' gan' zoa Diosen', na' chnabi'e txen len le'. <sup>27</sup>Nža'le naque' len b̄xoz blao ca' gosenita' cani'. Legaque' tža tža byažjen gosote' beyixe' bosolalje' xchemba' cont gosenabe' bezi'xen Diosen' xtoła'gaque', na' gwdechle gosote' beyixe' yoble bosolalje' xchemba' cate' gosenabe' bezi'xen Diosen' xtoła' yezica'chle bene' Israel gualaž checho ca'. Perw Jesúsén' šni'aze bnežjw cuine' neche xtoła' benachen' cate' gosote'ne' le'e yag cruzen', na' bi byažjde' gote' beyixe' can' goson b̄xoz ca' tža tža neche xtoła'gaque' na' neche xtoła' bene' yezica'chle. <sup>28</sup>Bene' gosac b̄xoz blao can' ža ley da' bzoj da' Moisésén' gosaque' bene' güen da' xinj can' zjanac yezica'chle bene'. Na' cate' ba goc zan iz bzoj Moisésén' leyna', Diosen' bzoa cuine' gwlo'e da' balı zoacze

Xi'ine' Jesúsén' naque' b̄xoz blao checho. Na' Xi'ine' Jesúsén' zoacze' toli tocane na' nac yichjlaždagüen' cayanen' chazlaže' Diosen'.

**Jesúsén' bene' cont gwzolao  
chac da' cobe da' gwna Diosen'  
gone' cont gaclene' chio'**

**8** Da' nga zejehen lao yogo' da' ba gwnia': zoa b̄xoz blao chechon' ben' nac cayanen' chazlaže' Diosen', na' ba chi'e yaban' chnabi'e txen len Diosen' ben' nac la'zelagüe bene' zaca'. <sup>2</sup>Chone' žin gan' zoa Xancho Diosen', gague lo' yo'o dan' goson benach' cont yesonxene' le'. <sup>3</sup>Na' yogo' b̄xoz blao che bene' Israel gualaž chechon' nite' chosonežjue' Diosen' bi da' chosonežjue'ne' na' chesote' beyixe' chosolalje' xchemba' lao Diosen'. Na' dan' nac Jesúsén' b̄xoz blao checho, benen byen bnežjw cuine' blalj xchene' neche xtoła'chon'. <sup>4</sup>Na' šaca' ne' zoe' yežlio nga bi naque' b̄xoz, le nita' b̄xoz che bene' Israel gualaž chechon' chjasesane' bi da' chjasesane' lao Diosen' con can' ža ley dan' bzoj da' Moisésén'. <sup>5</sup>Na' bene' ca', chesone' bi da' chesone' lo' yodao' da' naquen ca l' gua'a šaca' che yaban' gan' zoa Diosen'. Na' nezecho naquen ca l' gua'a šaca' che yaban' gan' zoa Diosen', le cate' za' gon Moisésén' yodao' dan' chacte chedobe gan' goson b̄xoz ca' žin che Diosen' cani', Diosen' gože'ne': “Yogo' da' ba gwnia' gonle, le gonen cayanen' blo'eda' le' caten' gwzoacho lo ya'an.” <sup>6</sup>Na' da' chon Jesúsén', da' xen zaca'chen ca da' cheson b̄xoz che bene' Israel gualaž chechon', na' can' gwna Diosen' gaclene' chio' lagüe

da' bnežjw cuin Jesúsen' neche  
xtola'chon', lecze da' xen zaca'chen  
ca dan' gože' da' xozxta'ocho ca'  
cani'.

<sup>7</sup>Le Diosen' gože' da' xozxta'ocho  
ca' gac güen chegaque' še  
yesone' can' ža ley chen', perw bi  
bosozenague', na' da'n'an' byažjen  
gwdixjue' to da' cobe. <sup>8</sup>Na' Diosen'  
bi bebede' legaque', san gwne':

Gwžin ža cate' nia' to da' cobe  
da' gona' gaclena' le'e nacle  
xi'in diaža che bene' ca'  
gosenite' Israel,

na' len le'e nacle xi'in diaža che  
bene' ca' gosenite' Judá.

Neda' naca' Xanle Dios žia' ca'.

<sup>9</sup>Nža' can' goša' da' xozxta'ole  
gona' gaclena' legaque' cani',  
bži'ilaže'da' legaque' na' bena'  
cont besyechoje' lo na' bene'  
nación Egipto.

Legaque' bi gosone' can' goša'ne'  
cont gac güen chegaque'.

Na' da'n'an' gwleza' bich  
goclena'ne', neda' Xanle Dios  
žia' ca'.

<sup>10</sup>Na' quinga gona' gaclena' xi'in  
diaža che le'e nacle bene'  
Israelen' cate' žin ža:

Neda' Xanle Dios gona' cont  
šo' yichjgaque' da' nona'  
mandadw yesone',

na' gona' cont yesyebeden' lo'  
yichjlažda'ogaquen',

na' toza' neda' yesejnilaže',  
na' legaque' yesaque' nación chia'.

<sup>11</sup>Na' bi yažjen yosozejni'i lježe'  
cont yesombi'e neda',  
neca yažjen yosozejni'i no bene'  
biše' lježe',  
le cana' yogo'lole' yesombi'e  
neda',

bi' bixjw lente bene' nac bene'  
gole.

<sup>12</sup>Canan' yezi'xena' xtoła'gaquen',  
na' bich gona' cuent še bi da'  
malen' ba gosonen'.

<sup>13</sup>Na' Diosen' be'e diža' che da' cobe  
da' gwne' gone' gaclene' nación  
chechon', na' da'n'an' nezecho ba  
bzoe' to šla'ale da'na' gože' da'  
xozxta'ocho ca' cani'. Na' da' gole da'  
ba bzoe' to šla'ale ba zoa yeniten.

**Yodao' da' zoa yežlion' na' dan'**  
**zoa yaba gan' zoa Diosen'**

**9** Cani' Diosen' gože' da'  
xozxta'ocho ca' gaclene'  
legaque' na' gac güen chegaque'  
še yesone' can' ža ley chen'. Na'  
šlac ne'chon žin da' nechw da'na'  
gože' legaque' cani', Diosen' bžie'  
bia' nacle yesonxene' le' na' nacle  
yesone' yodao' gan' yesonxene' le'  
yežlio nga. <sup>2</sup>Gosone' yodao' da' nsan'  
chope cuart. Na' lo' cuart nechon'  
bosozoe' to candeler na' to mes gan'  
bosocue'e yetextil da' naquen che  
Dios. Na' cuartna' bososi'en Latje  
che Dios. <sup>3</sup>Na' bosozie' to lache' lo'  
yo'ona' cont bchojen chope cuart,  
na' cuart gwchopen' bososi'en  
Latje ga Zoa Dios. <sup>4</sup>Na' lo' cuart  
gwchopen' bosozie' yeto mes de oro  
gan' bosozeye' yal. Na' goseyixjue'  
to caj da' bosoguzje' oro doxenen.  
Na' lo' cajan' gosegüe'e to yeso' de  
oro gan' gosegüe'e late' yeła' guagw  
da' nzi' maná, na' gosegüe'e carrot  
che da' Aarón dan' bexeje. lecze lo'  
caj nan' gosego'ošagüe' yej ta'a ca'  
gan' byoj yogo' dan' bžia' bia' Diosen'  
yesone' cont gaclene' legaque'. <sup>5</sup>Na'  
cože' cajan' bosonite' chope l gua'a  
lsaca' bene' gosone' ca' angl bene'

bososi'e querubines, cont nacbia' zoa Diosen' gan' žia cajen' na' naque' bene' zaca' juisyw. Na' cože' cajen' ladjo angl ca' gan' nžiljo xilgaquen', bosožie' xchen beyixe' cate' gosenabe' yezi'xen Diosen' xtoła' bene' Israel gualaž checho ca' to to iz. Perw bi chonen byen güe'cho diža' na'a doxen can' goca'.

<sup>6</sup>Na' beyož gosone' yodaon' na' bosonite' yogo' da' ca' lo'enna', nach yogo' ža b̄xoz ca' goso'e lo' cuart nechon' na' gosone' can' bžia bia' Diosen' gosone' gosonxene' le'. <sup>7</sup>Na' cuart gwchopen', toz b̄xoz blao goc gwyo'e lo'enna' tni'a tgiüz. Na' cate' gwyo'ena' benen byen bexo'e' chē che beyixe' bži'en lo' cajen' cont Diosen' bezi'xene' xtole' na' bezi'xente' xtoła' yezica'chle bene' Israel gualaž checho neche da' xinj da' gosone' sin cbi gosache'ede'.

<sup>8</sup>Na' da' bi de lsens šo' nochle bene' lo' cuart gwchopen', Spiritw che Diosen' chzejni'in chio' biņa' gac šo' benachen' gan' nac latje ga zoa Diosen' šlac ne' chon žin yodao' nechua' lo' yežlion'. <sup>9</sup>Na' yodaon' len yogo' da' cheson b̄xoz ca' lo'enna' chlo'en chio' zoacho na'a can' chac yaban' gan' zoa Diosen'. Na' la'czla' da' zan chesoe' bene' Diosen' na' be zan beyixe' chesote' chesonxene' le', bibi yeła' guac zjansa' da' ca' cont yesenezde' bibi doła' zjanape' len Diosen'. <sup>10</sup>Na' da' ca' cheson bene' gualaž chechon' lo' yodaon' naquen costumbr che no nis yeła' guagw, no beyixe' chesote', na' nacle cha' chyib cuingaque', na' bichle da' zjazacan' par cuerp chegaque' na'ze. Na' ba gosonen žin šlac Diosen' biņa' gwše'e costumbr ca' len da' coben'.

<sup>11</sup>Na' na'a Criston' naque' b̄xoz blao checho na' ba bžin ža b̄xie' costumbr güen ca'. Na' zoe' yaban' naque' b̄xoz checho lao Diosen', na' gan' zoen' zaca'chen ca' yodao' da' goson benachen' yežlio nga. <sup>12</sup>Na' bi bexo'e' chē che no šib no go'n dao' cate' gwyo'e gwñabe' cont Diosen' bezi'xene' xtoła'chon', san da' bnežjw cuine' gosote'ne' na' blalj xchene' neche xtoła'chon' tni'aze le'e yag cruzen', da'nān' goc gwyo'e gan' zoa Diosen' na' ba beque'e xtoła'chon' toli tocaņe. <sup>13</sup>Na' ley da' bzoj da' Moisésen' nyojen žan da' zan da' cheson bene' da' chonen cont bi chesaque' xilaže' len Diosen'. Na' cont yesyeyaque' xilaže' len Diosen' da' yoble, chyažjen gwže'e b̄xozen' legaque' xchen no šib no go'n na' nchixen len de da' chega'an cate' chosozeye' to vaca' dao'. <sup>14</sup>Na' xchen Criston' da' bedelalje' neche xtoła'chon' zaca'chen ca' xchen beyixe' ca', le xchenen' cheyonen yichjlažda'ochon' xilaže' len da' xinj da' ba bencho. Da'nān' bich nchoglaon checho gatcho neche xtoła'chon', san soaczcho gonxencho Diosen' ben' zoa toli tocaņe. Spiritw che Diosen' goclenen Criston' bnežjo cuine' beque'e xtoła'chon', na' bibi xtoła' Criston' gota'.

<sup>15</sup>Criston' bedelalj xchene' cont gwzolao chac da' coben' dan' gwna Diosen' gone' cont soacho binlo len le'. Na' ba b̄xie' da' coben' cont bałteze bene' ba gwlej Diosen' šjasyenite' len le' toli tocaņe. Na' da' got Criston' bedelalj xchene', da'nān' gwntilao xtoła' bene' ca' gosejnilaže' Diosen' šlac ne' chon žin dan' gwđixjue' da' nechw dan'



gwne' gone' cont chio' bene' Israel soacho binlo len le'. <sup>16</sup>Cate' to bene' ba bene' testament, cate'ch ba gota'bia' ba got bena' ben testamenta', cana'ch gac can' žanna'. <sup>17</sup>Le to testament bi gac can' žan šlac ne' mban ben' ben len. Cate'ch ba gote' canan' gac can' žanna'. <sup>18</sup>Na' goc ca' len da' nechon' da' gož Diosen' da' xozxta'ocho ca' gone' gaclene' legaque'. Da'n'an' bžie' bia' bosolalje' xchen beyixe' cont gwxen. <sup>19</sup>Cate' da' Moisésen' beyož be'lene' da' xozxta'ocho ca' diža' che yogo' dan' bžia' bia' Diosen' yesone' can' ža ley chen', nach Moisésen' bži'e' legaque' xchen goṅ dao' na' xchen šib dao' na' nis. Bži'e' legaque' da' ca' len late' yiša' xa xila' da' mben color xna' na' len to xis yixe' dao' da' nzi' hisopo. Lecze bži'en lao libren' gan' nyoj ley chen'. <sup>20</sup>Na' da' Moisésen' gože' legaque': "Chen ni ben Diosen' mandadw gwžia' le'e cate' gože' chio' nac goncho cont gaclene' chio' gac güen checho can' gwnen'." <sup>21</sup>Na' lecz ca' bene' bži'e' chenna' yodaon' na' yeso' ša' ca' bosochine' gan' gosonxene' Diosen'. <sup>22</sup>Ley dan' bzoj Moisésen' nžian bia' gwže'e' bžozen' chen lo yogo'ze bi da' chosochine' cont yesyeyaquen xilaže' lao Diosen'. Na' leyna' lecze žan še bina' lalj chen, Diosen' bi yezi'xene' xtoła' bena'chen'.

**Criston' gote' blalj xchene' cont beque'e xtoła' bene' chesejnilaže'ne'**

<sup>23</sup>Can' goc benen byen bosožie' xchen beyixe' lo' yodaon' na' lo da' ca' bosochine' yodaon' cont gosonen žin lao Diosen', na' yodaon' naquen con to l gua'a lsaca' da' chzejni'in

can' nac yaban'. Perw da' de yaban' byažžen to chen da' zaca'ch. <sup>24</sup>Na' gan' gwyo'o Criston' gague naquen to yodao' da' naquen con to l gua'a lsaca' cont nezecho can' nac yaban'. Le' beyepe' yaban' na' gwyo'e gan' zoa Diosen' cont chne' gualaz chio' lagüen'. <sup>25</sup>Bžox blao che bene' Israel gualaž checho ca' cheso'e yodaon' tni'a tgiüz gan' nzi' Latje gan' Zoa Dios na' chosoži'e chen che beyixe', perw Criston' bi bnežjw cuine' zan ni'a gosote'ne'. Tni'aze blalj xchene' neche xtoła' bena'chen'. <sup>26</sup>Šaca' byažžen blalj xchene' zan ni'a, ba gote' zan ni'a gwzolaon cate' gwxete yežlion', perw bi benen byen gac che' ca'. Bedelalj xchene' tni'aze cate' gwna Diosen' ba bžin ža che', cont chac cheque'e xtoła' bena'ch. <sup>27</sup>Na' can' chac che bena'chen', žin ža gat to toe' na' te yesate' nach na Diosen' che to toe' še yesezaca'zi'e o še yesenite' mbalaz. <sup>28</sup>Na' can' yesat bena'chen' tni'aze, ca'cze bnežjw cuin Criston' tni'aze gosote'ne' cont chac cheque'e xtoła' bena'chen'. Nach žin ža yide' da' yoble perw gague cont yeque'e xtoła' bena'chen', san cont yeche'e bene' ca' chesebeze' batcan' yide' nach nite' mbalaz len le'.

**10** Ley da' bzoj da' Moisésen' len costumbr da' nžian bia' goncho cate' gonxencho Diosen' bzejni'in chio' late'lasze che da' güen da' ba chac checho na'a ba bid Criston'. Perw leyna' bi goc yocoben yichjlaždao' bene' ca' gosejnilaže' Diosen' la'czla' gosote' beyixe' yogo' iz. <sup>2</sup>Šaca' yichjlažda'ogaque' beyaquen güen cate' gosote' beyixe' ca' na' cate'

bɔx ca' bosoži'e legaque' xchemban' neche xtoła'gaquen', ba gwnitlao xtoła'gaquen' to ši'ize šaca', na' bich bi yesacde' lo' yichjlažda'ogüen' che da' xinjen' chesonen'. <sup>3</sup>Perw da' chesote' beyixe' ca' na' bichle da' chesone' neche xtoła'gaquen' to to iz, bi chac yesanlaže' zjanape' doła'. <sup>4</sup>Le xchen no go'n dao' no šib dao' bi gac yeca'an xtoła' benach.

<sup>5</sup>Da'nan' cate' Criston' bide' yežlio nga gože' Diosen':

Dan' chesote' beyixe' na'  
dan' chjasesane' bichle da'  
chjasesane' laguo', gague da'  
can' zelažo'.

Zelažo' gwnežjw cuina' gona'  
can' chazlažo', le da'nan' beno'  
cont golja benach.

<sup>6</sup>Da' chesote' beyixe' chosozeye'ba' laguo' na' yogo' da' ca' chesone' cont yezi'xeno' xtoła'gaquen', gague da' can' chbedo'.

<sup>7</sup>Da'nan' gwnia' can' nyoj le'e libr gan' žan: “Dios chia', za'a nga zedeyena' con can' chazlažo'.”

<sup>8</sup>Zgua'tec Criston' gože' Diosen':

“Dan' chesote' beyixe' na' dan' chjasesane' bichle da' chjasesane' laguo', na' dan' chosozeye' beyixe' cont yezi'xeno' xtoła'gaquen', gague da' can' zelažo' na' gague da' can' chbedo'”, la'czla' leyna' nžian bia' yogo' da' ca'. <sup>9</sup>Nach Criston' gože' Diosen': “Za'a nga zedeyena' con can' chazlažo'”. Da'nan' nezecho ba bzo'e to šla'ale dan' bžie' bia' gotcho beyixe' cont yezi'xene' xtoła'chon', na' gualaz len, blalj xchen Criston' cont beque'e xtoła'chon'. <sup>10</sup>Na' da' ben Jesucriston' con can' gwyazlaže' Diosen' cate' bnežjw cuine' gosote'ne' tñi'aze cani', da'nan' ba beyac

yichjlažda'ocho xilaže' lao Diosen', chio' chejnilaže'chone'.

<sup>11</sup>To to bɔx che bene' Israel gualaž checho ca' con nita'cze' chesotcze' beyixen' tža tža na' chosoži'e xchemba' can' ža leyna' cheyała' yesone', la'czla' xchen beyixen' bi gac yeca'an xtoła' benachen'. <sup>12</sup>San Criston' tñi'azen' bnežjw yela' mban che' na' zaca'czen cont yeca'an xtoła' benachen' toli tocane. Na' beyož bnežjw cuine' zjaychi'e gan' chnabi'e txen len Diosen'. <sup>13</sup>Na' zoe' chbeze' žin ža yosozexjw yichj yogo' bene' chesegue'e le' na' yosozenague' che'. <sup>14</sup>Na' da' bnežjw cuin Criston' tñi'aze cani', bene' cont chio' naccho lo na' Diosen' beyac lažda'ochon' xilaže' toli tocane. <sup>15</sup>Na' Spiritw che Diosen' lecze benen cont nezecho naquen ca', le nyojen, žan:

<sup>16</sup>Quinga gona' gaclena' legaque' cate' žin ža,  
gona' cont šo' yichjgaque' da'  
nžia' bia' yesone',  
na' gona' cont yesyebeden' lo'  
yichjlažda'ogaquen',  
can' ža Xancho Diosen'.

<sup>17</sup>Na' nyoj yeto da' ža Spiritw che Diosen', žan:

Na' bich gona' cuent še bi da'  
malen' ba gosonen' o še bi  
xtoła'gaque' ba gota'.

<sup>18</sup>Na' cate' ba gwnitlao xtoła'chon' bich chyažjen gotcho no beyixe' neche xtoła'chon'.

#### Cheyała' soacho gonxencho Diosen' neca žebcho

<sup>19</sup>Bene' migw, nezecho gac šo'cho gan' zoa Diosen' neca žebcho, le Jesucriston' blalj xchenen' na'

beque'e xtoła'chon'. <sup>20</sup>Guac nacho gwsaljue' to nez cobe, to da' chonen chio' yela' mban toli tocane, le da' bnežjw cuine' gote' neče chio', guac šo'cho gan' zoa Diosen' na' bich naquen ca part yodaon' da' ngaše' len lache' da' ze gan' nono gac šo'. <sup>21</sup>Na' zoa bxoz blao chechon' naque' bene' zaca'chgua, na' naque' Xan yogo' chio' gwlej Diosen' cont chejnilaže'chone'. <sup>22</sup>Da'nan' cheyała' soacho gonxencho Diosen' do yichj do laže'cho neca žebcho, na' cheyała' soacho šejle'cho xchen Jesucriston' ba beca'an xtoła'cho, le nezecho ba gwzoacho nis da' chejnilaže'chone'. <sup>23</sup>Na' can' gwzolaacho be'cho diža' gwnacho šjayzoacho len Diosen', ca'cze cheyała' goncho bate'teze, na' da' li šjayzoaczcho len Diosen', le zoacze' chone' con can' gwnen'. <sup>24</sup>Lecze cheyała' yeyiljwlaže'cho nacle gaclen lježcho cont gaquech lježcho tocho yetocho na' gonchcho da' güen. <sup>25</sup>Na' bi cuejyichjcho da' chdop chžagcho txen chonxencho Diosen' ca chesebejyichj bał bene'. Cheyała' neyoe lježcho soaczcho šejnilaže'cho Criston', na' gonchcho ca' na'a ba nacia' ba zoa te che yežlion'.

<sup>26</sup>Še ne' chontezechcho da' xinj la'czla' ba nombia'cho diža' li che Criston', bibi de bichle da' gon žin cont nitlao xtoła'chon'. <sup>27</sup>Na' cheyała'cze žebcho gon Diosen' cont saca'zi'cho še ca', na' yeyejcho lo yi' gabilen' gan' cuiayi' yogo' bene' cheseque'e Diosen'. <sup>28</sup>Cani' da' xozxta'ocho ca' gosote' note'teze bene' bi bzenague' che ley da' bzoj da' Moisésen', bi besyeyaše'de' legaque', con še gwnita' chope o

šone bene' toz can' goso'e diža' che da' xinjen' none'. <sup>29</sup>Na' da' mal juisyoch gac che chio' še gue'echo Xi'in Diosen' na' gaquecho bibi zaca' xchen Criston' da' blalje' cont beque'e xtoła'chon' na' še necho che Spiritw che Dios ben' nži'ilaže'de' chio'. Le da' blalj xchen Criston' gwzolač hac da' cobe da' gwna Diosen' gone' gaclene' bene' yesejnilaže'ne'. <sup>30</sup>Nombia'cho Diosen' na' nezecho len' gwne': "Neda' yoži'a che da' mal da' chesone' na' neda' gona' cont yesezaca'zie." Na' lecze nyojen žan: "Xancho Diosen' chogbi'e nac gac che bene' ca' ba gwque'e ca xi'ine'." <sup>31</sup>Na' leca naquen da' žebcho še cuejyichjcho Diosen' ben' zoa toli tocane, le gone' cont saca'zi'cho toli tocane.

<sup>32</sup>Perw le šjayzalaže' can' bchejele da' zan da' gwdi gwxcac'le cate' beyož gwyo'o be'ni' che Criston' lo' yichjlažda'olen'. <sup>33</sup>Tgüejje gosezi'diže' le'e lao yogo' bene' yež na' tgüejje cate' gosotlate' le'e na' bichle da' bosochi bososaque' le'e, na' da' juisyw da' goquele cate' gosonde' bene' lježle ca'. <sup>34</sup>Beyaše'le bene' lježcho ca' bene' gosata' ližya na' goclēle legaque', na' gwzoale mbalaz la'czla' bene' besegue'e le'e goseque'e bi da' gota' chele, le nezele de da' zaca'ch chele yaban' da' bi te chen. <sup>35</sup>Da'nan' bi cuejyichjle da' chejnilaže'le Diosen', neca žeble, le žin ža cate' soachguale mbalaz. <sup>36</sup>Cheyała' gwyo gwchejle cont yeyož gonle yogo'lol da' chnalaže' Diosen', na' tena' gone' cont soale mbalaz toli tocane can' gwne'. <sup>37</sup>Can' nyoj Xtiza' Diosen', žan:

La' žinte ža yid ben' se<sub>l</sub>a' gan'  
zoalen', bich šede'.

<sup>38</sup>Na' xi'ina' be<sub>n</sub>e' zjanac be<sub>n</sub>e'  
güen len neda' yesata' ye<sub>l</sub>a'  
mban che' to<sub>l</sub>i toca<sub>n</sub>e da'  
chesejnilaže' neda'.

Na' še bich yesejnilaže' neda',  
bich yebeda' lega<sub>q</sub>ue'.

<sup>39</sup>Perw chio' bi naccho ca be<sub>n</sub>e' ca'  
bich yesejnilaže'ne', be<sub>n</sub>e' yesebiayi'.  
Chio' zoaczcho chejnilaže'chone' na'  
šjayzoacho len Diosen' to<sub>l</sub>i toca<sub>n</sub>e.

Da' chejnilaže'cho Diosen'  
naquen to da' zejen

**11** Še chejnilaže'cho Diosen'  
nezecho gac da' güen da'  
chbezcho gac, na' nezecho gon  
Diosen' gac can' že' da' bi<sub>n</sub>a' le'echo.

<sup>2</sup>Ba<sub>l</sub> be<sub>n</sub>e' gwlas ca' bebe Diosen'  
lega<sub>q</sub>ue' da' gosejnilaže'ne'.

<sup>3</sup>Da' chejnilaže'chone' chej<sub>l</sub>e'cho  
con gw<sub>n</sub>ie' na' goc yaban' len  
yežlion'. Na' bibi b<sub>ch</sub>ine' da' le'echo  
cate' bene' yogo' da' ca' chle'echo.

<sup>4</sup>Can' da' xozxta'ocho Abel  
gwejnilaže' Diosen' na' da'nan'  
bnežjue' Diosen' to da' gocch da'  
güen ca da' bnežjw be<sub>n</sub>e' biše' Caín.  
Na' dan' bebe Diosen' dan' bnežjw  
Abelen' le', da'nan' gw<sub>n</sub>eze Abelen'  
naque' be<sub>n</sub>e' güen len Diosen'. Na'  
la'czl<sub>a</sub>' ba got Abelen', da' gwzoe'  
gwejnilaže' Diosen', naquen ca  
to da' ch<sub>n</sub>eyoen chio' soaczcho  
šejnilaže'cho Diosen'.

<sup>5</sup>Na' lecze da' xozxta'ocho Enoc  
gwzoe' gwejnilaže' Diosen', na'  
da'nan' Diosen' bezi' beque'ene'  
šlac ne' mbane'. Bi gote', con noch  
no ble'e le'. Na' nyoj Xtiza' Diosen',  
žan Diosen' bebede' Enoquen'  
šlac gwzoe' yežlion'. <sup>6</sup>Na' Diosen'

bi chebede' note'teze be<sub>n</sub>e' bi  
chejnilaže'ne'. Le note'tez be<sub>n</sub>e' yo<sub>l</sub>  
güiže' Diosen' cheyla' šejle'e zoacze  
Diosen' na' šejle'e gwnežjue' ye<sub>l</sub>a'  
mban to<sub>l</sub>i toca<sub>n</sub>e che note'tez be<sub>n</sub>e'  
nabden' le' do yichj do laže'.

<sup>7</sup>Na' ca nac da' Noé, lecze  
gwejnilaže' Diosen', na' cate'  
Diosen' bosnisde' le' can' za' gac,  
gwej<sub>l</sub>e' Noén' can' gož Diosen' le',  
na' do bžebe' bene' to barcw gan'  
gwo'e len be<sub>n</sub>e' lo' yo'o che' ca' cont  
bi gosate' lo nisen'. Na' da' gwej<sub>l</sub>e'  
Noén' can' gwna Diosen', blo'ede'  
yezica'chle be<sub>n</sub>e' že' na' zjanape'  
do<sub>l</sub>a' da' bi bosozenague' che  
Diosen'. Na' lecze da' gwejnilaže'  
Diosen', goc gwna Diosen' naque'  
bene' güen len le'.

<sup>8</sup>Da' Abrahanna' lecze  
gwejnilaže' Diosen'. Da'nan'  
bzenague' cate' bo<sub>l</sub> güiž Diosen' le'  
na' gože'ne' šeje' ga de to yežlio zito'  
da' gaquen che'. Na' gweje' la'czl<sub>a</sub>'  
bi nombi'e latjen'. <sup>9</sup>Na' Abrahanna',  
da' gwejnilaže' Diosen' jasoe' laž  
be<sub>n</sub>e' zito' da' gwna Diosen' gac che'  
na' gac che xi'in diaža che'. Gwzoe'  
lo' yo'o de lache'ze na' lecz lo' yo'o  
de lache'ze gwnita' xi'ine' Isaaquen'  
na' xi'in xesoe' Jacob be<sub>n</sub>e' lecze  
gož Diosen' gac yežlion' chegaque'.  
<sup>10</sup>Abrahanna' gwzoe' gwleze' ca' lo  
yežlion', le gwneзде' žin ža šjayzoe'  
gan' zoa Diosen' gan' naquen to  
ciuda güen da' bi te chen, ciuda da'  
ben Diosen'.

<sup>11</sup>Na' Saran' no'ol nac no'ol che  
Abrahanna', la'czl<sub>a</sub>' naque' be<sub>n</sub>e'  
güiž na' naque' be<sub>n</sub>e' gole par soa  
xi'ine', Diosen' bene' to ye<sub>l</sub>a' guac  
cont gwzoe' xi'ine', le gwej<sub>l</sub>e'  
gon Diosen' con can' gwne' gone'.

<sup>12</sup>Ca' goquen' gwzoa bi' che da' Abrahanna' la'czła' goque' bene' gole par soa xi'ine', nachen' xi'in diaža che' gosaque' bene' zan can' zjanac beljw ca' na' can' nac yox da' chi' cho'a nisdaon' da' nono chac gwlab.

<sup>13</sup>Yogo' bene' ca' ne' chesejnilaže' Diosen' cate' bžin gosate'. Na' la'czła' bina' gac lo na'gaque' dan' gože' legaque' gac chegaquen', bi gosacžejlaže', san gwnite' mbalaz gosejle'e gwžin ža gon Diosen' can' gwnen'. Goso'e diža' zjanaque' ca' bene' zito' len bene' že' lo yežlion' na' bibi lažgaque' de lo yežlion'.

<sup>14</sup>Na' da' goso'e diža' bibi lažgaque' de yežlion', nacbja' gosezelaže' yesyežine' ga yoble gan' gac lažgaque'. <sup>15</sup>Šaca' gosone' xbab che yežen' gan' gosaljen' naquen lažgaque', gota' latje jaya'aque' šaca', perw bi gosone' xbaden' ca'. <sup>16</sup>Gosezelaže' yesyežine' yaban', le gosejle'e na'len' nac lažgaque', na' gosenezde' nacchen güench ca yežlion'. Da'n'an' Diosen' bi cheto'ede' chegaque' že' naque' Dios ben' chesonxene', na' ba benšagüe' to ciuda gan' zjanite'.

<sup>17</sup>Na' Abrahanna' da' gwejnilaže' Diosen' da'n'an' bzenague' cate' Diosen' bene' le' prueba gože'ne' cheyala' got xi'ine' Isaaquen' lao Diosen' cont gonxene'ne'. Ba zoa gote' xi'in'en' la'czła' gwnezde' Diosen' gože'ne': <sup>18</sup>“Gona' cont nita' xi'in diaža chio' bene' yesac xi'in diaža che Isaaquen'.” <sup>19</sup>Da' Abrahanna' bečhoglaže' gote'be', le gwnezde' Diosen' chac chosbane' bene' guat. Perw na' Diosen' bi be'e latje gote'be'. Da'n'an' guac nacho bosbane'be' ladjo bene' guaten', la'czła' gague gotbe'.

<sup>20</sup>Gwdechle Isaaquen' gwejnilaže' Diosen'. Da'n'an' gwñabde' Diosen' gone' güen len xi'ine' Jacob na' Esaú. <sup>21</sup>Lecze da' Jacoben' gwejnilaže' Diosen'. Da'n'an' cate' ba zoa gate', gwñabde' Diosen' gone' güen len xi'in xesoe' ca' bin' gosac xi'in da' José. Na' bcheque' yichje' benxene' Diosen' nchiše'teze' carrot che'. <sup>22</sup>Na' da' Josén' gwejnilaže' Diosen', na' gwejle'e žin ža yesyechoj bene' gualaž che' ca' Egipton' can' gwna Diosen'. Nachen' cate' ba zoa gate' bžie' bia' yesyeyo'e žit benat chen' cate' yesyeya'aque'.

<sup>23</sup>Cate' golje da' Moisésen', da' leca gosejnilaže' xaxne'en Diosen', bi besežebe' yesyedabague' dan' bžia bia' reyen' yesone', gwne' cheyala' yesote' bi' byo chegaque' ca'. Šone bio' bosocaaše'be' ližgaquen', le gosacde' nacchguabe' xdan.

<sup>24</sup>Nach bi' no'ol che rey beque'ebe' boscha'ogüe'be'. Perw cate' ba gwcha'o da' Moisésen' bžone' yesone' le' ca' xi'in bi' no'ol che rey che Egipton', le gwejnilaže' Diosen'.

<sup>25</sup>Da'n'an' gwyazlaže'che' bžaglagüe' txen len bene' gualaž che' ca' yogo' dan' bososaca'zi' bene' Egipto ca' legaque', clel ca' gone' txen len bene' Egipto ca', le gocbe'ede' job te che yela' chebe che da' xinj ca' cheson legaque'. <sup>26</sup>Goclaže' bžaglagüe' can' bžaglao Criston' cont bene' can' gwyazlaže' Diosen', bi gwzelaže' gac che' yogo' yela' gwni'a da' de che bene' Egipto ca', le gwnezde' gwžin ža gon Diosen' cont soe' mbalaz.

<sup>27</sup>Na' da' gwejnilaže' Diosen', bi bžebe' rey cate' bžin ža besyechoje' Egipton' la'czła' reyna' bža'achgüe' legaque', con gwzoacze' bzenague'

che Diosen'. Gwne<sub>2</sub>zde' zoacze  
Diosen' la'czla' bi chle'echone'.

<sup>28</sup>Nach Moisésen' da' gweyjnilaže'  
Diosen' bžie' bia' da' xozxta'ocho  
ca', bene' že' to to yo'o gosote' to  
xila' dao' na' bosozie' xchemban'  
ližgaquen', cont angl bene' nsa' yela'  
got bibi goc gonde' bi' byo nechw lo'  
to to yo'o. <sup>29</sup>Na' da' xozxta'ocho ca'  
gwnita' cani', da' gosejnilaže' Diosen'  
da'nan' Diosen' bene' cont Nisdao'  
Xnan' goquen chople, na' bla' yo  
biž gacholen cont goc goselaguen'.  
Perw bene' Egipto ca' cate'  
gosaclaže' leze yeselague' nisdaon',  
bocuaše' nisa' gan' chesedien', na'  
gosate' gose'eje' nisen'.

<sup>30</sup>Lecze da' gosejnilaže' da'  
xozxta'ocho ca' Diosen', da'nan'  
Diosen' bene' cont bebix ze'e da'  
gweychj doxen ciuda Jericó cate'  
gosechje' ze'en yogo' ža lao gaže ža.  
<sup>31</sup>Na' da' no'olen' le' Rahab, no'olen'  
goque' no'ol zle', lecze gweyjnilaže'  
Diosen', na' da'nan' bi gwžiyae'e  
txen len yezica'chle bene' Jericó  
bene' bi bosozenague' che Diosen',  
le blebe' chop da' xozxta'ocho ca'  
ližen' cate' jasegüia jasene'e lažen'.

<sup>32</sup>Ba gwnita'ch bene' zan bene'  
gosejnilaže' Diosen', perw bi de  
tiemp gua' diža' che da' ben' gože'  
Gedeón, che da' ben' gože' Barac,  
che da' ben' gože' Sansón, che da'  
ben' gože' Jefté, che da' rey David,  
che da' Samuel, na' che yezica'chle  
bene' gosoe' xtiža' Diosen' cani'.  
<sup>33</sup>Da' gosejnilaže' Diosen' besechoje'  
gosone' gan cate' gosedile' len  
no rey, na' bale' gosaque' bene'  
gwnabia' na' gosone' byen goson  
bene' yoble da' güen, yebale'  
besele'ede' ben Diosen' bi da' güen

da' gwne' gone' len legaque', yebale'  
Diosen' bene' cont bež znia bi  
gosagwba' legaque' na' bi gosoneba'  
legaque' zi' cate' gosegüe'e legaque'  
gan' že'ban'. <sup>34</sup>Lecze da' gosejnilaže'  
Diosen', bale' bi goseye' cate' bene'  
bosozale' legaque' lo yi', yebale'  
besyele' cate' bene' gosaclaže' yesote'  
legaque' len spada, yebale' beyon  
Diosen' legaque' bene' gual cate'  
bich zjanale', yebale' goclene'ne'  
gosaque' soldadw gual cont gosone'  
gan cate' soldadw bene' zito'  
gosedillene' legaque'. <sup>35</sup>Na' gwnita'  
no'ol ca' da' gosejnilaže' Diosen'  
da'nan' Diosen' bosbane' no bene' lo'  
yo'o chegaque' ladjo bene' guat ca'.

Na' gwnita' bene' yoble, da'  
gosejnilaže' Diosen' da'nan' gosate',  
bi gosaclaže' yesyele' lo na' bene'  
mal ca'. Gosoe' latje bosochi  
bososaque' legaque', le gosenezde'  
gwžin cate' Diosen' yechis yosbane'  
legaque' ladjo bene' guat ca'  
cont yesenite' len le'. <sup>36</sup>Gwnita'  
yebał bene' leca gosezi'diža'  
bene' legaque' na' leca goseyine'  
legaque', na' bosochije' legaque'  
gden na' goseyixjue' legaque' ližya.  
<sup>37</sup>Na' bene' ca' besegue'e legaque'  
gosote' legaque', bale' bosochele'  
legaque' yej, yebale' bosozoxje'  
cuerp chegaquen' len sier, yebale'  
gosote' len spada. Na' bał bene' ca'  
gosejnilaže' Diosen' benen byen  
gosaše' yixe' zjanyaze' no xa xila'  
no xa šib. Bibi gota' chegaque',  
leca nyaše' gosac chegaque' catec  
bosochi bososaca' bene' legaque'.  
<sup>38</sup>Gosaš goselaže' do latje daš, do  
ya'adao', do ga ze bloj na' ga zoa  
no liž beyixe'. Yogo' da' ca' goc che  
bene' ca' gosejnilaže' Diosen', la'czla'

zjazaca'chgüe' na' bene' že' yežlio nga bi zjazaque' yesenite' txen len leaque'. <sup>39</sup>Diosen' bebede' yogo' bene' ca' da' gosejnilaže' le', perw šlac gosenite' biṇa' gone' yogo' da' güen da' gwne' gone' che xi'in diaža che da' Abrahanna'. <sup>40</sup>Le goclaže' gone' ga gac che chio' zoacho na'a yogo' da' güen da' gwne' gone', cont txen len bene' ca' gosejnilaže'ne' cani', yeyož gaccho can' chazlažen'.

**Cheyała' soacho goncho  
xbab che Jesúsén'**

**12** Nezecho ba gwnita' bene' zan gosone' da' güen neche da' gosejnilaže' Diosen', na' dan' gosonen' chzejni'in chio' can' cheyała' goncho. Da'nan' cheyała' gwzoacho ca'ale še bi da' chžonen goncho can' chazlaže' Diosen' na' cuejyichjcho bi da' xinj da' choncho, le da' xinjen' chziye'czen chio'. Na' cheyała' soatezcho goncho can' že Diosen' sin cbi yeche'echo. <sup>2</sup>Jesúsén' bene' cont gwzolao chejnilaže'cho Diosen' na' gaclene' chio' cont soaczcho šejnilaže'chone' yežintecho gan' zoe'na'. Na' cheyała' soacho goncho xbab ca Jesúsén' byo bcheje' len da' gwdi gwxaque' cate' gosote'ne' le'e yag cruzen'. Bi bžone' yesonde' le' da' zan da' naquen da' zban juisyw, le gwñezde' za' gon Diosen' cont soe' mbalaz len le'. Na' na'a Jesúsén' ba chi'e chnabi'e txen len Diosen'.

<sup>3</sup>Cheyała' goncho xbab can' byo bchejlaže' Jesúsén' len yogo' da' ca' gosone' bene' mal ca' le' na' bene' can' gwna Diosen'. Na' ca'cze cheyała' gwyo gwchejlaže'cho goncho can' chazlaže' Diosen'

la'czla' še chaquechon zdebe; bi cheyała' yeche'echo. <sup>4</sup>Da' zan da' ba bžaglaole chdillenle da' malen', perw biṇa' lalj xchenle na' biṇa' yesote' le'e. <sup>5</sup>¿Ba gonlaže'le can' že Diosen' chneyoede' chio' can' chon bene' chneyoe xi'ine'? Nyoj xtiže'na', žan:

Xi'indagua', bi gacdo' bibi zejen da' chnežjo Xancho Diosen' le' da' saca'zi'o' cate' chono' bi da' xinj,

na' bi gaco' tole cate' chdile' le'. <sup>6</sup>Le Xancho Diosen' chzejni'ide' yogo' bene' chacde', na' chnežjue' da' saca'zi' yogo' bene' ba gwque'e ca xi'ine' cate' chesone' da' xinj.

<sup>7</sup>Cheyała' gwyo gwchejlaže'cho cate' Diosen' chone' chio' da' saca'zi'cho, le chonde' chio' ca benačhen' chonde' xi'ingaque'. Le yogo'ze bidao' chnežjo xaben' lebe' castigw cate' chontezbe' da' xinj. <sup>8</sup>Na' še bi chon Diosen' da' saca'zi'cho cate' chontezcho da' xinjen', zeje diža' bi naccho xi'ine', le yogo' bene' ba gwque'e ca xi'ine' chnežjue' da' yezezaca'zi'e cate' chesonteze' da' xinjen'. <sup>9</sup>Yogo' xaxna'cho bososgole' chio' yežlio nga na' gosone' castigw checho cate' bi da' xinj bencho, na' nezecho ca'cze cheyała' yesone'. Nacchxe cheyała' gwzenagcho che Xacho Diosen' bite'teze da' chzejni'ide' chio', cont šjayzoacho len le' toli tocaṇe. <sup>10</sup>Na' xaxna'chon' to chop izzen' šlac bososgole' chio' gosone' castigw checho con ca gosaclaže'. San Diosen' nezde' bi da' nac güen par chio', na' chdile' chio' na' chone' da' saca'zi'cho cont gaclenen chio' soacho goncho da'



güen na' gac lažda'ochon' xilaže' can' nac lažda'ogüen'. <sup>11</sup>Na' bite'tez da' chyi chzaca'cho, šlac chaquen bi chazlaže'chon, perw cate' ba gwden chaclenen goncho da' zej to licha na' chaclenen soacho binloch len xbab da' yo'o lo' yichjlažda'ochon'.

**Diosen' goṇe' da' saca'zi'cho  
še bi gwzenagcho che'**

<sup>12</sup>Da'nān' le soa le gon can' chazlaže' Diosen' sin cbi yeche'ele.

<sup>13</sup>Le soa le gon da' güen cont gaclenle bene' ca' ne' chesaczejlaže' naquen' yesone' cont legaque' yosozenagche' che Diosen' na' bi yesebejyichje' xtižen'.

<sup>14</sup>Le yeyiljwlaže' nacle gonle soale binlo len yogo'cze bene', na' le gwzenag che Diosen' cont gac lažda'olen' xilaže', le nono yežin gan' zoa Diosen' še bi nac lažda'ogüen' xilaže'. <sup>15</sup>Le gaclen lježle cont ne tole bi ganlaže'le catequen' nži'ilaže' Diosen' chio', le cate' chzolaicho choncho güedenag len Diosen', bedao' chcha'o chxenen na' guacte gonen cont bene' zan yesonche' da' xinj. <sup>16</sup>Bi gata'lenle bene' byo bi nac bene' chele o no'ole bi nac no'ol chele. Na' bi gue'ele da' naquen da' zaca' len Diosen' can' ben da' bene' gože' Esaú, ben' bše'ede' to platw yela' guagw da' cheyala' gwnežjo Diosen' le' dan' golje' goque' bene' nechw. <sup>17</sup>Nezele gwdechle goclaže' yeyac lo' ne'e da' bdie' lo' na' bene' biše', perw bich bi goc bi gone' cont yeyaquen lo' ne'e la'czla' gwcheže' catec gwzelažen'.

<sup>18</sup>Nža'le chac che chio' na'a na' can' goc che da' xozxta'ocho cani' cate' Diosen' bnežjue' legaque' ley

chen'. Cate' betje' lo' ya'a Sinaí gwyečhj yi' bel' ya'ana', gwxoan žen, beyaquen chol, na' gwyečhjchgua be'. <sup>19</sup>Gosende' gwchež to trompeta, na' gosende' be' Diosen' diža' len legaque'. Na' besežebchgüe' na' gosata'yoede' Moisésen' bich güe'len Diosen' legaque' diža'.

<sup>20</sup>Besežebchgüe', le Diosen' ba gožle' legaque' še noe' yesebigue' lo' ya'an cheyala' yesote'ne' yosochele'ne' yej, na' lecz ca' yesone' še len beyixe'.

<sup>21</sup>Da' zaca' žebcho goc lo' ya'an, lente da' Moisésen' gwne': "Leca chaž chžeba' can' chaquen'."

<sup>22</sup>Perw chio' chejnilaže'cho Criston' ba naccho txen len Diosen' ben' zoa toli tocaṇe na' len yogo' angl che' bene' že' yaban' chesonxene'ne', bene' zjanaque' bene' zan juisyw. Da'nān' guac nacho ba gwbiga'cho lo' ya'a Sión dan' lecze nzin' ciuda Jerusalén da' chi' yaba gan' zoa Diosen'. <sup>23</sup>Na' naccho txen len yogo'loṭte bene' chesedop chesežag chesonxene' Jesucriston' gate'teze, bene' zjanyoj lagaque' le'e libr che Diosen' da' de yaban'. Na' yogo' chio' chejnilaže'chone' zaca'lebcho ca bi' nechw to lo' yo'o, bi' chzi' byen che xaxna'be', le si'cho da' güen da' gon Diosen' chio'. Na' naccho txen len Diosen' bene' choglaogüen' che yogo' benačh še de xtoṭa'gaque'.

Lecze naccho txen len bene' ca' ba gosat, bene' gosaque' bene' güen lao Diosen' da' gosejnilaže'ne', na' na'a ba beyož zjanacyane' can' chaclaže' Diosen'. <sup>24</sup>Na' naccho txen len Jesús ben' blalj xchene' cont gwzolao chac da' coben' da' gwna Diosen' gone' gaclene' benačen'. Na' blalj

xchenen' cont ba bñitlao Diosen' xtola' chio' chejnilaže'chone'. Da'nan' xchen Jesúsen' zaca'chen ca xchen da' Abelen' da' gwłalj caten' betw bene' bišen' le'.

<sup>25</sup>Da' mal juisyw še goncho güedenag len Diosen' cate' chne' chio'. Bene' cont gosezaca'zi' da' xozxta'ocho ca' cate' gosone' güedenag len xtižen' da' gwñelene' legaque' lo yežlion' cani', na' gonche' da' saca'zi' chio' še goncho güedenag len xtižen' da' choelene' chio' lo' lažda'ochon' zoe' yaba na'ate. <sup>26</sup>Leca gwxo' cate' Diosen' betje' lo ya'a Sinaín' cont be'lene' da' xozxta'ocho ca' diža'. Na' na'a ba gwne': "Gwžin ža cate' gona' xo' yežlion' da' yoble, perw gague yežlio na'zen', san lente yogo' da' chle'echo le'e yaba." <sup>27</sup>Na' da' gwne' gone' xo' da' yoble, zejen te che yogo' da' ca' ben Diosen' da' chle'echo, perw bi te che Diosen' na' che yogo' da' güen da' chone' da' bi chle'echo. <sup>28</sup>Da'nan' cheyała' güe'cho yela' choxclen che Diosen' da' gone' cont šjayzoacho mbalaz txen len le' gan' chnabi'e, na' gague da' te che da' güen da' gac checho len le'. Nach lecz cheyała' gabe'echo bene' zaca'chgua nac Diosen' cont gonxenchone' do yichj do laže'cho can' chazlažen'. <sup>29</sup>Cheyała' gwzenagcho chen', le Dios chechon' leca chgue'ede' da' malen', na' sele' lo yi' gabil bene' ca' bi yesyetinjde' che da' xinjen', da'nan' zaca'lebde' ca yi' bel.

#### Da' chazlaže' Diosen' goncho

**13** Bitw gwsanle gague lježle, le yogo'cho chejnilaže'cho Jesucriston' naccho ca biše lježcho.

<sup>2</sup>Na' bi ganlaže'le cheyała' gwleble bene' za'ac zito' ližlen' bene' chesejnilaže' Jesucriston'. Bal xozxta'ocho ca' cate' bosolebe' bene' zito' ližgaquen' bosolebe' angl bene' gwswela' Diosen' neca gosacbe'ede'.

<sup>3</sup>Cheyała' gonle xbab che bene' lježcho ca' chesata' ližya cont gaclenle legaque'. Na' cheyała' gonle xbab can' gale'le šaca' chac chele can' chac che bene' ca'. Na' bi ganlaže'le bene' lježcho bi da' chosochi chososaca' bene' legaque', le šlac ne' mbancho, cuerp chechon' guac saca'zin' da' quinga. Na' cheyała' gonle xbab can' gale'le šaca' chac chele can' chac che bene' ca'.

<sup>4</sup>Na' le'e nšagna'le, yogo'le le soa do laže'le len no'ol chele o bene' chele na' bi talenle bene' yoble, le Diosen' gone' saca'zi' bene' chesata'lene' no'ole bi zjanac no'ol chegaque' o bene' byo bi zjanac bene' chegaque'.

<sup>5</sup>Bi cheyała' selaže'cho mechon', san cheyała' soacho becho bi da' dao' da' de checho, le Diosen' ba gwne' che to tocho: "Bi ganlaža' le' na' bi cuejyichja' le'." <sup>6</sup>Da'nan' bibi de da' žebcho, na' to tocho guac nacho:

Xana' Diosen' zoe' chaclene' neda'.

Bi žeba' bi da' gone benachen' neda'.

<sup>7</sup>Le šjayze'e bene' gwnita' bosozejni'ide' le'e xtiža' Diosen'. Le gon xbab can' gosone' cont yogo'ze bene' gosacbe'ede' gosenite' gosejnilaže' Diosen', na' le nita' le šejnilaže' Diosen' can' gosonen'.

<sup>8</sup>Na' can' nac yichjlaždao' Jesucriston' nej nase, ca'czen'

naque' ža na'aža, na' ca'czen' gague' toli tocanē. <sup>9</sup>Bi güe'le latje yeseziye' bene' le'e len bi diža' yoble da' chosozejni'ide', le nža' xen can' chososed chosolo'e balē'. Da' chon Diosen' lo' lažda'ochon' neche da' nži'ilaže'chgüede' chio', lenna' chaclenen chio', gague da' ca' chesena bene' cheyała' ye'ej gagwcho. Na' ca nac da' ca' chesene' cheyała' ye'ej gagwcho cont yebe Diosen' chio', bina' yesaclenen bene' ca' chesene' cheyała' gagwchon, na' neca gaclenen chio'.

<sup>10</sup>Xancho Jesucriston' bnežjw cuine' gosote'ne' neche chio', na' da' chejnilaže'chone' ba gwnitlao xtoła'chon'; perw bene' ca' ne' chosolalje' xchen beyixe' na' chosozeye'ba' cate' chesenabe' yezi'xen Diosen' chegaque', da' got Jesucriston' bi chaclenen legaque'. <sup>11</sup>Nezecho tñi'a tgüiz bene' nac b̄oxz blao che bene' Israel gualaž checho ca' chesote' beyixe' na' chjasesane' xchemba' lo' yodao' gana' nzi' Latje ga Zoa Dios cont chñabde'ne' yezi'xene' xtoła' yogo'lol gague'.

Nach yezica'chle b̄oxz ca' chosozeye' cuerp che beyixe' ca' cho'a yežen'.

<sup>12</sup>Na' ca' ca'le goc che Jesúsēn' dan' gosote'ne' cho'a ciuda Jerusalēnna' cate' bnezjw cuine' cont beque'e xtoła'chon' len xchene' dan' blaljen'.

<sup>13</sup>Da'nān' cheyała' šejnilaže'cho Jesúsēn' na' cuejyichjcho costumbr gol ca', la'czla' yesegue'e bene' chio' da' choncho ca'. <sup>14</sup>Gate'tez zoacho lo yežlio nga da' te chen, perw chbezcho šjayzoalencho Diosen' lo ciuda da' bi te chen. <sup>15</sup>Da' ba beca'a Jesucriston' xtoła'chon' cheyała' güe'cho yela' choxcen che Diosen'

yešlale mbancho, gonxenchone' len xtiža'chon'. Lēnna' da' chaclaže' Diosen' güe'chone'. <sup>16</sup>Na' cheyała' soacho goncho da' güen na' cheyała' gwnežjwcho con gaca'te da' saque' gwnežjwcho gaclencho bene' bi de chegaque', le chazlaže' Diosen' cate' chonxenchone' choncho ca'.

<sup>17</sup>Le gwzenag che bene' chososed cheselo'ede' le'e xtiža' Diosen' na' le güe' latje yesene' naquen' gonle, le chosogüia chesene'e le'e cont chesaclene' le'e len yichjlažda'olen', na' legaque' cheyała' yosyodie' cuent lao Diosen' še naquen' ba gosone'. Le gwzenag chegaque' cont yesyebede' na' cont da' chesone' bi gaquen to da' zdebe, le še gonle güedenag len legaque', bibi da' güen chga'an chele še ca'.

<sup>18</sup>Le nab cont gaclen Diosen' neto'. Nezetō' chonto' can' chazlaže' Diosen' na' chaclaže'to' gonto' con da' naquen' güen. <sup>19</sup>Na' leca chata'yoeda' le'e yol güižle Diosen' nable yob gac yidcha' gan' zoalen'.

### Chñabe' gaclen Diosen' legaque'

<sup>20</sup>Na' na'a zoa Diosen' chone' cont zoa chbezcho binlo len xbab da' yo'o lo' yichjlažda'ochon'. Len' bechis bosbane' Xancho Jesucriston' ladjo bene' guat, le da' blalj xchēnen' le'e yag cruzen' gwzolao chac da' cobe da' gwna Diosen' gone' gaclene' bene' yesejnilaže'ne'; na' gague da' te che dan' gwne' gonen'. Na' da' nži'ilaže' Xancho Jesucriston' chio', zaca'lebde' ca to bene' güeye' xila' bene' chon da' güen juisyw len be che' ca'. <sup>21</sup>Na' chñabda' Diosen' gaclene' le'e bite'tez da' chyažjele cont soale gonle yogo'te da' güen

can' chazlažen', na' gone' cont gac  
yichjlažda'ochon' cayanen' chaclaže'  
lagüe da' nombia'cho Jesucriston'.  
Le gonxen Jesucriston' toli tocanē.  
Na' ca' gonšcaczcho.

<sup>22</sup>Beñe' migw, chñabšca' bi  
gaquele zed da' ba bzoja' le'e  
chneyoeda' le'e nga, le bitec naquen  
da' tone. <sup>23</sup>Na' chzenda' le'e beñe'  
migw checho Timoteon' ba bechoje'  
ližyan' na' chbeza'ne' nga. Na' še yob

yele'e nach chi'ane' cate' yedena'a  
le'e.

<sup>24</sup>Ca nac neda', chguapa' tiox  
beñe' blao ca' chosozejni'ide' le'e na'  
chosogüia cheseñe'e le'e, na' lecze  
chguapa' tiox yogo' nochle beñe'  
chesejnilaže' Diosen'. Beñe' lježcho  
ca' za'ac Italia lecze chosoguape' le'e  
tiox.

<sup>25</sup>Diosen' gaclenšque' le'e. Da'  
na'zen' chzoja'.

# CART DAN' BZOJ SANTIAGO

---

Santiago'n chguape' tiox  
bene' ca' zjanaslas zan yež

**1** Neda' Santiago naca' bene'  
güen žin che Diosen' na' che  
Xancho Jesucriston'. Chguapa'  
le'e tiox, le'e nacle šižinw cue'  
xi'in diaža che da' Israel, le'e  
chejnilaže'le Jesucriston' na'  
naslasle yežlion'.

Nac nezecho can' che'ne  
Diosen' goncho

<sup>2</sup>Bene' migw, cheyała'  
yebechgüecho cate' chac bite'teze  
da' chac checho. <sup>3</sup>Cate' chac bi da'  
chac checho chonen chio' prueba  
še gonchachlaže'cho šejnilaže'cho  
Diosen'. Na' nezecho cate'  
chonchachlaže'cho chejnilaže'chone',  
chaclenen chio' cont gapchcho  
yela' chxenlaže' len bite'teze da'  
chac checho. <sup>4</sup>Na' da'nan' cheyała'  
gaple yela' chxenlaže' bite'teze  
dan' chac chele na' gonchachlaže'le  
šejnilaže'le Diosen' cont gacle can'  
chaclaže' le'.

<sup>5</sup>Note'tezcho cate' bi nezecho  
naquen' chaclaže' Diosen' goncho,  
cheyała' nabechone' gwzejni'iden'  
chio', na' gwzejni'iczeden'. Le  
chebede' chaclene' chio', na' bitw

chdile' chio' cate' chnabechone'  
gaclene' chio'. <sup>6</sup>Perw cate'  
chnabechone' gwzejni'ide' chio',  
cheyała' šejle'cho chzenagcze'  
chechon' na' bitw gacžejlaže'cho.  
Bena' chacžejlaže' še chzenag  
Diosen' che', zaca'lebde' ca nisdao'  
dan' chas chata' cate' chechj be'  
lagüen' na' chjatan' nile na'le.  
<sup>7</sup>Ben' chacžejlaže' še chzenag  
Diosen' che', bitw cheyała' soe' lez  
gwnežjw Diosen' le' bite'teze da'  
chnabe'. <sup>8</sup>Na' ben' chon ca' bitw  
nezde' bi xbab chone', con šayichj  
šayen chaque' len bite'teze dan'  
chonen'.

<sup>9</sup>Na' bene' migw, le'e  
chejnilaže'le Diosen', še nole  
nacle bene' yaše', le soa mbalaz,  
le nacle bene' zaque' len Diosen'.  
<sup>10</sup>Na' bene' migw, še nole nacle  
bene' gwni'a, le soa mbalaz dan'  
ba chacbe'ele lao Diosen' bitw  
zaca'chle clal ca yezica'chle bene';  
na' yob te che yela' gwni'an' can'  
chde che yej ca' zjaze yixe'. <sup>11</sup>Cate'  
chna'chgua gwbižen' chesecquad  
yixe' ca', na' cheseyinj laga' che  
yejen' na' bich chosolo'en xdan.  
Can' chac len yej ca', lecze can' gac  
len bene' gwni'a ca', yeyol yenite'  
lao xšinen'.

**Cheyała' soateze soacho šejnilaže'cho Jesucriston' bite'teze dan' chac checho**

<sup>12</sup>Še chyo chchejlaže'cho len da' chac checho na' chonchachlaže'cho chejnilaže'cho Diosen', nachen' leca mbalaz zoacho. Na' cate' te dan' chyi chzaca'chon', Diosen' gone' cont bancho len le' toli tocane can' gwne' ban yogo'cho chaquechone'. <sup>13</sup>Na' note'tezcho cate' žan goncho da' malen', bitw gac nacho Dios nan' chgo'oyele' chio' goncho da' malen', le Diosen' bitw chgo'oyele' bene' yesone' da' mal. Lecze ca' le', bitw bi de da' chgo'oyela' le' cont gone' da' malen'. <sup>14</sup>Yela' chzelaže' checho dan' yo'o lo' yichjlažda'ocho chonen cont chzelaže'cho choncho da' mal. <sup>15</sup>Na' še ba choncho can' ža yela' chzelaže' dan' yo'o lo' yichjlažda'ochon' na' zoacho choncho da' malen', nach gwžin ža cate' cuejyichj Diosen' chio' na' bitw šjayzoacho len le'.

<sup>16</sup>Bene' migw, bitw siye' cuinle gonle xbab Dios nan' chgo'oyele' le'e cont gonle da' malen'. <sup>17</sup>Dios ben' zoa yaba, le'na' chsele' da' güen da' chac checho na' da' de checho. Xacho Dios ben' ben gwbiž, bio' na' beljw ca' cont chososenin' len chio', chone' cont gac güen checho, na' bitw chše'e ca chone' len chio', bia'cze zoacze' chone' güen. <sup>18</sup>Gwyazlaže' Diosen' bocobe' yichjlažda'ochon' cate' gwyejle'cho che diža' li chen'. Na' ba bocobe' yichjlažda'ochon' cont žialaocho len bene' nechw ca' chesejnilaže'ne'. Na' da' ba bocobe' yichjlažda'o' chio', nezecho za' gone' ca' len bene' zan.

**Can' goncho cont yebe Diosen' chio'**

<sup>19</sup>Bene' migw, nezele cheyała' yebecho gwzenagcho che diža'

güen, na' cheyała' goncho xbab cate' za' necho, na' neca la' ža'atecho. <sup>20</sup>Cate' chža'acho, bitw chac goncho güen can' chaclaže' Diosen' goncho. <sup>21</sup>Da'nan' cheyała' cuejyichjcho yogo'lol da' xinjen' ba benchon' na' yogo'lol da' chgue'e Diosen' da' gwcha'o gwxenen lo' yichjlažda'ocho cate' bina' šejnilaže'chone'. Cheyała' gwzexjw yichjcho na' gwzenagcho diža' li che Diosen' dan' ba yo'o lo' yichjlažda'ochon', cont gata' yela' mban checho toli tocane.

<sup>22</sup>Na' cheyała' goncho dan' ža diža' li che Diosen' goncho, gague con yenezcho can' žanna'. Le še con chenecho can' žanna' na' bi chonchon, chziye'ze cuincho še ca'. <sup>23</sup>Ben' chene diža' li che Diosen' na' bi chone' can' žanna', zaca'lebbe' ca to bene' chna' cho'alagüen lo' spejw, <sup>24</sup>le con chne'e can' nac cho'alagüen na' cate' ba beyož gwne'en la' cheyanlažtie' can' naquenna'. <sup>25</sup>Perw bene' zoacze' chzenague' xtiža' Diosen' do yichj do laže' na' chone' can' žanna' sin cbi yeyanlažen', benan' soe' mbalaz, le xtiža' Diosen' chaclenen le' bite'tez da' chone'.

<sup>26</sup>Note'tezcho še choncho xbab choncho can' chazlaže' Diosen', perw bi chnabia' cuincho cont bi necho diža' mal, chziye'cze cuincho še ca'. Le še xtiža'chon' bi naquen güen lao Diosen', bitw chebede' bite'tez dan' choncho še ca'. <sup>27</sup>Še goncho can' chebe Xacho Diosen', gaclencho no'ole güezeb ca' na' bi' güezeb ca' še bi dan' cheseyažjde', na' cuejyichjcho bich goncho da' xinj dan' cheson bene' ca' bi zjanombia' Diosen'.

**Toze can' cheyała' goncho  
len yogo' bene'**

**2** Bene' migw, Xancho Jesucriston' naque' la'zelagüe bene' zaca', na' še chejnilaže'chone', toze can' cheyała' goncho len note'teze bene', bitw nacho balze bene' gonxenchguachone' na' yebałe' gonechone' nacteze. <sup>2</sup>Še yesela' chope bene' gan' chdop chžagcho chonxencho Jesucriston', na' toe' naque' bene' gwni'a na' nyaze' lache' šagüe' lache' xdan, na' ngo'o xbenen' to niy de oro, na' ben' yeto naque' bene' yaše' na' nyaze' lache' de'exo', toze can' cheyała' goncho len chope'. <sup>3</sup>Bitw naquen güen še gonxencho bene' gwni'a na'ze na' ye'chone': "Gwche'edo' lo yag siy nga ga nac binlo", na' ye'cho bene' yaše'na': "Gwzechateze do dan' na'le", o še ye'chone': "Gwche'etездo' lo yo". <sup>4</sup>Bitw naquen güen lao Diosen' še cuinzcho choglaochon nacho noen' zaque' na' noen' bi zaca'. Xbab chechon' naquen da' mal še goncho ca'.

<sup>5</sup>Bene' migw, Diosen' ba gwleje' zan bene' yaše' zjanaque' xi'ine' na' chesejnilaže'chgüe' le'. Na' yesenite' mbalaz cate' yesyežine' gan' zoen' chnabi'e, can' gwna Diosen' gac che note'teze chio' chaquecho le'. <sup>6</sup>Perw na' chonle bene' yaše' ca' ca bene' bibi zjazaca'. Na' bene' gwni'a ca' chongaclene' ca bene' zjazaca'chgua; len legaquen' chosoči chososaque' le'e na' cheseche'xoxje' le'e lao justis ca'. <sup>7</sup>Lecze legaquen' chosožie' yela' ya' che Jesucriston' ben' naccho txen, ben' naque' bene' zaca'.

<sup>8</sup>Ley dan' nac da' žialao lao yogo' da' ca' nyela' le'e Xtiža' Diosen' žan: "Le gaque ljež benačhle ca

chaque cuinle." Še da' licze chonle can' žanna' choncze güen. <sup>9</sup>Perw ley che Diosen' chchoglaon chele nape doła' še chonxenle bal bene' na' yebałe' chongaclene' ca bene' bibi zaca'. <sup>10</sup>Can' naquen, note'teze bene' zoe' chone' dołol can' ža leyna', perw na' še ba gwchoe' to da' dao', len doxen leyna' chape' doła' še ca'. <sup>11</sup>Diosen' ben' gwna: "Bitw gata'lenle no'ole bi nac no'ol chele o bene' byo bi nac bene' chele", leezen' gwne': "Bi gotle bene'". Na' la'czla' bitw chata'lencho no'ole bi nac no'ol checho o bene' byo bi nac bene' checho, še ba naccho bene' güet bene', bia'cze napcho doła' len leyna'. <sup>12</sup>Xtiža' Diosen' chaclenen chio' cont bi gwzenagcho che da' malen'. Na' cheyała' güe'cho diža' güen na' soacho goncho bichle can' žanna', le Diosen' gone' da' saca'zi'cho še bi choncho can' žanna'. <sup>13</sup>Diosen' gwnežjwchgüe' da' saca'zi' bene' ca' bi chesyeyaše' chesyezi'ilaže'de' ljež benače'. Perw bene' ca' chesyeyaše' chesyezi'ilaže'de' ljež benače', Diosen' yeyaše' yeži'ilaže'de' legaque'.

**Bitwbi zejen še con žacho  
chejnilaže'cho Jesucriston'**

<sup>14</sup>Bene' migw, še to bene' že' chejnilaže' Jesucriston' perw bi chone' da' nac güen, bitwbi zejen že' ca'. Bitw chaclenen le' cont gata' yela' mban che' toli tocane še con žaze' ca'. <sup>15</sup>Bal bene' lježcho bene' chesejnilaže' Jesucriston' bi de da' yese'ej yesagüe' na' bi de xałana'gaque'. <sup>16</sup>Na' še bitw gaclenchone' len dan' chesyayažde', še con ye'chone': "Le šjaya'ac to šagüe' to güen na' Diosen'



gaclene' le'e cont želele dan' chyažjelen'", bitwbi zejen dan' con nacho ca'. <sup>17</sup>Da'nan', še con žacho chejnilaže'cho Jesucriston' perw bitw choncho da' nac da' güen, bitwczę bi zejen dan' žacho chejnilaže'chonen'.

<sup>18</sup>Nita' bene' chesene' guac yesejnilaže' Jesucriston' la ca yesone' da' nac da' güen. Na' lecze nita' bene' chesene' še chejnilaže'cho Jesucriston' cheyała' goncho da' nac güen. Na' žia' le'e, še nacho chejnilaže'cho Jesucriston' perw bitw choncho da' güen, bitw nacbia' še chejnilaže'chone'. Perw še da' li chejnilaže'chone' nach soacho goncho da' güen na' yesacbe'e bene' le chejnilaže'chonen'.

<sup>19</sup>Chejle'cho toze Diosen' zaque' gonxenchone', na' ca'czen' cheyała' šejle'cho. Perw gague da' ca'zen' cheyała' goncho. Da' xigüe' ca' lecze chesejlen' toze Diosen' naque' bene' zaca' na' chesexizen chesežeben.

<sup>20</sup>Chnecho diža' da' bi zejen še con žacho chejnilaže'cho Jesucriston' na' bitw choncho da' güenna', le bi gaclenen chio' še con žazcho chejnilaže'chone'. <sup>21</sup>Da' xoxxta'ocho Abrahanna' blo'e le gwejnilaže' Diosen' dan' bzenague' che Diosen'. Da'nan' bzande' xi'ine' Isaaquen' gote'be' cont gonxene' Diosen'. Na' dan' bzenague' che Diosen', da'nan' Diosen' gwne' che' le naque' bene' güen len le'. <sup>22</sup>Na' nezecho can' ben da' Abrahanna', gague con gwejnilaže'ze Diosen', san lecze bzenague' che'. Na' dan' bene' ca' blo'e le gwejnilaže' Diosen'.

<sup>23</sup>Da'nan' goc can' nyoj Xtiža' Diosen' che', žan: "Abraham gwejnilaže'

Diosen' na' da'nan' Diosen' gwne' naque' bene' güen len le'." Na' lecze nyojen che Abrahanna' goque' bene' xmiġw Dios.

<sup>24</sup>Can' naquen, gague dan' žacho chejnilaže'cho Dios nan' že' naccho bene' güen len le', san dan' chzenagcho che', da'nan' že' naccho bene' güen len le'. <sup>25</sup>Na' da' Rahab goque' no'ole zle' no'ol con gwej len note'teze bene' byo, perw bzenague' che Diosen' cate' blebe' bene' ca' chope jasegiia jasene'e laže'na'. Na' blo'ede' legaque' yetole nez ga jaya'aque' cont bi jasyexen soldadw che rey legaque'. Na' dan' goclene' bene' ca', blo'e gwejnilaže' Diosen'. Na' gwna Diosen' naque' bene' güen len le'. <sup>26</sup>Quinga naquen: Še to bene' bich nye'e biš grasyw, nacbia' naque' bene' guat. Ca'czen' naquen, še bitw choncho da' güen nacbia' bitw chejnilaže'cho Diosen' la'czla' žacho chejnilaže'chone'.

### Choncho da' xinj len xtiža'cho

**3** Bene' migw, nezecho neto' chsed chlo'eto' bene' yoble xtiža' Diosen' saca'zi'chto' še bi gonto' can' žanna'. Da'nan' žia' le'e, gague la' si'te lo na'le gwsed gwlo'ele bene' yoble xtiža' Diosen'. <sup>2</sup>Zan ni'a yogo'cho choncho da' xinj. Perw še to bene' bitw chone' da' xinj len xtiže'na', nacchgüe' bene' güen na' gwzoeczde' nabile' doxen cuerp chen' še ca'. <sup>3</sup>Caten' chgo'ocho freno cho'a cabayw ca' cont yosozenagba' checho, na' šja'acba' con gate'teze chaclaže'cho šejlenchoba'. <sup>4</sup>Na' lecze bene' ca' chososa' barcw xen ca' chosočine' yag da'oze dan' chosose'eden' cont chejen

con gate'teze chesende', la'czla' še chžiga' to be' gual legaquen'.  
 5Ca'czen' naquen len lože'chon'.  
 Toze da' dao' rizen' naquen  
 lao cuerp chechon', perw chac  
 chnelenchon diža' da' zjazaca'. Na'  
 ca nac to yi' dao' riz, guac gwzeyen  
 to ya'adao' xen, ca'czen' naquen  
 len lože'chon' cate' chnelenchon  
 diža' mal. 6Lože'chon' naquen to  
 da' chnabia' chonchguan da' xinj  
 juisyw lao doxen cuerp chechon'.  
 Lože'chon' naquen ca to yi' be' da'  
 chla'an chca'an nile na'le chzeyen  
 bite'teze da' de, le še choe'cho diža'  
 malen' chya'la'ch yogo'lo'lte da' xinj  
 dan' chonchon', na' chonen cont  
 zoacho chonchguacho da' xinj  
 yešlale mbancho. Na' che gwxiyen'  
 chzenagcho caten' choe'cho diža'  
 mal ca'. 7Chac chnabia'cho yogo'te  
 beyixe', be žia tap ni'a na', be žia  
 xil, be chda nxobe le'e, na' be  
 ca' že' lo' nis. Ba gwnita' bene'  
 gosenabi'eba'. 8Perw ne to chio'  
 bitw soecho lože'chon' cont bi  
 güe'lenchon diža' mal. Con zoacho  
 choe'cho diža' malen', na' diža' mal  
 dan' choe'chon' zaca'leben ca venen  
 che to be' znia. 9Len xtiža'chon'  
 chonxencho Dios ben' naque' Xacho.  
 Na' lecze len xtiža'chon' chžiacho  
 yela' ya' che ljež benačcho bene'  
 ca' ben Diosen' can' nac le'. 10Na'  
 cho'acho na' chchoj diža' šagüe'  
 cate' chonxencho Diosen' na' lecze  
 chchoj diža' mal cate' chžiacho yela'  
 ya' che ljež benačcho. Bene' migw,  
 bitw choncho ca cheya'la' goncho.  
 11Nezecho ga chal nis bitw žia nis  
 sia na' nis zbapj toz bej. 12Na' lecze  
 ca' bene' migw, nezecho to yag  
 yixgüigw bitw chbian frut dan' nzi'

aceutuna, na' neca yag uvas chbian  
 yixgüigw. Na' lecze ca' ga chal nis,  
 bitw chchoj nis sia to bej ga žia nis  
 zbapj.

**Can' goncho še Diosen' ba  
 bene' chio' yela' sina' čhen'**

13Še note'tezle žale nacle bene'  
 sina' na' chejni'ile xtiža' Diosen',  
 cheya'la' gonle yogo'lo' can' chazlaže'  
 Diosen'. Cheya'la' gonle da' güen  
 sin cbi gonxen cuinle cont nacbia'  
 nacle bene' sina'. 14Perw še chgue'e  
 lježle na' chzelaže'le gacchle  
 bene' blaoch ca bene' lježle, bitw  
 cheya'la' nale nacle bene' sina', le  
 con chonlaže'len' še ca'. 15Na' še  
 chgue'e lježle na' chzelaže'le gacle  
 bene' blaoch ca bene' lježle, bitw  
 nacle bene' sina', san xbab chelen'  
 zan' che Satanás dan' chnabia' da'  
 xigüe' ca', na' con chonle da' xinjen'  
 can' ža lažda'olen' na' can' cheson  
 bene' ca' bi zjanombia' Diosen'. 16Še  
 chgue'e lježcho na' chzelaže'cho  
 gaccho bene' blaoch ca legaque',  
 bitw zoacho binlo len legaque' še ca',  
 na' choncho yogo'te da' xinj. 17Cate'  
 Diosen' chone' chio' yela' sina' čhen',  
 chaclaže'cho goncho yogo' da' nac  
 da' güen. Chaclaže'cho soacho binlo  
 len lježcho na' naccho bene' xenlaže'  
 na' chzexjw yichjcho cont chzenag  
 che lježcho. Na' lecze cheyaše'  
 cheži'ilaže' lježcho na' choncho da'  
 güen len legaque', na' toz ca choncho  
 len note'tez bene'. Na' bite'tez da'  
 choncho, chonchon do laže'cho.  
 18Nach še chebecho yesezoa yesebez  
 bene' binlo na' chaclencho bene'  
 yezica'chle cont yesezoa yesebeze'  
 binlo, na' chaclenen cont yeson bene'  
 da' güen.

**Bitw gac goncho can' cheson  
bene' bi zjanombia' Diosen'**

**4** Chdile chšašlen lježle, na' chonle ca' dan' yo'o nyaz da' malen' yichjlažda'olen' na' chnabian' le'e cont chonle con ca žan chele.

<sup>2</sup>Chzelaže'chguale bi da' gata' chele na' chdile chšašlen lježle na' chaclaže'tele gotle bene' cont gata' chele dan' chzelaže'len'. Perw bitw gata' dan' che'nelen' lagüete chonle da' xinj na' bi chnabele Diosen' gone' cont gata' dan' chyažjelen'.

<sup>3</sup>Na' cate' chnabele Diosen' gone' cont gata' bi dan' gata' chele, bitw chonen', le con che'nele gata' dan' chzelaže'le lo' lažda'olen' cont gonle con nacteze žan chele. <sup>4</sup>Na' da' chzenagle che dan' ža xbab chelen' na' chonle can' chzelažen'na', chonle txen len bene' ca' bi zjanombia' Diosen', na' chonle contr Diosen'. Na' note'tezcho še chaclaže'cho goncho txen len bene' mal ca', choncho contr Diosen' na' bich chaquechone' ca cheyala'. Zaca'lebcho ca to no'ole nzoa xto, no'ole ben' bich chacde' bene' che'. <sup>5</sup>Chonljale xbab Xtiža' Diosen' bitw bi zacan' gan' nyojen žan: "Spiritw che Diosen' dan' zoan lo' lažda'ochon' chzelaže'chguan gwzenagcho che toz Diosen'."

<sup>6</sup>Diosen' chaclenchgüe' chio' cont chzenagcho che toz le'. Da'nan' nyoj Xtiža' Diosen' žan: "Diosen' chone' contr bene' ca' chesonxen cuingaque', perw chaclene' bene' ca' chesacbe'ede' bi chosozenague' che' ca cheyala'." <sup>7</sup>Da'nan' cheyala' gon cuincho lo na' Diosen' na' gwyo gwchejlaže'cho bi gwzenagcho che Satanásen'. Še goncho ca',

gwcuseczen ca'ale. <sup>8</sup>Le soa le yol güiž Diosen', nach soe' gaclene' le'e. Cheyala' cuejyichjle da' xinj da' chonle. Na' še chonle xbab guac gonxencho Diosen' na' gontezcho can' ža lažda'ochon', celen' chonle xbaben' še ca', na' cheyala' güe'le latje yeyon Diosen' yichjlažda'olen' xilaže'. <sup>9</sup>Bi cheyala' yebele, san cheyala' yegüine'le neče da' xinjen' ba benlen' na' yeto'ele chen. <sup>10</sup>Cheyala' gwzexjw yichjle lao Xancho Diosen', nach Diosen' gone' cont gacxenle.

**Bi cheyala' nacho che  
lježcho nape' doła'**

<sup>11</sup>Bene' migw, bi cheyala' nelaocho che lježcho. Ben' chnelagüe' che lježe' o chosbaguede' lježe', benan' chne' che ley che Diosen' na' chzoe' leyna' ca'ale. Na' nezecho ben' chon ca' bi chzenague' che leyna'. Na' dan' chon cuine' ca bene' zaque' cont že' che bene' lježe' nape' doła', chone' ley che Diosen' ca to da' bibi zaca'. <sup>12</sup>Toz Dios nan' gwduxjue' leyna', na' toz le'na' zaque' choglagüe' che to tocho še napcho doła'. Na' toz le' zaque' gone' cont bi šjaya'ac bene' lo yi' gabilen', na' lecze zaque' cont yesele' bene' lo yi' gabilen'. Perw chio' bitw zaca'cho nacho che bene' lježcho zjanape' doła'.

**Bitw nezecho bin' gac gwxe güižj**

<sup>13</sup>Na' le gwzenag da' nga: Balle chchogbia'len šejle to ga šejle gonle negosyw cont gonle gan. Na' chbejle to ža cate' šejle na' chchogbia'len yega'anle na' tгүйž, <sup>14</sup>neca chacbe'ele bi nezecho bin' gac

checho o nac goncho gwxe güižj.  
 Yela' mban chechon' zaca'leben ca  
 to bejw, le bejon' šložze chle'echon  
 na' cheyasen. <sup>15</sup>Cheyała' nacho: "Še  
 Xancho Diosen' gone' latje bancho,  
 na' goncho to da' goncho." <sup>16</sup>Perw  
 da' xinjen' choncho še chonxen  
 cuincho chžiacho bia' naquen'  
 goncho sin cbi nabecho Diosen'.  
<sup>17</sup>Na' še nezecho cheyała' goncho da'  
 nac güen na' bi chonchon, napcho  
 doła' lao Diosen'.

**Da' malchgua gac che bene' gwni'a  
 ca' bene' bi chosozenag che Diosen'**

**5** Na' ca nac le'e bene' gwni'a,  
 le'e bi chzenagle che Diosen',  
 le soayaše' na' le cuežyaše', le leca  
 za' saca'zi'le. <sup>2</sup>Lao Diosen' dan' de  
 chele naquen ca to da' ba chbiayi',  
 na' lache' šagüe' chelen' naquen  
 ca to da' ba chl'e'e belziła'. <sup>3</sup>Na'  
 mechw chelen' dan' nac de oro na'  
 de plata, len Diosen' naquen ca to  
 da' ba chzen xche'en. Da'nan' žin  
 ža žaglaochgualo lo yi' gabilen'.  
 Ba gwche' yichjle tloaze btoble da'  
 scha'o xmechwen', la'czła' ba zoa  
 gon' Diosen' da' saca'zi'le. <sup>4</sup>Cheyała'  
 gonle xbab can' benle len bene'  
 güen žin chele ca', bene' yaše' ca'  
 besyelap coseš chelen'. Benlele  
 legaque' dan' bitw gwduxjwlene'  
 ca cheyała'. Na' dan' bi bnežjwle  
 laxjwgaquen' ca cheyała', chlo'en  
 nacle bene' güen da' xinj. Diosen'  
 chzenague' che bene' güen žin ca'  
 dan' chesyegüine'de', Dios ben' nape  
 la'zelagüe yela' guac xen. <sup>5</sup>Zoatezle  
 che'ej chagwšagüe'le na' chonditjele  
 dan' de chele chonle con ca žan  
 chele, na' bi chache'ele ba zoa gon'  
 Diosen' da' saca'zi'le. Na' lagüe dan'

chonle ca', zaca'leble ca to beyixe'  
 ben' chgüe'ej chguagwšagüe'cho  
 cont ba chañeba' cate' žin ža  
 gotchoba'. <sup>6</sup>Na' gan' chi'le chonle  
 yela' justisen', ba gwchoglaolen  
 yesote' bene' goson da' güen, bene'  
 bibi gosonde' le'e.

**Cuezcho batcan' yid Xancho  
 Jesucriston' da' yoble  
 na' yoł güižcho Dios**

<sup>7</sup>Ca nac le'e bene' migw, le gape  
 yela' chxenlaže' len dan' chyi  
 chzaca'le, le ba zoa yid Xancho  
 Jesucriston' da' yoble. Bene' ca'  
 chesaz, chesenite' chesebeze'  
 cosešen', le cosešen' naquen da'  
 zaca'. Na' chesape' yela' chxenlaže'  
 chesebeze' chde tiemp yejon', le  
 cate' chbeze yejon', cana'chen'  
 chosyotobe' cosešen'. <sup>8</sup>Da'nan'  
 bite'teze dan' chyi chzaca'le,  
 cheyała' gaple yela' chxenlaže'  
 na' gonchachlaže'le šejnilaže'le  
 Xancho Jesucriston', le ba zoa  
 yide' da' yoble. <sup>9</sup>Bene' migw, bitw  
 yosbaga' lježle še bin' chac chele.  
 Še bin' yosbaga' lježle, ba zoa yid  
 Xanchon' da' yoble na' choglagüen'  
 chele naple doła'. <sup>10</sup>Le gon xbab che  
 da' bene' ca' goso'e xtiža' Xancho  
 Diosen' cani'. Leca bosochi bososaca'  
 bene' legaque', perw bia'cze bosoyo  
 bosochije', can' cheyała' gonle. <sup>11</sup>Da'  
 li mbalaz bene' ca' gwnita'teze'  
 gosonchachlaže' gosejnilaže' Diosen'  
 la'czła' besežaglagüe'. Na' ba benele  
 xtiža' da' Job can' benchachlaže'  
 gweyjnilaže' Diosen', la'czła' da' zan  
 da' gwdi gwxaque'. Perw na' cate'  
 gwde dan' gwdi gwxaquen', Diosen'  
 bene' cont gwzoache' mbalazch clel  
 can' gwzoe' cani'. Can' nac Diosen',

leca chazlaže' chaclene' chio', na'  
leca cheyaše' cheži'ilaže'de' chio'.

<sup>12</sup>Bene' migw, da' naquen da'  
žialao, gwbat gwzoale no co' da'  
baļi che bite'teze. Bitw nale yaban'  
co'on da' baļi choe'le diža' li, neca  
nale yežlio nga co'on da' baļi choe'le  
diža' li, neca bite'tezechle. Cheyaļa'  
güe'cho diža' li da' šejle' bene' cont  
Diosen' bi choglagüen' checho  
saca'zi'cho.

<sup>13</sup>Note'tezcho cate' chac bi  
da' chac checho, cheyaļa' yol  
güižcho Dios. Na' note'tezcho cate'  
zoacho mbalaz, cheyaļa' goļcho  
gonxenchone'. <sup>14</sup>Note'tezcho cate'  
chacšenecho, cheyaļa' gaxcho  
bene' ca' gwlejcho cont chosogüia  
chesene'e chio' chdop chžagcho  
chonxencho Jesucriston'. Na'  
yosotope' yichjcho late' set, na'  
yosoļ güiže' Dios, yesenabe'  
yeyaquecho len yela' guac che  
Xancho Jesucriston' lagüe' da'  
chejniłaze'chone'. <sup>15</sup>Na' chio', cate'  
choļ güižcho Xancho Diosen',  
cheyaļa' šejle'cho le chzenagcze'  
checho cont yeyone' ben' chacšenon',  
na' še ba bene' da' xinj, güezi'xencze

Xancho' che'. <sup>16</sup>Da'nan' cheyaļa'  
xoadola'cho lao bene' lježcho na' yol  
güižcho Dios tocho yetocho cont ca'  
yezoacho güen še bin' chac checho.  
Na' še naccho bene' güen len  
Diosen', Diosen' chzenagcze' checho  
cate' choļ güižchone' na' chone' da'  
zan da' güen dan' chnabechone'  
gone'. <sup>17</sup>Le gon xbab che Elías ben'  
be' xtiža' Diosen' cani'te. Goque'  
benach cayanen' nac chio'. Na' cate'  
boļ güiže' Diosen' do yichj do laže'  
gwñabe' bi gac yejw, na' Diosen'  
bzenague' che' na' bitw goc yejon'  
lao šon iz yogašjo. <sup>18</sup>Na' yetni'a  
cate' boļ güiže' Diosen' gwñabde'ne'  
sele' yejon' da' yoble, nach Diosen'  
gwselen'. Na' goc coseš che bene' ca'  
da' yoble.

<sup>19</sup>Bene' migw, cate' to bene'  
lježcho ba gwlejiychje' dan' nac da'  
li dan' bzejni'i Diosen' chio', cheyaļa'  
gaclenchone' cont yetinjde' xtole'na'.  
<sup>20</sup>Chaclaža' nezele, cate' choncho  
cont note'teze bene' chetinjde'  
xtole'na', chaclenchone' cont chosla  
Diosen' le' lo yi' gabil, le chezi'xene'  
xtole'na' la'czla' še naquen da' zan.  
Da' na'zen' chzoja' na'a.

# CART NECHW DAN' BZOJ POSTLW SAN PEDRO

---

Pedro chzoje' cart nga che bene' ca'  
zjanaslas chesejnilaže' Criston'

**1** Neda' Pedro naca' postlw  
che Jesucriston'. Na' chzoja'  
cart nga che le'e chejnilaže'le  
Jesucriston', le'e naslasle distritw  
ca' gan' nzi' Ponto na' Galacia na'  
Capadocia na' Asia na' Bitinia. Chio'  
chejnilaže'cho Jesucriston' naccho  
ca bene' zito' len yezica'chle bene'  
že' yežlio nga. <sup>2</sup>Con can' bs'i'e  
xnezen' gwlatte, Xacho Diosen'  
gwleje' chio' cont Spiritw chen'  
bocoben yichjlažda'ochon' na'  
gwlo'on chio' lo na' Diosen'. Bene' ca'  
cont chzenagcho che Jesucriston' na'  
cont Jesucriston' zoacze' cheyone'  
lažda'ochon' xilaže' dan' blalj  
xchenen' neche chio' le'e yag cruzen'.  
Chnaba' soacze Diosen' gaclenchgüe'  
le'e na' soacze' gone' cont soa cuezle  
binlochgua len xbab chelen'.

**Zoacho lez šjayzoacho len Diosen'**

<sup>3</sup>Cheyała' gonxencho Diosen'. Le'  
naque' Xa Xancho Jesucriston', na'  
Xancho Jesucriston' lecze chonxene'  
le'. Leca cheyaše' cheži'ilaže'  
Diosen' chio', na' da'nan' bocobe'  
yichjlažda'ochon' na' bene' cont

zoacho lez šjayzoacho len le', le'  
Jesucriston' beyas bebane' ladjo  
bene' guat ca'. <sup>4</sup>Na' Diosen' gone'  
ga gac da' güen checho, to da'  
mbachgua da' bi yenit neca te chen,  
to da' ngo'ošagüe' cont gaquen  
checho cate' yežincho yaban'. <sup>5</sup>Na'  
Diosen' len yela' guac xen chen'  
chcuas chcue'eje' chio' len da' malen'  
lagüe chejnilaže'chone'. Chone' ca'  
šlac bina' žin ža le'echo da' mba da'  
gone' gac checho caten' šjayzoacho  
len le'.

<sup>6</sup>Da'nan' zoachguale mbalaz  
la'czla' chonen byen da' zan da'  
chyi chzaca'le šlož güeje na'a.  
<sup>7</sup>La'czla' da' te che oron', benachen'  
chosozeyen' cont chesyebeje' bi da'  
nchixen da' bibi zaca'. Na' ca'cze  
zaca'lebe dan' choe' Diosen' latje  
chac chele, chaquen cont gwlo'ele  
še da' li chejnilaže'lene' cate' chac  
bi da' mal chele. Na' še soatezle  
šejnilaže'lene', leca zaca'chen clel  
ca no oro. Nach cate' Jesucriston'  
yide' da' yoble Diosen' güe'e diža'  
ne' benle güen na' gone' le'e yela'  
bala'añ xen na' gone' soale txen len  
le' gan' yo'ochgua be'ni'.

<sup>8</sup>Chaquele Jesucriston' la'czla'  
bina' le'elne'. Na' la'czla' bi chle'elne'

na'a, chejnilaže'lene'. Da'nan' zoale mbalaz juisyw. Na' catec mbalaz zoale con bi chac gwzejni'ile bene' cayanen' chebele. <sup>9</sup>Na' da' chejnilaže'le Jesucriston', žin ža šjayzoale len Diosen'.

<sup>10-11</sup>Da' bene' ca' goso'e xtiža' Diosen' cani' gosene' yeyaše' yeži'ilaže' Diosen' chio' zoacho na'a. Spiritw che Criston' gwzoan len legaque' bzejni'in legaque' yid Criston' yežlion' na' saca'zi'e na' yeyoža' gwlo'e Diosen' naque' bene' zaca' juisyw. Da'nan' bososedyane' na' besyeyiljwyože' non' seła' Diosen' gaclene' chio' na' batcan' yide'. <sup>12</sup>Na' Diosen' bzejni'ide' legaque' che da' ca' bosozoje' cont gosenezde' gaquen che chio' zoacho na'a na' gague che cuingaque'. Na' na'a Spiriton' dan' za' gan' zoa Diosen' ba benen' cont gwnita' bene' goseyixjue'ede' le'e diža' güen che Criston', na' diža' güen chen' naquen lebe len dan' bosozoj da' bene' ca' goso'e xtiža' Diosen' cani'. Na' lente angl che Diosen' chesezelaže' yesejni'ide' naquen' chaclen Diosen' chio'.

**Cheyała' gac lažda'ochon' xilaže' len yogo' da' choncho**

<sup>13</sup>Da'nan' cheyała' soale len toze xbab na' gonle con ga zelao saque'le cont gonle can' chazlaže' Diosen'. Cheyała' soale yebele gon Diosen' gacchgua mba chele caten' yid Jesucriston' da' yoble. <sup>14</sup>Na' da' nacle xi'in Dios cheyała' gwzenagle che', na' bich gwzenagle che da' malen' can' gwna lažda'olen' gonle cana' cate' bina' šejni'ile che Diosen'. <sup>15</sup>Dios nan' ba gwleje' chio' naccho xi'ine', na' le' naque'

bene' laždao' xilaže'. Na' con ca nac le' bene' laždao' xilaže', lecze can' cheyała' gaccho bene' laždao' xilaže' len yogo' da' choncho. <sup>16</sup>Le Xtiža' Diosen' nyojen žan: "Cheyała' gacle bene' laždao' xilaže', le neda' Dios naca' bene' laždao' xilaže'."

<sup>17</sup>Chio' choł güižcho Diosen' che'chone': "Xato' Dios". Na' Diosen' chchoglagüen' che to to chio' benačh še nocho napcho doła' ca nac da' choncho, na' toz can' chone' len note'tezcho. Da'nan' cheyała' žebcho goncho da' bi chazlaže' Diosen' šlac zoacho yežlio nga.

<sup>18</sup>Nezecho Diosen' ba bebeje' chio' lo da' ca' bosozejni'i da' xozxta'ocho ca' chio' da' bibi zaca'. Na' nezecho ca nac no mechw de plata o de oro na' bichle da' ca' chesede chen, bi goc yesyebegen chio' lo da' ca' choncho da' bibi zaca'. <sup>19</sup>San byažjen gwseła' Diosen' Criston' blałj xchene' da' zaca'chgua. Na' le' bnežjw cuine' gote' cont bebeje' chio' lo da' ca' bibi zaca'. Na' Criston' zaca'lebe' ca to xila' dao' be bibi yižgüe' da', be bibi naqueba'. Ben' nac ca' gosot bene' Israel gualaž cheton' cont bezi'xen Diosen' xtola'gague'. <sup>20</sup>Za' xe yežlion' Diosen' gwleje' Criston' cont bnežjw cuine' neche xtola'chon'. Na' Diosen' gwsele'ne' nga na'a ba zoa te che yežlion' cont chaclene' chio'. <sup>21</sup>Na' Criston' chone' cont zoacho chejnilaže'cho Diosen'. Na' Dios nan' bosbane' Criston' ladjo bene' guaten' na' blo'e nac Xi'ine' Criston' bene' zaca' juisyw. Nachen' zoacho chejnilaže'cho Diosen' na' zoacho lez gon Diosen' güen len chio'.

<sup>22</sup>Na' da' chaclen Spiritw che Diosen' chio', ba chzenagcho diža'



li che Diosen' na' choncho can' že'. Da'nan' ba beyac lažda'ochon' xilaže', na' da'nan' do laže'cho ba chaquecho yezica'chle bene' chesejnilaže' Jesucriston'. Na' ca'cze cheyała' goncho, cheyała' gague lježcho do yichj do laže'cho, gague gaguechone' de diža'ze. <sup>23</sup>Xaxna' chio' zoacho yežlio nga zjanaque' bene' chesat, perw gague neche da' goljcho len legaque' naccho xi'in Dios, san naccho xi'ine' da' bocobe' yichjlažda'ochon' cate' gweyjele'cho xtižen'. Na' xtižen' zoan toli tocane, gague da' te chen. <sup>24</sup>Chac can' nyojen, žan:

Yogo' benach chesede che' ca chesede che no yixe' dao', na' yogo' da' chebe benachen' yežlio nga da' chesacde' zaca'chgvan, zaca'leben ca yej da' žia yixe'.

Chesebiž yixe' ca' na' chesecvad chesebix yej da' zjažia yixe'.

<sup>25</sup>Perw xtiža' Diosen' zoan toli tocane, gague da' te chen.

Na' xtiže' nan' diža' güen da' ba gwidxjue'eto' len le'e.

**2** Da'nan' cheyała' cuejyichjcho yogo' bite'teze da' xinj da' choncho. Bi gonlaže'cho, bi goncho contze yesaque bene' naccho bene' güen, bi xi'acho bene', bi necho diža' mal che bene'. <sup>2</sup>Na' ca bi' che'eñ dao' žan yesaže'be' xiže'gacbe', can' cheyała' selaže'cho yenecho xtiža' Diosen', le naquen da' güenchgua, na' cate' chzenagchon chaclenen chio' cont choncho can' cheyała' gon chio' ba de yela' mban checho toli tocane. <sup>3</sup>Le ba chacbe'echo na'a Xancho Criston' naque' bene' šagüe.

**Criston' zaca'lebde' ca to yej squin che yo'o**

<sup>4</sup>Cheyała' gwzenagcho che Xancho Jesucriston' ben' chon chio' yela' mban toli tocane. Bene' zan cheseque'ede' le' la'czla' Diosen' gwleje'ne' cont chaclene' chio' na' zaca'chgüe' len Diosen'. Da'nan' Jesucriston' zaca'lebde' ca to yej güen da' gwlej bene' cont gaquen yej squin ližen', perw bene' goson žinna' bi gosazlažen' na' gosebequen' šla'ale. <sup>5</sup>Na' chio' napcho yela' mban da' chejnilaže'cho Jesucriston'. Da'nan' yogo'cho txen zaca'lebcho ca yej ca' da' zjancua' zjangoden' gan' chac yo'o de yejen'. Na' zaca'lebcho ca' liž Diosen' dan' zoe' len chio'. Lecze zaca'lebcho ca bxoz bene' zjanac lo na' Diosen', le naccho lo na' Diosen' na' chaclen Jesucriston' chio' cont zoaczcho chonxencho Diosen' con can' chazlaže'. <sup>6</sup>Na' Xtiža' Diosen' nyojen, žan:

Sela' to bene' ciuda Sión na' zaca'lebde' ca to yej da' zaca' da' gwlej bene' cont gaquen yej squin liže'.

Na' note'teze ben' šejnilaže' le', gwbatech yetinjde' da' gweyjejnilaže'ne'.

<sup>7</sup>Nach len chio' chejnilaže'chone', Jesucriston' naque' leca bene' zaca'. San bene' bi chesejnilaže'ne', nyojczye da' nga chegaque', žan:

Yej da' bi gosaclaže' bene' güen yo'o ca' yosochine', len ba naquen yej squin.

<sup>8</sup>Na' lecze ca' žan:

Zaca'lebde' ca to yej da' chchego' bene' na' ca to yej da' chgo'o ni'e na' chjasebixe'.

Nyojen žan chesečegüe' le bi chosozenague' xtiža' Diosen'; na' Diosen' bžie' bia' yesac čhegaque' ca'.

**Chio' chejnilaže'cho  
Diosen' naccho xi'ine'**

<sup>9</sup>Na' chio', Diosen' ba gwleje' chio' cont chejnilaže'chone'. Na' len Diosen' naccho ca rey na' ca b̄xoz. Gwleje' chio' cont naccho nación čhe', na' nactecho diaža' čhe', le chaclaže' čixjue'echo catec da' güen juisyw chone'. Le'na' bebeje' chio' lo da' malen' bencho na' gwlo'e be'ni' xen čen' lo' yichjlažda'ochon' cont soacho goncho da' güen.

<sup>10</sup>Cana' le'e bi gweyjnilaže'le Diosen' na' bi gocle nación čhe', perw na'a ba nacle nación čhe'. Cana' bina' yeyaše'de' le'e, san na'a Diosen' ba beyaše' beži'ilaže'de' le'e.

**Cheyała' goncho can'  
chazlaže' Diosen'**

<sup>11</sup>Chacda' le'e bene' migw, na' chneyoeda' le'e le gon xbab le yežlio nga bi naquen lažle. Da'nan' bitw gonle bite'teze da' xinj da' žan gonle len cuerp čhelen', le še gonlen, gwžonen soa yichjlažda'olen' binlo len Diosen'. <sup>12</sup>Le soa le gon da' güen cont bene' ca' bi chesejnilaže' Diosen' yesele'ede' da' güen da' chonle, na' la'czla' na'a chesezi'diže' le'e chesene' chonle clele, žin ža yesele'ede' chonle da' güen na' yesonxene' Diosen' cate' žin ža čhogbi'en nac gac čhe to toe'.

<sup>13</sup>Da' chejnilaže'le Xancho Criston', le gwzenag čhe yogo' bene' ba bosozoa benachen' cont yesenabi'e le'e. Le gwzenag čhe rey ben' chnabia' doxen gan' zoachon', <sup>14</sup>na'

lece le gwzenag čhe bene' gwnabia' ca' chsel'a reyen'. Le nac lo na'gaque' yesone' castigw čhe bene' ca' cheson da' xinj na' yesonxene' bene' cheson can' cheyała' yesone'. <sup>15</sup>Diosen' chaclaže' goncho da' güen cont bene' ca' bi chesejni'i čhe', ben' zjančhol yichjlažda'ogaque', bi žel diža' da' yesene' yosocuiše' chio'.

<sup>16</sup>Cheyała' soa cuezcho mbalaz da' bich yo'ocho lo na' gwxiyen', perw bi goncho xbab guacte goncho bi da' xinj. San cheyała' soa cuezcho mbalaz da' yo'ocho lo na' Diosen', na' yo'ocho lo ne'en cont goncho con dan' chazlaže' goncho. <sup>17</sup>Cheyała' gapcho bala'aṅ yogo'lo' bene'. Na' cheyała' gaque bene' lježcho bene' chesonxene' Jesucriston'. Cheyała' žebcho goncho da' bi chazlaže' Diosen'. Na' cheyała' gapcho bene' gwnabia' čhechon' bala'aṅ.

**Criston' byo bčeje' dan'  
gwxaca'zi'ena'**

<sup>18</sup>Le'e chonle žin čhe bene', le gwzenag čhe xan žin čhele da' chaple legaque' bala'aṅ. Gague tloaze gwzenagle čhe xan žin čhelen' še zjanaque' bene' šagüe' bene' yo'o xbab, san lece le gwzenag čhegaque' še zjanaque' bene' znia. <sup>19</sup>Še bibi da' mal nonle na' bia'cze chosoči chososaque' le'e, chebe Diosen' chyo chčejele len da' chesonde' le'e lagüe nezele chaclaže' Diosen' goncho ca'. <sup>20</sup>Perw bibi zacan' še ba benle bi da' xinj na' chyo chčejele cate' chesebaže' le'e. San še chosoči chososaque' le'e cate' chonle da' güen na' chyo chčejele len da' chesonde' le'e, nachle chebe Diosen' le'e. <sup>21</sup>Le

Diosen' gwleje' chio' cont gwyo gwchejcho len bi da' yosoči yososaca' bene' chio', na' Criston' gwxcaca'zi'e neche chio' na' byo bchejde' len da' goc che' cont nezecho ca'czen' cheyała' goncho.

<sup>22</sup>Bibi da' xinj ben Criston', ne to diža' güenlaže' bi be'e. <sup>23</sup>Cate' gosed'i diža' bene' le', bi boži'e dižan' nac ca' len legaque'. Na' cate' bosochi bososaque'ne', bi gwne' yebi'e mal len legaque'. Ben cuine' lo na' Diosen', le gwneзде' Diosen' chogbi'en yesezaca'zi' bene' ca' con can' cheyała' gac chegaque'. <sup>24</sup>Criston' bnežjw cuine' neche xtoła'chon' cate' gosote'ne' le'e yag cruzen'. Da'nan' cheyała' cuejyichjcho da' xinjen' choncho na' soacho goncho da' güen.

Gwxaca'zi'e cont bozoe' chio' binlo.

<sup>25</sup>Goccho ca xila' be gosacžeje, perw na'a ba naccho ca be yo'o lo na' xamba' cont chyoeba', le Criston' chgüia chne'e chio' na' yo'o lo ne'e lažda'ochon' chcuas chcue'jen' len da' malen'.

**Can' cheyała' yeson bene' zjanšagna'**

**3** Na' lecze le'e no'ole nšagna'le, to tole cheyała' gwzenagle che bene' chele. Bale' bina' yosozenague' xtiža' Diosen', na' še gwzenagle chegaque', yesacbe'ede' xtiža' Diosen' naquen da' güen la'czła' bibi ye'lnē'. Na' yosozenague' che Diosen' <sup>2</sup>cate' yesele'ede' chaple legaque' bala'an' na' chi' yichjle soa cuezle cont lažda'olen' gaquen xilaže' len Diosen'. <sup>3</sup>Na' le'e no'ole, bi nacho naquen da' žialao gon cuinle xdan yopa'a no yichjle, gwguala' yenle no bga', gwguala'le no ret, co'ole

no niy de oro, na' chazle lache' šagüe'. <sup>4</sup>Dan' nac da' žialao, gac lažda'olen' güen, la'czła' nono chle'e len. Zaca'chguan len Diosen' gaccho bene' nexjwlaže' na' bene' xenlaže', le bi te che yichjlažda'ochon'.

<sup>5</sup>Gosenita' no'ole cani' no'olen' gosejnilaže' Diosen' na' goson cuine' lo ne'e. Legaque' gosaque' bene' nexjwlaže' na' bene' xenlaže' na' bosozexjwyichje' cont gosone' bin' gwna bene' che to toe'. <sup>6</sup>Da' Sara, no'ol che da' xozxta'oto' Abrahanna', gwzoe' bzenague' che bene' che' na' gože'ne': "Xana". Na' le'e še soatezle gonle da' güen na' bi žeble, nach yesena bene' nacle xi'in da' Saran' lagüe chonle can' benen'.

<sup>7</sup>Na' le'e bene' byo nšagna'le, lecze cheyała' gacle bene' šagüe' len no'ol chele na' gaplene' bala'an', le bi zjanaque' bene' gual can' nac chio' bene' byo. Na' lecze can' ba nži'ilaže' Diosen' chio' na' none' chio' yela' mban toli' tocane, ca'tezeczen' ba none' len legaque'. Nachen' cheyała' goncho güen len legaque' cont bibi gwžon gwzenag Diosen' checho cate' choj güižchone'.

**Can' goncho še yosoči yososaca' bene' chio' la'czła' choncho da' güen**

<sup>8</sup>Yogo'cho cheyała' goncho toze xbab na' cheyała' yeyaše'cho lo' lažda'ochon' še bi da' chac che bene' lježcho. Cheyała' gague lježcho do laže'cho ca bene' biše' lježcho, na' cheyała' gaccho bene' šagüe' len bene' lježcho na' bi gon cuincho bene' xen. <sup>9</sup>Še bi da' mal cheson bene' len chio', bi nacho lecze da' mal yebi'icho len legaque'. Na' še bene' chesezi'diže' chio', bitw

yoži'icho dižan' nac ca' len legaque',  
 san nabcho gac da' güen chegaque'.  
 Le Diosen' ba gwleje' chio' cont  
 goncho ca' na' cont gone' latje  
 soacho mbalaz. <sup>10</sup> Goncho ca' le  
 nyojen, žan:

Bene' chaclaže' soa cueze'  
 mbalaz,  
 cheyała' gwsaque' bich güe'e  
 bite'teze diža' mal,  
 na' gwsaque' bich güe'e bite'teze  
 diža' güenlaže'.

<sup>11</sup> Cheyała' cuejyichje' yogo' da'  
 mal na' gone' da' güen.

Cheyała' cuec yichje' gone' con  
 ga zelao saque'de' cont soe'  
 binlo len bene' lježe'.

<sup>12</sup> Le Xancho Diosen' chgüia chne'e  
 bene' ca' cheson da' zej to  
 licha,  
 na' chzenague' chegaque' cate'  
 chosol güiže'ne'.

San bene' ca' cheson da' xinj,  
 Diosen' ngüie' gone' cont  
 yezezaca'zi'e.

<sup>13</sup> Na' nono zoa no gone chio' mal  
 še zoatezcho choncho da' güen  
 do yichj do laže'cho. <sup>14</sup> Na' la'czla'  
 še tgüej cate' yosoči yososaca'  
 bene' chio' lagüe choncho da' zej  
 to licha, Diosen' gone' soacho  
 mbalaz. Na' bi cheyała' žebcho  
 bene', neca gacžejlaže'cho. <sup>15</sup> San  
 cheyała' gonxencho Criston' lo'  
 lažda'ochon', le naque' Xancho. Na'  
 bate'teze cheyała' soacho probnidw  
 cont yoži'icho xtiža' bene' še  
 yesenabde' chio' bixchen' zoacho lez  
 šjayzoacho len Diosen' toli tocanē.  
 Na' cheyała' gapcho legaque' bala'an  
 na' güe'lenchone' diža' šagüe'. <sup>16</sup> Tža  
 tža cheyała' goncho cont nezecho  
 lo' yichjlažda'ocho bibi doła' napcho

len Diosen'; nachen' cate' yesezi'diže'  
 chio' da' chejnilaže'cho Criston',  
 yesacbe'ede' le choncho güen na'  
 yesacde' zto'. <sup>17</sup> Jejni'a saca'zi'cho  
 neče choncho da' güen, še can'  
 chaclaže' Diosen' gac checho, clel ca  
 saca'zi'cho neče choncho da' xinj.

<sup>18</sup> Le Criston' lecze gwdi gwxaque'.  
 La'czla' gwejczte' to licha len Diosen',  
 bnežjw cuine' gote' neče xtoła' benačh  
 tni'aze, na' da' bene' ca' zaca'czen' toli  
 tocanē. Gote' cont ba bozoe' chio' binlo  
 len Diosen'. Perw la'czla' gosote'ne',  
 beyas bebane' ladjo bene' guaten',  
 dan' ne' zoa spiritw chen'. <sup>19</sup> Na' len  
 Spiritw chen' gweje' jatixjue'ede' xtiža'  
 Diosen' len bene' ca' ba zjanyeyw gan'  
 yezezaca'zi'e toli tocanē. <sup>20</sup> Legaque' bi  
 bosozenague' che Diosen' ža gwlaste,  
 la'czla' gwdape' yela' chxenlaže' len  
 legaque', gwleze' yosozenague' šlac da'  
 Noén' bene' to barcw xen. Na' to chopga  
 bene' goso'o lo' barcon' na' bi gosebiaye'  
 lo' nisen', con xono'gue' besyela. <sup>21</sup> Na'  
 dan' goc ca' cani' zaca'leben can' ba  
 gwzoacho nisen' lagüe dan' ba de yela'  
 mban checho toli tocanē. Na' gague  
 gwzoacho nisen' cont beyaccho xilaže'  
 len cuerp chechon', san gwñabecho  
 Diosen' beyone' lažda'ochon' xilaže'  
 cont nezecho bibi doła' napcho. Na'  
 ba nac lažda'ochon' xilaže' na'a lagüe  
 beban Jesucriston' ladjo bene' guaten'.  
<sup>22</sup> Na' na'a Jesucriston' ba beyepe'  
 yaban' gan' chnabi'e txen len Diosen',  
 na' chosozexjw yichj yogo' angl na'  
 yogo' nochle no nape yela' chnabia'  
 chosozenague' che'.

**Diosen' none' da' gon to tocho  
 cont chaclen lježcho**

**4** Criston' goque' bene' bela'  
 chen na' gwxcaca'zi'e yežlio

nga, da'nan' chio' cheyała' gonchachlaže'cho bi gacžejlaže'cho cate' saca'zi'cho. Goncho ca, le cate' ba gwzaca'zi'cho chaclenen bich chzenagcho che da' malen'. <sup>2</sup>Na' še bi chzenagcho che da' malen' šlac ne' mbancho, nach soa cuezcho bi goncho da' mal da' žan gon chio' benach, san soa cuezcho goncho con can' chazlaže' Diosen'. <sup>3</sup>Cana' gwzoale benle con can' cheson bene' bi chesejnilaže' Diosen'. Benle da' nac yela' zto', benle bite'teze da' mal da' gwzelaže' lažda'olen', gwzožele, benle no žaš len lni chelen' na' güe'ejchgual, na' gwyejnilaže'le l gua' lsaca' da' ca' gwna Diosen' bi cheyała' šejnilaže'chon. <sup>4</sup>Na' bene' ca' ne' cheson ca' chesyebande' bich chonle txen len legaque' can' chesaše' chosožiayi' cuingaque', nach chesezi'diže' le'e. <sup>5</sup>Perw žin ža cate' Diosen' nabyožde' legaque' che yogo'lol da' ba gosone', Dios ben chbeze' chogbi'en nac gac che bene' zjamban len bene' ca' ba gosat. <sup>6</sup>Le da'nan' gwsele' bene' goseyixjue'ede' diža' güen che' len bene' ba gosat can' goseyixjue'eden' len chio'. Diosen' goclaže' yesenite' mbalaz toli tocanē' can' zoa le', la'czla' nchoglagüen' de yela' got che yogo' benach yežlio nga.

<sup>7</sup>Ba zoa te che yežlion'. Da'nan' cheyała' soacho len toze xbab na' goncho byen goncho can' chazlaže' Diosen' cont bibi gwžon soacho yol güižchone'. <sup>8</sup>Na' da' nac da' žialaoch, cheyała' gague lježcho do yichj do laže'cho, le cate' chaque lježcho chezi'xencho chegaque' bite'teze da' chesonde' chio'. <sup>9</sup>Na' cheyała' gwlebcho bene'

lježcho cate' yeside' ližchon' sin cbi bixjwcho. <sup>10</sup>Con can' ba goclen Diosen' to tocho da' none' chio' grasyw che bi da' chac choncho, can' cheyała' gaclen lježcho len dan' choncho. Cheyała' gwchincho bite'teze grasyw da' non Diosen' chio' con can' chaclaže' gwchinchon, le nža' nža'te da' none' che to tocho choncho. <sup>11</sup>Še Diosen' ba none' checho chixjue'echo xtižen', le xtiže' na'zen' cheyała' chixjue'echo. Na' še ba none' checho gaclencho bene', cheyała' gaclenchone' do yichj do laže'cho, le Diosen' chone' cont chac chaclenchone'. Cate' bi da' goncho, gonchon ca gacxen Diosen' da' gwsele' Jesucriston' len chio'. Zaca'cze' gonxenchone' toli tocanē' na' zaca'cze' nabi'e toli tocanē. Can' gacšca.

**Guata' da' saca'zi' chio'  
chejnilaže'cho Criston'**

<sup>12</sup>Chacda' le'e bene' migw, na' chaclaža' bi yebanele can' chac chelen' chosoči chososaca'chgua bene' le'e. Bi naquen da' yebanele, san gwlo'en še da' li chejnilaže'le Diosen'. <sup>13</sup>Cheyała' yebele caten' chzaca'zi'le da' chejnilaže'le Criston', le chac chele can' goc che Criston' caten' gwxcaca'zi'e. Le yebe caten' chzaca'zi'le cont lecze yebele na' soale mbalaz cate' žin ža le'ele yid Criston' ben' nac bene' zaca' juisyw. <sup>14</sup>Mbalaz chac chele na'a cate' chesezi'diža' bene' le'e da' chejnilaže'le Criston', le Spiritw che Dios ben' nac bene' zaca' juisyw zolan chaclenen le'e. Bene' ca' chosoči chososaque' le'e cheseñe' mal che Criston', san le'e

chonxenlne'. <sup>15</sup>Na' še saca'zi'le, yejn'i'a gaquen neche chonle da' güen, gague neche da' betwle bene' o gwlanle da' de che bene' o benle bichle da' xinj o blaže' chele len bi da' chac che bene'. <sup>16</sup>Le še saca'zi'le neche chejnilaže'le Criston', bi cheyala' gaquele zto' can' chac chele, san cheyala' gonxenle Diosen' da' ba chejnilaže'ln'e'.

<sup>17</sup>Ba bžin ža Diosen' ba chone' cont chy chzaca' chio' naccho xi'ine' neche bi da' xinj da' choncho. Na' dan' chone' ca' zgua'tec len chio' naccho ca bene' lo' yo'o che', nezecho leca gwnežjwche' da' yesezaca'zi' bene' ca' bi chosozenag diža' güen chen'. <sup>18</sup>Na' ca nac bene' zja'ac to licha, nacchguaze yesyele' bi yesezaca'zi'e' toli' tocanē, nach bene' bi chesejnilaže' Diosen' na' chesontezē' da' xinj, gague bi de da' yosla legaque'. <sup>19</sup>Da'n'an' cate' chsi' Diosen' xnezen' chy chzaca'cho, cheyala' soacho gonczcho da' güen na' gon cuincho lo' na' Diosen', le len' bene' chio' benačh na' zoacze' chaclene' chio'.

**Can' cheyala' gon chio'  
chejnilaže'cho Criston'**

**5** Na'achen' de da' nia' le'e nchojle cont chgüia chna' ljež le'e chejnilaže'le Criston'. Neda' lecze nchoja' chona' ca'. Ble'eda' gwxaca'zi' Criston' na' choe'lena' bene' diža' can' goquen', na' lecze nezda' žin ža šjayzoa' len le' gan' yo'ochgua be'ni' ca le'e šjayzoalenlne'. <sup>2</sup>Le güia na' bene' ba gwlo'o Diosen' lo' na'le güia na'le, ca no xan xila' chgüia chne'e xila' che' ca'. Le gonen do yichj do laže'le can'

chazlaže' Diosen', gague gonlen žan ca žan, neca gonlen cont gonle gan mechw, san le yebe gonlen. <sup>3</sup>Na' ca nac bene' ca' güia na'le, bi gonle znia cont yosozenague' chele, san soatezle gonle da' chazlaže' Diosen' cont yesele'ede' can' chonlen', na' yesabe'ede' lecze can' cheyala' yeson legaque'. <sup>4</sup>Xancho Jesucriston' zaca'lebde' ca to bene' güeyoe' xila' bene' chnabi'e nochle güeyoe' xila'. Na' cate' yide' da' yoble, cana'ch gone' soale mbalaz juisyw še ba benle xšin Diosen' can' cheyala', na' gague da' te che yela' zoa mbalaz chelen' ca chde che no premio da' chesone' yežlio nga.

<sup>5</sup>Nach lecze ca' le'e bene' xcuide', cheyala' gwzexjw yichjle gwzenagle che bene' ca' ba zjanchoj ben' chosogüia chosone'e le'e. Na' yogo'le le gwzexjw yichjle cont gwzenag che lježe, le:

Diosen' chdillene' bene' zjanac  
yalaže',  
san chaclene' bene'  
chosozexjwlaže' lagüen'.

<sup>6</sup>Cheyala' gwzexjw yichjcho gwzenagcho che Dios ben' nape yela' guac xen, cont žin ža gone' ga gacxencho. <sup>7</sup>Na' cheyala' gwcua'ancho yogo'lol da' chi' yichjcho chen lo' na' Diosen', le len' chgüia chne'e chio'.

<sup>8</sup>Cheyala' goncho byen goncho da' nac da' zaca', na' cheyala' gwsaca'cho cont Satanás dan' chnabia' da' xigüe' ca' bi co'on chio' to lo nez mal, le chgue'en chio' na' cheyiljwlažen' nac gonen gwžiyin' chio', ca to bež znia chosya'aba' chdaba' chyiljwba' be gagwba'. <sup>9</sup>Cheyala' soačhačcho bi gwzenagcho che Satanásen' na' soačhačcho šejnilaže'cho

Jesucriston', le nezecho beñe' lježcho ca' chesejnilaže'ne' gate'tezechle lo yežlion' lecze chesezaca'zie can' chac che chio'. <sup>10</sup>Perw cate' ba gwde da' chy chzaca'cho šlož dao' na'a, cuin Diosen' gone' cont gacch yichjlažda'ochon' can' chazlažen', cont šejnilaže'chchone', cont soecho gonchcho can' chnalāžen', na' cont soacho len toze xbab. Dios nan' nži'ilaže'de' chio' na' chaclene' chio' bite'teze da' chac checho, na' ba gwleje' chio' chejnilaže'cho Criston' cont šjayzoacho txen len le' gan' yo'ochgua be'ni'. <sup>11</sup>Cheyala' soacho gonxenchone' toli tocane da' naque' beñe' zaca' juisyw, na' nabia'che' ca note'tezechle. Can' gonščaczcho.

**Pedron' chguape' tiox beñe'  
ca' yosolab carten'**

<sup>12</sup>Beñe' migw checho Silvano, ben' chacda', zoateze' chone' can'

cheyala' gone', na' ba bzoje' xtiža' le'e cart dao' nga. Na' le'e cart nga chñeyoeda' le'e soaczle gonle da' güen na' chzejni'ida' le'e Diosen' ba goclene' le'e cont nezele da' li nži'ilaže'chgüede' le'e. Da'nan' cheyala' soaczle šejnilaže'lne'.

<sup>13</sup>Beñe' ca' ba gwlej Diosen' cont chesedop chesežague' chesonxene' Jesucriston' lo ciuda Roma nga chosoguape' le'e tiox, ciudan' da' nsi'a Babilonia. Na' lecze Marcos ben' nona' ca xi'ina' chguape' le'e tiox. <sup>14</sup>Cate' chdop chžagle txen le gwnopa' na' lježle cate' gwguap lježle tiox cont gacbia' chaque lježle.

Na' chñaba' yogo'le chejnilaže'le Criston' soa cuezle binlo len xbab da' yo'o lo' yichjlažda'olen'. Da' na'zen' chnia'.



# CART GWCHOPE DAN' BZOJ POSTLW SAN PEDRO

---

Pedron' bzoje' cart nga che  
bene' chesonxen Jesucriston'

**1** Neda' Simón Pedro chona' xšin  
Jesucriston', na' len' gwsele'  
neda' naca' postlw che'. Chzoja'  
le'e ba chejnilaže'le Jesucriston'  
can' chon neto'. Jesucriston' naque'  
Dios ben' chonxencho na' none'  
yela' mban checho toli tocanē le  
zejcze' to licha. Na' da' zaca'chguan  
chejnilaže'chone'. <sup>2</sup>Chnaba'  
gaclenchgua Diosen' le'e na' gone'  
cont leca soa cuezle binlo len  
xbab chelen' lagüe nombia'lnē' na'  
nombia'le Jesús ben' nac Xanchon'.

Can' cheyała' gon chio'  
chejnilaže'cho Jesucriston'

<sup>3</sup>Dan' nap Diosen' yela' guac  
xennan', ba none' chio' yogo' da'  
chyažjecho cont de yela' mban  
checho toli tocanē na' cont goncho  
can' chazlažen'. None' chio' da'  
ca' lagüe nombia'cho Criston', na'  
Criston' ben' gwleje' chio' naque'  
bene' zaca' na' bene' šagüe'. <sup>4</sup>Na'  
da' naque' bene' zaca' bene' šagüe',  
da'nān' ba gwne' gaclene' chio' na'  
gone' da' güen juisyw len chio'. Na'  
zaca'chguan da' gwne' ca', le da'

chaclene' chio' can' gwne', da'nān'  
yichjlažda'ochon' chesyeyaquen  
güen can' nac yichjlažda'ogüen',  
na' chac chbejyichjcho da' mal  
da' chžiyain' bene' bi chesejnilaže'  
Diosen', lagüe chesone' con ca  
žan chegaque'. <sup>5</sup>Na' da'nān' chio'  
chejnilaže'cho Jesucriston' cheyała'  
goncho con ga zelao saque'cho  
cont gonchcho da' güen, na' cont  
šejni'ichcho. <sup>6</sup>Na' cheyała' goncho  
con ga zelao saque'cho cont bi  
nabia' da' malen' chio'. Cheyała'  
soachachcho šejnilaže'cho Diosen'  
caten' chy chzaca'cho, na' cheyała'  
soaczcho gonxenchone'. <sup>7</sup>Na'  
cheyała' žil'icho bene' lježcho ben'  
chesejnilaže' Jesucriston', na' lecze  
cheyała' gaquecho yogo'ze bene'.  
<sup>8</sup>Le še zejcho chonchguacho yogo'  
da' ca', nachen' gaccho can' cheyała'  
gac chio' nombia'cho Xancho  
Jesucriston', na' xšinen' da' goncho  
chojen güen. <sup>9</sup>Na' note'tez bene'  
bi chon da' ca' ba gwnia' cheyała'  
goncho, nchol yichjlažda'ogüe' na'  
bina' šejni'išagüe'de' can' cheyała'  
gone'. Chlo'en ba gonlaže' ba beya'  
beyib Diosen' lažda'ogüe' len da'  
xinjen' bene' cana'. <sup>10</sup>Da'nān' bene'  
migw, cheyała' gonchcho con ga

zelaosaque'cho cont nezecho da' li ba gwlej Diosen' chio' cont šejnilaže'chone' na' ba bsi'e xnezen' gwque'e chio' ca xi'ine'. Na' še goncho ca', gwbat cuiayi'cho, <sup>11</sup>na' mbalazchgua gwleb Diosen' chio' cate' šjayzoacho len Xancho Jesucriston' gan' chnabi'e toli' tocane, Jesucristw ben' none' yela' mban checho toli' tocane.

<sup>12</sup>Da'nan' ba gwchoglaža' yogo' ni'a güe'lena' le'e diža' che da' ca' ba gwnia' le'e cont šjayze'ele, la'czla' ba nezele can' gwnian' na' zoachachle chejnilaže'le diža' li che Diosen' dan' nombia'le. <sup>13</sup>Nan' chacda' šlac ne' mban' cheyala' gona' cont šjayze'elen. <sup>14</sup>Le nezda' yob žin ža gata', con can' ba bzejni'i Xancho Jesucriston' neda'. <sup>15</sup>Da'nan' gona' con ga zelao saque'da' cont šjayze'ele can' gwnia' che da' quinga cate' ba gota'.

**Postlw ca' besele'ede' cate' Diosen' blo'ede' yela' zaca' che Criston'**

<sup>16</sup>Ca nac da' bzejni'ito' le'e che yela' guac che Xancho Jesucriston' na' che dan' yide' da' yoble, bi nacho naquen diža' da' goljlaže' neto' postlw, le ble'eto' len yejlaoto' cate' Diosen' blo'e yela' zaca' che Jesucriston'.

<sup>17</sup>Ble'eto'ne' cate' Xacho Diosen' bnežjue'ne' yela' bala'an' xen na' cate' Dios ben' nac bene' zaca' juisyw bene' cont gwychje' be'ni' juisyw na' gože'ne': "Benga Xi'ina' ben' chacda' na' chbe chezaquelaže'chgüeda' che'."

<sup>18</sup>Neto' beneto' can' gwna Dios ben' zoa yaba be'e diža' che', le gwzoato' lo ya'ana' len Xancho Jesucriston' caten' goc ca', ya'a dan' gwlej Diosen' cont goc ca' lagüen.

<sup>19</sup>Napcho Xtiža' Diosen' dan' bosozoj bene' ca' goso'e xtižen' cani' na' nezecho naquen da' li. Na' güen gonle še gwzenagle che dan' bosozojen', le gwse'nen' lo' yichjlažda'olen' ca to yi' da' chseni' ga nac chol. Bi cheyala' yeche'echo gwzenagcho chen tža tža šlac žin ža yid Criston' da' yoble na' co'oche' be'ni' chen' lo' yichjlažda'ochon'. Na' dan' yide'na' zaca'leben ca dan' chla' beljw xsilen' cate' cheni'. <sup>20</sup>Na' naquen da' žialao xen šejni'icho da' nga: diža' dan' bosozoj bene' ca' goso'e xtiža' Diosen' cani', ne tozen bi gac šejni'ichon to gualazcho, <sup>21</sup>le ne toz da' ca' bosozoje' bi zan' che xbab chegacze'. San bene' gosaque' lo na' Diosen' gosenie' dan' gož Spiritw che Diosen' legaque' na' bosozojen'.

**Bene' ca' chosozejni'ide' xtiža' Diosen' clele**

**2** Cani' lecze besechoj bal' bene' gualaž cheto' bene' gosonlaže' gosene' cheseyixjue'ede' xtiža' Diosen', na' ca'czen' yesenita' bene' yosozejni'ide' le'e diža' güenlaže' gwxe güižj. Na' yeseyiljwlaže' nacle yesone' cont yosozejni'ide' le'e diža' güenlaže' da' gwžiyain' le'e sin cbi gacbe'ele. Yosozoe' Xancho Jesucriston' to šla'ale, ben' bnežjw cuine' cont gata' yela' mban checho toli' tocane. Perw žin ža yesebiaye'e yalzelaže'. <sup>2</sup>Bene' zan yosozenague' chegaque' na' yesone' da' xinj dan' nac da' yela' zto' can' yeson legaque'. Na' neche yesone' ca', yesenita' bene' yesene' bibi zaca' diža' güen che Diosen' da' chlo'en chio' dogualje nez güenna'. <sup>3</sup>Na' bene' güenlaže'

ca' yesezelaže' yeseque'e xmechwle. Da'nan' yosozejni'ide' le'e diža' da' yesaljšaže' cont gwnežjwle legaque' mechw. Perw cani'te Diosen' ba nžie' bia' yesebiaye'e.

<sup>4</sup>Nezecho Diosen' bi bezi'xene' che angl ca' cate' gosone' da' xinj, san gwsele' legaque' lo yi' gabilen' gan' nac leca chol, na' zjanite' zjancheje' gden šlac žin ža gone' yesezaca'zi'e toli tocanē. <sup>5</sup>Neca bezi'xen Diosen' che bene' ca' že' lo yežlion' bene' bi bosozenag che' caten' gwzoo da' Noé. Gwsele' yejw sio' juisyw da' bžiayin' legaque'. Na' Noén' gwzoe' gwduxjue'ede' can' cheyala' yesone' da' zej to licha. Da'nan' Diosen' bosle' le' len yegaže bene' lježe'. <sup>6</sup>Na' Diosen' lecze bechoglaže' bžiayi'tecze' ciuda Sodoma len ciuda Gomorra cani' yela' güen da' xinj che bene' ca' že'na'. Bzeye' ciuda ca' na' yešinga de bega'an. Na' bene' ca' cont chosnide' bene' za' za'ac gwnežjue' castigw chegaque' še bi yosozenague' che'. <sup>7</sup>Na' cate' Diosen' bžiaye'e ciuda ca', bosle' ben' le Lot ben' goc bene' güen len le', le Loten' gocchgüede' zi' lo' lažda'ogüe' che da' yela' zto' goson bene' mal ca' že' ciuda ca'. <sup>8</sup>Loten' goque' bene' güen na' bžaglagüe' lo' lažda'ogüe' tža tža ble'ede' goson bene' ca' da' bi cheyala' yesone' na' bende' diža' che da' malen' gosone'. <sup>9</sup>Can' naquen, Xancho Diosen' nezde' nac gone' yosle' chio' chejnilaže'chone' lao da' ca' yesonen' cuejyichjchone', na' nezde' nac gone' cont bene' ca' bi zjanac bene' güen len le' yesenite' yesezaca'zi'e na' na' cate'ch žin ža chogbi'en yesezaca'zi'e toli tocanē.

<sup>10</sup>Diosen' gwnežjwchgüe' da' yesezaca'zi' bene' ca' chesonteze'

da' yela' zto' can' chesezelaže' lažda'ogaquen' yesone' len cuerp chegaquen'. Bene' ca' bi chesape' Xancho Diosen' bala'an cont yosozenague' che'. Bitw chesežebe' chesone' con bi žan chegaque', na' neca chesežebe' chesezi'diže' no angl bene' zaca' na' no da' xigüe'.

<sup>11</sup>San ca' nac angl che Diosen', zjanaque' bene' gualch ca' chio' benačh na' zjanapche' yela' chnabia' xench ca' chio', perw legaque' bi cheseyaxjde' yesezi'diže' no bene' zaca' na' no da' xigüe', san cheso'e diža' šagüe' chosocuiše' bene' ca' na' len no da' xigüe' lao Xancho Diosen'.

<sup>12</sup>Bene' ca' chosozejni'ide' diža' güenlažen', chesezi'diže' da' ca' bi chesejni'ide'. Zjanaque' ca' beyixe' be bi chesejni'i. Le beyixen' con nsi' Diosen' xnezen' chesaljba' na' chesenita'ba' cont yesezen benačhen' legacba' na' yesote'ba'. Na' ca'cze yesebiayi' bene' ca' chosozejni'i diža' güenlažen', <sup>13</sup>yesezaca'zi'e da' chosoči chososaque' bene' yoble. Chesazlaže' chesaše' chese'ej chesagwχatteze' tža tža. Na' cate' chesedobe' txen len le'e cont che'ej chagwle, bi chesacde' zto' da' chesezožde' na' chesagwχate' catec chziye' da' malen' legaque'. Da'nan' zjazaca'lebde' ca' to da' bzigüe' da' dope to lo lache' šiš o ca' to yiž xen da' žia cho'alao bene'.

<sup>14</sup>Bate'teze chesele'ede' no'ole, chesezelaže' yesata'lenteze' legaque', na' bi chjasexaque'de' len da' xinjen' chesonen'. Chesego'oyele' bene' bina' yesenita'chache' len Jesucriston' cont yesone' da' xinjen' txen len legaque'. Bene' ca' chosozejni'i diža' güenlažen' ba zjayolagüe'

chesezelaže' bi de che bene'. Diosen' leca chgue'ede' yogo' da' chesone'.

<sup>15</sup>Le ba gosebejyichje' xnez Diosen' da' zej to licha. Na' ba goseque'e nez malen' can' ben da' Balaam ben' be' xtiža' Diosen' cani', ben' nac xi'in da' Beor. Balaanna' gwzelaže' yeseyixjue'ne' len mechw cont nabe' gac da' mal che bene' Israel.

<sup>16</sup>Na' Diosen' bene' cont xpurren' be bi chac chneba' gwneczba' ca to benach na' gwdiłba' le' che yela' tont chen', gožba' le' cueze' bich gone' da' xinjen' nac ca'.

<sup>17</sup>Bene' ca' chosozejni'ide' diža' güenlažen' zjazacalebde' ca bej gan' bibi nis žia na' ca bejw da' nžiga' to be' gual. Ba nchoglaon chegaque' yesezaca'zi'e gabil' toli' tocane ga nacchgua chol'. <sup>18</sup>Le chesoe'chgüe' diža' chesonxen cuingaque' na' chesego'oyele' bene' za' besyechoj lo da' xinjen' cont da' yoble yesonteze' da' yela' zto' da' chesezelaže' yesone' len cuerp chegaquen' can' chesoncze bene' ca'. <sup>19</sup>Bene' ca' chosozejni'ide' diža' güenlaže' chese'e legaque' guac yesenite' mbalaz yesone' bite'ze žan chegaque', la'czla' zjanaque' ca to esclavo len da' nac da' yela' zto'. Le note'tezcho naccho ca to esclavo len da' xinjen' cate' choncho con can' žan goncho. <sup>20</sup>Na' bene' ba zjanombi'e Xancho Jesucriston' ben' none' yela' mban checho toli' tocane, ba besyechoje' lo' da' xinj ca' dan' nac da' yela' zto' dan' gosone' cate' bina' yesombi'ene', na' še soe da' xinjen' legaque' na' da' yoble yeso'e latje nabian' legaque' cont yesonchen', da' malch gac chegaque' clel ca caten' bina' yesyechoje' lo da' xinjen' da' nechua'. <sup>21</sup>Yejni'a šaca'

bi gosombi'e xnez Diosen' da' zej to licha clel ca gosebejyichje' nez güen da' nžia bia' Diosen' šejlencho. <sup>22</sup>Ba goc chegaque' can' ža to diža' li žan: "Beco'na' cheyagwba' dan' ba beyebba' na' cošen' cate' bach bguazjchoba' cheyo'oba' lo gonan' da' yoble."

### Yid Jesucriston' da' yoble

**3** Bene' migw chia', chacda' le'e, na' da' nga naquen cart gwchope da' chzoja' le'e. Na' ba bzoja' chopten da' chaclaža' gonle xbab che diža' güen da' ba nombia'le. <sup>2</sup>Le šjayze'e diža' da' bosozoj bene' ca' gosac lo na' Diosen' ben' goso'e xtižen' cani'. Na' lecze le šjayze'e dan' nžia bia' Xancho Jesucriston' goncho, Jesucristw ben' none' yela' mban checho toli' tocane. Lenna' diža' da' ba bzejni'i neto' postlw le'e.

<sup>3</sup>Naquen da' žialao šejni'ile da' nga. Na'a ba zoa te che yežlion', na' yesechoj bene' yesonle' che xtiža' Diosen' na' yesenite' yesone' con can' ža xbab mal chegaquen'. <sup>4</sup>Na' yesonle' che Diosen' yesene': "ŽBatxen' gac can' gwna Diosen' yid Criston' da' yoble? Bi naquen da' šejle'cho, le toz can' chac ža na'aža lecze can' goc cate' gwnita' da' xozxta'ocho ca', na' lecze ca'czen' goc caten' gwxe te yežlion'." <sup>5</sup>Bene' chesena ca' bi chesaclaže' yesone' xbab can' ba ben Diosen'. Caten' gwxe yaban' na' yežlion', con gwne' yesaquen na' goc can' gwnen'. Gocxe yežlion' lao nisdao' da' nyechj mbi'in doxen, na' bchine' nisen' cate' benen'. <sup>6</sup>Nach bžin ža cate' da' ca' bene' bžiaye'en len yejw sio'

juisyw da' goc cate' bexoa nisen' lo yežlion'. <sup>7</sup>Na' Diosen' lecze ba bžie' bia' yaban' na' yežlion' ne' zjanitan' can' zjanaquen na'a cate' žin ža gac juisyw. Cana' yeseyen cate' gone' yezezaca'zi' bene' mal ca' toli' tocane.

<sup>8</sup>Na' le'e bene' migw chia', chacda' le'e, na' che'nda' bi ganlaže'le da' nga, len Xancho Diosen' toz ca nac to ža o to mil iz, bi naquen sša len le'. <sup>9</sup>Ba| bene' chesacde' ba chže Xancho Diosen' da' bi|a' yid Jesucriston' da' yoble can' gwne' yide'. Perw bi nacho chžede', san da' nape' yela' chxenlaže' len chio' benač na' chbeze' da' bi chaclaže' cuiayi' note'tezcho. Chaclaže' yogo'cho yetinje xto|a'chon'.

<sup>10</sup>Na' Xancho Jesucriston' yide' da' yoble cate' bi nanel'aže' bene', can' chac cate' cho'o gwban liž bene' šeže'le. Nach gac to sšag xen, na' te che yogo' da' ca' chle'echo le'e yaban', na' yogo' da' de le'e yaban' cuiayin' lo yi' gual, na' yežlion' na' da' de lagüen lecze yeseyen.

<sup>11</sup>Na' da' nezecho yesyenit yogo' da' ca' can' ba gwnia', cheya|a' gon cuincho lo na' Diosen' na' soaczcho gonxenchone' do yichj do laže'cho. <sup>12</sup>Na' cheya|a' soa cuzcho batcan' žin ža gon Diosen' gac juisyw, na' goncho cont yob gaquen. Zana' šey le'e yaban' na' da' ca' chle'echo le'e yaban' yesyeyonan' lo yi' gual na' yesyeniten. <sup>13</sup>Perw chio' zoacho lez le'e yaban' na' yežlion' yesyeyaquen

da' cobe can' ba gwna Diosen', na' con bene' cheson da' güen da' zej to licha yesenita' cana'.

<sup>14</sup>Da'nan' bene' migw chia', šlac chbezcho gac da' ca', cheya|a' goncho con ga zelao saque'cho cont soacho binlo len Diosen' cont bibi do|a' de da' gwchenen yichjlažda'ochon'. <sup>15</sup>Na' cheya|a' gacbe'echo nape Xancho Diosen' yela' chxenlaže' len chio' benač cont gwzenagcho che' na' gone' yela' mban checho toli' tocane. Lecze can' ba bzoj postlw Pablon' checho ben' chaquecho, cho'e dižan' len yela' sina' da' bnežjw Diosen' le'. <sup>16</sup>Na' yogo' cart che' ca' chesoen' diža' che da' quinga ba bzoja', la'czla' bzoje' ba| da' nac zdebe šejni'icho. Na' bene' bi|a' yesejni' xtiža' Diosen' binlo na' bi|a' yesezoačhače' yesejnilaže'ne' chesejni'ide' da' ca' clele, can' chesone' len bichle Xtiža' Diosen' da' nyoj, na' da'nan' zjangüe'e nez da' gwžiyain' legaque'.

<sup>17</sup>Chacda' le'e bene' migw chia', na' ba nezele da' ca' ba bzoja' le'e. Na' le gwsaca' cont bi šejle'le xtiža' bene' bi chosozenag che Diosen', bene' cheson da' zej clele, san le soačhač le gwzenag che Diosen'. <sup>18</sup>Na' zej gacbe'echle catec chaque Xancho Jesucriston' le'e na' zej gombia'chln'e, Jesucristw ben' none' yela' mban checho toli' tocane. Cheya|a' soacho gonxenchwne' na'a na' toli' tocane. Can' gonščaczcho.

# CART NECHW DAN' BZOJ POSTLW SAN JUAN

---

Jesucriston' chenežjue' yela' mban  
to<sub>li</sub> toca<sub>ne</sub> che bene chesejnilaže'ne'

**1** Chyixjue'eda' le'e che ben'  
nzi' Xtiža' Dios, ben' chnežjue'  
yela' mban to<sub>li</sub> toca<sub>ne</sub> che bene'  
chesejnilaže'ne'. Ba zoacze' caten'  
gwxe yežlion'. Neto' postlw  
bzenagto' xtižen', ble'eto'ne' na'  
gwdanto'ne'. <sup>2</sup>Len' golje' benach  
na' ble'eto'ne' na' choe'to' diža' žato'  
mbancze'. Chyixjue'eto' le'e ba  
zoacze' len Xacho Diosen' caten'  
gwxe yežlion' na' bedesoalene' chio'  
benach. <sup>3</sup>Chyixjue'eto' le'e che  
bena' ble'eto' na' che bena' bzenagto'  
xtižen' cont gonle neto' txen. Na'  
ca nac neto', da' li ba nacto' txen  
len Xacho Diosen' na' len Xi'ine'  
Jesucriston'. <sup>4</sup>Chzojto' le'e cart nga  
cont soale yebechgüele.

Diosen' naque' la'zelagüe bene' güen

<sup>5</sup>Neto' bzenagto' be' Jesucriston'  
diža' che Xe' Diosen' na'  
chyixjue'eton' le'e, bzejni'ide'  
gwne' Diosen' naque' ca to be'ni'  
da' naque' la'zelagüe bene' güen  
bene' laždao' xilaže'. Bibi da' xinj  
none'. <sup>6</sup>Na' še žacho choncho txen  
len Diosen' šlac choncho da' xinjen',

con chonlaže'cho. Dan' chonchon'  
bi zejen to li. <sup>7</sup>Diosen' naque'  
la'zelagüe bene' güen bene' laždao'  
xilaže'. Na' še chio' zoacho choncho  
da' güenna' can' zoa Diosen' chone'  
da' güenna', nachen' naccho txen  
tocho yetocho na' yichjlažda'ochon'  
chega'anen xilaže' lagüete Xi'ine'  
Jesucriston' blalj xchene' cont  
beque'e yogo'lol' xtoła'chon'.

<sup>8</sup>Še žacho bibi xtoła'cho de,  
chziye'ze cuinchon' na' bi choe'cho  
diža' li. <sup>9</sup>Perw na' še chxoadola'cho  
lao Diosen', chezi'xene' doła'  
chechon' na' chnitlagüe' yogo'te  
da' xinj da' choncho, le chone'  
con can' že' na' chone' da' zej to  
li. <sup>10</sup>Še žacho bibi da' mal na'  
goncho, choncho Diosen' ca to bene'  
güenlaže' na' bina' šejle'cho diža' li  
chen'.

Criston' chnabe' gaclen

Xacho Diosen' chio'

**2** Xi'inda'ogua', chzoja' le' cart  
nga cont cbi gonle da' xinj.  
Perw na' še no chio' goncho da'  
xinjen', zoa Jesucriston' ben' chon  
da' zej to li na' chnabe' yezi'xen  
Xacho Diosen' checho. <sup>2</sup>Jesucriston'  
blalj xchene' neche xtoła'chon' cont

yo<sub>z</sub>oe' chio' bin<sub>l</sub>o len Diosen', na' gague ne<sub>č</sub>e xto<sub>l</sub>a' chio'zen' blalj x<sub>č</sub>hene' san ne<sub>č</sub>e xto<sub>l</sub>a' yogo'lol bena<sub>č</sub>.

<sup>3</sup>Na' še choncho can' ža Diosen' nachen' guac na<sub>č</sub>o ba nombia'chwne'. <sup>4</sup>Na' še žacho ba nombia'chwne' na' bi choncho can' že'na', naccho bene' güenlaže' na' diža' li čhe Diosen' bina' šon' yichjlažda'ochon'. <sup>5</sup>Ba chaquecho Diosen' ca cheya<sub>l</sub>a' gaquechone' še choncho con can' že'na', na' še ba choncho ca', nezecho ba nacchone' txen. <sup>6</sup>Na' note'tezcho še žacho naccho Diosen' txen, cheya<sub>l</sub>a' soacho goncho da' güen can' ben Jesucriston'.

#### Dan' ža Diosen' cheya<sub>l</sub>a' goncho

<sup>7</sup>Le'e bene' chacda', dan' chzoja' nga chona' mandadw naquen' gon<sub>l</sub>e, bi naquen to da' cobe. Naquen to da' gole dan' gwnezele caten' gwzolaole chejni<sub>l</sub>aže'le Jesucriston', le naquen diža' da' ba benele. <sup>8</sup>Na' dan' chona' mandadw naquen' gon<sub>l</sub>e, bia'cze naquen ca to da' cobe, le ba bla' diža' güen čhe Criston' len bena<sub>č</sub>hen' na' ba chzolao chde čhe yogo' da' ca' da' chgue'e Diosen'. Na' dan' chona' mandadw gon<sub>l</sub>e, Criston' ba blo'ede' naquen da' zaque' na' lecz le'e ba chlo'ele naquen da' zaque'.

<sup>9</sup>Note'tezcho la'cz<sub>l</sub>a' žacho ba noncho Diosen' txen, bi naquen ca' še chgue'e lježcho; nac čho<sub>l</sub> lo' lažda'ochon'. <sup>10</sup>Note'tezcho še chaque lježcho nachen' da' li ba noncho Diosen' txen na' bibi de da' yoslažon' chio' lo da' xinjen'. Lo' yichjlažda'ochon' ba naquen ca to

da' yo'o be'ni'. <sup>11</sup>Na' note'tezcho še chgue'e lježcho nac čho<sub>l</sub> lo' lažda'ochon' na' zejcho ca to bene' l<sub>č</sub>ho<sub>l</sub> bene' bi chacbe'e galen' yeque'e, le bi chacbe'echo can' cheya<sub>l</sub>a' goncho.

<sup>12</sup>Ba bzoja' da' quinga par le'e xi'inda'ogua', le Diosen' ba bezi'xene' čhele dan' chejni<sub>l</sub>aže'le Jesucriston' do yichj do laže'le. <sup>13</sup>Ba bzoja' da' quinga par le'e bene' gole, le ba nombia'le Jesucriston' ben' ba zoa cate' gwxe yežlion'. Ba bzoja' da' quinga par le'e bene' güego' chaban, le ba<sub>č</sub> gwzoele bi chzenagle čhe Satanás dan' chnabia' da' xigüe' ca'.

Ba bzoja' da' quinga par le'e xi'inda'ogua' da' ba nombia'le Xacho Diosen'. <sup>14</sup>Ba bzoja' da' quinga par le'e bene' gole, da' ba nombia'le Jesucriston' ben' ba zoacze cate' gwxe yežlion'. lecz ca' ba bzoja' da' quinga par le'e bene' güego' chaban da' ngo'o yichjle xtiža' Diosen' na' da'nana' ba gwzoele bi chzenagle čhe Satanásen'.

<sup>15</sup>Bi selaže'le gacle toze len bene' ca' bi chosozenag čhe Diosen', na' ne<sub>č</sub>a selaže'le gon<sub>l</sub>e can' chesonen'. Note'tezcho chzelaže'cho goncho can' chesonen', bi chaquecho Xacho Diosen'. <sup>16</sup>Bene' bi chosozenag čhe Diosen' chesone' da' mal dan' chzelaže' lažda'ogaquen', na' chesezelaže' bi dan' chesele'ede', na' lecz ca' chesa'laže'. Na' yogo' da' ca' chesone' bi naquen čhe Xacho Diosen', naquen čhe da' mal dan' de yežlio nga. <sup>17</sup>Na' da' te čhe yežlio nga len da' ca' chesezelaže' bene' ca' bi chosozenag čhe Diosen'. Perw še chio' choncho can' chazlaže' Diosen', soaczcho len Diosen' to<sub>l</sub>i to<sub>č</sub>ane.



**Nezecho bin' nac da' li**

<sup>18</sup>Xi'inda'ogua', ba zoa žin ža te che yežlio nga. Neto' ba bzeneto' le'e gwžin ža yid ben' gonchgua contr Criston', na' na'a bene' zan ba za'aque' chesone' contr Criston'. Da'nan' nezecho ba zoa žin ža te che yežlion'. <sup>19</sup>Ladjo chio' besechoj bene' ca' chesegue'ede' Criston'. Gague do laže' gosone' txen len chio' chejnilaže'chone'. Le šaca' do laže' gosone' txen len chio', ne' nite' chesonche' chio' txen še ca'. Na' dan' bač besyechoje' nacbia' bi zjanaque' chio' txen.

<sup>20</sup>Criston' ba bene' chio' Spiritw che Diosen' na' da'nan' yogo'cho nezecho can' ža diža' li che Diosen'. <sup>21</sup>Chzoja' le'e da' nga le bač nombia'le diža' li che Diosen', gague nacho bi nombia'lenna', na' lecz ca' nezele ne toz diža' güenlaže' ca nchixe diža' li che'na'.

<sup>22</sup>Bene' güenlaže' ben' ža Diosen' bi gwsele' Jesucriston' golje' benač. Ben' že' ca' chgue'ede' Criston', le chzoe' Xacho Diosen' to šla'ale len Xi'ine' Criston'. <sup>23</sup>Na' note'tez bene' cho'e diža' že' Diosen' bi gwsele' Jesucriston', bitw zoa Xacho Diosen' len le'. Perw note'tez bene' cho'e diža' že' Diosen' gwsele' Jesucriston', zoacze Xacho Diosen' lente Xi'ine' Jesucriston' len le'.

<sup>24</sup>Le soa le gwzenag che da' ca' ba bzeneto' le'e caten' gwzolaotele chejnilaže'le Criston'. Na' še soatezle gwzenaglen, nachen' soatezle len Xacho Diosen' na' len Xi'ine' Jesucriston'. <sup>25</sup>Na' da' gwna Jesucriston' gone' checho, gone' yela' mban toli tocaņe.

<sup>26</sup>Ba bzoja' le'e da' nga bia' diža' che bene' ca' chesaclaže' yesonlede' le'e. <sup>27</sup>Na' Jesucriston' ba bene' chio' Spiritw che Diosen' zoan lo' lažda'ochon' chzejni'in chio' yogo'lol dan' cheyla' nezecho che cuine'. Na' Spiritw che Diosen' choen' diža' li, bi chonlažen'. Na' dan' zoan chzejni'in chio', bi chyažjecho nochle gwzejni'i chio' bi dan' nac da' li. Da'nan' le gwzenag dan' bzejni'i Spiriton' le'e na' le soa len Jesucriston'.

<sup>28</sup>Na' na'a xi'inda'ogua', cheyla' soatezcho gwzenagcho che Jesucriston' cont bi žebcho cate' yide' da' yoble na' cont bi yeto'echo na' cont bi nan gwcuša'e'chone' cate' le'echo ba ble'e. <sup>29</sup>Na' nezecho Criston' zeje' chone' con can' cheyla' gone', lecz ca' nezecho yogo'czecho še zejcho choncho can' cheyla' goncho naccho xi'in Dios.

**Naquen' goncho še naccho xi'in Dios**

**3** Le gon xbab catec chaquechgüe Xacho Diosen' chio' da' chne' naccho xi'ine', na' da' licze xi'ine' chio'. Bene' bi chesejnilaže' Diosen' bi chesejni'ide' naccho xi'in Dios, le bi chesacbe'ede' non' nac Diosen'. <sup>2</sup>Xi'inda'ogua', chio' chejnilaže'cho Jesucriston' bač naccho xi'in Dios. Na' bina' gata'bia' nac gaccho. Con nezecho caten' Jesucriston' yide' da' yoble canan' le'echwne' can' naque' na' yeyac yichjlažda'ochon' can' nac yichjlažda' le'. <sup>3</sup>Na' note'tezcho še zoacho lez gaccho can' naquen', soacho gwsaca'cho cont lažda'ochon' gaquen xilaže', le nezecho lažda' Jesucriston' naquen xilaže'.

<sup>4</sup>Note'tez bene' zoe' chone' da' xinjen' chone' clele len ley che Diosen', le cate' choncho da' xinj choncho clele len da' ba bzie' bia' goncho. <sup>5</sup>Nezczecho Jesucriston' bide' yežlio nga cont beque'e xtoła' chio' benač, na' ca nac Jesucriston', le bibi da' xinj none'. <sup>6</sup>Na' še chio' zoacho chzenagcho che', bi zoacho choncho da' xinj, san še zoacho choncho da' xinjen', biņa' šejni'icho che' na' biņa' gombia'chone'.

<sup>7</sup>Xi'inda'ogua', bi güe'le latje no siye' le'e, še choncho da' güen can' cheyała' goncho, zejcho to liča can' zej Jesucriston'. <sup>8</sup>Na' še zoacho choncho da' xinj, naccho xi'in Satanásen', le Satanásen' zoaczen chonen da' xinj cate' gwxete yežlion'. Na' bid Xi'in Diosen' yežlio nga par gwcueze' dan' chon Satanásen'.

<sup>9</sup>Note'tezcho še Diosen' ba gwque'e chio' ca xi'ine' bi zoacho choncho da' xinj, le ba bocobe' yichjlažda'ochon' na' bich žan goncho da' xinjen' da' zoa Diosen' len chio'. <sup>10</sup>Na' da' nga chlo'en non' nac xi'in Diosen' na' non' nac xi'in Satanásen': note'tezcho še bi zoacho choncho da' güen, bi naccho xi'in Dios, na' lecz ca' note'tezcho še bi chaque lježcho, bi naccho xi'in Dios.

#### Cheyała' gague lježcho

<sup>11</sup>Na' da' nga ba beneczecho cate' gwzolaicho chejniłaže'cho Jesucriston': cheyała' gague lježcho tocho yetocho. <sup>12</sup>Bi gagcho ca goc da' Caín, goque' xi'in Satanásen' na' beyote' bene' biše'. ¿Nezele bičen' betue' le'? Betue' le' le gwzoe' bene' da' xinj na' bene' bišen' gwzoe' bene' da' güen.

<sup>13</sup>Da'nan' xi'inda'ogua', bi yebanele cate' bene' ca' bi chosozenag che Diosen' chesegue'ede' le'e. <sup>14</sup>Nezecho bich mbiayi' yichjlažda'ochon', san ba de yela' mban checho toli tocaņe le ba chaque lježcho. Na' še bi chaque lježcho, ne' mbiayi' yichjlažda'ochon'. <sup>15</sup>Note'tezcho še chgue'e lježcho, lao Diosen' naccho bene' güet bene'. Na' nezecho bene' güet bene' bi de yela' mban che' toli tocaņe. <sup>16</sup>Bzane cuin Jesucriston' neče chio' gosote'ne' dan' leca chacde' chio', da'nan' nezecho can' cheyała' gague lježcho. Na' ca'cze chio' cheyała' zane cuincho gatcho cont gaclen lježcho še chonen byen. <sup>17</sup>Na' cate' de da' de checho na' nezecho bene' lježcho chyažden', še bi cheyaše'chone' bi gac nacho chaquecho Diosen'. <sup>18</sup>Xi'inda'ogua', bi cheyała' gague lježcho de diža'ze. Cheyała' gague lježcho do yichj do laže'cho na' soacho gaclen lježcho.

#### Nac goncho cont bi žebcho Diosen'

<sup>19</sup>Na' nezecho naccho txen len Dios ben' choe' diža' li še chaque lježcho can' gwnia'na', na' še goncho ca', na' gacbe'echo zoacho binlo len Diosen'. <sup>20</sup>Na' še zoa cate' choncho xbab bi zaca'cho par na Diosen' xi'ine' chio', Diosen' zaca'che' ca xbab chechon' na' nezde' yogo'lol. Da'nan' cheyała' gwzenagcho can' žen', gague con can' ža xbab chechon'. <sup>21</sup>Le'e bene' chacda', še lo' yichjlažda'ochon' chacbe'echo bitw napcho doła', nachen' bich chžebcho Diosen'. <sup>22</sup>Na' bite'tez dan' chnabečhone' chonczen', le choncho da' nžie' bia' goncho na'

can' chaclažen'. <sup>23</sup>Na' da' nga Diosen' nžie' bia' goncho, šejnilaže'cho Xi'ine' Jesucriston' do yichj do laže'cho na' gaque lježcho tocho yetocho, con can' nžie' bia'. <sup>24</sup>Na' še choncho can' nžie' bian', nach zoacho len Diosen' na' Diosen' zoe' len chio'. Na' quinga nezecho Diosen' zoe' len chio': ba bene' chio' Spiritw chen' zoan lo' lažda'ochon.

**Spiritw che Diosen' na' dan'  
chon contr Criston'**

**4** Le'e bene' chacda', bi šejle'le che yogo' bene' chesene' cheso'e diža' dan' gož Spiritw che Diosen' legaque', san le gone' prueba še xtiža'gaquen' naquen da' bzejni'i Dios o še cbi naquen. Le gone' prueba, le ba chaš bene' zan bene' chesonlaže' chesene' cheseyixjue'ede' dan' gož Diosen' legaque'. <sup>2</sup>Na' quinga guac nezecho še Spiritw che Diosen' bzejni'in legaque' dižan' cheso'e: yogo' bene' cheso'e diža' chesene' Jesucriston' naque' Dios golje' benačh, nezecho yo'o Spiritw che Diosen' lo' yichjlažda'ogüe'. <sup>3</sup>Na' bene' cheso'e diža' chesene' Jesucriston' bi naque' Dios golje' benačh, nezecho Spiritw che Diosen' bi yo'on lo' yichjlažda'ogüe'. Bene' ca' cheso'e diža' da' chonen contr Criston'. Na' ba bzeneto' le'e yid da' gon contr Criston' na' na'a ba blan' chonen contr le'.

<sup>4</sup>Xi'inda'ogua', ba nacle Diosen' txen na' da'nan' bi chejle'le che bene' güenlaže' ca'. Chzoele cbi chejle'le chegaque' neche da' yo'o Spiritw che Diosen' lo' lažda'olen' chzejni'in le'e, na' Spiriton' chnabia'chen ca Satanásen' dan' zoa len bene' ca'

bi chosozenag che Diosen' yežlio nga. <sup>5</sup>Bene' ca' bi chosozenague' che Diosen' cheso'e diža' che dan' chac yežlio nga, na' da'nan' bene' lježe' ca' chosozenague' chegaque'. <sup>6</sup>Ca' nac chio', ba naccho Diosen' txen. Da'nan' yezica'chle bene' chosozenague' che Diosen' lecz chosozenague' xtiža'chon'. Na' bene' ca' cbi zjanaque' Diosen' txen bi chosozenague' diža' chechon'. Can' chac nezecho no bene' yo'o Spiritw che Diosen' lo' lažda'ogüe' chzejni'in le' diža' li na' no bene' chzenague' diža' güenlaže' dan' chzejni'i Satanásen' le'.

**Diosen' chacde' benačh**

<sup>7</sup>Le'e bene' chacda', cheya'la' soacho gaque lježcho tocho yetocho, le Diosen' zoacze' chone' cont chaque lježcho. Na' note'tezcho še chaque lježcho nachen' nabia' naccho xi'in Dios na' nombia'chone'. <sup>8</sup>Na' note'tezcho še bi chaque lježcho bi nombia'cho Diosen', le chio' bi choncho can' chonen'. Len' zoacze' chacde' benačhen', le con can' nac yichjlažda'ogüe'. <sup>9</sup>Dan' ben Diosen' bzejni'ide' chio' can' chacde' chio', gwsele' laye'e Xi'ine' yežlio nga cont note'tezcho bancho toli' tocane še chejnilaže'chone' do yichj do laže'cho. <sup>10</sup>Bi goquecho Diosen'; lelen' godce' chio' na' gwsele' Xi'ine' Jesucriston' cont bnitlagüe' xto'la'chon'.

<sup>11</sup>Le'e bene' chacda', dan' chaque Diosen' chio' lecz ca' cheya'la' gaque lježcho tocho yetocho. <sup>12</sup>Nono zoa bene' ba ble'ede' Diosen'. Perw na' še zoacho chaque lježcho tocho yetocho, nabia' Diosen' zoacze'

len chio' na' ba chaquechone' can' cheyała' gaquechone'. <sup>13</sup>Nezecho zoacho len Diosen' na' le' zoacze' len chio' da' ba gwsele' Spiritw chen' zoan lo' yichjlažda'ochon'.

<sup>14</sup>Na' neto' postlw ba ble'eto' na' choe'to' diža' nezeto' gwseła' Xacho Diosen' Xi'inen' cont gwnitlagüe' xtola' note'tez bene' šejnilaže' le'.

<sup>15</sup>Na' note'tezcho še chejle'cho na' choe'cho diža' žacho Jesucriston' naque' dogualje Xi'in Dios, Diosen' zoe' len chio' na' lecz zoacho txen len Diosen'.

<sup>16</sup>Chio' ba nezecho na' chejle'cho chaque Diosen' chio'. Diosen' zoacze' chacde' benachen', le con can' nac yichjlažda'ogüe'. Na' note'tezcho še zoacho chaquecho Diosen' na' lecze zoacho chaque lježcho, nachen' zoacho len Diosen' na' le' zoacze' len chio'. <sup>17</sup>Diosen' zoacze' chaclene' chio' cont chaquechone' can' cheyała' gaquechone' na' chaque lježcho can' cheyała' gaque lježcho, na' Diosen' chone' ca' cont bi žebcho cate' žin ža gone' yela' justis che yogo' benach. Na' bi žebcho še zoacho chaque lježcho yežlio nga can' chon Jesucriston'. <sup>18</sup>Še chaquecho Diosen' ca cheyała', bibi de da' žebcho. Caten' chžebchon' naquen ca to castigw len chio', na' še ne' chžebcho biņa' gaquecho Diosen' can' cheyała' gaquechone'.

<sup>19</sup>Chio' chaquecho Diosen' le len' godce' chio' da' nechw.

<sup>20</sup>Note'tezcho še chgue'e lježcho, la'czla' žacho chaquecho Diosen', con chonlaže'chon'. ěNacxe goncho gaquecho Diosen' ben' bi chle'echo še bi chaque lježcho bene' chle'etecho? <sup>21</sup>Na' ba bene'

mandadw can' cheyała' gon chio' chaquechone', že' lecz cheyała' gaque lježcho.

#### Gwcuascho da' malen'

**5** Note'tez chio' naccho xi'in Dios še chejle'cho Diosen' gwsele' Jesucriston' cont nabi'e. Na' še chaquecho Xacho Diosen', lecz can' gaque lježcho, le lecz xi'in Dios bene' lježchon'. <sup>2</sup>Cate' chio' zoacho chaquecho Diosen' na' choncho da' bžie' bia' goncho, nezecho lecze zoacho chaquecho yezica'chle xi'in Dios. <sup>3</sup>Še chaquecho Diosen', choncho can' nžie' bia' goncho. Na' dan' nžie' bia' goncho, bi naquen zdebe gonchon. <sup>4</sup>Note'tezcho še ba bocob Diosen' yichjlažda'ochon', ba chzoecho chcuascho da' xinj dan' de yežlio nga. Na' dan' chejnilaže'cho Jesucriston', da'nan' chzoecho chcuascho da' xinjen' dan' de yežlion' bi chonchon. <sup>5</sup>Na' noch no chzoede' chcuase' da' xinj dan' de yežlio nga san bene' ca' chesejle'e Jesucriston' naque' dogualje Xi'in Dios, legaquen' chesezoede' chosocuase' da' xinjen'.

#### Diosen' cho'e diža' že' Jesucriston' naque' dogualje Xi'ine'

<sup>6</sup>Quinga ben Jesucriston' šlac bide' yežlio nga, bnežjw cuine' gwzoe' nis na' blalj xchene'. Bi nacho con gwzoaze' nis, san lecz blalj xchene'. Na' Spiritw che Diosen' choen' diža' bene' ca', na' Spiriton' choen' pur diža' li. <sup>7</sup>Na' nita' šone bene' chesegüe'e da' balj yaban' cheso'e diža' che Jesucriston': Xacho Diosen', len Jesucriston' ben' nzi' Xtiža' Dios na' len Spiritw che Diosen'. Na' toz

can' cheso'e diža' che Jesucriston'.  
<sup>8</sup>Lecz de šone da' chesego'on da' balı cheso'en' diža' che Jesucriston' yežlio nga: Spiritw che Diosen', na' dan' gwzoe' nis na' dan' blalj xchenen'. Na' toz ca cheso'en' xtižen'.  
<sup>9</sup>Chejle'cho xtiža' benachen', na' nacch xtiža' Diosen' da' zaca'ch, na' Diosen' ba bi'e diža' che Xi'ine' Jesucriston'.  
<sup>10</sup>Na' še chejle'cho Jesucriston' naque' dogualje Xi'in Dios, nezecho lo' lažda'ochon' xtiža' Xacho Diosen' dan' bi'e che' naquen da' li. Na' še bi chejle'cho che Diosen', chonchone' ca to bene' güenlaže' da' bi chzenagcho diža' dan' cho'e che Xi'ine'na'.  
<sup>11</sup>Na' xtiža' Diosen' chzejni'in chio' guata' yela' mban che benachen' toli tocane še yesejnilaže' Xi'ine' Jesucriston'.  
<sup>12</sup>Quinga naquen, de yela' mban checho toli tocane še chejnilaže'cho Jesucriston', na' bi de yela' mban checho toli tocane še bi chejnilaže'chone'.

**Can' beyož cart nga da'  
 bzoj Postlw San Juan**

<sup>13</sup>Ba bzoja' le'e cart nga, le'e chejnilaže'le Xi'in Diosen', cont nezele de yela' mban chele toli tocane.  
<sup>14</sup>Na' bitw chžebcho chol güižcho Diosen', le nezecho chzenague' checho cate' chnabcho lagüen' da' chazlaže'.  
<sup>15</sup>Na' cate' nezecho chzenague' checho bite'tez dan'

chnabechone', lecz nezecho gone' da' ca' ba gwñabechone'.

<sup>16</sup>Na' še chacbe'echo bene' lježcho chone' bi da' xinj da' bi zaca' seła' Diosen' le' lo yi' gabil, cheyla' nabecho Diosen' gaclene' le' cont yezoe' binlo len Diosen' da' yoble. Da' xinj da' cheson bal bene' zacan' seła' Diosen' legaque' lo yi' gabil. Bi žia' nable gaclen Diosen' bene' ca'.  
<sup>17</sup>Napcho doła' še choncho bite'tez da' xinj, perw gague yogo' da' xinj dan' chonchon' seła' Diosen' chio' lo yi' gabilen'.

<sup>18</sup>Nezecho še ba bocob Xacho Diosen' yichjlažda'ochon' bi zoacho choncho da' xinjen' le zoa Jesucriston' ben' nac Xi'in Diosen' chcuase' chio' len dan' chon Satanásen', na' da'n'an' bi soen gwžiayin' chio'.

<sup>19</sup>Lecz nezecho Diosen' zoe' len chio', perw bene' ca' bi chosozenague' che', Satanásen' chnabian' yichjlažda'ogaquen'.

<sup>20</sup>Na' nezecho ba bid Xi'in Diosen', na' ba bzejni'ide' chio' cont nombia'cho Xe' ben' nac dogualje Dios. Nach zoacho toz len ben' nac dogualje Dios dan' zoacho toz len Xi'ine' Jesucriston'. Len' naque' dogualje Dios na' chnežjue' yela' mban toli tocane che bene' chejnilaže' le'.  
<sup>21</sup>Xi'inda'ogua', gague nochle šejnilaže'le san ben' nac dogualje Dios. Da' na'zen' chzoja'.

# CART GWCHOPE DAN' BZOJ POSTLW SAN JUAN

---

## Chio' nombia'cho diža' li che Diosen' cheyała' gaque lježcho

<sup>1</sup>Neda' naca' bene' gole blao, na' chzoja' le' no'ole, len' ba gwlej Diosen' chzenago' xtižen', na' len xi'ino' ca'. Da' li chacda' le'e, na' gague nedaze' san lencze' yogo' bene' yezica'chle bene' zjanombia' diža' li che Diosen' chesacde' le'e. <sup>2</sup>Chaqueto' le'e da' yo'o diža' li che Diosen' lo' lažda'ochon' na' soan lo' lažda'ochon' gaclenen chio' toli tocane. <sup>3</sup>Xacho Diosen' na' len Xi'ine' Xancho Jesucriston' yesaclene' le'e, yesyeyaše' yesyeži'ilaže'de' le'e na' yesone' cont soa cuezle binlo len xbab dan' yo'o lo' yichjlažda'olen', le ba nombia'le diža' li che Diosen' na' ba chaque lježle tole yetole.

<sup>4</sup>Leca gwbeda' cate' gwnezda' bal bi' chio' ca' ba nita'be' chesombe' can' ža diža' li che Xacho Diosen' can' bžie' bia' goncho. <sup>5</sup>Dan' cheyała' goncho, no'ole, cheyała' soacho gaque lježcho tocho yetocho. Na' dan' žia' goncho ca', bi naquen to da' cobe; naquen dan' ba bzeneto' le'e caten' gwzolaole chejnilaže'le Jesucriston'. <sup>6</sup>Še chaquecho Diosen' goncho da' nžie' bia'. Na' nezele nžie' bia' gaque lježcho, le cate' gwzolaole

chejnilaže'le Jesucriston' bzejni'ito' le'e cheyała' gaque lježcho.

## Čaš bene' chesonlede'

<sup>7</sup>Bene' zan chesaše' lo yežlion' chosozejni'ide' clele, le cheso'e diža' che Jesucriston' chesene' bi naque' Dios ben' bide' golje' benach. Note'tez bene' chon ca' naque' bene' gwxiye' na' chone' contr Criston'. <sup>8</sup>Bi gwzenagle xtiža'gague' san le soa le gon cont Diosen' gac gone' soale mbalaz juisyw da' chonle can' chazlaže' gonle.

<sup>9</sup>Note'tezcho še chzoacho ca'ale dan' bsed blo'e Criston' cont chzenagcho bichle diža' dan' chzejni'i bene' chio', bi zoa Diosen' len chio' še ca'. Na' note'tezcho še zoacho chzenagcho che dan' bsed blo'e Criston', Xacho Diosen' len Xi'ine' Criston' nite' len chio'. <sup>10</sup>Na' še no bene' yide' gan' zoalen' chaclaže' gwzejni'ide' le'e da' bi nac xtiža' Criston', bi gwleblene' ližlen' na' bi gwguaplene' tiox. <sup>11</sup>Cheyała' gonelene' ca', le še gwlebelene' zejen txen chonlenine' da' xinjen'.

## Goclaže' šjane'e legaque'

<sup>12</sup>De da' zan da' nia' le'e perw bich chaclaža' gwzohan' le'e yiš. Zoa' lez

yida' gana' zoale na' güe'lēna' le'e  
diža' cho'a cont soacho mbalaz  
juisyw.

<sup>13</sup>Xi'īn no'ole bilon', no'ole ben' lecze  
gwlej Diosen' cont chzenague' che',  
chosoguape' le'e tiox. Da' na'zen' chzoja'  
na'a.



# CART GWYONE DAN' BZOJ POSTLW SAN JUAN

---

Postlw San Juanna' cho'e  
diža' güen che ben' le Gayo

<sup>1</sup>Neda' naca' bene' gole blao, na'  
chzoja' cart nga par le', xmigua'  
Gayo. Da' li chacda' le'.

<sup>2</sup>Bene' migw, chnaba' lao Diosen'  
gac güen chio' na' so' güen ca güenna'  
ba zoa lo' yichjlažda'oguo'. <sup>3</sup>Leca  
bebeda' cate' besela'ac to chope bene'  
lježcho gosole diža' can' zoaczo' chono'  
güen da' chzenago' diža' li che Diosen'  
do yichj do lažo'. <sup>4</sup>Len neda' le'e nacle  
ca xi'ina', na' bich bi de da' chbechda'  
ca chbeda' chnezda' chzenagle diža' li  
che Diosen' do yichj do laže'le.

<sup>5</sup>Bene' migw, chono' güen dan'  
chacleno' bene' lježcho ca' bene'  
zjanac bene' zito'. <sup>6</sup>Legaque' ba gosole  
diža' len neto' chdop chžagto' nga  
chonxento' Jesucriston' can' bži'ido'  
legaque'. Na' cate' yesele'e da' yoble  
güešco'ne' bi dan' yeseyažjde' cont  
yesyegüe'e nez da' yoble, le legaque'  
chesone' xšin Diosen'. <sup>7</sup>Ba gosa'ac  
laže' cont cheso'e xtiža' Criston' na'  
bibi goclen chesezi'e che bene' ca'  
bi chesejle'e che Criston'. <sup>8</sup>Da'nan'  
cheyala' gwlebocho bene' ca',  
gaclenchwne' na' gonchone' txen cont  
yesombia' bene' diža' li che Diosen'.

Diótrerefes chone' da' mal

<sup>9</sup>Bach bzoja' le'e chdop chžagle  
chonxenle Jesucriston', perw na'  
Diótrerefes chaclaže' gague' la'zelaoze  
bene' blao len le'e na' bi chzenague'  
cheto'. <sup>10</sup>Da'nan' caten' yida' dezna'a  
le'e na' yapa'ne' che yogo' dan' chone'  
contr neto' na' diža' güenlaže' dan'  
chne' cheto'. Na' gague da' na'zen'  
chone', lecz bi chlebe' bene' lježchon'  
liže' bene' za'ac zito', na' cate' no le'e  
chaclaže'le gwleble legaque' ližlen'  
nach chžone' gonle ca', na' chbeje' le'e  
ladjo lježle chdop chžagle chonxene'  
Jesucriston' cate' chleble legaque'.

<sup>11</sup>Bene' migw, bi gono' txen len  
bene' ca' cheson da' xinjen', san  
ben txen len bene' ca' cheson da'  
güen. Note'tez bene' zoateze' chone'  
da' güen, nacbja' nombi'e Diosen',  
na' note'tez bene' zoateze' chone'  
da' xinjen', nacbja' bina' gombi'e  
Diosen'.

Demetrimon' chone' da' güen

<sup>12</sup>Yogo'ze bene' cheso'e diža' güen  
che Demetrio na' nacbja' zejlene'  
diža' li che Diosen'. Lencze neto'  
choe'to' diža' žato' chone' da' güen,  
na' nezele choe'to' diža' li.

## Can' beyož carten'

<sup>13</sup>Dech da' zan da' gocda' n̄ia' le'e,  
perw bich chaclaža' gwzojan' le'e  
yiš. <sup>14</sup>Zoa' lez yob yežagcho cont  
güe'cho diža' cho'a cate' soacho  
txen.

<sup>15</sup>Soago' binlo len xbab  
dan' yo'o lo' yichjlažda'oguoñ'.  
Beñe' migw chion' nita' nga  
chosoguape' le' tiox. Na' chñaba'  
gwguaṗšco' tiox to to beñe'  
migw cheto' ca' nita' gan'  
zoalen'. Da' na'zen' chzoja' ña'a.

# CART DAN' BZOJ SAN JUDAS

---

**San Judas chzoje' bene' ca'  
zjanaque' lo na' Diosen'**

<sup>1</sup>Neda' Judas naca' bene' güen žin che Jesucriston', na' naca' bene' biše' Jacobo. Chzoja' le'e ba gwlej Xacho Diosen' cont nacle lo ne'en nach zoale chcuas chcue'ej Jesucriston' le'e len da' malen'. <sup>2</sup>Chnaba' gon Xacho Diosen' cont gacbe'echle cheyaše' cheži'ilaže'chgüede' le'e, na' gone' cont soa cuezechle binlo len xbab da' yo'o lo' yichjlažda'olen', na' gone' gacbe'echle chacchgüede' le'e.

**Bene' ca' chososed chosolo'ede' diža'  
güenlaže'**

*(2 Pedro 2:1-17)*

<sup>3</sup>Bene' migw, chacda' le'e, na' ba goclaže'chgua' gwzoja' le'e gwzejni'ida' le'e can' ben Xancho Jesucriston' cont de yela' mban checho toli tocane. Perw na'a ba chonen byen chzoja' chneyoeda' le'e soachachle šejle'le diža' li che Diosen' da' bzejni'ide' chio' to ši'ize, chio' naccho lo ne'en. <sup>4</sup>Nita' bal' bene' cheseziye'e cont chaquele zjanaque' le'e txen. Bi chosozenague' che Diosen', san chesene' da' nži'ilaže' Diosen' chio' guacte goncho bite'teze da' yela' zto'

len cuerp chechon', le chezi'xencze' checho. Na' chosozoe' to šla'ale toz ben' nac dogualje Dios ben' cheyala' yosozenag yogo' benachen' che', na' len Xancho Jesucriston'. Cana'te byoj Xtiža' Diosen' žan bene' cheson ca' yesežaglaochgüe' neche xtoła'gaquen'.

<sup>5</sup>Na' la'czla' ba gwnezele yogo' can' goquen', chaclaža' gona' cont šjayza'laže'le Xancho Diosen' bosle' da' xozxta'o neto' bene' Israel lo na' bene' Egipto ca', perw gwdechle bžiaye'e balteze' bi gosejle'e che'. <sup>6</sup>Na' zan angl bi gosazlaže' yesone' da' gwlo'o Diosen' lo na'gaque' yesone', san gosaclaže' yesacche' bene' blaoch. Nachen' besyechoje' gan' bžia Diosen' bia' yesenite'. Nach Diosen' gwsele' legaque' gan' nacchgua chol, na' zjancheje' gden toli tocane cont yesezaca'zi'e cate' žin ža gac juisyw. <sup>7</sup>Na' lecze ca' bene' gwnita' ciuda Sodoma na' ciuda Gomorra len yezica'chle ciuda ca' zjanyechj zjambi'in legaquen, gosonchgüe' da' nac yela' zto' len cuerp chegaquen', le gosata'lene' ljež bene' byogaque' gosone' le' ca xo'ole' cont gosone' da' yela' zto' len legaque'. Nach Diosen' gwsele' yi' da' bzeyen ciuda ca' gosebiayi'tecczen'.

Na' da' bene' ca', chosnisde' chio'  
benach gata' castigw lo yi' gabil toli  
tocane che bene' bi yosozenag che'.

<sup>8</sup>Na' bia'cze bene' ca' chososed  
chosolo'ede' le'e diža' güenlaže',  
zjanite' chesone' da' mal na' chesene'  
besele'edagüede' nac güen dan'  
chesonen'. Chesone' da' yela' zto'  
len cuerp chegaquen' bi chesaclaže'  
yosozenague' che Xancho Diosen',  
na' chesezi'diže' angl ca' bene'  
zjazaca'chgua. <sup>9</sup>Perw nža'le cheson  
angl che Diosen', le cani' gwzoa  
to tiemp cate' angl blao ben' le  
Miguel gocyože' len Satanás dan'  
chnabia' da' xigüe' ca' da' goclažen'  
yeyoan' cuerp che da' Moisésen'.  
Na' la'czla' Miguelen' naque' angl  
blao che Diosen', bi beyaxjde'  
si'diže' Satanásen', san con gožen':  
"Xanto' Diosen' tile' le.'" <sup>10</sup>Perw  
bene' quinga chesezi'diže' bite'teze  
da' bi chesejni'ide'. Na' chesonteze'  
da' ca' ža cuerp chegaquen' yesone',  
ca cheson beyixe' be bi chesejni'i,  
na' da' ca' chesonen' chosožiayin'  
legaque'.

<sup>11</sup>Nyaše'chgua gac chegaque'.  
Zjanite' chesegue'e lježgaque' can'  
ben da' Caín, na' lecze cheso'laže'  
chesone' da' mal cont yesone'  
gan mechw can' ben da' Balaam.  
Chesone' güedenag len bene' ca'  
gwlej Diosen' cont chesenabi'e  
legaque' cacze güedenag ben  
da' ben' gože' Coré cani', na'  
can' gwžiai'y' da' Corén neče  
yela' güedenag chen', lecz ca'  
yesebiaye'e. <sup>12</sup>Na' cate' le'e che'ej  
chagwle txen cont chlo'ele chaque  
lježle, legaque' chesagwxatteze'  
con nacteze žan chegaque' na'  
chese'ejchgüe' gualaz da' yesone'

güen len bene' lježe'. Na' da'  
bibu zaca' can' chesone', da'nan'  
zjazaca'lebde' ca bzigüe' da'  
dope to le'e lache' šiš, na' lecze  
zjazaca'lebde' ca bene' güeye' xila'  
bene' chna' cuine' na' bi chne'e  
xila' ca'. Lecze zjazaca'lebde'  
ca bejw da' nžiga' be' da' bi  
cheyaquen yejw, na' ca to yag  
xen da' bibi chbian cate' ba bžin  
tiemp cuian, na' gualaz da' cuian  
chbižen na' chbižen lo yo. <sup>13</sup>Na'  
neče yela' zton' cheson bene'  
ca', zjazaca'lebde' ca nisdao' da'  
chas chata' na' checho'onen bžina'  
ga nac lo yo cho'a nisdan'. Na'  
zjazaca'lebde' ca beljw da' bich  
zjažian xišne'en gan' cheyala'  
yesebian, le Diosen' bžie' bia'  
yesezaca'zi'e toli tocane gan' nac  
leca chol'.

<sup>14</sup>Gwzolaon cate' gwzoa da'  
Adán bžinten cate' gwzoa da'  
Enoc goc gaže dia che Adánna'.  
Na' Enoquen' lecze be'e diža'  
da' bzejni'i Diosen' le' che bene'  
ca' chososed chosolo'ede' diža'  
güenlaže', cate' gwne': "Ble'eda'  
za' Xancho Diosen' len angl zan  
juisyw che' ca' <sup>15</sup>cont chogbi'en  
yesezaca'zi' yogo' bene' zjanape'  
dola'. Yogo' bene' ca' bi bosozenag  
che' yesezaca'zi'e toli tocane  
neče da' gosone' da' mal juisyw  
yela' güedenag chegaquen'  
na' neče da' gosone' diža' ya'  
che.'" <sup>16</sup>Na' ca nac bene' ca'  
chososed chosolo'ede' le'e diža'  
güenlaže', bate'teze chesežeš'  
che Diosen', na' bibi chesazlaže'.  
Con chesonteze' bite'teze žan  
chegaque'. Len xtiža'gaquen'  
chesonxen cuingaque' na'

chosopede' bene' yoble cont  
yesone' gan mechw o cont  
yesaclen bene' legaque'.

**San Judas che'e bene' chesonxen  
Jesucriston' can' cheyała' yesone'**

<sup>17</sup>San le'e bene' migw, bene'  
chacda', cheyała' šjayze'ele diža' nga  
gosena postlw ca' bene' ca' gwlej  
Xancho Jesucriston'. <sup>18</sup>Gosene':  
"Tiempen' cate' ba zoa yid Xancho  
Jesucriston', nita' bene' bi yesejle'  
che Diosen' na' yesonle' che' na'  
yesonteze' con da' žan čegaque'  
da' nac yela' zto.'" <sup>19</sup>Na' na'a bene'  
ca' chesone' cont le'e chejnilaže'le  
Criston' bi chonle toze xbab, san  
nža' nža'te ca žale. Chesone' xbab  
che da' chnalaže' cuerp čegaque',  
le bi yo'o Spiritw che Diosen' lo'  
yichjlažda'ogaquen'.

<sup>20</sup>Perw le'e bene' migw, chacda'  
le'e, na' chneyoeda' le gonchach  
laže'le cont soachachle šejle'le diža'  
li che Diosen' da' zaca'chgua. Na' le  
yol güiž Diosen' ye'ln'e' da' chzejni'i  
Spiritw chen' le'e. <sup>21</sup>Na' le soa le  
gon cont gacbe'ele chaque Diosen'  
le'e. Na' da' cheyaše' cheži'ilaže'  
Xancho Jesucriston' chio', gone'  
cont šjayzoalenchone' toli tocanē.  
Da'nan' le soa le cueze batcan' gone'  
ca'.

<sup>22</sup>BaI bene' chesacžejlaže' še  
cheyała' yesone' can' ža Diosen'. Le  
gwzejni'i legaque'. <sup>23</sup>Na' bene' ca'  
ba chesezolagüe' chosozenague'  
che diža' güenlažen', le gon con  
ga zelao saca'le cont yesyechoje'  
lo nez malen' na' le co'o legaque'  
nez güenna'. Na' yebaI bene'  
chesonchgüe' da' xinj, na' lecze  
cheyała' yeyaše'cho legaque', perw  
do chaž chžebcho, do chgue'echo  
dan' chesonen' na' cheyała'  
gwsaca'cho cont bi goncho txen len  
da' xinjen' chesonen'.

**Judasen' chonxene' Diosen'**

<sup>24-25</sup>Cheyała' gonxencho toz Dios  
ben' zaca' gonxencho, ben' none'  
yela' mban checho toli tocanē. Dios  
nan' naque' bene' sina' juisyw. Chac  
chone' cont bi lažo'cho goncho  
da' xinj, na' chac chone' cont bibi  
xtoIa'cho gata' cate' yežincho lagüen'  
gan' yo'ochgua be'ni'. Leca yebecho  
cana'. Diosen' naque' la'zelagüe' bene'  
zaca' bene' blao, na' zaque' chnabi'e  
doxen. Naque' Xan yogo' benach  
na' yogo' bica'chle da' de. Len'  
gocxene' cate' biņa' xe yežlion' na'  
cheyała' gonxenchone' toli tocanē  
dan' gwsele' Xancho Jesucriston'  
chaclene' chio'. Ca'šca gac. Da'  
na'zen' chzoja'.

# JESUCRISTON' BZEJNI'IDE' SAN JUANNA' CHE DA' CA' ZA' GAC

---

Diosen' bzejni'ide' Jesucriston'  
diža' quinga

**1** Diosen' bzejni'ide' Jesucriston'  
diža' quinga cont le' gwlo'ede'  
bene' ca' chesejnilaže'ne' can' ba  
zoa gac. Nach ba gwsele' to bene'  
nac angl che' cont bzejni'iden' neda'  
Juan, neda' naca' ben' chon xšine'.

<sup>2</sup>Na' chzoja' diža' li che yogo' da'  
ba ble'eda', na' nezda' da' li gwna  
Diosen' gac quinga, le Jesucriston'  
bzejni'iden' neda'.

<sup>3</sup>Mbalaz bene' ca' yosolab da' nga  
chzoja' da' bzene Diosen' neda' na'  
bene' ca' yesende' yosolab bene'  
yoble len, še da' li yosozenague'  
chen, le ba zoa gac can' žanna'.

Juanna' chzoje' bene' ca' chesonxen  
Jesucriston' yež ca' gaže

<sup>4</sup>Neda' Juan chzoja' le'e nita'le  
gaž yež che Asia chdop chžagle  
chonxenle Jesucriston'. Diosen'  
len Spiritw chen' yesenitašque'  
yesaclene' le'e na' yesone' soa cuezle  
binlo len xbab chelen', Dios ben' ba  
zoacze' cate' binā' xe yežlion', na'  
soacze' toli tocane. Na' Spiritw che  
Diosen' naquen ca gaže spiritw na'  
zoan lao Diosen' gan' chi'e chnabi'e.

<sup>5</sup>Na' Jesucriston' lecze soašque'  
gaclene' le'e na' gone' soa cuezle  
binlo. Jesucriston' naque' ben' cho'e  
diža' li che Diosen'. Naque' bene'  
nechw bebane' ladjo bene' guaten'  
ben' bich nabia' yela' goten' le'.  
Na' le' chnabi'e yogo' nochle bene'  
gwnabia' že' yežlio nga. Dan' chacde'  
chio' bnežjw cuine' gosote'ne'  
na' blalj xchene' cont bnitlagüe'  
xtoja'chon'. <sup>6</sup>Nach ba gwleje' chio'  
cont nabia'cho txen len le' ca no  
rey na' cont soacho gonxencho  
Diosen' ca no bxož, Dios ben' nac  
Xe' na' lecze naque' ben' chonxene'.  
Cheyala' gonxenchone' toli tocane,  
le zoacze' chnabi'e toli tocane. Can'  
gonščacžcho.

<sup>7</sup>Jesucriston' yide' da' yoble to lo'  
bejw, na' yogo'lol bene' yesele'ede'  
le', lente bene' ca' gosot le'. Na'  
bene' ca' že' to to latje lo yežlion',  
yesebežyaše' cate' yesele'ede' le'.  
Can' žia', na' can' gačca.

<sup>8</sup>“Neda' naca' Dios ben' ben  
yežlion' len yogo' bichle da' de, na'  
naca' ben' gon cont te chen. Da'nan'  
zaca'lebda' ca letr nechw da' nzi' A  
na' letr bzebe da' nzi' Z.” Can' ža'  
Xancho Dios ben' nape' yela' guac  
xen juisyw, ben' ba zoacze' cate'

biṇa' xe yežlion' na' soacze' toli tocane.

**Juan ble'edaogüede' leca bene' zaca' juisyw nac Criston'**

<sup>9</sup>Neda' Juan naca' bene' lježle dan' naccho txen chzenagcho che Jesús'en' cont Diosen' chnabi'e yichjlažda'ocho, na' toz can' chosoči chososaca' bene' chio' neče xtižen', na' txen chaclen Jesucriston' chio' cont chyó chčhejcho len yogo' da' chac checho. Da' ba gwdixjue'eda' xtiža' Diosen' na' ba bia' diža' che Jesucriston', da'nan' gosezene' neda' na' gosešele' neda' pres gan' že' Patmos dan' nac to yežlio dao' lo' nisdaon'. <sup>10</sup>Na' to ža dmigw Spiritw che Diosen' benen cont ble'edaogüeda', na' benda' Jesucriston' chne' cožan' zižjehgua ca ga chbež trompeta. <sup>11</sup>Na' gože' neda':

—Neda' naca' ben' ben yežlion' len yogo' bichle da' de, na' naca' ben' gon cont te čhen. Da'nan' zaca'lebda' ca letr nechw da' nzi' A na' letr bzebe da' nzi' Z. Bzój to le'e yiš da' quinga le'edo', na' sełon' lao bene' ca' nita' gaž yež che Asia chesedop chesežague' chesonxene' neda', yež ca' zjanzí' Efeso, na' Esmirna, na' Pérgamo, na' Tiatira, na' Sardis, na' Filadelfia na' Laodicea.

<sup>12</sup>Na' gwyechja' gwṇa'a non' chne' na' ble'eda' gaže candeler de oro. <sup>13</sup>Na' gachol' candeler ca' gaže, ble'eda' to bene' nac ca to benačh perw gocbe'eda' bi naque' benačhze. Nyaze' to lache' ton' da' bžinte lo nī'e na' nchey cho'alčo'en ca to bant de oro. <sup>14</sup>Na' yiša' yichjen' naquen da' šiš ca xa xila' o ca no

beye'. Na' yejlagüen' gosactiten ca to yi' da' čala'nin. <sup>15</sup>Nī'e ca' ble'edan' ca to de bronze da' nłachgua cate' naquen ya'alj xoan lo yi'. Na' ši'en nenen zižjehgua ca chziž yegw cate' dechgua nis. <sup>16</sup>Na' noxe' gaže beljw len ne'e ličan' na' lo' cho'en chchojen ca to spada da' nla chop la'an. Na' cho'alagüen' goctiten ca gwbiž cate' čna'chguan.

<sup>17</sup>Na' cate' ble'eda'ne' gwbiža' xni'en gottia' šlat. Nach bli' ne'e ličan' gwxo'en yichja' na' gože'nda': —Bi žebo'. Neda' naca' ben' ben yežlion' len yogo' bichle da' de, na' naca' ben' gon cont te čhen. <sup>18</sup>Naca' ben' nsa' yela' mban. Cana' gota' perw bebana' ladjo bene' guat na' zoacza' toli tocane. Na' naquen lo na' nia' bat yesat to to bene' na' nac gac čhegaque' cate' bačh gosate'. <sup>19</sup>Na' ṇa'a bzój diža' che da' ca' ba ble'edo' na' diža' che da' ca' chac ṇa'a na' diža' che da' ca' za' gac. <sup>20</sup>Na' da' nono ṇa' neze che beljw ca' gaže dan' noxa' na' che candeler de oro ca' gaže, zejen quinga: beljw ca' zejen gaže bene' ca' cheso'e xtiža' len gaže cuen bene' ca' chesedop chesežag chesonxene' neda' gan' nzi' Asia. Na' candeler ca' gaže zejen gaž cuen bene' ca' chesonxen neda'.

**Da' gwna Jesucriston' che bene' ca' chesonxen le' lo ciuda ca' gaže: Da' gože' bene' Efeso ca'**

**2** 'Bzój ben' choe' xtiža' len bene' ca' chesedop chesežag chesonxene' neda' lo ciuda Efeson', yo'one' neda' noxa' beljw ca' gaže len na' ličan' na' chda' gachol' candeler de oro ca' gaže, na' yo'one' nedan' chapa'ne' diža'



quina: <sup>2</sup>“Neze nle'eda' ca güenna' chonle, can' chchejlaže'le zoale chonchguale xšinan'. Nezdā' bi chleble bene' cheson da' xinj, le ba ble'ele can' cheson bene' güenlaže' ca' chesene zjanaque' postlw na' chacbe'ele bi zjanaque' dogualje postlw. <sup>3</sup>Ba byo bchejle len yogo' dan' ba goc chele na' ba benchguale xšinan' na' bi jaḡaque'laže'le. <sup>4</sup>Perw da' nga bi chazlaža' can' chonle, da' bich chaquele neda' can' goquele neda' cana'. <sup>5</sup>Da'nān' le gon xbab can' gwzoale goquele neda' na' can' gwzoale bzenagle chia' na' yetinje xtoḷa'le cont da' yoble gonle güen can' benle cana'. Na' še bi yetinjele xtoḷa'len', yedeyena' cont bich gacle candeler chia'. <sup>6</sup>Perw la'czla' bi chontecle güen, chebeda' chgue'ele da' xinj da' cheson bene' ca' zjanzi' nicolaítas, bene' ca' chesene' guac gontezechle da' xinj, le neda' lecze chgue'eda' can' chesonen'. <sup>7</sup>Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', neda' gona' da' gagwle da' chbia lo yag yela' mban da' zoa latje xdan che Diosen'.”

#### Da' gože' bene' Esmirna ca'

<sup>8</sup>Na' na'a bzoj ben' choe' xtiža' len bene' ca' chesedop chesežag chesonxen neda' ciuda Esmirna, yo'one' naca' ben' ben' yežlion' na' len yogo' bichle da' de na' ben' gon cont te chen, ben' lecze gote' na' bebane' ladjo bene' guat ca', na' yo'one' nedan' chapa'ne' diža' quinga: <sup>9</sup>“Neze nle'eda' ca güenna' chonle. Nezdā' chyí chzaca'le.

Nezdā' nacchguale bene' yaše', la'czla' de chele da' zaca'ch clel ca' yela' gwni'an'. Na' ca' nac bene' Israel bene' ca' chesene' ba gwlej Diosen' legaque' cont gone' güen len legaque', nezdā' bale' chesenie' yela' ya' chele. Perw bi gwleje' ben' cheson ca', le bi chesejnilaže'ne', san zjanaque' dapa' txen chosozenague' che Satanás dan' chnabia' da' xigüe' ca'. <sup>10</sup>Bi žeble da' ca' za' gac chele, le Satanásen' gonen cont yeseyixjue' balle ližya cont gata'bia' še soen gonen cuejyichjle xtižan'. Na' lo to chope ža yosoči yososaque' le'e. Le soateze le gwzenag chia' la'czla' še yesote' le'e, na' gona' cont banle len neda' toli tocane. <sup>11</sup>Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', bi gac chele can' yesac che bene' yesezaca'zi' toli tocane dan' žacho yela' got gwchope.”

#### Da' gože' bene' Pérgamo ca'

<sup>12</sup>Na' bzoj ben' choe' xtiža' len bene' ca' chesedop chesežag chesonxen neda' ciuda Pérgamo, yo'one' neda' napa' spada toše' dan' nla chop la'an, na' nedan' chapa'ne' diža' quinga: <sup>13</sup>“Neze nle'eda' ca güenna' chonle. Na' nezdā' zoale lo ciuda gan' chnabia'chgua Satanásen', perw zoale chzenagle chia'. Nezdā' bi chbejyichjle xtižan' dan' chejle'le na' neca gwlejyichjlen cate' gosote' Antipas ben' be'e xtižan' lo ciuda chelen' gan' že' bene' zan bene' chosozenag che Satanásen'. <sup>14</sup>Perw de to chope da' chonle da' bi chazlaža'. Le nita' balle chzejni'i

lježle guac gontezle da' xinj. Ca'cze nac dan' bzejni'i da' Balaam da' rey Balac cani'. Da'nana' gwsele' no'ole gosego'oyele' bene' Israel ca' cont gosagüe' yela' guagw da' nac che l gua'a lsaca' gosejnilaže' bene' zito' ca' na' cont gosone' da' yela' zto' len cuerp chegaque'. <sup>15</sup>Na' lecze nita' balle chzenagle che dan' chgue'eda' dan' chososed chosolo'e bene' ca' zjanzl' nicolaítas. <sup>16</sup>Da'nana' le yetinjje che da' xinjen' chonle. Na' še bi yetinjjele xtoła'len', la' yidtia' yedetiłlena' nole chonle da' xinjen' len spada dan' chchoj choan'. <sup>17</sup>Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', gona' le'e to yela' guagw da' zaca' da' nono na' le'e lo yežlion', to da' zaca'leben ca maná, na' gona' to yej šiš che to tole gan' yoj lale da' naquen to lale da' cobe da' nono nombia', lete le'e gaquen lo na'le gombia'len."

#### Da' gože' bene' Tiatira ca'

<sup>18</sup>'Na' bzoj ben' choe' xtiža' len bene' ca' chesedop chesežag chesonxene' neda' lo ciuda Tiatira, na' yo'one' naca' dogualje Xi'in Dios, na' chactit yejlagua' ca to yi' da' chala'nin na' ni'a ca' chesaquen ca bronce da' cheyac ya'alj cate' xoan lo yi'. Yo'one' neda' chapane' diža' quinga: <sup>19</sup>"Neze nle'eda' ca güenna' chonle, nezda' zoale chaquele neda', chejnilaže'lenda', chonchguale xšinan' na' chchejele bite'teze chac chele, na' nezda' chonchle güen na'a cled can' benle cana'. <sup>20</sup>Perw de to da' chonle da'

bi chazlaža', le choe'le latje zoa to no'ole naque' txen len le'e, no'olen' zaca'lebe ca da' reina Jezabel. Že' chsed chlo'ede' xtiža' Diosen' perw len diža' güenlaže' chen' chziye'e bene' chesejnilaže' neda' cont bałe' chesone' da' nac da' yela' zto' len cuerp chegaquen' na' lecze chesagüe' yela' guagw da' chesena bene' naquen che l gua'a lsaca' chesejnilaže'. <sup>21</sup>Ba gwleza' cont yetinjde' che yela' zto' dan' chonen', perw bi chaclaže' yetinjden', na' bina' cuejyichje' yela' zton' chonen'. <sup>22</sup>Da'nana' gona' cont gacšende' na' gate' lo cam, na' gona' cont bene' ca' cheson yela' zton' txen len le' lecze yesale'chgüede' še bi yesebejyichje' da' ca' chzejni'ide' legaque' yesone'. <sup>23</sup>Nach bi' che' ca', gona' cont yesatbe'. Nach yogo' cuen bene' ca' chesedop chesežag chesonxene' neda' gate'teze yesacbe'ede' nombia' yogo'te xbab da' yo'o lo' yichjlaždao' benach, na' gona' cont to toe' soe' mbalaz o saca'zi'e con ca nac da' ba bene'. <sup>24</sup>Na' le'e zoale Tiatiran' le'e bi chonle can' chsed chlo'e no'ole güenlažen' na' neca nsedle dan' chesene' chesejni'ide' che Satanásen' dan' nono nombia', bi nia' bichle da' cheyala' gonle. <sup>25</sup>Con soacze gonle da' güen can' chonle tža tža, cont ne' chonle güen caten' yida' da' yoble. <sup>26</sup>Note'tezle še soele bi cuejyichjle xtižan', na' še soele ne' soatezle gonle can' nona' mandadw cate'ch yida' da' yoble, gona' cont nabi'a'le nación ca' txen len neda'. <sup>27</sup>Ca Xan' ba bene' cont chnabi'a' nación ca', lecze can' gona' cont bene' bi yesebejyichje' xtiža' yesenabi'e txen len neda'. Na' yesenabi'e nación

ca' na' žan ca žan bene' nación ca' yosozenague' chegaque', na' bene' ca' bi chosozenag, yosožiaye'e legaque' ca to bene' chzoxj to no yeso' xguague. <sup>28</sup>Na' gwnežjua' legaque' beljw xsilen'. <sup>29</sup>Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

### Dan' gože' bene' Sardis' ca'

**3** 'Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Sardis, yo'one' napa' Spiritw che Dios dan' nac ca gaže spiritw, na' noxa' beljw ca' gaže, na' neda' chapa'ne' diža' quinga: “Neze nle'eda' yogo'lol dan' chonle. Nezda' nacle ca bene' guat la'czla' chze chele nable yela' mban toli tocane. <sup>2</sup>Le gon xbab can' chonle na' le šejnilaže'ch neda' na' le gwzenag chia' šlac bina' yeyož cuiayi'le, le dan' chonlen' bi naquen can' chebe Dios ben' chonxena'. <sup>3</sup>Le soa le gon xbab che xtižan' dan' bosozejni'i bene' le'e na' da' bzenagle chen cana'. Le gwzenag chen na'a da' yoble cont yetinjele xtola'len'. Na' še bi gonle xbab yetinje xtola'len', žin ža yedexenyala' le'e na' gona' castigw chele ca chzenyal to no bene' gwban cate' chbane'. Bi nezele bi ža bi hor. <sup>4</sup>Bia'cze nita' balle bene' Sardis bina' gonle da' malen' txen len bene' yezica'chle. Na' le'e nac lažda'olen' xilaže' len neda', žin ža gona' lache' šiš chazle na' talenle neda', le zaca'le cont gonle neda' txen. <sup>5</sup>Note'tezle še soele bi cuejyichjle xtižan', žin ža gona' lache' šiš chazle, na' gwbat

yoxia' lalen' le'e libr chia' gan' nyoj la yogo' bene' zjanape' yela' mban toli tocane, na' güe'lena' Xan' diža' na' len bene' zjanac angl che' ca' yapegaca'ne' nacle neda' txen. <sup>6</sup>Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

### Da' gože' bene' Filadelfia' ca'

<sup>7</sup>'Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Filadelfia, yo'one' naca' bene' laždao' xilaže' juisyw, na' zoateza' chona' can' gwnia' gona'. Napa' xinya che da' rey David. Cate' chsaljua' cont yeso'o bene' gan' zoa Diosen' chnabi'e, nono gac yoseyjw, na' cate' chseyjua' cont bi yeso'e, nono gac saljw. Yo'one' neda' chapa'ne' diža' quinga: <sup>8</sup>“Neze nle'eda' ca güenna' chonle. Nach ba gwsaljua' ca to puert che le'e da' nono gac yososeyjw. Na' la'czla' bi nac zanle, ba chzenagle xtižan' na' bi gwlejyichjlen caten' bosochi bososaque' le'e. <sup>9</sup>Ba| bene' Israel že' gan' zoalen' chesene' ba gwlej Diosen' legaque' cont gone' güen len legaque', perw bi gwleje' legaque', le bi chesejnilaže'ne'. Zjanaque' dapa' txen chosozenague' che Satanás dan' chnabia' da' xigüe' ca'. Na' ca nac legaque', gona' cont žin ža yesape' le'e bala'an cate' yesacbe'ede' chacda' le'e. <sup>10</sup>Ba byo bchejle len yogo' dan' gwdi gwxa'le na' benle can' nona' mandaw, na' da'nan' gona' yechojle güen cate' žin ža saca'zi' yogo' benach. Cana' gata'bia' che to to benach še yosozenague' chia' o še

bi yosozenague'. <sup>11</sup>Ba zoa yida' da' yoble. Le soachach le šejnilaže'nda' na' gwzenagle chia' cont bibi gwžon soale mbalaz toli tocanē. <sup>12</sup>Note'tezle še soele bi cuejyichle xtižan', žin ža gona' gacle ca bdope da' zjanita' lo' yodao' blao che Dios ben' chonxena', le yežinle gan' zoa Diosen' na' yega'anlenlne' toli tocanē. Na' gwzoja' loxga to tole la Dios ben' chonxena' na' la ciuda che', ciuda Jerusalén da' nac da' cobe da' chi' yaba na' yetjen lo yežlion'. Na' gwzoja' loxga to tole la neda' da' nac da' cobe. <sup>13</sup>Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

#### Dan' gože' bene' Laodicea ca'

<sup>14</sup>'Na' bzoj ben' choe' xtiža' len bene' ca' chesedop chesežag chesonxen neda' lo ciuda Laodicea, yo'one' chona' cont chac can' chnalaže' Diosen'. Cho'a diža' li da' nac cayanen' che' Diosen' neda'. T xen len neda' ben Diosen' benač na' yogo'lol bichle da' de le'e yaban' na' lo yežlion'. Yo'one' neda' chapa'ne' diža' quinga: <sup>15</sup>"Neze nle'eda' ca chonle, bi nacho chgue'ele neda' na' neca chaquele neda'. Yebechda' šaca' chgue'ele neda' o šaca' chaquele neda'. <sup>16</sup>Na' da' bi chonle cuent gaquele neda', da'nana' ba zoa cuejyichja' le'e bich gona' le'e ca xi'ina'. <sup>17</sup>Le'e žale zoale mbalaz, žale chonle da' güenchgua, žale bibi chyažjele le chebechgüe Diosen' le'e. Na' bi chacbe'ele leca bene' zban nacle len Diosen'. Bi chacbe'ele nacle ca to bene' bi chle'e o ca to bene' laže' ga'alyid da' bi

chejni'ile xtižan' neca chzenagle chen. <sup>18</sup>Da'nana' chnia' le'e cheyala' si'le da' gona' le'e, le naquen da' zaca'ch ca oro dan' ba bosozeye' cont bega'an da' dogualje. Si'le da' gona' le'e cont da' li soale mbalaz. Na' le nab yezi'xena' xtoła'le cont gac lažda'olen' xilaže' can' chac xalana' bene' nyaz to lache' šiš xila'. Gonle ca' cont bich le'eda' le'e ca to bene' laže' ga'alyid, bene' cheyala' gaque zto'. Na' le güe' latje yocoba' xbab chelen' cont bich gacle ca to bene' bi chle'e, bene' chyažje rmed che yejlagüe' cont le'ede', san gacbe'ele da' chaclaže' Diosen' gonle. <sup>19</sup>Note'teze bene' chacda', chdiła'ne' na' chnežjua'ne' castigw cate' chone' da' xiñj. Da'nana' cheyala' cuec yichjle yetinjele xtoła'len'. <sup>20</sup>Chnia' to tole ca to bene' zecha cho'a yo'o chelen' chnie' na' chsiže' le'e puerten'. Note'tezle še gwzenagle chia' na' še saljwle cont šo'a, yedesoa' len le'e na' gona' cont soale mbalaz txen len neda'. <sup>21</sup>Na' note'tezle še soele bi cuejyichjle xtižan', žin ža gona' cont cue'lenle neda' gan' chi'a chnabi'a. Can' bena' neda', gwzoeda' cont bena' can' gwna' Xan' nach chi'lena'ne' chnabi'a'to' txen. <sup>22</sup>Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

#### Ben' že' yaban' chesonxene' Diosen'

**4** Beyož bzoja' da' ca' gwne' neda', ble'edaogüeda' nyaljo to puert yaban'. Nach da' yoble benda' gwne Jesucristw ben' gwne neda' da' nechw zižjehgua cacze zižje chbež to trompeta, gože'nda':

—Gwyep gan' zoa' nga cont gwlo'eda' le' da' ca' za' gac.

<sup>2</sup>Nach la' bente Spiritw che Diosen' cont ble'edaogüeda' yaban' gan' chi' Diosen' chnabi'e. <sup>3</sup>Na' ble'eda' ben' chi' chnabian' chactite' ca chactit yejese, yej da' nzi' jaspe na' da' nzi' cornalina. Na' to da' nac ca to pita' gwyechjen gan' chi'e chnabi'en, na' chactiten ca chactit to yej da' nzi' esmeralda. <sup>4</sup>Na' cue'ej cuit Diosen' gan' chi'e chnabi'e zjachi' yetapechoa bene' gwlej Diosen' zjanaque' blao, bene' chesenabi'e txen len le'. Zjanyaze' lache' šiš na' zjazoa corona de oro yichj to togaque'. <sup>5</sup>Na' gan' chi' Diosen' chnabi'e chap yes na' chac sšag na' chašjw chtin. Na' lagüen' nita' gaže yi' da' čala'nin. Yi' ca' gaže zjanaquen Spiritw che Diosen', na' Spiritw che Diosen' naquen ca gaže spiritw. <sup>6</sup>Na' doxen lagüe' gan' chi'e chnabi'en nžiljw lo yon' to da' chactit ca vidrw na' nlan' ca to nis nyadi da' nla'xeje.

Na' nita' yetap bene' gan' zoa Diosen'. Tgüeje' nita' cuite' chop la'ate, yetoe' cože' na' yetoe' lagüe', na' zjažia da' zan yejlaogaque', žia da' žia laogaque' na' lente cože'gaque'. <sup>7</sup>Bene' nechw naque' ca to león, na' bene' gwchope ca to go'n, na' bene' gwyone nac cho'alagüe' ca che benač, na' bene' gwdape naque' ca to bsia be ze lo be'. <sup>8</sup>Na' dapte bene' ca' to toe' žia xop güeje xilgaque', na' zjažia zan yejlaogaque' lo xilen' lente cože' xilen'. Na' do ža do yel bi chososane' chesene':

Leca bene' laždao' xilaže' juisyw nac Xancho Diosen' ben' nape la'zelagüe yela' guac xen.

Ba zoacze' cate' za' xe yežlion', na' soacze' toli' tocaņe.

<sup>9</sup>Na' yogo' ni'a cate' bene' ca' tap cheso'e diža' catec bene' zaca' nac Dios ben' chi' chnabia', ben' zoacze toli' tocaņe, yogo' ni'a cate' chesonxene' le' cheso'e yela' choxcen che', <sup>10</sup>bene' tapechoa ca' gwlej Diosen' cont zjanaque' blao chosozoa xibe' lao Dios ben' zoa toli' tocaņe chesonxene' le' gan' chi'e chnabi'e na' chosonite' corona čhegaquen' xni'en, chesene':

<sup>11</sup>Xanto' Dios, zaco' gonxento' le', na' soato' le' bala'an na' güe'to' diža' che yela' guac xen chion', le len' beno' yogo'lol da' de, na' beno' yogo'lole con ca gwnalažo'.

Jesucristw ben' zaca'lebe ca xila' daon' gosot bene' Israel ca' neče xtoła'gaque'

**5** Na' ble'eda' Dios ben' chi' chnabia', len ne'e liča noxe' to yiš da' ndobyoyen na' nyoj chop la'aten na' nyeyjon nyišen' gaže seyw. <sup>2</sup>Na' ble'eda' to angl gual gwne' zižje gwne':

—čNon' zaca' gwzoxj seyw ca' cont šaš yišen'?

<sup>3</sup>Na' nono bžel bene' zaca' gwzaše' yišen' neca yaban' na' ne yežlion' na' neca gan' že' bene' guat ca'. Ne to nono bžel bene' la'čh le'ezden' nac naquen. <sup>4</sup>Na' gwčežčgua' da' nono zoa bene' zaca' gwzaše' yišen' gwlaben' na' neca zaque' na'ze' nac naquen. <sup>5</sup>Nach to bene' gwlej Diosen' cont naque' blao gože'nda': —Bitw cuežo'. Gwņašc, na' zoa Jesucristw ben' golje lo diaža che da' Judá, naque' rey can' nac da'

xozxta'ogüe' David, na' da' nape'  
yela' chnabia' xen zaca'lebde' ca  
to bež be nzi' león. Na' le' zaque'  
gwzoxje' seyw ca' gaže na' gwzaše'  
yišen', le ba gwzoede' bene' cont gac  
nitlao xtoła' beṇachen'.

<sup>6</sup>Nach ble'eda'ne' zeche' gan'  
chi' ben' chnabian' na' ladjo beṇe'  
ca' tap ben' zjažia xil, do gachol  
beṇe' blao ca' tapechoa. Ble'eda'ne'  
ca to xila' dao' ben' ba gosote', ca  
xila' be žia gaže lozba' na' gaže  
yejlaoba'. Na' yejlaoban' gaže zejen  
zoa Spiritw che Diosen' doxen lo  
yežlion' chonen can' ža Diosen'.

<sup>7</sup>Nach ben' ble'eda' ca to xila' dao'  
jaxi'e yiš dan' noxe' ben' len ne'e  
liča gan' chi'e chnabi'en. <sup>8</sup>Na' cate'  
jaxi'e yišen' bene' ca' tap lente beṇe'  
blao ca' tapechoa bosozoa xibgaque'  
lagüen'. Na' to to beṇe' blao ca'  
zjanoxe' to arpa na' to barser de  
oro gan' chey yal, na' yalen' zejen  
xtiža' beṇe' ca' zjanac lo na' Diosen',  
dižan' cheso'e'lene' le' caten' chosol  
güiže'ne'. <sup>9</sup>Nach beṇe' ca' gosole' to  
da' cobe dan' ža:

Zaco' jaxi'o yišen' cont gwzašon'  
na' gwzoxjo' seyw ca' nyišen',  
le bnežjw cuino' gosote' le'.  
Blalj xcheno' cont bnitlaguo'  
xtoła'to',  
na' gwxi'o neto' cont nacto' lo na'  
Dios,  
neto' nacto' beṇe' to to nación,  
to to yež, to to diaža na'  
chacto' gwde gwdele diža' da'  
de lo yežlion'.

<sup>10</sup>Na' gwlejo' neto' cont nacto' ca  
rey,  
na' zoato' chonxento' Dios  
cheton' ca bxož,  
na' žin ža ṇabia'to' lo yežlion'.

<sup>11</sup>Nach gwṇa'a na' ble'eda' beṇe'  
zan juisyw angl, neca gwzoeda'  
gwlabane'. Zjazecha angl ca' cue'ej  
cuit ben' chi' chnabian' na' gan'  
že' beṇe' ca' tap na' beṇe' blao ca'  
tapechoa. <sup>12</sup>Na' benda' cheso'e'  
dižan' zižje chesene':

Jesucriston' bnežjw cuine' neche  
xtoła' beṇachen',

na' da'nan' zaca'lebde' ca xila'  
daon' gosot beṇe' Israel cont  
gwnitlao xtoła'gaque'.

Na' Jesucriston' zaca'cze'  
gonxenchone',

le chnabi'e doxen, na' yo'o lo  
ne'e yogo'te da' zjade.

Naque' beṇe' sina' gual, na' nape'  
yela' guac xen.

Cheyała' güe'chone' yela' bala'an,  
na' güe'cho diža' naque' beṇe'  
zaca' juisyw.

<sup>13</sup>Na' lecze benda' yogo' beṇe' že'  
yaban' na' yežlion' na' beṇe' že' latje  
che beṇe' guat, na' beṇe' zjanita' lo  
nisdao', cheso'e' diža' chesene':

Tołi tocaṇe chonxencho Dios  
ben' chi' chnabia'

na' Jesucriston' ben' zaca'lebde'  
ca xila' daon' gosot beṇe' Israel  
cont gwnitlao xtoła'gaque'.

Zjanape' yela' bala'an, na'  
zjanaque' beṇe' zaca' juisyw,  
na' zjanape' yela' guac xen  
juisyw toli tocaṇe.

Na' benda' lecze can' gosena be chaš  
yežlion' na' be chaš le'e yaban' na' lo'  
nis, na' len yogo' bichle da' zjade.

<sup>14</sup>Nach beṇe' ca' tap ben' zjažia xil  
gosene':

—Cašcaze gac.

Na' beṇe' blao ca' tapechoa  
bosozoa xibgaque' gosonxene' Dios  
ben' zoa toli tocaṇe.

## Seyw ca' gaže

**6** Ca nac seyw ca' gaže, ble'eda' cate' ben' zaca'lebde' ca xila' daon' be gosot bene' gualaž četo' neče xtoła'gaque' bzoخة' seyw nechon'. Nach bene' ca' tap zjažia xil, toe' gwne' zižje, ca zižjen' chašjw chtin yi' gwzio', gwne':

—Da, na' gwna' da' nga.

<sup>2</sup>Na' cate' gwna'a, ble'eda' to cabayw be šiš na' ben' žie' cože'ban' noxe' to arcw. Ba bosozoe' to corona yichje' neče da' ba bene' gan lo gwdile, na' na'a ba zeje' da' yoble cont tillene' nochle bene' chesegue'ede' le' na' gone' gan legaque'.

<sup>3</sup>Na' ben' zaca'lebde' ca xila' dao' be gosot bene' gualaž četo' neče xtoła'gaque', cate' bzoخة' seyw gwchope benda' gwne' yeto ben' žia xil, ben' nac bene' gwchope, gwne':

—Da, na' gwna' da' nga.

<sup>4</sup>Nach bchoj yeto cabayw, na' bena' nacba' be xna. Na' ben' žie' cože'ban' gwyo'o lo ne'e gone' cont bene' že' yežlion' bich yesenite' binlo len lježe' san yesot lježe'. Na' bosonežjue'ne' to spada xen.

<sup>5</sup>Na' cate' ben' zaca'lebde' ca xila' daon' be gosot bene' gualaž četo' neče xtoła'gaque' bzoخة' seyw gwyone, benda' gwne' bene' gwyone ben' žia xil, gwne':

—Da, na' gwna' da' nga.

Nach gwna'a na' ble'eda' to cabayw gasj na' ben' žie' cože'ban' noxe' to xigonz. <sup>6</sup>Na' benda' gwne' to bene' do gan' že' bene' ca' tap ben' zjažia xil, gože' ben' žia cože' cabayw gasja', gwne':

—Gwey jažiayi' trigw na' cebada cont yesaquen gwbin na' cont čop

ya trigw saca' laxjue' da' yesone' gan tža žin na' xop ya cebada saca' laxjue' da' yesone' gan tža žin, perw bi gono' cont cuiayi' set na' vino.

<sup>7</sup>Na' cate' ben' zaca'lebde' ca xila' daon' be gosot bene' gualaž četo' neče xtoła'gaque' bzoخة' seyw gwdape, benda' gwne' bene' gwdape ben' žia xil, gwne':

—Da, na' gwna' da' nga.

<sup>8</sup>Nach gwna'a na' ble'eda' to cabayw be gaše, na' ben' žie' cože'ban' lie' Yela' Got. Na' yeto bene' zej cože', lie' Latje Gan' Že' Bene' Guat. Na' gosac lo na'gaque' bosoxie' gwdile gan' gosat bene' zan, na' gosone' cont gosat yezane' gwbin, na' gosone' cont yezan bene' gosate' len yižgüe', na' gosone' cont be znia gosotba' yezane', na' goc ca' lao to tlcw yežlion' dan' gosac lo ne'e.

<sup>9</sup>Nach cate' ben' zaca'lebde' ca xila' daon' be gosot bene' gualaž četo' neče xtoła'gaque' bzoخة' seyw gayo', ble'eda' mes gan' bene' ca' že' yaban' chosozeye' bi dan' chosozeye' cate' chesonxene' Diosen', na' xni'a mesen' ble'eda' bene' ca' ba gosot yezica'chle bene' legaque' lagüe dan' bosozenague' xtiža' Diosen' na' lagüe dan' goso'e diža' gosene' chesejnilaže' Jesucriston'. <sup>10</sup>Na' bene' guat ca' gosene' zižje gosene':

—Xanto' Dios, le' naco' bene' laždao' xilaže' juisyw na' zoaczo' chono' con ca' žo'. ¿Batcan' gono' yela' justis che bene' ca' že' yežlion' ben' gosot neto'? ¿Batcan' gono' cont yesezaca'zi'e da' bosolalje' xčhenton'?

<sup>11</sup>Nach Diosen' bnežjue' to to bene' guat ca' tgüeje xagaque' da'



šiš da' gosaze'. Na' gože' legaque' yesyezi'laže'che' yeto chop ža šlac yeseza' bene' cheyala' yesat can' gosate' lagüe da' chesonxene' Criston', bene' zjanac ca biše' lježe'.

<sup>12</sup>Nach ben' zaca'lebde' ca xila' daon' be gosot bene' gualaž cheto' neche xtola'gaque', cate' bzojje' seyw gwwope, gwna'a na' leca gwwo'. Na' gwbižen' beyaquen gasj ca lache' gasj da' chesaz bene' chesezüine', na' doxen bion' beyaquen xna ca chen. <sup>13</sup>Na' beljw ca' besejnjjen besežinten lo yežlion' can' chyinj no yixgüigw da' žia lo xyaguen cate' chechj to be' gual da' chtan len. <sup>14</sup>Nach le'e yaban' benittecczen ca to no yiš da' chedoblolen. Na' yogo' ya'a ca' na' no yežlio dao' da' ca' zjachi' lo' nisdaon' bosoša' xišnan'. <sup>15</sup>Nach yogo'lol bene' že' yežlion', yogo' bene' ca' chesenabia' lo yežlion', yogo' xan soldadw, yogo' bene' blao bene' gwni'a, yogo' bene' cheson xšin bene' yoble ca beyixe', na' len yezica'chle bene', yogo'cze' bosocuaše' cuingaque' do xan bloj, do ladjo yej xen da' zjažia lo ya'a ca'. <sup>16</sup>Na' gosene':

—Chešca bdiñj na' yej quinga na' ya'a quinga yesebixen yeseyenen chio' cont bi le'e Diosen' chio', Dios ben' chi' chnabia', na' yeseyenen chio' cont Jesucriston' ben' zaca'lebde' ca xila' daon' be gosot bene' neche xtola'gaque' bi gone' saca'zi'cho. <sup>17</sup>Le ba bžin ža gac juisyw, na' Diosen' len Jesucriston' leca cheseže'e chio' bi chonxencho legaque', na' nono soe da' yesone' saca'zi'cho.

**Bene' Israel ca' bene' zjanyiše' seyw che Diosen'**

**7** Gwdena' ble'eda' tap angl zjazeche' tap squin che yežlion'

bosozague' ben' cont bi gwyechjen lo yežlion', lo nisdaon' o gan' ze yag ca'. <sup>2</sup>Na' ble'eda' yeto angl bene' za' gan' chla' gwbiž na' noxe' to da' gwchine' gwchiše'de' seyw che Dios loxga bene' ca' chesonxen le', Dios bene' zoa toli tocane. Na' anglen' gwne' zižje bol güiže' angl ca' tap ben' zjanac lo ne'e yesone' gac yela' zi' lo yežlion' len lo nisdaon'. <sup>3</sup>Gože' legaque':

—Bi gwžiai'yile yežlion', ne nisdaon', ne yag ca' šlac bina' gwchiša' seyw che Dios checho loxga bene' ca' chesonxen le'.

<sup>4</sup>Na' benda' gwne' bal bene' bchiše' seyon' bene' za'ac lo yogo' diaža che bene' Israel, na' yogüe' gosac to gayoa tapeyon mile'. <sup>5</sup>Šižinw mile' za'aque' lo diaža che da' Judá, šižinw mile' lo diaža che da' Rubén, šižinw mile' lo diaža che da' Gad, <sup>6</sup>na' šižinw mile' lo diaža che da' Aser, šižinw mile' lo diaža che da' Neftalí, šižinw mile' lo diaža che da' Manasés, <sup>7</sup>na' šižinw mile' lo diaža che da' Simeón, šižinw mile' lo diaža che da' Leví, šižinw mile' lo diaža che da' Isacar, <sup>8</sup>šižinw mile' lo diaža che da' Zabulón, šižinw mile' lo diaža che da' José na' šižinw mile' lo diaža che da' Benjamín.

**Bene' zan zjanyaze' lache' šiš**

<sup>9</sup>Na' gwdena' gwna'a da' yoble na' ble'eda' zjaze bene' zan lao Diosen' gan' chi'e chnabi'e na' lao ben' zaca'lebde' ca xila' daon' be gosot bene' Israel neche xtola'gaque'. Na' nono goc yosolab bal bene' že', le gosaque' bene' zan juisyw, bene' to to nación, to to yež, to to diaža, na' gosaque' bene' chesac gwde gwdele

diža' da' de lo yezlion'. Na' yogüe'  
zjanyaze' lache' šiš na' zjanoxe' zin.

<sup>10</sup>Na' chesyebede' bososye'e gosene':  
Xanto' Dios ben' chi' chnabia'  
na' Jesucristw ben' zaca'lebde'  
ca xila' daon' be gosot bene'  
Israel neche xtoła'gaque',  
legaque' ba gosone' yela' mban  
checho toli' tocanē.

<sup>11</sup>Nach yogo'loł angl ca' zjaze' cue'ej  
cuite' gan' chi'e chnabi'e, na' bene'  
blao ca' tapechoa na' bene' ca' tap  
zjažia xil, yogo'lole' jasechaze'  
coscho'ale lo yon' gosonxene'  
Diosen', <sup>12</sup>gosene':

Chac can' cheyała' gac, Dios  
chetō'.

Zaca'czo' gonxento' le' toli'  
tocanē,

le naco' bene' zaca' juisyw,  
naco' la'zelagüe bene' sina',  
zaco' güe'to' yela' choxclen chio'  
na' güe'to' yela' bala'an' chio'  
to'li' tocanē,

chnabi'o doxen, na' napo'  
la'zelagüe yela' guac xen.

Can' nacczen.

<sup>13</sup>Nach to bene' blao ben' nac txen  
len bene' tapechoa ca' gože'nda':

—¿Nezdo' no zjanac bene' quinga  
zjanyaz lache' šiš na' ga za'aque'?

<sup>14</sup>Na' boži'an goša'ne':

—Le' nezdo' bene' gole, bi nezda'  
neda'.

Nach gože' neda':

—Bene' quinga ba gosale'de' da'  
ba gosac chegaque' yezlion'. Na'  
bach gwnitlao xtoła'gaque' na' ba  
zjanyaze' lache' šiš, le chesejnilaže'  
Jesucristw ben' blalj xchene' ca  
xila' dao' be gosot bene' Israel  
cont bezi'xen Diosen' xtoła'gaque'.

<sup>15</sup>Da'n'an' nite' lao Diosen' gan'

chi'e chnabi'en chesonxene' le'  
do ža do yel. Na' Dios ben' chi'  
chnabi'e zoe' chape' legaque'. <sup>16</sup>Bich  
yesebil yesedone', na' gwbižen'  
bich gwzeyen legaque', neca  
yesacde' zeye'. <sup>17</sup>Le Jesucristw ben'  
zaca'lebde' ca xila' daon' ben' gosot  
bene' Israel neche xtoła'gaque', len'  
chgüia chne'e legaque'. Ze' lao  
Diosen' gachol gan' chi'e chnabi'e  
na' gone' cont nita'chgüe' mbalaz.  
Gone' cont bich yesebeže' neca  
yeseğüine'de'.

### Seyw gažen'

**8** Gwde gože' neda' ca', nach  
Jesucristw ben' zaca'lebde' ca  
xila' daon' be gosot bene' gualaž cheton'  
bzojje' seyw gaže da' nyiše' yiša, na'  
cate' bzojxen' gocži yaban' do gašj hor.  
<sup>2</sup>Na' ble'eda' gaže angl ca' zjazeche' lao  
Diosen', na' bnežjue' legaque' tgüeje  
trompeta. <sup>3</sup>Na' yeto angl bedeseche'  
cho'a mes de oro da' zoa lao Diosen' gan'  
chi'e chnabi'e, mesen' gan' bene' ca' že'  
yaban' chosozeye' bi da' chosozeye' cate'  
chesonxene' Diosen'. Na' angła' noxe' to  
barser de oro gan' yo'o da' zča'o yal  
na' bžien' lo yi' ya'alj da' žia lo mesen'.  
Anglen' bene' ca' cont naquen txen  
len ši'i bene' ca' chesonxene' Diosen'  
bate'teze chosol güiže'ne'. <sup>4</sup>Nach gwyas  
žen che yala' noxe' anglen' gwloen lao  
Diosen' len xtiža' bene' ca' chesonxene'  
le'. <sup>5</sup>Nach anglen' gwxi'e ya'alj da' žia lo  
mesen' gwlo'en lo' barseren' na' bzalen'  
lo yezlion' na' gošj gwtinchgua, na' goc  
bichle sšag, gwyep yes na' gwxo'.

### Trompeta ca'

<sup>6</sup>Nach angl ca' gaže ben' zjanoxe'  
trompeta ca' bosozoan' cho'agaque'  
cont yosocuežen'.

<sup>7</sup>Angl nechon' bcuež trompeta chen', na' gwche'chgua yej lo yežlion' na' nchixen yi' na' chen. Na' da' zcha'o yežlion' gwžiyai', yelate'ze ca goc gašje yo da' de lo yežlion' gwyeyen, lente yag da' ze lagüen goseyen, na' lecze yeto ca'ate' yixe' ga' da' de lo yežlion' goseyen.

<sup>8</sup>Nach angl gwchope bcuež trompeta chen', na' to da' nac ca to ya'a xen blažon' lo' nisaon' čala'ninen. Na' yelate'ze ca goc gašje nisaon' beyaquen chen. <sup>9</sup>Na' yelate'ze ca goc gašje be ca' že' lo' nisaon' gosatba', na' leze yeto ca'te' barcw ca' chaš lo nisen' gosebiayin'.

<sup>10</sup>Nach angl gwyone bcuež trompeta chen' na' to beljw xen blažon' le'e yaba čala'ninen ca to yi' yech. Jago'onen lo da' zan yegw na' da' zan ga chal nis lo yežlion', yelate'ze ca goc gašje yegw ca' na' ga chal nis dan' zjade yežlion' gan' jago'onenna'. <sup>11</sup>Na' beljon' nzin' Da' Zla', na' nisen' gan' jago'onenna' beyaquen zla' na' bene' zan gosat dan' gose'eje' nisen'.

<sup>12</sup>Nach angl gwdape bcuež trompeta chen' na' yelate'ze ca goc gašje gwbižen' gwžiyain', lecze yeto ca'te' bion' gwžiyain' na' lecze yelate'ze ca goc gašje beljw ca' gosebiayin'. Na' da' ca' gosebiayin' bich bososenin'. Da'nan' gwdena' goc chol yelate'ze ca goc gašj ža gašj yel, na' goc ca' yogo' ža yogo' yel.

<sup>13</sup>Nach gwna'a na' ble'eda' chda lo be' to angl do gachol le'e yaban' na' benda' gwne' zižje, gwne':

—iNyaše'chgua yesac che bene' ca' že' yežlion' yeyož yosocuež angl ca' yešone trompeta čegaquen'!

**9** Nach angl bene' gayo' bcuež trompeta chen' na' ble'eda' to beljw da' blažon' le'e yaban' jago'onen lo yežlion'. Na' beljon' goquen ca to bene' na' Diosen' bnežjue'ne' xinya cont saljue' yechw zitjwchgua dan' nac lo gabil'. <sup>2</sup>Nach gwsaljue' yechon' na' gwyaschgua žen can' chas žen cate' chesebeque' yi' gual to lo' horn. Na' goc chol le'e yaban' can' chac cate' čičhgua žendao', lao gwbižen' len lo be' goquen chol catec gwche' ženna'.

<sup>3</sup>Gan' gwyas ženna' besežaš biše'zo zan gwyasba' lo yežlion', be yeseyižba' bene' can' cheson bexjoni' be chaš yežlio. <sup>4</sup>Diosen' gože'ba' bibi yesoneba' yixe' ga', ne da' zjanaze' na' neca yag ca' ze yežlion', san yeseyižba' bene' ca' bi nyiše' sey che Diosen' loxgagaque'. <sup>5</sup>Na' bi be'e latje yesotba' legaque', san šašba' gayo' bio' yosoči yososaca'ba' bene' ca'. Na' cate' yeseyižba' bene', yesežaglagüe' can' čžaglaochi cate' chyž bexjonin' chio'. <sup>6</sup>Na' cate' žin ža yesomba' ca', bene' že' yežlion' yesenablaže' yesate', perw bi yesate'; yesaclaže' bich yesenite', perw bi gac can' yesaclažen'.

<sup>7</sup>Ca nac biše'zo ca', ble'eda' zjanacba' ca cabayw be šja'ac lo gwđile. Yichjgacban' zjazoa da' nac ca corona de oro. Cho'alaoban' naquen ca cho'alo benach.

<sup>8</sup>Zjažiab' yiša' da' nac ca yiša' yichj no'ole. Layban' zjanaquen ca lay bež znia be nzi' león. <sup>9</sup>Na' zjanyazba' to da' nac de ya da' chcue'ejen cuerp čhegacban'. Na' sšag da' chesomba' len xilgacban' čhninen ca čhnin cate' chesa'aces cabayw zan zja'acba' lo gwđile zjanxobba' carret.

<sup>10</sup>Na' lo xban biše'zo ca' zjazoa liba' zjanaquen ca xban bexjoni' cont yeseyižba' bene', na' goc lo na'gacba' yosoči yososaca'ba' bene' že' yežlion' gayo' bio', yeseyižba' legaque'. <sup>11</sup>Angl ben' beyac da' xigüe' dan' chnabia' gabilen' naquen xan biše'zo ca'. Lenña' nzi' Abadón diža' hebreo na' lecze nzin' Apolión diža' griego, na' zejen diža' Da' Chžiyain'.

<sup>12</sup>Ba gwde yela' zi' nechon' na' za' za'ac yechopen.

<sup>13</sup>Nach bcuež angl gwxopen' trompeta chen', na' benda' gwne to bene' do gan' zoa mes de oro dan' ze lao Diosen', mes da' žia lozen dapte squin, mesen' gan' bene' ca' že' yaban' chosozeye' bi da' chosozeye' cate' chesonxene' Diosen'. <sup>14</sup>Na' bol' güiže' angl gwxop ben' noxe' trompetan', gože'ne':

—Besež dap angl ca' ben' besyeyac bene' mal ben' zjanchej cho'a yegw da' nzi' Eufrates.

<sup>15</sup>Nach beseže' angl ca' tap bene' ca' bnita' Diosen' cont yesaše' lo iz, bio', ža na' horen' nžie' bia' yesote' benač, na' caten' gosaše', yelate'ze ca' goc gašje bene' že' yežlion' gosote'. <sup>16</sup>Na' gwnita' chop gayoa millón soldadw chegaque' zjažie' cože' cabayon'.

<sup>17</sup>Quinga ble'edaogüeda' cabayw ca' na' angl ca' bene' besyeyac bene' mal zjažie' cože'gacba' zjanaque' soldadw. Angl ca' zjanyaze' to de ya da' hcue'ej cho'alcho'gaque' na' yana' chnan' ca' color che yi' na' chnan' da' azul na' da' gaše. Na' yichj cabayw ca' zjanaquen ca yichj bež znia be nzi' león, na' chchoj yi' cho'agacba' len žen na' len azufre

da' chala'nin'. <sup>18</sup>Yelate'ze ca' goc gašje bene' že' yežlion' gosat len yi' na' len žen na' len azufre da' bchoj lo cho'agacba'. <sup>19</sup>Na' bosochin cho'agacba' na' len xbangacba' cont gosotba' benač, na' xbangacban' gosaquen ca' bel' na' zjansa' yichjen cont goseyi'inen bene'.

<sup>20</sup>Na' bene' ca' besyega'an bi gosat cate' gwaš cabayw ca' lo yežlion', legaque' bi besyetingjde' che da' mal ca' chesone', neca bososane' da' chesonxene' da' xigüe' ca' na' l' gua'a lsaca' chegaque' ca' da' zjanac de oro, de plata, de bronze, de yej o de yag, la'czla' l' gua'a lsaca' ca' bi chesele'en, neca chesenen, na' neca chac yesa'aquen. <sup>21</sup>Na' neca besyetingjde' cont yesebejyichje' bichle da' mal da' chesone', ca' dan' chesote' bene', da' chesone' txen len no bene' guaža', da' chesone' da' yela' zto' len cuerp chegaquen', na' da' chesebane' da' de che bene'.

Angl bene' noxe' yiš dao' ndobyoyen

**10** Nach ble'eda' yeto angl gual gwze'e yaban' betje' lo yežlion'. To bejw nyečjen le' na' zoa to pita' yichjen'. Cho'alagüen' chna'titen ca' gwbiž, na' yenie' ca' ble'edan' zjanaquen ca' bdope da' chala'nin'. <sup>2</sup>Anglen' noxe' to yiš dao' da' ba beyašen. Na' bzoa šla'a ni'e licha lo nisaon' na' yešla'an bzo'e lo yežlion'. <sup>3</sup>Na' bosye'e zižje ca' zižje chosya'a be nzi' león. Na' cate' bosye'e gwne gwzio' gaž ni'a na' to gwzion' zoa da' gosenan. <sup>4</sup>Beyož goc ca' na' ba zoa gwzoja' diža' da' benda' šlac gwne gwzion' cate' to bene' zoa yaba gože'nda':

—Bi gwzojo' dižan' bendo' šlac gwne gwzion', san gwdapen lo' yichjlažda'oguo'.

<sup>5</sup>Nach angl ben' zoa šla'a n'ien lo nisaon' na' yešla'an lo yežlion' gwliš ne'e ličan' yabale. <sup>6</sup>Na' gwlo'e da' bałi gac can' ža Dios ben' zoa toli tocane, ben' ben le'e yaba len yogo'te da' chle'echo le'enna', bene' yežlion', beňach, beyixe', na' bite'tezechle da' de lo yežlion', na' bene' nisaon' len be ca' na' da' ca' že' lo'enna'. Gwne':

—Bich cues Diosen' gone' can' ba nžie' bia' gone'. <sup>7</sup>San cate' žin ža gwcuež angl gažen' trompeta chen', cana'ch gac da' nžia Diosen' bia' gac, can' ba gože' bene' ca' goso'e xtižen', da' nono gwneze cani'.

<sup>8</sup>Nach da' yoble ben' zoa yaban' ben' ba benczeda' gwnie' neda', gwne':

—Gwey jaxi' yiš dao' dan' ba beyaš dan' noxe' angl ben' zecha zoa šla'a n'ien lo nisaon' na' yešla'an lo yežlion'.

<sup>9</sup>Da'nan' gwy'a gan' zoa anglen' jaňaba' yišen'. Na' anglen' gože'nda':

—Bexon' gwdagon'. Lo' cho'on gacdon' zix ca šina' beser, perw lo' li'on yeyaquen zla'.

<sup>10</sup>Nach bexo'a' yišen' noxe' anglen' gwdaguan'. Na' lo' cho'an goquen zix ca šina' beser, perw cate' bedaguan' beyaquen zla' lo' li'an. <sup>11</sup>Nach anglen' gože' neda':

—Da' yoble cheyał'a' go'o xtiža' Diosen' na' nao' can' gac che zan yež, che zan nación, che bene' chesac gwde gwdele diža' da' de yežlion', na' che zan bene' gwnabia'.

**Chope bene' goso'e xtiža' Diosen'**

**11** Nach anglen' bene' neda' to ya ca nac da' chosočhine' cate' chosočhixe' yo'o, na' gože'nda':

—Gwey jachixe yodao' blao na' mes gan' chosozeye' bi da' chosozeye' cate' chesonxene' Diosen', na' gwlabo' bał bene' že' chesonxene' le'. <sup>2</sup>Perw bi gwchixo' chyo'on, le ba naquen lo na' bene' bi zjanac bene' Israel bene' bi chesejnilaže' Diosen' cont yesone' nacteze chesaclaže' lo ciuda che Dios lao chopeyon bio'.

<sup>3</sup>Na' seł'a' chope bene' yeso'e xtiža', na' yesaze' lache' gasj ca to bene' cheguine' na' yeseyixjue'ede' xtižan' lao to mil chop gayoa gayon ža.

<sup>4</sup>Bene' ca' chope zjazaca'lebe' ca yag olivos ca' chope na' ca candelar ca' chope da' zjazoa lao Diosen' ben' nac Xan yežlio. <sup>5</sup>Na' še no chaclaže' gonxi'e legaque', choj yi' cho'a bene' ca' yeso'e xtižan' na' gwzeyen bene' chgue'ede' legaque'. Can' gac yesat note'teze bene' chende' gonxi'e bene' ca' chope. <sup>6</sup>Na' bene' ca' yeseyixjue'ede' xtižan', gac lo na'gaque' yesone' cont bi gac yejw šlac yeso'e xtižan', na' gac lo na'gaque' yesone' cont nisen' yeyaquen chen, na' bate'teze yesaclaže', yesone' gac bite'tezechle da' yesežagłao bene' že' yežlion'.

<sup>7</sup>Perw cate' yeyož yeso'e xtižan', nach choj lo' gabił gan' nac yechw zitjwchgua to bež xigüe' nizba' legaque' na' gotteba' legaque'. <sup>8</sup>Na' bene' ca' že'na' yosyocua'ane' cuerp chegaquen' gan' chesetolen la cay che ciuda blaon' gan' gosote' Xancho Jesucriston'. Ciudadan' zaca'leben ca ciuda Sodoma na' ca nación Egipto.

<sup>9</sup>Na' šone ža yo gašje bene' za'ac zan yež na' zan nación, bene' zjanac zan diaža, bene' chesac gwde gwdele diža' da' de lo yežlion', yesene'e bene' guat ca' na' bi yeso'e latje

yeseğaše'. <sup>10</sup>Beñe' ca' že' yežlion'  
yesebede' da' gosat beñe' ca' čhope,  
na' yosonežjo lježe' bi da' yosonežjo  
lježe' da' chesyebede' dan' bich  
nita' beñe' ca' yeso'e xtiža' Diosen'  
len legaque', le leca zed chesacden'.

<sup>11</sup>Na' ble'edaogüeda' gwde šone  
ža yogašje Diosen' bosbane' beñe'  
ca' čhope na' gosezeche' da' yoble.  
Na' yogo' beñe' besele'e legaque'  
besežebchgüe'. <sup>12</sup>Nach beñe' ca'  
gosoe' xtiža' Diosen' gosende' gož  
Diosen' legaque' zižje:

—Le yeda, le yeyep nga.

Nach beñe' ca' chesegue'e legaque'  
besele'ede' besyeyep'e yaban' to lo'  
bejw. <sup>13</sup>Šlac chesyeyep'en' leca gwxo'  
na' gwžiyai' late' ciudan', na' gaže  
mil beñe' gosat caten' gwxon'. Na'  
beñe' ca' besyega'an' besežebchgüe'  
na' gosonxene' Dios ben' zoa yaba.

<sup>14</sup>Ba gwde yela' zi' gwchopen' na'  
za' gac da' gwyone'.

**Can' goc cate' angl gaže  
bcueže' trompeta čhen'**

<sup>15</sup>Nach angl beñe' gažen' bcuež  
trompeta čhen' na' benda' bał beñe'  
ca' že' yaban' gosene' zižje, gosene':

Doxen yela' chnabia' che yežlion'  
bač naquen lo' na' Xancho  
Diosen' na' lo' na' Cristo ben'  
gwleje' cont chnabi'e.

Na' Diosen' zoacze' chnabi'e toli  
tocane.

<sup>16</sup>Nach beñe' blao ca' tapechoa ben'  
zjachi' cue'ej cuit Diosen', jasechaze'  
coscho'ale lo' yon' gosonxene'  
Diosen', <sup>17</sup>gosene':

Chonto' yela' choxclen čhio'  
Xanto',  
le naco' Dios ben' nap yela' guac  
xen.

Ba zoaczo' cate' biña' xe yežlion',  
na' soaczo' toli tocane.

Na' ba gwzolao chnabi'o len yela'  
guac xen čhion' cont gac can'  
chazlažo' doxen.

<sup>18</sup>Beñe' nación ca' že' yežlion'  
beseže'e le',  
perw ba bžin ža gono'  
yesezaca'zi'e.

Ba bžin ža čhoglaguo' che yogo'  
beñe' ca' ba gosat še noe' nap  
doła'.

Na' gono' cont beñe' güen xšino'  
ca' beñe' ca' gosoe' xtižon'  
yesenite' mbalaz,  
len yogo' beñe' gwlejo' cont  
zjanaque' lo' nao', beñe'  
gosonxen le'.

Con yogo' beñe' gosonxen le'  
yesenite' mba, beñe' gole len  
beñe' xcuide'.

Lecze ba bžin ža yesebiayi' beñe'  
ca' bosožiyai' ljež benače'  
yežlion'.

<sup>19</sup>Nach byaljo gan' chesonxene'  
Diosen' yaban' na' ble'eda' caj gan'  
že' yej ca' gan' nyoj da' ca' gož  
Diosen' beñe' Israel gualaž čheto'  
ca' yesone' cont gaclene' legaque'.  
Na' šlac gwña'a, gwyep yes,  
gocchgua ššag, gošj gwtin, gwxo' na'  
gwche'chgua yej.

**No'olen' na' beł be zoa gaž yichj**

**12** Na' ble'edaogüeda' to da'  
yebanchgüecho le'e yaban',  
ble'eda' to no'ole na' nyaze' gwbižen'  
ca' xe'. Nljeje' lo' bion' na' zoa to  
corona yichje' da' žian šžinw beljw.  
<sup>2</sup>No'olen' no'e bdao' na' chosye'e, le  
chaque' bes che yela' sanna'. <sup>3</sup>Na'  
ble'eda' yeto da' zaca' yebanecho le'e  
yaban', ble'eda' Satanás dan' chnabia'

da' xigüe' ca', ba naquen ca to bel  
 be žia gaž yichj, be xen juisyw.  
 Nacba' be xna na' žia ši lozba' na'  
 zoa tgüeje corona to to yichjban'.  
 4Na' bta xbamban' cont bchinjen  
 zan beljw ca' žia le'e yaban' na'  
 beselažon' lo yežlion', yelate'ze ca  
 goc gašje beljw ca' zjažia le'e yaban'  
 bchinj xbamban'. Na' gwlezba'  
 xni'a no'olen' ba zoa sanña' cont  
 yebba' bdao' chen' cate' sane'be'.

5Nach no'olna' gwxane' to bi' byo  
 bi' nabia' nación ca' na' žan ca žan  
 yosozenague' chebe'. Nach Diosen'  
 beyo'ebe' gan' chi'e chnabi'e. 6Nach  
 no'olen' boxonjde' belen', na' gwyeye'  
 to latje daš da' benšagüe' Diosen'  
 che', gan' yeso'ene' da' ye'ej gagüe'  
 lao to mil chop gayoa gayon ža.

7Gwde na' goc to gwdile yaban',  
 le angl blao ben' le' Miguel na'  
 soldadw che' ca' gosedillene' bel ben'  
 žia gaž yichj lencze angl che belen'  
 bene' ca' besyeyac da' xigüe'. 8Na'  
 belen' len da' xigüe' ca' bi gosezoen  
 angl ben' zjanac bene' che Dios, na'  
 bich bi latje gota' che belen' yaba,  
 neca che da' xigüe' ca' zjanac leba'  
 txen. 9Angl che Diosen' bosozale'ba'  
 lo yežlion'. Na' lecze bosozale' da'  
 xigüe' ca' lo yežlion'. Belnan' ben'  
 zoa ža gwlaste nacba' gwxiye' na'  
 leba' Satanás, na' ne' zoaczba' na'a  
 chziye'ba' yogo' benach.

10Nach benda' to bene' zoa yaban'  
 gwne' zižje gwne':

—Bač bžin ža ben Dios chechon'  
 cont bene' ca' chesejnilaže'ne'  
 zjanite' len le'. Bač bžin ža nacbia'  
 Dios chechon' nape' yela' guac xen.  
 Ba bžin ža chnabi'e cont gac con  
 da' cheyala'cze gac. Na' ba bžin ža  
 Criston' ben' gwleje' cont nabi'e bač

chnabia'lene' le'. Gac da' cheyala'cze  
 gac, le Satanás dan' ba gwzoa  
 lao Diosen' do ža do yel bcuišen  
 bene' chesejnilaže' Criston', bač  
 besyebjejen'. 11Na' bene' gosejnilaže'  
 Criston' na' ba gosate', gosezoede'  
 bi bosozenague' che Satanásen', le  
 gosejle'e Jesucriston' blalj xchene'  
 neche xtoła'gaque' na' goso'e diža'  
 chesejnilaže'ne'. Bene' ca' ba gosat  
 gosache'ede' jejni'a yesate' cnel ca  
 yesebejyichje' Jesucriston'. 12Yaban'  
 cheyala' gosya'an yela' chebe  
 chen, na' le'e že'le gan' zoa Diosen'  
 cheyala' yebele, perw nyaše'chgua  
 gac che le'e zoale lo yežlion' na' lo'  
 nisdakon', le Satanás dan' chnabi'a'  
 da' xigüe' ca' ba betjen gan' zoalen'  
 chaclocchguan, le nezen yešložga  
 de latj chen.

13Nach cate' belen' gocbe'eba'  
 bosozale'ba' lo yežlion', blagsesba'  
 no'olen' gwxan bi' byo daon'. 14Perw  
 Diosen' bnežjue' chop xile' da' xen  
 ca xil bsiadao' cont gwyeye' latje  
 daš gan' bi goc žin belen', latje gan'  
 benšagüe' che' gan' yeso'ene' da'  
 ye'ej gagüe' šon' iz yo gašje. 15Na'  
 bchoj nis zil cho'a belen' goquen to  
 yegw cont bžinen gan' zoa no'olen'  
 na' guan' le'. 16Perw Diosen' bene'  
 cont yežlion' goclenen no'olen',  
 byaljon güe'ejen nis dan' bchoj cho'a  
 belen'. 17Nach belen' blocchguaba'  
 no'olen' na' gwyejba' jatillemba'  
 yezica'chle xi'ine' da' chosozenague'  
 che Diosen', chesone' con da' že' na'  
 zjanita'chache' chesejnilaže' xtiža'  
 Jesucriston'.

Chope bež xigüe' be ble'e Juan

**13** Na' gwzia' cho'a nisdakon' na'  
 ble'eda' bchoj to bež xigüe'



lo' nisdawn'. Bežen' nita' gaž yichjba' na' žia ši lozba' na' žia tgieje corona lao to to lozban'. Na' to to yichjban' nyoj to laba' da' chlo'en chon cuimba' ca Dios. <sup>2</sup>Ble'eda' bežen' nacba' ca to tigr, perw ni'ana'ban' zjanaquen ca ni'a na' oso na' cho'aban' naquen ca cho'a león. Nach bel' ben' žia gaž yichj bnežjwba' bežen' yela' guac na' yela' chnabia' cheban' cont gwnabia'ba' na' cont gosenita' benach bosenague' cheba'. <sup>3</sup>Ble'eda' to yichj bežen' nacchguan güe', ca to da' gatlemba', perw beyacba'. Na' yogo'lo' benach besyebande' dan' beyacban' na' bosenague' cheba'. <sup>4</sup>Yogo'ze bene' gosonxene' belen' dan' bembaba' cont gwnabia' bež xigüen', na' lecze gosonxene' bež xigüen', gosene':

—Nono zoa bene' nap yela' chnabia' xen ca bež nga, na' nono zoa bene' soede' tillene'ba'.

<sup>5</sup>Lecze nono bžon gwna bežen' zaca'chba' ca Dios, na' gwnaba' yela' ya' che Diosen'. Na' goc lo' na' bežen' gwnabia'ba' chopeyon bio'. <sup>6</sup>Na' gwnechguaba' yela' ya' che Diosen' na' che yaba gan' zoe' na' len che yezica'chle bene' ca' že' yaban'. <sup>7</sup>Na' gwyo'o lo' na' bežen' gwdillemba' bene' ca' gosejnilaže' Diosen' na' bi gosoede'ba'. Bibi goc yesone' cont yesyechoje' lo' na'ba'. Gwnabia'ba' yogo' nación, yogo' yež, yogo' diaža na' bene' chesac gwde gwdele diža' da' de lo' yežlion'. <sup>8</sup>Na' yogo' bene' že' yežlion' bene' bi zjanyoj lagaque' le'e libr che Jesucriston', gosonxene' bežen'. Le cate' gwxete yežlion' Jesucriston' bzoje' le'e libr che' la yogo' bene' nezde' gata' yela' mban

chegaque' toli tocane, Jesucristw ben' zaca'lebde' ca xila' dao' be gosot bene' gualaž cheto' neche xto'la'gaque'.

<sup>9</sup>Note'tez le'e žia nagle da' chene, le gwzenag da' nga nia' le'e. <sup>10</sup>Bene' yeseyixjue' ljež benache' ližya, decze de ližya yesata' legaque'. Na' bene' yesot ljež benache' len spada, decze de gac chegaque' ca'. Da'nana' chonen byen soachach chio' ba gwlej Diosen' cont naccho lo' ne'e, gwyo' gwchejcho len bi da' gac checho na' soachachcho šejnilaže'chone'.

<sup>11</sup>Gwdena' ble'eda' yeto bež xigüen' be bchoj lo' yo. Na' žia chop lozba' da' nac ca loz xila', perw be'ba' diža' can' choe' bel' ben' žia gaž yichjen' diža'. <sup>12</sup>Na' bež nechon' bembaba' cont bež gwchopen' gwnabia'ba' par leba' na' bež gwchopen' bembaba' cont yogo' bene' že' yežlion' gosonxene' bež nechon' ben' beyaque len güe' dan' naquen ze da' got leba'. <sup>13</sup>Na' bež gwchopen' bembaba' zan da' bebanchgüe bene' len yela' guac cheban', na' bembaba' cont besele'ede' yi' le'e yaban' na' beselažon' lo' yežlion'. <sup>14</sup>Na' da' bembaba' da' ca' gan' zoa bež nechon', gwziye'ba' bene' že' yežlion' cont bosenague' cheba'. Nach bembaba' mandaw gosone' to l' gua'a lsaca' da' nac ca bež nechon' da' gosonxene', bež ben' goc yichjban' güe' len spada, güe' da' naquen ze da' got leba' perw beyacba'. <sup>15</sup>Na' goc lo' na' bež gwchopen' bembaba' cont l' gua'a lsacan' gwyo'on biš grasyw. Na' goc gwnen, benen mandaw gosote' yogo' bene' bi gosonxenen'. <sup>16</sup>Na' bež gwchopen' lecze bembaba'

byen gosezoa yogo' bene' señw che bežen' le'e na'gaque' licha o loxgagaque', bene' gole len bi' bixjw, na' bene' gwni'a len bene' yaše', na' bene' cheson xšin bene' yoble ca beyixe' len yezica'chle bene'. <sup>17</sup>Na' note'teze bene' še bi zoe' señw che bežen' o laba' o número da' zejen laba', bi goc bi si'e neca goc bi gote'. <sup>18</sup>Chyažjecho yela' sina' cont šejni'icho da' nga. Bene' chejni'i guac gwlabē' número cheban', le naquen número da' chchin benach, na' número cheban' naquen xop gayoa gayon xop.

Da' gosol bene' ca' to gayoa  
tapeyon mil gosonxene' Diosen'

**14** Na' gwna'a na' ble'eda' Jesucristw ben' zaca'lebde' ca xila' dao' be gosot bene' gualaž cheto' neche xtoła'gaquen', zeche' lo ya'a Sión len to gayoa tapeyon mil bene' yoble. Na' zjanyoj la Jesucriston' len la Xe' Diosen' loxgagaque'. <sup>2</sup>Na' benda' chesol bene' zan bene' že' yaban'. Nenen ca chsiž ga zjadechgua yegw zan na' ca nen cate' chašjw chtin. Na' nenen ca nen cate' bene' zan chosogole' arpan' to ši'ize. <sup>3</sup>Na' gosole' to da' cobe lao Diosen' na' lao bene' ca' tap zjažia xil na' lao bene' blao ca' tapechoa gan' chi' Diosen' chnabi'e. Noch no bene' yoble goc gol len, con bene' ca' to gayoa tapeyon mil na'ze gosac bososedē' dan' gosolen' cont gosonxene' Diosen', legacze' bebej Criston' lo na' Satanásen' šlac ne' nite' yežlion'. <sup>4</sup>Bene' ca' gosolen' zjanaque' bene' bi gosata'lene' no'ol bi nac xo'olgaque', na' gosapchgua cuinga'que' cont gosac

lažda'ogaquen' xilaže' len Diosen'. Na' zja'acteze' len Jesucriston' gate'teze zeje' chosozenague' che', le bebeje' lega'que' lo na' Satanásen' cont zjanaque' lo ne'e na' lo na' Diosen'. Da'nan' zjazaca'lebde' ca to tlaw coseš da' bnežjw bene' Israel gualaž cheto' ca' lo na' Diosen'. <sup>5</sup>Gwbat goso'e diža' güenlaže' na' bibi doła' zjanape' lao Diosen' ben' chi'e chnabi'e.

Da' gosena šone angl

<sup>6</sup>Nach ble'eda' yeto angl le'e yaban' chde' lo be'. Na' gwdi'xjue'ede' diža' güen che Diosen' da' bi te chen len bene' že' yežlion', len bene' zjanac to to nación, to to yež, to to diaža, na' bene' chesac gwde gwdele diža' da' de yežlion'. <sup>7</sup>Gwne' zižje gože' lega'que':

—Le žeb Diosen' na' le gonxene', le ba bžin hor gone' yela' justis che benach. Le gonxen Dios ben' ben yaban', yežlion', nisdao' na' ga chal nis.

<sup>8</sup>Yetō angl za' cožen' gwne':  
—Bač bžin ža cuiayi' ciuda Babilonia da' nac da' blao. Bač bžin ža cuiayi' ciuda che bene' ca' bosozoe' Diosen' ca'ale na' gosebede' da' nac yela' zto', le ba gosego'oyele' bene' že' yogo' nación cont chesone' güiedenag len Diosen'.

<sup>9</sup>Nach yeto angl zej cože' bene' gwchopa' be'e diža' zižje gwne':

—Note'teze bene' chesonxen bež xigüen' len l gua'a lsaca' cheba' na' cheso'e latje chesezoa señw che beža' loxgagaque' o taca'gaque', <sup>10</sup>Diosen' ba nžie' bia' yesesaca'zi'chgua bene' ca'. Yesezaca'zi'e gan' čala' yi' len

azufre lao angl che Diosen' na' lao ben' zaca'lebde' ca xila' dao' ben' gosot bene' Israel neche xtoła'gaque'. <sup>11</sup>Tołi tocanē chas žen che yi' gan' yesezaca'zi'en. Na' bene' ca' chesonxen bežen' len l gua'a lsaca' cheban', na' bene' zjazoa señw che bežen' loxgagaque' o taca'gaque', bi gac yesyezi'laže' len da' yesezaca'zi'en ne chel ne lagüe ža. <sup>12</sup>Da'nan' chonen byen soachach chio' ba gwlej Diosen' cont naccho lo ne'en, gwyo gwchejcho len bi da' chac checho, chio' chzenagcho che da' non Diosen' mandadw goncho na' bi chbejyichjcho dan' chejnilaže'cho Jesúsen'.

<sup>13</sup>Nach benda' to bene' zoa yaban' gwne':

—Bzoj da' nga: “Mbalaz bene' ca' ne' chesejnilaže' Xancho Jesucriston' žinte ža yesate'. Can' chac na'a na' can' gac bate'teze.”

Na' Spiritw che Diosen' žan:

—Da' li nite' mbalaz, le yesyezi'laže' len xšingaquen', na' gacbia' yogo' da' güen da' ba gosone'.

**Yotob Diosen' bene' bi chosozenague' che' cont yesezaca'zi'e**

<sup>14</sup>Nach gwna'a da' yoble na' ble'eda' to bejw šiš le'e yaban' na' cože' bejon' chi' to bene' nac ca to benačh. Na' zoa to corona de oro yichjen' na' noxe' to da' nzi' hoz da' nłachgua. <sup>15</sup>Na' yeto angl bchoj lo' gan' chesonxene' Diosen' yaban' na' gwne' zižje gože' ben' chi' cože' bejon':

—Ba bžin hor yotobo' coseš che uvas dan' de yežlion', le ba golen.

<sup>16</sup>Nach ben' chi' cože' bejon' noxe' hoz botobe' cosešen'.

<sup>17</sup>Nach bezchoj yeto angl lo' gan' chesonxene' Diosen' yaban' na' lecze noxe' yeto hoz da' nłachgua. <sup>18</sup>Na' lecze bezchoj yetoe' ben' yo'o lo ne'e yi' da' chała' lo mes gan' chesonxene' Diosen'. Na' angl nga gwne' zižje boł güiže' angl gwchopa' ben' lecze noxe' hoz, gože'ne':

—Ba güe uvas da' žia lo yežlion'. Bečhoguen len hoz chion' dan' nłachgua cont yotobchon.

<sup>19</sup>Nach anglen' bechogue' uvas da' žia yežlion' len hoz dan' noxen' na' botoben' bzalen' to lo' ša' xen ga yesesien' cont choj xisen'. Zeje diža', Diosen' botobe' bene' ca' bi bosozenag che' na' gwlo'e legaque' ga yesezaca'zi'e. <sup>20</sup>Na' gan' gosezaca'zi'en naquen cho'a ciudad', na' lo' ša' xen gan' gwlo'e uvasen' belalje chen zil da' nac xchengaque', bežinen ca sibe to xčhega' cabayw, na' bžiljon šone gayera mil metr.

**Angl ca' zjajo'o lo na'gaque' gaže yela' zi' da' zelao yesac**

**15** Na' ble'eda' yeto da' leca zaca' yebanecho le'e yaban'. Ble'eda' gaže angl bene' zjanac lo na'gaque' yesone' yegaže yela' zi' cont yeyož gwlo'e Diosen' can' chone' da' chloque' bene' ca' cheson da' xinj.

<sup>2</sup>Lecze ble'eda' to da' nac ca to nisdao' de vidrw da' nchixen yi'. Na' cho'a nisdao' zjazecha bene' ca' gosezoede' bi gosonxene' bežen' na' l gua'a lsaca' dan' nac ca leba', na' bi goso'e latje yosozoe' legaque' señw cheba' o número da' zejen laba'. Na' zjanoxe' tgüeje arpa da' bnežjw Diosen' legaque'. <sup>3</sup>Na' ble'eda' legaque' chesonxene' Diosen'

chesole' to da' bsede da' Moisésen' bene' Israel gualaž cheto' ca', Moisés ben' ben xšin Diosen' cani'. Lecze chesole' da' naquen to da' bsede Jesucriston' legaque', Jesucristw ben' zaca'lebde' ca xila' dao' be gosot bene' gualaž cheto' neche xtola'gaque'. Quinga žan:

Ḫanto' Dios, yogo' da' ba beno' len yela' guac xen chio' naquen da' güen juisyw na' da' zaca' yebanecho.

Yogo' da' chono' zejen to licha na' naquen da' zaca'.

Len' chnabi'o nación ca'.

<sup>4</sup>Nono zoa bene' bi cheyała' žebe' le' Ḫanto', da' chono' castigw che da' malen'.

Nono zoa bene' bi cheyała' gonxene' le'.

Tozo' le' naco' bene' laždao' xilaže' juisyw.

Na' bene' že' yogo' nación yeside' laguon' yesonxene' le', le ba besele'ede' da' ba beno' na' zjanezde' zejzen to licha.

<sup>5</sup>Gwde benda' da'na' nach gwna'a da' yoble na' ble'eda' byaljo gan' chesonxene' Diosen' yaban', latje gan' ngo'ošagüe' ley che Dios da' nyoj. <sup>6</sup>Na' ble'eda' gaž angl ca' zjajo'o lo na'gaque' yesone' gac gaž yela' zi' lo yežlion', besechoje' gan' chesonxene' Diosen' yaban'. Angl ca' zjanyaze' lache' šagüe' da' nac šiš xila' da' chactiten, na' to toe' nchej cho'alcho'e to bant de oro. <sup>7</sup>Na' ble'eda' bene' ca' tap zjažia xil ben' nita' lao Diosen', na' toe' bnežjue' angl ca' gažen' tgüeje tas de oro da' zjanža'ten da' zjajožen da' chon cont chac yela' zi' ca' lo yežlion', na' zejen Diosen' ben' zoa toli' tocanē

chlocchgüe' da' cheson bene' bi chosozenag che'. <sup>8</sup>Na' doxen gan' chesonxene' Diosen' yaban' gwche'chguan ca žen che be'ni' da' nsa' Diosen' na' che yela' guac xen che'. Nono goc šo' gan' chacxen Diosen' šlac bina' yeyož yesac yela' zi' ca' gaž da' zjanac lo na' gaž angl ca'.

Tas ca' gaže na' yela' zi' ca' gosac cate' bososcho'en

**16** Na' benda' gwne Diosen' zižjehgua, zoe' gan' chacxene', gože' angl ca' gaže: —Le šja'ac le šjalalj dan' yože lo' tas chelen' lo yežlion', da' zejen leca chloca' da' xinj cheson bene' ca' bi chosozenag chia', na' gona' ga yesezaca'zi'chgüe'.

<sup>2</sup>Nach angl nechon' gwyeje' jalalje' da' yože lo' tas chen' lo yežlion' gan' nac yo biž, na' yogo' bene' ca' zjazoa señw che bežen' na' chesonxene' l' gua'a lsaca' da' nac ca leba', gosebie' güe' xen güe' zban na' goselachgüe'.

<sup>3</sup>Nach angl gwchopen' jalalje' da' yože lo' tas chen' lo nisaon' na' nisaon' beyaquen chen ca chen che bene' guat, na' gosat yogo' be ca' že' lo' nisen'.

<sup>4</sup>Nach angl gwyonen' jalalje' dan' yože lo' tas chen' lo yegw ca' na' gate'ze chal nis na' lecze besyeyaquen chen. <sup>5</sup>Nach benda' gwne angl ben' chape' nisen' da' de lo yežlion', gože' Diosen':

—Ḫanto' Dios, len' naco' bene' laždao' xilaže' juisyw. Ba zoaczo' le' cate' za' xe yežlion'. Zejcz'o licha can' ba gwchoglaguo' chac da' quinga, <sup>6</sup>le bene' že' yežlion' ba gosote' bene' ca' gosote' xtižon' na'

gosote' nochle bene' gosac lo nao'.  
Da'nan' ba beno' cont yese'eje' chen  
neche da' bosolalje' xchen bene' ca'.  
Na' da' chac chegaque' naquen da'  
cheyala'cze gac.

<sup>7</sup>Nach benda' gwne to bene' do  
cho'a mes gan' bene' ca' že' yaban'  
chosozeye' bi da' chosozeye' cate'  
chesonxene' Diosen', gwne':

—Xanto' Dios, len' napo' la'zelagüe  
yela' guac xen, chono' con can' žo'  
gono', na' chono' da' zej to licha cate'  
chchogbi'o che bene'.

<sup>8</sup>Nach angl gwdapen' jalalje' dan'  
yože lo' tas chen' lo gwbižen', na'  
gwbižen' bzeyen benach. <sup>9</sup>Yogüe'  
leca goseye', perw bi besyetinjde'  
xtola'gaque' na' bi gosonxene'  
Diosen', con gosene' yela' ya' che  
Dios ben' be' latje goc da' ca'  
chesezaca'zi'e.

<sup>10</sup>Nach angl gayon' jalalje' dan'  
yože lo' tas chen' gan' chi' bežen'  
chnabia'ba' na' beyac chol' doxen  
gan' chnabia'ban'. Na' benachen'  
gosagwxetje lože'gaquen' catec  
gosesezaca'zi'e. <sup>11</sup>Na' gosene' yela'  
ya' che Dios ben' zoa yaban' neche  
dan' chesezaca'zi'en na' neche güe'  
xen dan' zjažia lo cuerp chegaquen',  
perw ne ca' bi besyetinjde' che da'  
mal dan' gosonen'.

<sup>12</sup>Nach angl gwxopen' jalalje' dan'  
yože lo' tas chen' lo yegw xen da'  
nzi' Eufrates, na' bebiž nis yegon'  
cont beyaquen to nez ga yesede  
bene' gwnabia' ca' za'ac do gan' chla'  
gwbiž.

<sup>13</sup>Nach ble'eda' šone da' xigüe' da'  
zjanac ca blož. Ton bchojen cho'a  
bel be zoa gaž yichj, yeton bchojen  
cho'a bež xigüen' na' yeton bchojen  
cho'a ben' cho'e diža' güenlaže'

cont chesonxene' bežen'. <sup>14</sup>Na' da'  
xigüe' quinga gosonen yela' guac da'  
besyebane bene', na' jasetoben yogo'  
bene' gwnabia' ca' že' gate'teze lo  
yežlion' cont yesedilene' Dios ben'  
nap la'zelagüe yela' guac xen cate'  
žin ža gac ca'. <sup>15</sup>Na' benda' ben' nac  
Xi'in Dios gwne':

—Le gwzenag da' nga: ba zoa yida'  
da' yoble, yedexenyala' bene' bi  
chosozenag chia' can' chzenyal bene'  
gwban ga chjalane'. Mbalaz zjazoa  
note'teze bene' nita'teze' chesebeze'  
neda' cate' yida' na' chesezaquede'  
bibi da' mal chesone', le yesacde' zto'  
še bina' yesyetinjde' xtola'gaquen'  
caten' yida', na' yogo'ze bene'  
yesacbe'ede' da' malen' ba gosonen'  
še ca'.

<sup>16</sup>Nach bezle'eda' da' xigüe'  
ca' šone bosyotoben yogo' bene'  
gwnabia' ca' že' lo' yežlion' to latje  
ga nzi' Armagedón diža' hebreo.

<sup>17</sup>Na' angl gažen' jalalje' dan' yože  
lo' tas chen' lo be', na' benda' gwne  
Diosen' zižje, gan' zoe' chesonxene'  
le' yaban' gan' lecze chi'e chnabi'e,  
gwne':

—Bač goc da' cheyala' gac.

<sup>18</sup>Nach gwyep yes, goc sšag,  
na' gošj gwtin, na' leca gwxo'.  
Gwxo'ch ca ba goc bate'tezechle  
šlac že' benachen' lo yežlion'. <sup>19</sup>Na'  
ciuda da' nac la'zelagüe blao lo  
yežlion' gwžiyayin' bchojen šonle,  
na' lecze gosebiayi' yezica'chle  
ciuda da' zjachi' lo yežlion'. Diosen'  
bich gwleze' bene' cont goseyi  
gosezaca'chgua bene' že' ciuda  
Babilonia che da' mal da' ba  
gosonteque', le blocchgüe' yela' mal  
chegaquen'. <sup>20</sup>Na' catequen' gwxo'  
besyenittecze yogo' yež da' zjachi'

lo' nisdawn' na' yogo' ya'a ca'. <sup>21</sup>Na' gwche'chgua yej ži'a lo yežlion', yej zi'i da' cha'a do tapa rob güeje beselažon' cože' bene'. Na' bene' že' yežlion' gosene' yela' ya' che Diosen' neče dan' besežaglaochgüe' len yej dan' gwchen'.

Diosen' be'e castigw che ciuda  
blao da' zaca'lebe ca to no'ole zle'

**17** Na' ca nac angl gaž ca' gosoxe' tas de oron', toe' bedenie' neda', gože'nda':  
—Da, gwlo'eda' le' can' gon Diosen' saca'zi' no'ole blaon' chi' lo nisdaw' ca', no'olen' nac no'ol zle'. <sup>2</sup>Yogo' bene' gwnabia' ca' že' yežlion' ba besyebede' bosozenague' che' gualaz che Diosen', na' da'nann' guac nacho zjanaque' xtoe'. Na' bene' že' yežlion' da' besyebchde' le' clel ca Diosen', guac nacho gosezožde' da' ba gose'eje' vino da' bnežjue' legaue'.

<sup>3</sup>Nach šlac ben Spiritw che Diosen' cont ble'edaogüeda' da' quinga, anglen' gwche'e neda' to latje daš. Na' bžina' na' ble'eda' to no'ole žia cože' bež xna be nac gaž yichjba' na' žia ši lozba'. Na' doxen cuerp cheban' noy diža' da' chžiaba' yela' ya' che Dios. <sup>4</sup>No'olen' nyaze' lache' da' nac moradw na' xna, na' non cuine' xdan len oro, len yej zaca' na' len perlas. Na' noxe' to tas de oro da' nža'ten yožen vino. Na' vinon' zejen chbede' chone' da' yela' zto' na' bichle da' chgue'e Dios. <sup>5</sup>Na' loxgue' noy diža' da' žan naquen' naque', diža' da' bi gosejni'i benach, žan: "Naca' ciuda Babilonia na' nacchgua' blao. Naca' no'ole zle', le chona' cont bene' že' yežlion' bi chesonxene'

Diosen', na' chgo'oyela' legaue' cont chesone' da' zan da' chgue'e Diosen'." <sup>6</sup>Na' ble'eda' chzože no'olen', le ba güe'eje' xchen bene' ca' zjanac lo na' Diosen', bene' goso'e diža' chesejnilaže' Jesúsenn', na' da' nacho güe'eje' xchengaque' zeje diža' betue' zane'. Na' cate' ble'eda' no'olen' leca bebanda'. <sup>7</sup>Nach gož anglen' neda':  
—Bi yebando'. Gwzejni'ida' le' bi zejen dan' ble'edo' no'olen' žie' cože' bež be gaž yichjen' na' žia ši lozba'. <sup>8</sup>Bežen' ble'edo' gwzoaba' gwnabia'ba' šlož na' bich zoaba' na'a, perw yechojba' lo' yechw zitjwchgua dan' nac lo gabilen' gan' yo'oba' na'a cont soaba' nabi'ba' yežlož, na' techle yeyo'oba' na' saca'zi'ba' toli tocane. Cate' gwxe yežlion' Diosen' bzoje' la bene' ca' zjanape' yela' mban toli tocane le'e libr chen'. Na' bene' ca' bi zjanyoj lagaque' le'e libr che Diosen' yesyebande' cate' yesele'ede' bežen' gwzoa, ben' bi zoa na'a perw soaba' da' yoble.

<sup>9</sup>Chyazjecho yela' sina' cont šejni'icho da' nga: da' gaž yichj bežen' zjanaquen gaž ya'a gan' chi' no'olen'. <sup>10</sup>Na' lecze zejen gaž bene' gwnabia'. Gayoe' ba gosenite' gosenabi'e na' ba gwnit yela' gwnabia' chegaquen'. Toe' chnabi'e na'a na' ben' yeto bene' bzeben' za' yedenabi'e, na' cate' yide', šložze yedenabi'e. <sup>11</sup>Na' bež ben' gwzoa cana' perw bich zoaba' na'a, zejen yeto bene' gwnabia', bene' xono'. Naque' to bene' ca' gaže gosenabi'e na' nabi'e da' yoble, perw Diosen' gone' cont cuiaye'e na' chi saque' toli tocane.

<sup>12</sup>Na' lozba' ca' ši dan' ble'edo', zejen ši bene' gwnabia' bene' za' za'ac

cont yesenabi'e. Na' gac lo na'gaque' yesenabi'e txen len bežen', perw šložze. <sup>13</sup>Na' yogo'te bene' ca' ši, toz ca yesone' yesegüe'e lo na' bežen' yela' gwnabia' chegaquen' na' bichle da' chac chesone' cont bežen' gacchba' blao. <sup>14</sup>Na' yesedillene' Jesucristw ben' zaca'lebde' ca xila' dao' ben' gosot bene' gualaž cheto' neche xtoła'gaque', na' Jesucriston' gone' gan lo gwdilen', le len' naque' Rey ben' chnabi'e yezica'chle rey, na' naque' Xancho ben' chnabi'e yezica'chle bene' gwnabia'. Na' bene' ca' yeson txen len Jesucriston' zjanaque' bene' ca' ba gwlej Diosen' cont zjanaque' xi'ine', bene' ca' nezde' yesenita'chache' yesejnilaže'ne' bite'teze da' gac.

<sup>15</sup>Nach anglen' gože' neda', gwne': —Nisdao' ca' ble'edo' gan' chi' no'ol zlen' zejen yesenita' bene' zan juisyw, bene' yež zan na' nación zan, bene' chesac gwde gwdele diža' da' de lo yežlion'. <sup>16</sup>Na' bežen' žia no'olen' cože'ban', ben' žia ši loz, gue'eba' no'olen' na' lecz ca' yeson lozba' ca' ši dan' zejen ši bene' gwnabia'. Na' yesaque' txen yesegue'e da' de che no'olen' na' yosyocua'ane'ne' ga'alyide'. Tena' yesagüe' xpelen' na' yosozeye' bi da' yega'an da' bi yesagüe'. <sup>17</sup>Le Diosen' güe'e latje yesaque' txen yesone' yogo' da' ca' na' bežen', na' yesone' yela' chnabia' chegaque' lo na' bežen' cont yeyož gac yogo' dan' ba gwna Diosen'. <sup>18</sup>Na' no'olen' bačh ble'edo', naque' ciuda blaochgua da' chnabian' bene' gwnabia' ca' že' doxen lo yežlion'.

**Can' gac cate' cuiayi'  
ciuda Babilonian'**

**18**

Gwdena' ble'eda' yeto angl bene' gwza' yaban' betje' lo

yežlion'. Goc lo ne'e yela' gwnabia' xen cont goc con can' gwne', na' gwyeni' lo yežlion' len be'ni' che' da' nse'e. <sup>2</sup>Na' anglen' gwne' zižje, gwne':

—Ba bžin ža cuiayi' ciuda Babilonian' da' nac leca ciuda blao. Ba bžin ža yeyaquen xišna' da' xigüe' ca'. Na' ba bžin ža yeyaquen xišna' yogo'cze be zoa xil be chesegue'e benačh. <sup>3</sup>Cuiayin', le bene' ca' že' ciudan' gosego'oyele' bene' že' yogo' nación cont bosozoe' Diosen' ca'ale bi gosonxene' le'. Na' bene' gwnabia' ca' že' yežlion' ba gosonchgüe' da' mal txen len bene' Babilonia ca' catequen' besyebede' gosone' da' yela' zto', na' bene' güen delgens ca' že' lo yežlion' ba gosaque' bene' gwni'a, le bene' Babilonia ca' gosonditjchgüede' dan' gota' chegaque' gosezi'en.

<sup>4</sup>Nach benda' gwne' yeto bene' zoa yaban', gwne':

—Le'e nacle xi'ina', le yechoj ciuda Babilonian' cont bi gonle da' mal txen len bene' ca' na' cont bi saca'zi'le txen len legaque', <sup>5</sup>le dechgua xtoła' bene' Babilonia ca', na' bich cues Diosen' gwnežjue' castigw chegaque'. <sup>6</sup>Yesezaca'zišque' lagüe dan' bosochi bososaque' bene', na' yesežaglaošque' da' xench ca dan' bosochi bososaque' bene' yoble. Gacšca chegaque' castigw gualech ca da' gosone' che bene'. <sup>7</sup>Con can' gota'chgua da' šagüe' da' güen chegaque' na' gosone' con bi da' žan chegaque', chnablaža' gacchgua chegaque' yela' yaše' yela' zi' cont yesyegüine'chgüede'. Bene' Babilonia ca' ba gosone' xbab lo' yichjlažda'ogaque' gosone': “Gwbat



te yela' chnabia' cheton'; gwbat soato yela' güine', neto' že'to' ciuda blao nga." <sup>8</sup>Da'nan' lo toze ža gac yogo' da' ca' gosacde' gwbat gac chegaque'. Bene' zan yesat, bene' zan yesegüine'de', na' yesebił yesedone', na' yeseye' len yi'. Gac ca' che bene' že' ciuda Babilonian', le Xancho Diosen' nape' yela' guac xen cont gone' yesezaca'zi'e neche xtolagaque'.

<sup>9</sup>Bene' gwnabia' ca' že' lo yežlion' bene' bosozenag che bene' Babilonia ca' cont bosozoe' Diosen' ca'ale na' gosone' bichle da' chgue'e Diosen', legaque' yesebeže' na' yesegüine'de' cate' yesele'ede' žen da' chas cate' šey ciudan'. <sup>10</sup>Na' yesyega'ane' zito'le yesene'e can' gac che bene' Babilonia ca', le yesežebchgüe'. Na' yesene':

—iNyaše'chgua chac che ciuda Babilonia nga da' nac blaoch ca yogo' ciuda! Ba chbiayi' ciuda da' gwnabia'ch lo yezica'chle ciuda da' zjachi' yežlion'. Ba bžin ža cuiayin' to š'i'ize.

<sup>11</sup>Nach bene' güen delgens ca' že' yežlion' yesebeže' na' yesegüine'de' cate' cuiayi' ciudan', le noch no si' dan' yesoten'. <sup>12</sup>Nono žel bene' si' da' yesote' da' nac de oro, de plata, de yej zaca', na' de perlas. Nono žel bene' si' lache' la'ay da' chesote' de lino, de sed, na' lache' moradw na' lache' xna. Nono žel bene' si' da' yesote' da' nac de yag da' chla' zix o de bichle yag zaque', de marfil, de ya na' de mármol. <sup>13</sup>Nono žel bene' si' canel, no set zix, no yal, no mirra, no perfume, no vino, no set yela' guagw, no yezj šiš, no trigw, no burr bžina', no xila', no cabayw,

no carret, na' no beñač bene' yesote' ca beyixe'. <sup>14</sup>Na' bene' güen delgens ca' yesene' che ciudan':

—Ba gwde che yogo' da' zix ca' na' yogo' bichle da' ca' gosazlaže' bene' Babilonia ca' yesezi'e lo yela' gwñi'a chegaquen'. Gwbatech yesezi'e da' ca'.

<sup>15</sup>Na' bene' güen delgens ca' bene' gosote' da' ca' gosezi' bene' Babilonian', ben' gosata' yela' gwñi'a chegaque' neche bene' Babilonia ca', yeseze' zito'le yesežebchgüe' che dan' chesežaglae bene' Babilonian'. Na' yesebeže' na' yesegüine'de', <sup>16</sup>na' zižje yesene':

—iNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion! Bene' gwže' ciudan' gosazchgüe' lache' šagüe' lache' zaque', no lache' moradw na' no lache' xna. Gosonchgua cuingaque' xdan len oro, len yej zaca' da' chesactiten, na' len perlas. <sup>17</sup>Perw na'a zejzenez gwžiai' yogo' da' šagüe' chegaquen'.

Yogo' xan barcw ca', yogo' bene' ca' chja'ac lo' barcw ca', len bene' ca' cheson žin lo' barcon' na' nochle bene' cheson žin lo' nisaon', yogüe' yeseze zito'le yesene'e. <sup>18</sup>Na' yesele'ede' chas žen cate' šey ciudan' na' yesene':

—Bina' gata' yeto ciuda yoble doxen lo yežlion' da' žinlaže' ca ciuda nga len yela' gwñi'a yela' šagüe' čhen.

<sup>19</sup>Na' yosožia yo bište yichjgaque' da' yesyegüine'de', na' yesebežyaše', yesene':

—iNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion! Neche yela'

gwñi'a che bene' ca' gwže' lo ciudan'  
yogo' chio' bencho gan xen len  
žin da' bencho len barcw checho  
quina. Na' ña'a zejzenez gwžiai'  
ciudan'.

<sup>20</sup>Perw le'e že'le yaban', le yebe.

Le'e gwseļa' Diosen' gogle postlw  
che', na' le'e gwseļa' be'le xtižen', na'  
yezica'chle le'e zoale lo na' Diosen',  
le yebe. Le Diosen' ba gwčhoglagüe'  
yesebiayi' bene' Babilonia ca' neche  
dan' bosochi bososaque' le'e.

<sup>21</sup>Nach to angl gual bcose' to yej  
xen ca dan' chon žin gan' chi' molin  
xen, na' bzalen' lo' nisaon', gwne':

—Can' gac che ciuda Babilonian',  
yeniten can' benit yej xen dan' bzala'  
lo' nisaon', na' gwbatech le'echon  
da' yoble. <sup>22</sup>Gwbatech yosogole'  
arpa lo ciudan'; gwbatech yosocuež  
güecuež ca' no flauta no trompeta.  
Gwbatech žel bene' zjansed cont  
yese' no xšinłaze' da' chosočhine',  
neca yenecho sšag che bene' chesot  
len molin lo ciudan'. <sup>23</sup>Gwbatech  
le'echo be'ni' che lámpara, na'  
gwbatech yenecho bene' cheson  
łni che yela' güešagna'. Yesebiayi'  
bene' güen delgens che ciudan' bene'  
zjanac bene' blao lo yežlion', le bene'  
Babilonia ca' ba goseziye'e bene'  
že' yogo' nación len yela' güaža'  
chegaquen'.

<sup>24</sup>Bene' Babilonia ca' gosote' bene'  
goso'e xtiža' Diosen' na' nochle bene'  
gwlej Diosen' cont gosaque' lo ne'e,  
na' bene' ciuda nan' zjanape' dolā'  
che yela' got che yezica'chle bene'  
gosot bene' doxen lo yežlion'.

**19** Gwdena' benda' bene' zan  
juisyw bene' že' yaban'  
chesonxene' Diosen', na' nen žižje,  
chesene':

Bene' güen juisyw nac Dios  
chechon'.

Ba bene' cont chio'

chejnilaže'chone' zoacho len le'.

Naque' bene' zaca' juisyw, na'  
nape' yela' guac xen.

<sup>2</sup>Zejcze' to licha na' chone'  
can' cheyala'cze gac dan'  
chčhoglagüe' yesezaca'zi' bene'  
bi chosozenag che'.

Ba gwčhoglagüe' cuiayi' ciuda xen  
da' zaca'lebe ca to no'ole zle',

le bene' lo ciudan' gosego'oyeļe'  
bene' že' doxen lo yežlion'  
cont bosozoe' Diosen' ca'ale bi  
gосonxene' le'.

Diosen' ba gwčhoglagüe' cuiayi'  
laž bene' Babilonia ca',  
le cheyala'cze yesezaca'zi'e da'  
gosote' bene' ca' gosonxen le'.

<sup>3</sup>Nach da' yoble gosene':

—Bene' güen juisyw nac Diosen'.

Toļi tocanē chas žen gan' šey ciudan'.

<sup>4</sup>Nach bene' blao ca' tapechoa na'  
bene' ca' tap bene' žia xil jasechaze'  
cosčo'ale lo yon' gosonxene' Diosen'  
gan' chi'e chnabi'e, gosene':

—Can' cheyala' gac. Bene' güen  
juisyw nac Diosen'.

<sup>5</sup>Na' benda' gwñe to bene' do gan'  
chi' Diosen' chnabi'e, gwne':

Yogo' chio' naccho bene' güen xšin  
Diosen' cheyala' gonxenchone',  
chio' chzenagcho che', chio'  
naccho bene' gole na' chio'  
naccho bene' xcuide' na' bi'  
bixjw.

Yela' güešagna' che ben'  
zaca'lebde' ca xila' daon' gosot  
bene' Israel neche xtoļa'gaque'

<sup>6</sup>Nach benda' be xñe che bene'  
zan juisyw chesonxene' Diosen'. Na'

xtiža'gaquen' nenen ca chac ga chziž  
yegon' cate' dechguan na' ca nen  
cate' leca chašjw chtin, chesene':

iBeñe' güen juisyw Xancho  
Diosen'!

Leñ' nape' la'zelagüe yela' guac  
xen na' len' chnabi'e.

<sup>7</sup> Chebechgüecho na' zoachguacho  
mbalaz chonxenchone'.

Le ba bžin ža gac yela' güešagna'  
che ben' zaca'lebde' ca xila'  
dao' be gosot beñe' Israel  
neche xtoła'gaque'.

Ba zoa no'olen' si'e gac xo'ole'.

<sup>8</sup> Ba bnežjue'ne' lache' šagüe' da'  
nyaze', lache' šiš xila' juisyw.  
Na' lache' šagüe' da' šiš xila' nyaze'  
zejen da' güen da' chon chio' ba  
gwlej Diosen' cont naccho lo ne'e.

<sup>9</sup> Nach anglen' da' yoble gože'nda':  
—Bzoy da' nga: “Mbalaz beñe' ca'  
ba goxe' cont yesenite' cate' gac  
lñi che yela' güešagna' che ben'  
zaca'lebde' ca xila' dao' be gosot  
beñe' Israel neche xtoła'gaquen'.”

Nach anglen' gwne':

—Diosen' gože' neda' dan' ba  
gwnia', na' naquen da' li.

<sup>10</sup> Nach bzoa xiba' cont gonxena'  
anglen', perw anglen' bi beñe' latje,  
gwne':

—Bi gono' ca'. Neda' naca' con  
to beñe' güen xšin Diosen' can'  
naco' le' na' beñe' lježo' ca' beñe' bi  
chesebejyichje' xtiža' Jesús'en' da'  
chesejle'e. Benxen Diosen'.

Na' note'teze beñe' cheso'e diža' li  
che Jesús'en', zoa Spiritw che Diosen'  
chzejni'in legaque' cont cheso'e xtižen'.

**Beñe' žia cože' cabayw šiš**

<sup>11</sup> Nach ble'eda' yaban' ca to da'  
nyaljo, na' ble'eda' to cabayw šiš

na' žia to beñe' cože'ba'. Na' ben'  
žia cože'ban' zjansi'ene' Ben' Chon  
Con Can' Že' na' Cho'e Diža' Li.  
Zejcze' to licha can' chchoglagüe'  
saca'zi' beñe' bi chosozenag che'  
na' can' chdillene' da' malen'. <sup>12</sup> Na'  
ble'eda' yejlagüe' ca' chesactiten  
ca to yi' da' čala'nin, na' zjazoa  
zan corona yichje'. Na' ble'eda' nyoj  
yeto le' loxguen' da' nombia' toze  
le'. <sup>13</sup> Ble'eda' nyaze' to lache' da'  
dope chen, na' le' Xtiža' Dios. <sup>14</sup> Na'  
ble'eda' beñe' zan beñe' zjanac  
soldadw che Diosen' zjana'ogüe'ne',  
zjanyaze' lache' šagüe' da' nac da'  
šiš na' da' naquen xilaže', na' to to  
beñe' ca' zjažie' tgüeje cabayw šiš.  
<sup>15</sup> Cho'a ben' le' Xtiža' Dios chchoj  
to spada da' nłachgua da' gwchine'  
chine' nación ca' bi chosozenag  
che'. Le nabi'e nación ca' na' žan  
ca žan yosozenague' che'. Na' gone'  
yesezaca'zi'chgua beñe' ba goson da'  
malen', le Dios ben' nap la'zelagüe  
yela' guac xen chlocchgüe' can' ba  
gosonen'. <sup>16</sup> Na' le'e xcamise' na'  
le'e xichje' nyoj diža' quinga žan:  
“Naca' Rey ben' chnabia' yezica'chle  
rey na' naca' Xan yezica'chle beñe'  
gwnabia'.”

<sup>17</sup> Nach ble'eda' to angl beñe'  
zecha lo gwbižen', na' bosye'e bol  
güiže' yogo' cuen šod ca' chesaš le'e  
yaban', gože'ba':

—Le da, le yedobe nga gagwle  
to xše' xen da' gon Diosen' gagwle.

<sup>18</sup> Gata' xpela' beñe' gwnabia', xpela'  
xan soldadw, xpela' no beñe' gual.  
Gata' xpela' cabayw na' xpela' beñe'  
gosebie'ba'. Gata' xpela' yogo' cuen  
beñe', beñe' gosac esclavos na' beñe'  
bi gosac esclavos, beñe' gosac beñe'  
xcuide' na' beñe' gosac beñe' gole.

<sup>19</sup>Nach ble'eda' bež xigüe' nechon' len yogo' bene' gwnabia' ca' že' yežlion' na' soldadw čhegaque' ca'. Ba besedobe' txen cont yesedillene' Jesús ben' žia čože' cabayw šišen' len soldadw che' ca'. <sup>20</sup>Na' bež nechon' gocba' lo na' Jesúsen'. Na' lecze ca' goc che bež xigüe' gwchope ben' choe' diža' güenlaže' na' bamba' yela' guac cont benačhen' bosozenague' che bež nechon', cont gosonxene' l gua'a lsaca' cheba' na' cont gosezoe' señw cheba'. Chopteba' gosacba' lo na' Jesúsen', na' ca' zjambamba' bosozale'ba' lo' yi' gabil gan' čala'nin azufre, yi' xen da' nac ca to nisdao'. <sup>21</sup>Nach bene' ca' yezica'chle, Jesúsen' ben' žia čože' cabayw šišen' betue' legaque' len spada da' chchoj cho'en', na' yogo' šod ca' gosagwxatba' xpela'gaquen'.

### Can' gac lo to mil iz

**20** Na' ble'eda' to angl bene' zoa yaban' betje' cont gwsaljue' yechw zitjwchgua dan' nac lo gabilen', na' noxe' to gden xen. <sup>2</sup>Na' anglen' bežoe' bel ben' zoa gaž yichj, be bla' da' nechw ža gwlaste. Leba' chnabia'ba' da' xigüe' ca' na' leba' Satanás. Anglen' bčeje'ba' gdenna' to mil iz. <sup>3</sup>Nach beyož bčeje'ba', na' bzale'ba' lo' yechw gabilen' na' la' bseyjwte' cho'a yechon' na' bchišen' to seyw. Bene' ca' cont bich siye'ba' benač šlac bina' te to mil iz. Na' cate' ba gwde to mil izen', cana'ch yeseže'ba' gdenna' cont yechojba' yešlož dao'.

<sup>4</sup>Nach ble'eda' bene' ca' gwlo'o Diosen' lo na'gaque' gosone' yela' justis che benač zjachi'e gan' chesenabi'e. Na' lecze ble'eda' bene'

bi gosonxene' bež xigüen' len l gua'a lsaca' cheba' neca goso'e latje yosozoe' señw cheba' loxgagaque' o taca'gaque'. Gosenita'čhache' goso'e diža' chesejnilaže' Jesúsen' na' goseyixjue'ede' xtiža' Diosen'. Da'nana' bene' ca' besegue'ede' Diosen' gosote' legaque' gosechogue' yengaque'. Perw Diosen' bene' cont besyebane' ladjo bene' guat ca', na' txen len Criston' gosenabi'e to mil iz. <sup>5</sup>Cate'ch ba goc to mil iz besyeban bene' ca' gosenita'čhach gosejnilaže' Criston', ben' gosac bene' nechw besyebane' ladjo bene' guat ca', cana'ch yosbane' yezica'chle bene' guat. <sup>6</sup>Mbalaz nita' bene' ca' belis bosbane' ladjo bene' guat ca' da' nechw, bene' ba gwlej Diosen' cont zjanaque' lo ne'e. Bi yesac čhegaque' can' gac che bene' ca' yesežaglagüe' neche xto'la'gaque' toli tocanē, da'nana' žacho yela' got gwchope. San yesenite' yesonxene' Diosen' na' yesonxene' Criston', na' da'nana' guac načo yesaque' bžox. Legaque' yesenabi'e len Criston' to mil iz.

<sup>7</sup>Na' cate' ba goc to mil izen', Diosen' güe'e latje yechoj Satanás dan' chnabia' da' xigüe' ca' lo' yechw zitjwchgua dan' nac lo gabil gan' bseyjuen'. <sup>8</sup>Na' yechojen na' da' yoble siyen' bene' že' yogo' nación ca' že' lo yežlion'. Na' siyen' bene' ca' zjanzl' Gog na' Magog, gwtoben' legaque' cont yesedillene' Criston', na' yesaque' bene' zan juisyw ca' yox da' chi' cho'a nisdao' da' nono chac gwlab. <sup>9</sup>Nach ble'edagüe'da' bene' zan juisyw ca', gosa'aque' doxen lo yežlion', ja'aque' gan' chi' ciuda dan' chaque Diosen' gan' že' bene'

ca' gwleje' cont zjanaque' lo ne'e.  
 Na' cate' gosechje' ciudan', Diosen'  
 bene' cont bchoj yi' le'e yaban'  
 bzeytecczen legaque'. <sup>10</sup>Na' ca nac  
 Satanás dan' gwziye' bene' ca' že'  
 yežlion', angl che Diosen' bosozalen'  
 lo yi' gabil gan' čala' azufre, yi'  
 xen da' nac ca to nisdao' gan' ba  
 bosozale' bež xigüe' nechon' na'  
 bež xigüe' gwchopen' ben' be' diža'  
 güenlaže' cont gosonxen benachen'  
 bež nechon'. Na' yesežaglaon do ža  
 do yel toli tocanē.

**Goc yela' justis che bene' ca' ba gosat**

<sup>11</sup>Nach ble'eda' chi' Diosen' to  
 lo siy xen da' nac da' šiš, či'e  
 chnabi'e. Na' chnatie' yežlion' len  
 da' ca' chle'echo le'e yaban' na'  
 besyeniten, noch no besele'e len,  
 na' gach ga gosac xišne'en ga yoble.  
<sup>12</sup>Na' ble'eda' bene' ba gosat, bene'  
 gole len bene' xcuide' len bi' bixjw,  
 zjazeche' lao Diosen'. Nach Diosen'  
 bzaše' libr ca' gan' zjanyoj yogo'lol  
 da' goson to toe'. Na' gwdena' bzaše'  
 libr gan' zjanyoj la bene' ca' zjanape'  
 yela' mban toli tocanē. Na' bene'  
 yela' justis čhegaque' con ca gosone'  
 šlac gosebane', le yogo' da' gosone'  
 zjanyojen le'e libr ca'. <sup>13</sup>Yogo'  
 bene' gosat lo' nisdao' besyechoje'  
 zjazeche' lao Diosen', na' yogo' bene'  
 gosat ga yoble lecze besyechoje'  
 zjazeche' lagüe' cont bene' yela'  
 justis che to toe' con ca gosone' šlac  
 gosebane'. <sup>14-15</sup>Nach Diosen' bcueze'  
 yela' goten' nombia'cho, na' bene'  
 cont noch no gwže' latje che bene'  
 guat ca' na' bnitlagüen'. Na' bene' bi  
 bosozenag che Dios, yogo' bene' bi  
 nyoj lagaque' le'e libr gan' nyoj la  
 bene' zjanap yela' mban toli tocanē,

bosozale' legaque' lo yi' gabil da' nac  
 da' xen ca to nisdao'. Na' dan' goc  
 čhegaque', lenna' yela' got gwchope  
 čhegaque'.

**Yežlion' na' le'e yaban'  
 besyeyaquen da' cobe**

**21** Gwdena' ble'eda' le'e yaban'  
 ba beyaquen da' cobe  
 na' lecze ca' yežlion', le yaba dan'  
 goc da' nechw na' yežlio nechua'  
 besyeniten. Na' lecze bich gota'  
 nisdao'. <sup>2</sup>Neda' Juan ble'eda' ciuda  
 che Diosen', ciuda Jerusalén cobe  
 da' chi' yaban' gan' zoa Diosen',  
 betjen lo yežlion'. Ba nonen' xdan ca  
 to no'ole bene' ba bpa'a cuine' cont  
 naque' xdan cate' gwšagne'e. <sup>3</sup>Na'  
 do gan' chi' Diosen' chnabi'e benda'  
 gwne to bene' zižje, gwne:  
 —Gwnašc, Diosen' ba betje'  
 zotalene' benač. Soateze' len  
 legaque', le gwleje' legaque' cont  
 zjanaque' yež che', na' yesonxene'ne'.  
<sup>4</sup>Na' Diosen' gone' cont bich gac da'  
 yesyeyaše'laže'de', da' yesyegüine'de'  
 o da' yesebeže' čhen. Nono gat,  
 nono šey la, le ba gwde che yogo'  
 da' ca' gota' lo yežlio nechon'.

<sup>5</sup>Nach Dios ben' chi' chnabi'e  
 gwne:

—Da' li ba chocoba' yogo'lol da' de.  
 Lecze gwne:

—Bzoi diža' li na' gac can' gwnian'.

<sup>6</sup>Nach gože' neda':

—Bač goc da' cheyała' gac. Neda'  
 naca' ben' ben yežlion' len yogo'  
 bichle da' de, na' naca' ben' gon cont  
 te čhen. Da'nan' zaca'lebda' ca letr  
 nechw da' nzi' A na' letr bzebe da'  
 nzi' Z. Note'teze bene' chaclaže' si'e  
 da' gwnežjua'ne', gwnežjua'ne' yela'

mban toli tocane da' zaca'lebe ca nis ya'a da' che'ejcho cate' chbilecho, na' bi sia' laxjuen. <sup>7</sup>Na' bene' chesejnilaže' neda', še ba gosezoede' bi yesebejyichje' xtižan', gac chegaque' yogo' da' šagüe' da' ba bia' diža' chen, na' yesonxene' neda', na' gwlo'a zjanaque' xi'ina'. <sup>8</sup>Perw ca nac bene' ca' chesežeb yosozenague' chia', bene' bi chesejnilaže' neda', bene' cheson da' ca' chgue'eda', bene' chesot ljež benache', bene' cheson da' nac da' yela' zto' len cuerp chegaque', bene' cheson txen len bite'teze yela' guaža', bene' chesejnilaže' l gua'a lsaca', na' yogo' bene' cheso'e diža' güenlaže', yogo' bene' ca' yesezaca'zi'e toli tocane lo yi' xen da' nac ca to nisdao', yi' gabil gan' chala' azufren'. Na' da' gac chegaquen', lenna' žacho yela' got gwchope.

#### Ciuda Jerusalén da' nac da' cobe

<sup>9</sup>Na' bezle'eda' to angl gažen' ben' gosoxe' tas ca' gaže dan' zjanža'te da' zjajožen da' bosolalje' cont gosac yela' zi' ca' la'zelagüe lo yežlion'.

Gwbigue' gan' zoan' na' gože' neda':

—Da len neda' cont gwlo'eda' le' bene' ca' zjazaca'lebbe' ca to no'ole za' gwšagna'. Na' Jesucristw ben' zaca'lebbe' ca xila' dao' ben' gosot bene' Israel neche xtolagaque', guac nacho le' si'e no'olen'.

<sup>10</sup>Nach Spiritw che Diosen' benen cont gwy'a'alena' anglen' to lo ya'a xen da' nac sibe, na' blo'ede' neda' ciuda Jerusalén da' nac ciuda che Dios. Ble'eda' gwzoan yaba gan' zoa Diosen' na' chetjen lo yežlion'.

<sup>11</sup>Na' ciudan' goctitchguan len be'ni' da' nsa' Diosen', na' ble'eda'

chactiten ca to yej da' zaca'chgua, ca yej da' nzi' jaspe da' chle'echo ca vidrw. <sup>12</sup>To ze'e xen da' nac sibe nyechjen ciudan', na' nita' šižinw puert chen, na' to to cho'a puerten' zecha tgüeje angl. Na' le'e puert ca' zjanyoj la šižinw bene' ca' bosoxie' šižinw cuen diaža che neto' nacto' bene' Israel. <sup>13</sup>Na' le'e ze'e dan' zoa šla'a ciudan' gan' chla' gwbiž nita' šone puert, na' šla'a gan' chxo'a gwbiž yešonen, na' šla'a zej yichjelen yešonen, na' šla'a zej xanelen yešonen. <sup>14</sup>Na' ze'e dan' nyechje ciudan', lenenna' naquen de šižinw yej xen, na' zjanyoj le'e yej ca' la šižinw neto' nacto' postlw che Jesucristw ben' zaca'lebbe' ca xila' dao' ben' gosot bene' gualaž cheto' neche xtolagaquen'.

<sup>15</sup>Na' angl ben' be'len neda' diža' noxe' to ya da' nac de oro da' bchine' gwxi'e medidw ciudan', che ze'e chen na' che puert ca'. <sup>16</sup>Ciudan' naquen da' cuadradw, toze ca naquen zlaga' len ton. Anglen' bchixe' ciudan' len ya chen' na' goquen chope mil chope gayoa kilómetros to to šla'an, ca'te' ndonen, ca'te' zlagan' na' ca'te' siben'. <sup>17</sup>Nach bchixe' ze'e dan' nyechj ciudan' na' goquen gayontap metr yela' sib chen, metr da' nombia' benach, le lenna' bchin anglen' gwxi'e medidon'.

<sup>18</sup>Ze'e da' nyechj ciudan' naquen de yej da' zaca' da' nzi' jaspe, na' doxen ciudan' naquen de oro na' nlan' ca to vidrw da' nac xilaže'.

<sup>19</sup>Na' ze'e da' nyechj ciudan', zjanone' lenen xdan len yogo' cuen yej da' zaca' da' de da' zjanac beya color na' chesactiten. Da' nechon'

naquen de jaspe; da' gwchope de zafiro; da' gwyone de ágata; da' gw dape de esmeralda; <sup>20</sup>da' gayo' de ónice; da' gw xope de cornalina; da' gaže de crisólito; da' xono' de berilo; da' ga de topacio; da' ši de crisoprasa; da' šnej de jacinto; na' da' šižinw de amatista. <sup>21</sup>Na' puert ca' šižinw zjanaquen šižinw perlas, to ton zjanonen' de toze perla. Na' nez yo da' de lo ciudan' naquen de oro na' zjanlan' ca vidrw da' nac xilaže'.

<sup>22</sup>Bibi yodao' ble'eda' lo ciudan', le bene' ca' že' ciudan' zjanite' lao Xancho Dios ben' nap la'zelagüe yela' guac xen na' lao Jesucristw ben' zaca'lebde' ca xila' dao' ben' gosot bene' gualaž cheto' neche xtoła'gaque'. Legaque' chesonxen bene' lo ciudan'. <sup>23</sup>Bene' ca' že' ciudan' bi cheseyažjde' gwbižen' ne bion' yososenin' lo ciudan', le be'ni' da' nyechj Diosen' chsenin' len legaque' na' lecz ca' be'ni' da' nsa' Jesucriston'. <sup>24</sup>Na' be'ni' che Diosen' gwseñin' len bene' za'ac yogo' nación bene' chesejnilaže' Diosen', na' bene' gwnabia' ca' že' yežlion' yesonxene' Diosen' yosonežjue'ne' bi da' zaca' da' šagüe' da' de chegaque', len no yela' bala'an da' de chegaque'. <sup>25</sup>Bitw šeyjw puert ca' zjanita' ciudan' lagüe' ža, na' gwbat gac šeže'le. <sup>26</sup>Can' ba gwnia', yela' zaca' yela' xdan da' zjade yogo' nación len yela' bala'an da' zjade che bene' gwnabia' che nación ca', yosonežjue' Diosen' lo ciudan'. <sup>27</sup>Lo ciudan' gwbat gac šo' bene' chon da' zban. Bi gac šo' bene' chon bite'tez da' chgue'e Diosen' o bene' choe' diža' güenlaže'. Con bene' zjanyoj

lagaque' le'e libr che Jesucriston' gan' zjanyoj la bene' zjanape' yela' mban toli tocanē, legacze' gac yeso'e na'.

**22** Nach anglen' blo'ede' neda' yegw gan' yože nis da' chnežjon benachen' yela' mban toli tocanē. Nisen' nacten ca vidrw le nyadichguan. Yegwna' chchojen do gan' chi' Diosen' chnabi'e txen len Jesucriston' ben' zaca'lebde' ca xila' dao' ben' gosot bene' gualaž cheto' neche xtoła'gaquen'. <sup>2</sup>Na' gachol nez yo xen che ciudan' na' chop la'a cho'a yegon' ze yag da' chnežjon benachen' yela' mban toli tocanē. Na' yogo' bio' chesebian frut, šižinw n'a chesebian lao tğüiz, na' bene' nación ca' yosochine' xlaguenna' ca rmed cont yesenite' güen. <sup>3</sup>Gwbat gata' bi da' chgue'e Diosen' lo ciudan', le ciudan' cui'e nabi'e txen len Jesucristw ben' zaca'lebde' ca xila' dao' ben' gosot bene' gualaž cheto' neche xtoła'gaque', na' yogo' bene' že' ciudan' yesonxene' le'. <sup>4</sup>Yesenite' yesele'ede' cho'alao Diosen', na' yoj la Diosen' loxgagaque'. <sup>5</sup>Gwbatech gac šeže'le lo ciudan'. Na' bene' že' lo ciudan' bi yeseyažjde' be'ni' che no lámpara o che gwbiž, le be'ni' da' nyechj Xancho Diosen' gwseñin' len legaque'. Na' yesenabi'e len le' toli tocanē.

**Ba zoa yid Jesucriston' da' yoble**

<sup>6</sup>Nach anglen' gože' neda':  
—Yogo' diža' quinga ba bendo' zjanaquen da' li na' gac con can' ba gwnato'. Xancho Diosen' chbeje' bene' cheso'e xtižen' na' chzejni'ide' legaque' bin' yesene', na' len' ba



gwsele' neda' chzejni'ida' le' len  
bene' lježo' ca' chesonxene' Diosen'  
cont gacbe'ele da' ca' za' gac.

<sup>7</sup>Nach gwna Jesúsen':

—Da' li ba zoa yida' da' yoble. Na'  
mbalaz bene' chosozenag che da' ca'  
ba bzojo' le'e libr chio' choen' diža'  
che da' ca' za' gac.

<sup>8</sup>Neda' Juan benda' na' ble'eda'  
da' quinga ba bzoja' nga, na' beyož  
bendan' na' ble'edan' jazoa xiba'  
xni'a angl ben' blo'e neda' da' ca',  
godca' gonxena'ne'. <sup>9</sup>Perw anglen' bi  
bene' latje, gwne':

—Bi gono' ca', le naca' con to bene'  
güen xšin Diosen' can' naco' le', can'  
zjanac bene' lježo' ca' ba gwleje'  
cheso'e xtižen', na' can' zjanac yogo'  
bene' yosozenag che da' ca' ba bzojo'  
le'e libr chion'. San benxen Dios.

<sup>10</sup>Lecze gože' neda':

—Bi gwcuša' diža' ca' ba bzojo', le  
ba zoa gac da' ca' bzojon'. <sup>11</sup>Na' bene'  
cheson da' mal, yesonchcze' da'  
malen' chesonen'. Na' bene' cheson  
da' yela' zto', yesonchcze' da' yela'  
zton' chesonen'. Na' bene' cheson da'  
chazlaže' Diosen', yesonchcze' da'  
güenna' dan' chesonen'. Na' bene' ba  
gwlej Diosen' cont zjanaque' lo ne'e,  
lo ne'en yesyega'ancze'.

<sup>12</sup>Nach Jesúsen' gozne':

—Da' li ba zoa yida' da' yoble,  
na' yedeyena' gac güen che to to  
benach o saca'zi'e con can' ba ben to  
toe'. <sup>13</sup>Neda' naca' ben' ben yežlion'  
len yogo' bichle da' de, na' naca' ben'  
gon cont te chen. Da'n'an' zaca'lebda'  
ca letr nechw da' nzi' A na' letr  
bzebe da' nzi' Z. Ba zoa' cate' gwxe  
yežlion' na' soacza' cate' te chen.

<sup>14</sup>Mbalaz bene' ca' nita'teze'  
chesenabe' yeca'a xtola'gaque'

cont yesaque' txen len bene' ca'  
ba ble'edo' ben' ba besyeyach  
xalana'gaque'. Legaque' gac  
yesagüe' frut dan' chbia yag yela'  
mban toli tocane, na' gac yeso'e  
cho'a puert che ciudan'. <sup>15</sup>Perw  
ca nac bene' ca' cheson da' nac da'  
zban, bene' ca' cheson txen len no  
yela' guaža', bene' cheson da' nac  
da' yela' zto' len cuerp chegaque',  
bene' chesot ljež benache', bene'  
chesejnilaže' l' gua'a lsaca' o bi  
da' ca' ben Diosen', na' yogo' bene'  
cheso'e diža' güenlaže' o chesyebede'  
chosozenague' dan' zjanac ca', yogo'  
bene' ca' bi gac yeso'e lo ciuda  
chian'.

<sup>16</sup>—Neda' Jesús ba gwsela' angl  
chian' cont ba bzende' le' yogo'  
da' ca' ba bzojon'. Na' cheyala'  
gwnežjon' bene' ca' chesedop  
chesežag chesonxene' neda'. Neda'  
naca' xi'in diaža che da' rey David  
na' naca' ben' gwsela' Diosen'  
yežlion' lo diaža che'. Na' zaca'leba'  
ca beljw xsil.

<sup>17</sup>Spiritw che Diosen' na' lecze  
ca' chio' chonxench Jesúsen'  
chnablaže'cho yob yidšca Jesúsen'  
da' yoble, chio' zaca'lebcho ca to  
no'ole si'e. Na' yogo' bene' yesene  
diža' quinga lecze yesenablaže'sšque'  
yide' da' yoble.

Na' note'teze bene' chaclaže' si'e  
da' gwnežjw Jesúsen' le', cheyala'  
yedenaben', na' gwnežjue'ne' yela'  
mban toli tocane da' zaca'lebe ca  
nis ya'a da' che'ejcho cate' chbilecho,  
na' bi si'e laxjuen.

<sup>18</sup>Na' chosnida' le'e chzenagle  
can' ža libr nga che da' ca' za' gac,  
note'tezle še gwzanchle ca dan' ža  
libr nga, Diosen' gone' gac chele

yogo' yela' zi' dan' zjanyoj le'e libr  
nga. <sup>19</sup>Na' note'tezle še žale bi gac  
yogo' da' qui zjanyoj le'e libr nga,  
Diosen' yoxie' lale le'e libr chen' gan'  
nyoj la bene' ca' zjanape' yela' mban  
toli tocane na' gone' cont bi gac  
šo'le lo ciuda chen', neca gac chele  
yogo' da' güen da' zjanyoj le'e libr  
nga.

<sup>20</sup>Nach Jesús, ben' bzejni'ide' neda'  
yogo' da' ca' ba bzoja', že':

—Da' li ba zoa yida' da' yoble.

Na' neda' chapa'ne':

—Ca' gacšca. Yob yidšco', Xana'  
Jesús.

<sup>21</sup>Xancho Jesucriston' soacze'  
gaclenšcacze' yogo'le. Da' na'zen'  
chzoja'.